


In yencuic iyectlajtoltzin Dios itech ica toTeco

Jesucristo



New Testament in Nahuatl, Guerrero (MX:ngu:Nahuatl,
Guerrero)

**In yencuic iyectlajtoltzin Dios itech ica toTeco Jesucristo
New Testament in Nahuatl, Guerrero (MX:ngu:Nahuatl, Guerrero)**

copyright © 1987 Wycliffe Bible Translators, Inc.

Language: Nahuatl, Guerrero

Translation by: Wycliffe Bible Translators, Inc.

Náhuatl, Guerrero [ngu], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nahuatl, Guerrero

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
f85e296d-89bd-5d7f-b7c2-328bd8e643b1

Contents

SAN MATEO	1
SAN MARCOS	72
SAN LUCAS	115
SAN JUAN	187
LOS HECHOS	237
ROMANOS	299
1 CORINTIOS	326
2 CORINTIOS	353
GÁLATAS	370
EFESIOS	381
FILIPENSES	390
COLOSENSES	397
1 TESALONICENSES	404
2 TESALONICENSES	410
1 TIMOTEO	413
2 TIMOTEO	420
TITO	425
FILEMÓN	429
HEBREOS	431
SANTIAGO	451
1 SAN PEDRO	459
2 SAN PEDRO	467
1 SAN JUAN	472
2 SAN JUAN	479
3 SAN JUAN	480
SAN JUDAS	482
APOCALIPSIS	485

SAN MATEO ON CUAJLI TLAJTOJLI YEJHUAN SAN MATEO OQUIJCUILOJ ICA INEMILIS JESUCRISTO

*In se tocayomej de on itajhuehuentzitzihuan Jesucristo
(Lc. 3.23-38)*

- ¹ In se tocayomej de itajhuehuentzitzihuan Jesucristo yejhuan teicniu itech David niman Abraham. ² Abraham tajtli catca itech Isaac, niman Isaac tajtli catca itech Jacob, niman Jacob tajtli catca intech Judá niman icnihuan Judá.
- ³ Judá tajtli catca intech Fares niman Zara, niman innan Fares niman Zara itoca catca Tamar. Fares tajtli catca itech Esrom, niman Esrom tajtli catca itech Aram.
- ⁴ Aram tajtli catca itech Aminadab, niman Aminadab tajtli catca itech Naasón, niman Naasón tajtli catca itech Salmón.
- ⁵ Salmón tajtli catca itech Booz, niman inan Booz itoca catca Rahab. Booz tajtli catca itech Obed, niman inan Obed itoca catca Rut. Obed tajtli catca itech Isaí,
- ⁶ niman Isaí tajtli catca itech rey David. Rey David tajtli catca itech Salomón, niman inan Salomón cahuajli catca itech Urías.
- ⁷ Salomón tajtli catca itech Roboam, niman Roboam tajtli catca itech Abías, niman Abías tajtli catca itech Asa.
- ⁸ Asa tajtli catca itech Josafat, niman Josafat tajtli catca itech Joram, niman Joram tajtli catca itech Uzías.
- ⁹ Uzías tajtli catca itech Jotam, niman Jotam tajtli catca itech Acaz, niman Acaz tajtli catca itech Ezequías.
- ¹⁰ Ezequías tajtli catca itech Manasés, niman Manasés tajtli catca itech Amón, niman Amón tajtli catca itech Josías.
- ¹¹ Josías tajtli catca intech Jeconías niman icnihuan. Niman yejhuatej nemiyaj ipan on tonaltin ijcuac on hebreos oquimajsiquej niman oquintzacuatoj ne ipan on país itoca Babilonia.
- ¹² Ijcuac on hebreos yoquintzacuatoj ne ipan on país itoca Babilonia, Jeconías onochiu tajtli itech Salatiel, niman Salatiel onochiu tajtli itech Zorobabel.

13 Zorobabel tajtli catca itech Abiud,
niman Abiud tajtli catca itech Eliaquim,
niman Eliaquim tajtli catca itech Azor.

14 Azor tajtli catca itech Sadoc,
niman Sadoc tajtli catca itech Aquim,
niman Aquim tajtli catca itech Eliud.

15 Eliud tajtli catca itech Eleazar,
niman Eleazar tajtli catca itech Matán,
niman Matán tajtli catca itech Jacob.

16 Jacob tajtli catca itech José yejhuan
ihuehuentzin catca María,
niman María nantli catca itech Jesús.
Yejhua no itoca Cristo yejhuan
quijtosnequi on yejhuan Dios quitlalia
para tlamandaros.

17 Yejhua ica, tej, Abraham hasta David, onochiu majtlactli huan nahui itajhuehuentzitzihuan Cristo. Niman David hasta on tonaltin ijcuac on hebreos oquimajsiquej niman oquintzacuatoj ne Babilonia, no onochiu majtlactli huan nahui itajhuehuentzitzihuan Cristo. Niman desde on tonaltin ijcuac on hebreos oquimajsiquej niman oquintzacuatoj ne Babilonia hasta onen Cristo, no ijqui onochiu majtlactli huan nahui itajhuehuentzitzihuan Cristo.

Ijquin otlacat Jesucristo

(Lc. 2.1-7)

18 Ijquin otlacat Jesucristo. María, on inan, yoquitlalijca compromiso para nonamictis ihuan José. Pero ijcuac xe san secan nemij, yejhua oquimat ica yocan se conetzintli. On conetzintli quitlacatilis ipampa ipoder on Espíritu Santo. **19** José, on yejhuan más saquin* ihuan ononamictij María, yejhua se tlacatl catca yejhuan nochipa oquichiu on tlen cuajli. Pero yejhua xoquinec para quipinajtis María. Yejhua ica José quinemiliaya san quichtacatlalcahuis para on tlacamej xquimatisquej. **20** Niman chica yejhua ijquin quinemiliaya, se ilhuicaktequitquetl† yejhuan toTeco ocuajtitlan oquinotitij itemicpan niman oquijlij:

—José, huejca teixhuiu‡ David, ma ca xmomojti ticselis María para mosihuau, pampa on conetzintli yejhuan quitlacatilis, quitlacatilis ipampa on Espíritu Santo. **21** María quitlacatilis se conetzintli, niman tictocayotis Jesús pampa yejhua quinmaquixtis ican intlajtlacolhuan on yejhuan quinelto-casquej.

22 Nochi yejhua in onochiu para otenquisquej on tlen toTeco oquijtoca itechcopa on tiotlajtojquetl. **23** Yejhua oquijtoj:

Sen ichpochtli yejhuan xe yacaj tlacatl quinixmachtia canas iconetzin, niman quitlacatilis se oquichconetl. Niman on oquichconetl itoca yes Emanuel. Emanuel quijtosnequi: Dios tohuan nemí.

24 Ijcuac José otlachix, ihuan ononamictij María quen on ilhuicaktequitquetl yejhuan toTeco ocuajtitlan oquinahuatij. **25** Pero José ihuan María xnemiyaj quen on yejhuan yononamictijquej masqui ihuan nemíya, yej hasta ijcuac otlacat on conetzintli. Niman ijcuac otlacat on conetzintli, José oquitocayotij Jesús.

* **1:19** después † **1:20** ángel: Angeles tequitij ne ilhuicac niman nican ipan in tlalticpactli. ‡ **1:20** descendiente

2

On tlacamej intoca magos, yejhuan quimixmatij on sitlalimej, ohualajquej para quitasquej on conetzintli Jesús

¹ Ijcuac Herodes rey catca, Jesús otlacat ne ipan on pueblo itoca Belén yejhuan oncaj ne Judea. Niman más saquin*, oyejcoquej ne ipan on hueyican itoca Jerusalén sequimej tlacamej yejhuan intoca magos. Yejhuamej ohualejquej ipan on país yejhuan nocahua ne iquisayan on tonajli. ² Yejhuamej otlajtlanquej:

—¿Canon nemi inrey on hebreos yejhuan quemach otlacat? Tej, desde ne ipan topaís yejhuan oncaj ne iquisayan on tonajli, otiquitaquej on sitlalin yejhuan otechititij ica yotlacat on rey. Yejhua ica otihuallajquej para tcmahuistilisquej.

³ Ijcuac on rey Herodes ijcon ocac, sanoyej† onomojtij, niman nochitlacatl ne Jerusalén no onomojtij. ⁴ Quemaj on rey oquinnotz nochimej on tlayecanquej tiopixquej niman on yejhuan quimachtiayaj on tlacamej ica on tlanahuatiltin, niman oquintlajtoltij canon tlacatis yejhua on Cristo yejhuan quitenehuaj Dios quitlapejpenia para tlamandaros. ⁵ Yejhuamej oquijlijquej:

—Tlacatis ipan on pueblo itoca Belén yejhuan oncaj ne Judea, pampa on tiotlajtojquetl ijquin oquijcuiloj:

⁶ Tejhua Belén yejhuan tioncaj ne ipan iregión Judá xtejhua más tipitentzin intzajlan on ocsequimej huejhueyican niman pueblos, pampa motech Belén quisas se tlayecanquetl yejhuan quinyecanas on nocone huan hebreos.

⁷ Quemaj Herodes oquimichtacanotz on magos, niman oquintlajtoltij tlen tonajli ones on sitlalin. ⁸ Quemaj oquintitlan ne Belén ica in tlanahuatijli, oquimijlij:

—Xhuiyan ne Belén, niman cuajli xtejtemocan on conetzintli. Ijcuac nenquinextisquej, xnechijlijtiquisacan para nejhua no nias nicon mahuistilis.

⁹ Ijcuac ocacquej on itlanahuatil on rey, on magos oyajquej. Niman on sitlalin yejhuan oquitaquej ne ipan impaís yejhuan oncaj ne iquisayan on tonajli yaya inyecapan, niman onoteltito ne campa nemiya on conetzintli.

¹⁰ Ijcuac on magos oquitaquej onoteltij on sitlalin, sanoyej ocuelitaquej niman sanoyej opaquillamatquej. ¹¹ Yejhuamej ocalaquitoj ne ipan on cajli, niman oquitaquej on conetzintli ihuan María on inan. Quemaj onotlacuenquetzquej ixpan on conetzintli niman oquimahuistilijquej. Quemaj oquitlapoqquej on incaya niman oquitlayocolijquej copajli yejhuan tlatla, incienso niman mirra. ¹² Ijcuac ye quisasquiaj para yasquej ne impaís, Dios oquinna huatij ipan se temictli ma ca nocuepacan itech on rey Herodes. Yejhua ica on magos onocuepquej ne impaís ipan ocse ojtli.

José oquinhuicac Jesús niman inan ne Egipto

¹³ Ijcuac yoyajquej on magos, se ilhuicactequitquetl‡ yejhuan to Teco ocuajtitlan oquinotitij José itemicpan, niman oquijlij:

—Xmoquetzehua niman xcuica on conetzintli niman inan ne Egipto. Ompa xnemican hasta ijcuac nimitzijlis ica cuajli para nenquisasquej, pampa Herodes quitejtemos on conetzintli para quimictis.

¹⁴ Yejhua ica José onoquetzteu sa no ipan on tlayohua, niman oquejcuaniij on conetzintli ihuan inanaj, niman ocajsiquej on ojtli para oyajquej ne Egipto. ¹⁵ Ompa onenquej hasta ijcuac omic Herodes. Yejhua in onochiu para

* ^{2:1} después † ^{2:3} muy ‡ ^{2:13} ángel: Angeles tequitij ne ilhuicac niman nican ipan in tlalticpactli.

otenquis on tlen oquijtojca on toTeco itechcopa on tiotlajtojquetl. Yejhua oquijtoj: “Onicnotz noconeua para ma quisa ne Egipto.”

Herodes oquinnahuatij on isoldados ma quinmictican on oquichcoconej ne Belén

¹⁶ Ijcuac Herodes oquimat ica on magos yej oquelcahuijquej, sanoyej ocualan, niman oquinnahuatij isoldados para ma quinmictican nochia on oquichcoconej de ome xipan para tlatzintlan yejhuan chantiyaj ne Belén niman iyehualican. Yejhua san ipan nohuicaya on tonajli yejhuan on magos oquijlijquej. ¹⁷ Ijcuac nochia on coconej yomiquej, onochiu on tlen onijtoj itechcopa on tiotlajtojquetl Jeremías ijcuac oquijcuiloj:

¹⁸ Ocaquistic se ajmancatzajtzilistli ne ipan on pueblo itoca Ramá. Oncatca choquistli niman hueyi nejeltolistli, pampa Raquel chocaya impampa iconehuan. Yejhua xoquinec onoyoltalij, pampa nochia iconehuan omiquej.

José ocuajhuicac Jesús niman inan ne Israel

¹⁹ Pero más saquin§, ijcuac Herodes yomic, se ilhuicactequitquetl* yejhuan toTeco ocuajtitlan oquinotitij ipan temictli José ne Egipto, niman oquijlij:

²⁰ —Xmoquetzehua, niman xmocuepa ihuan on conetzintli niman inan ne ipan on mopaís Israel, pampa on yejhuan quinequiya quimictis on conetzintli aman yomic.

²¹ Quemaj José onoquetzteu niman ocuicac on conetzintli ihuan inan ne Israel. ²² Pero ijcuac José oquimat ica Arquelao tequihuajtiticaj ne Judea campa tequihuaj catca Herodes on itaj, onomojtij ompa chantis. Quemaj Dios oquinnahuatij ipan se temictli ma huiya ne Galilea, niman yejhua ompa oyaj. ²³ Ijcuac ompa oajsiquej, ochantitoj ne ipan on pueblo itoca Nazaret. Yejhua in onochiu san para otenquis on tlen oquijtojca on tiotlajtojquetl ijcuac oquijcuiloj ica Jesús quitocayotisquej nazareno.

3

*Juan on tlacuatequijquetl otemachtij ne tlapatlaco
(Mr. 1:1-8; Lc. 3:1-9, 15-17; Jn. 1:19-28)*

¹ Ipan on tonaltin, Juan on yejhuan tlacuatequijquetl ohuajlaj ipan itlapatlaco Judea, niman oquinmachtij on tlacamej yejhuan itech ohualajquej.

² Quijtohuaya:

—Xcajcahuacan ica nenquichihuaj on tlen xcuajli, pampa ye huajlau on tonaltin ijcuac Dios tlamandaros nican quen tlamandarohua ne ilhuicac.

³ On tiotlajtojquetl Isaías otlajcuiloj itech ica Juan ijcuac ijquin oquijcuiloj: Yacaj nemi ne campa tlapatlaco niman ijqui tzajtzi: Xyectlalicán nemoyojo pampa ye huajlau toTeco. Xmejmelahuacan nemonemilis ijcon quen on tlacamej cueltlaliaj niman quimejmelahuaj se ojtlí ijcuac huajlau se tlacatl yejhuan hueyixticaj.

⁴ Juan notlaquentiaya ican tlaquentli yejhuan tlachijchiutli ican itojmiyo on camello, niman quitlaliaya ilpicatl tlachijchiutli ican cuetlaxtli. Yejhua quincuaya on yolcatzitzintin yejhuan quen chapolimej, niman no coniya on cojnecutli. ⁵ Huajlayaj cuajcaquiyaj nochimej on chanejquej ipan on hueyican itoca Jerusalén, niman on yejhuan nochihuiyan chantiyaj ne Judea, niman ne nisiu itech on atentli itoca Jordán. ⁶ Yejhuamej noyolcuitjtiayaj

§ ^{2:19} después * ^{2:19} ángel: Angeles tequitij ne ilhuicac niman nican ipan in tlalticpactli.

ican intlajtlacolhuan, niman Juan quincuatequiaya ipan on atentli itoca Jordán.

⁷ Pero ijcuac Juan oquitac ica miyequej fariseos niman saduceos huajlayaj para nocuatequisquej, oquimijlij:

—Nemejhuamej yejhuan nenquichihuaj on xcuajli quen nencohuamej, ¿jaquinon omechmachiltij para xmomanahuican itech on temojtij castigo yejhuan huajlau? ⁸ Cuajli xmohuicakan para cuajli nenquiteititisquej ica melahuac yonencajcaquej nenquichihuaj on tlen xcuajli. ⁹ Niman ma ca xne-milican tla xitlaj* huelis nochihuas nemotech pampa nenteconehuan itech Abraham. Nejhua nemechijlia ica hasta in temej Dios huelis quincuepas teconehuan itech Abraham. ¹⁰ Nemejhuamej nemijcomej quen on cojtint yejhuan xtlaquij. Nochi cojti yejhuan xtlaquis notequis niman notlatis. Yejhua ica xmotacan sa no nemejhuamej, pampa on hacha ye oncaj listo para quintequis hasta ipan inelhuayohuan on cojtin yejhuan xtlaquij.

¹¹ Melahuac nejhua nemechcuatequiya ican atl para noteititia ica yonen-cajcaquej nenquichihuaj on tlen xcuajli, pero yejhua on yejhuan nechajtoca quipia más poder xquen nejhua, niman nejhua xnechmelahua† nion achi-jitzin para nicacquixtis. Yejhua, tej, mechcuatequis ican Espíritu Santo niman ican tlilt. ¹² Dios ye nemi listo para nochimej quintlaxtlahuilis. Yejhua ye ipan ima quipia on iaventador para yejhua ica cajcahuis on trigo niman quixelos itech on itlajsojlo. Quejehuas on trigo ipan on cuescontli, pero on itlajsojlo quitlatis ipan on tlilt yejhuan xqueman sehuis.

Juan oquicuatequiij Jesús

(Mr. 1:9-11; Lc. 3:21-22)

¹³ Ipan on tonaltin Jesús oquis ne Galilea niman ohuajlaj itech on atentli Jordán para Juan ocuatequiij. ¹⁴ Pero Juan xquinequiya cuatequis Jesús, niman oquijlij:

—Nejhua nechtocarohua tinechcuatequis, ¿niman yej tejhua notech tihuajlau para ma nimitzcuatequi?

¹⁵ Pero Jesús oquijlij:

—Xcahua para aman ma ijqui nochihua, pampa ijqui nonequi ticchihuasquej nochí tlen Dios tlanahuatia.

Ijcuacon Juan ijqui oquichiu. ¹⁶ Quemaj ijcuac Jesús yonocuatequiij, oquis itech on atl. Niman nimantzin on ilhuicac otlapou, niman yejhua oquitac iEspíritu Dios huajtemohuaya quen itlaj paloma ipan. ¹⁷ Quemaj ocaquistic se tlajtojli ne ilhuicac yejhuan oquijtoj:

—Yejhua in yejhua notlajsojcaConejatin yejhuan itech nipacticaj.

4

On diablo oquitlatlatac Jesús para ma tlajtlaco

(Mr. 1:12-13; Lc. 4:1-13)

¹ Quemaj on Espíritu Santo ocuicac Jesús campa tlapatlaco, para on diablo ompa ma quitlatlata Jesús. ² Yejhua xotlacuaj ompoajli* tonajli niman ompoajli yehuajli, niman sanoyej† oquipix apostli. ³ Quemaj on diablo oquinisihuij Jesús, niman oquijlij:

—Tla tejhua tiiConeu Dios, xquinnahuati in temej ma nochihuacan tlaxcaltin.

⁴ Pero Jesús oquijlij:

* **3:9** nada; coxtla † **3:10** árboles ‡ **3:11** no merezco * **4:2** cuarenta † **4:2** mucha

—In Yectlajcuilojli quijtohua: “Xsan ican tlaxcajli huelis nemis on tlacatl, yej no ican nochí tlajtojli yejhuan Dios quijtohua.”

⁵ Quemaj on diablo ocuicac ipan on yejyejticaj hueyican Jerusalén, niman oquitlejcoltij ne campa más tlacpac ipan on hueyi tiopan, ⁶ niman oquijlij:

—Tla melahuac tejhua tiiConeu Dios, xonmotlajcali ne tlatzintlan, pampa ipan on Yectlajcuilojli quijtohua:

Dios quinnahuatis on iilhuicactequitcahuán[‡] ma mitzpalehuican niman mitzquetztehuasquej ican inmahuan para ma ca timocxicocos ican tetl.

⁷ Jesús oquijlij:

—No quijtohua on Yectlajcuilojli: “Ma ca xtlatlata moTeco Dios.”

⁸ Quemaj on diablo ocuicac ipan se tepetl yejhuan sanoyej hueyi. Ompa oquititij nochí países yejhuan oncaj ipan in tlalticpactli niman on hueyilistli yejhuan impan oncaj. ⁹ Quemaj on diablo oquijlij:

—Nochi yejhua in nimitzmacas tla tejhua timotlacuenquetzas niman tinechmahuistilis.

¹⁰ Ijcuacon Jesús oquijlij:

—Xhuiya, Satanás, pampa ipan on Yectlajcuilojli quijtohua: “Xmahuistili moTeco Dios, niman san yejhua xtequipano.”

¹¹ Quemaj on diablo oquitlalcahuij Jesús. Niman on ilhuicactequitquej ohualajquej itech Jesús niman oquipalehuijquej.

Jesús opeu tenojnotza ica on cuajli tlajtojli

(Mr. 1.14-15; Lc. 4.14-15)

¹² Ijcuac Jesús ocac ica Juan tzacuticaj, oyaj ne Galilea. ¹³ Pero yejhua xonocau ne Nazaret, yej ochantito ne Capernaum. Capernaum yejhua se pueblo yejhuan oncatca ne itenco on mar itoca Galilea niman ipan inyehual-ican Zabulón niman Neftalí. ¹⁴ Yejhua in onochiu para otenquis on tlen on tiotlajtojquetl Isaías oquijcuiloj. ¹⁵⁻¹⁶ Yejhua oquijcuiloj:

On tlacamej nemiyaj ipan tlayehuajlotl ne Zabulón niman Neftalí, niman nisiu on ojtli itech on mar itoca Galilea, niman ne campaca iquisayan tonajli on atentli Jordán, niman se parte de Galilea campa chantij on yejhuan xhebreos. Pero aman yejhuamej quitasquej se hueyi tlahuijli. Yejhuamej ye miquisquia inalma, pero on tlahuijli oquinmacac tlanaxiyotl.

¹⁷ Desde ijcuac onocuep para Galilea Jesús opeu tenojnotza, niman quiteijliaya:

—Xcajcahuacan ica nenquichihuaj on tlen xcuajli, pampa ye huajlau ijcuac Dios tlamandaros nican quen tlamandarohua ne ilhuicac.

Jesús oquinnotz nahuimej michajsiquej

(Mr. 1.16-20; Lc. 5.1-11)

¹⁸ Se tonajli ijcuac nejnentiaya ne itenco on mar de Galilea, oquintac omemej icniutin. Se itoca catca Simón, yejhuan no itoca Pedro, niman on ocse Andrés. Yejhuamej conchapaniayaj inmatl ne ipan on atl pampa michajsiquej catcaj. ¹⁹ Niman Jesús oquimijlij:

—Nemejhuamej nenquintejtemohuaj michimej. Pero aman xhuajhuiyan nohuán niman nenquintejtemosquej tlacamej para nenquinhuicasquej itech Dios.

²⁰ Yejhuamej nimantzin ocajquej inmatl niman ihuan oyajquej.

[‡] 4:6 ángeles de El: Angeles tequitij ne ilhuicac niman nican ipan in tlalticpatli.

²¹ Achijtzin más tlayecapan Jesús oquintac ocse omemej icniutin intoca catcaj Jacobo niman Juan. Yejhuamej iconehuan Zebedeo. Yejhuamej quitlamanilijtictacaj inmatl ipan se barco ihuan intaj. Jesús oquinnotz, ²² niman yejhuamej nimantzin oquitlalcahuijquej on barco niman intaj, niman ihuan oyajquej.

Jesús otemachtij niman otepajtij nochihuiyan ne Galilea

(Lc. 6.17-19)

²³ Jesús quipaxalohuilijtiaya nochí Galilea, niman temachtijtiaya ipan on tiopantin. Yejhua quiteijlijtiaya on cuajli tlajtojli ica Dios nemi listo para quinmandaros nochí on yejhuan quinequisquej. Yejhua no quipajtijtiaya nochí tlajtlamach[§] cualolistli niman cocolistli* yejhuan on tlacamej quipayaj. ²⁴ Omachiyato itequiu ne imanyan Siria. Yejhua ica oquinhuajhuiquilijquej nochimej on yejhuan quijyohuijticatcaj nochí sesetlamantic cualolistin niman cocolistin, niman on yejhuan quipayaj on xcuajcualtin espíritus, niman on yejhuan san sojsotlahuiyaj niman on yejhuan sepohuiyaj. Niman Jesús oquimpajtij. ²⁵ Niman quemaj oyaj ihuan miyec tlacatl yejhuan quisa ne Galilia, niman on yejhuan quisa ne Decápolis. Niman no oyaj ihuan miyec tlacatl yejhuan quisa ipan on hueyican itoca Jerusalén niman on yejhuan quisa imanyan Judea niman on yejhuan chantiyaj iquisayan tonajli de on atentli Jordán.

5

Jesús otemachtij ipan se tepetl

¹ Ijcuac Jesús oquintac nochimej on tlacamej, otlejcoc ipan se tepetl niman ompa onotlalij. Quemaj on inomachtijcahuan ompa iyehualican onosentlalijquej, ² niman Jesús opeu ijquin quinmachtia:

Jesús otemachtij aquinon quipia itlatiochihualis Dios

(Lc. 6.20-23)

³ —Dios quintiochihua on yejhuan quimatij ica quimpolohua cuajlilitli tlen hualehua itech Dios. Quintiochihua pampa nemisquej ne campa Dios yejhuan ilhuicac chanej tlamandarohua.

⁴ 'Dios quintiochihua on yejhuan najmanaj pampa Dios yejhua quinyoltalalis.

⁵ 'Dios quintiochihua on yejhuan yolyemanquej* pampa yejhuamej quiselisquej on tlalticpactli yejhuan Dios oquimprometerohuilij.

⁶ 'Dios quintiochihua on yejhuan ican nochí inyojlo capismiquij niman camiquij para quichihuasquej on tlen cuajli pampa Dios quimpalehuis para quichihuasquej.

⁷ 'Dios quintiochihua on yejhuan quimpalehuiyaj ocsequimej ican teicnenelistli† pampa Dios no itlaj ica quimicnelis.

⁸ 'Dios quintiochihua on yejhuan yolchipajquej pampa yejhuamej quitasquej Dios.

⁹ 'Dios quintiochihua on yejhuan quichihuaj canica para ma ca onyas tlahuejli ipan on tlacamej pampa Dios quintocayotis iconehuan.

¹⁰ 'Dios quintiochihua on yejhuan quijyohuiyaj ijcuac quintlahuelitaj san pampa quichihuaj on tlen cuajli. Quintiochihua pampa nemisquej ne campa Dios yejhuan ilhuicac chanej tlamandarohua.

¹¹ 'Dios mechtiochihuas nemejhuamej ijcuac on tlacamej mechhuijhuicaltaj, niman mechcojcocosquej, niman mechtenehuilisquej tlajtlamach‡ tlen

§ 4:23 cosas * 4:23 dolor * 5:5 humildes † 5:7 misericordia ‡ 5:11 cosas

xmela huac san pampa nennechneltocaj. ¹² Ijcuac ijcon mechchihuilisquej, xpaquican niman xnemican ican pactli, pampa ne ilhuicac nenquiselisquej se hueyi tetlayocolijli. On tlacamej no ijqui oquintlahuelitaquej niman tlajtlamach ica oquintlajyohuiltijquej[§] on tiotlajtojquej yejhuan onemicoj yehuejcahui ijcuac xe nennemiyaj.

*Jesús otemachtijca ica ipan in tlalticpactli on tlaneltocaquej nemij quen itlaj on istatl niman on tlahuijli
(Mr. 9.50; Lc. 14.34-35)*

¹³ 'Nemejhuamej quen on istatl yejhuan on tlacamej ica quipoyeliaj on nacatl para ma ca ijtacakuis. Dios quimpoyelia on tlalticpactlacamej nemotechcopa para ma ca ijtacakuisquej ican tlajtlacojli. Niman nemejhuamej no nenquimati j ica tla on istatl quipolos on ipoyecyo, xhuelis ocsejpa quitequitiltisquej. On xoc itlaj ica tepalehuj, yej san para quixiniaj ne ipan ojtli niman nochi tlacatl ipan cholohua.

¹⁴ 'Ipan in tlalticpactli on tlacamej mechitaj quen ijqui nemohuicaj. Yejhua ica nemejhuamej nennemij quen itlaj on tlahuijli yejhuan quintlahuilhuiya. Nochimej huelij quitaj se hueyican yejhuan oncaj icuapan se tepetl. ¹⁵ Niman xacaj quitlicultia se lámpara niman quitlalia itzintlan se chiquiutli, yej quitlalia campa tlacpac para hueli quitlahuilhuiya nochi tlacatl yejhuan nemi calijtic. ¹⁶ Nemejhuamej, tej, quen nenlámparas. Yejhua ica xchihuacan para nemotlahuil ma tlahuilo imixpan on tlacamej para ijqui quitasquej on tlen cuajli nenquichihuasquej, niman yejhua ica cueyilisquej nemoTajtzin yejhuan nemi ne ilhuicac.

Jesús oquitemelajcajli on itlanahuatil Moisés

¹⁷ Ma ca xnemilican tla nejhua onihuajlaj para onicpopoloco on itlanahuatil Moisés niman itemachtilhuan on tiotlajtojquej. Nejhua onihuajlaj xpara onicpopoloco, yej para onictlacamatico niman para onictetitico nochi tlen quijtosnequi on tlanahuatijli. ¹⁸ Ica tlen melahuac nemechijlia ica xnoquixtilis se letra nion se punto itlanahuatil Dios chica onyas on cielo* niman in tlalticpactli. Xitlaj noquixtilis hasta nochihuas nochi tlen onijcuiloj. ¹⁹ Yejhua ica, on yejhuan xquitlacamatis san catlejhua tlanahuatijli, masqui on tlanahuatijli yejhuan xmás hueyi quijtosnequi, niman quinmachtis ocsequimej para no ijqui ma quichihuacan, yejhua pitentzin yes ne campa Dios yejhuan ilhuicac chanej tlamandarohua. Pero on yejhuan quitlacamatis nochi on tlanahuatijli, niman quinmachtis ocsequimej para no ijqui ma quichihuacan, yejhua hueyi yes ne campa Dios tlamandarohua. ²⁰ Yejhua ica nemechijlia ica xnenhuelisquej nencalaquisquej ne campa Dios yejhuan ilhuicac chanej tlamandarohua tla xnenmohuicasquej más cuajli xquen on temachtijquej ican on tlanahuatijli niman on fariseos nohuicaj.

*Jesús otemachtij ica on cualanilistli yejhua tlajtlacojli
(Lc. 12.57-59)*

²¹ 'Nemejhuamej onencaquej ica ye huejcahui Moisés otemachtij: "Ma ca titemictis. San aquinon yejhuan temictis ica oncaj onotelquetzas ixpan on tequihuaj, niman quitlajtlacolmacas." ²² Pero nejhua nemechijlia ica san aquinon yejhuan cualanis ihuan ocse, ica oncaj onotelquetzas ixpan on tequihuaj, niman quitlajtlacolmacas. Niman san aquinon yejhuan cuijhuicaltis ocse, ica oncaj onotelquetzas imixpan on tetlakanonotzquej.

§ 5:12 les hicieron sufrir

* 5:18 On cielo oncaj ne campa oncaj ajacatl, moxtli, metzli, tonajli niman sitlalimej.

Niman san aquinon yejhuan quijlis ocse ica semi tonto, huelis yas ipan on tlilt yejhuan oncaj ne mictlan campa tetlajyohuiltyoyan.

²³ 'Ijcon, tej, tla ijcuac tictemaca mohuen ne tlaixpan[†] tiquelnamiqui ica ocse itlaj ica motech cualani, ²⁴ xcahua mohuen ne ipan on tlaixpan niman xhuiya itech on tlacatl. Achtopa ihuan xmoyoltlaliti, niman quemaj ocsejpa xhuiya ne itech on tlaixpan niman xtemaca mohuen.

²⁵ 'Tla yacaj mitzhuica ne juzgado para mitzteixpanhuis, nimantzin ihuan cuajli xmocahua ne ipan ojtli para ma ca mitztemacas ne itech on tequihuaj. Ijquin xchihua pampa tla mitztemacas itech on tequihuaj, on tequihuaj mitztemacas itech on policía niman mitzajsisquej. ²⁶ Ica tlen melahuac nimitzijlia ica ompa xtiquisas hasta tictlaxtlahuas on sa ica noch motomin yejhuan mitzquixtilisquej.

Jesús otemachtij ica on sihuapajpatlistli niman tlacapajpatlistli

²⁷ 'Nemejhuamej onencaquej ica onijtoj: "Ma ca xsihuapajpatlacan nion xtlacapajpatlacan." ²⁸ Pero nejhua nemechijlia ica san aquinon yejhuan quitas se sihuatl ican xcuajli elehuilistli[‡], yejhua ye sihuapajpatla ipan iyojo ihuan on sihuatl.

²⁹ 'Aman, tej, tla yejhua on mixtololoj yejhuan ticpia moyecmacopa mitzchihuilia para titlajtlacohua, xquixti niman xtlajcali. Más cuajli ticpolos se parte de on motlalnacayo niman ma ca noch motlalnacayo contlajcalisquej ne mictlan campa tetlajyohuiltyoyan. ³⁰ Niman tla yej moyecma mitzchihuilia para titlajtlacohua, xmotequili niman xtlajcali. Más cuajli ticpolos se parte de on motlalnacayo niman ma ca noch motlalnacayo contlajcalisquej ne mictlan campa tetlajyohuiltyoyan.

Jesús otemachtij ica se tlacatl tlajtlacohua ijcuac noxotonia ihuan isihuau (Mt. 19.9; Mr. 10.11-12; Lc. 16.18)

³¹ 'Nemejhuamej no nenquimatztoquej ica onijtoj: "San aquinon yejhuan noxotonis ihuan isihuau ica oncaj quimacas se amatlajcuilojli campa quijtos ica melahuac yocau." ³² Pero nejhua nemechijlia ica tla se tlacatl noxotonia ihuan isihuau, niman xpampa tla on sihuatl oquichiu on tlen xcuajli ihuan ocse tlacatl, sa no yejhua quichihua para on sihuatl ma tlacapajpatla tla non-amictia ocsejpa. Niman on yejhuan ihuan nonamictia on sihuatl, yejhuan tehuan yonoxotonij, no sihuapajpatla.

Jesús otemachtij ica on tlajtolpalehuilistli yejhua tlajtlacojli

³³ 'Nemejhuamej no onencaquej ica ye huejcahui Moisés otemachtij: "Ma ca ijqui ticahuas on tlen ticprometerohua, yej xchihua on tlen ican tlajtolpalehuilistli ticprometerohua itech toTeco." ³⁴ Pero nejhua nemechijlia: Ma ca itlaj ica xmotlajtolpalehuican. Ma ca xmotlajtolpalehuican ica on ilhuicac, pampa ompa nosehuijticaj Dios ican noch tequihuajyotl. ³⁵ Nion ma ca xmotlajtolpalehuican ican in tlalticpactli, pampa Dios yejhua quimandarohua in tlalticpactli. Nion ma ca xmotlajtolpalehuican ican Jerusalén, pampa on yejhua ihueyican on tohueyi Rey. ³⁶ Nion ma ca xmotlajtolpalehuican ican nemotzonetecon, pampa nion se nemotzon xhueli nencuepaj istac noso capotztic[§]. ³⁷ Pero san xtlananquilican "quemaj" noso "ca", pampa noch tlen ocsequi nenquijtosquej hualehuas itech on diablo.

Jesús otemachtij ica on tlacuepiltigli yejhua tlajtlacojli (Lc. 6.29-30)

[†] 5:23 altar [‡] 5:28 deseo [§] 5:36 negro; tliliqui

38 'Nemejhuamej onencacquej ica onijtoj: "Aquin quixtepatzahua se tla-
catl, yejhua no quixtepatzahuasquej. Aquin quitlajcalilia itlan se tlacatl,
yejhua no quitlajcalilisquej itlan." **39** Pero nejhua nemechijlia: Ma ca
xcuepiltican on xcuajli tlacatl tlen yejhua mechchihuilia. Yej tla mitzmailia
se lado ipan moxayac, no xmaca on ocse lado moxayac. **40** Niman tla yacaj
mitzteixpanhuiya niman quinequi mitzcivilis motlaquen, xcahuili no ma
quitqui mogában. **41** Tla yacaj mitzchihualtia tiquitquis se tlamamajli ipan
se kilómetro, xquitqui ipan ome kilómetro. **42** On yejhuan itlaj mitztlajtlanilis,
xmaca. Niman on yejhuan itlaj mitztlanehuilisnequi, xtlanejeti.

*Jesús otemachtij ica nonequi tiquintlajsojtlasquej on totlahuelicnihuan
(Lc. 6.27-28, 32-36)*

43 'No ijqui onencacquej ica onijtoj: "Xtlajsojtla* motetlajsojcau† niman
xtlahuelita motlahuelicniu." **44** Pero nejhua nemechijlia: Xquintlajsojtlacan
on nemotlahuelicnihuan. Xchihuacan on tlen cuajli intech on yejhuan
mechtenehuiliaj on tlen xcuajli, niman xchihuacan on tlen cuajli intech on
yejhuan mechtlahuelitaj. Xchihuacan oración para on yejhuan mechchihuil-
iaj on tlen xcuajli niman yejhuan mechtlahuelitaj miman tlajtlamach ica
mechtlayohuilitaj. **45** Ijcon xchihuacan para nesis ica nentecone huan itech
on nemoTajtzin ilhuicac chanej. Yejhua, tej, quichihua para on tonaltzintli
ma quisa impan on yejhuan xcuajcualtin tlacamej niman yejhuan cua-
jcualtin. Niman no quichihua para quiahui impan on yolchipajquej niman
yejhuan xyolchipajquej. **46** Niman tla nemejhuamej nenquintlajsojtlaj san
on yejhuan mechtla jsojtlaj, ¿tlin tetlayocolijli itech Dios nenquiselisquej
yejhua ica on? Hasta on yejhuan tlacobrarojquej ipan impuestos ijqui
quichihuaj. **47** Niman tla nenquintlajpalohuaj san on yejhuan nemocnihuan,
¿tlinon más cuajli nenquichihuaj xquen on ocsequimej quichihuaj? Tej,
hasta on yejhuan xquixmatij Dios ijqui quichihuaj. **48** Nemejhuamej, tej,
xmochihuacan cuajcualtin ican nochí tlajtlamach para nennemisquej quen
nemoTajtzin ilhuicac chanej.

6

*Jesús otemachtij ica xcuajli teixpan quichihuasquej on tlen cuajli san para
quinhueyitenehuasquej*

(Lc. 11.2-4)

1 'Xmotacan sa no nemejhuamej, ma ca nenquichihuasquej on tlen cuajli
imixpan on tlacamej san para yejhamej ma mechitacan tlen nenquichi-
huaj. Tla ijqui nenquichihuaj, on nemoTajtzin ilhuicac chanej xitlaj* mecht-
layocolis.

2 'Yejhua ica, ijcuac nenquimpalehuisquej on yejhuan quimpolojticaj, ma
ca xpantlantican quen quichihuaj on omexayacyejequej ne ipan on tiopantin
niman ipan calles. Yejhamej quichihuaj san para on tlacamej ma quintla-
caitacan. Pero nejhua ica tlen melahuac nemechijlia ica san yejhua ica on
tlen quichihuaj ye quipiaj intetlayocolil. **3** Pero ijcuac nemejhuamej itlaj ica
nenquimpalehuisquej on yejhuan quimpolojticaj, hasta yejhua on yejhuan
sanoyej† cuajli nemotlajsojcau‡ ma ca ma quimati tlinon nenquichihuaj.

4 Yej xchihuacan san ichtaca§. Tla ijcon nenquichihuasquej, nemoTajtzin
yejhuan quitas tlinon nenquichtacachihuasquej mechmacas nemotetlay-
ocolil yejhuan nochimej quimatisquej.

* **5:43** ámallo † **5:43** su amigo

* **6:1** nada; coxtla

† **6:3** muy

‡ **6:3** amigo de ustedes

§ **6:4** en secreto

⁵ 'Niman ijcuac nenquichihuasquej oración, ma ca xchihuacan quen on omexayacyejquej quichihuaj. Yejhuamej cuelitaj notelquetzaj para quichihuaj oración ne ijtic on tiopantin niman ipan iesquinas on calles, san para on tlacamej ma quintacan tlen quichihuaj. Ica tlen melahuac, tej, nemechijlia ica san yejhua ica on tlen quichihuaj ye quipiaj intetlayocolil. ⁶ Pero ijcuac nemejhuamej nenquichihuasquej oración, xcalaquican nemocalitic, xtzacuacan nemotlatzacuilyo*, niman ompa xquichtacachihuacan nemooración itech nemoTajtzin. Niman nemoTajtzin, yejhuan quitas tlinon nemejhuamej nenquichtacachihuasquej, mechmacas nemotetlayocolil yejhuan nochimej quimatisquej.

⁷ 'Ijcuac nenquichihuasquej oración, ma ca miyecpa sa no yejhua tlajtojli nenquijtosquej yejhuan xtlaj ica mechpalehuis, quen quichihuaj on xhebreos. Yejhuamej quinemiliaj ica Dios quincaqui pampa huejhueyac inoración quichihuaj. ⁸ Ma ca, tej, xchihuacan quen yejhuamej pampa on nemoTajtzin ye quimatzticaj tlinon nemejhuamej mechpolohua ijcuac xe nenquitlajtlaniaj. ⁹ Yejhua ica, tej, ijquin xchihuacan oración:

ToTajtzin aquin tinemi ne ilhuicac, ma mitzyectenehua nochi tlacatl.

¹⁰ Ma huajla on tonaltin ijcuac ticmandaros nochi tlacatl. Ipan in tlalticpactli on tlacamej ma quichihuacan on tlen ticnequi ijcon quen nochihua ne ilhuicac.

¹¹ Aman xtechmaca tlen ticusquej on yejhuan mojmostla ica tipanotoquej.

¹² Niman xtechtlapojojpolhuili totlajtlacolhuan ijcon quen tejhuamej tiquintlapojpolhuiyaj on yejhuan tlajtlamach† xcuajli techchihuiliaj.

¹³ Niman xtechpalehui para ma ca titlajtlacosquej, yej xtechejcuanilij nochi tlen xcuajli. Timitztlajtlaniliaj yejhua in pampa ticipia tequihuajyotl, niman poder, niman hueyilistli para nochipa. Amén.

¹⁴ 'Tla nenquintlapojpolhuisquej ocsequimej ica on tlen xcuajli mechchihuiliaj, nemoTajtzin ilhuicac chanej no mechtlapojojpolhuis. ¹⁵ Pero tla on ocsequimej xnenquintlapojpolhuijaj on tlen xcuajli mechchihuiliaj, nemoTajtzin no xmechtlapojojpolhuilis on tlen xcuajli onenquichijquej.

¹⁶ 'Ijcuac nemejhuamej nemosahuasquej, ma ca xtlalican nemoxayac ican ajmantli quen quichihuaj on omexayacyejquej. Yejhuamej, tej, ijcon quichihuaj san para on tlacamej ma quitacan ica yejhuamej nosautoquej. Ica tlen melahuac nemechijlia ica san yejhua ica on tlen quichihuaj ye quipiaj intetlayocolil. ¹⁷ Pero nemejhuamej ijcuac nemosahuasquej, cuajli xmixamican niman xmopeinarocan. ¹⁸ Ijcon on tlacamej xquitasquej ica nemosautoquej, yej san nemoTajtzin yejhuan xnesticaj quimatis. Yejhua quitas tlinon nenquichtacachihuasquej, niman yejhua mechmacas nemotetlayocolil yejhuan nochimej quimatisquej.

Jesús otemachtij ica se quitocarohua quipias riquezas ne ilhuicac (Lc. 12.33-34)

¹⁹ 'Ma ca xsentlalican nemorriquezas nican ipan in tlalticpactli campa on pochahuistli quijtlacohua niman nochi on tlajtlamach san ixpolihui, niman campa on ichtequej calaquij niman tlachtequij. ²⁰ Yej xsentlalican nemorriquezas ne ilhuicac campa on pochahuistli xqueman tlajtlacohua, niman nochi on tlajtlamach xqueman ixpolihui, niman on ichtequej xque-man calaquij para tlachtequij. ²¹ Tej, campa nemejhuamej nenquipiasquej nemorriquezas, no ompa onyas nemoyojo.

* **6:6** su puerta † **6:12** cosas

*Jesús otemachtij ica itlamachilis on tlacatl hueli quitlahuilhuilia ialma
(Lc. 11.34-36)*

²² 'Ijcuac nemotlamachilis cajsicamati on tlen cuajli para nenquichihuasquej, yejhua nochihua itlahuil nemoalma. ²³ Pero tla nemotlamachilis xcajsicamati on tlen cuajli para nenquichihuasquej, nemoalma quipia tlayohualyotl. Niman xoncaj ocse tlayohualyotl yejhuan más capostic‡ xquen yejhua on.

*Jesús otemachtij ica se xhuelis quitequichihuilis Dios niman on tomin
(Lc. 16.13)*

²⁴ 'Xacaj hueli quintequichihuilia omemej tecomej, pampa se quitlajsojtlas§ niman ocse quitlahuelitas, noso se quipialis cuajli iyojlo niman ocse quitlalcahuis. Ijcon, tej, xacaj huelis quitequichihuilis Dios niman no quinotequimacas on tomin.

*Dios quinmacas iconehuan nochí tlen quimpolohua
(Lc. 12.22-31)*

²⁵ 'Yejhua ica, tej, nemechijlia: Ma ca xcomatztiacan on tlen nenquicasquej niman on tlen nenconisquej, nion nemotlaquen yejhuan mojmostla mechpolojticaj. ¿Tlen xnenuquimati ica on nemilistli más hueyi quijtosnequi xquen yejhua on tlacuajli, niman on tlalnacayotl más hueyi quijtosnequi xquen yejhua on tlaquentli? ²⁶ Xquintacan on totomej yejhuan patlantinemij ne ipan ajacatl. Yejhuamej xtocaj nion pixcaj, nion quejehuaj ipan se cuescontli on tlen quicuasquej. Niman xcahua, tej, on nemoTajtzin ilhuicac chanej quinmacaticaj tlen quicuaj. ¿Tlica* nemejhuamej xmás nenhueyi quijtosnequij xquen yejhuamej on totomej? ²⁷ ¿Niman aquinon masqui sa itlaj comatztias, huelis ocse tlajco metro más notlaquechilis?

²⁸ ¿Niman tlica sa nencomatztoquej on nemotlaquen? Cuajli xquintacan quen ijqui noscaltiaj on xochimej ne ipan tepehl. Yejhuamej xtequitij nion quichijchihuaj intlaquen. ²⁹ Pero nejhua nemechijlia ica on rey Salomón xqueman onotlaquentij quen se de yejhua on xochitl masqui sanoyej onocualnextij ica on yejhuan patio itlaquehuan. ³⁰ ¡Oh! nemejhuamej yejhuan xmás nenquineltocaj Dios, tla on xojtli yejhuan quen aman in oncaj ipan tepehl, Dios ijqui quitlaquentia niman huajmostla quitlatiaj, ¿tlen xmás mechtlaquentis nemejhuamej? ³¹ Yejhua ica, ma ca xcomatztiacan nenquijtosquej: "¿Tlinon ticusquej? noso ¿tlinon ticonisquej? noso ¿tlinon ica titotlaquentisquej?" ³² On yejhuan xhebreos quitejtemohuaj nochí yejhua in tlajtlamach. Pero nemoTajtzin ilhuicac chanej quimatzticaj ica nochí yejhua in mechpolohua. ³³ Pero achtopa xnequican para nenquichihuasquej nochí on tlen Dios mechnahuatia niman no xnequican cuajli nennemisquej quen yejhua nemi. Tla ijcon nenquichihuasquej, Dios mechmacas nochí tlen mechpolohua. ³⁴ Ma ca xcomatztiacan on tlen mostla nochihuas, pampa cada tonajli ye oncaj tlen nenquiselisquej yejhuan ica nemocahuasquej. Cada tonajli, tej, nenquipiasquej problemas san quech huelis nenquixicosquej.

7

*Jesús otemachtij ica se xquitocarohua teistlacos
(Lc. 6.37-38, 41-42)*

¹ 'Ma ca queman xquinmistlacocan ocsequimej para ijcon Dios no xmechistlacos, ² pampa tla nemejhuamej nentetlajtlacoltisquej, Dios no

‡ 6:23 negro; tliliqui § 6:24 amará * 6:26 ¿por qué?; ¿line?

mechtlatlacoltis. Niman quech nemejhuamej ica nentetlatlacoltisquej, Dios no sa no ijqui ica mechtlatlacoltis. ³ ¿Quen ijqui, tej, hueli tiquita on quesqui tlajtlacojli yejhuan quichihua se mocniu niman xtiquita on miyec tlajtlacojli yejhuan tejhua ticchihua? ⁴ Noso, ¿quen ijqui hueli tiquijlia mocniu: “Ma nimitzcajcahualti on quesqui tlajtlacojli”, ijcuac tejhua ticpia miyec tlajtlacojli? ⁵ ¡Omxayacyej! Achtopa xcajcahua on miyec tlajtlacojli yejhuan ticpia, niman ijqui huelis ticajcahualtis mocniu on quesqui tlajtlacojli yejhuan yejhua quipia.

⁶ 'On tlen chipahuac ma ca xquinmacacan on tlacamej yejhuan sanoyej* xcuajli inyojlo, pampa yejhuamej quen chichimej yejhuan huajnocuepasquej nemotech, niman mechcuajcuasquej. Niman on tlen hueyi quijtosnequi ma ca xquinmacacan on tlacamej yejhuan quen pitzomej, para ma ca yej ipan chojcholosquej.

*Jesús otemachtij ica Dios quitemacas on tlen quitlajtlanilisquej
(Lc. 11.9-13; 6.31)*

⁷ 'Xtlajtlanilican Dios on tlen mechpolohua, niman yejhua mechmacas. Xtejtemocan on tlen mechpolohua, niman nenquinextisquej. Xtetepinican on tlatzacuilyotl†, niman Dios mechtlapohuilis. ⁸ Ijcon xchihuacan, pampa yejhuan quitlajtlani quiselia, niman yejhuan quitejtemohua quinextia, niman yejhuan quitetepinia on tlatzacuilyotl, quitlatlapohuiliaj.

⁹ ¿Tlen nemotzajlan nemi se yejhuan noyolchicahuas para quimacas iconeu se tetl ijcuac quitlajtlanilis se tlaxcajli? ¹⁰ ¿Noso quimacas se cohuatl ijcuac quitlajtlanilis se michin? ¹¹ Aman, tej, tla nemejhuamej yejhuan xnen-cuajcualtin tlacamej nenquimatiq quen cuajli nenquinmacasquej nemo-conehuan tlajtlamach‡ on tlen cuajli, sanoyej pantlannestiacaj ica nemo-Tajzin ilhuicac chanej mechmacas on tlen cuajli yejhuan nenquitlajtlanilisquej.

¹² 'Ijcon, tej, xquinchihuilican ocsequimej nochí on tlajtlamach tlen nemejhuamej nenquinequisquiaj ma mechchihuilican ocsequimej, pampa nochí on itlanahuatil Moisés niman nochí on yectlajcuiltin yejhuan on tiotlajtojquej oquijcuilojquej yejhua tlanahuatia.

*Jesús oquixtij se ejemplo itech ome ojtli
(Lc. 13.24)*

¹³⁻¹⁴ 'Oncaj se ojtli yejhuan tehuica ne mictlan campa tetlajyohuiltyoyan, niman ocse yejhuan tehuica ne ilhuicac campa oncaj on nemilistli yejhuan para nochipa. Ne campa pehua on ojtli yejhuan tehuica ne mictlan oncaj se tlatzacuilyotl§ yejhuan patlahuac, niman on ojtli no patlahuac. Miyequej quinejnemij on ojtli patlahuac niman miyequej calaquiipan on puerta. Pero pitztic on puerta yejhuan oncaj ne campa pehua on ojtli yejhuan tehuica ne campa oncaj on nemilistli, niman on ojtli pitzahuac. On ojtli pitzahuac ohuiticaj* para quinejnemij, niman xmiyequej quinextiaj on tlatzacuilyotl para ompa calaquisquej. Pero nemejhuamej xcalaqueican ipan on tlatzacuilyot yejhuan pitztic, niman xhuiyan ipan on ojtli yejhuan pitzahuac.

*Jesús otemachtij quen ijqui se huelis quixmatis on tlacatl yejhuan cuajli temachtia itlajtol Dios
(Lc. 6.43-44)*

¹⁵ 'Xmotacan sa no nemejhuamej intech on tlacajcaya jquej tiotlajtojquej yejhuan quijtohuaj tenojnotzaj ican itemachtil Dios. Yejhuatej huajlahuij

* **7:6** muy † **7:7** puerta ‡ **7:11** cosas § **7:13-14** puerta * **7:13-14** difícil

nemotech, niman nesij quen cuajli tlacamej, pero quinequij quixoxoton-isquej nemotlaneltoc. ¹⁶ Nemejhuamej huelis nenquintasquej tla tlacajcayajquej noso ca ica on tlen quichihuaj. Tej, xqueman notequi uvas ipan on huitzcojin, nion higos ipan on xicojhuitztin. ¹⁷ Ijcon, tej, nochi tlen cuajli cojtlaquijlyotl quipia cuajli itlaquilyo, niman nochi tlen xcuajli cojtlaquijlyotl quipia xcuajli itlaquilyo. ¹⁸ On cuajli cojtlaquijlyotl xhuelis quipias xcuajli itlaquilyo, nion on xcuajli cojtlaquijlyotl xhuelis quipias cuajli itlaquilyo. ¹⁹ Niman nochi cojtlaquijlyotl yejhuan xcuajli quipia itlaquilyo quitzontequej niman quitlatiaj. ²⁰ Yejhua ica, tej, huelis nenquintasquej tla tlacajcayajquej noso ca ica on tlen quichihuaj.

*Jesús otemachtij ica xnochimej huelisquej calaquisquej ne ilhuicac campa
Dios tlamandarohua
(Lc. 13.25-27)*

²¹ 'Xnochimej on yejhuan nechijliaj: "NoTeco, noTeco", calaquisquej ne campa noTajtzin ilhuicac chanej tlamandarohua, yej san yejhuan quichej on yejhuan quichihuaj on tlen quinequi noTajtzin ilhuicac chanej. ²² Ijcuac yejcos on tonajli para Dios quitlaxtlahuilis nochi tlacatl, miyequej nechijlisquej: "NoTeco, noTeco, tejhuan quichej otitemachtijquej ican motocatzin, niman ican motlanahuatil otictequixtilijquej on xcuajcualtin espíritus, niman ican motocatzin oticchijquej miyec milagros." ²³ Pero ijcuacon niquimijlis: "Xqueman onemechixmat. Xnechtlalcahuican nemejhuamej yejhuan nenquichihuaj on tlen xcuajli."

*Jesús otemachtij ica ome cajli
(Lc. 6.47-49; Mr. 1.22)*

²⁴ 'Nochimej on yejhuan nechcaquij niman quichihuaj on tlen nejhua niquijtohua, yejhuan quen on tlacatl tlajmatqui yejhuan oquitlalij ical ipan se tepetlatl yejhuan tilahuac niman chicahuac. ²⁵ Opeu quiahui, ohuejhueyiyaquej on atepeyamej†, niman opeu temojtij tlahuitequi on ajacatl ipan on cajli. Pero on cajli xohuetz, pampa yejhua tzimpejticaj ipan on tepetlatl. ²⁶ Pero nochimej on yejhuan nechcaquij niman xquichihuaj on tlen nejhua niquijtohua, yejhuan quen on tlacatl xtlajmatqui yejhuan oquitlalij ical ipan xajli. ²⁷ Opeu quiahui, ohuejhueyiyaquej on atepeyamej, niman opeu temojtij tlahuitequi on ajacatl ipan on cajli. On cajli xohuetz, niman sanoyej temojtij quen oxoxoton.

Jesús otemachtij ican tequihuajyotl

²⁸ Jesú otlan tlajtlajtohua niman on tojlan sanoyej mojcatlachaya ica on tlen yejhua quimijliaya, ²⁹ pampa yejhua temachtiaya ican itlanahuatil Dios, niman xijqui quen on temachtiyquej ican tlanahuatiyli temachtiyaj.

8

*Jesús oquipajtij se cocoxqui yejhuan palaniya inacayo
(Mr. 1.40-45; Lc. 5.12-16)*

- ¹ Ijcuac Jesú ohuajtemoc ne ipan tepetl, miyec tlacatl oquicuitlapanhuij.
- ² Niman se cocoxqui yejhuan quipiaya on cualolistli itoca lepra oquinisihuij Jesú. Ijcuac oquinisihuij, ixpan onotlacuenquetz, niman oquijlij:
—Señor, tla ticnequi, huelis tinechpajtis.
- ³ Ijcuacon Jesú oquimatocac, niman oquijlij:
—Nicnequi. Xpajti aman.

† 7:25 ríos

Ijcuac yejhua ijcon oquijtoj, inacayo on tlacatl nimantzin opajtic. ⁴ Niman Jesús oquijlij:

—Xcaqui tlin timitzijlis. Ma ca yacaj tiquijlis on tlen onicchiu. Yej san xhuiya niman xmoteititi ne itech on tiopixqui para mitzas ica xoc ticualo, niman xcuentlali on tlen Moisés otenahuatij para on tlacamej quitasquej ica yotipajtic.

*Jesús oquipajtij itequichihuilijs se soldado romano
(Lc. 7.1-10)*

⁵ Ijcuac Jesús ocalac ne ipan on pueblo itoca Capernaum, se capitán romano oquinisihuij niman oquitlajtlanilij se favor. ⁶ Niman ijquin oquijlij:

—NoTeco, notequichihuilijs nemi ipan tlapechtli ne nochan. Yejhua sepojtoc, niman sanoyej* nococohua.

⁷ Jesús oquijlij:

—Nejhua nias nicompajtis.

⁸ Pero on capitán oquijlij:

—NoTeco, nejhua xnechmelahua† para tejhua ticalaquis nochan. San ican motlajtol xtlanahuati, niman notequichihuilijs pajtis. ⁹ Ijcon nochihuas pampa nejhua no nicmati quen niqüintlacamati on yejhuan nechmandaro-huaj, niman nejhua no niqüimpia soldados yejhuan nechtlacamatij ijcuac niqüinmandarohua. Ijcuac se nicnahuatia canaj ma huiya, yau. Ijcuac ocse niqüijlis ma huajla, huajlau. Niman ijcuac on notequichihuilijs nicanahuatia itlaj ma quichihua, quichihua.

¹⁰ Ijcuac Jesús ijcon ocac, oquitlatlachaltij, niman oquimijlij on yejhuan cuicatiyaj:

—Ica tlen melahuac nemechijlia ica nion se hebreo xqueman niqüita sanoyej tlaneltoca quen yejhua in tlacatl. ¹¹ Nejhua nemechijlia ica miyequej xhebreos nochihuiyan ipan in tlalticpactli hualehuasquej, niman notlal-isquej para tlacuasquej ihuan Abraham, Isaac niman Jacob ne campa Dios ilhuicac chanej tlamandarohua. ¹² On hebreos nonequi calaquisquej ne campa Dios tlamandarohua, pero xcalaquisquej. Yej quinhuajxinisquej ipan tlayehuajlotl campa chocasquej niman notlantisquej.

¹³ Quemaj Jesús oquijlij on capitán:

—Xhuiya ne mochan niman on tlen oticneltocac ijqui nochihuas.

Niman quemaj nimantzin on itequichihuilijs on capitán opajtic.

*Jesús oquipajtij imonan Pedro
(Mr. 1.29-31; Lc. 4.38-39)*

¹⁴ Jesús oyaj ichan Pedro, niman ompa oquitac imonan Pedro onoc ipan itlapech ican totonqui‡. ¹⁵ Jesús oquitzquilij ima, niman ijqui ocau on totonqui. Quemaj yejhua onoquetzteu niman opeu quintlacualtia.

*Jesús miyequej oquimpajtij
(Mr. 1.32-34; Lc. 4.40-41)*

¹⁶ Ijcuac otlayohuac, oquinhuajhuicaquej itech Jesús miyequej tlacamej yejhuan quipiayaj on xcuajcualtin espíritus niman osequimej cocoxquej. Niman ican itlanahuatil oquinquixtilij on espíritus, niman no oquimpajtij nochimej on cocoxquej. ¹⁷ Yejhua in onochiu para otenquis on tlen oquitei-lilijca on tiolajtojquetl Isaías, ijcuac oquijtoj: “Sa no yejhua otechpopolohuilijs on tocualolis, niman oquitquic on tococolis.”

* **8:6** muy, mucho † **8:8** no merezco ‡ **8:14** fiebre; totonalistli

*On yejhuan quitoca Cristo ica oncaj notlajyohuis
(Lc. 9.57-62)*

¹⁸ Ijcuac Jesús oquitac ica tojlan quiyehualohuaya, oquinnaahuatij on inomachtijcahuau para ma panotij ne ipan ocse ilado on mar. ¹⁹ Quemaj se temachtijquetl ica on tlanahuatijli oquinisihuij Jesús niman oquijlij:

—Temachtijquetl, nimitzhuicas san canon tejhua tias.

²⁰ Jesús oquijlij:

—On ostotzitzintin quipiaj intecal, niman on totomej quipiaj intepajsol, pero nejhua yejhuan oninochiu Tlacatl xnicpia canon nicochis.

²¹ Niman ocse tlacatl, yejhuan no inomachtijcau, oquijlij:

—NoTeco, xnechcahuili achtopa ma nihuiya para nicontocas notaj niman quemaj mohuan nias.

²² Pero Jesús oquijlij:

—Xhuajla nohuan, niman xquincahua on yejhuan mictoquej ixpan Dios ma quintocacan on inmicatzitzihuan.

Jesús oquiteltij on temojtij ajacatl

(Mr. 4.35-41; Lc. 8.22-25)

²³ Niman Jesús otlejcoc ipan se barco niman on inomachtijcahuau oyajquej ihuan. ²⁴ Niman ipan on mar nimantzin opeu sanoyej chicahuac ajaca niman on atl yejhuan noquetztehuaya hasta calauiyaj ijtic on barco. Pero Jesús cochticatca. ²⁵ Quemaj on inomachtijcahuau oquitlachaltitoj, niman oquijlijquej:

—¡ToTeco, xtechmaquixti! ¡Ye tiamimictoquej!

²⁶ Yejhua oquimijlij:

—¿Tlica§ sanoyej nemomojtiaj? ¡Nemejhuamej semi achijtzin nenquipiaj tlaneltoctli!

Quemaj onotelquetz niman oquinahuatij on ajacatl niman on mar ma ca sa tlamach ma quichihua. Nimantzin noch i onoteltilij niman noch cuajli onocau. ²⁷ On tlacamej omojcatlachixquej, niman oquijtoquej:

—¿Tlinon itequiu yejhua in tlacatl ica hasta on ajacatl niman on mar quitlacamatij?

Jesús oquimpajtij omemej tlacamej yejhuan quipiayaj on xcuajcualtin espíritus

(Mr. 5.1-20; Lc. 8.26-39)

²⁸ Ijcuac Jesús oajsic ne ipan ocse ilado on mar, ipan intlahuan on tlacamej yejhuan chantij ne Gadara, omemej tlacamej ohuajquisquej ne intzajlan on ostomej yejhuan imijtic quintocayaj on mimiquej. On omemej tlacamej oquinisihuijquej Jesús. Yejhuatej quipiayaj on xcuajcualtin espíritus, niman ipan on ojli xacaj hueliya panohuaya pampa yejhuatej sanoyej cualaniyaj.

²⁹ Niman opejquej tzajtzij:

—¿Tlinon ticnequi tohuan Jesús tejhua tiiConetzin Dios? ¿Otihuajlaj nican para titechcastigaros masqui xe ajsi on tonajli para ticselisquej tocastigo?

³⁰ San ompaca nisu miyequej pitzomej tlacuajcuajtinemiya. ³¹ Niman on xcuajcualtin espíritus oquimojcatlajtlanilijquej Jesús:

—Tla titechquixtis impan in tlacamej, xtechcahuili ma ticalaquican ne impan on pitzomej.

³² Ijcuacon Jesús oquimijlij:

—Xhuiyan, tej.

Niman on xcuajcualtin espíritus oquisquej ne impan on tlacamej niman ocalaquej impan on pitzomej. Quemaj nochimej on pitzomej onotlajtlalojquej* niman ne ipan on tlaltentli campa huejcatlan oxinitoj hasta ijtic on mar, niman ompa oamimiquej.

³³ On yejhuan tlajpiayaj ica on pitzomej, ican inmojcayo ontlatlacsquej. Niman ijcuac oajsiquej ne ipan on pueblo, opeu quitetlajtlajtohuiliaj nochitlen onochiu, niman on tlen onochiu intech on tlacamej yejhuan quipiaj on xcuajcualtin espíritus. ³⁴ Quemaj nochitl acatl yejhuan chanti ipan on pueblo oquis para oquitato Jesús campa yejhua nemiya. Niman ijcuac oquitaquej, oquimojcatlajtlanilijquej para ma nejcuani ne intlapán ica.

9

Jesús oquipajtij se tlacatl yejhuan sepojtoya (Mr. 2.1-12; Lc. 5.17-26)

¹ Quemaj Jesús ocalac ipan se barco, opanoc ne ipan ocse ilado on mar, niman oajsic ipan on pueblo itoca Capernaum. ² Ipan on pueblo, ocuiquiliquej ican cojtlapechtli se tlacatl yejhuan sepojtoya. Ijcuac Jesús oquitac intlaneltoc, oquijlij on cocoxqui:

—Xmoyolchicahua, noconeua. Motlajtlacolhuan yotlapojo polhuiloquej.

³ Ijcuacon semej temachtijkej ica on tlanahuatijli oquinemilijquej: “In tlacatl yocuijhuicaltij Dios ican itlajtol pampa yejhua notenehua quipia sa no ipoder Dios.” ⁴ Jesús quimatzticatca tlinon yejhuatej quinemiliiticatcaj. Yejhua ica, tej, oquimijlij:

—¿Tlica* nenquinemiliaj on tlen xcuajli? ⁵ ¿Catlejhua más xtepopoloj para niquijtos: “Motlajtlacolhuan yotlapojo polhuiloquej”, noso yej niquijtos: “Xmotelquetz niman xnejnemi”? ⁶ Aman cuajli, nejhua nemechititis ica nejhua yejhuan oninochiu Tlacatl nicpia tequihuajyotl ipan in tlalticpactli para nitetlapojo polhuilis on tlajtlacoltin.

Quemaj oquijlij on tlacatl yejhuan sepojtoya:

—Xmotelquetza, xcajocui motlapech, niman xhuiya mochan.

⁷ Quemaj on yejhuan sepojtoya onotelquetz niman oyaj ichan. ⁸ Niman ijcuac on tlacamej ijcon oquitaquej, onomojtijquej, niman ocueyilijquej Dios ipampa on poder yejhuan oquimacac Jesús.

Jesús oquinotz Mateo para ihuan yas (Mr. 2.13-17; Lc. 5.27-32)

⁹ Ijcuac Jesús oquis ompa, ipan iohui oquitac se tlacatl itoca Mateo yehuaticatca ne campa tlacobrarohua ican impuestos. Niman Jesús oquijlij:

—Xhuajla nohuan.

Mateo nimantzin ohuajnotelquetz niman oyaj ihuan Jesús.

¹⁰ Más saquin†, ijcuac Jesús tlacuajticatca ne ichan Mateo, sequimej tlacamej yejhuan tlacobrarojquej ica on impuestos niman no ocsequimej yejhuan tlajtlacolejquej onosentlalijquej ihuan Jesús niman inomachtijcuhuan ne itech mesa. ¹¹ Pero ijcuac on fariseos ijcon oquitaquej, oquimijlijquej on inomachtijcuhuan:

—¿Tlica on nemotemachtijcau tlacua inhuan on yejhuan tlacobrarohuaj ica on impuestos niman inhuan on ocsequimej tlajtlacolejquej?

¹² Jesús ocac tlinon yejhuatej oquijtojquej, niman oquimijlij:

—Para on yejhuan xcualoj xquimpolohua on tepajtijquetl, pero on yejhuan cualoj quemaj. ¹³ Xhuiyan niman cuajli xcajsicamatitican tlinon

* 8:32 corrieron * 9:4 ¿por qué?; ¿tline?

† 9:10 después

quijtosnequi yejhua in Yectlajcuilojli ijcuac ijquin quijtohua: “Nejhua nicnequi teicnelilistli†, amo tla yej nenquinhuentlalisquej on yolquej.” Ijcon quemaj nenquimatisquej ica nejhua xonihuajlaj para niquinnotzas on yejhuan yolkmelajquej, yej para niquinnotzas on yejhuan tlajtlacolejquej.

*Jesús oquijtoj tlica inomachtijcahuān xnosahuāj quen inomachtijcahuān Juan on tlacuatequijquetl niman on fariseos
(Mr. 2.18-22; Lc. 5.33-39)*

¹⁴ Quemaj on yejhuan cuicatinemiyaj Juan on tlacuatequijquetl oquinisihuijquej Jesús, niman oquitlajtoltijkej:

—¿Tlica tejhuamej niman on fariseos sanoyej§ titosahuaj, niman monomachtijcahuān xnosahuāj?

¹⁵ Jesús oquimijlij:

—Xhuelis najmanasquej on yejhuan tlanotzaltil campa nonamictihua, chica on montli ompa inhuan nemi. Pero yejcos on tonajli ijcuac nejhua yejhuan quen nimontli nechquixtisquej on notlahuelicnihuan intech on notlanotzcahuān. Niman ijcuacon quemaj yejhuatej nosahuasquej ican ajmantli.

¹⁶ Xacaj quitlamania se tlaquentli ijsoltic ica on tlaquentli* yejhuan yencuic, pampa on yejhuan yencuic tlaquentli tzolihui niman más hueyica quitzayana on tlaquentli ijsoltic. ¹⁷ Niman no xquitecaj on vino yejhuan yencuic ipan on bolsas yejhuan tlachijchiutin ican on cuetlaxtin ijsoltiquej, pampa on vino posonis niman on bolsas toponisquej niman quemaj on vino ihuan on bolsas ixpolihuisquej. Yejhua ica xtlalican on vino yencuic ipan on bolsas yencuiquej, pampa ijcon quemaj san secan cuajli nocahuas.

Jesús oquiyolitij ichpotzin Jairo yejhuan tlayecanquetl intech on hebreos niman oquipajtij se sihuatl yejhuan yeshuetzinemiya

(Mr. 5.21-43; Lc. 8.40-56)

¹⁸ Chica Jesús quimijliaya in tlajtlamach†, se intlayecancau on hebreos ohuajlaj itech niman ixpan onotlacuenquetz. Niman yejhua oquijlij:

—Nochpotzin quinamantzin omic, pero tla tejhuā tias niman ipan tictlalis moma, yejhua ocsejpa yolihius‡.

¹⁹ Yejhua ica Jesús ohuanoquetz niman ihuan inomachtijcahuān oya-jquej ihuan on tlacatl.

²⁰ No ompa tehuan nemiya se sihuatl yejhuan quipia majtlactli huan ome xipan ica yeshuetzinemiya. Yejhua oquinisihuij Jesús icuitlapán niman ocajsic itempan itlaquen. ²¹ Ijcon oquichiu pampa yejhua oquinemilij: “Tla san nicajsis itlaquen, nejhua nipajtis.” ²² Niman Jesús onocueptquis, ocontac on sihuatl, niman oquijlij:

—Xmoyolchicahua, noconeū. Aman yotipajtic pampa otitlaneltocac.

Quemaj nimantzin opajtic.

²³ Ijcuac Jesús oajsic ne ichan on tlayecanquetl, niman oquitac ica on músicos nemiyaj listos para contocasquej on ichpocatzin, niman ica on tlacamej sa najcomantinemiyaj, ²⁴ oquimijlij:

—Xquisacan nican, pampa on ichpocatzin xe miqui, yej san cochtica.

Niman yejhuatej san ocuetzquilijquej. ²⁵ Ijcuac otlan quinquixtiaj on tlacamej, Jesús ocalauquito niman oquitzquij ipan ima on ichpocatzin, niman yejhua onotelquetz. ²⁶ Niman nochihuiyan nimantzin omachiyato on tlen onochiu.

‡ 9:13 misericordia § 9:14 mucho * 9:16 tela † 9:18 cosas ‡ 9:18 resucitará; yolis

Jesús oquimpajtij omemej ciegos

²⁷ Jesús ompa oquis. Niman chica nejnentiaya, omemej ciegos oquito-caquej, niman quitzatzilijtiayaj:

—¡Xtechicneli§, xtechpalehui tejhua huejca teixhui* itech David!

²⁸ Niman ijcuac Jesús ocalac ipan se cajli, on ciegos oquinisihuijquej, niman Jesús oquintlajtoltij:

—¿Nemejhuamej nenquineltocaj ica huelis nemechpajtis?

Yejhuamej oquijtojquej:

—Quemaj, toTeco.

²⁹ Ijcuacon Jesús oquinmatoquilij imixtololojhuan niman oquimijlij:

—Ma nochihua quen quimelahuat nemotlaneltoc.

³⁰ Niman on imixtololojhuan opajtiquej. Niman Jesús sanoyej oquint-lachicahuilij. Oquimijlij:

—Xchihuacan canica para ma ca yacaj quimatis aquinon omechpajtij.

³¹ Pero yejhuamej ohuajquisquej, oquitelajtlajtohuilijquej nochihuiyan on tlen Jesús oquichiu.

Jesús oquipajtij se tlacatl nontzin

³² Ijcuac yejhuamej huajquistiayaj ne ipan on cajli, sequimej tlacamej ocuajhuiquijquej Jesús se tlacatl nontzin yejhuan quipiaya se xcuajli espíritu. ³³ Ijcuac Jesús oquixtij on xcuajli espíritu, on nontzin opeu tlajtohua. On tlacamej tlamojcaitayaj niman quijtohuayaj:

—Ipan in país itoca Israel xqueman tiquitayaj tlajtlamach quen yejhua in.

³⁴ Pero on fariseos quijtohuayaj:

—Yejhua in tlacatl quitequixtilia on xcuajcualtin espíritus, pampa on poder quiselia itech intlayecancau sa no yejhuamej on espíritus.

Jesús oquimicnelij on tlacamej

³⁵ Jesús panotiaya nochihuiyan ipan pueblos niman cuadrillas. Niman nochihuiyan yejhua temachtijtiaya ipan intiopanhuan on hebreos niman quiteijlijtiaya on cuajli tlajtojli ica quen ijqui Dios tlamandarohua. Jesús quipajtijtiaya nochí cocolistli‡ niman masqui san catlejhua cuelolistli. ³⁶ Ijcuac Jesús oquintac on tojlamej, sanoyej oquimicnelij§, pampa yejhuamej najmanayaj niman xquipiayaj yolchicahualistli. Yejhuamej nemiyaj quen on borreguitos yejhuan xquipiayaj intlajpixcau.

³⁷ Ijcuacon oquimijlij inomachtijcahuan:

—Ica tlen melahuac tiquitaj ica sanoyej miyec tlatoctli, pero xmiyequej nemij tequitquej para pixcasquej. ³⁸ Yejhua ica, tej, xtlajtlanilican iTeco on tlaquiyotl más ma quinhuajtitlani on pixcaquej para ma pixcaquij.

10*Jesús oquitlapejpenij majtlactli huan ome nomachtijquej*

(Mr. 3.13-19; Lc. 6.12-16)

¹ Quemaj Jesús oquinsentlalij on majtlactli huan ome inomachtijcahuan, niman oquinmacac poder para ma quitequixtilican on xcuajcualtin espíritus niman para quipajtisquej nochí cocolistli* niman masqui san catlejhua cuelolistli.

² Ijquin intojtoca on majtlactli huan ome apóstoles: achtopa Simón, yejhuan no itoca Pedro, niman Andrés on icniu, Jacobo niman Juan on icniu yejhuan iconehuan Zebedeo, ³ Felipe, Bartolomé, Tomás, Mateo on

§ 9:27 ten misericordia de nosotros * 9:27 descendiente † 9:29 merece ‡ 9:35 dolor

§ 9:36 tuvo compasión * 10:1 dolor

yejhuan tlacobrarojquetl catca ican impuestos, Jacobo yejhuan iconeu Alfeo, Lebeo, yejhuan no itoca Tadeo, ⁴ Simón, on yejhuan tehuan tlapohuajli catca ne intech on cananistas, niman Judas Iscariote, yejhuan más saquint† oquitemactilij Jesús.

*Jesús oquintitlan on majtlactli huan ome apóstoles imanyan on país de Israel
(Mr. 6.7-13; Lc. 9.1-6)*

⁵ Jesús oquintitlan on majtlactli huan ome apóstoles, niman ijquin oquin-najnahuatij:

—Ma ca nenyasquej campa chantij on yejhuan xhebreos, nion ipan on pueblos de Samaria. ⁶ Yej xhuiyan ne campa on hebreos chantij. Yejhuamej quen iborreguitos Dios yejhuan polijcanemij. ⁷ Xhuiyan niman ijquin xteijilitij: “Ye huajlau on tonajli ijcuac Dios tlamandaros nican quen tlamandaro-hua ne ilhuicac.” ⁸ Xquimpajtican on yejhuan palanij innacayo niman on ocsequimej cocoxquej. Xquinyolihuitican on mimiquej. Xquintequixtilican on xcuajcualtin espíritus. Nemejhuamej xican tomin nenquiselaj yejhua in poder, yejhua ica xtequitiltican niman ma ca xtecobrarocan.

⁹ Ma ca xquitquican tomin. ¹⁰ Ma ca xquitquican nemotlacual para nencuasquej ipan nemojhui. Ma ca ocsequi xquitquican nemotlaquen, nion nemocachuan. Nion ma ca xquitquican nemocojtopil†. Nochi in tlajtlamach§ ma ca xquitquican, pampa on tequitquetl quimelahuah* quimacasquej itlaxtlahuil.

¹¹ Ijcuac nemejhuamej nemajsisquej ipan se hueyican noso ipan se pueblo, ompa xtejtemocan yacaj cuajli tlacatl yejhuan nenhuelisquej nen-quitlalischej nemoyojojlo itech, niman ichan xmocahuacan hasta ijcuac ocse pueblo nenyasquej. ¹² Ijcuac nencalaquisquej ipan se cajli, ijquin xtetlaj-palocan: “Xpiacan yolsehuilistli.” ¹³ Tla on tlacamej yejhuan chantij ipan on cajli cuajli mechselisquej, Dios quintiochihuas ican yolsehuilistli. Pero tla yejhuamej xcuajli mechselisquej, Dios xquinmacas yolsehuilistli. ¹⁴ Niman tla on yejhuan chanejquej ipan on cajli noso ipan on pueblo xmechselisquej nion xquinequisquej mechcaquisquej, tla ijcon xquisacan niman xtzejtzelocan nemocxi ica on tlalteutli. ¹⁵ Ica tlen melahuac nemechijlia ica ipan on tonajli ijcuac Dios tetlaxtlahuilis, on yejhuan chanejquej ipan on pueblo más temojtij quiselisquej tlajtlacolmacalistli xquen on tlacamej yejhuan ochantijquej ne Sodoma niman Gomorra.

Jesús oquinmachtij on iapóstoles ica tlajyohuisquej

¹⁶ ¡Xcaquican! Nejhua nemechtitlani intzajlan on xcuajcualtin tlacamej quen on borreguitos yejhuan quistinemij intzajlan on lobos. Yejhua ica xmotacan sa no nemejhuamej quen on cohuamej niman xyolyemanquej† quen on palomas. ¹⁷ Xmotacan sa no nemejhuamej, pampa on tlacamej mechtemacasquej intech on tetlacamontzquej, niman no mechhuihuitequisquej ipan intiopanhuan. ¹⁸ Mechhuicasquej imixpan on gobernadores niman reyes san pampa nennechneltocaj. Ijcuac ijcon nemopan nochihuas, noca xtajtocan imixpan niman imixpan on yejhuan xhebreos. ¹⁹ Niman ijcuac mechtemactilisquej intech on tequihuajquej, ma ca sa xcomatztiacan tlilon nенquijtosquej noso quen ijqui nенquijtosquej, pampa ijcuac ajsis on

† 10:4 después ‡ 10:10 su bastón § 10:10 cosas * 10:10 merece † 10:16 ser inofensivos

hora para nentlajtosquej, Dios mechmacas tlinon nenquijtosquej. ²⁰ On tlajtoltin yejhuan nenquijtosquej xnemoyaxca[‡] yes, yej on iEspíritu nemoTajtzin yejhua mechmacas on tlajtoltin.

²¹ 'On tlacamej quintemacasquej imicnihuan ma quinmictican, niman on tatajtin no quintemacasquej inconehuan, niman on teconehuan quintlahuelixnamiquisquej intajhuan niman quichihuasquej para ma miquican. Ijcon quinchihuilisquej pampa yejhamej nechneltocaj. ²² Nochi tlacatl mechtlahuelitas san pampa nennechneltocaj. Pero yejhuan melajcanemis ican itlaneltoc hasta ijcuac nochi tlamic, Dios yejhua quimaquixtis. ²³ Ijcuac mechtlahuelitasquej niman tlajtlamach ica mechtla jyohuiltisquej ipan se pueblo, xhuiyan ipan ocse. Tej, ica tlen melahuac nemechijlia ica nejhua yejhuan oninochiu Tlacatl nihuajlas ijcuac nemejhuamej xe tlami nenyahuij ipan nochi inpueblos on hebreos.

²⁴ 'Xacaj nomachtijquetl más hueyixticaj xquen on itemachtijcau, nion ya- caj tlanamactli más hueyixticaj xquen on iteco. ²⁵ On nomachtijquetl ma noy- oltlali quijyohuis on tlajyohuclistli yejhuan quijyohuiya on itemachtijcau, niman on tlanamactli no quen yejhua on iteco. Tla nejhua nechtocayotiaj nidiablo, tla ijcon nemejhuamej más mehtocayotisquej ica tlajtlamach.

*Jesús oquinmachtij on iapóstoles aquinon quitocarohua quimacajsiquej
(Lc. 12.2-9)*

²⁶ 'Ma ca xquinmacajsican on tlacamej. Tej, nochi on temachtijli yejhuan iyanticaj pa nesis, niman nochi on temachtijli yejhuan ichtaca[§] oncaj machiyas. ²⁷ Tlinon nejhua nemechijlia campa xacaj nemi, nemejhuamej xtemachiltican ne campa tojlan. Niman tlinon nejhua nemechichtacai- jlia, nochi tlacatl xpanextilican. ²⁸ Ma ca xquinmacajsican on yejhuan hueli quimictiaj nemotlalnacayo pero xhuelij itlaj quichihuiliaj nemoalma. Yej xmacajsican Dios yejhuan huelis quioxoxotonis nemotlalnacayo niman cahuas nemoalma ne mictlan campa tetlajyohuiltyoan.

²⁹ '¿Tlen xsan se tomin valerohuaj omemej tototzitzintin? Pero nion semej yejhuamej on tototzitzintin hueli huetzi tla on toTajtzin xcahuilia. ³⁰ Tej, hasta on tzontli ipan nemotzonetecon nochi oncaj tlapohuajli cada sesentel. ³¹ Yejhuia ica, tej, ma ca xmomojtican. Nemejhuamej más nenhueyiquij- tosnequij xquen miyequej tototzitzintin.

*Jesús oquinmachtij iapóstoles tlinon quichihuas tla xnonenequij ipampa
(Lc. 12.8-9)*

³² 'Nochimej on yejhuan imixpan on tlacamej quijsquej ica nechseliaj quen intemaquixtijcau, nejhua no niquijtos ixpan noTajtzin ilhuicac chanej ica niquinselia. ³³ Pero on yejhuan nonenequisquej* nopampa imixpan on tlacamej, nejhua no ninonenequis impampa ixpan noTajtzin ilhuicac chanej.

*Jesús oquinmachtij iapóstoles ica san ipampa on tlacamej noxexelosquej
(Lc. 12.51-53; 14.26-27)*

³⁴ 'Ma ca xnemilican ica nejhua onicuajquic yolsehuclistli ipan tlaltic- pactli. Nejhua, tej, xonicuajquic yolsehuclistli, yej nopampa notlahuelitalos.

³⁵ Onihuajlaj para noxexelosquej on tlacamej. Nopampa se telpochtli quipias tlahuejli itech itaj, niman se ichpochtli quipias tlahuejli itech inan, niman se sihuamontli quipias tlahuejli itech imonan. ³⁶ Ijcon, tej, se quipias itlahuelicniu sa no ihuan ichanchanecahuant.

[‡] **10:20** no les pertenece; xnemoaxca, xnemohuaxca, xnemotlatqui § **10:26** secreto * **10:33**
negarse † **10:36** su familia

³⁷ 'On yejhuan quitlajsojtlas[‡] itaj noso inan más xquen nejhua, xquimelahuas[§] noyaxca yes. Niman yejhuan quitlajsojtlas itelpoch noso ichpoch más xquen nejhua, xquimelahuas noyaxca yes. ³⁸ Niman on yejhuan xquinequis quiselis on tlajyohuilistli ipan inemilis niman xquinequis nohuan yas, xquimelahuas noyaxca yes. ³⁹ On yejhuan quimanahuis inemilis para ma ca miquis nopampa, quipolos ialma. Pero on yejhuan quipolos inemilis san nopampa, yejhua quimaquixtis ialma.

Jesús oquinmachtij inomachtijcahuān ica on yejhuan quinselisquej Dios quinmacas intlaxtlahuil

(Mr. 9.41)

⁴⁰ 'On yejhuan mechselia, sa no ijqui quen nejhua nechselisquia. Niman yejhuan nechselia no quiselia on yejhuan onechajtitlan. ⁴¹ Yejhuan quiselia se tiotlajtojquetl pampa on tiotlajtojquetl quichihua itequiu Dios, sa no ijqui quiselis itlaxtlahuil quen quimacaj se tiotlajtojquetl. Niman yejhuan quiselia se cuajli tlacatl pampa yejhua cuajli tlacatl, sa no ijqui quiselis itlaxtlahuil quen quimacaj se cuajli tlacatl. ⁴² Niman san aquinon yejhuan quinmacas siquiera se vaso asesec semej nonomachtijcahuān, ica tlen melahuac quipias itlaxtlahuil.

11

On inomachtijcahuān Juan oquinotzquej Jesús

(Lc. 7.18-35)

¹ Ijcuac Jesús otlan quinnajnahuatia on majtlactli huan ome inomachtijcahuān, onejcuanij ompa, niman oyaj para otemachtito niman otenojnotzato ne ipan ipueblos on regióñ.

² Ijcuac Juan yejhuan tzacuticatca oquimat tlinon Cristo quichihuaya, yejhua oquintitlan omemej inomachtijcahuān ³ para quitlajtoltisquej tla yejhua melahuac Cristo yejhuan ye oncaj para huajlas, noso yej quichasquej ocse.

⁴ Quemaj Jesús ijquin oquinanquilij on inomachtijcahuān Juan:

—Xhuiyan niman xquijlican Juan on tlen nemejhuamej nenquitztoquej niman nencactoquej. ⁵ Xtlajtlajtohuilican ica aman tlachaj on yejhuan ciegos, niman ica on yejhuan huilatzitzintin quistinemij, niman on yejhuan palaniyaj innacayo pajtij, niman on yejhuan nacastatzamej tlacaquij, niman on yejhuan mimiquej yolihuij* niman noquetztehua ipan intlalcon. Niman no xtlajtlajtohuilican ica on yejhuan mayanquej caquij on cuajli tlajtojli yejhuan quitemaca temaquixtilistli. ⁶ Dios quitiochihuas on yejhuan xqueman ometlamatis san nopampa.

⁷ Chica inomachtijcahuān Juan oyajquej, Jesús opeu quinnojnotza on tlacamej ica Juan, niman oquimijlij:

—¿Aquinon onenquitatoj ne tlapatlaco? ¿Onenquitatoj se tlacatl yejhuan nolinia itlaneltoc quen se ohuatl nolinijticas ica on ajacatl? ⁸ ¿Aquinon, tej, onenquitatoj? ¿Onenquitatoj se tlacatl yejhuan tlaquempepetlacaj? Nemejhuamej nenquimatztoquej ica on yejhuan sanoyej† tlaquempepetlacaj nemij ne inchan on reyes. ⁹ Tla ijcon, ¿aquinon onenquitatoj? ¿Onenquitatoj se tiotlajtojquetl? Quemaj on melahuac, niman yejhua más hueyixticas xquen se tiotlajtojquetl. ¹⁰ In Juan yejhua on tenojnotzquetl yejhuan itechcopia in Yectlajcuilojli ijquin quijtohua:

‡ 10:37 amará § 10:37 no merece * 11:5 son resucitados; yolij † 11:8 muy

On yejhuan noachtotenojnotzcau nictitlanis moyecapan para yejhua mitzyectlalilis mojhui para tias ipan.

¹¹ Ica tlen melahuac nemechijlia ica intzajlan nochimej on tlacamej xqueman yacaj otlacat yejhuan más hueyixticaj xquen Juan on tlacuatequijquetl. Pero in no melahuac ica on yejhuan quinocahulia ma quimandaro Dios, más hueyixticaj xquen Juan.

¹² Desde ijcuac Juan on tlacuatequijquetl opeu quiteijlia on cuajli tlajtojli niman opeu tlacuatequia hasta aman, sanoyej noyolchicahualo para quinocahuliaj Dios ne ilhuicac ma quinhuajmandarotia. Pero yejhua san hueli quinhuajmandarohua on yejhuan itech noyolchicahuaj.

¹³ Hasta ijcuac Juan ohuajlaj, nochimej on tiotlajtojquej niman on itlanahuatil Moisés otlajtlajtojquej quen ijqui Dios tlamandaros.

¹⁴ Niman tla nemejhuamej nenquinequij nenquineltocasquej intemachtil, Juan sa no yejhua on tiotlajtojquetl Elías yejhuan onijtoj ica huajlas.

¹⁵ Tla nemejhuamej nenquipiaj nemotlamachilis, xcajsicamatican on tlen oniquijtoj.

¹⁶ ¿Tlinon ica huelis niquimixtlalos on tlacamej yejhuan nemij ipan in tonaltin? Yejhuanmej ijcomej quen on telpocamej yejhuan nosehuij ne ipan plaza, niman ijquin quintzajtziliaj on intetlajsojcahuant‡:

¹⁷ “Otomechtlapichilijquej ica on acatlapitzajli quen quintlapichiliaj ipan se nonamictilistli, pero nemejhuamej xonemijtotijquej. Otomechcuicatlali-jquej ica on tlacuicajli teajman yejhuan nocuicatiaj ijcuac se miqui niman xonenchoaquej.” ¹⁸ Ijcuac Juan ohuajlaj, nosahuaya niman xitlaj coniya. Pero yejhuanmej oquijtojquej ica yejhua oquipix se xcuajli espíritu. ¹⁹ Quemaj onihuajlaj, nejhua yejhuan oninochiu Tlacatl. Ijcuac nejhua yejhuan nitlacuani niman natlini onihuajlaj, yejhuanmej oquijtojquej ica melahuac nitlacuan, niman ica sanoyej natlini. Niman oquijtojquej ica nitetlajsojcau itech on tlajtlacolejquej niman on yejhuan tlacobrarojquej ica on impuestos. Pero on ihueyi tlamatquilis§ Dios noteititia yejhua ica on tlen nochihua.

*Jesús oquimajhuac on yejhuan xcajcahuayaj on tlen xcuajli
(Lc. 10.13-15)*

²⁰ Quemaj Jesús opeu quiteijlia ijqui quen on tlacamej yejhuan chantij ipan on pueblos campa más oquichiu imilagros ica sanoyej tlajtlacohuaya. Yejhua ijquin temachiaya, pampa on tlacamej yejhuan chantij ipan on pueblos xcajcahuayaj ica quichihuayaj on tlen xcuajli. ²¹ Oquimijlij:

—¡Lástima para yejhuanmej on yejhuan chantij ipan on pueblo itoca Corazín niman ipan on pueblo itoca Betsaida! Xcuajli yes para yejhuanmej pampa Dios sanoyej quincastigaros. Ijquin quinchihuilis pampa oquitaquej miyec milagros, pero xocajcajquej ica oquichijquej on tlen xcuajli. Tla on chanejquej ipan on huejhueyican intoca Tiro niman Sidón quitasquiaj on milagros yejhuan oquitaquej Corazín niman Betsaida, yejhuanmej cahuasquiaj ica quichihuasquiaj on tlen xcuajli. Niman yejhuanmej quitlalisquiaj tlaquentli tlachijchiutli ican ichtli niman quinotemilisquiaj tliconextli ipan intzonetecon, para quiteititisquiaj ica yocajcajquej quichihuaj on tlen xcuajli. ²² Niman nemechijlia ica ipan on tonajli ijcuac Dios tetlaxtlahuilis, yejhuanmej más hueyi tlajyohuilistli quiselisquej xquen on tlacamej yejhuan ochantijquej ne Tiro niman Sidón. ²³ Niman yejhuan chanejquej ipan on pueblo Capernaum sanoyej nohueyimatij ipampa on hueyilistli yejhuan quipia ipueblo. Pero inhueyimatilis quintlajcalis ne mictlan, pampa tla

‡ **11:16** amigos de ellos § **11:19** sabiduría

ne ipan on hueyican itoca Sodoma nochihuasquiaj on milagros yejhuan onochijquej ipan, manisquia on hueyican oc* nemí. ²⁴ Niman nemechijlia ica ipan on tonajli ijcuac Dios tetlaxtlahuilis, yejhuatej on yejhuan chantij ne Capernaum más hueyi tlajyohuclistli quiselisquej xquen on tlacamej yejhuan ochantijquej ne Sodoma.

Jesús nochí tlacatl oquinotz para itech ma huiyan niman ijqui quiselisquej nesehuilistli para inalma

(Lc. 10.21-22)

²⁵ Ipan on tonajli Jesús oquichiu oración. Ijquin oquijtoj:

—Nimitzyectenehua noTajtzin, tehua yejhuan iTeco on ilhuicac niman in tlalticpactli. Nimitzyectenehua pampa nochí in tlajtlamach† xotiquin-machiltij on tlajmatquej niman on tlacajsicamatquej, pero otiquinmachiltij on yejhuan quen coconej. ²⁶ Melahuac noTajtzin, ijcon oticchiu quen oticnec.

²⁷ 'Nochi tlajtlamach noTajtzin onechmactilij. Xacaj nechixmati, nejhua yejhuan niiConeu, yej san yejhua on noTajtzin. Niman xacaj quixmati noTajtzin, yej san nejhua yejhuan niiConeu niman on yejhuan niquntlapejpenia para niquntitia.

²⁸ 'Xhuajlacan notech nemochimej‡ yejhuan yonensiauquej pampa hasta aman xnenquinextiaj temaquixtilistli niman pampa on tlajtlamach tepaj-solohualistin sanoyej mechyetiliaj, niman nejhua nemechmacas nesehiji. ²⁹ Xmocahuilican ma nemechpalehui niman xmocahuilican ma nemechmachti, pampa nejhua niyolsejqui niman niyolyemanqui§, niman notech nenquinextisquej nesehuilistli para nemoalma. ³⁰ On temachtijli yejhuan nejhua nemechmaca xtepopoloj para nenquitlacamatisquej, niman on tlanahuatijli yejhuan nejhua nemechmaca no xtepopoloj.

12

Jesús quipia tequihuayotl para quijtos tlinon cuajli para se quichihuas ipan on tonajli ijcuac nosehuiaj on hebreos

(Mr. 2.23-28; Lc. 6.1-5)

¹ Ipan se tonajli ijcuac nosehuiaj on hebreos, Jesús nejnentiaya ne cam-paca tlatocyoj ican trigo. Inomachtijcahuan opeu apismiquij niman opeu quimaxicopinaj on trigo para quicuasquej on iteyo. ² Ijcuac on fariseos ijcon oquitaquej, oquijlijquej Jesús:

—Xquinta, monomachtijcahuan tequitij, niman totlanahuatil xtech-ahuilia para titequitisquej ipan on tonajli ijcuac on tlacamej nosehuiaj.

³ Pero yejhua oquimijlij:

—¿Nemejhuatej xqueman nenquimomachtianij on tlen oquichijca David ijcuac yejhua niman itehuicalhuan oapismiquej? ⁴ Yejhua ocalac ichan Dios niman ihuan itehuicalhuan oquicuaj on pan yejhuan oquihuentlalili-jcaj Dios, masqui on itlanahuatil Moisés san quincahuiliaya on tiopixquej quicuayaj on pan. ⁵ ¿Noso ca yej xqueman nenquimomachtiaj on itlanahuatil Moisés, ica on tiopixquej ipan hueyi tiopan xnosehuiaj ipan on tonaltin ijcuac nosehuiaj on hebreos, niman ica yejhuatej xquipiaj tlajtlacojli ijcuac ijquin quichihuaj? ⁶ Tej, nemechijlia ica nican nemi on yejhuan más hueyixtacaj xquen on hueyi tiopan. ⁷ On Yectlajcuilojli quijtohua: “Nejhua nicnequi teicnelilistli*”, niman ma ca yej xquinhuentlalican on yolquej.”

* ^{11:23} todavía; sanquen † ^{11:25} cosas ‡ ^{11:28} todos ustedes; nannochti, yejmochimej, anochimej, innochimej, emmochimej § ^{11:29} soy humilde * ^{12:7} misericordia

Tla nencajsciamatisquiaj tlinon quijtosnequi yejhua in Yectlajcuilojli, xnenquintlajtlacolmacasquiaj on tlacamej yejhuan xmelahuac quichihuaj on tlen ica nenquintlajtlacolmacaj. ⁸ Tej, nejhua yejhuan oninochiu Tlacatl nicpia tequihuayotl para niquitos tlinon cuajli para se quichihuas ipan on tonajli ijcuac on hebreos nosehuiaj.

*Jesús oquipajtij on tlacatl yejhuan quipiaya se ima huaqui
(Mr. 3.1-6; Lc. 6.6-11)*

⁹ Quemaj Jesús onejcuanij ompa, niman ocalaqito ipan on intiopan on hebreos. ¹⁰ Ompa nemiya se tlacatl yejhuan quipiaya se ima huaqui. No nemiyaj quesquimej tlacamej yejhuan quinequiyaj quinextilisquej tlinon ica huelisquej quiteixpanhuisquej Jesús. Yejhua ica oquitlajtoltijquej:

—¿Totlanahuatil techcahuilia para ticpajtisquej se cocoxqui ipan on tonajli ijcuac titosehuiaj?

¹¹ Jesús oquinnanquilij:

—Tla semej nemejhuamej quipia se iborreguito niman on borreguito onhuetzi ijtic se pozo ipan on tonajli ijcuac on hebreos nosehuiaj, ¿xau para conquixtia? ¹² Tej, se tlacatl más hueyi quijtosnequi xquen on borreguito. Ijcon, tej, totlanahutil techcahuilia ticchihuasquej on tlen cuajli ipan on tonajli ijcuac titosehuiaj.

¹³ Ijcuacon Jesús oquijlij on tlacatl yejhuan quipiaya se ima huaqui:

—Xmelhua moma.

Niman ijcuac oquimelau, opajtic on ima, niman cuajli onocau quen on ocse ima. ¹⁴ Quemaj oquisquej on fariseos ipan intiopan on hebreos, niman opejquej notlajtoltiaj quen ijqui huelisquej quimictisquej Jesús.

Jesús oquinnahuatiij on tlacamej para ma ca quiteijlisquej aquin yejhua

¹⁵ Jesús oquimat on tlinon quinequij quichihuasquej niman yejhua ica onejcuanij. Miyec tlacatl oyaj ihuan, niman yejhua quimpajtiaya nochimej on cocoxquej. ¹⁶ Yejhua quinnahuatiaya para ma ca quiteijlisquej aquin yejhua.

¹⁷ Yejhua in onochiu para otenquis on tlen oquiteijlijca on tiotlajtojquetl Isaías, ijcuac oquijtoj:

¹⁸ In yejhua notequipanojcau yejhuan onictlapejpenij, quijtohua Dios.

Yejhua nictlajsojtla†, niman itech nipacticaj. Ipan nictlalia noEspíritu para quimijlis on xhebreos ica cada se nictlaxtlahuilis quen quitocarohua on tlen quichihua.

¹⁹ Xtehuan nocamatlanis, nion xtehuan notzajtzilis. Niman no xacaj caquis sa tzajtzi ijcuac temachtia ipan calles.

²⁰ Yejhua xquitlajcali on yejhuan xcojtic xijqui quen se tlacatl quitlajcali se acatl yejhuan xcuajli. Yejhua xquisehuis itlahuil ialma on yejhuan xhueyi tlahuijli quipia ipan ialma, xquen se tlacatl quisehuia yejhua on mecha yejhuan sa popocaticaj. Yejhua quimpalehuijtias hasta queman tetlanis nochí on tlen cuajli.

²¹ Niman on xhebreos quineltocasquej ica yejhua quinmaquixtis.

*On fariseos oquijtohuilijquej Jesús ica quipia ipoder on diablo
(Mr. 3.19-30; Lc. 11.14-23; 12.10)*

²² Quemaj ocuiquilijquej Jesús se tlacatl ciego niman nontzin yejhuan quipia se xcuajli espíritu. Jesús oquipajtij. Ijcon, tej, on tlacatl ohuel otlachix niman ohuel otlajtoj. ²³ Nochi tlacatl otlamojcaitac, niman oquijtoj:

—¿Manin in yejhua huejca teixhuiu‡ itech David yejhuan Dios oquitlapejpenij para techmandaros?

† 12:18 le amo ‡ 12:23 descendiente

²⁴ Pero ijcuac on fariseos ijcon ocacquej, oquijtojquej:
—Yejhua in tlacatl quintequixtilia on xcuajcualtin espíritus san ican ipoder on diablo, on yejhuan inhueyi tlayecancau.

²⁵ Jesús quimatzticatca tlinon yejhuamej quinemilijticatcaj, niman oquimijlij:

—Tla se país notlajcoxelohua, xoxotoni. Niman nochí hueyican noso chanyotl§ yejhuan noxexelohuaj ican tlahuejli, xqueman huejcahuij san secan nemij. ²⁶ Satanás, tej, quinmandarohua on xcuajcualtin espíritus. Niman tla sa no yejhua quitequixtilia on xcuajcualtin espíritus, ¿quen ijqui, tej, huelis san secan nemisquej? ²⁷ Tla nejhua nictequixtilia on xcuajcualtin espíritus ican ipoder on diablo quen nennechenehuiliaj, tla ijcon, ¿aquinon quinmaca poder para quitequixtiliaj on yejhuan nopohuaj nemotech? Sa no yejhuamej, tej, quijtosquej tla melahuac noso ca on tlen onennechijlijquej. ²⁸ Pero nejhua nictequixtilia on xcuajcualtin espíritus ican iEspíritu Dios, niman yejhua in quijtosnequi ica Dios yohuajlaj para mechmandaros.

²⁹ ¿Quen ijqui, tej, huelis yacaj calaquis ichan se tlacatl yejhuan sanoyej* cojtic niman cuilis on tlen quipia, tla xachtopa quisalohua? San ijcon, tej, huelis quixtilis on tlen yejhua quipia.

³⁰ 'On yejhuan xnohuan nopohua, quejecohua quiteltlalis notequiu. Niman on yejhuan xnohuan pixca, quichajchayahua on tlaquilyotl. ³¹ Yejhua ica nemechijlia ica Dios huelis quintlapojpolhuis nochí intlatlacoilhuan on tlacamej niman nochí tlahuijhuicaltilistli. Pero tla yej cuijhuicaltis on Espíritu Santo, yejhua xqueman quintlapojpolhuis. ³² Niman san aquinon yejhuan nechtenehuilis se tlajtojli yejhuan xcuajli nejhua yejhuan oninochiu Tlacatl, Dios huelis quitlapojpolhuilis, pero on yejhuan quitenehuilis tlen xcuajli on Espíritu Santo, Dios xquitlapojpolhuis ipan in nemilistli nion ipan ocse.

On tlacatl ixmachyoj ican itlajtol (Lc. 6.43-45)

³³ 'Tla on cojtlaquilyotl yejhua cuajli, quitlaquitia cuajli itlaquiliyo. Niman tla on cojtlaquilyotl yejhua xcuajli, xcuajli tlaqui itlaquiliyo. Yejhua ica, tej, on cojtlaquilyotl nenquixmatisquej tla cuajli noso xcuajli ica on itlaquiliyo.

³⁴ ¡Tecone huan intech cohuamej! Xnenhuelisquej nenquijtosquej on tlajtlamach† tlen cuajli ijcuac nemejhuamej xnencuajcualtin. Tej, on tlen quisa ipan tecamac hualehua ne ipan teyojlo campa yejhua ica tlatentoc. ³⁵ On yejhuan cuajli tlacatl quijtohua tlajtlamach tlen cuajli pampa ipan iyojlo quipia on tlen cuajli. Niman on yejhuan xcuajli tlacatl quijtohua tlajtlamach tlen xcuajli pampa ipan iyojlo xquipia on tlen cuajli. ³⁶ Niman nejhua nemechijlia ica ipan on tonajli ijcuac Dios quintlaxtlahuilis on tlacamej, nochimej yejhuan quimacasquej cuenta Dios nochí on tlen camaijnehuaj. ³⁷ Ijcon, tej, ican nemotlajtol yejhuan cuajli xnemotlajtlacolmacasquej, pero ican nemotlajtol yejhuan xcuajli nemotlajtlacolmacasquej.

Yejhua on xcuajcualtin tlacamej oquitlajtlanilijquej Jesús ma quintlamajhuisolti ica se milagro

(Mr. 8.12; Lc. 11.29-32)

³⁸ Quemaj semej fariseos niman on yejhuan temachtijquej ican itlanahuatil Moisés oquijlijquej Jesús:

—Temachtijquetl, ticnequij tiquitasquej xchihua itlaj tlama jhuisojli milagrosa.

39 Jesús oquimijlij:

—On xcuajcualtin tlacamej, yejhuan ixcoejehuaj Dios quen se sihuatl ixcoejehua ihuehuentzin, quinequiij quitasquej se tlamajhuisojli milagrossa. Pero xniqintitis ocse más, yej san yejhua on tlen oquichiu on tiotlajtojquetl Jonás. **40** Ijcon quen Jonás onen yeyi tonajli niman yeyi yehuajli ijtic on hueyi michin, no ijqui nejhua yejhuan oninochiu Tlacatl yeyi tonajli niman yeyi yehuajli ninemis ne ijtic on tlajli. **41** On yejhuan ochantijquej ne ipan on hueyican itoca Nínive ocacquej Jonás yejhuan oquimijlij on itemachtil Dios. Niman ijcuac ocacquej, yejhuatej ocajcajquej ica quichihuaj on tlen xcuajli. Tej, nemechijlia ica nican nemi on yejhuan más hueyixticaj xquen Jonás, niman on tlacamej yejhuan aman nemij xcajcahuaj ica quichihuaj on tlen xcuajli. Yejhua ica ijcuac on yejhuan aman nemij notelquetzasquej ixpan Dios ipan on tonajli ijcuac yejhua quintlaxtlahuilis nochimej, on yejhuan ochantijquej ne Nínive noquetztehuasquej niman quintlajtlacolmacasquej in tlacamej. **42** No ijqui on sihuatlamandarojquetl ne Sur ohualeu ne campa sanoyej huejca para ocaquico on itlamatquilis Salomón. Tej, nemechijlia ica nican nemi on yejhuan más hueyixticaj xquen Salomón. Yejhua ica on sihuatlamandarojquetl ne Sur no noquetztehuas ipan on tonajli ijcuac Dios quintlaxtlahuilis nochimej, niman yejhua quintlajtlacolmacas in tlacamej yejhuan chantij ipan in tonaltin.

*Jesús otemachtij ica se xcuajli espíritu yejhuan onocuep itech se tlacatl
(Lc. 11.24-26)*

43 Ijcuac se xcuajli espíritu quisa ijtic se tlacatl, pehua quistinemi campa tlayohuatoc. Quitejtemojtinemi canon nosehuis. Niman ijcuac xhueli quinextia, quinemilia: **44** “Ocsejpa nias ne nochan campa onquis.” Ijcuac yejco, quinextia on tlacatl quen se cajli yejhuan xacaj quitequitiltia, tlachpancan ijtic, niman cuajli tlaojoncaj. **45** Quemaj yau cominana ocse chicomemej más xcuajcualtin espíritus xquen yejhua, niman nochimej calaquiij para chantisquej ijtic on tlacatl. Ijcuacon on tlacatl más sanoyej xcuajli nocahua xquen ijcuac san se on xcuajli espíritu quipiaya. No ijqui impan nochihuas in xcuajcualtin tlacamej yejhuan chantij ipan in tonaltin.

*Tla se quichihuas tlen Dios quinequi, yejhua icniu yes Jesús niman inan yes
(Mr. 3.31-35; Lc. 8.19-21)*

46 Jesús oc‡ quinnojnotzticatca on tlacamej, ijcuac oajsiquej inan niman icnihuan. Onocajquej ipan ojtli, niman quinequiyaj ihuan tlajtosquej. **47** Yacaj oquijlij Jesús:

—Monan niman mocnihuan ompa nemij ipan ojtli, niman mitznotzasnequij.

48 Pero yejhua oquinanquilij niman oquijlij on yejhuan oquimachiltij:

—¿Aquinon on nonan, niman aquinomej on nocnihuan?

49 Quemaj ocominmajpilhuij on inomachtijcahan, niman oquijtoj:

—In yejhuatej nonan niman nocnihuan, **50** pampa san aquinon yejhuan quichihuia on tlen quinequi noTatzin ilhuicac chanej, on yejhua nocniu noso yejhua nonan.

13

*Jesús oquixtij se ejemplo itech se tlaxinijquetl
(Mr. 4.1-9; Lc. 8.4-8)*

‡ **12:46** todavía; sanquen

¹ Ipan sa no yejhua on tonajli, Jesús oquis ne ipan on cajli niman onotlalij ne itenco on mar. ² Ica sanoyej* miyec tlacatl onosentlalij ne campa yejhua nemiya, Jesús otlejcoc ipan se barco niman onotlalij, niman nochí tlacatl onocau ne itenco on mar. ³ Niman opeu quinmachtia miyec tlajtlamach† ican ejemplos. Quimijliaya:

—Sen tlaxinijquetl oyaj tlaxinito. ⁴ Ijcuac tlaxinijtiaya, sequi xinachtli oxinito ipan ojtli, niman on totomej ohualajquej niman ocuajquej. ⁵ Ocsequi xinachtli oxinito ipan tepetlayoj campa xmás oncaj tlajli. On xinachtli nimantzin oquis, pampa xmás huejcatlan oncatca on tlajli campa oxin. ⁶ Pero ijcuac oquis on tonaltzintli, ocoseu imilyo on trigo. Niman ica xhuejcatlan quipiaya inelhuayo, ohuajhuac. ⁷ Ocsequi xinachtli oxinito intzajlan on huitzcojin. On huitzcojin saniman onoscaltijquej niman oquixomictiquej imilyo on trigo. ⁸ Pero ocsequi xinachtli oxin ipan on cuajli tlajli, niman oquipix cuajli itlaquiliyo. Sequi xinachtli oquitlaquitij se ciento iteyo, ocsequi sesenta, niman ocsequi treinta. ⁹ Tla nemejhuamej nenquipiaj nemotlamachilis, xcajsicamatican on ejemplo.

*Jesús oquimijlij inomachtijcahuan tlica tenojnotza ican ejemplos
(Mr. 4.10-12; Lc. 8.9-10)*

¹⁰ Quemaj on nomachtijquej oquinisihuijquej Jesús, niman oquitlajtoltijquej:

—¿Tlica‡ tiquinnojnotza on tlacamej ican ejemplos?

¹¹ Yejhua oquimijlij:

—Nemejhuamej Dios yomechcahuilij para nenquimatisquej on tlinon iyanticatca quen ijqui yejhua tlamandarohua. Pero yejhamej in tlacamej xquincahuilia ma quimatican. ¹² San aquinon yejhuan cajsicamati itemachtil Dios, Dios quipalehuis para más cajsicamatis sanoyej miyec. Pero on yejhuan xcajsicamati itemachtil Dios, quixtilisquej on tlen achijtzin cajsicamati. ¹³ Yejhua ica niquinnojnotza ican ejemplos, pampa masqui quitaj on tlen nicchihua, yejhamej xquinomacaj cuenta, niman masqui caquij on tlen niquijtohua, yejhamej xcajsicamatij. ¹⁴ Ijcon, tej, cuajli impan nochihua tlen on tiotlajtojquetl Isaías oquijtoj:

Nemejhuamej ican nemonacashuan nentlacaquisquej, pero xitlaj§ nencajsicamatisquej. Ican nemixtololojhan nentlachasquej, pero xnennquimatisquej tlinon quijtosnequi on tlen nenquitasquej.

¹⁵ Yejhua in nochihua, pampa intlamachilis in tlacamej xtequiti. Yejhamej nonacastzajtzacuasquej niman nixtzajtzacuasquej para ma ca tlachasquej ican imixtololojhan, nion ma ca tlacaquisquej ican innacashuan, nion ma ca itlaj cajsicamatisquej ican intlamachilis, nion ma ca nocuepasquej notechica para nejhua niquinmaquixtis.

¹⁶ Pero Dios mechtiochihua nemejhuamej, pampa nentlachaj ican nemixtololojhan, niman nenquimatiij tlinon quijtosnequi on tlen nenquitaj. Niman no nencajsicamatij on tlen nenaquij niquijtohua. ¹⁷ Ica tlen melahuac nemechijlia ica miyequej tiotlajtojquej niman on yejhuan cuajcualtin tlacamej sanoyej oquinequej quitasquej yejhua in tlen nemejhuamej nenquitaj, pero xoquitaquej. Niman yejhamej sanoyej oquinequej caquisquej in tlen nemejhuamej nenaquij, pero xocacquej.

* **13:2** mucha † **13:3** cosas ‡ **13:10** ¿por qué?; ¿tline? § **13:14** nada; coxtla

*Jesús oquintlajtlajtohuilij inomachtijcahuān tlinon quijtosnequi iejemplo on tlaxinijquetl
(Mr. 4.13-20; Lc. 8.11-15)*

¹⁸ 'Xcaquican, tej, on tlen quijtosnequi iejemplo on tlaxinijquetl. ¹⁹ On ojatlí yejhuan ipan oxinito quesqui xinachtli quijtosnequi inyojo on tlacamej yejhuan ica caquij itlajtol Dios yejhuan quimijlia ica Dios quinequi quinmandaros, niman xcajsicamatij. Yejhua ica on Satanás huajlau niman quinquixtilia itlajtol Dios ipan inyojo. ²⁰ On tlajli yejhuan tepetlayoj quijtosnequi inyojo on tlacamej yejhuan ica cuelcaquij itlajtol Dios niman ican pactli quiseliaj. ²¹ Pero yejhua in tlacamej xmás cuajli quitzquiaj on tlajtojli. Yejhua ica, ijcuac impan huajlau on tlen tepajsoloj niman on tlen tetlajyohuiltia ipampa itlajtol Dios, nimantzin cahuaj intlaneltoc. ²² On tlajli yejhuan huitzyoj quijtosnequi inyojo on tlacamej yejhuan cuelcaquij itlajtol Dios. Pero pampa sa comatztoquej quen ijqui nopalotisquej niman sanoyej quinequij notomintisquej, quelcahuaj itlajtol Dios. Ijcon, tej, itlajtol Dios xhueli quimpalehuiya yejhamej. ²³ Pero on cuajli tlajli quijtosnequi inyojo on tlacamej yejhuan ica cuelcaquij niman cajsicamatij itlajtol Dios, niman intech quisa se cuajli tlaquiliyotl. Yejhamej sa no ijqui quen on xinachtli yejhuan oquitlaquitij se ciento iteyo, niman ocsequimej sa no ijqui quen on yejhuan oquitlaquitij yepoajli*, noso sa no ijqui quen on yejhuan oquitlaquitij sempoajli† huan majtlactli.

Jesús oquixtij se ejemplo itech on xcuajli xojtli

²⁴ Jesúz no oquintlalilij in ocse ejemplo:
—Niman ipan in tlalticpactli campa Dios tlamandarohua sa no ijqui quen se tlajli campa se tlacatl quitoca ican cuajli xinachtli. ²⁵ Pero ijcuac iteco on tlajli niman itequitcahuān cochticatcaj, ocalquito se itlahuelicniu niman oquitocac on xcuajli xojtli intzajlan on trigo. Niman quemaj onejcuani. ²⁶ Ijcuac on trigo onoscaltij niman omiyahuatlapan, no ompa ones on xcuajli xojtli. ²⁷ Quemaj on tequitquej ohualajquej itech on iteco on tlajli, niman oquijlijquej: “Señor, tla yejhua on xinachtli yejhuan otictocac ne ipan on motlal cuajli catca, ¿canon, tej, ohualeu on xcuajli xojtli?” ²⁸ Niman iteco on tlajli oquimijlij: “Yacaj notlahuelicniu oquichiu yejhua on.” Quemaj itequitcahuān oquitlajtoltijquej: “¿Ticnequi para ma ticuihuitlatij on xcuajli xojtli?” ²⁹ Niman yejhua oquimijlij: “Ca, xnicnequi, pampa ijcuac nencuihuitlasquej on xcuajli xojtli, no huelis tehuan nencuihuitlasquej on trigo. ³⁰ Más cuajli xcahuilican ma ihuan noscalti hasta ma chicahui on trigo. Niman ijcuac yochicau, niquinnahuatis on pixcaquej achtopa ma quisentlalican on xcuajli xojtli niman ma quisalocan por manojos para tlatlas. Niman quemaj niquinnahuatis ma quisentlalican on trigo niman ma quitlalican ipan nocuescon.”

Jesús oquixtij se ejemplo itech iteyo on mostaza

(Mr. 4.30-32; Lc. 13.18-19)

³¹ Jesúz no oquintlalilij yejhua in ocse ejemplo:
—On tlacamej yejhuan Dios quinmandarohua ipan in tlalticpactli miyequixtihuij sa no ijqui quen iteyo mostaza ijcuac se tlacatl yoquitocac ipan itlal nomayehualojtiu. ³² On melahuac ica yejhua más pitentzin xinachtli xquen nochimej on xinachtin yejhuan onoquej. Pero ijcuac noscaltia, nochihua más hueyi xquen nochí on tlen quitocaj. Yejhua hueyiya quen itlaj hueyi

* **13:23** sesenta † **13:23** Sempoajli quitosnequi veinte, niman sempoajli huan majtlactli quitosnequi treinta.

cojtlit, niman hasta on totomej huajlahuij itech niman notepajsooltiaj ipan imatzitzihuan.

*Jesús oquixtij se ejemplo itech on tlaxocolilistli
(Mr. 4:33-34; Lc. 13:20-21)*

³³ No oquintlalilij yejhua in ocse ejemplo:

—On tlacamej yejhuan Dios quinmandarohua ipan in tlalticpactli ijcomej quen on tlaxocolilistli[§] yejhuan se sihuatl quimanelohua ican yeji tlatemachihuajli harina hasta queman nochi najcocui.

³⁴ Nochi yejhua in Jesús oquimijlij on tlacamej ican ejemplos niman xitlaj* quimijliaya tla xican ejemplo. ³⁵ Yejhua ijquin oquichiu san para otenquis on tlen oquijtoj on tiotlajtojquetl ijcuac ijquin oquijcuiloj:

Nitenojnotzas ican ejemplos, niman niquipitos on tlajtlamach yejhuan ichataca† oncaj desde ijcuac Dios oquichijchiu in tlalticpactli.

Jesús oquintlajtlajtohuilij inomachtijcahuau tlinon quijtosnequi iejemplo on xcuajli xojtli

³⁶ Quemaj Jesús oquimijlij on tojlan ica ye yau. Quemaj ocalaquito ipan on cajli, niman inomachtijcahuau oquinisihuijquej, niman oquijlijquej:

—Cuajli xtechmelajcaili iejemplo yejhua on xcuajli xojtli yejhuan oquis ne itzajlan on trigo.

³⁷ Ijcuacon Jesús oquimijlij:

—On yejhuan quitoca on cuajli xinachtli sa no nejhua yejhuan oninochiu Tlacatl, ³⁸ niman on tlajli yejhuan trigojyoj sa no yejhua in tlalticpactli. On cuajli xinachtli quijtosnequi on tlacamej yejhuan teconehuan itech Dios, niman on xcuajli xojtli quijtosnequi on yejhuan teconehuan itech diablo, ³⁹ niman on tetlahuelicniu yejhuan oquitocac on xcuajli xojtli sa no yejhua on diablo. On tonaltin ijcuac on pixcaquej quitequij on trigo quijtosnequi on tonaltin ijcuac tlatlalpolihuis, niman on pixcaquej yejhuan quitequij on trigo sa no yejhuatej on ilhuicactequitquej†. ⁴⁰ Ijcon quen on xcuajli xojtli nosenthalia niman conxinaj ipan tlilt para tlatla, no ijqui nochihuas ijcuac tlatlalpolihuis. ⁴¹ Nejhua yejhuan oninochiu Tlacatl niquinhuajtitlanis noilhuicactequitcahuau para quinhuajsentlalisquej niman quinquixtisquej intzajlan on tlacamej yejhuan niquinmandarohua nochimej on yejhuan quichihuaj para ocsequimej ma tlajtlacocan, niman on yejhuan quichihuaj on tlen xcuajli. ⁴² Niman cominxinisquej ne tlico campa yejhuatej sanoyej chocasquej niman notlantotopotzasquej. ⁴³ Ijcuacon on yejhuan cuajcualtin petlanisquej quen on tonaltzintli ne campa inTajzin tlamandarohua. Tla nemehuamej nenquipiaj nemotlamachilis, xcajsicamatican on ejemplo.

Jesús oquixtij se ejemplo itech se tesoro yejhuan iyanticaj

⁴⁴ 'On tlacatl yejhuan quinequi Dios ma quimandaro quen se tlacatl yejhuan oquinextij on tesoro ipan se tlajli campa iyanticatca. Ijcuac oquinextij on tesoro, ocsejpa ompa oquian. Niman ican paquillistli oyaj ichan, niman oquinamacato nochi tlen quipia. Quemaj ocou on tlajli campa oquinextij on tesoro.

Jesús oquixtij se ejemplo itech on perla

⁴⁵ 'On tlacatl yejhuan quinequi calaquis ne campa Dios tlamandarohua, no quitejtemojtinemi on perlas yejhuan sanoyej cualtetzitzintin. ⁴⁶ Niman

‡ 13:32 árbol § 13:33 levadura * 13:34 nada; coxtla † 13:35 secreto ‡ 13:39 ángeles:
Angeles tequitij ne ilhuicac niman nican ipan in tlalticpactli.

ijcuac quinextia se yejhuan sanoyej patioj, yau ichan, niman quinamaca nochi tlen quipia, niman cohua on perla.

Jesús oquixtij se ejemplo itech on matlatl

⁴⁷ 'Ne campa Dios ilhuicac chanej tlamandarohua no ijqui quen se matlatl yejhuan conchapaniaj ipan mar niman quisentlalia miyec sesetlamantic michimej. ⁴⁸ Ijcuac temi on matlatl, on michajsiquej quixtiaj ne itenco on mar, niman ompa notlaliaj para quintlapejpeniaj on michimej. Yejhamej quejehuaj on yejhuan cuajcualtin ipan chiquiutin, niman quixiniaj on yejhuan xcuajcualtin. ⁴⁹ Ijcon nochihuas ijcuac tlatlalpolihuis. On ilhuicactequitquej[§] quisasquej para quinxelosquej on yejhuan xcuajcualtin tlacamej intech on yejhuan cuajcualtin tlacamej. ⁵⁰ Niman cominxinisquej on xcuajcualtin tlacamej ne tlico campa sanoyej chocasquej niman notlantisquej.

Jesús oquijtoj ica cuajli para se temachtijquetl ican tlanahuatijli quipias on yencuic temachtijli niman on yejhuan xencuic temachtijli

⁵¹ Quemaj Jesús oquintlajtoltij:

—¿Nencajscamatij nochi yejhua in?

Yejhuamej oquijtojquej:

—Quemaj, toTeco.

⁵² Quemaj oquimijlij:

—Ijcuac se temachtijquetl ica on tlanahuatijli nomachtia quen Dios tlamandarohua, hueli quitemachtia on yencuic temachtelistli niman on yejhuan xencuic. Yejhua, tej, sa no ijqui quen se tlayejejquetl ipan se cajli yejhuan quimati quen ijqui quixtia itech on tlen quipia tlajtlamach yejhuan yencuic niman yejhuan xencuic.

On chanejquej ne Nazaret xoquiselijquej Jesús

(Mr. 6.1-6; Lc. 4.16-30)

⁵³ Ijcuac Jesús otlan quiteijlia in ejemplos, oyaj. ⁵⁴ Ijcuac oajsic ipan ipueblo, opeu temachtia ne ipan intiopan on tlacamej. Yejhamej oometlamatquej niman ocualancatlanemilijquej. Yejhua ica quijtohuayaj:

—¿Canon ohuelito in tlacatl on tlamatquilistli*? ¿Quen ijqui hueli quichihua yejhua in milagros? ⁵⁵ In, tej, yejhua iconeu on cojxinqui, niman no yejhua inan María. Yejhua icnihuan Jacobo, José, Simón niman Judas. ⁵⁶ Niman nochimej icnihuan yejhuan sihuamej no nican totzajlan chantij. ¿Canon, tej, hueli quimati niman quichihua nochi yejhua in tlajtlamach?

⁵⁷ Niman yejhamej ocualanquej itechcopa Jesús. Pero yejhua oquimijlij:

—Sen tiotlajtojquetl nochihuiyan quitlacaitaj, pero ipan ipueblo niman intzajlan ichanchanecahuan† xquitlacaitaj.

⁵⁸ Niman ompa xoquichiu miyec milagros, pampa yejhamej xquineltocayaj.

14

Juan on tlacuatequijquetl omic

(Mr. 6.14-29; Lc. 9.7-9)

¹ Ipan on tonaltin, Herodes, on gobernador ne Galilea, ocac on tlen huejhueyi quichihuaya Jesús. ² Niman yejhua oquimijlij itequitcahuan yejhuan quipalehuiyaj para tlamandarohua:

§ **13:49** ángeles * **13:54** sabiduría † **13:57** su familia

—On yejhua Juan on tlacuatequijquetl. Yejhua yonoyolihuitij* niman yonoquetzteu intzajlan on mimiquej. Yejhua ica yejhua hueli quichihua on milagros.

³ Herodes ijcon oquijtoj, pampa yejhua otlanahuatij ma cajsican Juan, niman ma quisalocan ican teposcadenas niman ma quitzacuacan para quipactis Herodías yejhuan isihuau. Yejhua in Herodías isihuau catca Felipe on icniu Herodes. ⁴ Herodes oquitzacu Juan pampa yejhua quijliaya:

—Itlanahuatil Dios xmitzcahuilia ticpias isihuau mocniu quen mosihuau.

⁵ Herodes quinequiya quimictis Juan, pero quinmacajsya on tlacamej, pampa nochimej quineltocayaj ica Juan se tiotlajtojquetl. ⁶ Pero ijcuac oquichijquej ilhuitl ipan ilhui Herodes, imixpan on itenotzcahuan onijtotij ichpoch Herodías. Niman Herodes sanoyej† ocuelitac quen onijtotij on ichpochtli. ⁷ Yejhua ica oquiprometerohuilij niman onocalactij ican itlajtol para quimacas san tlinon yejhua quitlajtlanis. ⁸ Ijcuacon yejhua ican itlanahuatil inan oquijlij Herodes:

—Nican ipan se plato xnechmaca itzontecon Juan on tlacuatequijquetl.

⁹ Ijcuacon on rey Herodes onajman, pero pampa yonocalactijca ican itlajtol, niman impampa on itenotzcahuan yejhuan ihuan tlacuaj, on rey otlanahuatij para ma quimacacan. ¹⁰ Oquintitlan on isoldados ma quiquechtzontequitij Juan ne campa tzacuticaj. ¹¹ Quemaj ocuajquiquej itzontecon ipan se plato, niman oquimacaquej on ichpochtli. Quemaj yejhua oquitquic niman oquimactilij inan.

¹² Quemaj ohualajquej on yejhuan inomachtijcahuan Juan, niman oquitquiquej on itlalnacayo niman ocahuatoj ipan tlalcontli. Quemaj oyajquej oquimachiltitoj Jesús on tlinon onochiu.

*Jesús oquintlacualtij macuijli mil tlacamej
(Mr. 6.30-44; Lc. 9.10-17; Jn. 6.1-14)*

¹³ Ijcuac Jesús ijcon oquimat, onejcuanij ompa niman oyaj ipan barco campaca xacaj nemí. Pero ijcuac on tlacamej oquimatquej ica Jesús ye yau, yejhuamej oquisquej ipan on pueblos, niman onejnentiajquej ocuitlapanhuijquej. ¹⁴ Ijcuac Jesús oquis ipan on barco, oquitac ica miyec tlacatl ompa quichixticatca. Yejhua oquimicnelij niman oquimpajtij on cocoxquej yejhuan quinhuicayaj.

¹⁵ Ijcuac ye tiotlac catca, on inomachtijcahuan Jesús ohualajquej itech, niman oquijlijquej:

—Ye tiotlac, niman xacaj nican chanti. Xquintitlani on tlacamej para ma huiyan ipan on pueblitos niman ma cohuacan tlen quicuasquej.

¹⁶ Jesús oquimijlij:

—Ca, xquipiaj tlica‡ yasquej. Sa no nemejhuamej xquinmacacan tlinon quicuasquej.

¹⁷ Yejhuamej oquijlijquej:

—Pero san ticpiaj macuijli pan niman ome michin.

¹⁸ Jesús oquimijlij:

—Xnechajcuilican nican.

¹⁹ Quemaj otlanahuatij para on tlacamej ma notlajtlalican ipan on sacayoj. Quemaj ijcuac ocontilan on macuijli pan niman on ome michimej, oajcotlachix ne ilhuicac niman oquimacac tlaxtlahuijli Dios para on tlacuajli. Niman quemaj oquitlatapan on pan niman oquinmacac on inomachtijcahuan para ma quinxexelohuilican on tlacamej. ²⁰ Nochimej otlacuajquej

* **14:2** resucitó † **14:6** tanto ‡ **14:16** por qué; tline

niman cuajli oixhuiquej. Quemaj on nomachtijquej ica on tlatlajcotzitzin tlen onocau oquitemiltijquej majtlactli huan ome chiquiutin. ²¹ On yejhuan otlacuajquej canaj macujli mil tlacamej, pero xtehuamej tlapohualti on sihuamej nion on coconej yejhuan no otlacuajquej.

*Jesús onejnen ipan atl
(Mr. 6.45-52; Jn. 6.16-21)*

²² Quemaj Jesús oquinahuati on inomachtijcahuan para ma calaquican ipan on barco, niman ma yecatztiacan ipan ocse ilado on mar chica yejhua quinnahuatiaya on tlacamej. ²³ Más saquin§, ijcuac yoquintilan on tlacamej, Jesús otlejcoc ipan on tepetl para iselti oquichihuato oración. Ijcuac otlay-ohuac, Jesús iselti ompa nemiya. ²⁴ Ipan on mismo tiempo on barco ye atlajcotian yaya, niman on olas ontlahuitequiya jitech on barco, pampa sanoyej chicahuac ajacatl tlahuitequiya intech yejhamej. ²⁵ Ijcuac canaj ipan yeyi hora ica cualcan, Jesús nejnentiaya ne ixco on mar niman oquinisihuij inomachtijcahuan. ²⁶ Niman ijcuac on inomachtijcahuan oquitaquej nejnentiu ne ixco on mar, sanoyej onomojtijquej. Yejhamej oquijtojquej:

—¡Aj! ¡Ne nemi se tlamojtiloni!

Niman omojcatzajtziquej.

²⁷ Pero Jesús nimantzin oquinnotz, niman oquimijlij:

—Xmoyolchicahuacan. Nejhua niJesús. Ma ca xmomojtican.

²⁸ Ijcuacon Pedro oconanquilij, niman oquijlij:

—NoTeco, tla tejhua, xtlanahuati ma nihuiya ipan on atl hasta campa tejhua tinemi.

²⁹ Jesús oquijlij:

—Xhuajla, tej.

Ijcuacon Pedro otremoc ipan on barco, niman opeu nejnemi ipan on mar para yas campa nemi Jesús. ³⁰ Pero ijcuac oquitac on temojtij ajacatl, onomojtij niman opeu apolaqui. Quemaj ijquin otzajtzic:

—Xnechmaquixti, noTeco!

³¹ Nimantzin Jesús oquitzquij ipan ima, niman oquijlij:

—Semi achijtzin ticpia tlaneltoctli! ¿Tlica* otiometlamat?

³² Niman ijcuac yejhamej otlejcoquej ipan on barco, onoteltij on ica chicahuac ajacaya. ³³ Quemaj on yejhuan nemiyaj ne ipan barco onotlacuenquetzquej ne ixpan Jesús, niman oquimahuistilijquej. Oquijlijquej:

—Tlacaj melahuac tejhua tiiConetzin Dios.

*Jesús oquimpajtij on cocoxquej ne ipan on tlajli itoca Genesaret
(Mr. 6.53-56)*

³⁴ Niman ijcuac oquipanahuiquej on mar, oajsiquej ipan on tlajli itoca Genesaret. ³⁵ Ijcuac on tlacamej yejhuan chanejquej ipan on lugar oconixmatquej, oquitemachiltitoj nochihuiyan ipan on regiones ica Jesús ye ompa nemi. Yejhua ica oquinhuajhuicaquej nochimej on cocoxquej ne campa Jesús nemiya. ³⁶ Niman on tlacamej sanoyej oquitlajtlanilijquej para on cocoxquej ma quincahuili ma quimatoquilican, masqui san itencotzin on itlaquen. Niman nochimej yejhuan oquimatoquilijquej, opajtiquej.

15

*Jesús oquimixcoijlij on fariseos niman on temachtijquej ican tequihuajyotl ica yejhamej omexayacyequej
(Mr. 7.1-12)*

§ **14:23** después * **14:31** ¿por qué?; ¿tline?

1 Quemaj semej fariseos niman on temachtijkej ican tlanahuatijli yejhuan ohualejquej ne ipan on hueyican de Jerusalén oquinisihuijquej Jesús, niman oquitlajtoltijquej:

2 —¿Tlica* monomachtijcahuán xquitlacamatij incostumbre on achtojta-jhuan? Monomachtijcahuán, tej, xnomajtequiaj ijcuac tlacuaj ijqui quen on achtojtatajtin tlamandarohuaj.

3 Pero Jesús oquimijlij:

—¿Man tlica nemejhuamej no xnenquitlacamatij on itlanahuatil Dios, san para nenquitlacamatij on nemocostumbres? **4** Dios oquijtoj: “Xtlacaita motaj niman monan.” Niman no oquijtoj: “Yejhuan itlaj xcuajli quitenehuilis itaj noso inan, ma quimictican.” **5** Pero nemejhuamej nenquijtohuaj ica se tlacatl huelis quijlis itaj noso inan yejhuan quipolohua itlaj: “Xhuelis nimitzpalehuis ica on tlen mitzpolohua pampa nochí tlen nicpia yonicmactilij Dios.” **6** Yejhua ica on, tej, tlen nenquijtohuaj quijtosnequi ica on tlacatl xoc quitocarohua quipalehuis itaj noso inan ica on tlen quipolohua. Ijcon, tej, nemejhuamej yonencuepquej quen xitlaj† quijtosnequi on itlanahuatil Dios san para nenquitlacamatij on costumbres yejhuan otemachtijcaj on achtojtatajtin. **7** ¡Omxayacyequej! Cuajli oquijtoj on tiotlajtojquetl Isaías nemotechcopia ijcuac oquijcuiloj quen Dios oquijtoj. Oquijtoj:

8 Yejhuatej in tlacamej nechtlacaitaj ican on tlen quijtohuaj, pero xnechtla-caitaj ican inyojo.

9 San nencaj nechmahuistiliaj, pampa yejhuatej quitemachtiaj on tlanahu-tiltin yejhuan sa no yejhuatej on tlacamej oquitlalijquej quen it-lanahuatilhuan yesquiaj Dios.

Jesús otemachtij tlinon quijtlacohua se tlacatl

(Mr. 7.13-23)

10 Quemaj Jesús oquinnottz nochimej on tlacamej, niman oquimijlij:

—Xcaquican niman xcajsicamatican. **11** On tlen calaqui icamac se tlacatl xquijtlacohua, yej yejhua on tlen quisa icamac se tlacatl, yejhua quijtlacohua.

12 Ijcuacon on nomachtijkej oquinisihuijquej Jesús, niman oquijlijquej:

—¿Ticmati ica on fariseos ocualanquej ijcuac ocacquej on tlen otiquijtoj?

13 Pero yejhua oquimijlij:

—San tlen xojtli noso cojtli‡ yejhuan noTajtzin ilhuicac chanej xoquito-cac, hasta ipan inelhuayo nohuihuitlas. **14** Ma ca, tej, xquimpajsolocan. Yejhuatej quen on ciegos quinyecanaj ocsequimej ciegos. Tla se ciego quiye-canás ocse ciego, nochimej on omemej onxinisquej ne campa huejcatlan.

15 Ijcuacon Pedro oquijlij Jesús:

—Cuajli xtechmelajcaili yejhua in ejemplo.

16 Jesús oquijtoj:

—¿Nemejhuamej no oc§ xnencajsicamatij? **17** ¿Xnencajsicamatij ica nochí tlen calaqui ipan icamac se tlacatl yau ipan ijtí niman quemaj quisa ipan on tlalnacayo? **18** Pero on tlen quijtohu se tlacatl hualehua ipan iyojo, niman in quijtlacohua on tlacatl. **19** Yejhua in melahuac, pampa ipan iyojo quisa on xcuajcualtin tlamachilistli, on temictilistli, on sihuapajpatlistli, on ahuin nemelistli, on tlachtequilistli, on tetlajtolcatztehualistli, niman on tlahuijhuicaltilistli. **20** Yejhua in tlajtlamach* quijtlacohua se tlacatl. Pero tla se tlacatl xnomajtequiaj ijcuac tlacua, quen on tlayecanquej ipan on tiopan temachtiaj, on xtejtlacohua.

* **15:2** ¿por qué?; ¿tline? † **15:6** nada; coxtla ‡ **15:13** árbol § **15:16** todavía; sanquen

* **15:20** cosas

*Sen sihuatl yejhuan xhebrea oquitlajtlanilij Jesús ma quipalehui
(Mr. 7.24-30)*

²¹ Jesús onejcuani niman oyaj ne ipan on región campa nisiu intech on omemej huejhueyican intoca Tiro niman Sidón. ²² Niman se sihuatl cananea yejhuan chantiya ipan on región ohuajtzajtzitaj itech Jesús:

—¡NoTeco, huejca teixhuiu† itech David, xnechicneli‡ niman xnechpalehui! Nochpoch quipia se xcuajli espíritu niman sanoyej§ temojtij quitlajyohuiltia.

²³ Pero Jesús xoquichihuili cuenta. Quemaj on inomachtijcahuan oquinisihuijquej Jesús niman sanoyej oquitlajtlanilijquej:

—Xnahuati ma huiya pampa huajtzajtzitius tocuitlapan.

²⁴ Ijcuacon Jesús oquijtoj:

—NoTaj san onechajtitlan intech on hebreos yejhuan ixpolijtinemij.

²⁵ Pero on sihuatl oquinisihuij niman ixpan onotlacuenquetz, niman oquijlij:

—¡NoTeco, xnechpalehui!

²⁶ Pero Jesús oquijlij:

—Tejhua xtihebrea. Tla nimitzpalehuis, yejhua in sa no ijqui quen nicualtisquia se chichi intlacual on iconehuan Dios.

²⁷ Pero yejhua oquijlij:

—On melahuac, noTeco, pero hasta on chichimej quicuaj on tlacuajli tejeleinqui yejhuan xixini ipan tlajli yejhuan onehua ne ipan immesa on inteco.

²⁸ Ijcuacon Jesús oquijlij:

—¡Oh sihuatl, sanoyej hueyi motlaneltoc ticpia! Ma nochihua quen tejhua ticnequi.

Ijcuacon nimantzin opajtic on ichpoch.

Jesús oquimpajtij miyequej tlacamej

²⁹ Jesús onejcuani niman opanoc ne itenco on mar itoca Galilea. Quemaj otlejcoc ipan se tepetl niman ompa onotlalij. ³⁰ Miyec tlacamej oajsiquej ne campa yejhua nemiya, niman quinhuajhuicayaj coxomej, ciegos, nontzitzintin, on yejhuan xquipiayaj se imicxi noso inma niman miyequej ocsequimej cocoxquej. Oquintlalijquej icxitlan Jesús, niman yejhua oquimpajtij.

³¹ Ijcuac on tlacamej oquitaquej ica on nontzitzintin tlajtohuaj, on yejhuan quimpolohuaya imicxi noso inma quinmacaya, on coxomej cuajli nejne-miyaj niman on ciegos hueliyaj tlachaj, sanoyej opacatlachixquej. Niman opejquej cueyiliaj inDios on hebreos.

Jesús oquintlacaultij nahui mil tlacamej

(Mr. 8.1-10)

³² Quemaj Jesús oquinnotz on inomachtijcahuan niman oquimijlij:

—Nejhua niquimicnelia in tlacamej, pampa ye quipia yeyi tonajli ica nican nohuan nemij niman xquipiaj tlinon quicuasquej. Xnicnequi niqquintitlanis inchajchan tla xtlacuaj, pampa huelis sotlahuisquej ne ipan ojtli.

³³ Ijcuacon on inomachtijcahuan oquijlijquej:

—Pero ¿quen ijqui huelis ticnextisquej quech tlacuajli nican campa tlapat-laco yejhuan quimajxilis in miyec tlacatl?

³⁴ Jesús oquintlajtoltij:

—¿Quesqui pan nenquipiaj?

Niman yejhuatej oquijlijquej:

† **15:22** descendiente ‡ **15:22** ten misericordia de mí § **15:22** muy

—Chicome niman quesqui michintzitzintin.

³⁵ Quemaj Jesús otlanahuatij para on tlacamej ma notlajtlalican ipan tlajli.

³⁶ Quemaj yejhua ocontilan on chicome pan niman on michintzitzintin, niman oquimacac tlaxtlahujli Dios. Quemaj oquitlatapan niman oquinmacac on inomachtijcahuau, niman on inomachtijcahuau oquinxexelohuili quej on tlacamej. ³⁷ Nochimej otlacuajquej, niman cuajli oixhuiquej. Quemaj inomachtijcahuau oquitemiltijkej chicome chiquiutin ica on tlatlajcotzitzin tlen onocau. ³⁸ On yejhuan otlacuajquej canaj nahui mil tlacamej, pero xtehuamej tlapohualti on sihuamej nion on coconej yejhuan no otlacuajquej.

³⁹ Quemaj Jesús ononajnahuatij inhuan on tlacamej. Quemaj yejhua otlejcoc ipan barco niman oyaj ne ipan on región yejhuan oncaj itech on hueyican itoca Magdala.

16

*On fariseos niman saduceos oquitlajtlanilijquej Jesús ma quintiti se milagro
(Mr. 8.11-13; Lc. 12.54-56)*

¹ On fariseos niman on saduceos oquitatoj Jesús, pampa quinequiyaj quitlatlatasquej. Yejhamej oquijlijquej ma quichihua ne imixpan itlaj milagro yejhuan ne ilhuicac quisticaj para quitasquej ica Dios ocuajtitlan. ² Pero Jesús oquimijlij:

—Ijcuac on tonajli calaqui, nemejhuamej nenquijtohuaj: “Aman xquiahuis, pampa ne itech on cielo tlachichilejtoc.” ³ Niman ijcuac quisa tonajli nenquijtohuaj: “Aman quiahuis, pampa ne itech on cielo tlachichilejtoc niman tlamoxtentoc.” ¡Omxayacye quej! Nemejhuamej hueli nenquimati tlinon quijtosnequi on tlen nochihua ne itech cielo, pero xhueli nenquimati tlinon quijtosnequi on tlajtlamach* yejhuan nochihua nemotzajlan ipan in tonaltin. ⁴ In tlacamej yejhuan aman nemij xcuajcualtin niman yoquitlalcahuijquej Dios. Yejhamej nechijliaj ma nicchihua se milagro para niquntitis ica Dios onechajtitlan. Pero xniquintitis ocse más milagro, yej san yejhua on tlen oquichiu on tiotlajtojquetl Jonás.

Quemaj oquincau, niman oyaj.

Jesús oquimijlij on inomachtijcahuau para ma ca quijtocasquej on intemachtil on fariseos niman on saduceos

(Mr. 8.14-21)

⁵ Ijcuac Jesús niman on inomachtijcahuau opanotoj ipan ocse ilado on mar, on inomachtijcahuau oquelnamiquej ica xquitquij pan. ⁶ Ijcuacon Jesús oquimijlij:

—Cuajli xcaquican yejhua in. Xmotacan sa no nemejhuamej itech intlaxo-colilis† on fariseos niman on saduceos.

⁷ Quemaj on nomachtijquej opeu ijquin quinochtacaijliaj:

—On quijtohua pampa xoticuajquiquej pan.

⁸ Jesús oquimat on tlinon quinojlayaj, niman oquimijlij:

—¿Tlica‡ nenquijtohuaj ica xnenquipiaj pan? ¡Nemejhuamej semi achijtzin nenquipiaj tlaneltoctli! ⁹ ¿Oc xnencajsicamatij nion nenquelnamiquij on macuijli pan ica onicxeloj intech on macuijli mil tlacamej, niman ica más saquin§ quesqui chiquiutin onenquisentlalijquej tlen onocau? ¹⁰ ¿Nion nenquelnamiquij on chicome pan onicxeloj intech nahui mil tlacamej, niman ica más saquin quesqui chiquiutin onenquisentlalijquej tlen onocau? ¹¹ ¿Tlica, tej, xonencajsicamatquej ica xejhua on pan nictenejticatca ijcuac

* 16:3 cosas † 16:6 levadura de ellos ‡ 16:8 ¿por qué?; ¿tline? § 16:9 después

onemechijlij ica xmotacan sa no nemejhuamej itech intlaxocolilis on fariseos niman saduceos?

¹² Ijcuacon ocajsicamatquej ica Jesús xoquimijlij para ma notacan sa no yejhuamej itech on tlaxocoliliklistli de pan, yej oquimijlij para ma notacan itech on intemachtil on fariseos niman on saduceos.

*Pedro oquijtoj ica Jesús yejhua Cristo on toTemaquixtijcau
(Mr. 8.27-30; Lc. 9.18-20)*

¹³ Ijcuac Jesús oajsic ne ipan iregión on hueyican itoca Cesarea de Filipo, oquintlajtoltij on inomachtijcahuan:

—Nejhua oninochiu Tlacatl, pero on tlacamej, ¿quen quijtohuaj aquin nejhua?

¹⁴ Yejhuamej oquijlijquej:

—Sequimej quijtohuaj ica tejhua tiJuan on tlacuatequijquetl, ocsequimej quijtohuaj ica tejhua tiElías, niman más ocsequimej quijtohuaj ica tejhua tiJeremías noso yacaj ocse tiotlajtojquetl.

¹⁵ Quemaj Jesús oquimijlij:

—Niman nemejhuamej, ¿quen nenquijtohuaj aquin nejhua?

¹⁶ Ijcuacon Simón Pedro oquijlij:

—Tejhua tiCristo yejhuan Dios oquitlapejpenij para tlamandaros. Tejhua tiiConetzin Dios yejhuan melahuac nemí.

¹⁷ Jesús oquijlij:

—Dios yomitziotchiu tejhua Simón, yejhuan iconeu Jonás, pampa xacaj tlacatl mitzijlia ica nejhua niCristo yejhuan Dios onechtlapetpenij para tlamandaros. Yej noTajtzin ilhuicac chanej yejhua mitzmachiltia. ¹⁸ Niman nejhua nimitzijlia ica tejhua tiPedro yejhuan quijtosnequi “tetl”, pampa tejhua oticpantlantij on tlen melahuac. Niman nochimej on yejhuan nech-neltocasquej, quiselisquej in tlen melahuac. Niman ipoder on miquilistli xqueman huelis quintlanis. ¹⁹ Niman nimitzmacas illaves on campa Dios tlamandarohua. On tlen tejhua xtictecahuilis ma nochihua nican ipan in tlalticpactli, Dios ne ilhuicac no ijqui quijtos ica on tlacamej xquintocarohua nohuicasquej ijcon. Niman on tlen tejhua xtictecahuilis nochihua nican ipan in tlalticpactli Dios ne ilhuicac no ijqui quijtos ica on tlacamej huelisquej nohuicasquej ijcon.

²⁰ Quemaj Jesús oquinnahuatij on inomachtijcahuan ma ca yacaj quijlisquej ica yejhua Cristo yejhuan Dios oquitlapejpenij para tlamandaros.

Jesús oquinmachiltij on inomachtijcahuan ica yejhua quitlajyohuilitisquej niman quimictisquej

(Mr. 8.31—9:1; Lc. 9.22-27)

²¹ Jesús ijcuacon opeu quintlajtlajtohuilia on inomachtijcahuan ica yejhua ica oncaj yas ne Jerusalén, niman ica ompa on tlajtlamatquej, niman on tlayecanquej tiopixquej niman on temachtijquej ican tlanahuatijli quitlajyohuilitisquej ican miyec tlajtlamach. Niman oquimijlij ica yejhua quimictisquej, pero ipan yeyi tonajli yolihuis* niman noquetztehuas ne ipan itlalcon. ²² Ijcuacon Pedro oquixeloj ocsecan niman ijquin opeu cajhua:

—NoTeco, ¡Ma ca Dios quinequi ijcon nochihuas! ¡Tejhua xmitztocarohua para ijcon mopan nochihuas!

²³ Pero Jesús onomalacachoij niman oquijlij Pedro:

—¡Xnechtalcahui nican Satanás! Tejhua tinechteltia para xnicchihuas on tlen Dios quinequi. Tejhua xticnemilia quen Dios, yej ticnemilia quen on tlacamej.

* **16:21** resucitará; yolis

²⁴ Quemaj Jesús oquimijlij on inomachtijcahuan:

—Tla yacaj quinequi nohuan yas, ma quelcahua on tlen quinequi, ma nemi listo para tlajyohuis noso miquis nopampa, niman ma nohuan huiya. ²⁵ Yehua in nemechijlia pampa yejhuan quinequis quimaquixtis inemilis ipan in tlalticpactli, quipolos ialma, pero yejhuan san nopampa quipolos inemilis ipan in tlalticpactli, yejhua quiselis nemilistli para ialma. ²⁶ Tej, ¿tlinon ica quipalehuis se tlacatl, tla yejhua quinoyaxcatis† nochí tlen oncaj ipan in tlalticpactli niman quipolos ialma? Xitlaj, tej, ica quipalehuis, pampa xitlaj‡ oncaj yejhuan se tlacatl huelis ica quitlaxtlahuas ialma. ²⁷ Nejhua yejhuan oninochiu Tlacatl nihuajlas ihuan noilhuicachtequitcahuan§, niman nihuajlas ican ihueyilis noTajtzin. Niman ijcuacon cada se nictlaxtlahuilis quech quitocarohua on tlen oquichiu. ²⁸ Ica tlen melahuac nemechijlia ica sequimej yejhuan aman nican nemij, ijcuac xe mimiquij, nechitasquej nejhua yejhuan oninochiu Tlacatl pehuas nitlamandaros.

17

Jesús onixpatlac

(Mr. 9:2-13; Lc. 9:28-36)

¹ Chicuasen tonajli más saquin*, Jesús ocuicac Pedro, niman on icniutin Jacobo niman Juan, niman inseltimej oyajquej ipan se tepetl sanoyej† hueyi ² campa imixpan onixpatlac. Ixayac onocau petlanqui quen on tonaltzintli, niman on itlaquen sanoyej cualtzin opetlancaistayac. ³ Niman nimatzin ohuajnonextijkej Moisés niman Elías otlajtlajtojquej ihuan Jesús. ⁴ Ijcuacon Pedro oquijlij Jesús:

—NoTeco, ¡sanoyej cuajli ica nican tinemij! Tla ticnequi, ma ticchijchihuacan yeyi caltzitzintin, se para tejhua, ocse para Moisés niman ocse para Elías.

⁵ Chica Pedro ijcon tlajtohuaya, se moxtli yejhuan sanoyej istac oquintlapachoj. Niman quemaj ipan on moxtli ocaquistic se tlajtojli yejhuan oquijtoj:

—In yejhua notlajsojcaConeu yejhuan itech nipacticaj. Yejhua xtencaquican.

⁶ Ijcuac on nomachtijquej ijcon ocacquej, nimantzin onotlacuenquetzquej ican inxayac hasta ipan tlajli, niman sanoyej onomojtijquej. ⁷ Ijcuacon Jesús oquinminmatocac niman oquimijlij:

—Xmotelquetzacan, ma ca xmomojtican.

⁸ Niman ijcuac onotelquetzquej, xoc yacaj más oquitaquej, yej san Jesús iselti.

⁹ Chica huajtemotiayaj ne ipan on tepetl, Jesús oquinnahuatij:

—Ma ca yacaj xtlajtlajtohuilican on tlen onenquitaquej, hasta ijcuac nejhua yejhuan oninochiu Tlacatl niyolihuis‡ niman ninoquetztehuas ipan notlalcon.

¹⁰ Ijcuacon on nomachtijquej oquitlajtoltijquej Jesús:

—¿Tlica§, tej, on temachtijquej ican itlanahuatil Dios quijtohuaj ica Elías ica oncaj achtoj huajlas xquen tejhua yejhuan Dios omitztlapejpenij para techmandaros?

¹¹ Jesús oquimijlij:

—On melahuac ica Elías achtoj huajlas niman nochí tlajtlamach* quiyec-lalis. ¹² Pero nejhua nemechijlia ica Elías yohuajlaj, niman xoquixmatquej,

† **16:26** se posesionará; quinoaxcatis, quinohuaxcatis, quinotlatquis ‡ **16:26** nada; coxtla

§ **16:27** mis ángeles: Angeles tequitij ne ilhuicac niman nican ipan in tlalticpactli. * **17:1** después

† **17:1** muy ‡ **17:9** resucitaré; niyolis § **17:10** ¿por qué?; ¿tline? * **17:11** cosas

yej oquichihuilijquej nochí tlen xcuajli yejhuamej oquinequej. No ijqui nejhua yejhuan oninochiu Tlacatl nechtajyohuiltisquej.

¹³ Ijcuacon on nomachtijquej ocajsicamatquej ica ijcuac Jesús quinnojnotzticatca ica Elías, yejhua quitenejticatca Juan on tlacuatequijquetl.

*Jesús oquipajtij se telpochtli yejhuan quiaya se xcuajli espíritu
(Mr. 9.14-29; Lc. 9.37-43)*

¹⁴ Ijcuac oajsiquej ne itzintlan on tepetl campa nemiyaj on tojlamej tlacamej, se tlacatl oquinisihuij Jesús niman ixpan onotlacuenquetz, niman oquijlij:

¹⁵ —NoTeco xpalehui notelpoch ican teicnelilistli†. Yejhua san sojsotlatjinemi niman sanoyej temojtij tlajyohuiya. Miyecpa onhuetzi ipan tlilt niman miyecpa ipan atl. ¹⁶ Nejhua onicuajhuicac itech momachtijcahuan, pero yejhuamej xohuelquej oquipajtijquej.

¹⁷ Jesús oquijtoj:

—¡Oh tlacamej yejhuan xtlaneltocaj niman xmelajqui tlanemiliaj! ¿Hasta quemanon más nemohuan ninemis? ¿Hasta quemanon nemechxicos? Nican xcuajhuicacan on telpochtli.

¹⁸ Quemaj Jesús ocajhuac on xcuajli espíritu niman oquis ipan on telpochtli. Quemaj nimantzin on telpochtli opajtic.

¹⁹ Más saquin‡ on nomachtijquej oquinotzquej Jesús san iselti, niman oquitlajtoltijquej:

—¿Tlica§ tejhuamej xotihuelquej otiquixtijquej on xcuajli espíritu?

²⁰ Jesús oquimijlij:

—Xonenhuelquej pampa onenometlamatquej tla huelisquia pajtis noso ca. Ica tlen melahuac nemechijlia ica tla nenquipiaj nemotlaneltoc masqui ichtetzin on quen on iteyo on mostaza huelis nenquijlisquej on tepetl: “Xmejcuanij nican niman xhuiya ne ocsecan”, niman on tepetl nejcuanis. Ijcon, tej, nochí huelis nenquichihuasquej tla melahuac nenquipiaj nemotlaneltoc.

²¹ Pero in quen in xcuajli espíritu huelis nenquitequixtilisquej san ican oración niman nesahujli.

*Jesús ocsejpa oquimijlij on inomachtijcahuan ica miquis
(Mr. 9.30-32; Lc. 9.43-45)*

²² Chica san secan quistinemiyaj neca ipan on iregión Galilea, Jesús oquimijlij:

—Nejhua yejhuan oninochiu Tlacatl nechtemactilisquej intech on tlacamej, ²³ niman nechmictisquej, pero ipan yeyi tonajli niyolihuis* niman ninoquetztehuas ne ipan notlalcon.

Niman ijcuac yejhuamej ijcon ocacquej, sanoyej onajmanquej.

Jesús oquitlaxtlau on quech notlajtlani para ipan tiopan

²⁴ Ijcuac Jesús niman inomachtijcahuan oajsiquej ipan on pueblo itoca Capernaum, on yejhuan tlacobrarohuayaj para ne tiopan, oyajquej itech Pedro niman ijquin oquitlajtoltijquej:

—¿On nemotemachtijcau xquitlaxtlahuas on tomin para on hueyi tiopan?

²⁵ Pedro oquijlij:

—Quemaj.

Quemaj ijcuac Pedro ocalaquito ne ipan on cajli, Jesús achtoj yejhua oquinotz, niman oquijlij:

† 17:15 misericordia ‡ 17:19 después § 17:19 ¿por qué?; ¿tline? * 17:23 resucitaré; niyolis

—¿Quen ticnemilia Simón? In reyes ipan in tlalticpactli, ¿aquinomej quinco-brarohuaj yejhua ica on impuestos? ¿Quincobrarohuaj yejhuamej on chane-jquej noso on yejhuan xchanejquej?

²⁶ Pedro oquijlij:

—On yejhuan xchanejquej.

Quemaj Jesús oquijlij:

—Tla ijcon, on chanejquej xquintocarohua para quitlaxtlahuasquej.

²⁷ Pero para ma ca yacaj ticualanisquej, xhuiya ne ipan mar para xcajsi se michin. Niman on yejhuan achtoj michin ticajsis, xquixti. Niman ipan icamac ticnextis se tomin yejhuan cajxilis para tictlaxtlahuas on quech techtlajtlaniaj nejhua niman tejhua ne ipan tiopan. Xquitqui, tej, on tomin niman xquintlaxtlahuiliti.

18

Jesús oquimijlij inomachtijcahan aquinon más hueyixticas ne campa tlamandarohua Dios.

(Mr. 9.33-37; Lc. 9.46-48)

¹ Ipan on tonaltin on nomachtijquej oquinisihuijquej Jesús niman oquitlatoltijquej:

—¿Aquinon más hueyixticas ne campa tlamandarohua on ilhuicac chanej?

² Ijcuacon Jesús oquinotz se conetl, niman oquitlalij ne imixpan. ³ Niman oquijtoj:

—Ica tlen melahuac nemechijlia, ica tla nemotlamachilis xnopatla niman xnocuepa quen intlamachilis on coconej, xnencalaquisquej ne campa tlamandarohua on ilhuicac chanej. ⁴ Ijcon, tej, on yejhuan más hueyixticas campa tlamandarohua on ilhuicac chanej, on yejhuan xnohueyimati yej nohuica quen yejhua in conetl. ⁵ San aquinon yejhuan nopampa quiselis yacaj yejhuan yolyemanqui* quen yejhua in conetl, nejhua nechselia.

Jesús oquimijlij inomachtijcahan para ma quipiacan nemojtiji quichihuasquej tlajtlacojli

(Mr. 9.42-48; Lc. 17.1-2)

⁶ Pero san aquinon yejhuan quitlajcalis ipan tlajtlacojli semej yejhuamej in pipitiquej coconej yejhuan nechneltocaj, quiselis hueyi castigo. Más cuajli yesquia ijcuac xe quichihua on tlajtlacojli iquechtlan quipilohuilisquiaj se tetl hueyi yejhuan imetl on molino niman contlajcalisquiaj ne ipan on mar campa más huejcatlan. ⁷ Lástima para in tlalticpactlacamej pampa sanoyej† oncaj tlinon se ica huetzi ipan tlajtlacojli. Nochipa ijcon yes, pero sanoyej xcuajli yes para on tlacatl yejhuan itech pehua on tlajtlacojli.

⁸ Yejhua ica, tej, tla moma noso mocxi mitzchihulia titlajtlacohua, xte-qui niman huejca xcontlajcali. Ijcon xchihua, pampa más cuajli tinemis timatejtepolic noso tiicxittejtepolic, ijcuac ticalaquis ne ilhuicac, xquen tla tajsistas niman yej mitzontlajcalisquej ne ipan on tlilt yejhuan para nochipa mitztlatis. ⁹ Niman tla mixtololoj mitzchihulia para titlajtlacohua, xquixti niman huejca xcontlajcali. Ijcon xchihua, pampa más cuajli para ticpias san se mixtololoj, ijcuac ticalaquis ne ilhuicac, xquen tla tajsistas niman yej mitzontlajcalisquej ne ipan on tlilt yejhuan oncaj ne mictlan.

Jesús oquixtij se ejemplo itech se borreguito yejhuan opolija
(Lc. 15.3-7)

* ^{18:5} humilde † ^{18:7} mucho

10 'Xquintlacaitacan in pipitquej coconej. Tej, nemechijlia ica ne ilhuicac on inilhuicactequitcahuan‡ nochipa nemij ne ixpan on noTajtzin ilhuicac chanej. **11** Nejhua yejhuan oninochiu Tlacatl onihuajlaj para oniquinmaquixtico on yejhuan ixpolijtoquej.

12 ¿Quen nenquinemiliaj? ¿Tlinon quichihua se tlacatl yejhuan quipia se ciento iborreguitos ijcuac se quipolohua? Yejhua, tej, cajtehua on napoajli§ huan majtlactli huan chicanhui ne ipan tepetl niman yau contejtemohua on yejhuan oquipoloj. **13** Niman tla yejhua quinextia, ica tlen melahuac nemechijlia ica yejhua más sanoyej paqui ihuan on se borreguito yejhuan oquipolojca xquen inhuan on napoajli huan majtlactli huan chicnahui yejhuan xoquimpoloj. **14** On nemoTajtzin ilhuicac chanej no xquinequi para semej yejhuatej in pipitquej ma polihuican.

Jesús otemachtij ica se tlacatl nonequi quinotzas icniu para quipantlantis on tlen xcuajli oquichihuili

(Lc. 17.3)

15 'Niman tla mocniu mitzchihuilia itlaj tlen xcuajli, xnotza san iselti niman xquijli on tlinon xcuajli omitzchihuili. Tla quiselia on itlajtlacol niman noyoltlalia, yejhua ocsejpa cuajli mohuan nocahuas. **16** Pero tla yejhua xmitztencaqui, tla ijcon, xcuica se noso ome tlacatl más para nochitlen nijtos ma quimati ome noso yeyi teixpantiliquej. **17** Tla yejhua no xquintencaqui, tla ijcon, san secan xquinotza on tlaneltocaquej ipan itiopian Dios para no ma quitlacanonotzacan. Niman tla yejhua xquintencaqui, tla ijcon xpiacan, quen se yejhuan xquineltoca Dios noso quen se tlaixpachohuani tlacobrarojquetl ican on rentas.

18 'Ica tlen melahuac nemechijlia, ica on tlen nemejhuamej xnenquitecahuilisquej ma nochihua nican ipan in tlalticpactli, Dios ne ilhuicac no ijqui quijtos ica on tlacamej xquintocarohua nohuicasquej ijcon. Niman no on tlen nemejhuamej nenquitecahuilisquej ma nochihua nican ipan in tlalticpactli Dios ne ilhuicac no ijqui quijtos ica tlacamej huelisquej nohuicasquej ijcon.

19 'No ijqui nemechijlia ica tla nenomemej nican ipan in tlalticpactli nemotlajtolmacasquej ican nochihua nemoyojlo para itlaj nenquitlajtlanisquej noTajtzin ilhuicac chanej, yejhua mechmacas. **20** Yejhua ijcon quichihuas pampa campa omemej noso yeyimej nopampa nosentlaliaj, nejhua ompa ninemi inhuan.

Jesús oquixtij se ejemplo itech se tequitquetlyejhuan xoquipialij ijyohuilistli on itetequipanojcaxiu

21 Quemaj Pedro oquinisihuij Jesús niman oquijlij:

—NoTeco, ¿quesquipa nictlapojpolhuis yacaj nocniu tla yejhua nechchihuilia on tlen xcuajli? ¿Hasta chicomepa nictlapojpolhuis?

22 Jesús oquijlij:

—Nejhua xnimitzijlia tla hasta chicompa tictlapojpolhuis, yej nimitzijlia hasta yepoajli* huan majtlactli ica chicomepa.

23 'Yejhua ica sanoyej nonequi titetlapojpolhuis pampa ne campa tlamandarohua on ilhuicac chanej sa no ijqui quen se rey yejhuan oquinec quixtis cuentas inhuan on itequipanojcahuan. **24** Yejhua on rey ye pejiticatca quixtiaya cuentas ijcuac ocuiquilijquej se itequipanojcau yejhuan

‡ **18:10** ángeles de ellos: Angeles tequitij ne ilhuicac niman nican ipan in tlalticpactli. § **18:12** Napoajli quitosnequi ochenta, niman napoajli huan majtlactli huan chicnahui quitosnequi noventa y nueve. * **18:22** Yepoajli quitosnequi sesenta, niman yepoajli huan majtlactli ica chicomepa quitosnequi setenta veces siete.

cuiquiliaya miyec millones de pesos. ²⁵ Pero on itequipanojcau xquipiaya tlinon ica quitlaxtlahuas icuenta. Yejhua ica on rey otlanahuatij para ma quinamacacan quen tlamanactli san secan ihuan isihuau, iconehuan niman no ma quinamacacan nochi tlen quipia, san para notlaxtlahuas on icuenta. ²⁶ Ijcuacon on itequipanojcau onotlacuenquetz ixpan on iteco niman oquicnotlajtlanilij: “Señor, xnechijyohuili, niman nochi nimitzlaxtlahuilis tlen nimitzhuiquia.” ²⁷ Iteco oquicnelij†, niman oquipopolohuili on icuenta niman oquimacau.

²⁸ 'Pero ijcuac on mismo tlacatl ohuajquis ne itech iteco, oquinamic se itetequipanojcaxiu yejhuan cuiquiliaya quesqui pesos tomin. Yejhua ica nimantzin ocajsic iquechtlan, opeu cocojpatzca, niman ijquin qui利亚: “¡Xnechtlahtlahuili tlen tinechhuiquia!” ²⁹ Quemaj on itetequipanojcaxiu ixpan onotlacuenquetz niman ijquin oquicnotlajtlanilij: “Xnechijyohuili, niman nochi nimitzlaxtlahuilis tlen nimitzhuiquia.” ³⁰ Pero yejhua xoquinec, yej ocuicac campa tzacutias hasta quitlaxtlahuilis nochi tlen cuiquilia. ³¹ Ijcuac on ocsequimej tetequipanojquej ijcon oquitaquej, sanoyej oquinyolcocoj, niman oyajquej oquitlajtlahtohuilito inteco nochi tlen oquitaquej onochiu. ³² Quemaj on inteco oquitecuitlan on itequipanojcau, niman oquijlij: “¡Xcuajli tequipanojquet! Nejhua onimitzpojpolohuili nochi quech tinechhuiquia, pampa tejhua ijqui otinechicnotlajtlanilij. ³³ Ijcon quen nejhua onimitzicnelij, tejhua no ijqui nonequi tiquicnelis on motetequipanojcaxiu.” ³⁴ Niman on teteco sanoyej ocualan. Yejhua ica oquinnahuatij on cárcelxapiquej ma castigarocan hasta queman quitlaxtlahuas nochi tlen cuiquiliaya.

³⁵ Niman otlan tlajtlajtohua Jesús ica in tlajtojli:

—No ijqui mechchihuilis on noTajtzin ilhuicac chanej, tla cada nensesentemej xnenquitlapojpolhuiaj nemocniu ican nochi nemoyojo.

19

Jesús otemachtij ica tla se tlacatl noso se sihuatl noxotonia quichihua tlajtlacolij

(Mr. 10.1-12; Lc. 16.18)

¹ Ijcuac Jesús yotlan quiteijlia in tlajtlamach*, oquis ne Galilea, niman oyaj ne ipan on yehualican itoca Judea yejhuan onocau ne campa iquisayan tonatzintli de on atentli Jordán. ² Miyec tlacatl oyaj ihuan, niman ompa oquimpajtij on cocoxquej.

³ Niman sequimej fariseos oquinisihuijquej Jesús para quitlatlatasquej, niman ijquin oquitlajtoltijquej:

—¿On tlanahuatijli cahulia se tlacatl noxotonis ihuan isihuau masqui san tlaj icatzin?

⁴ Yejhua oquimijlij:

—¿Nemejhuamej xqueman nenquimomachtaij ipan on Yectlajcuilojli ica on yejhuan oquintlalij ijcuac quemach nochi otzimpeu, oquintlalij tlacatl niman sihuatl? ⁵ No oquijtoj: “Yejhua ica on tlacatl quitlalcahuis itaj niman inan para nosentlalis ihuan isihuau, niman ijcon on omemej nochihuasquej quen se tlacatl.” ⁶ Ijcon, tej, yejhuatej xoc omemej, yej yonochiu san se. Yejhua ica se tlacatl xhuelis quixelos on tlen Dios oquisentlalij.

⁷ Ijcuacon on fariseos ijquin oquitlajtoltijquej:

† 18:27 se compadeció de él * 19:1 cosas

—¿Tla ijcon, tej, tlica[†] Moisés otlanahuatij para se tlacatl quimacas se amatlajcuilojli on isihuau campa quiitos ica ihuan noxotonia, niman quemaj ma cahua?

⁸ Jesús oquimijlij:

—Moisés omechcahuilij nemoxotonisquej pampa nenyoltechicajquej niman xonenquinequej onenquitlacamatquej Dios. Pero ijcuac nochí otzimpeu, Dios xoquintlalij on tlacamej para ijcon quichihuasquej. ⁹ Nejhua nemechijlia ica san aquinon yejhuan noxotonis ihuan isihuau, pero xpampa on sihuatl itlaj quichtacachijtinemi ihuan se tlacatl, niman nonamictis ihuan ocse sihuatl, yejhua sihuapajpatla. Niman on yejhuan nonamictis ihuan on sihuatl yejhuan yocajquej, no sihuapajpatla.

¹⁰ Quemaj inomachtijcahuan oquijlijquej:

—Tla se tlacatl xquipia permiso para nocahuas ihuan isihuau, más cuajli para xqueman yacaj nonamictis.

¹¹ Jesús oquimijlij:

—Xnochimej tlacamej huelisquej quijyohuisquej inseltimej nemisquej, yej san on yejhuan Dios quinequi para ijqui nemisquej. ¹² Oncaj sesetlamantic tlajtlamach yejhuan xquitecahuilia ma nonamictihua. Sequimej xhueli nonamictiaj pampa xcujli tlacatij. Ocsequimej xhueli nonamictiaj pampa on mismos tlacamej quinquixtiliaj on tlen quinchihuaultia ma nonamictican. Niman ocsequimej xquinequij nonamictisquej pampa quinequij más huelisquej quichihuasquej on tequitl yejhuan para Dios. On yejhuan noyolchicahuas para nemis iselti, ma quichihua.

Jesús oquintiochiu on coconej

(Mr. 10.13-16; Lc. 18.15-17)

¹³ Quemaj oquinhuajhuicaquej sequimej coconej ne itech Jesús para yejhua impan ma quintlali imahuan, niman para impampa quichihuas oración. Pero on nomachtijquej opejquej quimajhuaj on yejhuan quinhuajhuicayaj on coconej. ¹⁴ Pero Jesús oquijtoj:

—Xquincahuilican on coconej ma huajhuiyan notech, niman ma ca xquinteltican, pampa on tlacamej yejhuan nemij quen coconej calaquisquej ne campa Dios tlamandarohua.

¹⁵ Yejhua oquintlalij imahuan impan on coconej, niman quemaj ompa onejcuenij.

Sen tlacatl yejhuan rico xoquipix iyojlo quitlacamatis Jesús para ijqui quipias on nemilistli yejhuan para nochipa

(Mr. 10.17-31; Lc. 18.18-30)

¹⁶ Sen tlacatl oyaj itech Jesús niman oquitlajtoltij:

—Cuajli temachtijquetl, ¿tlinon cuajli nicchihuas para nicselis on nemilistli yejhuan para nochipa?

¹⁷ Jesús oquijlij:

—¿Tlica tinechcuitia nicuajli? On yejhuan cuajli san Dios iselti, niman tejhua ticnemilia ica nejhua san nitlacatl niman xniDios. Pero xcaqui tlen nimitzijlis. Tla ticnequi tonchantis ne ilhuicac, xquintlacamati on tlanahuatiltin.

¹⁸ Niman on tlacatl oquijlij:

—¿Catlejhuamej on tlanahuatiltin?

Niman Jesús oquijlij:

[†] 19:7 ¿por qué?; ¿tline?

—Ma ca titemictis; ma ca tisihuapajpatlas; ma ca titlachtequis; ma ca yacaj tictlajtolquetztehuilis; ¹⁹ xtlacaita motaj niman monan, niman xquintlajsojtla[†] ocsequimej quen tejhua timotlajsojtla.

²⁰ Quemaj on tlacatl oquijtoj:

—Nochi yejhua in desde niconetl nicuajtlacamatztiu. ¿Tlinon más nech-polohua?

²¹ Jesús oquijlij:

—Tla ticnequi noch ica ticuajli tlacatl yes, xhuiya mochan, niman xnamaca on tlen ticpia niman on tomin xquinmaca on mayanquej. Tla ijcon ticchihuas, ticpias riquezas ne ilhuicac. Niman quemaj xhuajla niman xhuiya nohuan.

²² Pero ijcuac on tlacatl ijcon ocac, oyaj onajmantiaj, pampa sanoyej[§] rico catca.

²³ Ijcuacon Jesús oquimijlij on inomachtijcahuan:

—Ica tlen melahuac nemechijlia ica sanoyej ohuiticaj*, para Dios yejhuan ilhuicac chanej quimandaros se tlacatl yejhuan rico. ²⁴ Ocsejpa nemechijlia ica más ohuiticaj para se rico calaquis ne campa Dios tlamandarohua xquen para se camello panos ipan on campa tlacoyoniaj ican aguja.

²⁵ Ijcuac on inomachtijcahuan ijcon ocaquej, sanoyej omojcatlachixquej, niman ijquin oquijtoquej:

—Tla ijcon, tej, ¿aquinon huelis maquisas?

²⁶ Jesús ocommintac, niman oquimijlij:

—On tlacamej xhuelij nomaquixtiaj, pero Dios noch hueli quichihua.

²⁷ Quemaj Pedro oquijlij:

—NoTeco, tejhamej yoticajquej noch i tlen ticpiayaj, niman tiquistinemij mohuan. ¿Tlinon, tej, ticpiasquej?

²⁸ Jesús ijquin oquimijlij:

—Ica tlen melahuac nemechijlia ica ipan on tonajli ijcuac noch yencuiyas, nejhua yejhuan oninochiu Tlacatl ninotlalis ipan on sillia campa nihueyixtias para nitlamandaros. Ipan on tonaltin nemejhuamej yejhuan nennechtocaj no nemotlalischej ipan majtlactli huan ome sillas. Ompa nenquipiasquej tlanahuatijli para nenquintlajtlacolmacasquej on xcuajcualtin, niman nenquinyectenehuasquej on yejhuan cuajcualtin tlacamej nemij ipan on majtlactli huan ome ifamilias de Israel. ²⁹ Niman nochimej yejhuan cahuaj inchan noso imicnihuan, noso intaj, noso innan, noso insihuau, noso inconehuan, noso intlahuan san nopampa, quiselisquej se ciento más, niman no quiselisquej nemilistli para nochipa. ³⁰ Pero miyequej yejhuan saniman calaquij campa Dios tlamandarohua, xhuejhueyixtiasquej, niman miyequej yejhuan más saquin[†] calaquij campa Dios tlamandarohua huejhueyixtiasquej.

20

Jesús oquixtij se ejemplo intech on tlaquehaulti

¹ 'Yejhua ica, ne campa tlamandarohua on yejhuan ilhuicac chanej, no ijcon nochihua quen on tlalejquetl yejhuan quipia uvas ipan se hueyi tlajli. Yejhua in tlacatl, ijcuac cualcan oquis, oquintejtemoto tlaquehualtin para quitequilisquej on uvas. ² Ijcuac oquinnextij quesquimej tlaquehualtin, inhuan onocau para se tonajli quintlaxtlahuilis ican se tomin itoca denario. Quemaj oquintitlan ne ipan itlal para ma tequititij. ³ Sa no ipan on tonajli

‡ **19:19** ámalos § **19:22** muy * **19:23** difícil † **19:30** después

canaj ipan chicnahui hora ica cualcan, ocsejpa oquis, niman ne ipan plaza oquintac ocsequimej tlacamej yejhuan xtequitij. ⁴ Yejhua oquimijlij: “Nemejhuamej no xhuiyan, xtequititij ne ipan notlal, niman nemechtlaxtlahuilis quen quitocarohua.” Niman yejhuan oquimijlij: “⁵ On tlalejquetl ijcuac tlacualispan oquis, niman canaj ipan yeyi hora ocsejpa oquis, niman sa no ijqui oquinnotz ocsequimej tlaquehaultin. ⁶ Quemaj ipan macuijli hora ica tiotlac, ocsejpa oyaj ne plaza, niman ompa oquintac ocsequimej tlacamej yejhuan xitlaj* quichihuayaj. Yejhua ica oquimijlij: “⁷ ¿Tlica† nican yonense-tonalojquej niman xnentequitij?” ⁷ Yejhuan oquimijlij: “Pampa xacaj techtlaquehua.” Ijcuacon oquimijlij: “Nemejhuamej no xhuiyan, xtequititij ne ipan notlal, niman nemechtlaxtlahuilis quen quitocarohua.”

⁸ Ijcuac otlapoyau, on tlalejquetl oquijlij on yejhuan quiyecanaya on tequitl: “Xquinquixti on tlaquehaultin, niman xquintlaxtlahuili inca xt-lapehua on yejhuan sa olatocatiajquej ica ocalaquej, niman inca tontlamis on yejhuan achtopa ocalaquej.” ⁹ Niman ijcuac ohualajquej on yejhuan ocalaquej para tequitisquej canaj ipan macuijli hora ica tiotlac, cada se oquiselij itlaxtlahuil se denario. ¹⁰ Ijcuac no ohualajquej on yejhuan achtopa opeu tequitij, oquinemilijquej ica más hueyi quiselisquej intlaxtlahuil, pero cada se no san oquiselij se denario. ¹¹ Yejhua ica, ijcuac oquiselijquej intlaxtlahuil, opeu cualanij itechcopia on tlalejquetl. ¹² Quijliayaj: “Yejhuamej in yejhuan sa olatocatiajquej para tequitisquej san se hora otequitquej niman sa no ijqui otiquintlaxtlahuili quen tejhuamej yejhuan nochi se tonajli otitequitquej campa tonayan.” ¹³ Pero on tlalejquetl oquinanquilij semej yejhuan, niman oquijlij: “Notetlajsojcau‡, nejhua xnimitzixpachohuilia motomin. ¿Tlen xmohuan oninocau para nimitztlaxtlahuilis se denario? ¹⁴ Xquitqui motlaxtlahuil niman xhuiya. Nejhua onicnec para yejhua in yejhuan saquin§ ocalac para tequitis sa no ijqui ma quiseli itlaxtlahuil quen tejhuat ticselia. ¹⁵ ¿Tlen xnechmelahua* nicchihuas ican notomin tlen nejhua nicnequis? ¿Noso yej tinexicolmiqui pampa nejhua nitepalehuiya ican teicnelilistli†?” ¹⁶ Yejhua ica, tej, miyequej yejhuan saniman calaqui campa Dios tlamandarohua xhuejhueyixtiasquej, niman miyequej yejhuan más saquin calaqui campa Dios tlamandarohua huejhueyixtiasquej. Dios miyequej oquinnotz, pero xmiyequej oquintlapejpenij.

*Jesús ica yexpa oquimijlij on inomachtijcahan ica quimictisquej
(Mr. 10.32-34; Lc. 18.31-34)*

¹⁷ Ijcuac Jesús ye yaya ne Jerusalén, se lado oquinhuicac on majtlactli huan ome inomachtijcahan, niman ijquin oquimijlij:

¹⁸ —Xcaquican. Aman tiahuij ne Jerusalén campa nejhua yejhuan oninochiu Tlacatl nechtemactilisquej intech on tlayecanquej tiopixquej niman intech on temachtijquej ican itlanahuatil Dios. Yejhuan nechtlajt-lacolmacasquej para nechmictisquej. ¹⁹ Quemaj nechtemactilisquej intech on xchanejquej para ma noca huetzcacan, ma nechhuihuitequican, niman ma nechmajmasohuáltican‡ ipan cojnepanojli§, pero ipan yeyi tonajli niyoliuis* niman ninoquetztehuas ne ipan notlalcon.

*Inan Jacobo niman Juan oquitlajtlanilij Jesús se favor
(Mr. 10.35-45; Lc. 22.24-30)*

* ^{20:6} nada; coxtla † ^{20:6} ¿por qué?; ¿tline? ‡ ^{20:13} mi amigo § ^{20:14} después * ^{20:15} no merezco ‡ ^{20:15} misericordia ‡ ^{20:19} me crucificarán § ^{20:19} cruz * ^{20:19} resucitaré; niyolis

20 Quemaj, isihuau Zebedeo ihuan Jacobo niman Juan, on iconehuan, oquinisihuijquej Jesús. Niman isihuau Zebedeo ixpan onotlacuenquetz Jesús para oquitlajtlanilij se favor. **21** Jesús oquitlajtoltij:

—¿Tlinon ticnequi?

Yejhua oquijlij:

—Xtlanahuati para ne campa titlamandaros yejhuamej in notlajsojca-conehuan se ma notlali moyecmacopa niman ocse ipan mopochmacopa.

22 Pero Jesús oquimijlij:

—Nemejhuamej xnenquimati tlinon nenquitlajtlanij. ¿Nenhuelisquej nen-quijyohuisquej on tlen nejhua ye oncaj para niquijyohuis?

Yejhuamej oquijtojquej:

—Huelis titlajyohuisquej quen tejhua.

23 Yejhua oquimijlij:

—On melahuac ica nentlajyohuisquej quen nejhua. Niman nemocuatequisquej quen nejhua pero yejhua on para nemotlalisquej noyecmacopa niman ipan nopochmacopa, nejhua xnechmelahua† ompa nemechtlalis, yej ompa noTajtzin quintlalis on yejhuan yoquintlapejpenij.

24 Ijcuac on majtlactlimej nomachtijquej oquimatquej tlinon oquitlajtlanquej on omemej icniutin, sanoyej‡ intechcopa ocualanquej. **25** Pero Jesús nochimej oquinnotz para ma huajhuiyan nisu, niman oquimijlij:

—Nemejhuamej ye nenquimatztoquej ica nemij xhebreos yejhuan huejhueyixtoquej, niman yejhuamej quinmandarohuaj ocsequimej tlayecanquej, niman yejhua in tlayecanquej tlamandarohuaj ipan on países xican teicnelilistli§. **26** Pero para nemejhuamej xijqui yes. Yej aquin quinequis hueyixtias nemotzajlan, ica oncaj quimpalehuis on ocsequimej. **27** San aquinon de nemejhuamej yejhuan quinequis tlayecantias, ica oncaj yejhua tepalehuis quen se tlanamactli. **28** No ijqui quen nejhua yejhuan oninochiu Tlacatl xonihuajlaj para nechpalehuisquej, yej para nitepalehuis, niman nictemacas nonemilis para niquinmaquixtis miyec tlacatl.

Jesús oquimpajtij omemej ciegos

(Mr. 10.46-52; Lc. 18.35-43)

29 Ijcuac yejhuamej quisiayaj ne ipan on hueyican itoca Jericó, miyec tlacatl oquitlapanhuij Jesús. **30** Ne itech ojtli yejyehuaticatcaj omemej ciegos. Niman ijcuac ocacquej ica Jesús ompaca panotiaya, oquitzajtzilijquej:

—¡ToTeco huejca teixhui* itech David, xtechicneli niman xtechpalehui!

31 Pero on tlacamej oquimajhuaquej on ciegos para ma ca sa ma nahuatican, pero yejhuamej yej más otzajtziiquej:

—¡ToTeco, huejca teixhuiu itech David, xtechicneli† niman xtechpalehui!

32 Quemaj Jesús onoteltij, ocominnotz on ciegos, niman ijquin oquintlajtoltij:

—¿Tlinon nenquinequij ma nemechchihuili?

33 Yejhuamej oquijlijquej:

—ToTeco, san ticnequij ma tihueican titlachacan.

34 Ijcuacon Jesús oquimicneli, niman oquinmatoquilij imixtololojhuan. Quemaj nimantzin on ciegos ohuelquej ottachixquej. Quemaj oyajquej ihuan Jesús.

† 20:23 no merezco ‡ 20:24 mucho § 20:25 misericordia * 20:30 descendiente † 20:31 ten misericordia de nosotros

21

*Jesús ocalac ne Jerusalén quen se rey
(Mr. 11.1-11; Lc. 19.28-40; Jn. 12.12-19)*

¹ Ijcuac ye nisu nemiyaj ne Jerusalén campa oncatca on pueblo itoca Betfagé, ne ipan on tepetl itoca Olivos, Jesús oquintitlan omemej inomachti-jcahuán, ² niman oquimijlij:

—Xhuiyan ipan on pueblito yejhuan oncaj ne tlayecapan. Ne campa nemoncalactiasquej, nenquitasquej se sihuapoloco* salijticaj ihuan se polocotzin†. Xquintojtomacan niman xnechinhuajhuiquilican. ³ Niman tla yacaj mechijlia: “¿Tlica‡ nenquintojtomaj on polocomej?”, xquijlican ica on nemoTeco quinnequi niman ica nimantzin cuajtitlanis.

⁴ Yejhua in onochiu san para otenquis on tlen oquijtoj nochihuas on tiotlajtojquetl ijcuac ijquin oquijcuiloj:

⁵ Xquijlican on yejhuan chanti ipan on hueyican itoca Sión: “Xquitacan, moRey huajlau motech. Yejhua xhuajnohueyimatziu, yej hualetiu ipan se poloco yejhuan pitentzin. On polocotzin teconeu itech on yolqui yejhuan tlamama.”

⁶ Yejhua ica on nomachtijquej oyajquej, niman oquichijquej quen Jesús oquinnahuatij. ⁷ Yejhuamej ocuajhuicaquej on sihuapoloco ihuan iconetzin. Quemaj impan oquintlalijquej intlaquen, niman Jesús otlejcoc ipan on polocotzin. ⁸ Niman más miyequej on tlacamej yejhuan ompa yayaj oquisojquej intlaquen ipan ojtli, niman sequimej oquitejtequej inxojoyo on cojin§ niman oquitlalijquej neca ipan ojtli. ⁹ On tlacamej yejhuan tlayecapan yayaj, niman on yejhuan tlacuitlapan yayaj, opejquej tzajtzi:

—¡Ticyectenehuaj in huejca teixhuiu* itech rey David! ¡Ma Dios quitiochihua on yejhuan ocuajtitlan! ¡Ma ne ilhuicac noyectenehua!

¹⁰ Ijcuac Jesús ocalac ne Jerusalén, nochí tlacatl ipan on hueyican onajcoman, niman miyequej otlajtlanquej:

—¿Aquinon in?

¹¹ Niman on yejhuan ihuan Jesús yayaj oquijtojquej:

—In yejhua tiotlajtojquetl Jesús, on yejhuan chanej Nazaret yejhuan oncaj ipan on región itoca Galilea.

Ne ipan iquiahuac on ihueyi tiopan Dios, Jesús oquinhuajquixtij on yejhuan xquitlacaitayaj on tiopan

(Mr. 11.15-19; Lc. 19.45-48; Jn. 2.13-22)

¹² Quemaj Jesús ocalac ne iquiahuac on ihueyi tiopan Dios, niman oquinhuajquixtij on yejhuan ompa tlanamacaticatc妖 niman tlacojticatc妖. Oquinixinilij inmesas on yejhuan quitepatiliayaj tomin, niman insietas on yejhuan quinnamacayaj palomas. ¹³ Niman oquimijlij:

—Ipan in Yectlajcuilojli, ijquin tlajcuilolnesticaj: “Nochan itoca yes tiyo-ocajli campa quichihuaj oraciones”, pero nemejhuamej yonencuepquej quen teostotl cajli campa on tlachtequij nosentlaliaj.

¹⁴ Chica Jesús nemiya ipan on hueyi tiopan, semej ciegos niman coxomej oquinisihuijquej, niman yejhua oquimpajtij. ¹⁵ Pero intlayecanahuan on tiopixquej niman on temachtijquej ican tlanahuatijli ocualanquej ijcuac oquitaquej on sanoyej† cuajli tlajtlamach‡ yejhuan Jesús quichihuaya. Ni-man no ocualanquej ijcuac ocacquej on coconej ijquin tzajtziyaj ne ipan

* **21:2** burra † **21:2** burrito ‡ **21:3** ¿por qué?; ¿tline? § **21:8** árboles * **21:9** descendiente
† **21:15** muy ‡ **21:15** cosas

on hueyi tiopan: “¡Ma noyectenehua in huejca teixhuiu§ itech rey David!”

¹⁶ Yejhua ica oquijlijquej Jesús:

—¿Ticaqui tlen on yejhuamej in quijtohuaj?

Niman Jesús oquimijlij:

—Quemaj nicaqui. ¿Tlen xqueman nenquimomachtiaj on Yectlajcuilojli campa quijtohuia: “Oticchiu para on coconej niman on tzelicacoconej* ma mitzcuicatlalican ica on melajqui yectenehualistli”?

¹⁷ Quemaj yejhua oquintlalcahuij, niman onejcuenij ne ipan on hueyican. Oyaj ne ipan on pueblo itoca Betania, campa onocau ipan on tlayohua.

Jesús ocuatz se cojtli itoca higuera

(Mr. 11.12-14, 20-26)

¹⁸ Ijcuac cualcan, Jesús ocsejpa yaya ne Jerusalén, niman ipan iojhui opeu apismiqui. ¹⁹ San nisu campa yaya oquitac se cojtli† itoca higuera. Pero ijcuac oquinisihuij, xoquinextilij itlaquilyo on cojtli, yej san ixojoyo quipiaya. Quemaj Jesús oquijlij on higuera:

—Ma ca sa queman titlaquis.

Niman on higuera nimantzin ohuac. ²⁰ Ijcuac on nomachtijquej ijcon oquitaquej, omojcatlachixquej niman oquitlajtoltijquej Jesús:

—¿Quen ijqui, tej, ohuel nimantzin ohuac on higuera?

²¹ Jesús oquimijlij:

—Ica tlen melahuac nemechijlia, ica tla nentlaneltocaj niman xnenometlamatij, xsan yejhua on tlen onicchihuilij on higuera huelis nenquichihuasquej, yej no huelis nenquijlisquej yejhua in tepetl: “Xmejcuanij nican, niman xcalaqui ne ijtic on mar”, niman ijqui nochihuas. ²² Niman tla nentlaneltocasquej nochí on tlen nemejhuamej nenquitlajtlanisquej ijcuac nenquichihuasquej oración, nenquiselisquej.

On tlayecanquej tiopixquej niman on tlajtlajmatquej oquitlajtoltijquej Jesús aquinon oquimacac on tlanahuatijli

(Mr. 11.27-33; Lc. 20.1-8)

²³ Quemaj Jesús ocalac ne ipan on hueyi tiopan, niman chica yejhua ompa temachtiaya, oquinisihuijquej intlayecancahuan on tiopixquej niman on intlajtlajmatcahuan on hebreos, niman oquitlajtoltijquej:

—¿Tlen tlanahuatijli ticpia para ticchihua yejhua in tlajtlamach? ¿Aquinon, tej, omitzmacac yejhua on tlanahuatijli?

²⁴ Jesús oquimijlij:

—Nejhua no nicpia tlen nemechtajtoltis. Tla nennechijlisquej on tlen nemechtajtoltis, nejhua no nemechijlis ican tlen tlanahuatijli nicchihua in tlajtlamach. ²⁵ ¿Aquinon ocuajtitlan Juan para ma otlacuatequij? ¿Dios ocuajtitlan, noso on tlacamej ocuajtitlanquej?

Quemaj yejhuamej opejquej ijquin quinochtacatlajtlajtoltiayaj:

—¿Quen ijqui tiquijlisquej? Tla tiquijtosquej ica Dios ocuajtitlan, yejhua techijlis: “Tla ijcon, ¿Tlica xonenquineltocaquej on tlen Juan oquijtoj notechica?” ²⁶ Niman tla tiquijtosquej ica on tlacamej ocuajtitlanquej, tehuamej tiquinmacajsij on tlacamej, pampa nochimej quineltocaj ica Juan se tiotlajtojquetl.

²⁷ Yejhua ica oquijlijquej Jesús:

—Xticmatij aquinon ocuajtitlan.

Ijcuacon yejhua oquimijlij:

—Yejhua ica nejhua no xnemechijlis aquinon onechmacac tlanahuatiijli para nicchihua yejhua in tlajtlamach.

Jesús oquixtij se ejemplo itech ome iconehuan se tlacatl

²⁸ Jesúis ijquin oquimijlij:

—¿Quen nenuquinemiliaj yejhua in? Sen tlacatl quipiaya ome iconeu. Niman on yejhuan yencuiyotl ijquin oquijlij: “Nocone, aman xtequititi ne ipan notlal para tictequis uvas.” ²⁹ On iconeu oquijlij: “¡Ca! ¡Xnicnequi nias!” Pero más saquin[‡] cuajli ononemilij niman oyaj otequitito. ³⁰ Quemaj on tajtli oquitato on ocse iconeu, niman no sa no ijqui oquijlij. Niman yejhua in iconeu oquijlij: “Quemaj nias.” Pero yejhua xoyaj. ³¹ ¿Catlejhua, tej, de on omemej icniutin oquitlacamat itaj?

Yejhuamej oquijtojquej:

—On yejhuan achtoj oquinotz itaj.

Ijcuacon Jesúis oquimijlij:

—Ica tlen melahuac nemechijlia, ica yejhuan oquijtojquej on yejhuan tlacobraro-huaj ne ipan on impuestos niman on sihuamej yejhuan san ica nocahuaj tlacapajpatlaj calaquisquej achtopa ne campa Dios tlamandarohua xquen nemejhuamej. ³² In nochihua pampa Juan on tlacuatequijquetl ohuajlaj niman omechititij quen ijqui nonequi nennemisquej, niman nemejhuamej xonenquineltocaquej tlen omechijlij. Pero on yejhuan tlacobraro-huaj ne ipan tlajtlanetli niman on sihuamej yejhuan san ica nocahuaj tlacapajpatlaj oquineltocaquej. Niman masqui nemejhuamej onenquitaquej quen ijqui onoyolpatlaquej on tlacamej, nemejhuamej xonemoyolpatlaquej para onenquineltocaquej on tlen Juan oquijtoj.

*Jesús oquitlalij se ejemplo intech on hebreos yejhuan xoquiselijquej Cristo
(Mr. 12.1-12; Lc. 20.9-19)*

³³ Xcaquican yejhua in ocse ejemplo: Nemiya se tlalejquetl yejhuan ne ipan itlal oquitocac uvas. Quemaj ocorraltij, niman oquichijchiú se pila campa quipatzcasquej on uvas. Niman no oquichijchiú se torre para huelis nochí cuidarosquej.

Quemaj oquinnextij sequimej medieros para ma tequitican niman cuidarosquej on uvas. Niman quemaj yejhua onejcuénij niman oyaj ipan ocse país. ³⁴ Ijcuac oajsic on tonaltin para notequis on uvas, on tlalejquetl oquintitlan itequichihuilijsahuan intech on medieros para ma quintlajtlanilitij on medieros quech yejhua quitocarohua quiselis. ³⁵ Pero on medieros ompa oquimajsiquej itequichihuilijsahuan on tlalejquetl. Se oquimajmailijquej, ocse oquimictijquej, niman on ocse oquitemojmotlaquej. ³⁶ On tlalejquetl ocsejpa ocsequimej oquintitlan on itequichihuilijsahuan, niman más miyequej xquen ijcuac achtoj oquintitlanca. Pero on medieros sa no ijqui oquinchihuilijsquej. ³⁷ Quemaj sa ica nochí yejhua oquititlan on yejhuan mero iconeu pampa oquinemilij: “Melaúac quitlacaitasquej nocone.”

³⁸ Pero ijcuac on medieros oquitaquej on teconeu, opeu ijquin quinojla: “Yejhua in iconeu on tlalejquetl. Ijcuac miquis itaj, yejhua yes iyaxca[§] nochí in tlajli. Aman ma tictictican para totech nocahuas on herencia.” ³⁹ Yejhua ica, tej, ompa ocajsiquej; oquixtijquej ne ipan on uvasyoj, niman oquimictijquej.

⁴⁰ Quemaj Jesúis ijquin oquintlajtoltij:

—Ijcuac huajlas iteco on tlajli, ¿tlinon quinchihuilis on medieros?

⁴¹ Yejhuan oquijlijquej:

[‡] **21:29** después [§] **21:38** le pertenece; iaxca, ihuaxca, itlatqui

—Xquimicnelis para quinmictis on xcuajcualtin medieros. Niman yejhua quintejtemos ocsequimej medieros yejhuan quitequitisquej on uvas, niman ijcuac ajsis on tonajli quimacasquej quech quitocaros quiselis.

⁴² Ijcuacon Jesús oquimijlij:

—¿Xqueman nenquimomachtianij yejhua in Yectlajcuilojli yejhuan ijquin quijtohua?

On tetl yejhuan xoquiselijquej on tepanchijquej aman yejhua yonotlalij yacatztica. Yejhua in ijqui oquitlalij on toTeco, niman ticmojcaitaj tlen tiquitaj.

⁴³ Yejhua ica nemechijlia ica Dios xmechcahuilis nencalaquisquej ne campa yejhua tlamandarohua. Yej quincahuilis calaquisquej on yejhuan quichihuasquej on tlen cuajli quinequi Dios.

⁴⁴ Niman ica yejhua on tetl yejhuan onemechijlij, on sa no yejhua in, ica san aquin huetzis ipan on tetl notepojpostequis, niman tla on tetl yacaj ipan onhuetzis, cuejcuechtilis.

⁴⁵ Ijcuac intlayecancahuan on tiopixquej niman on fariseos ocacquej on ejemplos yejhuan Jesús quintlaliliaya, oquimatquej ica Jesús intechcopa tlajtohuaya. ⁴⁶ Yejhua ica, tej, quinequiyaj cajsiquej, pero quinmacajsiyaj on tlacamej, pampa on tlacamej quineltocayaj ica Jesús se tiotlajtojquetl yejhuan tlajtlajtohua ica on tlen Dios quimachiltia. Yejhua ica, tej, xocajjsiquej.

22

Jesús oquixtij se ejemplo itech on se ilhuitlyejhuan nochihua ijcuac nonamictihua

¹ Jesús ocsejpa opeu quinnojnotza ican ejemplos, niman ijquin oquimijlij:
² —Ne campa tlamandarohua on ilhuicac chanej sa no ijqui quen on ilhuitl yejhuan oquichiu on rey ijcuac ononamictij itelpoch. ³ Oquintitlan on itequitcahuan para ma quimanatij on yejhuan itenotzcahuan yejhuan yoquinnotzcaj ipan ilhuitl. Pero on yejhuan yoquinnotzcaj xoquinequej oyajquej ipan in ilhuitl. ⁴ Quemaj ocsejpa oquintitlan ocsequimej itequitcahuan, niman oquimijlij: “Xquimijlican on yejhuan yotiquinnotzcaj ica ye nicpia listo on tlacuajli. Nohuacaxhuan niman ocsequimej yolquej yejhuan tojtomajquej yoquinmictijquej, niman nochi on tlacuajli ye oncaj listo. Ma hualajtetzican ipan in ilhuitl.” ⁵ Pero on itenotzcahuan xoquitenaquej. Semej yejhuatej oyaj oquintato itlalhuan, niman ocse oyaj otlasemanato. ⁶ On ocsequimej oquimajsiquej itequitcahuan on rey niman sanoyej* oquinmajmailijquej, niman quemaj oquinmictijquej. ⁷ Ijcuacon on rey sanoyej ocualan, niman oquintitlan isoldados para no ma quinmictitij on yejhuan otemicijquej, niman para quitlatisquej on impueblo. ⁸ Quemaj oquimijlij on itequitcahuan: “Nochi ye oncaj listo para on ilhuitl, pero on yejhuan ye tlanotzalticatcaj xquinmelahuaya† huajlasquej. ⁹ Xhuiyan, tej, ipan iesquinas on calles, niman nochimej on yejhuan nenquinnamiquisquej xquinnotzacan ma huajhuiyan ipan in ilhuitl.” ¹⁰ Yejhua ica on tequipanojquej oyajquej ipan on calles, niman oquinsentlalijquej nochimej on yejhuan oquinnamiquej. Oquisentlalijquej, tej, on yejhuan xcuajcualtin tlacamej niman on yejhuan cuajcualtin tlacamej. Niman ijcon on cajli oten ican tlanotzaltin.

¹¹ Quemaj on rey ocalac ipan on cajli para quintas on tlanotzaltin. Ompa oquitac se tlacatl yejhuan xonotlaquentij quen nonequi notlaquentihuas

* **22:6** mucho † **22:8** no merecían

ipan on quen on ilhuitl. ¹² Niman oquijlij: “Notetlajsojcau‡, ¿quen ijqui ohuel oticalac nican niman xtitlaquemej quen nonequi notlaquentihuas ipan in quen in ilhuitl?” Pero yejhua xonahuat. ¹³ Quemaj on rey ijquin oquinnahuatij on yejhuan tetlamacayaj: “Xmasajsalocan niman xquicxisajsalocan, niman xcontlajcalican campa tlayohuatoc campa chocas niman notlantotopotzas.” ¹⁴ Quemaj Jesús oquijtoj: “Dios miyequej oquinnotz, pero xmiyequej on yejhuan oquintlapejpenij.”

On fariseos oquitlajtoltijkej Jesús tla cuajli para quitlaxtlahuasquej impuestos para on más hueyi tequihua de Roma

(Mr. 12.13-17; Lc. 20.20-26)

¹⁵ Quemaj on fariseos oyajquej, niman san secan oquinojlijquej quen ijqui quichihualtisquej Jesús itlaj ma quimijli yejhuan ica huelis quiteixpanhuisquej. ¹⁶ Quemaj, tej, on fariseos oquintitlanquej itech Jesús on innomachtijcahuau inhuan on yejhuan oquipalehuijquej Herodes para ma calaqui rey. Yejhuatej oquijlijquej:

—Temachtijquetl, ticmatztoquej ica nochipa tiquijtohua on tlen melahuac. On tlacamej cuajli tiquintitia quen Dios quinequi para nohuicasquej. Tejhua xticchihulia cuenta on tlen quijtohuaj motechcopa on tlacamej, masqui huejhueyixtoquej. ¹⁷ Aman, tej, xtechijli tlinon tincnemilia. ¿Itlanahuatil Moisés techcahuilia titlatlaxtlahuasquej ican impuestos itech César yejhuan itequihuaj nochi on país de Roma?

¹⁸ Pero Jesús oquimat ica yejhuatej ijcon quitlajtoltiayaj san para cajcayahuasquej. Yejhua ica ijquin oquimijlij:

—Omxayacyejquej, ¿tlica§ nennechchihualtisnequij ma nemechijli itlaj yejhuan ica huelis nennechteixpanhuisquej? ¹⁹ Xnechititican on tomin yejhuan ica notlaxtlahua on impuestos.

Niman yejhuatej oquititijkej se tomin. ²⁰ Ijcuac Jesús oquitac on tomin, oquintlajtoltij:

—¿Aquinon ixayac yejhua in, niman aquinon itocayo in nican tlajcuilnesticaj ipan in tomin?

²¹ Yejhuatej oquijlijquej:

—Iyaxca* on tequihua César.

Quemaj Jesús oquimijlij:

—Xmacacan César on tlen yejhua iyaxca, niman no xmacacan Dios on tlen yejhua iyaxca.

²² Ijcuac yejhuatej ijcon ocacquej, otlamojcaitaquej, niman ijqui oquitlalcahuijquej, niman oyajquej.

On saduceos oquitlajtoltijkej Jesús tla yolihiisquej niman noquetztehuasquej on yejhuan yomiquej

(Mr. 12.18-27; Lc. 20.27-40)

²³ Ipan sa no on tonajli semej saduceos oquitatoj Jesús. Yejhuatej temachtiayaj ica xhuelis yolihiisquej† niman noquetztehuasquej on mimiquej. Yejhua ica ijquin oquijlijquej:

²⁴ —Temachtijquetl, Moisés oquijtoj ica tla miqui se tlacatl yejhuan xoquipix iconehuan, icniu on tlacatl ica oncaj nonamictis ihuan on sihuacahuajli‡, niman ihuan tlascaltis para on coconej nemisquej quen iconehuan yesquia on icniu yejhuan omic. ²⁵ Aman, tej, nican totzajlan nemiyaj chicomemej icniutin. On achtoj teicniu ononamictij, niman omic. Niman

‡ 22:12 mi amigo § 22:18 ¿por qué?; ¿tline? * 22:21 le pertenece; iaxca, ihuaxca, itlatqui

† 22:23 resucitarán; yolisquej ‡ 22:24 viuda; icnosihuati

ica xoquipix iconehuan, on icniu ihuan on sihuacahuajli ononamictij. ²⁶ No ijqui oquichiu on ica ome teicniu, quemaj on ica yeyi teicniu, niman ijqui onochijtiaj hasta otlanquej on chicomemej icniutin. ²⁷ Ijcuac on icniutin nochimej yomiquej, quej yejhua on sihuatl omic. ²⁸ Tla ijcon, tej, ijcuac yolihiis, ¿catlejhua itech tesihuau yes de yejhuamej on chicomemej icniutin, pampa nochimej oquipixquej quen insihuau?

²⁹ Jesús oquimijlij:

—Nemejhuamej nemopopolohuaj, pampa xnenquimati tlinon quijtohua on Yectlajcuilojli nion nenquimati ica Dios nochi hueli quichihua. ³⁰ Tej, ijcuac on mimiquej yolihiisquej, xnonamictisquej nion on tatajtin quitemacasquej imichpochhuan para ma nonamictican. Ijcuacon nemisquej quen iilhuicactequitcahuans[§] Dios yejhuan nemij ne ilhuicac.

³¹ 'Niman aman on ica yolihiisquej niman noquetztehuasquej on mimiquej, ¿xnenquimomachtianij on tlen Dios omechijlij? Yejhua ijquin oquijtoj:

³² "Nejhua niiDios Abraham, nejhua niiDios Isaac niman nejhua niiDios Jacob." Ticmatij ica Dios xejhua inDios on mimiquej, yej yejhua inDios on yoltoquej.

³³ Ijcuac on tlacamej ijcon ocacquej, nochimej otlamojcaitaquej ica on itemachtil Jesús.

*Jesús oquijtoj catlejhua tlanahuatijli más hueyixticaj
(Mr. 12.28-34)*

³⁴ Ijcuac on fariseos oquimatquej ica Jesús oquinacamatzacu on saduceos, san secan onosentlalijquej, niman quej yejhuamej oquinisihuijquej Jesús.

³⁵ Quemaj semej yejhuamej on yejhuan tepantlajtojquetl catca ican itlanahutil Dios oquinec quistlacos Jesús, niman ijquin oquitlajtoltij:

³⁶ —Temachtijquetl, ¿catlejhua tlanahuatijli más hueyixticaj ipan on itlanahuatil Moisés?

³⁷ Jesús oquijlij:

—"Xtlajsojtla*" on moTeco Dios ican nochi moyojo, ican nochi moalma niman ican nochi motlamachilis." ³⁸ Yejhua in yejhua más hueyixticaj niman yejhua yecatzticaj de nochimej on tlanahuatiltin. ³⁹ Niman on ica ome tlanahuatijli yejhuan no ijqui hueyi quijtosnequi quen on achtoj tlanahuatijli ijquin quijtohua: "Xquintlajsojtla ocsequimej no ijqui quen tejhu timotlajsojtla." ⁴⁰ Yejhua in ome tlanahuatijli quitzquijticaj nochi itlanahuatil Moisés niman intemachtilhuan on tiotlajtoquej.

*Jesús oquintlajtoltij on fariseos aquinon itech teConeu on Cristo
(Mr. 12.35-37; Lc. 20.41-44)*

⁴¹ Chica on fariseos san secan nemiyaj, Jesús ijquin oquintlajtoltij:

⁴² —¿Tlinon nenquinemiliaj nemejhuamej itechica Cristo on yejhuan Dios oquitlapejpenij para tlamandaros? ¿Aquinon itech huejca teixhuiu†?

Yejhuamej oquijlijquej:

—Yejhuahuejca teixhuiu itech David.

⁴³ Ijcuacon Jesús oquimijlij:

—¿Tlica, tej, on Espíritu Santo oquichihualtij David para ma quijto ica Cristo "noTeco", pampa David ijquin oquijtoj:

⁴⁴ Dios oquijlij noTeco: "Xmotlali nican ipan noyecma, hasta queman ma nimitztlali tlayecanquetl intech on yejhuan motlahuelicnihuau"?

§ 22:30 ángeles de él: Angeles tequitij nican ipan in tlalticpactli niman ne ilhuicac. * 22:37 ámalo

† 22:42 descendiente

45 Tla David ijcon oquijtoj ica Cristo yejhua iTeco, tla ijcon, tej, ¿quen ijqui Cristo hueli huejca teixhuiu itech David?

46 Niman xacaj ohuel oquinanquilij nion ican se tlajtojli. Niman desde ipan on tonajli nochimej pinahuayaj para itlaj quitlajtoltisquej.

23

Jesús oquiteijlij ma ca xmohuicacan quen nohuicaj on fariseos niman on temachtijquej ican itlanahuatil Dios

(Mr. 12.38-40; Lc. 11.37-54; 20.45-47)

1 Quemaj Jesús oquimijlij on tlacamej niman on inomachtijcahuan:

2 —On temachtijquej ican itlanahuatil Dios niman on fariseos quipiaj tlanahuatiijli para quinoquitzquiltiaj on itequiu Moisés. Yejhua ica, aman yejhuamej nonequi temachtiaj ica on itlanahuatil Moisés. **3** Yejhua ica, tej, nemejhuamej xquintlacamatican, niman xchihuacan nochi tlen mechijlisquej. Pero ma ca xmohuicacan quen yejhuamej, pampa yejhuamej quijtohuaj se tlamantli* niman yej ocse quichihuaj. **4** Niman yejhuamej quinchihualtiaj on tlacamej cuajli ma quejehuacan on miyec tlanahuatiltin. Yejhua in sanoyej† ohuijticaj‡ para quejehuasquej. Pero yejhuamej nion siquiera ican se inmajpil quinequij tepalehuisquej. **5** Nochi intequiu quichihuaj san para on tlacamej ma quintacan. Cuelitaj quitquisquej sequimej ihuejhueyi textos on Yectlajcuilojli ijtic on incaya tlachijchiutin ican cuetlaxtli yejhuan quinotlaliliaj ipan imixcuateu niman ipan inma. Niman no cuelitaj quitlalisquej intlaquen ican puntas más pajpatlaquej xquen on ocsequimej tlacamej. **6** Quinequij quipiasquej on yejhuan más huejhueyixtoquej sietas ne campa ilhuipan, niman on más cuajcualtin sietas ne ipan on tiopantin. **7** Yejhuamej quinequij para on tlacamej ma quintlajpalocan ican miyec tetlacaitalistli ne ipan on plazas, niman ma quincuitican temachtijquej.

8 'Pero nemejhuamej ma ca nenquimocahuilisquej ma mechcuitican temachtijquej, pampa nochimej nemejhuamej nemicniutin niman nenquipiaj san se temachtijquetl. **9** Niman ipan in tlalticpactli ma ca yacaj nenquijlisquej "noTajtzin", pampa san se nemoTajtzin nenquipiaj, niman yejhua nemi ne ilhuicac. **10** Nion ma ca nenquimocahuilisquej ma mechcuitican tlayecanquej, pampa san nejhua niCristo yejhuan Dios onechtlalij para tlamandaros, ninemotlayecancau. **11** On yejhuan más hueyixticaj mechpalehuis. **12** On yejhuan nohueyilia quipias nocnelilistli, pero on yejhuan nocnelis quipias hueyilistli.

13'¡Lástima para nemejhuamej temachtijquej ican itlanahuatil Dios niman nemejhuamej fariseos, nemexayacyequej! Lástima, pampa on tlacamej xnenquincahuiliaj ma calaquican ne campa tlamandarohua on ilhuicac chanej. Niman sa no nemejhuamej xnencalaquij, nion nenquincahuiliaj calaquisquej on yejhuan quinequij calaquisquej.

14'¡Lástima nemejhuamej temachtijquej ican itlanahuatil Dios niman nemejhuamej fariseos, nemexayacyequej! Lástima, pampa on sihuacahuaultin§ nenquincuiliaj incal, niman para nesi quen xnentlajtlacolejquej, nenquichihuaj huejhueyac oraciones. Yejhua ica on nemejhuamej más hueyi nenquiselisquej nemocastigo.

* 23:3 cosa † 23:4 muy ‡ 23:4 difícil § 23:14 viudas; icnosihuamej

15’¡Lástima para nemejhuamej temachtijquej ican itlanahuatil Dios niman nemejhuamej fariseos, nemomexayacyeijkej! Lástima, pampa nenquipax-alohuiliaj nochí tlalticpactli para ijqui nencalactiaj se tlacatl ipan nemorreligión, niman ijcuac se tlacatl yonencuepquej, nemejhuamej nenquichihuaj para on tlacatl ocpa ma quitocaro yas ne mictlan campa tetlajyohuiltyoyan xquen nemejhuamej.

16’¡Lástima para nemejhuamej tlayecanquej yejhuan nenquitemachtiaj on tlen xnencajsicamatij! Lástima, pampa nenquijtohuaj: “Tla yacaj quitlalia se promesa, niman notlajtolpalehuiya itech on hueyi tiopan ica quichihuas on promesa, ipromesa xoc itlaj quijtosnequi. Pero tla notlajtolpalehuiya itech on oro yejhuan oncaj ne ipan on hueyi tiopan, on quemaj melahuac hueyi quijtosnequi ipromesa niman yejhua ica nonequi quichihuas on tlen oquitlalij ipan ipromesa.” **17**’¡Xnentlanemiliaj niman nenquitemachtiaj on tlen xnencajsicamatij! ¿Catlejhua más hueyixticaj: on oro, noso on hueyi tiopan yejhuan quichipajtacaj on oro? **18** Niman nemejhuamej no nenquijtohuaj: “Tla yacaj quitlalia se promesa, niman notlajtolpalehuiya itech on tlaixpan* ica quichihuas, ipromesa xoc itlaj quijtosnequi. Pero tla notlajtolpalehuiya itech on huintli yejhuan oncaj ne tlapani ipan on tlaixpan, on quemaj melahuac hueyi quijtosnequi ipromesa niman yejhua ica nonequi quichihuas on tlen oquitlalij ipan ipromesa.” **19**’¡Nemejhuamej nenquitemachtiaj on tlen xnencajsicamatij! ¿Catlejhua más hueyixticaj: on ofrenda, noso on tlaixpan yejhuan quichipajtacaj on huintli? **20** Tej, on yejhuan notlajtolpalehuiya itech on tlaixpan, ican ipromesa xsan itech on tlaixpan yej no itech on tlen oncaj ipan on tlaixpan. **21** Niman on yejhuan notlajtolpalehuiya itech on hueyi tiopan, ican ipromesa xsan itech on tiopan notlajtolpalehuiya, yej no itech Dios yejhuan ompa chanti. **22** No ijqui on yejhuan notlajtolpalehuiya itech ilhuicac ican ipromesa, no notlajtolpalehuiya itech on nesehuilpan campa tequihuajti Dios, niman no itech sa no yejhua Dios yejhuan ompa nosehuia.

23’¡Lástima para nemejhuamej temachtijquej ican itlanahuatil Dios niman nemejhuamej fariseos, nemomexayacyeijkej! On tlajtlamach† yejhuan nenquipiaj, se nenquiyaxcatiaj‡ Dios itech on majtlactli. In se ejemplo, nenquiyaxcatiaj se menta, se anís niman se comino. Pero xnenuquichihuaj on tlen más hueyi quijtosnequi ipan on temachtilistli yejhuan oncaj ipan on tlanahuatijli campa quijtohua ica nonequi nemohuicasquej ican mela-jcanemilistli, ican teicnelilistli§ niman ican tlaneloctli. In yejhua mech-melahuia nenquichihuasquej ihuan on tlen nenquichihuaj. **24**’¡Nemejhuamej nenquitemachtiaj on tlajtlamach yejhuan xnencajsicamatij! Nemejhuamej nenquitemachtiaj on tlajtlamach yejhuan xhueyi quijtosnequi. Pero on yejhuan hueyi quijtosnequi, xnenuquichihuaj.

25’¡Lástima para nemejhuamej temachtijquej ican itlanahuatil Dios niman nemejhuamej fariseos, nemomexayacyeijkej! Lástima, pampa nen-quichihuaj para ma mechitacan quen sanoyej nencuajcualtin tlacamej, pero nemoyojlo tenticaj ican on tlen nenquitlanij ipan on tlachtecyotl niman ipan on nexicolyotl. **26** Nemejhuamej fariseos nenquitemachtiaj on tlen xnencajsicamatij. Achtopa, tej, xchipahuacan nemoyojlo, niman quemaj nemotlalnacayo no chipahuis.

27’¡Lástima para nemejhuamej temachtijquej ican itlanahuatil Dios niman nemejhuamej fariseos, nemomexayacyeijkej! Lástima, pampa nemijcomej

* **23:18** altar † **23:23** cosas ‡ **23:23** le entregan; nenquiyaxcatiaj, nenquihuaxcatiaj, nenquitlatquitiaj § **23:23** misericordia

quen on micacajli yejhuan ne camposanto cuajli quistaliaj san para cualtzin tlajtlacha, pero ijtic tenticaj ican micaomimej niman ican nochi tlajtlamach tlen xchipahuac. ²⁸ Ne imixpan on ocsequimej nesi sanoyej nencuajcualtin tlacamej, pero nemojtic tenticaj ican on tlen xmelahuac niman ican tlajtla-cojli.

²⁹ ¡Lástima para nemejhuamej temachtijquej ican itlanahuatil Dios niman nemejhuamej fariseos, nemomexayacyequej! Lástima, pampa nenquinchi-jchihiliaj inmicacal on tiotlajtojquej, niman nenquitlatlajmacyotiaj* ne campa toctoquej on yejhuan cuajcualtin tlacamej catcaj. ³⁰ Niman nen-quijtohuaj: “Tla tejhuamej tinemisquiaj ipan on tonaltin ijcuac onenquej on toachtojtajhuan, xtiquipalehuisquiaj para quinmictisquiaj on tiotlajtojquej.” ³¹ San nemopantlantiaj ica nentecone huan intech on yejhuan oquin-mictijquej on tiotlajtojquej. ³² Xtlamican on tlajtlacojli yejhuan opejquej quichihuaj on nemoachtojtajhuan.

³³ ¡Cohuamej! ¡Tecone huan intech on cohuamej! ¿Quen ijqui nemomaquix-tisquej itech on castigo yejhuan oncaj ne mictlan campa tetlajyohuiltloyan? ³⁴ Yehua ica nemechinhua jtitlan ilis on tiotlajtojquej, on tlajmatquej, niman on temachtijquej. Pero sequimej nenquinmictisquej, sequimej nenquimaj-masohualtisquej† ipan cojnepanojli‡, niman ocsequimej nenquinhuahuiteq-uisquej ne ipan on tiopantin. Niman campa cada pueblo ocsequimej oniyanasquej nencomintejtemosquej para más nenquintlajyohuiltisquej. ³⁵ Yehua ica, tej, nemejhuamej hebreos nenquiselisquej nochi castigo im-pampa on cuajcualtin tlacamej yejhuan oquinmictijquej huajpejtoc itech Abel hasta itech Zacarías iconeu Berequías, yejhuan nemejhuamej onen-quimictijquej itzajlan on tiopan niman on tlaixpan§ ne quiahuac. ³⁶ Ica tlen melahuac nemechijlia, ica on hebreos yejhuan aman nemij, quiselisquej nochi on castigo yejhuan hualejticaj intech on yejhuan oquinmictijquej.

Jesús ochocac ipampa Jerusalén

(Lc. 13.34-35)

³⁷ ¡Oh nemejhuamej yejhuan nenchantij ne Jerusalén, nemejhuamej nen-quinmictiaj on tiotlajtojquej niman nenquintemojmotlaj on yejhuan Dios mechinhua jtitlan ilia! ¡Miyecpa onicnec nemechsentlalis quen yejhua on cuanaca quinsentlalia iconehuan itzintlan imajtlapalhuan, pero xonen-quinequej! ³⁸ Aman Dios xoc mechpalehuis, yej mechtlalcahuis. ³⁹ Yejhua ica, tej, nemechijlia ica xoc ocsejpa nennechitasquej hasta ajsis on tonajli ijcuac nemejhuamej ijquin nenquijtosquej: “Ma Dios quitiochhua on yejhuan ocuajtitlan para tlamandaros.”

24

Jesús oquimijlij inomachtijcahuan ica on hueyi tiopan xoxotonis

(Mr. 13.1-2; Lc. 21.5-6)

¹ Jesús oquis ne ipan on hueyi tiopan, niman ye yajticatca, ijcuac on inomachtijcahuan oquinisihuijquej para quititisquej quen tlachijchiutli on hueyi tiopan. ² Pero Jesús oquimijlij:

—¿Nemejhuamej nenquitaj nochi yejhua in? Ica tlen melahuac nemechijlia, ica nican nion se tetl xnocahuas ipan ocse tetl, pampa nochi quioxoton-isquej.

* **23:29** adorna † **23:34** le crucificarán ‡ **23:34** cruz § **23:35** altar

Jesús oquimijlij inomachtijcahuān tlínōn nochihuās ijcuac nisiu tlatlalpolihuis

(*Mr. 13.3-23; Lc. 21.7-24; 17.22-24*)

³ Niman ijcuac yehuaticatca Jesús ne ipan on tepetl itoca Olivos, on nomachtijquej oyajquej itech niman ijquin sa iseltiemej oquichtacailitoj:

—Xtechijli, ¿quemanon nochihuas on tlajtlamach*, niman tlínōn tlamajhuisojli noteititis ijcuac tejhua tihuajlas ocsejpa, niman ijcuac tlatlalpolihuis?

⁴ Ijcuacon Jesús oquimijlij:

—Xmotacan sa no nemehuamej para ma ca yacaj mechcajcahuas, ⁵ pampa miyequej huajlasquej yejhuan ican noTocatzin cualij tojtiasquej: “Nejhua niCristo”, niman miyequej quincajcahuasquej. ⁶ Nemejhuamej nenaquisquej ica nisiu oncaj on guerra, niman ica neca huejca no oncaj. Pero ma ca xmoyolpajsolocan pampa nochí on ica oncaj achtoj nochihuas. Pero ijcuac ijcon nochihuas oct xejhua tonajli para tlatlajtlamis. ⁷ On tequihuajquej nohuijsoquisquej inhuan ocsequimej tequihuajquej niman on países nomicitsquej inhuan ocsequimej países. Onyas apistli, niman onyas miyec cualolistli, niman tlalolinis miyecan. ⁸ Pero in xsan ica nochí yes, yej más onyas tlajyohuilistli.

⁹ 'Quemaj nemejhuamej mechtemacasquej para mechtlajyohuiltisquej, niman mechmictisquej, niman san nopampa nochí tlacatl mechtlahuelitas. ¹⁰ Ipan on tonaltin ijcuac ijcon nochihuas, miyequej xoc nechnelto-casquej, niman notlahuelitasquej semej ihuan ocsequimej, niman notemac-tilisquej semej ihuan ocsequimej. ¹¹ Niman miyequej tlacajcayajquej yejhuan notenehuaj tiotlajtojquej huajnesisquej, niman miyequej quincajcahuasquej. ¹² Niman ica sanoyej‡ miyequiyas on tlen xcuajli, miyequej xoc quipiasquej tetlajsojtlalistli§ intech ocsequimej. ¹³ Pero on yejhuan quixicos hasta ijcuac nochí tlamis, on yejhua maquisas. ¹⁴ Niman in cuajli tlajtojli yejhuan techijlia quen ijqui tlamandarohua on yejhuan ilhuicac chanej, noteijlis nochihuiyan ipan in tlalticpactli para nochimej países ma quixmatican on tlen melahuac. Niman ijcuac nochihuiyan yonoteijlij, ijcuacon tlatlalpolihuis.

¹⁵ 'On yejhuan quinomachtis itlajcuilo Daniel ma cajsicamatí. Yejhua ot-lajcuiloj ica yejhua on tlen tlajtlacohua niman on tlen tetzinquixtia cuajtlasisquej ne campa tlayectiticaj. Ijcon, tej, ijcuac nemejhuamej nenquitasquej ica yejhua on tlen Daniel oquijcuiloj ye nochijticaj ne campa yectiticaj, ¹⁶ ijcuacon on yejhuan nemisquej ne Judea ma cholocan niman ma huiyan ne ipan tepemej. ¹⁷ Niman on yejhuan ipan on tonajli nemis ne icuapan ical, ma ca huajtemos para itlaj quixtis ne icalijtic. ¹⁸ Niman on yejhuan nemis ne ipan imil, ma ca nocuepas ichan para concuis itlaj itlaquen. ¹⁹; Sanoyej xcuajli yes para on sihuamej yejhuan ipan on tonaltin yocanquej inconetzin niman on sihuamej yejhuan ipan on tonaltin tlachichitisquej! ²⁰ Nemejhuamej xchihuacan oración itech Dios para ma ca nencholosquej ipan on tonaltin ijcuac sanoyej seuas, nion ipan on tonajli ijcuac nosehuiaj on hebreos, ²¹ pampa ijcuacon sanoyej miyec onyas tlajyohuilistli quen yejhuan xque-man oncaj desde ijcuac otzimpeu yejhua in tlalticpactli, niman xqueman onyas. ²² Tla yejhua xquinteltlalis on tonaltin, nochimej miquisquej. Pero Dios quinteltlalis on tonaltin impampa on yejhuan yoquintapejpenij.

²³ 'Tla ijcuacon yacaj mechijlis: “Xquitacan, nican nemi Cristo”, noso “Xquitacan, nepa nemi”, ma ca xneltocacan. ²⁴ Ma ca xneltocacan, pampa

* ^{24:3} cosas † ^{24:6} todavía; sanquen ‡ ^{24:12} mucho § ^{24:12} amor

huajlasquej on tlacajcayajquej yejhuan notenehuasquej Cristos noso tiotlajtojquej. Niman quichihuasquej huejhueyi tlamajhuisoltin niman milagros para tecajcayahuasquej, niman hasta on yejhuan Dios yoquintlapejpenij. Pero yejhuamej xhuelisquej quincajcayahuasquej on yejhuan Dios yoquintlapejpenij. ²⁵ Xmotacan sa no nemejhuamej. Xquipia tlaca* nenhuetzisquej, pampa ye nemechmachiltijticaj tlinon nochihuas. ²⁶ Yejhua ica, tla mechijlisquej: "Xquitacan, nepa nemí Cristo campa tlapatlaco", ma ca xhuiyan. Noso tla mechijlisquej: "Xquitacan nican iyanticaj ijtic in caltzintli", ma ca xneltocacan. ²⁷ Ma ca xneltocacan, pampa ijcuac nejhua yejhuan oninochiu Tlacatl nihuajlas, nochi tlacatl nechitas quen on tlaperlanajli nochi tlacatl quita ijcuac ne iquisayan tonaltzintli ompa pehua petlani niman hasta ne icalaquian tonaltzintli ontlami petlani.

²⁸ 'Ijcuac nihuajlas, nicuaquis castigo para nochí yejhuan xcuajli tlacatl no ijqui quen on tzopilomej huajlahuij ne campa xintoquej on yolquej yejhuan yomiquej.

Jesús oquimijlij on inomachtijcahuān huajlas yejhua yejhuan onochiu Tlacatl

(Mr. 13.24-37; Lc. 21.25-33; 17.26-30, 34-36)

²⁹ Ijcuac yopanoquej on tonaltin ican tlajyohuilistli, nimantzin xoc tlahui-los on tonaltzintli niman on metzli xoc petlanis. Niman on sitlalimej huajxinisquej niman hasta on tlen cojtilijticaj on cielo huihuixcas. ³⁰ Quemaj ne ipan cielo quitasquej notlamajhuisol, nejhua yejhuan oninochiu Tlacatl. Niman ijcuacon nochi tlajtlacoltlacatl quipias hueyi ajmantli, niman nechitas nejhua yejhuan oninochiu Tlacatl, nihuajlas ican nohueyi poder niman nohueyilis. Nihuajlas ipan on moxtli yejhuan quisa ne ilhuicac. ³¹ Quemaj ica on trompeta chicahuac quipitzasquej, niquinhuajtitlanis on noilhuicactequitcahuān† para quinsentlalisquej nochimej on yejhuan Dios yoquintlapejpenij nochihuiyan ipan in tlalticpactli.

³² 'Xcajsicamatican in ejemplo itech on higuera. Ijcuac on imahuan seliaj niman pehua xojoquoisaj, nemejhuamej nenquimatiij ica ye nisiu on xopantlaj. ³³ In sa no ijqui, ijcuac nemejhuamej nenquitasquej nochí yejhua in tlajtlamach ye nochijticaj, xmatican ica ye listo para nihuajnocuepas ocsejpa. ³⁴ Ica tlen melahuac nemechijlia, ica nochí yejhua in tlajtlamach nochihuas ijcuac xe miquij on tlacamej yejhuan nemij ipan in tonaltin. ³⁵ On cielo‡ niman in tlalticpactli popolihuis, pero notlajtol xqueman popolihuis ifuerza.

³⁶ 'Pero on tonajli niman on hora para tlatlalpolihuis xacaj quimati, nion yejhuamej on ilhuicactequitquej ne ilhuicac nemij, nion nejhua yejhuan niiConeu Dios. Yej san Dios toTajtzin quimati.

³⁷ Ijcuac nejhua yejhuan oninochiu Tlacatl nihuajlas, on tlacamej ijcon quichihuasquej quen oquichijquej ipan on tonaltin ijcuac nemija Noé.

³⁸ Ipan on tonaltin, ijcuac xe apachihuilo, on tlacamej tlacuayaj, atliyaj, nonamictiayaj niman quitemacayaj inichpochhuan para ma nonamictican hasta ipan on tonajli ijcuac Noé ocalac ipan barco. ³⁹ Niman yejhuamej xoquichihuiliqquej cuenta on tlen nochijticatca, yej hasta ijcuac opeu quiahui niman on atl nochimej oquinmictij. Ijcon, tej, quen ipan on tonaltin onochiu, no ijqui nochihuas ijcuac nejhua yejhuan oninochiu Tlacatl nihuajlas. ⁴⁰ Ipan on tonajli omemej tlacamej tequitisquej ne ipan tepetl. Se cuicasquej niman

* ^{24:25} por qué; tline † ^{24:31} mis ángeles: Angeles tequitij ne ilhuicac niman nican ipan in tlalticpactli. ‡ ^{24:35} On cielo oncaj ne campa oncaj ajacatl, moxtli, metztli, tonajli niman sitlalimej.

ocse cajtehuasquej. ⁴¹ Omemej sihuamej tistiasquej ipan se molino. Se cuicasquej niman ocse cajtehuasquej.

⁴² Xtlachixtiacan, tej, pampa xnenquimatiij tlen hora huajlas on nemoTeco. ⁴³ Pero xmatican yejhua in, ica tla se tlacatl tlayecanqui ican ichanchanecahuans quimatisquia tlen hora huajlas on tlachtequetl, yejhua xcochisquia niman xcahuilisquia on tlachtequetl ma quitlapohuili ical para quitlachtequilis. ⁴⁴ Yejhua ica, nemejhuamej no nochipa xnemican listos, pampa ijcuac xnenquinemilitiasquej ica nihuajlas, nejhua yejhuan oninochiu Tlacatl ijcuacon nihuajlas.

Jesús oquijtoj catlejhua cuajli tequitquetl niman catlejhua on yejhuan xcua-jli tequitquetl
(Lc. 12.41-48)

⁴⁵ ¿Aquinon on tequitquetl yejhuan nochipa quichihua quen iteco quinahuatia niman quipia cuajli itlamachilis? On tequitquetl sa no yejhua on, yejhuan iteco quimactilia ichanchanecahuans* niman itequitcahuau para quimacas on tlen quicuasquej ijcuac nonequi. ⁴⁶ Dios quitiochiwas on tequitquetl yejhuan ijcuac huajlas iteco, cuajnextis cuajli quichijtacaj ite-quiui. ⁴⁷ Ica tlen melahuac nemechijlia, ica on iteco quimactilis on tequitquetl nochil tlen yejhua quipia para quejehuas. ⁴⁸ Pero tla yejhua on tequitquetl nocuepas xcua-jli tlacatl, niman quinemilis ica iteco nohuejcahuas para huajlas, ⁴⁹ niman pehuas quinhuihuitequis on ocsequimej tequitquej, niman no notlalis tlacuas niman tlahuanihuan on tlahuantequej, ⁵⁰ on iteco huajlas ipan on tonajli niman ipan on hora ijcuac yejhua xquimatztias ica huajlas. ⁵¹ Niman on iteco sanoyej quitlajyohuiltis, niman quitlalis inhuan on omexayacyequej campa chocas niman notlantotopotzas.

25

Jesús oquixtij se ejemplo intech on majtlactlimej ichpocamej

¹ Ipan on tonajli ijcuac nihuajlas, on yejhuan quinequij calaquisquej ne campa tlamandarohua on yejhuan ilhuicac chanej, ijcon yesquej quen on majtlactlimej ichpocamej. Cada se oquitquic itlahuil ican aceite niman oyajquej ne campa conamiquisquej on novio, yejhuan huajlaya para nonamictis. ² Macuijli de yejhuan xtlamatquej* catcaj, niman on ocse macuijli huej quemaj tlamatquej† catcaj. ³ On yejhuan xtlamatquej catcaj ijcuac oquitquiquej intlahuil, xoquitquiquej aceite para quitequilibisquej on intlahuil. ⁴ Pero on yejhuan tlamatquej catcaj oquitquiquej aceite ican imbotella. ⁵ Niman ica on novio polihuiya para yejcos, nochimej opeu cochisnequij, niman ijqui ocochquej.

⁶ Quemaj ijcuac canaj tlajcoihuan, ocaquistic se tlajtojli: “¡Ye huajlau on novio! ¡Xnamiquitij!” ⁷ Nochimej on ichpocamej otlachixquej, niman opeu quectlalaj intlahuil. ⁸ Quemaj on macultimej ichpocamej xtlamatquej oquimijlajquej on yejhuan tlamatquej: “Achijtzin xtechmacakan nemoaceite, pampa totlahuilhuan ye sejtoquej.” ⁹ Pero on yejhuan tlamatquej ichpocamej oquinanquilajquej: “Ca, pampa tla ijcon xcaxilis para tejhuanamej niman nemejhuamej. Más cuajli, xhuiyan campa quinamacaj, niman xcohuacan yejhuan para nemejhuamej.” ¹⁰ Pero chica on macuijli ichpocamej xtlamatquej ocohuatoj on aceite, oyejcoc on novio. Quemaj on ichpocamej

§ 24:43 su familia * 24:45 su familia * 25:2 no sabios † 25:2 sabios

yejhuan quimachayaj oyajquej ihuan on novio ipan on ilhuitl campa non-amictihuaj. Ijcuac yejhuamej ocalaquej ipan on ilhuitl on tlatzacuilyotl‡ onotzazu.

¹¹ Quemaj oajsiquej on ocsequimej ichpocamej, niman oquijtojquej: “¡Señor, Señor, xtechtlatlapohuili!” ¹² Pero yejhua oquinnanquilij: “Ica tlen melahuac nemechijlia ica nejhua xnemechixmati.”

¹³ Quemaj Jesús oquimijlij:

—Nemejhuamej xnemican ican tlamachalistli, pampa xnenquimatiij on tonajli nion yejhua on hora ijcuac nejhua yejhuan oninochiu Tlacatl nihuajlas.

Jesús oquixtij se ejemplo intech on yeyimej tequitquej

(Lc. 19.11-27)

¹⁴ Nemechijlia ocse ejemplo ica yejhua on tonajli ijcuac nihuajlas. Ijcuac nihuajlas nicchihuas quen oquichiu on tlacatl yejhuan, ijcuac ye yas ipan ocse país, oquinnotz on itequitcahan niman oquinmactilij itomin para ma ica tequitican, ijcuac xac yes. ¹⁵ Se oquimacac canaj ompoajli§ huan majtlactli mil pesos, ocse oquimacac canaj sempoajli* mil pesos, niman ocse canaj majtlactli mil pesos. Oquinmacac san quech se hueli quitequitiltis. Quemaj yejhua oyaj ipan ocse país.

¹⁶ On tequitquetl, yejhuan oquiselij ompoajli huan majtlactli mil pesos, oquitequitiltij on tomin, niman ijqui oquitlan ocse ompoajli huan majtlactli mil pesos. ¹⁷ Niman on yejhuan oquiselij sempoajli mil pesos sa no ijqui oquichiu, niman no oquitlan ocse sempoajli mil pesos. ¹⁸ Pero on yejhuan oquiselij majtlactli mil pesos oyaj niman oquianato ne ijtic tlajli itomin on iteco.

¹⁹ Miyec tonaltin más saquin†, ohuajlaj inteco on tequitquej, niman opeu inhuan quixtia cuenta. ²⁰ Achtopa itech ohuajlaj on yejhuan oquiselijca ompoajli huan majtlactli mil pesos, niman oquititij iteco on ocsequi ompoajli huan majtlactli mil pesos yejhuan oquitlan. Oquijlij: “Señor, otinechmacac ompoajli huan majtlactli mil pesos, niman nican ticpia in ocse ompoajli huan majtlactli mil yejhuan onictlan.” ²¹ Iteco oquijlij: “¡Sanoyej cuajli! Tejhua ticuajli tequitquetl, niman oticchiu quen onicnec. Aman ica xomitzixcajgayau on achijtzin, más miyec nimitzmactilis. Xcalaqui niman nohuan xpaqui.”

²² Quemaj itech ohuajlaj on yejhuan oquiselij sempoajli mil pesos, niman oquijlij: “Señor, otinechmacac sempoajli mil pesos, niman nican ticpia in ocse sempoajli mil pesos yejhuan onictlan.” ²³ On iteco oquijlij: “¡Sanoyej cuajli! Tejhua ticuajli tequitquetl, niman oticchiu quen onicnec. Aman ica xomitzixcajgayau on achijtzin, más miyec nimitzmactilis. Xcalaqui niman nohuan xpaqui.” ²⁴ Pero ijcuac oyejcoc on tequitquetl yejhuan oquiselijca majtlactli mil pesos, oquijlij on iteco: “Señor, nejhua nicmatzticatca ica tejhua xtiteicnelia†, niman ticmoyaxcatia§ itlanca on tlen se quitequit.

²⁵ Yejhua ica nejhua oninomojtij, niman oniaj oniquianato motomin ne ijtic tlajli. Pero nican ticpia on tlen otinechmacac.” ²⁶ Iteco oquijlij: “Xcuajli tequitquetl niman tlatzijqui, ye ticmatzticatca ica nicnoyaxcatia itlanca on tlen se quitequit. ²⁷ Yejhua ica, nonequiya ticalactisquia notomin ipan banco para ijcuac nejhua nihuajlasquia nicselisquia on tlen noyaxca niman on itlanca.” ²⁸ Quemaj on teteco oquinnahuatij on yejhuan ompa nemiyaj: “Xcuilican on majtlactli mil pesos, niman xmacacan on yejhuan aman quipia

‡ **25:10** puerta § **25:15** Omipoajli quitosnequi cuarenta, niman ompoajli huan majtlactli quitosnequi cincuenta. * **25:15** veinte † **25:19** después ‡ **25:24** no tiene misericordia

§ **25:24** lo posees; ticmoaxcatia, ticmohuaxcatia, tictmotlatquitia

cien mil pesos,²⁹ pampa on yejhan quitequitiltia on tlen quipia, quitlanis más, niman on yejhan xquitequitiltia on tlen quipia, quipolos on tlen achijtzin quipia.³⁰ Aman in tequitquetl, yejhan xitlaj* ica servirohua, xcontlajcalican ne campa tlayohuatoc campa chocas niman notlantotopotzas.”

Jesús quintlaxtlahuilis nochimej on tlalticpactlacamej

³¹ Ijcuac nejhua yejhan oninochiu Tlacatl nihuajlas ican nohueyilis in-huan nochimej noilhuicactequitcahuant, nihuajlas ican tlanahuajtijli para nitetlajtlacolmacas niman niteyectenehuas.³² On tlacamej de nochihuiyan países nixpan nosentlalischej. Quemaj on yejhan yolchipajquej niquinxelos intech on yejhan xyolchipajquej, ijcon quen on tlajpixqui quinxelohua on iborreguitos itech on ichivos.³³ On yejhan borreguitos niquintlalis ipan noyecma, niman on yejhan chivos niquintlalis ipan nopochohma.

³⁴ Quemaj nejhua niquimijlis on yejhan niquintlalis ipan noyecma: “Nemejhuamej yejhan noTajtzin omechtiochiu, xhuajlacan niman xcalaquican ne campa nitlamandarohua quen Rey. Ompa Dios otlayectlalij para nemejhuamej, desde ijcuac oquichijchiu in tlalticpactli.³⁵ Mechmelahua nencalaquisquej, pampa nejhua onapismic, niman nemejhuamej onennechtlacualtijquej. Nejhua onamic, niman onennechatlitijquej. Oniquistinen quen huejca chanej, niman onennechsehuijquej nemochan.³⁶ Nechpolojticatca notlaquen, niman onennechmacaquej. Onicualoc, niman onennechpalehuijquej. Nitzacuticatca niman onennechitacoj.”

³⁷ Ijcuacon on yejhan yolchipajquej nechtlajtoltisquej: “ToTeco, ¿quemanon otimitzitaquej ican apistli niman otimitztlacualtijquej? ¿Noso quemanon otimitzitaquej ican amictli, niman otimitzatlitijquej?³⁸ ¿Noso quemanon otimitzitaquej quen tihuejcachanej, niman otimitzsehuijquej tochan, noso omitzpoloj motlaquen, niman otimitzmacaquej?³⁹ ¿Noso quemanon otimitzitaquej ticualo, noso titzacuticaj niman otimitzitatoj?”⁴⁰ Niman nejhua yejhan niRey niquimijlis: “Ica tlen melahuac nemechijlia ica nochí on tlen ica onenquipalehuijquej intech in nocnihuan yejhan xhuejhueyixtoquej, sa no nejhua onennechpalehuijquej.”

⁴¹ Quemaj niquimijlis on yejhan nemij ipan nopochohma: “Xmejcuancan notech nemejhuamej yejhan Dios yomechtla tlacolmacac. Xhuiyan ne ipan on tlilt yejhan nochipa tlicutias. On tlilt Dios oquitlalij para on diablo niman on ilhuicactequitquej yejhan aman quitequipanohua on diablo.⁴² Ompa, tej, xhuiyan pampa onapismic, niman nemejhuamej xonennechtlacualtijquej. Onamic, niman xonennechatlitijquej.⁴³ Oniquistinen quen huejca chanej, niman xonennechsehuijquej nemochan. Nejhua onechpoloj notlaquen, niman xonennechmacaquej. Nejhua onicualoc niman no nitzacuticatca, pero xonennechnotzatoj.”

⁴⁴ Ijcuacon yejhuamej nechijlisquej: “Señor, ¿quemanon otimitzitaquej ican apistli, noso ican amictli, noso quen huejca tichanej, noso mitzpolojticatca motlaquen, noso ticualo, noso titzacuticaj niman xotimitzpalehuijquej?”⁴⁵

Niman niquimijlis: “Ica tlen melahuac nemechijlia, ica nochí on tlen xonenquipalehuijquej semej yejhuamej in nocnihuan yejhan xhuejhueyixtoquej, sa no nejhua xonennechpalehuijquej.”⁴⁶ Quemaj yejhuamej in xyolchipajquej yasquej ne campa para nochipa nemisquej ipan tlajyohuclistli, pero on yejhan yolchipajquej yasquej ne campa para nochipa quipiasquej on nemilstli.

* **25:30** nada; coxtla † **25:31** mis ángeles: Angeles tequitij ne ilhuicac niman nican ipan in tlalticpactli.

26

*On hebreos tlayecanquej oquinojliquej quen ijqui quimictisquej Jesús
(Mr. 14.1-2; Lc. 22.1-2; Jn. 11.45-53)*

¹ Ijcuac Jesús otlan tlajtlajtohua, oquimijlij on inomachtijcahuau:

² —Nemejhuamej nenuquimatztoquej ica polihui ocse ome tonajli para onyas on ilhuitl pascua. Ipan on tiempo, nejhua yejhuan oninochiu Tlacatl, nechtemactilisquej para nechmajmasohualtisquej* ipan cojnepanojli†.

³ Quemaj intlayecancahuau on tiopixquej inhuan on temachtijkej ican tlanahuatiijli, niman on tlajtlajmatquej intech on hebreos onosentlalijquej ne iquiahuac on ipalacio Caifás. Yejhua on más hueyi intlayecancau on tiopixquej. ⁴ Ompa san secan oquinojliquej para san ichtacatzin‡ cajsisquej Jesús niman quimictisquej. ⁵ Pero quijtohuayaj:

—Ma ca ijcon ticchihuasquej ipan on ilhuitl para ma ca najcomanasquej on tlacamej.

Sen sihuatl ocuapatzoz Jesús ican ajhuiyalistli

(Mr. 14.3-9; Jn. 12.1-8)

⁶ Jesús nemiya ne Betania ichan Simón, on yejhuan oquipatijca ijcuac palaniya inacayo. ⁷ Niman chica Jesús yehuaticatca ne itech on mesa, oquinisihiij se sihuatl. Yejhua quitquiya se botella tlachijchiutli ican on tetl yejhuan fino. On botella tentiaya ican ajhuiyalistli yejhuan sanoyej§ patioj. Niman on sihuatl oquitoyau on ajhuiyalistli ipan itzoncon Jesús. ⁸ Niman ijcuac on nomachtijquej oquitaquej tlinon quichihua on sihuatl, ocualanquej niman opeu ijquin quijtohuaj:

—¿Tlica* oixpoliu yejhua on? ⁹ Yejhua on huelisquia patioj nonamacasquia, niman ica on tomin nopalehuisquiaj on mayanquej.

¹⁰ Jesús ocac on tlen quijtohuayaj, niman oquimijlij:

—¿Tlica nenquipajsolohuaj yejhua in sihuatl? Yejhua in tlen yejhua nechchihilia sanoyej cuajli. ¹¹ Nemejhuamej nochipa nemotzajlan nenquimpiasquej on mayanquej, pero nejhua xnochipa nican nennechpiasquej nemohuan. ¹² On ica in sihuatl oquitoyau on aceite ajhuiyalistli ipan notlalnacayo, oquichiu para nechpalehuis ijcuac nechtocasquej ipan notlalcon. ¹³ Ica tlen melahuac nemechijlia, ica ne imanyan in tlalticpactli campa noteijlis on temachtilistli yejhuan quitemaca temaquixtilistli, no noteijlis on tlen oquichiu in sihuatl para yejhua no quelnamiquisquej.

Judas oquitlalij iyojlo para quitemactilis Jesús

(Mr. 14.10-11; Lc. 22.3-6)

¹⁴ Quemaj semej yejhamej on majtlactli huan ome nomachtijquej, itoca Judas Iscariote, oyaj oquinnotzato intlayecancahuau on tiopixquej. ¹⁵ Niman oquimijlij:

—¿Quech nennechtlaxtlahuilisquej tla nemechmactilis Jesús?

Ijcuacon yejhamej oquitlaxtlahuilisquej sempoajli† huan majtlactli piezas de tomin tlachijchiutin ican plata. ¹⁶ Niman desde ijcuacon, Judas quipiaya cuidado on cuajli tiempo para quinmactilis Jesús.

Jesús otlacuaj inhuan inomachtijcahuau ipan on ilhuitl itoca pascua niman otzimpeu on Santa Cena

(Mr. 14.12-25; Lc. 22.7-23; Jn. 13.21-30; 1 Co. 11.23-26)

* ^{26:2} me crucificarán † ^{26:2} cruz ‡ ^{26:4} en secreto § ^{26:7} muy * ^{26:8} ¿por qué?; ¿tline?

† ^{26:15} Sempoajli quitosnequi veinte, niman sempoajli huan majtlactli quitosnequi treinta.

¹⁷ Ipan on achtoj tonajli de on ilhuitl ijcuac nocuaya on pan yejhuan xquipia tlaxocolilistli‡, on nomachtijquej oquinisihuijquej Jesús niman oquijlijquej:

—¿Canon ticnequi ma timitzcuectlalilitij on tlacuajli yejhuan ticusas ipan in ilhuitl pascua?

¹⁸ Yejhua oquimijlij:

—Xhuiyan ne ipan on hueyican, ipan ichan se tlacatl yejhuan niquixmati, niman xquijlican: “On temachtijquetl quijtohua: Ye nisiu para nitlajyohuis, niman ica oncaj mochan nicas on tlacuajli inhuau nonomachtijcahuau ipan in ilhuitl pascua.”

¹⁹ On nomachtijquej oquichijquej on tlen Jesús oquinnahuatij, niman otlatlajtlajquej on tlacuajli para nocuas ipan on ilhuitl pascua.

²⁰ Ijcuac otlayohuac, Jesús nemiya ne itech mesa inhuau on majtlactli huan ome nomachtijquej. ²¹ Niman chica tlacuayaj, oquimijlij:

—Ica tlen melahuac nemechijlia, ica semej nemejhuamej nechtemactilis.

²² Ijcuac yejhuamej ijcon ocacquej, sanoyej onajmanquej, niman quemaj cada sesentemej opeu quitlajtoltiaj:

—NoTeco, ¿tlen manin nejhua?

²³ Niman Jesús oquimijlij:

—On yejhuan nohuan tlapalohua ipan noplato, yejhua nechtemactilis.

²⁴ Nejhua yejhuan oninochiu Tlacatl nimquis quen quijtohua on Yectlajcuilojli, pero jlástima para on tlacatl yejhuan nechtemactilis! Más cuajli yesquia tla xqueman tlacatisquia.

²⁵ Quemaj ottajtoj Judas, on yejhuan quitemactilis, niman oquijlij:

—Temachtijquetl, ¿tlen manin nejhua?

Jesús oquijlij:

—Quemaj. Melahuac on tlen yotiquijtoj.

²⁶ Chica tlacuajticatcaj, Jesús ocontilan on pan, niman oquimacac tlaxtlahuijli Dios. Ijcuac yoquitlatapan, oquinmacac on inomachtijcahuau, niman ijquin oquimijlij:

—Nochimej nemejhuamej xcuacan yejhua in pan. In pan quixnescayotia§ notlalnacayo.

²⁷ Quemaj ocontilan on copa, oquimacac tlaxtlahuijli Dios, niman oquimpanoltilij on inomachtijcahuau. Yejhua ijquin oquimijlij:

—Nochimej nemejhuamej xconican yejhua in. ²⁸ Yejhua in tlen aman nencisquej ica in copa quixnescayotia noyesyo yejhuan ica notzimpehualtia on yencuic pacto, niman in noyesyo toyahuis para miyequej tlapojo polhuilos intlajtlacol. ²⁹ Niman no nemechijlia ica aman tzimpehuela ica xoc niconis iyayo in uvas, yej hasta ipan on tonajli ijcuac nemohuan niconis on yencuic iyayo uvas ne campa toTajtzin tlamandarohua.

Jesús oquijlij Pedro ica quinenequis

(Mr. 14:26-31; Lc. 22:31-34; Jn. 13:36-38)

³⁰ Niman ijcuac yoquinocuicatijquej se tlacuicajli, oyajquej ne ipan on tepetl itoca Olivos. ³¹ Niman ompa Jesús oquimijlij:

—Ipan in tlayohua, nochimej nemejhuamej nennechtalcahuisquej, pampa on Yectlajcuilojli ijquin quijtohua: “Nicmictis on tlajpixqui, niman on borregos nopojo polosquej.” ³² Pero ijcuac nejhua yoniyoliu* niman yoninoquetzteu ne ipan notlalcon, nias ne Galilea nemoyecapan.

³³ Ijcuacon Pedro oquinanquilij:

‡ **26:17** levadura § **26:26** simboliza * **26:32** he resucitado; yoniyol

—Masqui nochimej mitztlalcahuisquej, nejhua ca.

³⁴ Niman Jesús oquijlij:

—Ica tlen melahuac nimitzijlia, ica ipan sa no in tlayohua, ijcuac xe tzajtzi on caxtil†, tejhua tiquijtos yexpa ica xtinechixmati.

³⁵ Pedro oquijlij:

—Masqui hasta mohuan nimquis, nejhua xnimitznenequis‡.

Niman nochimej on nomachtijquej sa no ijqui oquijtojquej.

Jesús oquichiu oración ne Getsemani

(*Mr. 14.32-42; Lc. 22.39-46*)

³⁶ Quemaj Jesús oajsic ihuan on inomachtijcahuan campa itoca Getsemani. Niman sequimej inomachtijcahuan ijquin oquimijlij:

—Chica nicchihua oración, nican xmotlajtalicán.

³⁷ Quemaj Jesús más neca ocuicac Pedro niman on omemej iconehuan Zebedeo, niman opeu sanoyej najmana niman noyolcocohua. ³⁸ Quemaj oquimijlij:

—Sanoyej ninajmana. Machixti niajmancam quis. Nemejhuamej nican xmocahuacan, niman xtlachixtiacan.

³⁹ Quemaj Jesús oyaj achijtzin más tlayecapan niman, ijcuac onotlacuenquetz niman oquitlalij ixayac ipan tlajli, oquichiu oración itech Dios, niman oquijlij:

—NoTajzin, tla huelisquia, xnechcahuili ma ca niquijyohuis yejhua in tlajyohuclistli, pero ma ca ma nochihua quen nejhua nicnequi, yej ma nochihua quen tejhua ticnequi.

⁴⁰ Quemaj oyaj ne campa nemiyaj on yejimej inomachtijcahuan, niman oquinnextito cochtoquej. Niman oquijlij Pedro:

—¿Nemejhuamej nion se hora xnenhuelij nohuan nentlachixtoquej?

⁴¹ Xtlachixtiacan niman xchihuacan oración para xmechtlatlatas on diablo. Melahuac, tej, on nemoespíritu quinequi quichihuas cuajli, pero nemonacayo xcojtic.

⁴² Ica ocpa oyaj, niman ijquin oquichiu oración:

—NoTajzin, tla xhuelis para tejhua ticchihuas para ma ca niquijyohuis in tlajyohuclistli, tla ijcon ma nochihua tlen tejhua ticnequi.

⁴³ Niman ijcuac ocsejpa oyaj itech inomachtijcahuan, ocsejpa oquinnextito cochij, pampa sanoyej ocochisnequej. ⁴⁴ Yejhua xoquinnotz, yej oyaj para ica yexpa oquichiu oración, niman sa no yejhua tlajtojli oquijtoto. ⁴⁵ Quemaj oyaj ne campa nemiyaj on inomachtijcahuan, niman oquimijlij:

—¿Hasta aman nencochij niman nenmosehuitoquej? Yoyejcoc on hora ijcuac nechtemactilisquej nejhua yejhuan oninnochii Tlacatl ipan inmahuan on tlajtlacojquej. ⁴⁶ Xmotelquetzacan. Tiahuij. Ye huajlau on yejhuan nechtemactilis.

Jesús ocajsiquej

(*Mr. 14.43-50; Lc. 22.47-53; Jn. 18.2-11*)

⁴⁷ Jesús oc§ tlajtojticatca ijcuac oyejcoc Judas, on yejhuan inhuan on majt-lactli huan ome nomachtijquej tlaphuajli catca. Niman yejhua cuajhuicaya sanoyej miyec tlacatl yejhuan cuajquiyaj inespadas, niman sequimej cuajquiyaj cojin*. Yejhamej huajlayaj ican intlanahuatil on hebreos. ⁴⁸ Niman Judas, on yejhuan quitemactiliaya Jesús, ijquin oquimijlijca on tlacamej:

—On yejhuan nictencuas†, yejhua Jesús. Xcajsican.

† ^{26:34} gallo ‡ ^{26:35} no te negaré § ^{26:47} todavía; sanquen * ^{26:47} palos † ^{26:48} al que yo bese; nicbesarohuilis

In, tej, yejhua señal oquinmacac Judas on tlacamej.

⁴⁹ Quemaj Judas nimantzin oquinisihuij Jesús, niman oquijlij:

—¡Yahuilij, temachtijquetl!

Niman oquitencuaj. ⁵⁰ Jesús oquijlij:

—Notetlajsojcau‡, ¿tlinon ica tihuajlau?

Quemaj on tlacamej oquinisihuijquej Jesús, niman ocajsiquej.

⁵¹ Pero semej on yejhuan nemiyaj ihuan Jesús oquxicopintiaj iespada, niman oquinacastzontec se tlacatl itlaquehual on más hueyi intlayecancau on tiopixquej. ⁵² Ijcuacon Jesús oquijlij:

—Xquejehua moespada campa oticxicopin, pampa nochimej yejhuan temictiaj ican espada, no yejhua ica miquisquej. ⁵³ ¿Tlen xticmati ica nejhua nihuelisquia nictlajtlanilisquia noTajtzin más de majtlactli huan ome tlatecpantli iilhuicactequitcahuans§, niman yejhua amantzin nechinhuatitlanilisquia? ⁵⁴ Pero tla ijcon nochihuas, ¿quen ijqui nochihuas on tlen quijtohua on Yectlajcuilojli campa quijtohua ica ye ijqui oncaj para ijquin nochihuas?

⁵⁵ Quemaj Jesús oquimijlij on tlacamej:

—¿Nemejhuamej onenhualajquej ican espadas niman cojtin* para nennechaisisquej quen yacaj nitlachtequetl yesquia? Nejhua mojmostla nemo-huan ninotlaliaya para nemechmachiaya ne ipan ihueyitiopan Dios, niman xqueman onennechaisisquej. ⁵⁶ Pero nochí yejhua in nochihua para tenquisa on tlen oquijtojquej on tiotlajtojquej ipan on Yectlajcuilojli.

Quemaj nochimej on nomachtijquej ontlatlacsaquej, niman sa iselti oca-jtejquej Jesús.

Jesús onen ne imixpan on tlayecanquej tlajtlajmatquej

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ On yejhuan ocajsiquej Jesús ocuicaquej itech Caifás, on yejhuan más hueyi intlayecancau on tiopixquej. Ompa on temachtijquej ican tlanahuatijli niman on tlajmatquej san secan nemiyaj. ⁵⁸ Pero Pedro san huejca oquitocac hasta queman oajsic ne iquiahuac on cajli yejhuan ical on yejhuan más hueyi tlayecanquetl intech on tiopixquej. Ijcuac ompa ocalac, onotlalij inhuan on policías yejhuan tlajpiaj ipan ihueyi tiopan Dios para quitas quen ijqui tlamis on tlen nochijtacatca.

⁵⁹ Intlayecancahuán on tiopixquej, niman nochimej on tetlacanojnotzquej quitejtemohuayaj quen ijqui quiteixpanhuisquej Jesús para ijqui huelis quimictisquej. ⁶⁰ Pero masqui miyequej tlacajcayajquej teixpantiliquej oyajquej niman oquijtojquej miyec tlen xmelahuac itechica Jesús, xohuel oquitlajtlacolmacaquej. Pero quemaj oyajquej omemej xcuajcualtin teixpantiliquej ⁶¹ yejhuan oquijtojquej:

—Yejhúa in tlacatl oquijtoj: “Nejhua huelis nicxoxotonis ihueyi tiopan Dios, niman ipan yeyi tonajli nitlamis ocsejpa nicchijchihuas.”

⁶² Quemaj on más hueyixticaj tlayecanquetl intech on tiopixquej ohua-jnotelquetz, niman oquijlij Jesús:

—¿Xitlaj ica titlananquilis? ¿Tlinon in quiteixpantilijtoquej yejhamej in mocá tejhua?

⁶³ Pero Jesús xonahuat. Quemaj ocsejpa on más hueyixticaj tlayecanquetl intech on tiopixquej oquijlij:

—Ican itocatzin Dios yejhuan nochipa nemi, xtechijli ican tlajtolpale-huilstli tla tejhua tiCristo, on iConeu Dios.

‡ **26:50** mi amigo § **26:53** ángeles de El; Angeles tequitij ne ilhuicac niman nican ipan in tlalticpactli. * **26:55** palos

64 Jesús oquijlij:

—Quemaj, melahuac on tlen otiquijtoj. Niman no nemechijlia ica nenechitasquej nejhua yejhuan oninochiu Tlacatl, ninotlalis iyecmacopa Dios yejhuan quipia nochí poder. Niman no nennechitasquej nihuajlas ipan on moxtli yejhuan ne ilhuicac quisticaj.

65 Ijcuacon on más hueyi tlayecanquetl intech on tiopixquej sanoyej ocualan niman onotlaquencocotontiaj†, niman oquijtoj:

—Yejhua in tlacatl yocuijhuicaltij Dios ican itlajtol. Tej, ¿tlinon para tiquinequij más teixpantiliquej? Nemejhuamej yonencaquej quen yocuijhuicaltij Dios. **66** ¿Quen nenquinemiliaj?

Yejhuamej oquijtojquej:

—Yejhua tlajtlacolej, niman nonequi miquis.

67 Quemaj oquixayacachijchatijquej, niman oquihuihuitequej. Niman sequimej oquixayacatetlatzinijquej, **68** niman oquijlijquej:

—Xtlajto, tiotlajtojquetl. Tejhua Cristo, xtechijli aquinon omitzmailij.

Pedro oquinene Jesús

(Mr. 14.66-72; Lc. 22.56-62; Jn. 18.15-18, 25-27)

69 Pedro yehuaticatca ne quiahuac, niman se sihuatl tequichihuilijsquetl oquinisihuij niman oquijlij:

—Tejhua no tiquistinemiya ihuan Jesús, on yejhuan hualehua ne Galilea.

70 Niman Pedro imixpan nochimej oquinene‡, niman oquijtoj:

—Nejhua xnicmati on tlen tiquijtohua.

71 Pedro ye yajtiaya itechica on tlatzacuilyotl§ ijcuac ocse sihuatl tequichihuilijsquetl oquitac. Niman on sihuatl oquimijlij on yejhuan ompa nemiyaj:

—Yejhua in tlacatl no quistinemiya ihuan Jesús on yejhuan hualehua ne Nazaret.

72 Niman Pedro ocsejpa oquinene niman onocalactij ican itlajtol. Oquijtoj:

—Nemechyolmelajcaila ica nejhua xniquixmati yejhua on tlacatl.

73 Achijtzin más saquin*, on yejhuan ompa nemiyaj oquinisihuijquej Pedro niman oquijlijquej:

—Melauc, tejhua no tehuan titlapoajli, pampa tixmachyoj hasta ica titlajtlajtohua.

74 Ijcuacon Pedro oquijtoj ican itlajtolpalehuilis:

—¡Ma nimiqui tla xniquijtohua on tlen melahuac! Nejhua xniquixmati yejhua on tlacatl.

Quemaj nimantzin otzajtzic se caxtil†. **75** Ijcuac Pedro ocac ica otzajtzic on caxtil, oquelnamic on tlin Jesús oquijlijca: “Ijcuac xe tzajtzi on caxtil, tejhua yexpa tinechnenequis‡.” Niman quemaj Pedro oquis ompa niman sanoyej oajmancachocac.

27

Jesús ocuicaquej ne itech Pilato

(Mr. 15.1; Lc. 23.1-2; Jn. 18.28-32)

1 Ijcuac yotlanes, nochimej intlayecanahuan on tiopixquej niman on tlajtlajmatquej intech hebreos oquinojlijquej quen ijqui quimictisquej Jesús.

2 Quemaj ijcuac yoquisalojquej Jesús, ocuicaquej niman oquitemactilito ne itech on gobernador Poncio Pilato.

† 26:65 fue rompiendo sus ropas ‡ 26:70 negó § 26:71 puerta * 26:73 después † 26:74 gallo ‡ 26:75 me negarás

Judas omic

³ Ijcuac Judas, on yejhuan oquitemactilij Jesús, oquitac ica Jesús yoquitlajt-lacoltijquej para miquis, onoyolpatlac niman on sempaojli* huan majtlactli piezas de tomin tlachijchiutin ican plata oquincuepilij intlayecancahuan on tiopixquej niman on tlajtlajmatquej. ⁴ Oquimijlij:

—Nejhua yonitlajtlacoj pampa yonictemactilij se tlacatl yolchipahuac para ma quimictican.

Pero yejhamej oquijlijquej:

—Niman aman, ¿tlinon totequiviu† tejhuamej? ¡On, tejhuam ompa xcontili quen ticchihuas!

⁵ Ijcuacon Judas oconxinij on tomin ne ijtic on hueyi tiapan, niman quemaj oyaj onoquechmictito.

⁶ Intlayecancahuan on tiopixquej ocajcocuquej on tomin, niman oquijto-jquej:

—On tlanahuatiijli xtechcahuilia tictlalisquej in tomin ne ipan on caja campa nehua on huentomin, pampa in yejhua ica oquitlaxtlajquej imiquilis se tlacatl.

⁷ Quemaj san secan onotlajtolmacaquej para yejhua ica on tomin co-huasquej se tlajli, yejhuan itoca Alfarero, campa quintocasquej on yejhuan xchanejquej. ⁸ Yejhua ica, hasta aman ipan in tonajli, on tlajli itoca Yest-lajli. ⁹⁻¹⁰ Niman ijqui onochiu on tlen oquijtocaj on tiotlajtojquetl Jeremías: “Oquitilanquej on sempaojli huan majtlactli tomin de plata, niman ocojquej on tlajli itoca Alfarero, sa no ijqui quen onechnahuatij on toTeco.” On hebreos sa no ijqui on tomin oquijtocaj para quitlaxtlahuasquej.

Pilato tlamach oquitlajtoltij Jesús

(Mr. 15.2-5; Lc. 23.3-5; Jn. 18.33-38)

¹¹ Jesús ijcaticatca ne ixpan on gobernador. Niman on gobernador oquit-lajtoltij:

—¿Tejhua tiinRey on hebreos?

Jesús oquinanquilij:

—Quemaj. Ijqui quen tejhuam tiquijtohua.

¹² Pero ijcuac intlayecancahuan on tiopixquej niman on tlajtlajmatquej quiteixpanhuiyayaj, Jesús xitlaj‡ ica otenanquilij. ¹³ Niman on Pilato oquijlij:

—¿Xticaqui nochí on tlen ica mitzteixpanhuiyaj?

¹⁴ Pero Jesús xitlaj ica oquinanquilij nion se tlajtojli. Yejhua ica on gober-nador otlamojcaitac, niman xquimatiya tlinon quinemilis.

Pilato oquitecahuiliij ma quimictican Jesús

(Mr. 15.6-20; Lc. 23.13-25; Jn. 18.38—19.16)

¹⁵ Cada xipan ipan on ilhuitl itoca pascua, on gobernador quinmacahuil-iani on tlacamej se tlacatl yejhuan tzacuticaj yejhuan yejhamej quitlajt-laniyaj. ¹⁶ Niman ipan on tonaltin nemiya se yejhuan tzacuticatca itoca Barrabás yejhuan nochí tlacatl quixmatiya ica xcualji tlacatl. ¹⁷ Yejhua ica, ijcuac on tlacamej onosentlalijquej, Pilato oquintlajtoltij:

—¿Aquinon nenquinequij ma nemechmacahuili: Barrabás, noso Jesús, on yejhuan no itoca Cristo?

¹⁸ Yejhua ijcon oquintlajtoltij pampa oquimat ica intlayecancahuan on tiopixquej san ican innexicol oquimactilijquej Jesús.

* ^{27:3} Sempoajli quitosnequi veinte, niman sempaojli huan majtlactli quitosnequi treinta. † ^{27:4} qué nos importa; techimportarohua, techajmana ‡ ^{27:12} nada; coxtla

¹⁹ No ijqui, ijcuac Pilato yehuaticatca ne ipan on sillá campa quintlajtla-colmaca on yejhuan xcuajcualtin tlacamej, on isihuau otlanahuatij ijquin ma quijlitij: “Ma ca itlaj ica timocalactis ticchihuilis on yolchipahuac tlacatl, pampa in tlayohua sanoyej[§] temojtij onictemic san ipampa.”

²⁰ Pero intlayecancahuan on tiopixquej niman on tlajtlajmatquej oquinyolchicajquej on tlacamej para ma tlajtlanican ma quimacahuac Barrabás, niman Jesús ma quimictican. ²¹ On gobernador ocsejpa oquinnotz, niman oquintlajtoltij:

—¿Catlejhua de in omemej nenquinequij ma nemechmacahuili?

Niman yejhuamej oquijtojquej:

—Barrabás.

²² Pilato oquintlajtoltij:

—¿Niman tlinon nicchihuas ihuan Jesús, yejhuan no itoca Cristo?

Nochimej oquijtojquej:

—¡Xmajmasohualli* ipan cojnepanojli†!

²³ Quemaj Pilato oquimijlij:

—¿Tlinon, tej, xcuajli oquichiu?

Pero yejhuamej más chicahuac ocsejpa otzajtziqquej:

—¡Xmajmasohualli ipan cojnepanojli!

²⁴ Ijcuac Pilato oquitac ica xhuelis quimanahuis Jesús, yej más najcomanayaj on tlacamej, otlanahuatij ma cuilitij atl. Niman quemaj onomajtequij imixpan nochimej on tlacamej, niman oquimijlij:

—Nejhua xnicpias tlajtlacojli tla miquis in yolchipahuac tlacatl. Ompa xcontilican.

²⁵ Niman nochimej on tlacamej oquijtojquej:

—¡Tejhuamej niman tocone huan titotlajtlacolmacasquej yejhua ica on imiquilis!

²⁶ Quemaj Pilato oquinmacahuili Barrabás, niman otlanahuatij ma quitlatzhuitequican Jesús, niman oquitemacac para ma quimajmasohuáltican ipan cojnepanojli.

²⁷ Quemaj isoldados on gobernador ocuicaquej Jesús ne ipan palacio, niman nochí on quech soldado ompa nemiya oquiyeyehualo quej. ²⁸ Quemaj Jesús oquixtilijquej itlaquen, niman oquitlaliltijquej se tlaquentli morado.

²⁹ Niman no oquimaniltijquej se huitzcorona, niman oquimacuitijquej se acatl ipan iyecma. Quemaj ixpan onotlacuenquetzquej niman ica huetzcayaj. Quijliayaj:

—¡Cuajli xnemi tejhua Rey intertech on hebreos!

³⁰ No ijqui quichijchayaj, niman cuiliayaj on cojtlí yejhuan oquimacuitijquej, niman quimailiayaj ipan itzontecon. ³¹ Ijcuac ica yonahuiltijquej, oquixtilijquej on tlaquentli morado, niman oquitlaliltijquej on yejhuan yejhua itlaquen. Niman quemaj ocuicaquej para quimajmasohuáltisquej ipan on cojnepanojli.

Jesús oquimajmasohuáltijquej ne ipan on cojnepanojli

(Mr. 15.21-32; Lc. 23.26-43; Jn. 19.17-27)

³² Ijcuac quisiatiyaj ipan on hueyican, oquinamiquej se tlacatl itoca Simón yejhuan chantiya ne Cirene. Niman on soldados oquichihualtijquej para ma quitquili icojnepanol‡ Jesús.

³³ Niman ijcuac oajsiquej ne campa itoca Gólgota, yejhuan quijtosnequi “Micatzontecomatlán”, ³⁴ Jesús oquimacaquej para ma coni on vino tlaneloyo

§ 27:19 muy * 27:22 crucificalo † 27:22 cruz ‡ 27:32 su cruz

ihuán on tlen chichic itoca hiel. Pero ijcuac yejhua oquimat ican icamac, xoquinec oconic.

³⁵ Ijcuac yoquimajmasohualtijquej ipan on cojnepanojli, on soldados onotlatlanquej para quitasquej cada se tlinon quitquis de yejhua on itlaquen Jesús. Ijquin onochiu on tlen oquijtoj on tiotlajtojquetl: “Onotlatlanquej ican suertes para se oquinoyaxcatij[§] notlaquen.” ³⁶ Quemaj onotlajtlalijquej itech Jesús para oquitlajpixquej. ³⁷ Niman ne ipan on cojnepanojli campa icuapan ica Jesús, oquijcuiloltlalijquej tlica* oquimictijquej. Niman on tla- jcuilojli quiytohuaya: “In yejhua Jesús, in Rey on hebreos.” ³⁸ No ijqui ihuan Jesús oquinmajmasohualtijquej impan cojnepanoltin omemej tlachtequej. Se oquimajmasohualtijquej iyecmacopa niman ocse iopochmacopa.

³⁹ Niman on yejhuan ompa quipanahuiyayaj cuijhuicaltiayaj, niman nocuahuixohuayaj, pampa sa ica nahultiayaj. ⁴⁰ Niman quijliayaj:

—Tejhua yejhuan ticxoxotonis ihueyi tiopan Dios niman ipan yeyi tonajli ocsejpa tlamic ticchijchihuas, xmomaquixti sa no tejhua. Tla melahuac tiiConeu Dios, xhuajtemo ipan on cojnepanojli.

⁴¹ Niman intlayecancahuan on tiopixquej niman on temachtijquej ican tlanahuatijli, inhuan on fariseos niman on tlajtlajmatquej no ijqui ica huetcayaj, niman yejhamej quinojlayaj:

⁴² —Ocsequimej oquinmaquixtij, pero sa no yejhua xhueli nomaquixtia. Tla melahuac yejhua in Rey on hebreos, ma huajtemo ne ipan on cojnepanojli niman ticneltocasquej. ⁴³ Yejhua notenehua yoquitlalij iyojlo itech Dios. Aman, tej, ma Dios quimaquixti tla melahuac quitlajsojtla†, pampa yejhua oquijtoj: “Nejhua niiConeu Dios.”

⁴⁴ Niman hasta on tlachtequej yejhuan no oquinmajmasohualtijquej impan cojnepanoltin cuijhuicaltiayaj Jesús.

Jesús ohuajnotlamilij

(Mr. 15.33-41; Lc. 23.44-49; Jn. 19.28-30)

⁴⁵ Quemaj ijcuac oajsic tlacualispan, otlayohuatiac nochihuiyan, niman tlayohuatoc catca hasta ijqui oajsic ipan yeyi hora ica tiotlac. ⁴⁶ Niman canaj ipan on hora, Jesús chicahuac otzajtzic:

—Elí, Elí, ¿lama sabactani? —yejhuan quijtosnequi: noDios, noDios, ¿tlica tinechtlalcahuiya?

⁴⁷ Sequimej yejhuan ompa nemiyaj ocacquej, niman ijquin oquijtojquej:

—Yejhuá in tlacatl quinotza on tiotlajtojquetl Elías.

⁴⁸ Quemaj nimantzin semej yejhamej onotlalojtiquis, ocuito on quen itlaj tlaquentli‡ momoxic itoca esponja, niman oquipolactij ipan on vinagre. Quemaj ocontlalij icuapan se acatl niman ocontlalij itech iten Jesús para ma quipachichina. ⁴⁹ Pero on ocsequimej oquijlijquej:

—¡Ma ca! Yej xcahua. Tiquitasquej tla huajlas Elías niman cuajmanahuis.

⁵⁰ Quemaj Jesús ocsejpa otzajtzic chicahuac, niman ijcuacon ohuajnotlamilij.

⁵¹ Quemaj nimantzin on tlazacuilltlaquentli yejhuan pilcaya ne ijtic on hueyi tiopan ohuajtlajcotecoton[§] tlacpac hasta tlatzintlan. No otلالolin niman on temej otlajtlapanquej. ⁵² On tlalcontin otlapojquej, niman miyequej on mimiquej yejhuan Dios iyaxcahuan oyoliuquej*. ⁵³ Niman ijcuac Jesús oyoliu niman onoquetzteu, on iyaxcahuan Dios oquisquej ijtic intlalcon,

§ 27:35 lo adueñó; oquinoaxcatij, oquinohuaxcatij, oquinotlatquitij

* 27:37 por qué; tline

† 27:43 lo ama ‡ 27:48 tela § 27:51 La cortina se partió a la mitad. * 27:52 resucitaron

niman oyajquej ne ipan on yectiticaj hueyican itoca Jerusalén campa miyec tlacatl oquintac.

⁵⁴ Ijcuac on capitán niman on soldados, yejhuan ompa inhuan quitlajpi-ayaj Jesús, oquimatquej tlalolinticaj niman oquitaquej ocsequi tlajtlamach† nochijticaj, sanoyej onomojtiquej, niman oquijtojquej:

—In tlacatl melahuac iConeu catca Dios.

⁵⁵ San huejcatzin nemiyaj miyequej sihuamej yejhuan ocuajhuicaquej Jesús de ne Galilea hasta Jerusalén para oquipalehuijquej. ⁵⁶ María yejhuan hualehua ne ipan on hueyican itoca Magdala, María on yejhuan innan Jacobo niman José, niman innan on iconehuan Zebedeo ompa nemiyaj inhuan ocsequimej.

Oquitocaquej Jesús

(*Mr. 15.42-47; Lc. 23.50-56; Jn. 19.38-42*)

⁵⁷ Ijcuac ye tlayohuatitiaya, ohuajlaj se tlacatl rico itoca José. Yejhuan hualehuaya ipan on pueblo itoca Arimatea. Yejhua no inomachtijcau catca Jesús. ⁵⁸ Oyaj itech Pilato, niman oquitlajtlanilij itlalnacayo Jesús. Niman Pilato otlanahuatij ma quimacacan. ⁵⁹ José oquitemohuij itlalnacayo Jesús, niman oquitejcuix ican se tlaquentli‡ istac yejhuan patioj niman chipahuac.

⁶⁰ Quemaj ocahuato ipan se yencuic tlalcontli yejhuan oquichijchiu ipan se techinantli. Niman quemaj ocuejcueptiaj se tetl sanoyej hueyi para oquitentzacu. Niman ijcuac yoquitentzacu on tlalcontli, oyaj. ⁶¹ Niman María yejhuan hualehua Magdala ihuan on ocse María onotlajtlalijquej ixpan on tlalcontli.

Pilato oquinnahuatij on soldados ma quitlajpiatij on tlalcontli campa onotocac itlalnacayo Jesús

⁶² Huajmostla, ipan on tonajli ijcuac on hebreos nosehuij, intlayecanc-ahuan on tiopixquej niman on fariseos oyajquej, oquitatoj Pilato, ⁶³ niman oquijlijquej:

—Señor, tejhuamej otiquelnamiquej ijcuac on tlacajcayajquetl oc§ nemiya, oquijtoj ica más saquin* ipan yeyi tonajli yolihuis† niman noquetztehuas ne ipan itlalcon. ⁶⁴ Yejhua ica, tejhuamej ticnequij xtlanahuati ma cuajli quitlajpiatij on tlalcontli hasta ma ajsi on yeyi tonajli para on inomachtijcahuau ma ca cualichtequisquej on itlalnacayo, niman quemaj quimijlisquej on tlacamej: “Aman yoyoliu niman yonoquetzteu ipan itlalcon.” Tla ijcon nochihuas, más temojtij onyas tlacajcayahualistli xquen ijcuac oquijtoj ica ijcon quichihuas.

⁶⁵ Pilato oquimijlij:

—Ompa on nenquimpiaj quesquimej soldados. Xhuiyan, niman hasta campa nenhuelisquej cuajli xtlajpiacan on tlalcontli.

⁶⁶ Quemaj oyajquej niman oquitlalijquej se sello ipan on tetl yejhuan ica tentzacuticatca para quitasquej tla yacaj calaqui ne ijtic on tlalcontli. Niman quemaj ompa oquincajquej on soldados para ma quitlajpiacan.

28

Jesús oyoliu niman onoquetzteu ipan itlalcon

(*Mr. 16.1-8; Lc. 24.1-12; Jn. 20.1-10*)

¹ Ijcuac opanoc on tonajli ica nosehuij on hebreos niman yohuajtlanes ipan on tonajli domingo, María yejhuan hualehua ne Magdala ihuan on

† 27:54 cosas ‡ 27:59 sabana § 27:63 todavía; sanquen * 27:63 después † 27:63 ha resucitado; yoyol

ocse María oyajquej oquitatoj on tlalcontli. ² Niman nimantzin ohuajtlalolin, pampa se ilhuicactequitquetl*, yejhuan toTeco ocuajtitlan, ohuajtemoc ne ilhuicac. Ijcuac oyejcoc ne itech on tlalcontli, oquejcuanij on tetl yejhuan ica tentzacuticatca niman ipan onotlalij. ³ Yejhua sanoyej† petlanqui catca quen itlaj tlapetlanajli, niman itlaquen istac catca quen itlaj nieve. ⁴ Niman ijcuac on soldados oquitaquej on ilhuicactequitquetl, onomojtijquej, ocuecuetla-caquej niman onocajquej quen omijmiquej. ⁵ Quemaj on ilhuicactequitquetl oquimijlij on sihuamej:

—Ma ca xmomojtican. Nejhua nicmatzticaj ica onenquitacoj Jesús yejhuan oquimajmasohualtijquej‡ ipan on cojnepanojli§. ⁶ Yejhua xnican nemi. Yejhua yoyoliu* niman yonoquetzteu ipan itlalcon quen oquijtojca quichi-huas. Xhuajlacan, xquitacan campa oquitecacaj. ⁷ Nimantzin xhuiyan, niman xquimijlican on inomachtijcahuau: “On yejhuan omic, aman yoyoliu niman yonoquetzteu ipan itlalcon. Aman, tej, yejhua nemoyecapan yas ne Galilea niman ompa nenquitasquej.” Aman yonemechijlij on tlen nonequi nemechijlis.

⁸ Niman on sihuamej nimantzin onejcuanijquej ne itech on tlalcontli ican nemojtijli niman no ican miyec paquilstli. Yejhuatej onotlajtlalojquej para oquinmachiltitoj on nomachtijquej on tlen oquimijlij on ilhuicactequitquetl. ⁹ Niman chica yejhuatej on sihuamej yayaj, Jesús oquinnotitij niman oquintlajpaloj. Niman yejhuatej oquinisihuijquej, niman oquinapalojquej icxihuau, niman oquimahuistilijquej. ¹⁰ Yejhua oquimijlij:

—Ma ca xmomojtican. Xhuiyan, xquinmachiltitij nocnihuan ma huiyan ne Galilea, niman ompa nechitasquej.

On soldados oquiselijquej tomin para quijtosquej ica Cristo xnejli yoyoliu niman yonoquetzteu ipan itlalcon

¹¹ Chica yejhuatej on sihuamej yayaj, sequimej soldados, yejhuan quit-lajpiyaj on tlalcontli, oyajquej ne ipan on hueyican, niman oquintla-jtlajtohuilijquej intlayecancahuau on tiopixquej nochí on tlen onochiu. ¹² Yejhuatej on tiopixquej oyajquej oquinnotzatoj on tlajtlajmatquej. Niman ijcuac san secan yoquinojlijquej quen ijqui quiyanasquej on tlen melahuac ica Jesús yoyoliu† niman yonoquetzteu ipan itlalcon, yejhuatej oquinmacaquej miyec tomin on soldados. ¹³ Niman ijquin oquimijlijquej:

—Xquimijlican on tlacamej ica ijcuac tlayohua, chica nemejhuatej nen-cochticatcaj, on inomachtijcahuau ohualajquej niman oquichteqeij itlal-nacayo. ¹⁴ Niman tla on gobernador caquis, tejhuamej ticyoltlalisquej niman ticchihuasquej para ma ca itlaj mechchihuialisquej.

¹⁵ Quemaj on soldados oquiselijquej on tomin, niman oyajquej oquichi-huatoj quen oquimijlijquej. Niman desde ipan on tonajli hasta aman ijqui quitetlajtlajtohuiliaj on hebreos.

*Jesús oquinnotitij on inomachtijcahuau
(Mr. 16.14-18; Lc. 24.36-49; Jn. 20.19-23)*

¹⁶ Ijcon, tej, on majtlactli huan se nomachtijquej oyajquej ne Galilea ipan on tepetl campa Jesús oquimijlij para yasquej. ¹⁷ Niman ijcuac yejhuatej oquitaquej Jesús, oquimahuistilijquej. Pero sequimej ometlamatiyaj. ¹⁸ Quemaj Jesús oquinisihuij, niman oquimijlij:

* ^{28:2} ángel: Angeles tequitij ne ilhuicac niman nican ipan in tlalticpactli. † ^{28:3} muy ‡ ^{28:5} crucificaron § ^{28:5} cruz * ^{28:6} ha resucitado; yoyol † ^{28:12} ha resucitado; yoyol

—Nejhua yonechmacaquej nochí tequihuajyotl para nitlamandarohua ne ilhuicac niman nican ipan in tlalticpactli. ¹⁹ Yehua ica, tej, xhuiyan imanyan nochí on tlalticpactli, niman xquinmachtican nochimej on tlacamej para yejhuamej no nonomachtijcahuan yesquej. Xquinquatequican ican itoca noTajtzin, niman ican itoca on iConetzin, niman ican itocatzin on Espíritu Santo. ²⁰ Niman xquinmachtican para ma quitlacamatican nochí tlen yonemechnahuatij. Niman xmatican ica nejhua mojmostla nemohuan ninemi hasta ijcuac tlatlalpolihuis. Ma ijqui nochihua.

SAN MARCOS IN CUAJLI TLAJTOJLI YEJHUAN SAN MARCOS OQUIJCUILOJ ACERCA DE INEMILIS JESUCRISTO

Isaías oquijtoj ica huajlas Juan

(Mt. 3.1-12; Lc. 3.1-9, 15-17; Jn. 1.19-28)

- 1 Ijquin otzimpeu in cuajli tlajtojli ica Jesucristo yejhua iConetzin Dios.
 - 2 On tiotlajtojquetl Isaías oquijcuilojca on tlinon Dios oquijlijca iconueu. Dios oquijlij:
- Xcaqui in. Nictitlanis se notenojnotzcau moyecapan. Yejhua quintlalilis inyojlo melajqui para mitzselisquej.
- 3 On notlaquehual tzajtzi ipan se tlapatlaco. Quimijlia on tojlamej tlacamej: “Xyectlalican nemoyojo pampa ye huajlau toTeco. Xmejmelahuacan nemonemilis ijcon quen on tlacamej cueltlaliaj niman quimejme-lahuaj se ojti ijcuaac huajlau se tlacatl yejhuan hueyixticaj.”

Juan yohuajlaj niman otemachtij ica huajlas Jesús

- 4 Juan, on tlacuatequijquetl, tlacuatequiaya ne ipan on tlapatlaco, niman quinmacthiayaj on tlacamej ma noyolcuepacan niman ma nocuate-quican, niman Dios quintlapoipolhuis intlajtlacol. 5 Huajlayaj cuajcaquiyaj nochimej on chanejquej ipan on hueyican Jerusalén niman on yejhuan nochihuiyan chantiyaj ne Judea. Niman ijcuaac yejhamej yonoyolcuitijquej, Juan quincuatequiaya ne ipan on atentli itoca Jordán.

6 Juan notlaquentiaya ican itojmiyo on yolqui itoca camello, niman not-lajcosalohuaya ican se ilpicatl tlachijchiutli ican cuetlaxtli. Quincuaya on yolcatzitzintin yejhuan quen chapolimej, niman no coniya on cojnecutli.

- 7 Niman quinmacthiayaj ijquin:

—Huajlau ocse, yejhuan quipia más poder xquen nejhua. Nejhua nion achijtzin xnechmelahua* nictojtomas icacmecayo. 8 Nejhua melahuac, tej, yonemechcuatequij ican atl, pero yejhua mechcuatequis ican Espíritu Santo.

Jesús ohuajlaj niman Juan ocuatequij

(Mt. 3.13-17; Lc. 3.21-22)

- 9 Ipan on tonaltin Jesús oquis Nazaret de Galilea, niman Juan ocuatequij ne ipan on atentli itoca Jordán. 10 Niman ijcuaac Jesús ohuajquis ne ijtic on atl, oquitac on ilhuicac ottapou, niman on Espíritu Santo huajtemohuaya quen itlaj paloma ipan. 11 Niman ohualeu itlajtol toTajzin ne ilhuicac. Quijohua:

—Tejhua tinotlajsojcaConetzin, niman sanoyej moca nipacticaj.

On diablo oquitlatlatac Jesús para ma tlajtlaco

(Mt. 4.1-11; Lc. 4.1-13)

- 12 Quemaj nimantzin on Espíritu Santo oquichihualtij Jesús ma huiya ne ipan on tlapatlaco. 13 Niman Jesús ompa onen ompoajli† tonaltin campa nemij on huejhueyi yolcamej yejhuan tecuanimej. Niman on diablo ompa oquitlatlatac Jesús para ma tlajtlaco. Quemaj ohualajquej on ilhuicacte-quitquej‡, niman ompa quipalehuiyaj.

Jesús ohuajlaj ne Galilea

(Mt. 4.12-17; Lc. 4.14-15)

* 1:7 no merezco † 1:13 cuarenta ‡ 1:13 ángeles: Angeles tequitij ne ilhuicac niman nican ipan in tlalticpactli.

¹⁴ Quemaj ijcuac Juan yocasiquej, Jesús oajsic ne Galilea campa quitemachtiaya on cuajli tlajtojli ica quen ijqui Dios tlamandarohua.

¹⁵ Quijtohuaya Jesús:

—Ye huajlau on tonajli ijcuac Dios tlamandaros. Xcajcahuacan ica nenzquichihuaj on tlen xcuajli, niman xneltocacan on temachtilistli yejhuan quitemaca temaquixtilistli.

Jesús oquinnotz sequimej inomachtijcahuán

(Mt. 4.18-22; Lc. 5.1-11)

¹⁶ Se tonajli ijcuac nejnentiaya ne itenco on mar itoca Galilea, Jesús ocomintac Simón niman icniu Andrés. Yejhuamej michajasiquej catcaj, niman conchapaniayaj inmatl ne ipan on atl. ¹⁷ Niman Jesús oquimijlij:

—Nemejhuamej nenquintejtemohuaj michimej. Pero aman xhuajhuiyan nohuan, niman nenquintejtemosquej tlacamej para nenquinhuicasquej itech Dios.

¹⁸ Yejhuamej nimantzin ocajquej inmatlahuan, niman ihuan oyajquej.

¹⁹ Quemaj Jesús onejnen achijtzin más, niman ocomintac omemej icniutin intoca catcaj Jacobo niman Juan. Yejhuamej iconehuan Zebedeo. Nemyaj ipan se barco, niman quintlamanilijcatcaj on inmatlahuan. ²⁰ Nimantzin ocominnotz para ma huajhuiyan ihuan, niman yejhuamej ocajtejquej intataj Zebedeo ne ipan on barco inhuan on itlaquehualhuan, niman oyajquej ihuan Jesús.

Jesús oquipajtij se tlacatl, yejhuan quipiaya on xcuajli espíritu

(Lc. 4.31-37)

²¹ Niman oajsiquej ne ipan on pueblo itoca Capernaum. Ijcuac oyejcoc on tonajli sábado, yejhua on tonajli ijcuac on hebreos nosehuij, Jesús ocalac ne ipan intiopan on hebreos, niman ompa otemachtij. ²² Yejhua xtemachtiaya quen on temachtijquej ican itlanahuatil Dios, yej temachtiaya quen se yejhuan quipia tequihuajyotl. Yejhua ica on tlacamej sanoyej§ omojcatlachixquej.

²³ Ne ipan intiopan on hebreos nemya se tlacatl yejhuan quipiaya se xcuajli espíritu. Niman on tlacatl otzajtzic, ²⁴ oquijlij:

—¿Tlinon ticchihuas tohuan, tejhua Jesús aquin otiuhaleu Nazaret? ¿Otiuhajlaj para titechxoxotonico? Nejhua nimitzixmatzticaj, niman nicmatzticaj ica tejhua tiichipauConetzin Dios.

²⁵ Jesús ocajhuac on xcuajli espíritu, niman oquijlij:

—¡Ma ca xnahuati, niman xquisa ijtic yejhua in tlacatl!

²⁶ Niman on xcuajli espíritu sanoyej chicahuac oquitzejzeloj on tlacatl, niman otzajtzic chicahuac. Quemaj oquis. ²⁷ Nochimej omojmojcatlachixquej, niman nochimej quinotlajtoltiayaj yejhuamej:

—¿Tlinon in? In nesi yencuic tlamachtijli. Ican itequihuajyo Dios in tlacatl tlamandarohua, niman hasta on xcuajcualtin espíritus quitlacamatij.

²⁸ Nimantzin omachiayac ne imanyan Galilea tlinon oquichiu Jesús.

Jesús oquipajtij imonan Pedro

(Mt. 8.14-15; Lc. 4.38-39)

²⁹ Quemaj Jesús oquis ne ipan intiopan on hebreos, niman oyaj ihuan Jacobo niman Juan ne inchan Simón niman Andrés. ³⁰ Niman imonan Simón ompa onoya ipan se tlapechtli. Yejhua quipiaya totonqui*. Niman nimantzin oquijlijquej Jesús ica on imonan Pedro cuelo. ³¹ Niman quemaj

§ 1:22 mucho * 1:30 fiebre

Jesús oquinisihuij, ocontilan ipan ima, niman oquitelquetz. Nimantzin ocau on totonqui, niman quemaj opeu quintlacualtia.

Jesús oquimpajtij miyec tlacatl

(Mt. 8.16-17; Lc. 4.40-41)

³² Ijcuac yocalac tonajli, yejhuamej quinhuajhuicayaj nochimej on quech cualohuayaj, niman on yejhuan quipiayaj on xcuajcualtin espíritus. ³³ Niman nochimej on yejhuan chantiyaj ipan on hueyican onosentlalijquej ne quiahuatenco. ³⁴ Niman Jesús oquimpajtij miyequej on cocoxquej, on yejhuan cada se quipiaya ocse tlamantic cualolistin, niman miyequej oquinquixtilij on xcuajcualtin espíritus. Pero xquincahuiliaya para on xcuajcualtin espíritus ma tlajtocan, pampa yejhuamej quimatzticatcaj ica yejhua aquinon.

Jesús otemachtij ne Galilea

(Lc. 4.42-44)

³⁵ Huajmostla huelipan, ijcuac oc† tlayohuatoc catca, Jesús onocoteu, niman oquis ipan on pueblo, niman oyaj neca campaca xacaj nemí. Ompa oquichihuato oración. ³⁶ Más saquin‡, Simón niman on ocsequimej ino-machtijcahuan Jesús oyajquej para oquitejtemotoj. ³⁷ Ijcuac oquinextitoj, oquijlijquej:

—Miyec tlacatl mitztejtemohua.

³⁸ Yejhua oquinnanquijlij:

—Tiahuij ocsecan pueblos campaca nisu para ompa no nitemachtis, pampa yejhua ica onihuajlaj.

³⁹ Quemaj Jesús temachtijtinemiya ipan intiopan on hebreos nochihuiyan ne imanyan Galilea. No quinquixtiliaya on tlacamej xcuajcualtin espíritus.

Jesús oquipajtij se tlacatl yejhuan palaniya inacayo

(Mt. 8.1-4; Lc. 5.12-16)

⁴⁰ Ohuajlaj se tlacatl itech Jesús yejhuan palaniya inacayo ican on cualolistli itoca lepra. Ixpan onotlacuenquetz niman oquiajmancatlajtlanilij. Oquijlij:

—Tla ticnequi, huelis tinechpajtis.

⁴¹ Niman Jesús oquicnelij. Oquimatozac, niman oquijlij:

—Nicnequi. Aman xpajti.

⁴² Niman ijcuac Jesús ijcon oquijtoj, on cualolistli nimantzin opopoliu ipan on tlacatl. Opajtic inacayo. ⁴³⁻⁴⁴ Jesús oquichicacanahuati, oquijlij:

—Xcaqui in. Ma ca yacaj itlaj xquijli, yej san xhuiya, niman xmoteititi ne itech on tiopixqui para mitzitas ica xoc ticualo. Niman pampa yotipajtic, xcuentlali on tlen Moisés otlanahuatij. Ijcon, tej, on tlacamej quitasquej ica tejhua yotipajtic.

⁴⁵ Pero on tlacatl oyaj niman opeu quitetlajtlajtohulia nochihuiyan on tlen Jesús oquichihuiliij. Yejhua ica Jesús xoc hueliya calaquiya neca ipan pueblos, yej sanecaj nemíya campaca tlapatlaco, niman on tlacamej huajlayaj itech de nochihuiyan pueblos.

2

Jesús oquipajtij se tlacatl yejhuan sepohuiya

(Mt. 9.1-8; Lc. 5.17-26)

† 1:35 todavía; sanquen ‡ 1:36 después

¹ Quemaj ipan quesqui tonajli más saquin*, ocsejpa Jesús oyejcoc ne Caper-naum. Niman ocacquej ica yejhua nemiya ne techan. ² Nimantzin onosent-lalijtetzquej sanoyej† tojlamej tlacamej hasta xoc onaquiyyaj. Sanoyej oten on cajli, nion siquiera ne quiahuatenco xoc onaquiyyaj. Yejhua quitemachtiaya on itlajtol toTajtzin. ³ Niman quemaj oyejcoquej nahuimej tlacamej yejhuan cualajantiyaj se tlacatl yejhuan sepojtoc. ⁴ Niman quemaj ica xohuelquej ocalaquej pampa sanoyej tojlan catca, yej oquitlejcoltijquej ne icuatipan on cajli. Ompa, tej, ocuatlapojquej on cajli ne imelakan Jesús. Niman quemaj ocuajtemoltijquej on sepojtoc ican se cojtlapechtli. ⁵ Ijcuac Jesús oquitac ica yejhamej quineltocayaj ica yejhua hueli tepajtia, oquijlij on cocoxqui:

—Noconeu, motlajtlacolhuan yotlapojpolhuiloquej.

⁶ Pero ompa yejyehuaticatcaj sequimej temachtijquej ican itlanahuatil Dios. Ijquin yejhamej quinemilijticatcaj ipan inyojo: ⁷ “In tlacatl, ¿tlica‡ tlajtlajtohua ijquin? In tlacatl cuijhuicaltia Dios. Xacaj hueli quitetlapojpol-huilia on tlajtlacojli, yej san yejhua Dios.” ⁸ Pero Jesús quimatzticatca ipan inyojo tlinon yejhamej quinemilijticatcaj, niman oquimijlij:

—¿Tlica ijcon nenquinemiliaj ipan nemoyojo? ⁹ ¿Catlejhua más xtepopoloj niquijtos: “Motlajtlacolhuan yotlapojpolhuiloquej”, noso niquijtos: “Xmo-quetztehua, xcajcocui motlapech niman xnejnemi”? ¹⁰ Aman cuajli neme-chitis ica nejhua yejhuan oninochiu Tlacatl nicpia tequihuayotl ipan in tlalticpactli para nictetlapojpolhuilis on tlajtlacojli.

Quemaj Jesús oquijlij on tlacatl yejhuan sepojtoc:

¹¹ —Tejhua nimitzijlia: Xmoquetztehua, xcajcocui motlapech niman xhuiya mochan.

¹² Quemaj on yejhuan sepojtoya nimantzin onotelquetz, ocajocu itlapech, niman quemaj imixpan nochimej ohuajquis. Yejhua ica nochimej sanoyej omojmojcatlachixquej, niman opeu cueyiliaj Dios. Quijtohuayaj:

—Xqueman tiquitayaj ijquin.

*Jesús oquinotz ocse inomachtijcau itoca Leví
(Mt. 9.9-13; Lc. 5.27-32)*

¹³ Quemaj Jesús ocsejpa oyaj ne itenco on mar. Onosentlalij miyec tlacatl, niman oquinmachtij. ¹⁴ Ijcuac oquis ompa ipan iojhui, oquitac Leví iconue Alfeo. Yejhua yehuaticatca ne campa tlacobrarohua ica on impuestos. Niman Jesús oquijlij:

—Xhuajla nohuan.

Leví nimantzin ohuajnotelquetz niman oyaj ihuan Jesús.

On fariseos xquinequiyaj para Jesús ma tlacua inhuan tlajtlacolejquej

¹⁵ Más saquin§ ijcuac Jesús tlacuajticatca ne ichan Leví, sequimej tlacamej yejhuan tlacobrarojquej ica on impuestos niman on ocsequimej yejhuan tlajtlacolejquej onosentlalijquej ihuan Jesús niman inomachtijcahuan ne ipan mesa. Ijcon onochiu pampa miyequej yayaj ihuan Jesús. ¹⁶ Pero on temachtijquej ican itlanahuatil Dios niman on fariseos, ijcuac oquitaquej ica inhuan tlacuaya on tlacobrarojquej niman tlajtlacolejquej, oquimijlijquej on inomachtijcahuan Jesús:

—¿Tlica nemotemachtijcau tlacua niman coni inhuan on tlacobrarojquej niman on tlajtlacolejquej?

¹⁷ Jesús ocac tlinon oquijtojquej, niman oquimijlij:

* ^{2:1} después † ^{2:2} mucha ‡ ^{2:7} ¿por qué?; ¿tline? § ^{2:15} después

—Para on yejhuan xcualoj xnonequij on tepajtijquetl, pero on yejhuan cualoj quemaj. Nejhua xonihuajlaj para niquinnotzas on yejhuan yolmela-jquej, yej para niquinnotzas on yejhuan tlajtlacolejquej.

Jesús oquijtoj tla ticneltocaj itlajtol, ma ticaahuacan on quen ijqui titohuicayaj ye huejcahui
(Mt. 9.14-17; Lc. 5.33-39)

¹⁸ Se tonajli, ijcuac on fariseos niman on inomachtijcahuan Juan nosahuaj, sequimej tlacamej oyajquej itech Jesús, niman oquijlijquej:

—On innomachtijcahuan on fariseos niman inomachtijcahuan Juan nosahuaj. ¿Tlica on monomachtijcahuan xnosahuaj?

¹⁹ Jesús oquimijlij:

—¿Tlen huelisquej nosahuasquej on yejhuan tlanotzaltin campa nonamictihua chica on montli ompa inhuan nemí? Ijcuac on montli ompa nemí tehuan, xhuelisquej nosahuasquej. ²⁰ Pero yejcos on tonajli ijcuac nejhua yejhuan quen nimontli nechquixtisquej intech on notenotzcahuan. Niman ijcuacon quemaj yejhamej nosahuasquej.

²¹ 'Xacaj quitlamanilia se tlaquentli ijsoltic ica on tlaquentli* yejhuan yencuic, pampa on yejhuan yencuic tlaquentli tzolihui, niman más hueyica quicotona on tlaquentli ijsoltic. ²² Niman no xacaj quitlalia on vino yencuic ipan on bolsas yejhuan tlachijchiutin ican on cuetlaxtin ijsoltiquej, pampa on vino posonis, niman on bolsas toponisquej, niman quemaj on vino ihuan on bolsas ixpolihuisquej. Yejhua ica xtlalican on vino yencuic ipan on bolsas yencuiquej.

On fariseos otetlajtoltijquej ica on sábado

(Mt. 12.1-8; Lc. 6.1-5)

²³ Se tonajli, yejhuan ijcuac on hebreos nosehuaj, Jesús panotiaya inhuan on inomachtijcahuan neca campaca oncatca mijli. Niman on inomachtijcahuan opeu cojcopinaj on inyahuayo on mijli de trigo. ²⁴ Quemaj on fariseos oquijlijquej:

—Xquita. On monomachtijcahuan tequitij ipan in tonajli de nesehuijli. Totlanahuatil xtechcahuilia titequitisquej ipan on tonajli de nesehuijli.

²⁵ Pero Jesús oquimijlij:

—¿Nemejhuamej xqueman nenquimomachtianij on tlen oquichijca David ijcuac yejhua niman itehuicalhuan oapismiquej? ²⁶ Yejhua ocalac ipan itiopan Dios ijcuac Abiatar yejhua on más hueyi intlayecancau catca intech yejhamej on tiopixquej. Niman yejhua oquicuaj on pan yejhuan tlatiochitli. Ijquin oquichiu masqui on itlanahuatil Moisés san quincahuiliaya on tiopixquej quicuayaj on pan. Niman David no oquinmacac on tlacamej yejhuan no ompa inhuan nemija.

²⁷ Quemaj Jesús oquimijlij:

—On tonajli de nesehuijli Dios oquitlalij impampa on tlacamej. Xoquintlalij on tlacamej ipampa on tonajli de nesehuijli. ²⁸ Yejhua ica nejhua yejhuan oninochiu Tlacatl nechmelahua† para niquistos tlinon cuajli para se quichihuas ipan on tonajli de nesehuijli.

3

Jesús oquipajtij se tlacatl yejhuan yomatehuatzalijca

(Mt. 12.9-14; Lc. 6.6-11)

* ^{2:21} tela † ^{2:28} merezco

¹ Jesús ocalac ocsejpa ne ipan se tiopan. Niman ompa nemiya se tlacatl yejhuan quipiaya se ima huaqui. ² No ompa nemiyaj sequimej yejhuan sa quipijpiayaj Jesús, para quitasquej tla quipajtis on tlacatl ipan on tonajli de nesehuijli. Ijcon oquichijquej para quipiasquej tlinon ica huelis quiteixpan-huisquej. ³ Jesús oquijlij on tlacatl yejhuan mahuaquia, ma notelquetza ne tlajcotian.

⁴ Quemaj oquintlajtoltij on tlacamej:

—¿Totlanahuatil tlinon techcahuilia ticchihuasquej ipan on tonajli de nesehuijli? ¿Techcahuilia ticchihuialisquej on tlen cuajli on tlacamej, noso on tlen xcuajli? ¿Techcahuilia ticmaquixtisquej on nemilistli, noso ticmictisquej?

Pero yejhamej xoquinanquilijquej. ⁵ Quemaj Jesús oquintlahueltlajt-latac, niman sanoyej* onajman sa ica on inyoltechicahualis. Niman oquijlij on tlacatl:

—Xmelahua moma.

On tlacatl oquimelau ima niman opajtic.

⁶ Ijcuacon ohuajquisquej on fariseos, niman opejquej quinotlajtoltiaj inhuan on itetlajsojcahuant Herodes quen ijqui huelisquej quimictisquej Jesús.

Jesús nemiya inhuan on miyec tlacatl ne itenco on mar

⁷ Jesús onejcuanij, niman oyaj ne itenco on mar inhuan inomachtijcahuau. Niman sanoyej miyec tlacatl yejhuan chanej ne Galilea oyajquej no. No ijqui oyajquej yejhuan chanejquej ne Judea, ⁸ niman ne hueycan Jerusalén, niman ne Idumea, niman ne iquisayan tonajli de on atentli Jordán, niman ne nisu on hueyican Tiro niman on hueyican Sidón. Yejhamej oyajquej para oquitatoj Jesús pampa ocacquej nochí tlinon quichihuaya. ⁹ Jesús oquimijlij on inomachtijcahuau ma onya listo se barco campa huelis tlejcos, para ma ca quipitzmictisquej† on tlacamej. ¹⁰ Nemiyaj sanoyej tojlan tlacamej pampa oquimpajtij miyequej cocoxquej, niman yejhua ica nochimej yejhuan quipiaya j cualolistli quitelosnequiyaj para pajtisquej. ¹¹ Niman on tlacamej, yejhuan quipiaya on xcuajcualtin espíritus notlajcaliyaj icxitlan Jesús, niman on xcuajcualtin espíritus chicahuac tzajtziyaj, quijtohuaya:

—Tejhua tiiConetzin Dios.

¹² Pero Jesús oquinchicajcanahuatij ma ca quiteijlisquej aquin yejhua.

Jesús oquintlapejpenij on majtlactli huan ome nomachtijkej

(Mt. 10.1-4; Lc. 6.12-16)

¹³ Quemaj Jesús otlejcoc ne ipan se tepetl niman oquinhuajnotz san aquinomej yejhua oquinec. Niman yejhamej oyajquej itech. ¹⁴ Niman oquintlalij on majtlactli huan ome tlacamej ipan on tequitl para ma nemican ihuan, niman para quintitlanis ontemachtisquej. ¹⁵ Niman oquinmacac poder para quimpajtisquej on cocoxquej, niman para quintequixtilisquej on xcuajcualtin espíritus. ¹⁶ Oquitlalij Simón yejhuan no oquitocayotij Pedro. ¹⁷ No oquintlalij Jacobo iconeu Zebedeo, niman Juan yejhuan icniu Jacobo. Jesús oquintocayotij Boanerges yejhuan quijtosnequi tetlajtlahuelmej. ¹⁸ No ijqui oquintlalij Andrés, Felipe, Bartolomé, Mateo, Tomás, Jacobo yejhuan iconeu Alfeo, Tadeo, Simón on yejhuan no tehuan catca ne intech on intoca cananistas, ¹⁹ niman Judas Iscariote yejhuan más saquin§ oquitemactilij Jesús.

* 3:5 muy † 3:6 amigos de él ‡ 3:9 lo apretaren; quitetztilisquej § 3:19 después

On temachtijquej ican itlanahuatil Dios oquijtojquej ica Jesús quipia on diablo

(Mt. 12.22-32; Lc. 11.14-23; 12.10)

²⁰ Quemaj Jesús oyaj ne techan, niman ocsejpa onosentlalij miyec tlacatl, niman nion achijtzin xhueliyaj tlacuayaj Jesús niman inomachtijcahuán.

²¹ Ijcuac on quen quintaya* oquimatzquej, ohualajquej para cuicasquej, pampa yejhuamej cuitiayaj yotlamachilispoliu.

²² Yejhuamej on temachtijquej ican itlanahuatil Dios, yejhuan ohualejquej ne Jerusalén, quijtohuayaj:

—Jesús quipia on diablo itoca Beelzebú yejhuan tlayecanquetl intech nochimej on xcuajcualtin espíritus. Yehua quimacaticaj Jesús on hueyilistli para quinquixtis on xcuajcualtin espíritus.

²³ Quemaj Jesús oquinnotz, niman oquimijlij:

—¿Quen ijqui huelis on diablo quixtis on xcuajcualtin espíritus tla sa no yejhua? ²⁴ Tla se país noxexelos, niman pehuas nohuijsoquisquej sa no yejhuamej, on país xhuelis nemis. ²⁵ Niman no ijqui, tla se chanyotl† noxexelos, niman pehuas nohuijsoquisquej sa no yejhuamej, on chanyotl xhuelis onyas. ²⁶ No ijqui, tla on diablo noxelos intech on xcuajcualtin espíritus niman pehuas quinhuijsoquis, xoc huelisquej itlaj quichihuasquej.

²⁷ 'No ijqui, tla yacaj ichtequi quinequi calaquis ichan se tlacatl yejhuan cojtiticaj para quixtilis on tlinon quipia, achtoj ica oncaj quisalos on yejhuan cojtic tlacatl. Niman ijcuacon huelis quicuilis nochí on tlen quipia ipan ichan.

²⁸ 'Melaucac, tej, nemechijlia ica Dios huelis quintlapojpolhuis on tlacamej nochí intlajtlacol niman on tlahuijhuicaltilistli san catlejhua nochí quech ica tlahuijhuicaltilihuaj. ²⁹ Pero tla se tlacatl cuijhuicaltis on Espíritu Santo, Dios xqueman quitlapojpolhuis, yej nochipa quipias itlajtlacol.

³⁰ Ijcon oquijtoj pampa on temachtijquej ican itlanahuatil Dios quijtojicatca ica yejhua quipiaya se xcuajli espíritu.

On yejhuan quitlacamatis Dios, yejhua icniu Jesús niman inan

(Mt. 12.46-50; Lc. 8.19-21)

³¹ Quemaj ohualajquej inan niman icnihuan Jesús. Yejhuamej onocajquej ipan calle, niman otlatitlanquej ma quinotzatij Jesús. ³² On tojlan yejhuan nemiyaj iyehualijcan Jesús ne calijtic, oquijlijquej:

—Monan niman mocnihuan nemij ipan calle, niman quinequij mitzitasquej.

³³ Pero yejhua oquinnanquilij, oquimijlij:

—¿Aquinon nonan niman nocnihuan?

³⁴ Quemaj yejhua ocomintac on yejhuan ompa nemiyaj iyehualijcan, niman quemaj oquijtoj:

—In yejhuamej nonan niman nocnihuan. ³⁵ Nochí aquin quichihuas on tlen Dios quinequi, yejhua nocniu tlacatl, noso nocniu sihuatl, niman yejhua nonan.

4

Jesús oquitlalilij se ejemplo ica on tocaquetl

(Mt. 13.1-9; Lc. 8.4-8)

¹ Ocsejpa Jesús otemachtij ne itenco on mar. Ica sanoyej* miyec tlacatl onosentlalij ne campa yejhua nemiya, Jesús otlejcoc ipan se barco yejhuan oncatca ipan on mar, niman onotlalij. On tlacamej nemiyaj ne itenco on mar.

* 3:21 parientes de El † 3:25 casa; cajli * 4:1 mucha

² Niman yejhua quinmachtiaya miyec tlajtlamach† ican ejemplos, niman ijquin quimijliaya:

³ —Xcaquican cuajli tlinon nemechilhuis. Sen tlacatl oyaj oquixinito on xinachtli de trigo. ⁴ Chica tocaya, sequi xinachtli oxinito ipan ojtli, niman on totomej ohuajlajquej niman oquicuajquej. ⁵ Ocsequi xinachtli oxinito ipan tepetlayoj campa xmás oncaj tlajli, niman on xinachtli nimantzin oixhuac, pampa xmás huejcatlan oncatcaj on tlajli campa oxin. ⁶ Pero ijcuac oquis on tonaltzintli, ocoseu imilyo on trigo. Niman ica xhuejcatlan quipiaya inelhuayo, ohuajhuac. ⁷ Niman ocsequi xinachtli oxinito intzajlan on huitzcojin. On huitzcojin saniman onoscaltijquej niman oquixomictijquej imilyo on trigo. Yejhua ica xotlac. ⁸ Pero sequi xinachtli oxin ipan cuajli tlajli. Onoscaltij, niman sanoyej cuajli otlac. Sequi oquitlaquitij sempoajli‡ huan majtlactli iteyo, niman sequi yepoajli§ iteyo, niman sequi se ciento.

⁹ No oquimijlij:

—Tla nemejhuamej nenquipiaj nemotlamachilis, xcajsicamatican on ejemplo.

Jesús oquijtoj tlica temachtia ican ejemplos
(Mt. 13.10-17; Lc. 8.9-10)

¹⁰ Niman quemaj saquin* ijcuac Jesús sa iselti nemiya inhuan on ino-machtijcahuau niman sa quesqui tlacatl, yejhuan oquitlajtlalilijquej Jesús para ma quimijli tlinon quijtosnequi on ejemplos. ¹¹ Oquimijlij:

—Nemejhuamej Dios yomechcahuilij para nenquimatisquej on tlinon iyanticatca† quen ijqui yejhua tlamandarohua. Pero on ocsequimej niquin-machtia san ican ejemplos ¹² para masqui quicaquisquej on tlinon niqijtohua, niman quitasquej tlinon nicchihua, xcajsicamatisquej, para ma ca noyolcuepasquej niman quintlapojpolhuis Dios on intlajtlacol.

Jesús oquintlalilij on ejemplo de on tocaquetl
(Mt. 13.18-23; Lc. 8.11-15)

¹³ Quemaj oquimijlij:

—Tla xnencajsicamatij in ejemplo, ¿quen ijqui nencajsicamatisquej osequi ejemplos? ¹⁴ Yejhua on tlacatl yejhuan toca, on quen on yejhuan quiteijlia on itlajtoltzin Dios niman on xinachtli quen itlajtol Dios. ¹⁵ On ojtli campa ohuetz on xinachtli sa no ijqui quen on inyojlo sequimej tlacamej yejhuan quicaquij on itlajtol Dios. Pero nimantzin huajlau on diablo, niman quitlalciahaultia ica on itlajtol Dios yejhuan oquitocaquej ipan inyojlo. ¹⁶ On tlajli yejhuan tepetlayoj quijtosnequi inyojlo on tlacamej yejhuan cuelcaquij itlajtol Dios, niman ican pactli quiseliaj on tlajtojli. ¹⁷ Pero yejhua in tlacamej xmás cuajli quitzquiaj on tlajtojli. Yejhua ica ijcuac impan huajlau on tlen tepajsoj niman quintlahuelitaj niman tlajtlamach ica quintlajyohuilitaj ipampa itlajtol Dios, nimantzin cahuaj intlaneltoc. ¹⁸ On tlajli yejhuan huitzyoj quijtosnequi inyojlo on tlacamej yejhuan cuelcaquij itlajtol Dios. ¹⁹ Pero pampa sa comatztoquej quen ijqui nopalotisquej, niman sanoyej quinequij notomintisquej, niman ocsequi tlajtlamach quinejnemiliaj, quelcahuaj on itlajtol Dios. Ijcon itlajtol Dios xhueli quimpalehuiya yejhuan osequi. ²⁰ Pero on cuajli tlajli quijtosnequi inyojlo on tlacamej yejhuan ica cuelcaquij itlajtol Dios, niman quiseliaj, niman intech quisa se cuajli tlacyotl. Yejhuan osequi

† **4:2** cosas ‡ **4:8** Sempoajli quijtosnequi veinte, niman sempoajli huan majtlactli quijtosnequi treinta. § **4:8** sesenta * **4:10** después † **4:11** era su secreto

sa no ijqui quen on xinachtli yejhuan oquitlaquitij sempoajli[‡] huan majtlactli iteyo, niman ocsequimej sa no ijqui quen on yejhuan oquitlaquitij yepoajli§, noso sa no ijqui quen on yejhuan oquitlaquitij se ciento.

Jesús oquimpalehuij para ma cajsicamatican

(Lc. 8.16-18)

²¹ No oquimijlij:

—Xacaj cuajqui se tlahuijli, niman quitlalia ne itzintlan se chiquiutli noso ne itzintlan tlapachatl. On tlahuijli nenquitlaliaj ne tlacpac para ijcon ma tlahuipanti cuajli. ²² Yejhua on tlen iyanticaj, yejhuatej quimatisquej ipan ocse tonaltin. Nochi on yejhuan aman xquimati, quimatisquej. ²³ Tla yacaj quipia itlamachilis, ma cajsicamatican cuajli.

²⁴ Xnemilican cuajli tlinon nenquicaquij, pampa ica on tlen tejhua tictequitiltia para tiquintlajtlacolmaca ocsequimej, Dios no yejhua quitequitiltis para mitztlajtlacolmacas. Niman más miyec ica mitztlajtlacolmacas. ²⁵ Tej, yejhuan quipia cajsicamatilistli, Dios quimacas más, niman on yejhuan xquipia cajsicamatilistli, Dios quixtilis hasta noch quech quipia.

Jesús oquintalilij se ejemplo ica on xinachtli ijcuac ixhua

²⁶ No oquijtoj Jesús:

—On yejhuan Dios quinmandarohua nochihuaj quen on xinachtli yejhuan se tlacatl quitoca ne ipan tlajli. ²⁷ Mojmostla on tlacatl cochi tlayohua niman nocuitehua cualcan. Niman on xinachtli ixhua, niman quemaj noscaltia, pero yejhua xquimati quen ijqui. ²⁸ On tlajli san iselti quiscaltia. Achoj quisa on imilohuayotzin, quemaj on imiyahuayo, niman quemaj xilotzintli, quemaj yelotl, camahuac, niman quemaj sintli. ²⁹ Niman quemaj ijcuac yotlachicau, on tlacatl nimantzin calactilia machete, pampa yoyejcoc on pixquilstli.

Jesús oquintalilij se ejemplo ica on xinachtli itoca mostaza

(Mt. 13.31-32, 34-35; Lc. 13.18-19)

³⁰ No oquijtoj Jesús:

—Nemechijlis quen ijqui Dios tlamandarohua. Masqui Dios quinmandarohua aman sanoyej achijtzin on tlacamej, pero más miyequiyasquej. ³¹ Sa no ijqui quen se tlacatl oquitocac on iteyo on itoca mostaza. On mostaza quipia más pitentzin iteyo xquen noch quech xinachtli yejhuan oncaj nican ipan in tlalticpactli. ³² Pero ijcuac yonotocac noscaltia, niman hueyiya más huejcapania xquen noch quech xiutli. Sanoyej nomajmatia hasta on totomej huelij ompa quichijchihuaj intepajsol ne ipan imahuan campa tlajsehuayoc.

³³ Quinmachtiaya on cuajli tlajtojli ican ejemplos hasta campa xoc hueliyaj cajsicamatiyaj. ³⁴ Yejhua quinmachtiaya san ican ejemplos niman xitlaj* quimijliaya tla xican ejemplo. Pero ijcuac Jesús sa iselti nemiya inhuan on inomachtijcahuau, yejhua quinmachtiaya tlinon quijtosnequi on ejemplos.

Jesús oquiteltij on ajacatl

(Mt. 8.23-27; Lc. 8.22-25)

³⁵ Ipan on tonajli ijcuac yotlayohuac, Jesús oquimijlij on inomachtijcahuau:

—Tiahuij ne ocse ilado in mar.

³⁶ Quemaj ijcuac yoquinnahuatijquej on tlacamej ma huiyan, on nomachtijquej ocuicaquej Jesús ipan on barco ijcon quen nemiya. Ocsequimej

‡ 4:20 Sempoajli quijtosnequi veinte, niman sempoajli huan majtlactli quijtosnequi treinta. § 4:20 sesenta * 4:34 nada; coxtla

barcos oyajquej ihuan. ³⁷ Niman quemaj más achi saquin†, ohuajlaj se ajacatl sanoyej chicahuac, niman on atl oncoxoniya ne ijtic on barco hasta ye temiya. ³⁸ Jesús cochticatca nepa tlacuitlapán ipan se cuejtomatl. Niman quemaj oquitlachaltitoj, niman oquijlijquej:

—Totemachtijcau, ¿tlica‡ yej ticochticaj chica tejhuamej ye tiamimictoquej? ¡Xtechpalehui!

³⁹ Quemaj Jesús onotelquetz, oquinahuatij on ajacatl, niman oquijlij on mar:

—Xmotelti, niman ma ca sa tlamach xchihua.

Niman quemaj ohuajnoteltij on ajacatl. Nimantzin nochí ocactiaj, niman nochí cuajli onocau. ⁴⁰ Niman quemaj oquimijlij on inomachtijcahuán:

—¿Tlaca sanoyej nemomojtiaj? ¿Tlen, xnennechneltocaj hasta aman?

⁴¹ Yejhuamej sanoyej nomojtiyaj, niman quinojliyaj ihuan ocsequimej:

—¿Manin aquin tlacatl in ica on ajacatl niman on mar quitlacamatij?

5

Jesús oquixtij on xcuajli espíritu itech se Gadareno

(Mt. 8.28-34; Lc. 8.26-39)

¹ Oajsiquej ne ocsecan itenco on mar ipan iregión Gadara. ² Niman ijcuac Jesús yohuajquis ipan on barco, oquinamiquito se tlacatl yejhuan quipiaya se xcuajli espíritu. Ohualeu neca ijtic ostomej campa notocayaj on mimiquej. ³ Ompa, tej, ichan catca. Niman xacaj hueliya quiteltiaya, nion siquiera ican on teposcadenas. ⁴ Sanoyej miyecpa oquisalojcaj ican teposcadenas niman tepostli yehuáltic yejhuan para quiteltiaya imahuan niman icxihuán. Pero nochipa ijcuac quitlaliliyaj, yejhua quitecojcotonaya on teposcadenas, niman quincuejcuechtilaya on tepostin yejyehuáltiquej. Niman xacaj hueliya quiteltiaya. ⁵ Tlayohua niman tlajocaj tzajtzitinemiya, niman nocojcocohuaya ican temej ne imanyan on ostomej campa notocayaj on mimiquej niman ipan on tepemej.

⁶ Pero ijcuac ocontac Jesús huejcatzin, huajlau onotlaloj campa yejhua nemiya, niman ixpan onotlacuenquetz. ⁷ Niman oquitzajtzilij chicahuac:

—¿Tlinon ticnequi nohuan Jesús, tejhua tiiConeu Dios yejhuan más hueyixtaj? Nimitzajmancatlajtlanilia ixpan Dios, ma ca xnechtajyohuilty.

⁸ Otzajtzic ijcon pampa Jesús yoquijlijca:

—Xcuajli espíritu, xquisa ijtic in tlacatl.

⁹ Jesús oquitlajtoltij:

—¿Quen ijqui motoca?

Yejhua oquinanquilij:

—Nejhua nicpia miyec notoca pampa sanoyej timiyequej.

¹⁰ Niman yejhuamej on xcuajcualtin espíritus sanoyej quitlajtlaniliyaj Jesús para ma ca ma quinquixti ompaca ne. ¹¹ Niman ompa nemiyaj miyequej pitzomej ipan se tepetl campa tlacuajcuajtinemiya. ¹² Niman on xcuajcualtin espíritus sanoyej* quitlajtlaniliyaj Jesús:

—Xtechtitlani ne intech on pitzomej niman ma ticalaquican impan.

¹³ Niman Jesús oquinahuilij, niman on xcuajcualtin espíritus oquisquej ipan on tlacatl, niman ocalaquej impan on pitzomej. On pitzomej canaj ome mil catca. Yejhuamej on tlatlacsquej† niman ne ipan se teostotl campa huejcatlan oxixinitoj hasta ijtic on mar. Ompa, tej, nochimej oamimiquej.

¹⁴ On yejhuan tlajpiayaj ica on pitzomej, ican inmojcayo ontlatlacsquej. Oquitetlajtlajtohuilitoj ne ipan on pueblos niman nochihuiyan ipan campo.

† 4:37 después ‡ 4:38 ¿por qué?; ¿tline? * 5:12 mucho † 5:13 corrieron

Niman on tojlan oyajquej para oquitatoj on tlen onochiu. ¹⁵ Ijcuac oyejcoquej campa nemiya Jesús, oquitaquej on tlacatl yejhuan ipan oquisquej on xcuajcualtin espíritus. Yejhua yehuaticatca, niman ye nemiya ican itlaquen, niman ye quipiaya cuajli itlamachilis. Yejhuatej sanoyej onomojtijquej. ¹⁶ Niman quemaj yejhuatej on yejhuan oquitaquej quen ijqui onochiu, nochi oquitetlajtlajtohuilijquej quen onochiu ica on yejhuan quipiayaj on xcuajcualtin espíritus, niman quen onochiu ica on pitzomej. ¹⁷ Niman yejhuatej sanoyej oquitlajtlanilijquej Jesús para ma quisa ompaca ne.

¹⁸ Ijcuac Jesús ocsejpa otlejcoc ipan on barco, on tlacatl yejhuan quimpiaya on xcuajcualtin espíritus sanoyej oquitlajtlanilij para ma huiya ihuan. ¹⁹ Pero Jesús xocahuilij, yej oquijlij:

—Xhuiya mochan, niman xquimijli on quen tiquinta[†] nochi on huejhueyi tlajtlamach[§] tlen Dios omitzchihuilij, niman quen omitzicnelij*.

²⁰ Tej, on tlacatl oyaj ne ipan on región yejhuan quimpia majtlactli pueblos, niman nochi oquitetlajtlajtohuilij tlinon Jesús oquichiu ipampa, niman nochimej tlamojcaitayaj.

Jesús oquipatilij ichpocatzin Jairo niman on sihuatl yejhuan yeshuetztinemiya

(Mt. 9.18-26; Lc. 8.40-56)

²¹ Ijcuac Jesús ocsejpa yopanoc ipan ocse lado de on mar ipan on barco, onosentlalij miyec tlacatl itech. Niman yejhua ompa nemiya itenco on mar.

²² Quemaj oyejcotetz se tlacatl itoca Jairo. Yejhua se tlayecanquetl ne ipan intiapan on hebreos. Ijcuac oquitac Jesús, ixpan onotlacuenquetz. ²³ Yejhua oquiajmancatlajtlanilij, oquijlij:

—Nochpocatzin ye micticaj. Nimitztlajtlanilia sanoyej, xhuiya, niman xtlaliti momahuan ipan yejhua para ma pajti, niman ma nemi.

²⁴ Quemaj Jesús oyaj ihuan, niman oyajquej miyequej tlacamej ihuan. Sa quipitzmictiayaj†.

²⁵ No ompa tehuan nemiya se sihuatl, yejhuan quipia matlactli huan ome xipan ica yeshuetzinemiya. ²⁶ Miyequej tlapajtijquej sanoyej yoquitlajyohuilitijcaj. Yejhua yoquitlajtlamijca nochi on tlinon quipiaya, pero xopajtic, yej más tlanahuiya. ²⁷ On sihuatl oquicac ica Jesús hueli tepajtia. Yejhua ica yejhua ohuajlaj inhuan on tlacamej. Oquinisihuij Jesús san icuitlapan, niman ocajsic itlaquen. ²⁸ Ijcon oquichiu pampa quinemiliaya: “Tla san nicasisitlaquen, nipajtis.” ²⁹ Nimantzin xoc yeshuetziya. On sihuatl nimantzin oquimat ipan itlalnacayo ica opajtic. ³⁰ Ijcuacon Jesús oquimat ica on poder itech oquis. Yejhua ica ohuajnocuep ne tetzajlan niman oquitetlajtoltij:

—¿Aquinon oquimatocac notlaquen?

³¹ On inomachtijcahuan oquijlijquej:

—Tiquitzticaj ica in tlacamej mitzpitzmictiaj[‡]. Yejhua ica, ¿tlica[§] titlajtlani aquinon oquimatocac notlaquen?

³² Pero Jesús tlatlachaya iyehualijcan para quitas aquinon oquimatocac.

³³ Ijcuacon on sihuatl yehuan quimatzticatca tlinon ipan yonochiu, ohuajlaj itech Jesús, niman onotlacuenquetz ixpan. Yejhua sanoyej nomojetiaya, niman cuecuetlacaya. Yejhua oquijlij nochi tlen melahuac. ³⁴ Quemaj Jesús oquijlij:

—Noconeu, otipajtic pampa otitlaneltocac. Xhuiya ican yolsehuilistli. On cualolistli xoc ticpia.

† 5:19 tus parientes § 5:19 cosas * 5:19 tuvo compasión de tí † 5:24 lo apretaban, quitettilijtiayaj ‡ 5:31 te aprieta; mitztetziiliaj § 5:31 ¿por qué?; ¿line?

³⁵ Jesús oc* tlajtlajtojticatca ijcuac oyejcotetzquej sequimej tlacamej yejhuan ohualejquej ne ichan itlayecancau on tiopan. Niman yejhamej oquijlijquej:

—Mochpoch yomic. Ma ca sa más xpajsolo on temachtijquetl.

³⁶ Jesús xoquinchihulij cuenta on tlinon oquijtojquej, niman oquijlij on tlayecanquetl ipan on tiopan:

—Ma ca xmomojti, yej san xnechneltoca melahuac.

³⁷ Niman Jesús xocahuilij yacaj más ihuan ocalac, yej san Pedro niman on omemej icniutin Jacobo niman Juan. ³⁸ Ijcuac oajsiquej ne ichan on tlayecanquetl ipan on tiopan, Jesús oquitac ica on tlacamej sanoyej yonajcomanquej, niman ica chocayaj, niman sa amancatzajtziyaj sanoyej. ³⁹ Jesús ocalac, niman oquimijlij:

—¿Tlica nemmajcomanaj, niman nenchocaj? On sihuaconetl xmiqui, yej san cochtica.

⁴⁰ Pero yejhamej ocuetzquilijquej. Quemaj Jesús oquinquiixtij ne quiahuatec on yejhuan ompa nemiyaj, niman ocuicac san itataj niman on inanaj on sihuaconetl, niman yejhamej on yeyimej inomachtijcahuau. Niman ocalacquej ne campa onoc on sihuaconetl. ⁴¹ Quemaj oconquitzquij ima on sihuaconetl, niman oquijlij:

—Talita, cumi —yejhuan quijtosnequi: Sihuaconetl, nejhua nimitzijlia, xmotelquetza.

⁴² Nimantzin on sihuaconetl, yejhuan quipiaya majtlactli huan ome xiapan, onoquetzteu, niman quemaj opeu nejnemi. Niman nimantzin yejhamej sanoyej otlamojcaitajquej. ⁴³ Pero Jesús oquintlachicahuilij para ma ca yacaj quijlisquej on tlinon yejhua oquichiu. Quemaj Jesús otlanahuatij ma quitlacualtican on sihuaconetl.

6

Jesús nemiya ne Nazaret (Mt. 13.53-58; Lc. 4.16-30)

¹ Quemaj Jesús ohuajquis niman oyaj ne ipan on pueblo campa onoscaltij. Niman on inomachtijcahuau oyajquej ihuan. ² Ijcuac oajsic on sábado, opeu temachtia ipan intiopan on hebreos. Niman miyec tlacatl oquicac, niman otlamojcaitajquej. Oquijtojquej:

—¿Hasta canon ohuelito nochí in tlen quijtohua? niman ¿aquionon oquimacac in tlamatquilistli*? niman ¿quen quichihua in milagros? ³ ¿Tlen xejhua cojxinquí, niman iconeu María? ¿Xejhua icniu Jacobo, niman José, niman Judas niman Simón? ¿Xnican ipan in pueblo chantij on icnihuan yejhuan sihuamej?

Niman onotlahueltijquej ipampa. ⁴ Jesús oquimijlij:

—Se tiotlajtojquetl nochihuiyan quitlacaitaj, pero ne ipan ipueblo niman on quen quinta† niman ichanchanecahuan‡ xquitlacaitaj.

⁵ Xohuel oquichiu ompa itlaj milagro. San quesquimej cocoxquej impan oquintlalij imahuan, niman oquimpajtij. ⁶ Jesús sanoyej§ tlamojcaitaya pampa yejhamej xquineltocayaj. Niman Jesús panotiaya nochihuiyan ipan on pueblos, niman temachtijtiaya.

Jesús oquintitlan on inomachtijcahuau para ma temachtitij (Mt. 10.5-15; Lc. 9.1-6)

* 5:35 todavía; sanquen * 6:2 sabiduría † 6:4 parientes ‡ 6:4 su familia § 6:6 mucho

⁷ Niman quemaj oquinsentlalij on majtlactli huan ome inomachtijcahuau, niman opeu quintijtitlani ojomemej. Niman yejhua oquinmacac poder para ma quitequixtilican on xcuajcualtin espíritus. ⁸ Niman oquinnahuatij ma ca itlaj quitquisquej para ipan ojtli san incojtopil*. Oquimijlij para ma ca quitquisquej inbolsa, nion tlaxcajli, nion tomin, ⁹ yej san ma quitequitiltican incac niman insentetlaquen. ¹⁰ Quemaj oquimijlij:

—Ijcuac nemajsiquej ipan se pueblo, xmocahuacan ipan se cajli hasta nenquisasquej ipan on pueblo. ¹¹ Tla nemajsij ipan se pueblo campa xmechselsiquej, nion mechcaquisquej, xtzejtzelocan nemocxi on tlateutli ijcuac nenquisasquej. Melahuac, tej, nemechijlia ica ijcuac Dios quiyolcuitis niman quitlajtlacolmacas on pueblo, más tlajyohuis xquen Sodoma niman Gomorra.

¹² Quemaj yejhamej oquisquej, niman oyajquej. Quinmachtijiayaj on tlacamej para ma noyolcuepacan. ¹³ No oquinquixtijquej miyequej xcua-jcualtin espíritus, niman oquintlalilijquej aceite ipan miyequej on cocoxquej, niman oquimpatijquej.

Ijquin omic Juan on tlacuatequijquetl

(Mt. 14.1-12; Lc. 9.7-9)

¹⁴ Niman on rey Herodes ocac ica notenehua Jesús pampa itoca nohuiyan yomachiyac. Sequimej quijtohuayaj:

—Jesús hueli quichihua on milagros pampa melahuac, tej, yejhua Juan yejhuan Dios yoquiyolihuitij† niman yoquetzteu ne intzajlan on mimiquej.

¹⁵ Pero sequimej quijtohuayaj:

—Yejhua on tiotlajtojquetl Elías.

Niman ocsequimej quijtohuayaj:

—Yejhua se tiotlajtojquetl noso yacaj semej on achtoj tiotlajtojquej.

¹⁶ Pero ijcuac Herodes ocac, oquijtoj:

—Yejhua in Juan on tlacuatequijquetl yejhuan onitlatitlan para oquech-zontequej. Aman yonoyolihuitij niman yonoquetzteu ne intzajlan on mimiquej.

¹⁷ Ijquin Herodes oquijtoj pampa yejhua otlanahuatij para ma cajsican Juan, niman oquisalojquej ican teposcadena ne campa tzacuticaj para quipactis Herodías. Yejhua in Herodías, isihuau catca Felipe on icniu Herodes, pero Herodes oquicuilij para yejhua isihuau. ¹⁸ Herodes oquitzacu Juan pampa yejhua quijlijtinemiya Herodes:

—Itlanahuatil Dios xmitzcahuilia ticpias isihuau mocniu quen mosihuau.

¹⁹ Herodías, tej, sanoyej quitlahuelitaya Juan, niman quinequiya quimictis, pero yejhua xhueliya ²⁰ pampa Herodes quitlacaitaya Juan, niman quimatzticatca ica yejhua cuajli tlacatl yolchipahuac. Yejhua ica Herodes quimanahuiaya. Ijcuac Herodes contaya sanoyej cuelcaquia, masqui xoc quimatiya tlen quichihuas.

²¹ Quemaj oyejcoc on tonajli yejhuan cuajli catca para Herodías. Ijcuac on Herodes oquichiu ilhuitl pampa yejhua ilhuiu catca, oquinnotz on tequihuajquej, niman on comandantes niman on huejhueyixtoquej ne Galilea.

²² Niman on ichpoch Herodías no ocalac, niman onijtotij. Niman on rey Herodes niman yejhuan oquinnotz sanoyej ocuelitaquej. Yejhua ica Herodes oquijlij on ichpochtli:

—Xnechtlajtlanili nochí san tlinon ticnequis, niman nimitzmacas.

²³ Niman no oquijlij:

* **6:8** bastones de ellos † **6:14** lo resucitó; yoquiyolitij

—Ican notlajtol nimitzijlia: “Nochi tlinon tinechtlajtlanis nimitzmacas, masqui hasta tlajcotipan in campa nejhua nitlamandarohua.”

²⁴ On ichpochtli oquis niman oquitlajtoltijetetzito inan. Oquijlij:

—¿Tlinon nictlajtlanilis?

Niman yejhua oquijlij:

—Xtlajtlanili itzontecon Juan on tlacuatequijquetl.

²⁵ Niman quemaj nimantzin on ichpochtli ocsejpa ocalapro. Oquitlajtlanito, oquijlij on rey:

—Ipan se plato xnechmaca amantzin itzontecon Juan on tlacuatequijquetl.

²⁶ Niman quemaj on rey Herodes sanoyej onajman. Pero pampa yejhua yonocalactijca ican itlajtol, niman impampa itenotzcahuau yejhuan ihuan tlacuaj, on rey oquichiu quen oquijtojca. ²⁷ Nimantzin on rey oquititlan se itlajpixcau soldado, niman oquinahuatij para ma cuajqui on itzontecon Juan ipan se plato. On soldado oyaj, niman oquechtzontequito Juan ne campa tzacuticatca, ²⁸ niman ocuajquic itzontecon ipan se plato. Yejhua oquimacac on ichpochtli, niman on ichpochtli oquimacac inan.

²⁹ Ijcuac on inomachtijcahuau Juan oquimatquej ica yomic Juan, ohualajquej niman ocuicaquej. Quemaj oquitocatoj ne ipan se tlalcontli.

Jesús oquintlacuallij on macuijli mil tlacatl

(Mt. 14.13-21; Lc. 9.10-17; Jn. 6.1-14)

³⁰ Quemaj on iapostolhuan Jesús onosentlalijquej ihuan, niman oquitlajtlohuilijquej nochitlinon oquichijquej, niman tlinon otemachtijquej.

³¹ Yayaj niman huajlayaj tojlamej, niman Jesús inhuan iapostolhuan nion xquipiayaj tiempo para tlacuasquej. Yejhua ica Jesús oquimijlij on iapostolhuan:

—Xhuiyan, tiahuij neca campaca xacaj nemí, niman ompa ti-huelisquej titosehuisquej achijtzin.

³² Quemaj oyajquej ipan se barco ne tlapatlaco campa xacaj nemí.

³³ Niman ijcuac oyajquej, miyequej oquintaquej, niman oconixmatquej Jesús. Niman on tlacamej ipan nochihuiyan pueblos campaca san nisu onotlajtlalojquej, niman oajsiquej más achtoj, niman on barco oajsic más saquin‡.

³⁴ Ijcuac Jesús ohuajquis ne ipan on barco, oquintac sanoyej yotojlantic. Yejhua sanoyej oquimicnelij, pampa nemiyaj quen itlaj borregos yejhuan xquipiaj intlajpixcau. Quemaj Jesús opeu quinmachtia miyec tlajtlamach§.

³⁵ Ijcuac más tiotlac, on inomachtijcahuau oquijlijquej:

—Xacaj chanti nican, niman ye tiotlactiticaj. ³⁶ Xquintitlani para ma huiyan neca ipan on pueblitos niman neca ipan on cuadrillas campaca san nisu para ma cohuacan itlaj para quicuasquej.

³⁷ Pero yejhua oquimijlij:

—Nemejhuamej xquintlacuallican.

Niman oquijlijquej:

—¿Ticnequi ma tihiyan, niman ma ticohuatij pan? Sen tlacatl nonequi tequitis canaj chicueyi metztli para huelis cohuas on pan para nochimej in tojlamej.

³⁸ Oquimijlij:

—¿Quesqui pan nenquipiaj? Xhuiyan, niman xquitacan quesqui nenquipiaj.

Niman quemaj ijcuac oquimatquej, oquijlijquej:

—Ticpiaj macuijli pan niman ome michimej.

‡ 6:33 después § 6:34 cosas

³⁹ Quemaj Jesús oquinnahuatij ma notlajtlalican ipan on sacatl ojoncuaj. ⁴⁰ Niman quemaj onotlajtlalijquej ojoncuaj sejsen ciento niman tlatlajco ciento. ⁴¹ Quemaj ijcuac Jesús ocontilan on macuijli pan niman ome michin, oajcotlachix ne ilhuicac niman oquimacac tlaxtlahujli Dios para on tlacuajli. Niman quemaj oquitlatlapan on pan, niman oquinmacac inomachtijcahuan para ma quinxelohuilican on tlacamej. No oquitexelohuilijquej on ome michin. ⁴² Nochimej otlacuajquej, niman cuajli oixhuiquej. ⁴³ Niman quemaj ica on tlatlajcotzitzin tlen onocau, oquitemiltiquej majtlactli huan ome chiquiutin. ⁴⁴ Niman on yejhuan otlacuajquej macuijli mil tlacamej.

Jesús nejnemiya ixco on mar

(Mt. 14.22-27; Jn. 6.16-21)

⁴⁵ Quemaj Jesús nimantzin oquinnahuatij on inomachtijcahuan para ma calaquican ipan on barco, niman ma yecatziacan ne ocse ilado on mar ipan on pueblo itoca Betsaida, chica yejhua quinnahuatiaya on tlacamej para ma huiyan. ⁴⁶ Más saquin*, ijcuac yoquintilan on tlacamej, yejhua otlejcoc ipan se tepetl, niman ompa oquichiu oración. ⁴⁷ Ijcuac otlayohuac, on barco yaya ne atlajcotian ipan on mar, niman Jesús nemiya iselti ne ipan on tepetl. ⁴⁸ Jesús oquitac ica on inomachtijcahuan yosiauquej ica quinejnemitiaya on barco pampa on ajacatl quimixnamiquiya. Niman canaj ipan yeyi hora ica cualcan, yejhua nejnentiaya ne ixco on mar hasta ijqui oajsic ne campa nemiyaj on inomachtijcahuan. Yejhua quinemiliaya quimpanahuis. ⁴⁹ Pero ijcuac on nomachtijquej oquitaquej nejnentiu ne ixco on mar, yejhuatej cuitiayaj se xcuajli tlamojtiloni. Yejhuatej chicahuac otzajtiquej, ⁵⁰ pampa nochimej oquitaquej, niman sanoyej onomojtijquej. Quemaj nimantzin Jesús oquimijlij:

—¡Xmoyolchicahuacan niman ma ca xmomojtican! Nejhua niJesús.

⁵¹ Quemaj otlejcoc ne ipan on barco, niman quemaj onoteltij on ica chicahuac ajacaya. On inomachtijcahuan sanoyej otlamachilispolijquej niman sanoyej otlamojaitaquej. ⁵² Yejhuatej, masqui yoquitaca tlinon yoquichi-jca ican on pan niman on michin, hasta aman xcajsicamatiyaj on milagro yejhuan Jesús oquichiu. Quipayaj on intlamachilis sanoyej chicahuac.

Jesús otepajtij ne Genesaret

(Mt. 14.34-36)

⁵³ Niman ijcuac oquipanahuiquej on mar, oajsiquej ipan on tlajli itoca Genesaret campa oquisalotoj inbarco. ⁵⁴ Ijcuac yejhuatej oquisquej ipan on barco, on tojlamej nimantzin oquixmatquej Jesús. ⁵⁵ Quemaj nimantzin oya-jquej nochihuiyan ompaca nijnisiu, niman oquinhuajhuicaquej on incocox-cahuan ipan cojtlapechtin hasta campa nemiya Jesús. ⁵⁶ Nochihuiyan campa calaquiya ipan huejhueyican, noso pueblos, noso cuadrillas, yejhuatej oquintlajtlalijquej on incocoxcahuan ne ipan calles, niman quitlajtlaniliyaj Jesús para ma quinocahuili ma cajxilican on itlaquen, masqui san itencotzin. Niman nochimej on yejhuan ocajxilijquej itlaquen oquimpajtij.

7

Jesús oquijtoj on tlen quijtlacohua se tlacatl

(Mt. 15.1-20)

¹ Se tonajli sequimej fariseos niman sequimej temachtijquej ican it-lanahuatil Dios ohualejquej ne Jerusalén, niman onosentlalijquej ne itech Jesús. ² Ijcuac nemiyaj ihuan Jesús, yejhuatej oquitaquej ica sequimej

* **6:46** después

inomachtijcahuán Jesús tlacuayaj, masqui xnomajtequiayaj quen on huehuetquej tlajtlajmatquej oquijtocaj ica nonequi nomajtequisquej. ³ On fariseos niman nochimej on hebreos xtlacuaj, tla xachtoj nomajtequiaj quen on huehuetquej tlajtlajmatquej oquijtojcaj ica cuajli para quichihuasquej. ⁴ In se ejemplo. Ijcuac huajnocuepaj ne plaza, achtoj nomajtequiaj quen on tlajtlajmatquej huehuetquej oquijtojcaj ica cuajli para quichihuasquej, niman quemaj tlacuasquej. Niman quipiaj ocsequi miyec tlanahuatijli no ijqui quejehuasquej, ijcon quen quimpajpacayaj on contzitzintin, niman on tazas niman on teposcontin. ⁵ Quemaj on fariseos niman on temachtijquej ican itlanahuatil Dios oquitlajtoltijquej Jesús:

—¿Tlica* on monomachtijcahuán xnomajtequiayaj ijcon quen otechititi-jquej on huehuetquej tlajtlajmatquej?

⁶ Jesús oquinanquilij:

—Cuajli oquijtoj on tiotlajtojquetl Isaías nemotechcopia nemejhuamej omexayacyequej, ijcuac oquijcuiloj quen Dios oquijtoj. Oquijtoj: Yejhuamej in tlacamej nechtlacaitaj san ica incamac, pero xnechtlacaitaj ican inyojlo.

⁷ Sanencaj nechmahuistiliaj, pampa yejhuamej quitemachtiaj on tlanahuatiltin yejhuan on tlacamej oquitlalijquej quen itlanahuatilhuan yesquiaj Dios.

⁸ Quemaj Jesús oquimijlij:

—Xnenquitlacamatij on tlinon Dios omechnahuatij, pero nenquitlacamatij yejhua on tlinon on huehuetquej tlajtlajmatquej otemachtijcay. Niman nenquichihuaj ocsequi miyec tlajtlamach† no ijqui.

⁹ Niman quemaj oquimijlij:

—Nemocajcayahuaj niman nentecajcayahuaj, ijcuac nenquejcuaniaj itlanahuatil Dios para nentemachtiaj quen nemejhuamej nemohuicaj.

¹⁰ Ijquin nentecajcayahuaj. Moisés otlanahuatij: “Xtlacaita motaj niman monan.” Niman no oquijtoj: “Yejhuan tlaj xcuajli quitenehuilis itaj noso inan, ma quimictican.” ¹¹ Pero nemejhuamej nenquijtohuaj ica se tlacatl huelis quijlis itaj noso inan: “Xhuelis nimitzpalehuis ica on tlen mitzpolohua pampa yej Corbán.” (Corbán quijtosnequi on tlinon nicpia yonicmactilij Dios). ¹² Ijcon xnencahuiliaj ma quipalehui itaj noso inan. ¹³ Ijcon, tej, nemejhuamej onenquichijquej quen xitlaj‡ quijtosnequi on itlanahuatil Dios, pampa nemohuicaj ipan on costumbres yejhuan on huehuetquej tlajtlajmatquej otemachtijquej. Niman nenquichihuaj miyec ocsequi tlajtlamach sa no ijqui.

¹⁴ Quemaj Jesús oquinnotz nochimej on tlacamej, niman oquimijlij:

—Xcaquican nemochimej§ niman xcajsicamatican. ¹⁵ On tlen calaqui icamac se tlacatl xejhua quijtlacohua, pero on yejhuan quisa ipan iyojlo, on quemaj yejhua quijtlacohua. ¹⁶ Tla nemejhuamej nenquipiaj nemotlamachilis, xcajsicamatican on tlen oniquijtoj.

¹⁷ Quemaj ijcuac Jesús oquincajteu on tlacamej niman ocalaquito ipan techan, inomachtijcahuán oquitlajtoltijquej para ma quimijli tlinon quijtosnequi on ejemplo. ¹⁸ Jesús oquinanquilij:

—¿Nemejhuamej no xonencajsicamatquej on tlinon oniquijtoj? Xnencajsicamatij ica nochí tlen calaqui ipan icamac se tlacatl xejhua quijtlacohua, ¹⁹ pampa on tlinon quicua xcalaqi ne ipan iyojlo, yej calaqui ne ijtic icuitlaxcol, niman quemaj quisa ne ipan itlalnacayo.

* ^{7:5} ¿por qué?; ¿tline? † ^{7:8} cosas ‡ ^{7:13} nada; coxtla § ^{7:14} todos ustedes; nannochti, yemochimej, anochimej, innochimej, emmochimej

Ijcon oquijtoj ica nochí quech tlacuajli oncaj cuajli para nocuas. ²⁰ Niman no quijtohuaya:

—On yejhuan quisa ipan iyojlo se tlacatl, on quemaj quijtlacohua, ²¹ pampa ne ijtic iyojlo quisa on xcuajcualtin tlamachilistin, sihuapajpatlalistli, tlacapajpatlalistli, on ahuilnemilistli, temictilistli, ²² tlachtequilistli, on tlen xcuajli elehuilistli*, tlacajcayahualistli, xtetlacamatilistli, nexicolistli tetlajtojquetztehuilistli, nohueyimatilistli, tontojtililistli niman nochí tlajtلامach tlen xcuajli nochihua. ²³ Nochi in yejhuan xcuajli hualehua ne ipan iyojlo se tlacatl, niman yejhua ica más nijtlacohua.

*Sen sihuatl yejhuan hualehua ne Sirofenicia oquineltocac Jesús
(Mt. 15.21-28)*

²⁴ Quemaj ohuajnoquetzteu, oquis ompa, niman oyaj ne ipan iregión on huejhueyican Tiro niman Sidón. Quemaj ocalac ipan se cajli, niman xquinequiya para ma quimatican on tlacamej tla ompa nemí, pero yejhuatej oquimatquej. ²⁵ Nimantzin inan se ichpochtli, yejhuan quipiaya se xcuajli espíritu, oquimat ica Jesús nemíya ne ipan on cajli. Yejhua oyaj itech niman ixpan onotlacuenquetz. ²⁶ On sihuatl ohualeu ne Sirofenicia niman tlajtohuaya griego. Oquiajmancatlajtlanlij Jesús para ma quixtili on xcuajli espíritu yejhuan nemíya ijtic ichpoch. ²⁷ Pero Jesús oquijlij:

—Achtoj ma niquimpalehui on nochantlacaj† hebreos. Tejhua xtihebrea. Tla nimitzpalehuis, yejhua in sa no ijqui quen nicualtisquia se chichi intlacual on iconehuan Dios.

²⁸ Pero on sihuatl oquijlij:

—On melahuac, noTeco, pero on chichimej yejhuan nemíj ne itzintlan on mesa, quicuajcuaj on tlaxcaltejteinqui yejhuan xixini ne tlaltipan.

²⁹ Jesús oquijlij:

—Ma ijqui nochihua. Xhuiya. On xcuajli espíritu yoquis ne ijtic mochpoch pampa tlinon otinechijlij sanoyej‡ cuajli.

³⁰ On sihuatl oyaj, niman ijcuac oajsic ne ichan, oquinextijtajsic ichpoch nemí ipan itlapech, niman on xcuajli espíritu yoquitlalcahuij.

Jesús oquipajtij se tlacatl yejhuan nacastzatza catca niman tenenepochtitcatca

³¹ Quemaj Jesús oquis ne ipan iregión Tiro, niman ohuajlaj ipan on hueyican itoca Sidón. Quemaj yejhua oyaj imanyan on iyehualican yejhuan quipia majtlactli pueblos, niman oajsic ne itech on mar itoca Galilea. ³² Niman sequimej tlacamej ocuajhuicaquej se tlacatl yejhuan nacastzatza catca niman tenenepochtitcatca. Niman sanoyej oquitlajtlanlijquej para ma quitlali ima ipan on tlacatl. ³³ Jesús ocuicac neca campa xacaj nemí, niman quemaj oquincalactij imajpilhuan ne ijtic inacashuan. Niman quemaj oquipatzoj on imajpil ican icualac, niman oquitzquilij on inenepil on tlacatl. ³⁴ Oajcotlachix ne ilhuicac, niman quemaj onejeltij ica ajmantli, niman oquijtoj:

—¡Efata! —yejhuan quijtosnequi: ¡Xlapohuican!

³⁵ Quemaj nimantzin on tlacatl otlacac. No ijqui ohuajnomajmacau isasal-iuyan inenepil niman ohuel otlajtoj cuajli. ³⁶ Quemaj Jesús oquinnahuatij on tlacamej:

—Ma ca yacaj nenquijlisquej on tlinon onicchiu.

Pero masqui quinnahuatiaya para ma ca yacaj quijlisquej, más quiteijli-ayaj. ³⁷ Nochimej sanoyej tlamojcaitayaj, niman quijtohuayaj:

* 7:22 deseo † 7:27 mis paisanos ‡ 7:29 muy

—¡Nochi hueli quichihua sanoyej cuajli hasta on nacastatzamej hueli quintlacaquitia, niman on tenenepochmej quinchihuilia para ma tlajtocan cuajli!

8

*Jesús oquintlacualtij on nahui mil tlacatl
(Mt. 15.32-39)*

¹ Ocse tonajli ocsejpa onosentlalij miyec tlacatl. Yejhuamej xquipiayaj tlen cuasquej niman Jesús oquinnotz on inomachtijcahuau, niman oquimijlij:

² —Nejhua niquinmicnelia* on tlacamej, pampa ye quipiaj yeyi tonajli ica nican nohuan nemij niman xquipiaj tlinon quicuasquej. ³ Tla xniquintlacualtis, yej niquinnahuatis ma huiyan, huelisquej sotlahuisquej ne ipan ojtli, niman sequimej sanoyej† huejca inchan.

⁴ On inomachtijcahuau oquijlijquej:

—Xtihuelisquej ticnextisquej tlacuajli para tiquintlacualtisquej nochimej in tlacamej nican tlapatlaco.

⁵ Yejhua oquintlajtoltij:

—¿Quesqui pan nenquipiaj?

Yejhuamej oquijlijquej:

—Chicome.

⁶ Quemaj Jesús otlanahuatij para on tlacamej ma notlajtlalicán ne ipan tlajli. Quemaj ocontilan on chicome pan, niman oquimacac tlaxtlahuijli Dios. Quemaj oquitlatlapan, niman oquinxelohuiliij on inomachtijcahuau para ma quinxelohuilican on tlacamej. Niman oquinxelohuiliijquej nochí on quech ica tojlan. ⁷ No quimpiayaj quesquimej michintzitzintin. Quemaj oquimacac tlaxtlahuijli Dios por yejhua on michimej, niman quemaj oquimijlij on inomachtijcahuau para ma quitexelohuilican. ⁸⁻⁹ Canaj nahui mil tlacatl catcaj, niman nochimej otlacuajquej niman cuajli oixhuiquej. Niman quemaj on inomachtijcahuau oquisentlalijquej chicome chiquiutin yejhuan onocau. Niman on yejhuan otlacuajquej canaj nahui mil. Quemaj Jesús oquinnahuatij on tlacamej ma huiyan. ¹⁰ Nimantzin otlejcoc ipan barco inhuan on inomachtijcahuau, niman oyajquej ne Dalmanuta.

*On fariseos quinequiyaj quitasquej itlaj milagro
(Mt. 16.1-4; Lc. 12.54-56)*

¹¹ Quemaj ohualajquej on fariseos niman opeu notencuicuij ihuan Jesús. Quitlajtlaniliayaj ma quintiti itlaj milagro ne ipan cielo‡. Ijquin oquijtojquej para oquitlatlataquej. ¹² Jesús onejeltij ican ajmantli, niman oquijtoj:

—Miyequej on tlacamej quitlajtlanij se milagro. Melahuac, tej, nemechijlia ica xitlaj§ nicteititis.

¹³ Niman quemaj oquincajteu. Yejhua otlejcoc ipan se barco, niman oyaj ne ocse ilado on mar.

*Jesús oquijtoj ma ca ticchihuas tlen quichihuaj on fariseos
(Mt. 16.5-12)*

¹⁴ On inomachtijcahuau oquelcajquej para quitquisquej pan. San se pan oquitquijquej ne ipan on barco. ¹⁵ Quemaj Jesús oquintlachicahuiliij:

—Cuajli xcaquican yejhua in. Xmotacan sa no nemejhuamej ica intlaxocolilis* on fariseos niman itlaxocolilis on rey Herodes.

* **8:2** tengo misericordia de ellos † **8:3** muy ‡ **8:11** On cielo oncaj ne campa oncaj ajacatl, moxtli, metztli, tonajli niman sitlalimej. § **8:12** nada; coxtla * **8:15** levadura

16 Quemaj on inomachtijcahuan opeu ijquin quinotlajtoltiayaj se ihuan ocse:

—Yejhua otechijlij in pampa xticpiaj pan.

17 Jesús oquimat tlen quijtohuayaj, niman oquimijlij:

—¿Tlica[†] nenquijtohuaj xnenquipiaj pan? ¿Xnencajsicamatij? ¿Tlen nemotlamachilis sanoyej chicahuac? **18** ¿Nemejhuamej xnentlachaj ican nemixtololoj, nion xnentlacaquij ican nemonacas? ¿Tlen xnenquelnamiquij? **19** Ijcuac onictlatapan on macuijli pan, niman quemaj oniquintlacualtij on macuijli mil tlacatl, ¿quesqui chiquiutin de tlatlajcotzitzin yejhuan onocau onenquisentlalijquej?

Niman yejhuatej oquijtojquej:

—Majtlactli huan ome.

20 Quemaj Jesús oquintlajtoltij inomachtijcahuan:

—Niman ijcuac yonictlatapan on chicome pan, niman quemaj oniquintlacualtij on nahui mil tlacatl, ¿quesqui chiquiutin de tlatlajcotzitzin yejhuan onocau onenquisentlalijquej?

Niman yejhuatej oquijtojquej:

—Chicome.

21 Quemaj oquimijlij:

—¿Man hasta aman xnencajsicamatij?

Jesús oquipajtij se ciego ne Betsaida

22 Quemaj oajsiquej ne Betsaida, niman ocuajhuiquiliijquej se tlacatl yejhuan ciego catca. On tlacamej sanoyej oquitlajtlanilijquej Jesús para ma quimato. **23** Quemaj Jesús oquitilan ipan ima, niman ocuicac neca caltempan. Niman ijcuac oquitlalilij icualac ipan ixtololojhuan, oquintlalij imahuan ipan, niman quemaj oquitlajtoltij:

—¿Ye tihueli tiquita itlaj?

24 On tlacatl oajcotlachix, niman oquijlij:

—Ni Quinta tlacamej, pero nesi quen cojtint[‡] yehuan nejnemij.

25 Quemaj ocsejpa Jesús oquintlalij imahuan ne ipan ixtololojhuan on tlacatl. Niman quemaj on tlacatl sa sentlachixtacatca, niman quemaj nochu cuajli oquitac. **26** Jesús oquijlij:

—Ma ca sa xhuiya ipan in pueblo. Niman ma ca itlaj xteijli.

Pedro oquijtoj ica Jesús yejhua melahuac Cristo

(Mt. 16.13-20; Lc. 9.18-21)

27 Jesús niman on inomachtijcahuan oyajquej neca ipan on pueblos nisu Cesarea de Filipo. Neca ipan ojli oquintlajtoltij on inomachtijcahuan:

—On tlacamej, ¿quen quijtohuaj aquin nejhua?

28 Oquijlijquej:

—Sequimej quijtohuaj ica tejhua tijuan on tlacuajtequijquetl, ocsequimej quijtohuaj ica tejhua tiElías, niman ocsequimej quijtohuaj ica tejhua tiyacaj ocse tiotlajtojquetl.

29 Quemaj Jesús oquintlajtoltij on inomachtijcahuan:

—Niman nemejhuamej, ¿quen nenquijtohuaj aquin nejhua?

Pedro oquijlij:

—Tejhua tiCristo, yejhuan Dios oquitlapejpenij para tlamandaros.

30 Quemaj Jesús oquinnahuatij para ma ca yacaj ma quijlijcan ica yejhua Cristo.

† **8:17** ¿por qué?; ‡**line?** ‡ **8:24** árboles

*Jesús quijtohua ica yejhua tlajyohuis niman miquis
(Mt. 16.21-28; Lc. 9.22-27)*

³¹ Quemaj Jesús opeu quinmachtia ica yejhua aquin onochiu Tlacatl quijohuis miyec tlajtlamach[§]. On tlajtlajmatquej, niman intlayecancahuau on tiopixquej niman on temachtijquej ican iflanahuatil Dios xquiselisquej. Yejhuatej quimictisquej, pero ipan yeyi tonajli yolihijs*, niman noquetztehuas. ³² Nochi oquinmelajcailij ica ijqui nochihuas. Ijcuacon Pedro oquixeloj neca ocsecan niman opeu cajhua. ³³ Pero Jesús ohuajnocuep, niman ocomintac on ocsequimej inomachtijcahuau, niman ijquin ocajhuc Pedro:

—Xnechtlalcahui Satanás. Tejhua Pedro, xticnemilia quen Dios, yej tejhua tincnemilia quen on tlacamej.

³⁴ Quemaj Jesús oquinnotz on tojlamej niman on inomachtijcahuau, niman oquimijlij:

—Tla yacaj quinequi yas nohuan, ma quelcahua on tlen quitlajsojtlat†, niman ma nemi listo para tlajyohuis no ijqui quen se tlacatl tlayohuia ijcuac quimamajtiu icojnepanol‡ ne campa quimictisquej. ³⁵ Yejhua in nemechijlia pampa yejhuan quinequis quimaquixtis inemilis ipan in tlalticpactli, quipolos ialma, pero yejhuan san nopampa niman san ipampa on cuajli tlajtolij yejhuan quitemaca temaquixtilistli quipolos inemilis ipan in tlalticpactli, yejhua quiselis nemilistli para ialma. ³⁶ Tej, ¿tlinon ica quipalehuis se tlacatl tla yejhua quinoyaxcatis[§] nochitlen oncaj ipan in tlalticpactli niman quipolos ialma? ³⁷ Xitlaj, tej, ica quipalehuis, pampa xitlaj* oncaj yejhuan se tlacatl huelis ica quitlaxtlahuas ialma. ³⁸ Tla yacaj ne imixpan on tlajtlacolejquej noca pinahua niman ica pinahua on tlen nictemachtia, nejhua yejhuan oninochiu Tlacatl no ica nippinahuas ijcuac nihuajlas ican ihueyilis noTataj niman inhuan on yolchipajquej ilhuicachtequitquej†.

9

¹ No oquimijlij Jesús:

—Ica tlen melahuac nemechijlia ica sequimej yejhuan aman nican nemij quitasquej Dios tlamandaros ican poder ijcuac xe mijmiquij.

Onixpatlac Jesús

(Mt. 17.1-13; Lc. 9.28-36)

² Chicuasen tonajli más saquin*, Jesús oquinotz Pedro, Jacobo Juan niman oquinhuicac san yejhuatej ipan se tepetl sanoyej† hueyi. Ompa oquitaquej Jesús ica onixpatlac. ³ On itlaquen sanoyej opetlan, niman oistayac ijcon quen xacaj tlapacquetl ipan in tlalticpactli hueli tlapaca, niman tlastalia sanoyej. ⁴ Niman quemaj Elías niman Moisés ohuajnonextijquej imixpan. Niman on yejimej inomachtijcahuau oquitaquej ica Elías niman Moisés ihuan tlajtlajtohuayaj Jesús. ⁵ Ijcuacon Pedro oquijlij Jesús:

—Totemachtijcau, sanoyej cuajli ica nican tinemij. Ma ticchijchihuacan yeji caltzitzintin, se para tejhua, ocse para Moisés, niman ocse para Elías.

⁶ Ijcon oquijtoj pampa yejhua niman on ocsequimej sanoyej yonomojtijcaj, niman yejhua xoc quimatiya tlinon quijtos. ⁷ Quemaj ohuajlaj se moxtli yejhuan oquintlapachoj, niman quemaj ipan on moxtli ocaquistic se tlajtolij yejhuan oquijtoj:

§ 8:31 cosas * 8:31 resucitará; yolis † 8:34 lo ama ‡ 8:34 su cruz § 8:36 se posesionará; quinoaxcatis, quinohuaxcatis, quinotlatquitis * 8:37 nada; coxtla † 8:38 ángeles: Angeles tequitij ne ilhuicac niman nican ipan in tlalticpactli. * 9:2 después † 9:2 muy

—In yejhua notlajsojcaConeu. Yejhua xtengaquinan.

⁸ Quemaj nimantzin otlatlachixquej inyehualican niman xoc yacaj más oquitaquej, yej san Jesús iselti.

⁹ Chica huajtemohuayaj ne ipan on tepetl, Jesús oquinnahuatij para ma ca yacaj quijlisquej on tlinon oquitaquej hasta ijcuac yejhua, aquin onochiu Tlacatl, yonoyolihuitij[‡] niman yonoquetzteu ne ipan itlalcon. ¹⁰ Yejhua ica xacaj oquijlijquej, yej san quinojliyaj tlinon quijtosnequi on ica quijtohua noyolihuitis niman noquetztehuas ne ipan itlalcon. ¹¹ Quemaj oquitlajtoltijquej Jesús:

—¿Tlica§, tej, quijtohuaj on temachtijquej ican itlanahuatil Dios ica Elías ica oncaj achtoj huajlas xquen tejhua yejhuan Dios omitztlapejpenij para techmandaros?

¹² Otlananquilij, Jesús oquimijlij:

—On melahuac ica Elías achtoj huajlas niman quiyectlalis nochi tlajtlamach*. Tla ijcon, ¿tlica tlajcuilnesticaj ipan on Yectlajcuilojli ica nejhua yejhuan oninochiu Tlacatl nechtla jyohuiltisquej sanoyej niman xnech-selisquej? ¹³ Pero nemechijlia ica Elías yohuajlaj, niman oquichihuili quej nochi xcuajli tlen oquinequej quen on Yectlajcuilojli quijtohua ipan nochihuas.

*Jesús oquipajtij se tlacatl yejhuan quipaya on xcuajli espíritu
(Mt. 17.14-21; Lc. 9.37-43)*

¹⁴ Quemaj ijcuac oajsiquej intech on ocsequimej nomachtijquej, oquitaquej sanoyej tojlamej san secan nemiyaj niman sequimej temachtijquej ican itlanahuatil Dios notencuicuiticatcaj inhuan on nomachtijquej. ¹⁵ Niman ijcuac on tojlamej oquitaquej ica yoyejcoc Jesús, sanoyej otlamojcaitaquej niman onotlajtlaloquej para oquitlajpalotetzitoj.

¹⁶ Quemaj Jesús oquintlajtoltij on inomachtijcahuau:

—¿Tlinon ica nemotencuicuiticatcaj inhuan on temachtijquej ican itlanahuatil Dios?

¹⁷ Quemaj se on yejhuan tehuan ompa nemiyaj, oquinanquilij:

—Temachtijquetl, nican onimitzajhuiquilij notelpoch yejhuan quipia se xcuajli espíritu yejhuan quinontzintilia. ¹⁸ Tej, nochihuiyan campaca yau in espíritu cajsi niman quitlajcali ipan tlajli, niman ompa sanoyej camaposon-alquisa, niman sanoyej notlancochtijsi, niman cuecuetlaca. Yoniquintlajtlanilij in monomachtijcahuau para ma quixtilican on xcuajli espíritu, pero xohuelquej.

¹⁹ Quemaj Jesús oquimijlij:

—¡Oh, nemejhuamej tlacamej yejhuan xnennechneltocaj! ¿Hasta quemanon ninemis nemohuan? ¿Hasta quemanon nemechijyohuis? Xcuajhuicacan nican on telpochtli.

²⁰ Yejhuatej ocuajhuicaquej on telpochtli ne campa nemiya Jesús. Ijcuac oquitac Jesús, nimantzin on xcuajli espíritu oquitzejtzeloj on telpochtli, niman ohuetz ipan tlajli. Onotlalcuejcuep, niman otemposonalquis. ²¹ Jesús oquitlajtoltij on tajtli:

—¿Quesqui xipan ica quipia motelpoch in xcuajli espíritu?

Yejhau oquinanquilij:

—Hasta ijcuac pitentzin. ²² Miyecpa on xcuajli espíritu quinequi quimictis. Camantica contlajcali ne ipan atl noso ne tlico. Xtechicneli niman xtechpale-hui tla tihueli.

²³ Jesús oquijlij:

‡ 9:9 ya resucitó; yoyoliu

§ 9:11 ¿por qué?; ¿tline?

* 9:12 cosas

—¿Tlica tinechijlia: “Tla tihuelis”? Tla yej tejhua ticneltoca, Dios nochí huelis mitzchihuilis.

²⁴ Nimantzin on tajtli otzajtzic chicahuac:

—Nejhua nicneltoca, pero xnechpalehui más ma nitlaneltoca quen melahuac nonequi.

²⁵ Ijcuac Jesús oquitac ica on tlacamej sanoyej ye nosentlalijticatcaj. Oca-jhuac on xcuajli espíritu:

—Tejhua, aquin yoticau nontzin niman nacastzatza in telpochtli, xquisa ne ijtic, niman ma ca ocsejpa ticalaquis ijtic.

²⁶ Ijcuacon on xcuajli espíritu otzajtzic niman oquitzejzeloj sanoyej chicahuac. Quemaj oquis ne ijtic on telpochtli, niman ompa ocajteu sotlajtoc. Yejhua ica miyec tlacatl quiptojuaya ica yomic. ²⁷ Pero Jesús ocontilan ima on telpochtli, niman oquipalehuij para onotelquetz.

²⁸ Ijcuac Jesús ocalac ne calijtic, on inomachtijcahuán sa iseltimej oquitlajtoltijquej Jesús:

—¿Tlica tejhuamej xotihuelquej otiquixtijquej on xcuajli espíritu?

²⁹ Yejhua oquinanquilij:

—Nemejhuamej san nenhuelisquej nenquinquixtisquej yejhua in quen in xcuajli espíritu tla nenquichihuaj oración niman nemosahuaj.

Jesús ocsejpa quijtohuá ica miquis

(Mt. 17.22-23; Lc. 9.43-45)

³⁰ Quemaj Jesús niman inomachtijcahuán oquisquej ompa, niman opanoquej neca Galilea. Xquinequiya yejhua ma quimatican canon nemí ³¹ pampa quinmactiaya inomachtijcahuán. Yejhua oquinmactij, oquimijlij:

—Nejhua yejhuan oninochiu Tlacatl nechtemactilisquej intech on tlacamej niman nechmictisquej, pero ipan yeji tonajli niyolihuis[†] niman nino-quetztehuas ipan notlalcon.

³² Pero on inomachtijcahuán xcajsicamatiyaj tlinon quimijliaya niman nomoxtayaj para quitlajtojlisquej ma quinmelajcajli on tlen quimijlijticatca.

Jesús oquijtoj quen se hueli hueyixtias

(Mt. 18.1-5; Lc. 9.46-48)

³³ Ijcuac oajsiquej ne Capernaum, ocalaquej ne ipan se cajli, niman Jesús oquintlajtoltij:

—¿Tlinon nencualijijtojtiayaj ne ipan ojtli?

³⁴ Pero yejhamej xoquinanquilijquej pampa yejhamej cualijitojtiayaj aquinon más hueyixtacaj intzajlan. ³⁵ Quemaj Jesús onotlalij, niman oquinnotz on majtlactli huan ome inomachtijcahuán. Niman quemaj oquimijlij:

—On yejhuan quinequis hueyixtias, yejhua ma nochihua quen se tlana-mactli, niman ma quinserviro nochimej.

³⁶ Quemaj oquitilan se conetl niman oquitelquetz ne imixpan. Quemaj oquinapaloj, niman oquimijlij on inomachtijcahuán:

³⁷ —San aquinon yejhuan nopampa quiselis yacaj yejhuan yolyemanqui[‡] quen yejhua in conetl, nejhua nechselia, niman on yejhuan nechselia, xsan nejhua nechselia, yej no quiselia Dios on yejhuan onechajtitlan.

On yejhuan xtechtlahuelita tohuan nopohua

(Mt. 10.42; Lc. 9.49-50)

³⁸ Juan oquijlij Jesús:

† 9:31 resucitaré; niyolis ‡ 9:37 humilde

—Notemachtijcau, otiquitaquej se tlacatl yejhuan ica motocatzin quintequixtilaya on xcuajcualtin espíritus. Pero oticnahuatijquej ma ca sa ijqui ma quichihua pampa xtohan quistinemi.

³⁹ Quemaj Jesús oquimijlij:

—Ma ca xtlacahualtican pampa on yejhuan quitenquixtia notoca para quichihua on milagros xhuelis más saquin[§] itlaj nechijtohuilis tlen xcuajli.

⁴⁰ On yejhuan xtlamach quijtohuaj totechcopa, on tohuan nopoqua. ⁴¹ Tla ya-caj mechmacas masqui san se vaso atl pampa nennoyaxcahuan*, melahuac quiselis itlaxtlahuil yejhuan Dios quimacas.

Jesús oquijtoj ica on tlajtlacojli sanoyej xcuajli

(Mt. 18.6-9; Lc. 17.1-2)

⁴² 'San aquinon yejhuan quitlajcalis ipan tlajtlacojli semej yejhamej in pipitiquej yejhuan nechneltoca quiselis ihueyi tlahuil Dios. Más cuajli yesquia, ijcuac xe quichihua on tlajtlacojli, iquechtlan quipilohuilisquiaj se tetl yejhuan imetl on molino, niman contlajcalisquiaj ne ipan on mar.

⁴³ Niman tla moma mitzchihuilia titlajtlacohua, xtequi. Ijcon xchihua pampa más cuajli ticpias san se moma ijcuac ticalaquis ne ilhuicac xquen tiquimpias ome momahuan niman tias ne mictlan campa on tlilt tetlatij para nochipa, ⁴⁴ niman campa on oculimej nochipa quicuasquej motlalnacayo, niman campa on tlilt xcaman sehuis. ⁴⁵ Niman tla mocxi mitzchihuilia titlajtlacohua, xtequi. Ijcon xchihua pampa más cuajli ticpias san se mocxi ijcuac ticalaquis ne ilhuicac, xquen tla tajsitias niman yej mitzontlajcalis ne mictlan, ⁴⁶ ne campa on oculimej nochipa quicuasquej motlalnacayo, niman on tlilt xcaman sehuis. ⁴⁷ Niman tla mixtololoj mitzchihuilia para titlajtlacohua, xquixti. Ijcon xchihua pampa más cuajli ticpias san se mixtololoj ijcuac ticalaquis ne campa Dios tlamandarohua, xquen tla tajsitias niman yej mitzontlajcalis ne mictlan, ⁴⁸ campa on oculimej nochipa quicuasquej motlalnacayo, niman on tlilt xcaman sehuis. ⁴⁹ Nochimej on yejhuan quintlatlatas on tlajtlacojli, quimatisquej sanoyej ohuijticaj†, pero on Espíritu Santo yejhua quimpalehuis.

⁵⁰ 'Sanoyej cuajli on istatl para tlacuajli, pero ijcuac xoc poyec, xacaj ocsejpa hueli quichihuilia para poyeya. Xnemican cuajli sa no ijqui quen on istatl, niman xchantican inhuan ocsequimej ican yolsehuilistli.

10

Jesús oquijtoj ica xcuajli para se tlacatl noxotonis ihuan isihuau

(Mt. 19.1-12; Lc. 16.18)

¹ Quemaj Jesús oquis ompa, niman oyaj ne Judea, niman ne campa iquisayan tonaltzintli campaca on atentli itoca Jordán. Ompa ocsejpa miyec tlacamej onosentlalijquej, niman ocsejpa Jesús opeu quinmachtia ijcon quen nochipa quichihuaya. ² Niman sequimej fariseos oquinisihuijquej Jesús para quitlatlatasquej. Oquitlajtoltijquej:

—¿On tlanahuatiijli cahuilia se tlacatl noxotonis ihuan isihuau?

³ Quemaj Jesús oquinnanquilij, oquimijlij:

—¿Quen otlanahuatiij Moisés?

⁴ Yejhamej oquijlijquej:

—Itlanahuatil Moisés cahuilia se tlacatl quitlalia se amatl campa quijtohua ica noxotonia ihuan isihuau.

⁵ Jesús oquimijlij:

§ 9:39 después * 9:41 me pertenecen; nennoyaxcahuan, nennohuaxcahuan, nennotlatquihuan

† 9:49 difícil

—Moisés oquitlalij on tlanahuatijli pampa on tlacamej sanoyej* yoltechicajquej. ⁶ Pero ijcuac Dios oquitlalij in tlalticpactli, oquitlalij se tlacatl niman se sihuatl. ⁷ Yehua ica on tlacatl cahuas itaj niman inan para nosentlalis ihuan isihuau. ⁸ Ijcon, tej, on omemej sa se huajnochihuasquej quen se tlacatl. Ijcon, tej, yejhuamej xoc omemej, yej yonochijquej san se. ⁹ Yehua ica ma ca yacaj tlacatl quixelos on tlen Dios oquinsentlalij.

¹⁰ Ijcuac oyajquej ne calijtic, on inomachtijcahuau ocsejpa quitlajtlanili-jquej para ma quinmelajcailij on tlen oquimijlijcaj on fariseos. ¹¹ Quemaj oquimijlij:

—San aquinon yejhuan noxotonis ihuan isihuau niman nonamictis ihuan ocse sihuatl, yejhuau sihuapajpatla. Yejhuau tlajtlacohua itech ica on achtoj isihuau. ¹² Niman no tla se sihuatl noxotonis ihuan ihuehuentzin, niman nonamictis ihuan ocse tlacatl, yejhuau tlacapajpatla.

Dios hueli quinmandarohua yejhuamej on yejhuan yolyemanquej quen yejhuamej on coconej

(Mt. 19.13-15; Lc. 18.15-17)

¹³ Quemaj sequimej oquinhuicaquej inconehuan para ma quinmatoca Jesús, pero on inomachtijcahuau opejquej quimajhuaj on yejhuan quinhuajhuicayaj. ¹⁴ Pero ijcuac Jesús oquitac, ocualan, niman oquimijlij:

—Xquincahuacan on coconej notech ma huajlacan, niman ma ca xquinteltican pampa yejhuan yolyemanquej† quen in coconej calaquisquej ne campa Dios tlamandarohua. ¹⁵ Ica tlen melahuac nemechijlia ica on yejhuan xquiselis itequihuayo Dios quen yacaj conetl, xqueman ompa calaquis campa Dios tlamandarohua.

¹⁶ Quemaj Jesús oquinnapaloj on coconej, niman oquintlalij imahuan impan, niman oquintiochiu.

Nochi tlacatl yejhuan cahuas nochí on tlen quipia san ipampa Jesús, quiselis se ciento más de on tlen yejhuá quicahua

(Mt. 19.16-30; Lc. 18.18-30)

¹⁷ Niman chica Jesús quisaya, se tlacatl ohuajnotlaloj itech, niman onotlancuaquetz ixpan, niman oquitlajtoltij:

—Cuajli temachtijquetl, ¿tlinon nicchihuas para nicselis on nemilistli yejhuan para nochipa?

¹⁸ Jesús oquijlij:

—¿Tlica‡ tiquijtohua ica nicuajli? Dios san yejhuai selti cuajli, niman tejhuatlicnemilia ica nejhua xniDios. ¹⁹ Tejhuai tiquimixmati itlanahuatilhuau Dios: “Ma ca xtemicti, ma ca xahuilnemi, ma ca xtlachtequi, ma ca yacaj xtlatjolquetztehuili, ma ca xtlacajcayahua, xtlacaita motaj niman monan.”

²⁰ On tlacatl oquinanquilij:

—Temachtijquetl, nochí yejhuan in desde niconetl nicuajtlacamatztiu.

²¹ Niman Jesús ocontac, niman sanoyej oquitlajsojcaitac, niman oquijlij:

—Sanquen mitzpolohua se cosa. Xhuiya mochan niman xnamaca on tlen ticpia, niman on tomin xquinmaca on mayanquej. Tla ijcon ticchihuas, ticpias riquezas ne ilhuicac. Niman quemaj xhuajla nohuan, niman xmommamulti mocojnepanol§.

²² Pero ijcuac on tlacatl ijcon ocac, sanoyej onajman, niman oyaj onajmantiaj pampa sanoyej rico catca.

²³ Quemaj Jesús ocomintac iyehualican on inomachtijcahuau, niman oquimijlij:

* **10:5** muy † **10:14** humildes ‡ **10:18** ¿por qué?; ¿tline? § **10:21** su cruz

—Sanoyej ohuijticaj* para huelis Dios quinmandaros on yejhuan ricos.

²⁴ On inomachtijcahuan sanoyej otlamojcaitaquej ica on tlinon oquimijlij Jesús. Pero Jesús ocsejpa oquimijlij:

—Noconejuan, sanoyej ohuijticaj para on tlacamej calaquisquej ne campa Dios tlamandarohua on yejhuan quitlalaj inyojo ne ipan inrriquezas. ²⁵ Más ohuijticaj para se rico calaquis ne campa Dios tlamandarohua xquen para se camello panos ne campa tlacoyonia se aguja.

²⁶ On inomachtijcahuan sanoyej omojcatlachixquej niman ijquin oquijtoquej:

—Tla ijcon, tej, ¿aquinon huelis maquisas?

²⁷ Jesús ocommintac, niman oquimijlij:

—On tlacamej xhuelisquej nomaquixtisquej, pero Dios huelis quinmaquixtis pampa para Dios xitlaj† ohuijticaj quichihua.

²⁸ Quemaj Pedro oquijlij Jesús:

—Xquita, tejhuamej yoticajquej nochí tlen ticpiayaj, niman tiquistinemij mohuan.

²⁹ Jesús oquinanquilij:

—Ica tlen melahuac nemechijlia ica san aquinon yejhuan quicahuas ichan, icnihuan, itaj, inan, isihuau, iconehuan, noso itlalhuan, san nopampa niman ipampa on cuajli tlajtojli yejhuan quitemaca temaquixtilistli, ³⁰ quiselis aman ipan in tlalticpactli se ciento más de yejhua on tlen ocajteu. Quiselis se ciento más caltin, icnihuan, inanhuan, iconehuan niman itlalhuan. Pero no quiselis tlahuejli niman tlajtlamach ica quitlajyohuilitisquej. Niman ipan on tonaltin yejhuan huajlau, quiselis nemilistli yejhuan para nochipa. ³¹ Aman miyequej on yejhuan huejhueyixtoquej, ompa xoc huejhueyixtiasquej. Niman miyequej on yejhuan xhuejhueyixtoquej, ompa yejhuatej huejhueyixtiasquej.

Jesús ica yexpa oquijtoj ica miquis

(Mt. 20.17-19; Lc. 18.31-34)

³² Quemaj opeu nejnemiyaj tlejcotiayaj para Jerusalén. Jesús yaya ipan ojli inyecapan on inomachtijcahuan, niman yejhuatej cuitlapanhuijtiayaj. Yejhuatej on inomachtijcahuan tlamojcaitayaj niman on ocsequimej tojlamej nomojtiayaj. Jesús oquinnotz on inomachtijcahuan niman ocsejpa oquimijlij on tlajtlamach‡ tlinon ipan nochihuas. ³³ Oquimijlij:

—Xcaquican. Aman titlejcotihuij para Jerusalén campa nejhua aquin oninochiu Tlacatl nechtemactilisquej intech on tlayecanquej tiopixquej niman intech on temachtijquej ican itlanhuatil Dios. Yejhuatej nechtlatj-lacolmacasquej para nechmictisquej, niman nechtemacajsquej intech on xhebreos. ³⁴ Yejhuatej on xhebreos noca huetzcasquej, niman nechchijchasquej, niman nechhuihuitequisquej niman nechmictisquej. Niman quemaj ipan yeji tonajli niyolihius§ niman ninoquetztehuas ipan notlalcon.

Jesús oquitlajtlanilijquej Juan niman Jacobo ma quinchihuili se favor

(Mt. 20.20-28; Lc. 22.24-30)

³⁵ Quemaj Jacobo niman Juan, iconehuan Zebedeo, oquinisihuijquej Jesús, niman oquijliquej:

—Totemachtijcau, tejhuamej ticnequij xtechchihuili tlen nimitztlatj-lanisquej.

³⁶ Niman Jesús oquimijlij:

—¿Tlinon nenquinequij ma nemechchihuili?

* **10:23** difícil † **10:27** nada; coxtla ‡ **10:32** cosas § **10:34** resucitaré; niyolis

37 Niman oquinanquilijquej:

—Xtechahuili ma titotlalican monacastlan ijcuac tipehuas titlamandaros ican mohueyilis, se ipan moyecmacopa niman se ipan mopochmacopa.

38 Niman Jesús oquimijlij:

—Xnenquimati tlinon nenquitlajtlanij. ¿Nenhuelisquej nenquijyohuisquej on tlen nejhua niquijyohuis? ¿Nenhuelisquej nenquixicosquej tlajtlamach ijcon quen nejhua nicxicos?

39 Quemaj oquinanquilijquej:

—Huelis titlajyohuisquej quen tejhua.

Ijcuacon Jesús oquimijlij:

—Melauc, nentlajyohuisquej ijcon quen nejhua, niman nenquixicosquej tlajtlamach ijcon quen nejhua. **40** Pero yejhua on para nemotlalischej noyecmacopa niman ipan nopocho macopa nejhua xnihuelis ompa nemechtlalis, yej ompa noTajzin quintlalis on yejhuan yoquintlapejpenij.

41 Ijcuac on majtlactlimej nomachtijquej oquimatzquej tlinon oquitlajtlanquej, sanoyej ocualanquej intechcopia Jacob niman Juan. **42** Niman Jesús oquinnotz niman oquimijlij:

—Nemejhuamej ye nenquimatztoquej ica nemij xhebreos yejhuan huejhueyixtoquej, niman yejhuatej quinmandarohuaj ocsequimej tlayecanquej, niman yejhuatej in tlayecanquej tlamandarohuaj ipan on países xican teicnelilistli*. **43** Pero para nemejhuamej xijqui yes. Yej aquin quinequis hueyixtias nemotzajlan ica oncaj yejhua teserviros intech ocsequimej. **44** San aquinon nensemjej nemejhuamej yejhuan quinequis tlayecantias, ica oncaj yejhua tepalehuis quen se tlanamactli. **45** Pampa nejhua aquin oninochiu Tlacatl xonihuajlaj para nechtequipanosquej, yej para nitetequipanos niman nictlaxtlahuas ica nonemilis para niquinmaquixtis miyec tlacatl.

Jesús oquipajtij se ciego itoca Bartimeo

(Mt. 20.29-34; Lc. 18.35-43)

46 Niman quemaj oajsiquej ne Jericó. Niman ijcuac Jesús ye quistiaya ipan on hueyican inhuan on inomachtijcahuan niman sanoyej miyequej tlacamej, se ciego, itoca Bartimeo, iconeu Timeo, yehuaticatca ne itenco on ojtli. Quinotlajtlanilijticatca tlanechicojli. **47** Niman ijcuac ocac ica quitenehuayaj Jesús on yejhuan hualehua Nazaret, opeu tzajtzi:

—Jesús, huejca teixhuiu† ne itech David, xnechicneli‡.

48 Miyequej tlacamej ocajhuaquej niman oquijlijquej para ma ca sa ma nahuati. Pero yejhua más chicahuac tzajtziya:

—Huejca teixhuiu ne itech David, xnechicneli.

49 Ijcuacon Jesús onoteltij, niman oquijtoj:

—Xquijlican ma huajla nican.

Quemaj oquinotzatoj, niman oquijlijquej:

—Xmoyolchicahua. Xmotelquetza. Yehuamitnotza.

50 Quemaj on ciego ompa oquichapanij on igaban, onotelquetz, niman oyaj ne campa nemí Jesús.

51 Jesús oquitlajtoltij:

—¿Tlinon ticnequi ma nimitzchihuili?

On ciego oquijlij:

—Temachtijquetl, xchihua para ma nitlacha.

52 Niman Jesús oquijlij:

—Xhuiya. Aman tihueli titlacha pampa oticneltocac ica nimitzpajtisquia.

* **10:42** misericordia † **10:47** descendiente ‡ **10:47** ten misericordia de mí

Quemaj nimantzin on tlacatl ohuel otlachix, niman oyaj ihuan Jesús neca ipan ojtli.

11

Jesús ocalac ne Jerusalén yetiu ipan se polocotzin quen se rey (Mt. 21.1-11; Lc. 19.28-40; Jn. 12.12-19)

¹ Jesús oquinisihuij Jerusalén ne ipan on tepetl itoca Olivos campa oncatcaj on pueblitos itoca Betfagé niman Betania. Ijcuacon oquintitlan omemej inomachtijcahuán, ² niman oquinmijilij:

—Xhuiyan ne ipan on pueblito yejhuan oncaj ne tlayecapan. Niman ijcuac nemoncalactiasquej, nenquitasquej salijticaj se polocotzin* yehuan xqueman yacaj ipan tlejcohua. Xtojtomacan, tej, niman xnechajhuiquilican.

³ Tla yacaj mechijlia: “¿Tlica† nenquitojtomaj?” xquijlican ica nemoTeco quinequi niman ica nimantzin cuajtitlanis.

⁴ On omemej inomachtijcahuán oyajquej, niman oquinextijquej on polocotzin salijticaj ne ipan ojtli quiahuatenco, niman quemaj oquitojtonquej.

⁵ Niman sequimej tlacamej yejhuan nemiya ompa oquintlajtoltijquej on inomachtijcahuán Jesús:

—¿Tlica nenquitojtomaj on polocotzin?

⁶ Yejhuamej on inomachtijcahuán oquiteijlijquej ijcon quen oquimijilij Jesús. Niman quemaj on tlacamej oquincahuilijquej para ma cuicacan.

⁷ Niman ocuajhuicaquej on polocotzin ne itech Jesús. Ijcuacon yejhuamej oquitlalijquej intlaquen ipan on polocotzin, niman quemaj Jesús otlejcoc ipan. ⁸ Niman miyequej oquisojoquej intlaquen ipan ojtli, niman sequimej oquitejtequej inxojoyo on cojtin

⁹ On yejhuan yayaj ne tlayecapan, niman on yejhuan yayaj ne tlacuitlapán opeu tzajtzij:

—Ma noyectenehua Dios. Ma Dios quitiochihua on yejhuan ocuajtitlan.

¹⁰ Ma Dios quitiochihua on yejhuan huajlau para techmandaros cuajli quen otlamandaroj David ye huejcahui. ¡Ma Dios ne ilhuicac noyectenehua!

¹¹ Niman ocalac Jesús ne ipan on hueyican Jerusalén, niman quemaj oyaj ne calijtic ipan on hueyi tiopan. Ompa oquitac nochí tlen quichijticatcaj. Niman pampa sanoyej‡, niman oquitlalijquej neca ipan ojtli. § ye tiotlac catca, oyaj ne Betania inhuan on inomachtijcahuán.

Jesús ocajhuac on cojtlí yejhuan xquipiaya on tlaquilyotl (Mt. 21.18-19)

¹² Huajmostla ocsejpa oquisquej ne Betania, niman ne ipan ojtli Jesús apismiquiya. ¹³ Jesús ocontac ne huejca se cojtlí*, itoca higuera, niman xojoyo catca. Yejhuá oyaj ne para quitas tla quipia itlaquilyo. Ijcuac oquinisihuij on cojtlí, xoquinextilij itlaquilyo, yej san ixojoyo pampa ijcuacon xe tiempo catca para quipias itlaquilyo. ¹⁴ Quemaj oquijlij on cojtlí:

—Ma ca sa queman yacaj quicuas motlaquilyo.

Niman on inomachtijcahuán ocacquej.

Jesús oquichipau on hueyi tiopan (Mt. 21.12-17; Lc. 19.45-48; Jn. 2.13-22)

¹⁵ Quemaj oajsiquej ne Jerusalén niman Jesús ocalajquito ne iquiahuac on hueyi tiopan. Yejhuá opeu quinhuajquixtia on yejhuan ompa tlanamacayaj niman tlacohuayaj. Oquinixinilij inmesas on yejhuan quitepatiliayaj

* **11:2** burrito † **11:3** ¿por qué?; ¿tline? ‡ **11:11** árboles § **11:11** muy * **11:13** árbol

tomin, niman insietas on yejhuan quinnamacayaj palomas. ¹⁶ Jesúx xquitec-ahuiliaya para yacaj ma quitqui itlaj ne ipan on hueyi tiopan. ¹⁷ Quemaj Jesúx oquinmachtij on tlacamej:

—Ye nenuimatztoquej tlinon quijtohua in Yectlajcuilojli: “Nochan itoca yes cajli campa nochihua oración para nochimej on tlacamej chanejquej ipan nochí países”, pero nemejhuamej yonencuepquej campa on tlachtequej nosenthaliaj.

¹⁸ Quemaj on tlayecanquej tiopixquej niman on temachtijquej ican itlanhuatil Dios ocacquej, niman quemaj opejquej quitejtemohuaj quen ijqui quimictisquej. Yejhuatej sanoyej nomojtiyaj, pampa oquimatquej ica nochimej on tlacamej cuelcaquiyaj on itemachtil Jesúx. ¹⁹ Ijcuac otlayohuac, Jesúx niman on inomachtijcahuan oquisquej ipan on hueyican.

*Jesúx otemachtij yejhua ica on tlaneltocalistli
(Mt. 21.20-22)*

²⁰ Huajmostla cualcan oyajquej, niman oquitaquej ica on higuera yohuac hasta ipan inelhuayo. ²¹ Ijcuacon Pedro oquelnamic quen Jesúx ocajhuac on cojtlí[†], niman oquijlij:

—Notemachtijcau, xquita on higuera yejhuan oticajhuac para ma ca sa tlaquis. Aman yejhua yohuac.

²² Quemaj Jesúx oquimijlij:

—Xtlaneltocacan itech Dios. ²³ Ica tlen melahuac nemechijlia, san aquinon quijlisquia yejhua on tepetl: “Xmejcuani nican niman xcalaqui ne ijtic on mar”, niman xometlamatztias ipan iyojlo, on tlen quijtos nochihuas.

²⁴ Yejhua ica nemechijlia ica nochí on tlen nenquitlajtlanij ijcuac nenquichihuasquej oración, xneltocacan ica nenquiselisquej, niman nenquipiasquej.

²⁵ Niman no ijqui, tej, ijcuac nenquichihuasquej oración, xlapojojpolhuican on yejhuan mechchihuilaj on tlen xcuajli, para ijcon on nemoTajtzin yejhuan nemi ne ilhuicac no mechtlapojojpolhuis ica nemotlajtlacol. ²⁶ Tla nemejhuamej xnentlapojojpolhuiyaj, yejhua no xmechtlapojojpolhuis.

On huejhueyi tiopixquej oquitlajtoltijquej Jesúx aquinon oquimacac tequihuajyotl

(Mt. 21.23-27; Lc. 20.1-8)

²⁷ Quemaj ocsejpa oajsiquej ne Jerusalén. Niman chica Jesúx ompa quistinemiya ne ipan on hueyi tiopan, oquinisihujquej intlayecancahuan on tiopixquej niman on temachtijquej ican itlanahuatil Dios niman on tlajtlajmatquej. ²⁸ Niman oquitlajtoltijquej:

—¿Tlen tequihuajyotl ticpia para ticchihua yejhua on tlajtlamach[‡]? ¿Aquinon, tej, omitzmacac yejhua on tequihuajyotl ica oticchiu on tlajtlamach?

²⁹ Quemaj Jesúx oquimijlij:

—Nejhua no nicpia tlen nemechtlajtoltis. Tla nennechijlisquej, nejhua no nemechijlis ican tlen tequihuajyotl nicchihua in tlajtlamach. ³⁰ Xnechijlican, ¿quinon ocuajtitlan Juan para otlacuatequij? ¿Dios ocuajtitlan noso on tlacamej ocuajtitlanquej?

³¹ Quemaj yejhuatej opejquej ijquin quinochtacatlajtoltiayaj:

—¿Quen ijqui tiquijlisquej? Tla tiquijtosquej ica Dios ocuajtitlan, yejhua ijquin techijlis: “Tla ijcon, ¿tlica xonenquineltocaquej on tlen Juan oquijtoj notechica?” ³² Niman xhueli tiquijtohua ica on tlacamej ocuajtitlanquej

[†] 11:21 árbol [‡] 11:28 cosas

Juan. Yehuamej nomoxtiayaj, pampa nochimej quijtohuayaj ica Juan melahuac se tiotlajtojquetl catca.

³³ Yehua ica oquijlijquej Jesús:
—Xticmatij aquinon ocuajtitlan.

Quemaj oquimijlij:

—Yehua ica nejhua no xnemechijlis aquinon onechmacac tequihuajyotl ica nicchihua in tlajtlamach.

12

Jesús oquitlalij se ejemplo yejhua ica on xcuajcualtin tlacamej yejhuan oquitequilitjiquej on tlajli

(Mt. 21.33-46; Lc. 20.9-19)

¹ Quemaj Jesús opeu quintlaliliaj ejemplos, oquimijlij:
—Sen tlalejquetl oquitocac miyec uvas. Quemaj ocorraltij niman oquichijchiu se pilaj campa quipatzcasquej on uvas. Niman no oquichijchiu se torre para huelis quitlajpias on itlal. Niman quemaj oquinnextij sequimej medieros yejhuan tehuan tlaxelohuaj para quitlajpiasquej on uvas. Quemaj on tlalejquetl onejcuanij niman oyaj ipan ocse país. ² Ijcuac oyejcoc on tonaltin para quitequisquej on uvas, on tlalejquetl oquititlan se itequichihuilijcau para ma quintlajtlaniliti on medieros on quech yejhua quitocarohua quiselis. ³ Pero yejhuan ocajsiquej, niman oquimajmailijquej on tequichihuilijquetl. Ocontitanquej niman xitlaj* oquimacaquej. ⁴ Quemaj on tlalejquetl oquititlan ocse itequichihuilijcau, niman on tlacamej oquite-mojmotlaquej ipan itzontecon niman oquipijpinajtjiquej. ⁵ Quemaj on tlalejquetl oquititlan ocse itequichihuilijcau, niman on medieros oquimictijquej. Miyequej ocsequimej no ijqui oquinchihuilijquej. Sequimej oquinmajmailijquej, niman sequimej oquinmictijquej.

⁶ 'On tlalejquetl sa iconeu itech ohuajnocau, yejhuan sanoyej† quitlajsoj-laya‡. Quemaj sa ye ica quej yejhua oquititlan. On tlalejquetl quinemiliaya: "In noconeu quemaj quitlacaitasquej." ⁷ Pero ijcuac on teconeu oajsic ne ipan on tlatocylo ican uvas, on medieros oquijtojquej: "Yehua in iconeu on tlalejquetl. Ijcuac miquis itaj, yejhua yes iyaxca§ nochí in tlajli. Aman ma ticmictican iconeu niman in tlajli toyaxca yes." ⁸ Quemaj ocajsiquej, oquimictijquej, niman itlalnacayo oquixtijquej ne ipan on tlatocylo ican uvas.

⁹ Quemaj Jesús oquintlajtoltij:

—Aman, tej, iteco on tlatocylo ican uvas, ¿tlinon quinchihuilis on xcuajcualtin medieros? Yejhua, tej, yas niman quinmimictis on medieros, niman on tlatoctli ocsequimej quinmacas.

¹⁰ Nemejhuan cuajli nenquimatiq quen ijqui quijtohua on tiotlajtojli: On tetl yejhuan on tepanchijquej xoquiselijquej, aman yejhua yonotlalij yacatztica.

¹¹ Yejhuan in ijqui oquitlalij on toTeco niman ticmojcaitaj tlen tiquitaj.

¹² On tlayecanquej intech on hebreos quinequiyaj cajsisquej Jesús para quitzacuasquej, pampa quimatzticatcaj ica on ejemplo oquintenehuilij yejhuan. Pero xocajsiquej, pampa nomoxtiayaj quincualanisquej on tlacamej. Yejhua ica ocajejquej niman xitlaj oquichihuilijquej.

Quitocarohua quimacasquej on tequihuaj tlen yejhua iyaxca niman quimacasquej Dios on tlen yejhuan iyaxca

(Mt. 22.15-22; Lc. 20.20-26)

* ^{12:3} nada; coxtla † ^{12:6} mucho ‡ ^{12:6} amaba § ^{12:7} le pertenece; iaxca, ihuaxca, itlatqui

13 Quemaj oquintitlanquej sequimej fariseos niman sequimej herodianos para quichihualtisquej Jesús quijtos itlaj ican itlajtol yejhuan huelis ica quiteixpanhuisquej. **14** Yejhamej ohualajquej, niman oquijlijquej Jesús:

—Temachtijquetl, ticmatztoquej ica nochipa tiquijtohua on tlen melahuac. Tejhua xtictencaqui on tlen quijtohuaj motech ica on tlacamej masqui huejhueyixtoquej. Yej melahuac ticteititia quen Dios quinequi ma titohuicacan. Xtechijli, ¿itlanahuatil Moisés techcahuilia titlatlaxtlahuasquej ican impuestos itech César yejhuan itequihuaj on país de Roma? ¿Tontlatlaxtlahuasquej, noso xtontlatlaxtlahuasquej?

15 Jesús oquitac inyojlo ica omexayacyequej. Yejhua ica oquimijlij:

—¿Tlica* nennechchihualtisnequij ma nemechijli itlaj yejhuan ica huelis nennechteixpanhuisquej? Xnechajcuilican se tomin para ma niquita.

16 Yejhamej ocuajquiquej se tomin, niman Jesús oquintlajtoltij:

—¿Aquinon ixayac yejhua in, niman aquinon itocayo in nican tlajcuilones-ticaj ipan in tomin?

Yejhamej oquinanquilijquej:

—On tequihuac César yejhuan quimandarohua nochí on país itoca Roma.

17 Quemaj Jesús oquimijlij:

—Xmacacan César on tlen yejhua iyaxca, niman xmacacan Dios on tlen yejhua iyaxca.

Yejhamej sanoyej otlamojcaitaquej ijcon quen oquinnanquilij.

Masqui totlalnacayo miquis toespíritu nemis

(Mt. 22.23-33; Lc. 20.27-40)

18 Niman oquitacoj Jesús sequimej saduceos yejhuan quijtohuaj ica xhuelis yolihiisquej† on mimiquej. Quemaj oquijlijquej:

19 —Temachtijquetl, Moisés oquijcuiloj para tejhuamej ica tla yacaj icniu miqui niman cajtehua isihuau, niman tla xitlaj‡ iconeu cajtehua, icniu ihuan nonamictis isihuau niman ma yejhua tlaxinacho quen icniu yesquia.

20 Aman, tej, nemiyaj chicomemej icniutin yejhuan tlacamej. Yejhua on yejhuan yencuiyotl ononamictij, pero omic niman xitlaj iconeu ocajteu.

21 Yejhua ica on ica ome teicniu no ihuan ononamictij, niman no omic. Nion yejhua xocajteu iconeu. No ijqui opanoc on ica yeji teicniu. **22** Niman no ijqui opanoc inhuan on ocsequimej hasta ijqui otlanquej on chicomemej. Niman nochimej inhuan ononamictijquej, pero xoquipixquej inconeu. Niman quemaj on sihuatl no omic. **23** Xtechijli, ijcuac yolihiilos, ¿catlejhua itech tesihuau yes de yejhamej on chicomemej icniutin, pampa nochimej oquipixquej quen insihuau?

24 Jesús oquimijlij:

—Nenquijnehuaj pampa xnenuquimati tlinon quijtohuac on Yectlajcuilojli, nion nenquimati ica Dios nochí hueli quichihua. **25** Ijcuac on mimiquej yolihiisquej, xnonamictisquej nion on tatajtin quitemacasquej imichpochhuan para ma nonamictican. Ijcuacon nemisquej quen iilhuicactequitcahuans§ Dios yejhuan nemij ne ilhuicac. **26** Niman aman on ica yolisquej niman noquetztehuasquej on mimiquej, ¿xnenquimomachtianij iamau Moisés campa oquijcuiloj on tiotlajtojli ica Dios nemija ne ijtic on tlacotepajsojli, niman oquinotz Moisés? Oquijlij ijquin: “Nejhua niiDios Abraham, niman niiDios Isaac, niman niiDios Jacob.” **27** Dios oquijtoj ijquin saquin* ijcuac yomiquej

* **12:15** ¿por qué?; ¿tline? † **12:18** resucitarán; yolisquej ‡ **12:19** nada; coxtla § **12:25** ángeles de El * **12:27** después

yejhuamej on tlacamej, pero Dios xejhua inDios on mimiquej. Yejhua inDios on yoltoquej. Nemejhuamej yejhua in ica nenquipolohuaj sanoyej.

*Jesús oquijtoj catlejhua tlanahuatijli más hueyi quijtosnequi
(Mt. 22.34-40)*

²⁸ Ohuajlaj se temachtijquetl ican itlanhuatil Dios, niman yejhua ocac quen ijqui notencuicuiyaj Jesús. Yejhua ocac ica Jesús cuajli otlananquilij. Yejhua ica on temachtijquetl oquitlajtoltij:

—¿Catlejhua más hueyi quijtosnequi on tlanahuatijli de noch?

²⁹ Jesús oquinanquilij:

—On tlanahuatijli yejhuan más hueyi quijtosnequi yejhua in: “Xcaquican tlacamej yejhuan huajlehuan ne Israel. ToTeco Dios, yejhua san se. ³⁰ Xtlajsojtlā† on moTeco Dios ican noch moyojo, ican noch moalma, ican noch motlamachilis, niman ican noch mochicahualis.” Yejhua in, tej, tlanahuatijli yejhuan más hueyi quijtosnequi. ³¹ Niman on ica ome tlanahuatijli san yejhua in: “Xquintlajsojtlā ocsequimej no ijqui quen tejhua timotlajsojtlā.” Xitlaj ocse tlanahuatiltin yejhuan más hueyi quijtosnequi quen yejhua in ome.

³² On temachtijquetl ican itlanahuatil Dios oquijlij Jesús:

—Temachtijquetl, otiquijtoj cuajli. Melahuac, san se Dios nemí, niman xacaj ocse Dios. ³³ Tla tictlajsojtlasquej Dios ican noch toyoljo, ican noch totlamachilis, ican noch toalma niman ican noch tochicahualis, niman tla tictlajsojtlasquej noch tlacatl ijcon quen tejhamej tittlajsojtlaj, yejhua ica in más ticpactiaj Dios xquen itlaj huentli tictlatisquiaj noso itlaj ica titlamanasquiaj.

³⁴ Ijcuac Jesús oquitac ica cuajli oquinanquilij, oquijlij:

—San polihui achijtzin para timotemacas itech Dios para yejhua mitzman-daros.

Niman xoc yacaj onoyolchicau para itlaj quitlajtoltis.

*Jesús más hueyixticaj xquen David
(Mt. 22.41-46; Lc. 20.41-44)*

³⁵ Quemaj ijcuac Jesús temachtiaya ne ipan on hueyi tiopan, quijtohuaya:

—¿Tlica on temachtijquej ican itlanahuatil Dios quijtohuaj ica Cristo, yejhuan Dios oquitlapejpenij para temandaros, yejhua teconeu ne itech David? ³⁶ Sa no yejhua David oquimelajcrajtoj ican on Espíritu Santo:

NoDios oquijlij noTeco: “Xmotlali nican ipan noyecma hasta queman nim-itztalis tlayecanquetl intech on yejhuan motlahuelicnihuan.”

³⁷ Tla David ijcon oquijtoj ica Cristo yejhua iTeco, tla ijcon, tej, ¿quen ijqui Cristo hueli huejca teixhuiu‡ itech David?

Niman on tlacamej sanoyej miyequej quicaquiyaj ican pactli.

Jesús oquijtoj ica ma ca titohuicasquej quen nohuicaj on temachtijquej ican itlanhuatil Dios

(Mt. 23.1-36; Lc. 11.37-54; 20.45-47)

³⁸ Yejhua más quinmactiaya, oquimijlij:

—Xmotacan sa no nemejhuamej intech on temachtijquej ican tlanahuatijli yejhuan cuelitaj tlaquenhuejhueyac quistinemij. Yejhuamej cuelitaj quistinemisquej ican intlaquen huejhueyaquej para noch tlacatl quinemilis ica on temachtijquej ican itlanahuatil Dios sanoyej hueyixticaj. Niman cuelitaj ijcuac tlacamej quintlajpalohuaj neca ipan plaza. ³⁹ Yejhuamej no quinequij on más cuajcualtin sietas, ne ipan on tiopantin. Niman

† 12:30 ama ‡ 12:37 descendiente

quinequi quipiasquej on yejhuan más huejhueyixtoquej sietas ne campa il-huipan. ⁴⁰ Niman quinchancuiliaj on sihuacahualtzitzintin§, niman quichihuaj oración sanoyej huejcahuij para on tlacamej ma cuajli tlanemilican intech. Yejhuamej, tej, quiselisquej más hueyi castigo.

*Sen sihuacahualtzintli oquimacac Dios ihuentomin
(Lc. 21.1-4)*

⁴¹ Jesús yehuaticatca ne nisu iitech on caja ne ipan on hueyi tiopan campa contlaliaj on huentomin. Ompa oquintac on tlacamej concajticatcaj inhuentomin. Miyequej yejhuan ricos conxinijticatcaj miyec tomin. ⁴² No ohuajlaj se sihuacahualtzintli* mayanqui. Ocahuaco ome centavito, sanoyej achijtzin tomin. ⁴³ Quemaj Jesús oquinnotz on inomachtijcahuan, niman oquimijlij:

—Ica tlen melahuac nemechijlia ica yejhua in mayanqui sihuacahualtzintli más hueyi oquitlalij ihuentomin xquen nochimej ocsequimej yejhuan yocahuacoj intomin ipan on caja. ⁴⁴ Yejhuamej on yejhuan ricos quitemacaj san yejhua on tlen yoquinsobraroj. Pero in sihuatl, masqui mayanqui, oquitemacac nochi hasta on tlen ica nopenoltisquia.

13

*Jesús oquijtoj ica on hueyi tiopan xoxotonis
(Mt. 24.1-2; Lc. 21.5-6)*

¹ Ijcuac Jesús huajquistiaya ne ipan on hueyi tiopan, se on inomachtijcau oquijlij:

—Notemachtijcau, xquita. Sanoyej huejhueyimej on temej yejhuan ica tlachijchiutin on caltin niman sanoyej* huejhueyimej on caltin.

² Ijcuacon Jesús oquijlij:

—¿Tiquinta in huejhueyimej caltin? Nican xnocahuas nion se tetl tlapani ipan ocse pampa nochi quixoxotonisquej.

*Yejcos on tonaltin ijcuac tlajyohuisquej on tlacamej
(Mt. 24.3-38; Lc. 21.7-24; 17.22-24)*

³ Niman ijcuac yehuaticatca Jesús ne ipan on tepetl itoca Olivos ne ixpan on hueyi tiopan, Pedro, Jacobo, Juan niman Andrés san iseltimej oquitlajtoltijquej:

⁴ —Xtechijli, ¿quemanon ijcon nochihuas on tlajtlamach†, niman tlen tlama-jhuisojli noteititis ijcuac in tlajtlamach ye pehuas nochihuas?

⁵ Jesús opeu quinmachtia, oquimijlij:

—Xmotacan sa no nemejhuamej para ma ca yacaj mechcajgayahuas, ⁶ pampa miyequej huajlasquej yejhuan ican no Tocatzin cualijtojtiasquej: “Nejhua niCristo.” Niman yejhuamej quincajgayahuasquej miyequej.

⁷ ’Niman ijcuac nenzaquisquej ica oncaj guerras nisu niman no neca huejca, ma ca xmoyolpajsolocan. Tej, nochi on ica oncaj achtopa nochihuas. Pero ijcuac ijcon nochihuas, oc‡ xejhua tiempo para ipan in tlalticpactli tlatajtlamis. ⁸ On tequihuaquej nohuijsoquisquej inhuan ocsequimej tequihua-jquej, niman on países nohuijsoquisquej inhuan ocsequimej países, niman tlalolinis miyecan, niman onyas apistli. Pero in xica nochi yes, yej más onyas tlajyohuilistli.

§ **12:40** viudas; icnosihuamej * **12:42** viuda; icnosihuatl * **13:1** muy † **13:4** cosas ‡ **13:7** todavía; sanquen

9 'Xmotacan sa no nemejhuamej, pampa san nopampa semej nemejhuamej mechtemacasquej ne intech on tequihuajquej, niman semej nemejhuamej mechhuihuitequisquej ne ipan intiopanhuan on hebreos, niman semej nemejhuamej mechhuicasquej san nopampa ne intech on presidentes niman intech on reyes. Ijcuacon noca nentenojnotzasquej. **10** On cuajli tlajtojli yejhuan quitemaca temaquixtilistli achtoj noteijlis nochihuiyan, niman quemaj tlatlajtlamis. **11** Niman ijcuac mechajhuicasquej niman mechtemacasquej ne intech on tequihuajquej, ma ca sa xcomatztiacan tlinon nenquijtosquej, niman ma ca xnemilijtiacan. Xquijtocan tlinon Dios mechmacas para nenquijtosquej ipan on hora, pampa xnemejhuamej nentlajtosquej, yej tlajtos on Espíritu Santo. **12** Sequimej quintemacasquej imicnihuan para ma quinmictican pampa nechneltocaj. Niman sequimej tatajtin no ijqui quintemacasquej iconehuan para ma quinmictican pampa nechneltocaj. Niman on teconehuan noquetztehuasquej impan on tatajtin niman nanantin, niman no quintemacasquej para quinmictisquej. **13** Nochi tlacatl mechtlahuelitas san pampa nennechneltocaj. Pero on yejhuan quixicos nochi, on yejhua maquisas.

14'Nenquitasquej nochihuas yejhua on tlen xcuajli tlajtlacohua niman on tlen tetzinquixtia quitlalisquej ne campa xquitocarohua para nemis ijcon quen on tiotlajtojquetl Daniel oquijcuiloj. (Ijcuac timomachtis, xcajsicamatí sanoyej cuajli.) Quemaj on yejhuan nemisquej ne Judea, ma ontlatlacsacan§ neca ipan tepeyoj. **15** Niman on yejhuan ipan on tonajli nemis ne icuatipan on cajli, ma ca huajtemos para concuis itlaj ne icalijtic. **16** Niman on yejhuan nemis ne ipan imil ixtlahuacan, ma ca nocuepas ichan para concuis itlaj itlaquen. **17** Sanoyej xcuajli yes para on sihuamej yejhuan ipan on tonaltin yocanquej inconeu, niman on sihuamej yejhuan ipan on tonaltin tlachichitisquej. **18** Xchihuacan oración niman xtlajtlanilican Dios para ma ca nochihuas ijcuac sanoyej sehua, **19** pampa ijcuacon sanoyej miyec onyas tlajyohuolistli quen yejhuan xqueman oncaj desde ijcuac Dios oquitlalij in tlalticpactli, niman xqueman yes. **20** Pero toTeco xcahuilis para on tlacamej tlajyohuisquej miyec tonaltin pampa quimicnelis on yejhuan yoquintlapejpenij. Tla yejhua quincahuilisquia tlajyohuisquiaj miyec tonaltin, nochimej miquisquiaj.

21 'Niman tla ijcuacon yacaj mechijlis: "Xquitacan, nican nemi Cristo", noso "Xquitacan, ompa on nemi", ma ca xneltocacan. **22** Ma ca xneltocacan pampa huajlasquej on tlacajcayajquej yejhuan notenehuasquej Cristos noso tiotlajtojquej. Niman yejhuamej quichihuasquej on tlamajhuisoltin niman milagros para tecajcayahuasquej niman hasta on yejhuan Dios yoquintlapejpenij. Pero yejhuamej xhuelisquej quincajcyahuasquej on yejhuan Dios yoquintlapejpenij. **23** Xmotacan sa no nemejhuamej. Xquipia tlica* nenhuetzisquej pampa ye nemechmachiltijticaj nochi tlen nochihuas.

Jesús huajlas ocsejpa

(Mt. 24.29-35, 42-44; Lc. 21.25-36)

24 'Ijcuac yopanoquej on tonaltin ican tlajyohuolistli, xoc tlahuilos on tonaltzintli niman on metztli xoc petlanis. **25** On sitlalimej huajxinisquej ne ipan cielo, niman hasta on tlen cojtilijticaj on cielo nolinis.

26 'Niman quemaj nechitasquej nejhua yejhuan oninochiu Tlacatl, nihuajlas ipan on moxtli ican nohueyi poder niman ican nohueyilis. **27** Niman quemaj niquinhuajtitlanis on noilhuicactequitcahuant para quinsentlal-

§ **13:14** que corran * **13:23** por qué; tline † **13:27** mis ángeles: Angeles tequitij ne ilhuicac niman nican ipan in tlalticpactli.

isquej nochimej on yejhuan Dios yoquintlapejpenij nochihuiyan ipan in tlalticpactli.

²⁸ 'Xcajsicamatican in ejemplo itech on higuera. Ijcuac on imahuan seliaj, niman quisa on ixouyo, nemejhuamej nenquimatiij ica ye nisu xopantlaj.

²⁹ Sa no ijqui in, ijcuac nenquitasquej nochi yejhua in tlajtlamach ye nochijtcaj, xmatican ica ye nisu para nihuajnocuepas ocsejpa. ³⁰ Ica tlen melahuac nemechijlia ica nochi in tlajtlamach nochihuas ijcuac xe miquij on tlacamej yejhuan nemij ipan in tiempo. ³¹ On cielo[†] niman in tlalticpactli popolihuis, pero notlajtol xqueman popolihuis.

³² 'On tonajli niman on hora ijcuac tlatlalpolihuis xacaj quimati, nion yejhuamej on ilhuicactequitquej ne ilhuicac nemij, nion nejhua, yejhuan niiConeu Dios. Yej san noTajtzin quimati.

³³ 'Xmotacan sa no nemejhuamej! Xtlachixtiacan niman xchihuacan oración, pampa xnenquimatiij quemanon yejcos on tonajli. ³⁴ In sa no ijqui quen se tlacatl yejhuan cajtehua ichan niman ompaxalohua sanoyej huejca. Niman quinnajnahuatlehua on itlaquehualhuan, niman quinmajmaca tequitl, niman ocse tlacatl cajtehua ne quiahuatenco para ma tlajpia. ³⁵ Oquimijlij iteco on cajli: "Xtlachixtiacan, tej, pampa xnenquimatiij quemanon nejcos, tla tlayohua, noso tlajcoihuan, noso ijcuac tzajtzitoquej on caxtiltin§, noso ijcuac yotlanes." ³⁶ Xtlachixtiacan, tej, para ma ca san isicapan nihuajnocuepas ijcuac xnennechchixtoquej, niman nemechnextijtejcos nencochij. ³⁷ Niman in tlajtlamach tlen nemechijlia, nochi tlacatl niquijlia: "Ma tlachixtiacan."

14

Intlayecancahuan on hebreos quitejtemohuiliayaj quen ijqui quimictisquej Jesús

(Mt. 26.1-5; Lc. 22.1-2; Jn. 11.45-53)

¹ Ipan ome tonajli ilhuitl yes itoca pascua. Ipan on ilhuitl quicuaj pan yejhuan xquipia tlaxocolilistli*. Niman intlayecancahuan on tiopixquej niman on temachtijquej ican itlanahuatil Dios ichtaca† quitejtemohuiliayaj quen ijqui cajcayahuasquej Jesús para cajsiquej, niman quimictisquej. ² Pero quijtohuayaj ma ca ipan on ilhuitl para ma ca on tlacamej najcomanasquej.

Sen sihuatl oquitequilij ajhuiyalistli Jesús ipan itzontecon

(Mt. 26.6-13; Jn. 12.1-8)

³ Jesús nemiya ne Betania ichan Simón on yejhuan oquipatijca ijcuac palaniya inacayo. Niman ijcuac yehuaticatca ne ipan mesa, ohuajlaj se sihuatl. Ocuajquic se on quen itlaj botella yejhuan tlachijchiutli ican tetl fino. On botella tentiaya ican on ajhuiyalistli itoca nardo yejhuan sanoyej‡ patioj. Quemaj yejhua oquitlapan on botella para oquitlapoj, niman oquitequilij Jesús ipan itzontecon. ⁴ Pero sequimej yejhuan ompa nemiyaj ocualanquej, niman quinnojliayaj:

—¿Tlica§ oixpoliu in ajhuiyalistli? ⁵ In huelisquia nonamacasquia para notlanisquiaj tomin canaj sa no ijqui quen quitlani se tlacatl tla tequiti se xipan. Niman ica on tomin tiquimpalehuisquiaj on mayanquej.

Niman yejhuamej cajhuayaj on sihuatl.

‡ ^{13:31} On cielo oncaj ne campa oncaj ajacatl, moxtli, metztli, tonajli niman sitlalimej. § ^{13:35}
gallos * ^{14:1} levadura † ^{14:1} en secreto ‡ ^{14:3} muy § ^{14:4} ¿por qué?; ¿tline?

6 Pero Jesús oquimijlij:

—Xahuacan, ¿Tlica nenquipajsolohuaj? Yejhua in tlen yejhua nechchihuilia sanoyej cuajli. **7** Nemejhuamej nochipa nemotzajlan nenquimpasquej on mayanquej, niman san quemanon nenquinequisquej huelis nenquinchihuilisquej cuajli. Pero nejhua xnochipa nican nennechpiasquej nemohuan. **8** In sihuatl oquichiu hasta campa ohuel. Yejhua yonachtojhuij ica yocajhuiyalij notlalnacayo para nechtaltocasquej. **9** Ica tlen melahuac nemechijlia ica nochihuiyan ipan in tlalticpactli campa noteijlis on temachtilistli yejhuan quitemaca temaquixtilistli, no noteijlis on tlen oquichiu in sihuatl para yejhua quelnamiquisquej.

Judas oquinec quitemactilis Jesús

(Mt. 26.14-16; Lc. 22.3-6)

10 Ijcuacon Judas Iscariote, se on ica majtlactli huan ome inomachtijcahuan Jesús, oyaj intech intlayecancahuan on tiopixquej para oquintlajtlatohuilito quen ijqui huelis quinmactilis Jesús. **11** Ijcuac yejhamej ijquin ocacquej, yejhamej sanoyej opacquej, niman onotlajtolmacaquej para Judas quimacasquej tomin. Quemaj Judas opeu quitejtemohua quen ijqui quitemactilis Jesús.

On inomachtijcahuan Jesús otlatlajtlalijquej on tlacuajli para on ilhuitl

(Mt. 26.17-19; Lc. 22.7-13)

12 Ipan on achtoj tonajli ica on ilhuitl, ijcuac nocuaya on pan yejhuan xquipia tlaxocolilistli*, niman ijcuac quihuentlaliaj on borreguito, on inomachtijcahuan Jesús oquitlajtoltijquej:

—¿Canon ticnequi ma tihuiyan niman ma timitzcuectlalilitij on tlacuajli yejhuan ticusas ipan in ilhuitl pascua?

13 Quemaj oquintitlan omemej inomachtijcahuan, niman oquimijlij:

—Xhuiyan ne ipan on hueyican, niman ompa nenquinamiquisquej se tlacatl yejhuan quitqui se tzotzocojli ican atl. Xhuiyan ihuan. **14** Niman ne campa calaquis, xquijlican iteco on cajli: “On Temachtijquetl quijtohua: ¿canon oncaj on calijtic campa nicuas on tlajcuajli ipan on ilhuitl pascua inhuan nonomachtijcahuan?” **15** Niman yejhua mechititis se hueyi calijtic ye listede ipan on sa ica nochí caltlanepantli tlacpac. Ompa, tej, xchihiucan on tlacuajli.

16 On inomachtijcahuan oyajquej ne ipan on hueyican, niman ijqui oquinextijquej quen Jesús oquimijlij. Ompa, tej, ocuectlalijquej on tlacuajli para tlacuasquej ipan on ilhuitl pascua.

Jesús oquijtoj ica semej yejhamej on inomachtijcahuan quitemactilis

(Mt. 26.20-25; Lc. 22.14-23; Jn. 13.21-30)

17 Ijcuac yotlayohuac, oajsic Jesús inhuan on majtlactli huan omemej nomachtijquej. **18** Niman ijcuac nemiyaj ne ipan mesa tlacuayaj, Jesús oquimijlij:

—Ica tlen melahuac nemechijlia ica semej nemejhuamej nechtemactilis. Yejhua nican tlacuajticas nohuau.

19 Quemaj yejhamej sanoyej onajmanquej, niman opejquej quitlajtoltiaj Jesús sesentemej:

—¿Tlen manin nejhua?

Niman ocse no oquijtoj:

—¿Tlen manin nejhua?

20 Jesús oquimijlij:

* **14:12** levadura

—Semej nemejhuamej nenmajtlactli huan ome yejhuan quipatzohua on pan ipan on plato campa nejhua nicpatzohua on pan. ²¹ Nejhua yejhuan oninochiu Tlacatl nimquis ijqui quen quijtohua on Yectlajcuilojli, pero lástima para on yejhuan nechtemactilis. Más cuajli yesquia tla xqueman tlacatisquia.

Achtoj Santa Cena catca

(Mt. 26.26-29; Lc. 22.19-20; 1 Co. 11.23-26)

²² Chica tlacuajticatcaj, Jesús ocontilan on pan, niman oquimacac tlaxtlahuijli Dios. Niman quemaj ijcuac yoquitlatlapan, oquinmacac on inomachtijcahuan. Oquimijlij:

—Xcuacan. In pan yejhua quixnescayotia† notlalnacayo.

²³ Niman quemaj ocontilan on copa niman oquimacac tlaxtlahuijli Dios. Niman quemaj oquinmacac on inomachtijcahuan, niman nochimej oconiquej. ²⁴ Niman oquimijlij:

—In tlen nenconisquej noyesyo yejhuan ica notzimpehualtia on yencuic pacto, niman in noyesyo toyahuis para miyequej tlapojpolhuilos intlajtlacol.

²⁵ Ica tlen melahuac nemechijlia ica xoc queman niconis iyayo in uva hasta ipan on tonajli ijcuac niconis yencuic iyayo on uvas campa tlamandarohua Dios.

Jesús oquijtoj ica Pedro quinenequis yexpa

(Mt. 26.30-35; Lc. 22.31-34; Jn. 13.36-38)

²⁶ Niman ijcuac yoquinocuicatijquej se tlacuicajli, oyajquej ne ipan on tepetl itoca Olivos. ²⁷ Niman Jesús oquimijlij:

—Nemochimej‡ nemejhuamej nennechtalcahuisquej pampa on Yectlajcuilojli ijquin quijtohua: “Nicmictis on tlajpixqui, niman on borregos po-jpolihuisquej.” ²⁸ Pero ijcuac nejhua yoniyoliu niman yoninoquetzteu ipan notlalcon, nias ne Galilea nemoyecapan.

²⁹ Quemaj Pedro oquijlij:

—Masqui nochimej mitztlalcahuisquej, nejhua ca.

³⁰ Pero Jesús oquijlij:

—Ica tlen melahuac nimitzijlia ica aman ipan in tlayohua, ijcuac xe tzajtzi on caxtil§ ocpa, tejhuá tiquijtos yexpa ica xtinechixmati.

³¹ Pero yejhua quichihuaya canica, niman oquijtoj:

—Masqui hasta ijqui mohuan nimquis, nejhua xniquijtos ica xnimitzixmati.

Niman nochimej ijqui quijtohuayaj.

Jesús oquichiu oración ne Getsemaní

(Mt. 26.36-46; Lc. 22.39-46)

³² Quemaj oajsiquej ne campa itoca Getsemaní, niman ompa Jesús oquimijlij on inomachtijcahuan:

—Xmotlajtlalican nican chica nejhua nicchihuas oración.

³³ Quemaj Jesús más neca oquinhuicac Pedro, Juan niman Jacobo. Niman Jesús opeu sanoyej najmana niman noyolcocohua. ³⁴ Niman oquimijlij:

—Nejhua sanoyej ninajmana. Machisti niajmancam quis. Nemejhuamej nican xmocahuacan, niman xtlachixtiacan.

³⁵ Quemaj Jesús oyaj achijtzin más tlayecapan, niman onixacamantetlajcal ne ipan tlajli. Oquichiu oración tla huelisquia xquipanosquia on tlajyohuilstli yejhuan ipan huajlas. ³⁶ Niman oquijtoj:

† **14:22** simboliza ‡ **14:27** todos ustedes; nannochti, yemochimej, anochimej innochimej, emnochimej § **14:30** gallo

—NoTajzin, tejhua tihueli noch. Xnechmaquixti ican in tlajyohuilstli yejhuan nechcha, pero ma ca ma nochihua quen nejhua nicnequi, yej ma nochihua quen tejhua ticnequi.

³⁷ Quemaj oyaj ne intech on inomachtijcahuau, niman oquinnextito cochtoquej. Niman oquijlij Pedro:

—Simón, ¿ticochi? ¿Xtihueli titlachixticaj nion se hora?

³⁸ Niman oquimijlij:

—Xtlachixtiacan, niman xchihuacan oración para on diablo xmechtlatas para xtlajtlacocan. Melahuac, tej, nemoespíritu quinequij quichihuas cuajli, pero nemonacayo xcojic.

³⁹ Quemaj ocsejpa oyaj, niman oquichiu oración sa no ijqui oquijtoj.

⁴⁰ Quemaj ocsejpa ohuajlaj, niman oquinnextijtejcoc cochij on inomachtijcahuau, pampa sanoyej cochisnequiyaj. Niman yejhuatej xquimatiyaj tlilon quijlisquej. ⁴¹ Niman ica yexpa ohuajlaj intech, niman oquimijlij:

—¿Hasta aman nencochij niman nemosehuitoquej? Yoyejcoc on hora ijcuac nechtemactilisquej. Xquitacan. Nejhua yejhuan oninochiu Tlacatl nechtemactilisquej ipan inmahuan on tlajtlacolejquej. ⁴² Xmotelquetzacan. Tiahuij. Ye huajlau on yejhuan nechtemactilis.

Ocajsiquej Jesús

(Mt. 26.47-56; Lc. 22.47-53; Jn. 18.2-11)

⁴³ Jesús oc* tlajtojticatca ijcuac oyejcoc Judas, on yejhuan tehuan nopolhua intech on majtlactli huan ome nomachtijcamej. Niman yejhua cuajhuicaya miyec tlacatl yejhuan cuajquiya inespadas, niman sequimej cuajquiya cojtint†. Yejhuatej huajlayaj ican intlanahuatil on tlayecanquej tiopixquej, niman on temachtijquej ican itlanahuatil Dios niman on tlajtlajmatquej. ⁴⁴ Niman Judas, on yejhuan quiteactiliaya Jesús, ijquin oquimijlijca on tlacamej:

—On yejhuan nictencuas‡, yejhua Jesús. Xcajsican, cuajli xsasalocan niman xcuicacan.

⁴⁵ Quemaj Judas nimantzin oquinisihuij Jesús, niman oquijlij:

—Notemachtijcau.

Niman quemaj oquitencuaj. ⁴⁶ Quemaj oquimayauquej, niman ocajsiquej.

⁴⁷ Pero semej on yejhuan ompa nemiyaj ihuan Jesús oquxicopintiaj iespada niman oquinacastzontec se tlacatl itlaquehual on más hueyi tlayecanqui intech on tiopixquej. ⁴⁸ Quemaj Jesús oquimijlij on tlacamej:

—¿Onenhuaqlajquej nemejhuatej ican espadas niman cojin para nennechajsicoj quen yacaj nitlachtequetl yesquia? ⁴⁹ Nejhua mojmostla nemojhuan ninemiya para nemechmachiaya ne ipan ihueyi tiopan Dios. Nemechmachiaya niman xqueman onennechajsiquej. Pero onennechajsiquej para ma nochihua quen tlajcuilnesticaj ipan on Yectlajcuilojli.

⁵⁰ Quemaj on inomachtijcahuau ocajtejquej Jesús, niman ochojcholojquej.

Sen telpochtli ocholoj

⁵¹ Niman se telpochtli quitocaya Jesús san huejca. Niman san quitquia se sábana ica notlapachohtiaya. Niman ocajsiquej, ⁵² pero yejhua ocajteu on isábana niman ijqui oyaj tetzotzoltic.

Jesús nemiya ne imixpan on tetlacanonotzquej
(Mt. 26.57-68; Lc. 22.54-55, 63-71; Jn. 18.12-14, 19-24)

* ^{14:43} todavía; sanquen † ^{14:43} palos ‡ ^{14:44} al que yo besare; nicbesaros

⁵³ Quemaj ocuicaquej Jesús ne itech on más hueyi intlayecancau on tiopixquej. Niman ompa onosentlalijquej nochimej on tlayecanquej tiopixquej, niman on tlajtlajmatquej, niman on temachtijquej ican itlanahu-til Dios. ⁵⁴ Niman Pedro ocuitlapanhuijtiaj san huejca hasta queman oajsic ne ijtic iquiahuac on cajli yejhuan ical on yejhuan más hueyi intlayecancau on tiopixquej. Niman ompa yehuaticatca inhuan on policías yejhuan tlajpiayaj ipan on hueyi tiopan. Nototonijtictacaj ne itech on tlitl. ⁵⁵ Intlayecancahuan on tiopixquej niman nochimej on tetlacanonotzquej quitejtemohuiliayaj quen ijqui quiteixpanhuisquej Jesús para ijqui huelis quimictisquej, pero xquinextiliayaj. ⁵⁶ Niman miyec quitlajtolquetztehuil-ayaj Jesús, pero xsan se tlajtojli quipiayaj. ⁵⁷ Sequimej huajnotelquetzquej, niman opeu quiteixpanhuiyaj. Quijtohuayaj on tlen xmelahuac.

⁵⁸ Quijtohuayaj:

—Oticaquilijquej oquijtoj: “Nejhua nicxoxotonis ihueyi tiopan Dios yejhuan oquichijchijquej on tlacamej. Niman ipan yeyi tonajli ocse nicchijchihuas yejhuan xtlachijchiutli yes ican tlacamej.”

⁵⁹ Pero nochimej xsan se tlajtojli quipiayaj.

⁶⁰ Quemaj on más hueyixticaj tlayecanquetl intech on tiopixquej ohuajnotelquetz imixpan nochimej, niman oquitlajtoltij Jesús:

—¿Xitolaj ica titlananquilis? ¿Tlinon in quiteixpantilijtoquej yejhuatej in moca tejhua?

⁶¹ Pero Jesús xonahuat. Xtenanquiliaya. On más hueyixticaj tlayecanquetl intech on tiopixquej ocsejpa oquitlajtoltij, oquijlij:

—¿Tejhua tiCristo, tiiConeu on Dios yejhuan quiselia yectenehualistli?

⁶² Quemaj oquijtoj Jesús:

—Quemaj, nejhua. Niman nennechitasquej nejhua yejhuan oninochiu Tlacatl ninotlalis iyecmacopa Dios yejhuan quipia nochí poder. Niman no nennechitasquej nihuajlas ipan on moxtli yejhuan ne ilhuicac quisticaj.

⁶³ Ijcuacon on más hueyixticaj tlayecanquetl intech on tiopixquej sanoyej ocualan niman onotlaquencocotontiaj§, niman oquijtoj:

—¿Tlinon para tiquinnequij más teteixpantilijquej? ⁶⁴ Yonencaquej quen yocuijhuicaltij Dios. ¿Quen nenquinemiliaj nemejhuamej?

Quemaj yejhuatej nochimej oquitlajtlacolijquej para ma quimictican.

⁶⁵ Quemaj sequimej opejquej quichijchaj, niman oquixtlapachojoquej, niman ocuijhuitequej. Niman quijliayaj:

—Xtlajto tiotlajtojquetl. Xtechijli aquinon omitzmailij.

Niman quemaj on policías yejhuan tlajpiayaj ipan on hueyi tiopan ocuicaquej, niman ocuijhuitequej.

Pedro oquineneç Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ijcuac Pedro nemiya ne tlatzintlan ne quiahuac, ohuajlaj se sihuatl yejhuan quipalehuiya on más hueyi tlayecanquetl intech on tiopixquej.

⁶⁷ Niman ijcuac oquitac Pedro ompa nototonijtictacaj itech on tlitl, opeu quitlajtlata, niman oquijlij:

—Tejhua no tiquistinemiya ihuan Jesús yejhuan hualehua Nazaret.

⁶⁸ Pero Pedro oquineneç*, niman oquijtoj:

—Xniquixmati, nion nicmati tlinon on tiquijtohua.

§ 14:63 rompiendo sus vestiduras * 14:68 negó

Niman quemaj Pedro oquis ne quiahuac, niman oyaj ne quiahuatenco. Niman quemaj ompa otzajtzic se caxtil†. ⁶⁹ Niman on sihuatl ocsejpa ocontac, niman oquimijlij on yejhuan ompa nemiyaj:

—In tlacatl tehuan nopohua itech Jesús.

⁷⁰ Pero yejhua ocsejpa oquinene, niman achijzin más saquin‡ ocsejpa yejhamej on yejhuan ompa nemiyaj, oquijlijquej Pedro:

—Melauc, tejhua titehuan pampa tejhua tiuhalehua ne Galilea, niman ijqui titlajtlajtohua quen yejhamej.

⁷¹ Pedro opeu quijtohua:

—Ma nimiqui tla xniquijtohua on tlen melahuac. Nejhua xniquixmati on tlacatl aquin nenquijtohuaj.

⁷² Quemaj nimantzin otzajtziteu on caxtil ica ocpa. Quemaj Pedro oquel-namic on tlen Jesús oquijlijca: “Achtoj ijcuac xe tzajtzi on caxtil ocpa, tejhua tinechnenequis yexpa.” Niman ijcuac yejhua oquelnamic on tlajtojli opeu choaca.

15

Jesús ocuicaquej ixpan Pilato

(Mt. 27.1-2, 11-14; Lc. 23.1-5; Jn. 18.28-38)

¹ Ijcuac otlanes, intlayecancahuan on tiopixquej, on tlajtlajmatquej, on temachijquej ican itlanahuatil Dios niman nochimej on tetlacanonotzquej oquinemilijquej tlinon quichihuialisquej Jesús. Quemaj ijcuac yoquisalo-jquej, ocuicaquej niman quitemactilitoj ne itech on gobernador itoca Pilato.

² Niman Pilato oquitlajtoltij:

—¿Tejhua tiinrey on hebreos?

Jesús oquinanquilij:

—Quemaj, ijqui quen tejhua tiquijtohua.

³ Niman on tlayecanquej tiopixquej quiteixpanhuiayaj ican miyec tlajtlamach*. ⁴ Quemaj Pilato ocsejpa oquitlajtoltij, oquijlij:

—¿Xitlaj ica titlananquilis? Xquita quech san tlajtlamach ica mitzteixpan-huijtoquej.

⁵ Pero Jesús xitlaj† ica oquinanquilij. Yejhua ica Pilato otlamojcaitac, niman xquimatiya tlinon quinemilis.

Pilato oquitemacac Jesús para ma quimajmasohualtican ne ipan on co-jnepanojli

(Mt. 27.15-26; Lc. 23.13-25; Jn. 18.38—19.15)

⁶ Cada xipan ipan on ilhuitl itoca pascua, Pilato quinmacahuiliani on tlacamej se tlacatl yejhuan tzacuticatca yejhuan yejhamej quitlajtlaniyaj.

⁷ Niman nemija se tlacatl itoca Barrabás, tzacuticatca ihuan ocsequimej yejhuan inhuan onoquetztejca. Yejhamej otemicthijaj ijcuac onajcomancaj.

⁸ Quemaj on tlacamej ohualajquej, niman oquitlajtlanilijquej Pilato para ma quixti se yejhuan tzacuticaj quen quichihuani nochipa ipan on ilhuitl.

⁹ Niman Pilato oquinnanquilij:

—¿Nenquinequij para ma nemechmacahuili inRey on hebreos?

¹⁰ Pilato ijquin oquijtoj pampa yejhua quimatzticatca ica san ican in-nexicol on tlayecanquej tiopixquej oquitemactilijquej Jesús. ¹¹ Pero on tlayecanquej tiopixquej oquinchihualtijquej on tlacamej para ma tlajtlani-can Barrabás, niman ma ca ma quitlajtlanican Jesús. ¹² Quemaj Pilato oquintlajtoltij:

† 14:68 gallo ‡ 14:70 después * 15:3 cosas † 15:5 nada; coxtla

—¿Niman, tej, tlinon nicchihuas ihuan on yejhuan nemejhuamej nenquito-cayotiaj inRey on hebreos?

¹³ Quemaj yejhuamej oquijlijquej chicahuac ocsejpa:

—¡Xmajmasohaulti‡ ipan cojnepanojli§!

¹⁴ Pilato oquimijlij:

—¿Tlinon, tej, xcuajli oquichiu?

Pero yejhuamej ocsejpa más chicahuac otzajtliquej:

—¡Xmajmasohaulti ipan cojnepanojli!

¹⁵ Pampa Pilato quinequiya cuajli nocahuas inhuan on tlacamej, oquin-macahuilij Barrabás. Quemaj oquinahuatij on isoldados para ma cuijhuite-quican Jesús. Niman quemaj oquitemactilij para ma quimajmasohaultican ipan cojnepanojli.

On soldados ica onajahuiltijkej Jesús

(Mt. 27.27-31; Jn. 19.16)

¹⁶ Ijcuacon, on soldados ocuicaquej Jesús ne iquiahuac on palacio, ni-man oquinnotzquej nochimej on ocsequimej soldados. ¹⁷ Oquitlaliltijkej se tlaquentli morado, niman oquichijchijkej se huitzcorona, niman oquimaniltijkej ne ipan itzontecon. ¹⁸ Quemaj opeu quitlajpalohuaj, qui-jliyaj:

—¡Cuajli xnemi tejhua Rey intech on hebreos!

¹⁹ Quemaj ocuahuijhuitequej ican se ojlatl, oquichijchaquej, niman ono-tlacuenquetzquej ixpan sa no ijqui quen quimahuistiliasquiaj. ²⁰ Quemaj ijcuac ica yonajahuiltijkej, oquixtilijkej on tlaquentli morado, niman oquitlaliltijkej on itlaquen. Quemaj ocuicaquej para oquimajmasohaulti-toj* ne ipan cojnepanojli†.

Jesús oquimajmasohaultijkej ne ipan cojnepanojli

(Mt. 27.32-44; Lc. 23.26-43; Jn. 19.17-27)

²¹ Ijcuacon huajpanotiaya se tlacatl itoca Simón yejhuan chanej catca ne Cirene. Yejhua itaj catca Alejandro niman Rufo, niman ohualeu campa otequitito ipan imijla. Yejhua oquinahuatijkej para ma quitqui on ico-jnepanol‡ Jesús.

²² Ocuicaquej Jesús ne campa itoca Gólgota, más cuajli quijtosnequi Mi-catzon tecamat. ²³ Niman oquitequihuiltijkej on vino tlanelojli ihuan mirra. Pero Jesús xoquiselij. ²⁴ Quemaj oquimajmasohaultijkej§ ne ipan on cojnepanojli, niman yejhuamej onotlatlanquej para quitasquej cada se tlinon quitquis ica yejhua on itlaquen Jesús.

²⁵ Las nueve catca, ijcuac cualcan, oquimajmasohaultijkej Jesús ne ipan on cojnepanojli. ²⁶ Niman para nochimej ma quitacan tlica* miqui ne ipan on cojnepanojli, ijquin oquijcuilojquej: “Yejhua in inRey on he-breos.” ²⁷ Niman on omemej tlacamej tlachtequej oquinmajmasohaultijkej ipan cojnepanoltin ihuan Jesús, se iyecmacopa niman ocse iopochmacopa. ²⁸ Onochiu ijcon quen tlajcuilnesticaj ne ipan on Yectlajcuilojli. Quijtohua: “Otlapohualquis inhuan on xcuajcualtin.”

²⁹ Niman yejhuamej on yejhuan ompa quipanahuiyaj, cuijhuicaltiyaj, niman nocuahuihuixohuayaj pampa sa ica nahultiyaj. Quijliyaj:

‡ **15:13** crucificalo § **15:13** cruz * **15:20** lo llevaron a crucificar † **15:20** cruz ‡ **15:21** su cruz § **15:24** lo crucificaron * **15:26** por qué; tline

—¡Aj! Tejhua yejhuan ticxoxotonis ihueyitiopan Dios niman ipan yeyi tonajli ocsejpa tlamic ticchijchihuas, ³⁰ xmomaquixti sa no tejhua, niman xhuajtemo ipan on cojnepanojli.

³¹ Sa no ijqui intlayecancahuan on tiopixquej niman on temachtijquej ican itlanahuatil Dios sa ica nahuitiayaj Jesús. Yejhuatej quinojliayaj:

—Ocsequimej oquinmaquixtij, pero sa no yejhua xhueli nomaquixtia. ³² Tla yejhua Cristo yejhuan inRey on hebreos, ma huajtemo ne ipan on cojnepanojli para tiquitasquej niman ticneltocasquej ica melahuac yejhua inRey on hebreos.

Niman on yejhuan ompa pilcayaipan on cojnepanoltin no cuijhuicaltiayaj Jesús.

Omic Jesús

(Mt. 27.45-56; Lc. 23.44-49; Jn. 19.28-30)

³³ Ijcuac oajsic tlacualispan, otlayohuatiac nochihuiyan, niman tlajyohuatox catca hasta ijqui oajsic ipan yeyi hora ica tiotlac. ³⁴ Niman ipan on hora, Jesús chicahuac otzajtzic:

—Eloi, Eloi, ¿lama sabactani? —yejhuan quijtosnequi: NoDios, noDios, ¿tlica tinechtalcahuia?

³⁵ Sequimej, yejhuan ompa nemiyaj, ocacquej, niman oquijtojquej:

—Xcaquican. Quinotzticaj on tiotlajtojquetl Elías.

³⁶ Nimantzin se tlacatl onotlalojtiquis. Yejhua oquictic se tojtontli momoxic, niman oquipatzo ican xococ vino. Quemaj ocontlalij ipan sen acatl ica oconitij Jesús. Quemaj oquijtoj:

—Xcahuacan, ma tiquitacan tla huajlau Elías cuajtemohuis.

³⁷ Quemaj Jesús chicahuac otzajtzic, niman quemaj ohuajnotlamilij.

³⁸ Ijcuacon, on tlatzacuilitlaquentli yejhuan pilcaya ne ijtic on hueyi tiopan ohuajtlajcocoton† tlacpac hasta tlatzintlan. ³⁹ Ijcuac on capitán romano yejhuan ijcaya ixpan Jesús oquitac quen ijqui otzajtzic, niman quen ijqui omic, oquijtoj:

—Yejhua in tlacatl melahuac iConetzin catca Dios.

⁴⁰ No san huejcatzin sequimej sihuamej conitzticatcaj Jesús. Ompa nemiya María on yejhuan hualehua Magdala, Salomé, niman María on yejhuan inan Jacobo on yejhuan más teyic, niman José. ⁴¹ In sihuamej oyajquej ihuan Jesús, niman oquipalehuijquej ijcuac quistinemaya neca Galilea. No nemiyaj ompa osequimej sihuamej yejhuan ohualajquej ne Jerusalén ihuan Jesús.

Jesús ocahuatoj ne ijtic on ostol

(Mt. 27.57-61; Lc. 23.50-56; Jn. 19.38-42)

⁴² Ipan on tonajli viernes on hebreos cuectlaliayaj nochitlalimach para xtequitiyaj ipan on tonajli sábado. Ipan in tonajli viernes, ijcuac ye tlayohtitiaya, ⁴³ ohuajlaj se tlacatl, itoca José, yejhuan hualehua ne ipan on pueblo itoca Arimatea. Yejhua tehuan catca intech on tetlacaonotzquej ne ipan on hueyi tiopan, niman nochimej quitlacaítayaj. Yejhua no quichaya quemanon pehuas tlamandaros Dios. Yejhua onoyolchicau, niman oyaj itech Pilato para oquitlajtlanilij itlalnacayo Jesús. ⁴⁴ Pilato omojcatlachix ica yomic Jesús. Yejhua ica oquititlan se tlacatl para ma cuajhuica on capitán. Ijcuac on capitán ohuajlaj, Pilato oquitlajtoltij tla melahuac yomic Jesús. ⁴⁵ Quemaj ijcuac on capitán oquimachiltij ica melahuac yomic, Pilato ocahuilij José para ma quitemolti on itlalnacayotzin Jesús. ⁴⁶ Quemaj José ocou se tlaquentli‡ istac sanoyej§ patioj. Niman ijcuac oquitemohuij on itlalnacayo Jesús,

† 15:38 se partió ‡ 15:46 sábana § 15:46 muy

oquitejcuix ican on tlaquentli istac. Quemaj oquitocato ne ijtic se ostotl yejhuan oquichcuajquej ipan tetl. Niman ne itenco ocuejcueptiajquej se tetl sanoyej hueyi, niman ica oquitentzazu. ⁴⁷ María on yejhuan hualehua ne Magdala, niman María yejhuan inan José oquitatoj canon ocahuatoj itlalnacayotzin Jesús.

16

Jesús oyoliu niman onoquetzteu ipan itlalcon (Mt. 28.1-10; Lc. 24.1-12; Jn. 20.1-10)

¹ Ijcuac yopanoc on sábado, María on yejhuan hualehua ne Magdala, María inan Jacobo, niman Salomé ocojquej on ajhuiyalistli para conajhuiyalisquiaj on itlalnacayotzin Jesús. ² Huelipan cualcan, ipan on achtoj tonajli ipeuyan on semana, oyajquej ne itech on tlalcontli campa José oquitocato itlalnacayotzin Jesús. Ye huajquistiaya on tonatzintli. ³ Niman ijcuac xe ajsiaj, quinojiliayaj yejhuamej:

—¿Aquinon techejcuanylil on tetl ne itenco on tlalcontli?

⁴ Pero ijcuac ontlachixquej, oquitaquej ica on tetl yejhuan sanoyej hueyi ye cueptoc. ⁵ Quemaj ijcuac ocalajquitoj ne ijtic on ostotl yejhuan tlalcontli, oquitaquej ipan yecmatli se telpochtli. Ompa yehuaticaj niman tejcuixticaj ican se hueyac tlaquentli istac. Niman yejhuamej sanoyej onomotiquej.

⁶ Pero yejhua oquimijlij:

—Ma ca xmomojtican. Nenquitejtemohuaj Jesús on yejhuan hualehua Nazaret niman oquimajmasohualtiquej* ne ipan on cojnepanojli†. Pero aman yoyoliu‡ niman yonoquetzteu. Yehua xnican nemi. Xquitacan nican campa oquitlalijcaj itlalnacayotzin. ⁷ Aman xhuiyan, niman xquijlican inomachtijcahuan niman Pedro ica inyecapan yas ne Galilea, niman ompa nemejhuamej nenquitasquej ijcon quen omechijlij.

⁸ Quemaj nimantzin on sihuamej oquitlalcahuijquej on tlalcontli niman sa mojacacuecuetlacatiayaj. Xacaj oquijlijquej quen ijqui oquitaquej, pampa sanoyej nomojiayaj.

Jesús oquinotitij María on yejhuan hualehua ne Magdala (Jn. 20.11-18)

⁹ Niman ipeuyan on semana ijcuac Jesús oyoliu§ niman onoquetzteu ipan itlalcon, Jesús oquinotitij achtoj María on yejhuan hualehua ne Magdala, on yejhuan oquixtilijca chicomemej xcuajcualtin espíritus. ¹⁰ Niman yejhua oyaj, oquinmachiltito on inomachtijcahuan Jesús, yejhuan sanoyej* najmanayaj, niman chocayaj. ¹¹ Pero ijcuac ocacquej ica Jesús yoyoliu niman yonoquetzteu ipan itlalcon, niman ica María oquitac, yejhuamej xoquineltoquej.

Jesús oquinnotitij omemej on inomachtijcahuan (Lc. 24.13-35)

¹² Más saquint†, ocse tlamantic oquinnotitij omemej nomachtijquej chica yejhuamej yayaj ipan ojtli. ¹³ Yehuamej onocuepquej ne campa nemiyaj on osequimej, pero no xoquineltoquilijquej.

Jesús oquinnotitij on majtlactli huan se inomachtijcahuan (Mt. 28.16-20; Lc. 24.36-49; Jn. 20.19-23)

* **16:6** lo crucificaron † **16:6** cruz ‡ **16:6** resucitó; yoyol § **16:9** resucitó; oyol * **16:10**
muy † **16:12** después

¹⁴ Más saquin Jesús oquinnotitij on majtlactli huan se inomachtijcahuán chica tlacuajtictacaj. Ijcuacon oquimajhuac pampa xtlaneltocayaj niman ipampa inyoltechicahualis. Yejhuan xoquinnettocaquej on yejhuan oquitaquej achtoj ica oyoliu[‡] niman onoquetzteu ipan itlalcon. ¹⁵ Quemaj oquimijlij:

—Xhuiyan nochihuiyan imanyan in tlalticpactli, niman xquijlican nochitlacatl on cuajli tlajtojli yejhuan quitemaca temaquixtilistli. ¹⁶ On yejhuan quineltocas on cuajli tlajtojli yejhuan quitemaca temaquixtilistli niman nocuatequis nomaquixtis. Pero on yejhuan xquineltocas quitlajtlacolmacasquej. ¹⁷ Niman in tlamajhuisoltin quichihuasquej on aquin tlanelto-casquej. Quinquixtisquej on xcuajcualtin espíritus ica notoca. Tlajtosquej ican ocsequi yencuic tlajtojli. ¹⁸ Tla quinquitzquisquej cohuamej, noso tla conisquej on veneno, xquinchihuilis daño. Quintlalisquej inmahuan impan on cocoxquej niman quimpajtisquej.

Jesús otlejcoc ne ilhuicac

(Lc. 24.50-53)

¹⁹ Niman quemaj ijcuac Jesús yoquinnojnotz, Dios ocuicac ne ilhuicac campa onotlalij ipan iyecmatzin. ²⁰ On nomachtijquej opejquej tenojnotzaj niman temachtijtiyaj nochihuiyan. Niman toTeco quimpalehuiyaya, niman itechcopa on milagros yejhuan onochiu ijcuac temachtijtiyaj, quintitiaya on tlacamej ica intemachtil yejhua tlen melahuac.

[‡] **16:14** resucitó; oyol

SAN LUCAS ON CUAJLI TLAJTOJLI YEJHUAN SAN LUCAS OQUIJCUILOJ

San Lucas oquitlajcuilhuij Teófilo para quimatis on tlen melahuac itech ica on cuajli tlajtojli

¹ Miyequej tlacamej oquijcuilojquej quen ijqui onochiu on tlajtlamach^{*} opanoc totzajlan. ² Nochi oquijcuijloquej ijqui quen otechmachiltijquej on yejhuan oquiteixpantilijquej nochi on tlajtlamach tlen onochiu desde itzimpeuyan niman oquiteijlijquej tlajtol Dios. ³ Nejhua no cuajli oninomachtij nochi yejhua on tlajtlamach yejhuan onochiu desde ne itzimpeuyan. Yejhua ica, tejhuahueyixticaj Teófilo, nicuitia cuajli para nimitztlajcuilhuis niman nimitzmelajcajis ipan iyojhui on quen ijqui onochiu on tlajtlamach. ⁴ Ijcon, tej, cuajli ticmatis nochi on tlen melahuac itechica on tlajtlamach yejhuan omitzmachtijquej.

Sen ilhuicactequitquetl oquijlij Zacarías ica isihuau quitlacatilis iconeu

⁵ Nochi on tlajtlamach opeu ijcuac rey Herodes tequihua catca ipan iregión Judea. Ipan on tonaltin nemiya se tiopixqui itoca catca Zacarías, yejhuan tehuan nopohuaya ipan igrupo on tiopixquej Abías. Isihuau Zacarías itoca catca Elisabet. Yejhua on huejca teixhui† catca itech on tiopixqui itoca Aarón. ⁶ On omemej yolchipajquej catcaj ixpan Dios niman quitlacamatijay nochi on itlanahuatilhuan niman on tlen oquijtoj toTeco, niman ijcon, tej, xacaj hueliya itlaj ica quintlajtlacolmacaya. ⁷ Pero xquipiayaj inconehuan, pampa Elisabet tetzacatl catca, niman sanoyej‡ ye huehuentzitzintin catcaj.

⁸ Ijcuac oyejcoc on tonaltin para tequitis on grupo campa Zacarías nopohuaya, yejhua otequit ixpan Dios pampa yejhua tiopixqui catca. ⁹ Oquipixquej se costumbre intzajlan on tiopixquej ica quitlapejpeniayaj se tiopixqui san ican suerte para calaquiya niman quitlatiaya on xochicopajli ipan ihueyi tiopan toTeco. ¹⁰ Chica quitlatiaya on xochicopajli, nochi on tlacamej quichijtacatcaj oración ne quiahuac ixpan on hueyi tiopan. ¹¹ Quemaj se ilhuicactequitquetl§, yejhuan toTeco ocuajtitlan, ohuajnonextij nisu iitech Zacarías. On ilhuicactequitquetl ijcaticatca iyecmacopa on tlaixpan* campa notlatiani on xochicopajli. ¹² Ijcuac Zacarías oquitac on ilhuicactequitquetl, xoc quimatiya quen quichihuas niman sanoyej onomojtij. ¹³ Pero on ilhuicactequitquetl oquijlij:

—Ma ca xmomojti, Zacarías. Dios yocac mooraciones, niman mosihuau Elisabet quitlacatilis ioquichcone. Tictocayotis Juan. ¹⁴ Sanoyej tipaquis niman no miyequej paquisquej ipampa itlacatilis mocone. ¹⁵ Ijquin nochihuas, pampa yejhua hueyixtias ixpan Dios. Yejhua xconis vino nion itlaj se yejhuan tetlahuantij, niman on Espíritu Santo noch ica quiyecanas desde ijcuac tlacatis. ¹⁶ Yejhua quichihuas para miyequej tlacamej yejhuan teconehuan itech Israel ma nocuepacan niman ma quitlacamatican toTeco yejhuan inDios. ¹⁷ Yejhua in Juan yas iyecapan toTeco ican on iyolchicahualis niman on poder yejhuan oquipix on tiotlajtojquetl Elías. Yas iyecapan toTeco, niman quichihuas para on tatajtin ma quintlajsojtlacan inconehuan, niman no quichihuas para on yejhuan xquitlacamatij Dios ma quipiacan on

* 1:1 cosas † 1:5 descendiente ‡ 1:7 muy § 1:11 ángel: Angeles tequitij ne ilhuicac niman nican ipan in tlalticpactli. * 1:11 altar

tlamatquilitli[†], ijcon quen on yejhuan cuajcualtin tlacamej quipiaj. Ijcon quinmelajcatlalis on tlacamej para huelisquej quiselisquej on toTeco.

¹⁸ Pero Zacarías oquitlajtoltij on ilhuicactequitquetl:

—¿Quen ijqui nicmatis ica on tlen otiquijtoj melahuac? pampa nejhua sanoyej ye nihuehuentzin niman nosihuau no ye lamajtzin.

¹⁹ Niman on ilhuicactequitquetl oquinanquijil:

—Nejhua niGabriel, niman niitequitcau Dios. Dios, tej, onechajtitlan ma nimitznotzaqui para nimitzijlis in cuajli tlajtoji. ²⁰ Pero xoticneltocac tlinon onimitzijlij. Yejhua ica tinontias. Xhuelis titlajtos hasta ijcuac tlacatis moconeу.

²¹ On tlacamej yejhuan quichixticatcaj Zacarías ne quiahuac xoquimatzquej tlinon quinemilisquej, pampa yejhua yohuejcajca ica xhuajquisaya ne ijtic on hueyi tiopan. ²² Niman ijcuac Zacarías ohuajquis, xhueliya quinnojnotzaya. Yejhua ica on tlacamej ocajsicamatquej ica yejhua oquitac itlaj tetlatlachaltlistli yejhuan quen itemicpan ne ijtic on hueyi tiopan. Niman yejhua, tej, sa quinmanotzaya, pampa xoc hueliya tlajtohuaya.

²³ Ijcuac otlanquej on tonaltin ica Zacarías tequiti ne ipan on hueyi tiopan, oquis niman oyaj ichan. ²⁴ Más saquin[‡], Elisabet on isihuau ones ica ye quipia iconeu, niman macujli metztli oniyan ne ichan. Ijquin quinemiliaya: ²⁵ “Aman toTeco ijquin onechchihuilij ican iteicnelilis[§] para xoc nipinahuas imixpan on tlacamej.”

Sen ilhuicactequitquetl oquijlij María ica quitlacatilis se conetzintli

²⁶ Ijcuac Elisabet ye quipiaya iconeu chicuasen metztli, Dios ocuajtitlan on ilhuicactequitquetl* Gabriel ipan se pueblo de Galilea itoca Nazaret. ²⁷ Dios oquititlan para conotzas se ichpochtli, yejhuan xe yacaj tlacatl quinix-machtiaya, itoca María. María yoquitlalijca compromiso para nonamictis ihuan se tlacatl itoca José yejhuan sa huejca teixhui[†] itech David. ²⁸ On ilhuicactequitquetl oquinishuij María niman oquijlij:

—Nimitztlajpalohua. ¡Dios yomitziocliu! On toTeco mohuan nemi. Dios más omitztiocliu xquen nochimej on osequimej sihuamej.

²⁹ Pero ijcuac María ocac on ilhuicactequitquetl, oquimojcacac itlajtol, niman sa no yejhua quinotlajtoliaya tlica[‡] ijquin quitlajpalohuaya. ³⁰ Pero on ilhuicactequitquetl oquijlij:

—Ma ca xmomojti María, pampa Dios yomitziocliu. ³¹ Aman ticanas moconetzin niman tictlacatilis se oquichconetl. Niman tictocayotis Jesús.

³² Yejhua hueyixtias niman itoca yes teConeu itech on yejhuan más hueyixticas Dios. Niman Dios toTeco quitlalis para Rey yes niman quipias on tequihuajyotl yejhuan ihuejcataj David oquipix. ³³ Yejhua nochipa tequihuaj yes ipan on país de Israel, niman on ica tequihuaj yes xsan ontlamis.

³⁴ Quemaj María oquitlajtoltij on ilhuicactequitquetl:

—¿Quen ijqui huelis nochihuas yejhua in, pampa nejhua xe yacaj tlacatl ihuan ninemi?

³⁵ Niman on ilhuicactequitquetl oquijlij:

—On Espíritu Santo mopan huajlas, niman ipoder on yejhuan más hueyixticas Dios quichihuas se milagro tejhua mopan. Yejhua ica on conetzintli yejhuan tlacatis chipajtias niman cuitisquej iConetzin Dios. ³⁶ Xquelnamiqui moprima Elisabet yejhuan quijtohuiliaj tetzacatl. Aman ye quipia chicuasen

† ^{1:17} sabiduría ‡ ^{1:24} después § ^{1:25} su misericordia * ^{1:26} ángel † ^{1:27} descendiente
‡ ^{1:29} por qué; tline

metzli ica conehua masqui yejhua lamajtzin. ³⁷ In ijquin nochihuas pampa xitlaj§ oncaj yejhuan Dios xhuelis quichihuas.

³⁸ Niman ijcuacon María oquijtoj:

—Nejhua niitequichihuilijcau toTeco. Ma Dios, tej, nechchihuili on tlen otinechijlij.

Quemaj on ilhuicactequitquetl oyaj.

María oquinotz Elisabet

³⁹ Ipan on tonaltin María ocajsic iojhui. Nimantzin oyaj ipan on tepemej hasta oajsic ipan se pueblito yejhuan oncatca ne Judea. ⁴⁰ Ijcuac oajsic ipan on pueblo, ocalac ichan Zacarías niman oquitlajpaloj Elisabet. ⁴¹ Niman ijcuac Elisabet ocac itetlajpalol María, on iconetzin Elisabet onolinij ijtic, niman on Espíritu Santo noch ica oquiyecan Elisabet. ⁴² Quemaj Elisabet oquijtoj chicahuac, niman oquijlij María:

—Dios más omitziochiu xquen nochimej on sihuamej, niman no yoquiti-ochiu on conetzintli yejhuan tictlacatilis. ⁴³ ¿Aquin nejhua, tej, ica tejhua yejhuan inan noTeco otihuajlaj para otinechnotzaco? ⁴⁴ Nimantzin ijcuac otinechtalajpaloj, noconetzin onolinij ican pactli nican nojtic. ⁴⁵ Dios mitz-tiochihua para tejhua yejhuan oticneltocac ica nochihuas on tlen toTeco oquijtoj.

⁴⁶ Quemaj María oquijtoj:

Noalma cueyilia toTeco,

⁴⁷ niman noyojlo nopactia itech Dios yejhuan noTemaquixtijcau,

⁴⁸ pampa yejhua onechelnamic nejhua yejhuan xnihueyixticaj itequichihuilijcau. Niman desde aman nochimej nechtocayotisquej nitlatiochicas-ihuatl.

⁴⁹ Ijcon nochihuas pampa on huehueyi tlajtlamach yejhuan tohueyi Dios onechchihuilij. Yejhua yolchipahuac.

⁵⁰ Nochipa quipialis teicnelilistli* nochimej yejhuan quitlacaitasquej.

⁵¹ Yejhua oquiteititij ipoder ican on tlen oquichiu. On yejhuan nohueyimatij niman san tlamach xcuajli quinejnemiliaj, Dios xquincahuilia ma quichihuacan tlen quinequij.

⁵² On tequihuajquej oquinquixtij ne campa tequihuajtiticatcaj niman oquin-mamacac hueyillistli on yejhuan yolyemanquej.

⁵³ Yejhuan apismiquiyaj oquinmacac noch i tlen cuajli niman xitlaj† oquin-mamac on yejhuan ricos.

⁵⁴ Oquipalehuij on país itoca Israel yejhuan itequipanojcau. Yejhua xoquel-cau quipialis teicnelilistli on país,

⁵⁵ ijcon quen oquintlalilij ipan ipromesa on toachtojtajhuan, Abraham niman noch quech teconehuan para nochipa.

⁵⁶ María onocau ihuan Elisabet canaj yeyi metzli, niman quemaj onocuep para ichan.

Juan on tlacuatequijquetl otlacat

⁵⁷ Oajsic on tonajli para Elisabet quitlacatilis iconetzin, niman oquitla-catilij se oquichconetl. ⁵⁸ Quemaj inisiuchantlacaj‡ niman ichanecahuan§, ijcuac ocacquej quen toTeco sanoyej cuajli oquitlachiu, paquiyaj ihuan.

⁵⁹ Quemaj ipan chicueyi tonajli oyajquej para oquitlalilito se nescayotl itoca circuncisión ipan inacayo. Niman quinequiyaj quitocayotisquej Zacarías quen itaj, ⁶⁰ pero inan oquijtoj:

§ 1:37 nada; coxtla * 1:50 misericordia † 1:53 nada; coxtla ‡ 1:58 vecinos de ella § 1:58 parientes de ella

—Ca. Itoca yes Juan.

⁶¹ Niman oquijlijquej:

—¿Tlica ijcon itoca yes? Ipan mochanecahuan* xacaj nemí yejhuan ijcon itoca.

⁶² Quemaj oquimanotzquej itaj on conetzintli para quimatisquej quen ijqui yejhua quinequi quitocayotis. ⁶³ Niman itaj oquitlajtlan se amatl para ompa quicuilos quen itoca yes on iconeu. Niman ijquin oquijcuiloj: “Itoca Juan.” Niman nochimej omojcatlachixquej yejhua ica in. ⁶⁴ Nimantzin Zacarías ohuel otlahtoj ocsejpa, niman opeu quiyectenehua Dios. ⁶⁵ Yejhua ica in, nochimej on ichantlacaj otlamojcaitaquej. Niman nochihuiyan ipan on tepemej yejhuan oncaj ipan on iregión Judea noteijliaya on tlen onochiu. ⁶⁶ Niman nochimej on yejhuan intech on machiyaya yejhua on, pehuayaqlanemiliayaj niman ijquin quinotlajtoltiayaj:

—¿Manin tlinon itequiu yes in oquichconetl? Melahuac ipoder toTeco ipan oncaj.

Zacarías oquiteijlij on tlen Dios oquijlij

⁶⁷ On Espíritu Santo nochí ica oquiyecan Zacarías itaj on oquichconetl niman ica on yectlajtojli yejhuan Dios oquimacac, oquijtoj:

⁶⁸ Ma ticueyilican toTeco Dios, on yejhuan inDios on hebreos pampa yotechnotz niman yotechmaquixtij.

⁶⁹ Yotechmacac se hueyi Temaquixtijquetl yejhuan huejca teixhuiu† itech David yejhuan itequipanojcau.

⁷⁰ Ye huejcahui ijquin oquijtoj intechcopia on iyectiotlajtojcahan

⁷¹ ica yejhua techmaquixtis intech on totlahuelicnihuan niman itech inpoder nochimej on yejhuan techtlahuelitaj.

⁷² Ijcon oquichiu para techmacas on teicnelistli‡ yejhuan oquimprometerohuijlij toachtojtajhuan, niman xquelcahua ichipahuac pacto.

⁷³ In yejhua on promesa yejhuan Dios oquiprometerohuiliij itech on toachtojtaj Abraham

⁷⁴ ica techmanahuis intech on totlahuelicnihuan, para xican nemojtijli tictequipanosquej

⁷⁵ ican chipahualistli niman quen cuajli para ticchihuasquej nochí tonaltin ipan tonemilis.

⁷⁶ Niman tejhua, noconetzin Juan, mitztocayotisquej itiotlajtojcau on más hueyixtaj Dios, pampa tejhua tias iyecapan on toTeco para ticuectalalijtias iojhuihuan.

⁷⁷ Tictemachiltis ica quiselisquej temaquixtilistli ijcuac Dios quintlapojpolhuilis intlajtlacolhuan.

⁷⁸ ToDios quintlapojpolhuiya pampa sanoyej quimicnelia. Ican iteicnelilis quinhuajtitlanilis on Temaquixtijquetl yejhuan hualehua ne ilhuicac.

⁷⁹ Niman on Temaquixtijquetl quinmaquixtis yejhuan tlajtlacohuaj niman yejhuan nemij ipan miquilistli. Yejhamej no quinmacas yolseshuolistli.

⁸⁰ Niman on oquichconetl noscaltiaya niman chicajtiaya itech Dios. Niman yejhua ochantic ne campa tlapatlaco hasta ipan on tonajli ijcuac yejhua onoteititij itech on tlacamej yejhuan chantij ipan on país de Israel.

* ^{1:61} tu familia † ^{1:69} descendiente ‡ ^{1:72} misericordia

2

*Otlacat Jesucristo
(Mt. 1:18-25)*

¹ Ipan on tonaltilin, Augusto yejhuan más hueyi tlayecanquetl catca ipan on hueyi país Roma, otlanahuatij para nochil on ichantlacaj* ipan on país ma quitemacatij intoca ne ipan on censo. ² Yejhua in achtoj censo oquichichiquej ijcuac Cirenio tequihuaj catca ipan on iregión Siria. ³ Ipan on tonaltilin nochil tlacatl yaya cada se ipan ipueblo campa nemiya san secan ichanecahuan† para ompa onijcuijoto ipan on censo. ⁴ José huejca teixhui‡ catca itech David. Yejhua ica oquis ipan on pueblo itoca Nazaret, yejhuan oncaj ipan on iregión Galilea, niman oyaj ne ipan on pueblo itoca Belén, yejhuan oncaj ipan on iregión Judea campa otlacatca David. ⁵ Yejhua oyaj ne Belén para onijcuijoto ipan on censo ihuan María yejhuan quipiaya compromiso para ihuan nonamictis. María, tej, ye quipiaya iconeu. ⁶ Niman chica nemiyaj ne Belén, oyejcoc on tonajli para María quitlacatilis iconetzin. ⁷ Ompa oquitlatlapachoj ican tlaquentli§ niman oquitecac ipan se canoa, pampa xoncatca ompa campa yejhamej nosehuisquej ijtic on mesón campa nosehuij on nejnenquej.

Sen ilhuicactequitquetl oquimijlij semej tlajpixquej ica inTemaquixtijcau yotlacat

⁸ Nisiu ne Belén nemiyaj sequimej tlajpixquej yejhuan nochil tlayohua nocahuayaj ne ipan on tepetl campa quintlajpiayaj inborreguitos. ⁹ Sen ilhuicactequitquetl* yejhuan toTeco Dios ocuajtitlan oquinhuajnotitij. Niman ihueyilis toTeco Dios quen se tlahuijli opetlan inyehualican on tlajpixquej. Ijcuacon, yejhamej sanoyej† onomojtijquej. ¹⁰ Pero yejhua on ilhuicactequitquetl oquimijlij:

—Ma ca xmomojtican, pampa onihuajlaj para nemechmachiltico se cuajli tlajtojli, yejhuan huelis quipactis nochil tlacatl. ¹¹ Aman ne ipan ipueblo David otlacat nemoTemaquixtijcau. Yejhua Cristo on toTeco. ¹² Niman para nenquixmatisquej, nemejhamej nenquinextisquej on conetzintli tetejcuixticaj ican se tlaquentli‡, niman onoc ipan se canoa.

¹³ Quemaj nimantzin ne itech on ilhuica tequitquetl ohuajnonextijquej sanoyej miyequej ocsequimej ilhuicactequitquej yejhuan ohualejquej ne tlacpac ilhuicac. Yejhamej cueyiliayaj Dios niman quijtohuayaj:

¹⁴ ¡Hueyixtica Dios ne ilhuicac, niman nican ipan tlalticpactli ma onya yolsehuistli intzajlan on tlacamej yejhuan quipiaj tetlajsojtlalistli§!

¹⁵ Quemaj ijcuac on ilhuicactequitquej onocuepquej ne ilhuicac, on tlajpixquej opeu quinojliaj ihuan ocsequimej:

—Tiahuij, tej, ne Belén, niman ticontasquej on tlen onochiu yejhuan otechmachiltij on toTeco.

¹⁶ Nimantzin oyajquej niman oquinextitoj María niman José, niman on conetzintli onoya ipan se canoa campa tlacuaj on yolquej. ¹⁷ Ijcuac oquitaquej, oquintlajtlajtohuilijquej on tlen on ilhuicactequitquetl oquimijlij itech ica yejhua on conetzintli. ¹⁸ Niman nochimej yejhuan oquincaquej otlamojcacaquej ica on tlen on tlajpixquej quijtohuayaj. ¹⁹ Pero María oquejeu ipan iyojlo nochil yejhua in tlajtojli niman sanoyej ica tlanemiliaya. ²⁰ On tlajpixquej onocuepquej ne campa oquincaquej on inborreguitos. Niman

* 2:1 paisanos † 2:3 familias de ellos ‡ 2:4 descendiente § 2:7 pañales * 2:9 ángel:
Angeles tequitij ne ilhuicac niman nican ipan in tlalticpactli. † 2:9 mucho ‡ 2:12 pañales
§ 2:14 amor

chica nocuepayaj, ocueyilijquej niman oquiyectenejquej Dios ipampa nochí on tlen ocacquej niman oquitaquej. Nochí onochiu quen on ilhuicactequiquetl oquimijlij.

On conetzintli Jesús ocuicaquej ne ipan hueyi tiopan para ocaxcatitoj on toTeco Dios

²¹ Ipan chicueyi tonajli oquitlalilijquej on nescayotl itoca circuncisión ipan inacayo on conetzintli niman oquitocayotijquej Jesús. Oquitocayotijquej ica sa no yejhua on tocayotl yejhuan on ilhuicactequiquetl* oquijlij María ijcuac oc† xe nesiya tla quipia iconeu.

²² Ijcuac yopanoc on tonaltin ica José niman María yonochipajquej ijcon quen tlanahuatia itlanahuatil Moisés, yejhuamej ocuicaquej Jesús ne Jerusalén niman oquiyaxcatijquej† on toTeco Dios. ²³ In oquichijquej pampa ipan itlanahutil on toTeco ijquin tlajcuilolnesticaj: “Nochí yejhuan yen-cuiyotl oquichconetl ma quiyaxcatican on toTeco.” ²⁴ Niman no oyajquej para oquihuentlalitoj ome cocotetzitzintin noso ome palomas ijcon quen tlanahuatia itlanahuatil toTeco.

²⁵ Ipan on tonaltin chantiya ne Jerusalén se tlacatl itoca Simeón. Yejhua cuajli tlacatl catca, niman cuajli quitlacaitaya Dios. Yejhua quichaya que-manon tlacatis on yejhuan quinyoltlalis ichantlacaj§ on país itoca Israel, niman Espíritu Santo nemiya ipan. ²⁶ Niman on Espíritu Santo oquimachilti-ja ica yejhua xmiquis hasta quitas on Cristo yejhuan toTeco cuajtitlanis.

²⁷ Niman yejhua on Espíritu Santo ocuicac Simeón para oyaj ipan on hueyi tiopan. Niman ijcuac José niman María ocuicaquej on conetzintli Jesús ne ipan on hueyi tiopan para oquichihuilijquej tlinon on tlanahuatijli tlanahuatia, ²⁸ Simeón oquinapaloj on conetzintli niman oquihueyilij Dios, oquijtoj:

²⁹ NoTeco, aman ye huelis tinechcahuilis para ma nimiqui ican yolsehuilistli, pampa aman yoticchiu tlinon otinechprometerohuilij nejhua nimote-quipanojcau.

³⁰ Aman ican nixtololojhuan yoniquitac on Temaquixtijquetl yejhuan yotic- uajtitlan

³¹ niman yejhuan yotictlalij ixpan nochí tlacatl.

³² Yejhua quen tlahuijli yejhuan quitlahuilhuis on ojtli itech Dios para on yejhuan xhebreos niman quinmacas hueyilistli mocone huan he-breos.

³³ José niman inan Jesús sanoyej oquintlatlachaltij on tlen Simeón quij-tohuaya itech ica on conetzintli. ³⁴ Quemaj Simeón oquintiochiu, niman oquijlij María:

—Xquita, Dios oquitlalij in conetzintli ipan itequiu. Miyec tlacatl yejhuan chanej ipan in país de Israel ixpolihuisquej pampa xquineltocasquej mo-coneū, niman miyec tlacatl no quiselisquej on nemilistli yejhuan para nochipa pampa quineltocasquej. Niman yejhua quiteititis on ojtli para calaquisquej ne itech Dios, pero miyequej yej quixnam quisquej. ³⁵ Niman ijcon miyequej quiteititisquej quen quinemiliaj ipan inyojlo. Niman para tejhua, nochí yejhua in quen itlaj espada yes yejhuan quitzopinis moalma.

³⁶ No ompa nemiya se sihuatl tiotlajtojquetl, itoca Ana, yejhuan itaj catca Fanuel, yejhuan quisa ipan on ihuej cachanej* Aser. Yejhua sanoyej lamajtzin catca. Ijcuac ononamictijca san chicome xipan onen ihuan ihuehuentzin. ³⁷ Niman quemaj yejhua cahuajli catca hasta ye quipiaya

* ^{2:21} ángel † ^{2:21} todavía, sanquen ‡ ^{2:22} entregaron § ^{2:25} paisanos * ^{2:36} familia

napoajli† huan nahui xipan. Xcaman quisaya ipan on hueyi tiopan, yej quitequipanohuayaj toTeco ican tonajli niman yehuajli, ican nesahuajli niman ican oraciones. ³⁸ Niman chica Simeón tlajtlajtohuaya ihuan María niman José, yejhua oquinnisihuij niman opeu quimaca tlaxtlahuijli Dios. Niman quemaj opeu quinnojnotza yejhua ica on conetzintli Jesús nochimej on yejhuan no quimachayaj on temaquixtijquetl para quinmanahuis on hebreos.

Jesús ihuan itajhuan onocuepquej para Nazaret

³⁹ Quemaj ijcuac José niman María yoquichijquej nochi on tlen tlanahuatia on itlanahuatil toTeco, onocuepquej para oyajquej ipan on impueblo itoca Nazaret yejhuan oncaj ne ipan iregión Galilea. ⁴⁰ Niman on oquichconetl Jesú noscaltiaya niman cajsitiaya más chicahualistli niman miyec tlamatquilistli‡, niman quiseliaya itlatiochihualis Dios.

On oquichconetl Jesú nemiya ne ipan on hueyi tiopan

⁴¹ Cada xipan itajhuan Jesús yaya ne Jerusalén para companohuayaj on ilhuitl itoca pascua. ⁴² Niman ijcuac Jesús ocajxitij majtlactli huan ome xipan, oyajquej Jerusalén ijcon quen quichihuayaj. ⁴³ Ijcuac otlan on ilhuitl niman nochi tlacatl nocuepaya para ichan, on oquichconetl Jesú onocau ne Jerusalén. Pero inan niman itaj xoquimatquej ica yejhua onocau. ⁴⁴ Yejhuatej quinemiliayaj ica Jesús yaya intzajlan on tlacamej. Yejhua ica ijcuac se tonajli yonejnencaj, quemaj opeu quitejtemohuaj intech on ichanchanecahuan niman intech iteixmatcahuan. ⁴⁵ Pero ijcuac xoquinextijquej, onocuepquej ne Jerusalén para ompa oquitejtemotoj.

⁴⁶ Niman ipan yeji tonajli saquin§ oquinextitoj ne ipan on hueyi tiopan. Yehuaticatca intzajlan on huejhueyixtoquej temachtijquej yejhuan quitemachtiaj itlanahuatilhuan Dios. Ompa quincacticatca niman no miyec tlamach quitlajtoltiayaj. ⁴⁷ Niman nochimej yejhuan caquiyaj quipacaitayaj ica on cuajli itlamatquilis* yejhuan ica tenanquiliaya. ⁴⁸ Ijcuac itajhuan oquitaquej, opacatlachixquej, niman inan oquijlij:

—Noconetzin, ¿tlica† ijquin otitechchihuilij? Motaj niman nejhua sanoyej yotimojcamiquej chica nimitztejtemohuaj.

⁴⁹ Niman Jesús oquimijlij:

—¿Tlica nennechtejtemohuayaj? ¿Tlica xnenquimatiij ica nejhua ica oncaj ninotequimacas ipan on tlajtlamach‡ yejhuan iyaxca§ noTajzin?

⁵⁰ Pero yejhuatej xocajsicamatquej tlinon on yejhua oquimijlij.

⁵¹ Quemaj inhuan onocuep para Nazaret, niman yejhua quintlacamatiya. Niman inan quejehuaya ipan iyojlo nochi on tlajtlamach yejhuan onochiu.

⁵² Niman Jesús más noscaltiaya ipan itlalnacayo niman más cajsitiaya itlamatquilis*, niman quipactiaya Dios niman on tlacamej.

3

Juan on tlacuatequijquetl otomachtiij ne campa tlapatlaco (Mt. 3:1-12; Mr. 1:1-8; Jn. 1:19-28)

¹ Ijcuac Tiberio César quipiaya caxtojli xipan ica tequihuaj catca ipan on hueyi país Roma, Poncio Pilato gobernador catca ne Judea, Herodes gobernador catca ne Galilea, niman Felipe on icniu Herodes gobernador

† ^{2:37} Napoajli quitosnequi ochenta, niman napoajli huan nahui quitosnequi ochenta y cuatro.

‡ ^{2:40} sabiduría § ^{2:46} después * ^{2:47} su inteligencia † ^{2:48} ¿por qué?; ¿tline? ‡ ^{2:49} las cosas § ^{2:49} le pertenece; iaxca, ihuaxca, itlatqui * ^{2:52} su sabiduría

catca ne Iturea niman ne Traconite, niman Lisanias gobernador catca ne Abilinia. ² Niman ipan sa no on tonaltin Anás niman Caifás yejhuamej más huejhueyixticatcaj tlayecanquej intech on tiopixquej. Ipan on tonaltin Juan, on iconeu Zacarías, oquiselij se yectlajtojli itech Dios ne campa tlaptlaco. ³ Yehua ica, tej, Juan oquistinen nochihuiyan campa nisu itech on atentli Jordán. Quimijlijtiaya on tlacamej ica nonequi nocuatequisquej para quiteititisquej ica yonoyolpatlaquej, niman Dios quintlapojojhuis intlajtla-colhuan. ⁴ Yehua in onochiu ijcon quen on tiotlajtojquetl Isaías oquijcuilojca: Yacaj nemi ne campa tlaptlaco niman ijqui tzajtzi: “Xyectlalican nemoyojojo pampa ye huajlau toTeco. Xmejmelahuacan nemonemilis ijcon quen on tlacamej cueltlaliaj niman quimejmelahuaj se ojtli ijcuac huajlau se tlacatl yejhan hueyixticaj.

⁵ Nochihuiyan campa tlahuejhuejcatlan ica oncaj quintlaltemasquej, niman nochimej tepemej niman tepetzitzintin ica oncaj calahuasquej para tlaixmanasquej. On ojtli xmelajqui ica oncaj quinmelahuasquej, niman on ojtli yejhan xixmanqui ica oncaj quixmanasquej.

⁶ Niman nochí tlalticpactlacatl quitas quen temaquixtis Dios.”

⁷ Miyec tlacatl huajlaya itech Juan para quincuatequiaya, niman ijquin quimijliaya:

—Tecone huan intech cohuamej*, ¿Aquinon omech machiltij para xmomanhuan itech on temojtij castigo yejhan huajlau? ⁸ Cuajli xmohuican para cuajli nenquiteititisquej ica yonencajcajquej nenquichihuaj on tlen xcua jli. Niman ma ca nemejhuamej nenquijtosquej: “Xitlaj† huelis nochihuas totech, pampa titecone huan itech Abraham.” Nejhua nemechijlia ica hasta in temej Dios huelis quincuepas tecone huan itech Abraham. ⁹ Nemejhuamej no ijqui quen on cojin yejhan xtlaquij. Nochi cojtlidyejhuani xtlaquis notzontequis niman notlatis. Yejhuia ica cuajli xmotacan, pampa on hacha ye oncaj listo para quintequis hasta ipan inelhuayohuan on cojin yejhan xtlaquij.

¹⁰ Quemaj on tlacamej oquitlajtoltijquej Juan:

—¿Tlinon, tej, nonequi ticchihuasquej?

¹¹ Juan oquimijlij:

—On yejhan quipia ome itlaquen, nonequi se quimacas on yejhan xitlaj quipia, niman on yejhan quipia tlen cuas, nonequi sequi quimacas on yejhan xquipia.

¹² No ohualajquej itech Juan sequimej tlacobrarojquej ica on impuestos para yejhuia ma quincuatequi. Niman no oquitlajtoltijquej:

—Temachtijquetl, ¿tlinon nonequi ticchihuasquej?

¹³ Niman Juan oquimijlij:

—Xtlacobrarocan san quech tlanahuatia on tlanahuati jli niman ma ca ipan xtecuilican.

¹⁴ No ijqui oquitlajtoltijquej sequimej soldados:

—Niman tejhuamej, ¿tlinon nonequi ticchihuasquej?

Niman yejhuia oquimijlij:

—Ma ca yacaj itlaj xcuilican, nion ma ca yacaj xteixpanhuican quen itlaj yoquichiu ijcuac xnejli oquichiu niman xpaquican san ican on quech nenquitlanij.

¹⁵ Nochi tlacatl sa quichixticatca para saniman ma huajla Cristo. Niman quinemiliyaj tla Juan yejhuia Cristo noso ca. ¹⁶ Yejhuia ica Juan oquimijlij:

* ^{3:7} víboras † ^{3:8} nada, coxtla ‡ ^{3:9} árbol

—Mela huac nejhua nemechcuatequia ican atl. Pero huajlau ocse yejhuan quipia más hueyitilistli xquen nejhua, niman nejhua xnechmelahua[§] nion se achijtzin nictojtomas icacmecayo. Yejhua, tej, mechcuatequis ican Espíritu Santo niman ican tlilt. ¹⁷ Yejhua ye ipan ima quipia on iaventador para ica cajcahuis on trigo niman quixtilis on itlajsojlo. On trigo quejehuas ipan icuescon, pero on itlajsojlo quitlatis ipan on tlilt yejhuan xqueman sehuis.

¹⁸ Ijcon, niman ican ocsequi miyec más tlachicahualistli, Juan quin-machiltiaya on tlacamej itech ica on cuajli tlajtojli. ¹⁹ Juan no oquichicajcan-otz on gobernador Herodes pampa Herodes quipiaya Herodías quen isihuau, masqui Herodías isihuau catca Felipe. Felipe icniu catca Herodes. Juan no oquichicajcanotz Herodes pampa oquichijca miyec ocsequi tlajtlamach* tlen xcuajli. ²⁰ Pero Herodes xoquinec, yej oquichiu ocse tlin xcuajli. Oquitzacu Juan.

*Juan oquicuatequij Jesús
(Mt. 3.13-17; Mr. 1.9-11)*

²¹ Pero Herodes antes quitzacuasquia Juan, Juan oquicuatequij miyec tlacatl. Niman no ocuatequij Jesús. Quemaj chica Jesús quichihuaya oración, on ilhuicac otlapou, ²² niman on Espíritu Santo ohuajtemoc quen itlaj paloma ipan Jesús. Niman quemaj ocaquistic se tlajtojli ne ilhuicac yejhuan quijto-huaya:

—Tejhua tinotlajsojca Conetzin, niman moca nipacticaj.

*In itajhuehuentzitzihuan Jesucristo
(Mt. 1.1-17)*

²³ Jesús quipiaya canaj sempoajli† huan majtlactli xipan ijcuac opeu quichihua itequiu Dios. On tlacamej oquinemilijquej ica yejhua teconeu catca itech José pero xmelahuac itaj catca José.

José teconeu catca itech Elí,

²⁴ niman Elí teconeu catca itech Matat,
niman Matat teconeu catca itech Leví,
niman Leví teconeu catca itech Melqui,
niman Melqui teconeu catca itech Jana,
niman Jana teconeu catca itech José,

²⁵ niman José teconeu catca itech Matatías,
niman Matatías teconeu catca itech Amós,
niman Amós teconeu catca itech Nahúm,
niman Nahúm teconeu catca itech Esli,
niman Esli, teconeu catca itech Nagai,

²⁶ niman Nagai teconeu catca itech Maat,
niman Maat teconeu catca itech Matacías,
niman Matacías teconeu catca itech Semei,
niman Semei teconeu catca itech José,
niman José teconeu catca itech Judá,

²⁷ niman Judá teconeu catca itech Joana,
niman Joana teconeu catca itech Resa,
niman Resa teconeu catca itech Zorobabel,
niman Zorobabel teconeu catca itech Salatiel,
niman Salatiel teconeucacta itech Neri,
²⁸ niman Neri teconeu catca itech Melqui,
niman Melqui teconeu catca itech Adi,

§ 3:16 no merezco * 3:19 cosas † 3:23 Sempoajli quitosnequi veinte, niman sempoajli huan majtlactli quitosnequi treinta.

niman Adi teconeu catca itech Cosam,
 niman Cosam teconeu catca itech Elmodam,
 niman Elmodam teconeu catca itech Er;
²⁹ niman Er teconeu catca itech Josué,
 niman Josué teconeu catca itech Eliezer,
 niman Eliezer teconeu catca itech Jorim,
 niman Jorim teconeu catca itech Matat,
³⁰ niman Matat teconeu catca itech Leví,
 niman Leví teconeu catca itech Simeón,
 niman Simeón teconeu catca itech Judá,
 niman Judá teconeu catca itech José,
 niman José teconeu catca itech Jonán,
 niman Jonán teconeu catca itech Eliaquim,
³¹ niman Eliaquim teconeu catca itech Melea,
 niman Melea teconeu catca itech Mainán,
 niman Mainán teconeu catca itech Matata,
 niman Matata teconeu catca itech Natán,
³² niman Natán teconeu catca itech David,
 niman David teconeu catca itech Isaí,
 niman Isaí teconeu catca itech Obed,
 niman Obed teconeu catca itech Booz,
 niman Booz teconeu catca itech Salmón,
 niman Salmón teconeu catca itech Naasón,
³³ niman Naasón teconeu catca itech Aminadab,
 niman Aminadab teconeu catca itech Aram,
 niman Aram teconeu catca itech Esrom,
 niman Esrom teconeu catca itech Fares,
 niman Fares teconeu catca itech Judá,
³⁴ niman Judá teconeu catca itech Jacob,
 niman Jacob teconeu catca itech Isaac,
 niman Isaac teconeu catca itech Abraham,
 niman Abraham teconeu catca itech Taré,
 niman Taré teconeu catca itech Nacor,
³⁵ niman Nacor teconeu catca itech Serug,
 niman Serug teconeu catca itech Ragau,
 niman Ragau teconeu catca itech Peleg,
 niman Peleg teconeu catca itech Heber,
 niman Heber teconeu catca itech Sala,
³⁶ niman Sala teconeu catca itech Cainán,
 niman Cainán teconeu catca itech Arfaxad,
 niman Arfaxad teconeu catca itech Sem,
 niman Sem teconeu catca itech Noé,
 niman Noé teconeu catca itech Lamec,
³⁷ niman Lamec teconeu catca itech Matusalén,
 niman Matusalén teconeu catca itech Enoc,
 niman Enoc teconeu catca itech Jared,
 niman Jared teconeu catca itech Mahalaleel,
 niman Mahalaleel teconeu catca itech Cainán,
³⁸ niman Cainán teconeu catca itech Enós,
 niman Enós teconeu catca itech Set,
 niman Set teconeu catca itech Adán,
 niman Adán teconeu catca itech Dios.

4

*On diablo oquitlatlatac Jesús para ma tlajtlaco
(Mt. 4.1-11; Mr. 1.12-13)*

¹ Jesú斯 oquis itech on atempan Jordán. Niman on Espíritu Santo nochí ica quiyecanaya Jesúś niman ocuicac ne campa tlapatlaco. ² Ne campa tlapatlaco onen ompoajli* tonaltin niman on diablo ompa oquitlatlatac Jesúś para tlajtlacos. Ipan on ompoajli tonaltin, Jesúś xotlacuaj. Yehua ica sanoyej† apismiquiya. ³ Niman on diablo oquijlij:

—Tla melahuac titeConeu itech Dios, xnahuati yehua in tetl ma nochihua tlaxcajli.

⁴ Niman Jesúś oquijlij:

—In Yectlajcuilojli quijtohua: “Xsan ican tlaxcajli huelis nemis se tlacatl, yej no ican nochí tlajtojli yehuan Dios quijtohua.”

⁵ Quemaj on diablo ocuicac icuapan se hueyi tepetl, niman nimantzin oquititj nochí on países yehuan oncaj ipan in tlalticpactli. ⁶ Niman on diablo oquijlij:

—Nejhua nimitzmacas nochí tequihuajyotl niman on hueyilistli yehuan oncaj ipan in países. Nochí yehua in onechmacaquej, yehua ica nihuelis nicmacas san aquin nicnequis nicmacas. ⁷ Tla nixpan timotlacuenquetzas niman tinechmahuistilis, nochí yehua on moyaxca‡ yes.

⁸ Pero Jesúś oquijlij:

—Xnechtlalcahui, Satanás, pampa on Yectlajcuilojli quijtohua: “Xtlacaita moTeco Dios, niman san yehua xtequipano.”

⁹ Quemaj on diablo ocuicac Jesúś ne ipan on hueyican itoca Jerusalén niman oquittlejcoltij ne campa más tlacpac ipan on hueyi tiopan, niman oquijlij:

—Tla melahuac tejhuac titeConeu itech Dios, xonmotlajcali ne tlatzintlan, ¹⁰ pampa ipan on Yectlajcuilojli quijtohua:

Dios quinnahuatis on iilhuicachtequiticahuan§ ma mitzpalehuican.

¹¹ No quijtohua:

Mitzquetztehuasquej ican inmahuan para ma ca timocxicocos ican se tetl.

¹² Ijcuacon Jesúś oquijlij:

—No quijtohua on Yectlajcuilojli: “Ma ca xtlatlata moTeco Dios.”

¹³ Niman ijcuac on diablo yotlan quitlatlata Jesúś, oquittlalcahuij sequi tonaltin.

Jesúś opeu tenojnotza ica on cuajli tlajtojli ne Galilea

(Mt. 4.12-17; Mr. 1.14-15)

¹⁴ Quemaj Jesúś onocuep para Galilea niman nochí ica oquipalehuij ipoder on Espíritu Santo. Niman nochihuiyan oquimatquej on tlacamej tlinon quichihuaya Jesúś. ¹⁵ Yehua temachiaya ipan on tiopantin niman nochí tlacatl quihueyiliaya.

On chanejquej ne Nazaret xoquiselijquej Jesúś

(Mt. 13.53-58; Mr. 6.1-6)

¹⁶ Quemaj Jesúś oyaj ne ipan on pueblo de Nazaret campa onoscaltij. Niman ipan on tonajli ijcuac on hebreos nosehuiaj, ocalac ipan on tiopan ijcon quen yehua nochipa quichihuaya. Ne ipan on tiopan onotelquetz para oquinomachtij on Yectlajcuilojli ¹⁷ niman oquimacaquej on tlajcuilolamatl

* ^{4:2} cuarenta † ^{4:2} mucho ‡ ^{4:7} te pertenece; moaxca, mohuaxca, motlatqui § ^{4:10} ángeles de El: Angeles tequitij ne ilhuicac niman nican ipan in tlalticpactli.

yejhuan on tiotlajtojquetl Isaías oquijcuilojca. Niman ijcuac oquitlapoj, oquinextij on campa tlajcuilolnesticaj:

¹⁸ On iEspíritu toTeco nopal oncaj, pampa onechcalactij ipan notequiv para niquinmachiltis on mayanquej tlacamej on cuajli temachtilistli yejhuan quitemaca temaquixtilistli. Onechajtitlan niquimpactis on yejhuan noyolajmanaj, para niqquintitis ica Dios huelis quinmanahuis on yejhuan Satanás yoquinnoyaxcatijca, para niquiminmacas int-lachalis on ciegos, niman para niquiminmanahuis on yejhuan tlajyohuijaj.

¹⁹ Onechajtitlan para nictemachiltis ica yoyejcoc on tonaltin ijcuac Dios ican iteicnelilis* quintiochihuas on yejhuan hualasquej itech.

²⁰ Ijcuac Jesús otlan nomachtia, oquitzacu on tlajcuilolamatl, oquimacac on tlapalehuijquetl ipan on tiopan niman quemaj onotlalij. Niman nochimej on yejhuan nemiyaj ipan on tiopan sa conitzticatcaj. ²¹ Ijcuacon yejhua opeu ijquin quijtohua:

—Amantzin nican nemixpan otenquis on tlen quijtohua in Yectlajcuilojli.

²² Niman nochimej cuajli quijtohuiliayaj Jesús niman pacatlachayaj ica on cualtzin tlajtojli yejhuan quimijliayaj. Pero ijquin quinotlajtoltiayaj:

—¿Tlica† xejhua in iconeu José?

²³ Jesús oquimijlij:

—Niman nicmati ica nennechijlisnequij in tlajtojli: “Tepajtijquetl, sa no tejhua xmopajti.” Niman no nennechijlisnequij: “On tlen otechmachiltijquej ica oticchiu ne Capernaum, no ijqui xchihua nican ipan in pueblo campa otimoscaltij.”

²⁴ Quemaj más otlajtoj, niman oquijtoj:

—Ica tlen melahuac nemechijlia ica xacaj tiotlajtojquetl cuajli quitlacaitaj niman quiseliaj ipan on pueblo campa noscaltia. ²⁵ Nemechmelajcailia ica nemiyaj miyequej sihuacahualtin‡ ne ipan Israel ipan on tonaltin ijcuac Elías on tiotlajtojquetl nemiya, ijcuac yeyi xipan huan tlajco xoquiau niman sanoyej§ oncatca apostli ipan nochij on país de Israel. ²⁶ Pero Dios xocuajtitlan Elías nion se itech on sihuacahualtin yejhuan nemiyaj ne Israel, yej itech se yejhuan nemiya ipan on pueblo de Sarepta yejhuan oncaj ipan on iyehualican Sidón. ²⁷ No ijqui ipan on tonaltin ijcuac nemiya on tiotlajtojquetl Eliseo, ne Israel nemiyaj miyequej tlacamej yejhuan quipiayaj on temojtij cualolistli itoca lepra. Pero Eliseo xoquipajtij nion se de yejhamej, yej oquipajtij Naamán, yejhuan chantiya ne Siria.

²⁸ On yejhuan nemiyaj ipan on tiopan, ijcuac ijcon ocacquej quen oquijtoj Jesús sanoyej ocualanquej. ²⁹ Yejhamej ohuajnoquetztejquej niman oquixtijquej Jesús ipan on pueblo. On pueblo itoca Nazaret oncatca ipan se tepetl. Quemaj ocuicaquej más tlacpac ipan on tepetl para cuajtlajcalisquiaj ne ipan on teostotl campa más tlacpac. ³⁰ Pero ijcuac ompa ye cuajtlajcalisquiaj, Jesús intlajcotian ohuajpanoc niman oyaj.

*Jesús oquipajtij se tlacatlyejhuan quipiaya on xcujli espíritu
(Mr. 1.21-28)*

³¹ Quemaj Jesús otomoc ipan on pueblo itoca Capernaum, yejhuan oncaj ipan on iyehualican Galilea. Niman ipan on tonajli ijcuac on hebreos nosehuijaj ompa opeu quimimachtia on tlacamej. ³² Niman on tlacamej sanoyej mojcatlachayaj quen temachtiaya pampa yejhua temachtiaya quen se tequihuaj.

* ^{4:19} su misericordia † ^{4:22} ¿por qué?; ¿tline? ‡ ^{4:25} viudas; icnosihuamej § ^{4:25} mucha

³³ Ne ipan on tiopan nemiya se tlacatl yejhuan quipiaya se xcuajli espíritu. Yejhua on espíritu se demonio. Niman yejhua chicahuac otzajtzic:

³⁴ —¡Xtechcahua! ¿Tlinon ticchihuas tohuan tejhuamej, Jesús aquin oti-hualeu Nazaret? ¿Otiuhujlaj para titechxoxotonis? Nejhua nimitzixmatzticaj, niman nicmatzticaj ica tejhuajlaj para titechxoxotonis?

³⁵ Jesús ocajhuac on xcuajli espíritu, niman oquijlij:

—¡Ma ca xnahuati! ¡Xquisa ijtic yejhua in tlacatl!

Quemaj on xcuajli espíritu imixpan oquitlajcaltiaj on tlacatl, niman quemaj oquis, pero xoc itlaj oquichihuilij. ³⁶ Ijcuac on tlacamej ijcon oquitaquej, nochimej ojmojcatlachixquej niman ijquin quinojlayaj:

—¿Tlinon quipia itlajtol on tlacatl? ¡Ican itlajtol de tlanahuatijli niman poder quinnahuatia on xcuajcualtin espíritus, niman yejhamej quitlacamatij!

³⁷ Niman nochihuiyan noteijliaya on tlen Jesús oquichiu.

*Jesús oquipajtij imonan Simón Pedro niman miyequej ocsequimej
(Mt. 8.14-17; Mr. 1.29-34)*

³⁸ Quemaj Jesús oquis ne ipan on tiopan niman ocalac ne ichan Simón. Imonan Simón sanoyej cualohuaya ican totonqui*, niman oquitlajtlanili-jquej Jesús para ma quipajti. ³⁹ Jesús ohuajnopachoj itech on sihuatl niman quemaj ocajhuac on totonqui para ma cahua, niman on totonqui ocau on sihuatl. Nimantzin yejhua onoquetzteu niman opeu quintlacualtia.

⁴⁰ Ijcuac ye calacticatca tonajli, nochimej on tlacamej yejhuan quipiayaj incocoxtahuan oquinhuajhuicaquej itech Jesús. On cocoxquej quipiayaj sesetlamantic cualolistin, pero ipan cada se de yejhamej Jesús oquitlalij imahuan niman ijqui oquimpajtij. ⁴¹ Intech on miyequej cocoxquej no oquisquej on xcuajcualtin espíritus yejhuan tzajtziyaj niman quijtohuayaj:

—Tejhua titeConeu itech Dios.

Pero Jesús quimajhuatiaya niman xquincahuiliaya ma tlajtocan, pampa yejhamej quimatzticatcaj ica yejhua Cristo.

*Jesús otemachtij ne Galilea
(Mr. 1.35-39)*

⁴² Huajmostla ijcuac otlanes, Jesús oquis ipan on hueyican niman oyaj campa tlapatlaco. Niman on tlacamej quitejtemohuayaj. Niman ijcuac oquinextijquej, quejecohuayaj quiteltisquej para ma ca ma nejcuani intech.

⁴³ Pero Jesús oquimijlij:

—Nejhua ica oncaj nitemachtis on cuajli tlajtojli no ipan on ocsequimej pueblos quen Dios tlamandarojticaj, pampa yejhua ica Dios onechajtitlan.

⁴⁴ Ijcon, tej, temachtijtinemiya Jesús ne ipan on tiopantin yejhuan oncaj ipan on iregión Galilea.

5

*Nahuimej michajsiquej onochijkej inomachtijcahuán Jesús
(Mt. 4.18-22; Mr. 1.16-20)*

¹ Ipan se tonajli Jesús nemiya ne itenco on atl itoca Genesaret. Niman miyec tlacatl oyaj itech niman hasta quipitzmictiayaj* para caquisquej itemachtil Dios. ² Jesús oquitac ome barco ne itenco on atl. On michajsiquej yehuaticatcaj niman quipajpacticatcaj inmatl. ³ Quemaj Jesús otlejcoc ipan

* 4:38 fiebre; totonalistli

* 5:1 lo apretaban; quitetztiliayaj

on se barco yejhuan iyaxca[†] Simón, niman oquitlajtlanilij Simón para achi-jtzin ma calacti ne atlajcotian. Quemaj Jesús onotlalij ne ipan on barco niman oquiminmachtij on tlacamej yejhuan nemiyaj ne atlalenco. ⁴ Niman ijcuac Jesús otlan quiminmachtia on tlacamej, oquijlij Simón:

—Xcuica yejhua in barco ne campa más achi huejcatlan niman ompa xconchapanican nemomatlahuan para nenquimajsiquej on michimej.

⁵ Simón oquijlij:

—Temachtijquetl, tejhuamej nochí tlayohua otiquejecojquej tiquimajsiquej on michimej niman xqueman itlaj oticajsiquej. Pero pampa tejhua titechnahuatia, tejhuamej ticonchapanisquej in matlatl.

⁶ Ijcuac oconchapanijquej on matlatl, ocajsiquej miyec michin niman hasta ye cocotoniya[‡] on matlatl. ⁷ Quemaj oquinmanotzquej on intequipanojcaxihuán yejhuan nemiyaj ipan on ocse barco para ma quimpalehuijqui. Niman yejhuan ohualajquej, niman oquitemiltijkej on ome barco ican michimej niman hasta ye polaquisnequiyaj. ⁸ Niman ijcuac Simón Pedro oquitac on tlen onochiu, onotlacuenquetztiaj ixpan Jesús niman oquijlij:

—Xnechtlalcahui, noTeco, pampa nejhua nitlajtlacolej.

⁹ Simón niman nochimej yejhuan ihuan nemiyaj otlamojcaitaquej, pampa ocajsiquej miyec michin. ¹⁰ No ijqui onomojtijquej Jacobo niman Juan, iconehuan Zebledo, yejhuan itequipanojcaxihuán catca Simón. Pero Jesús oquijlij Simón:

—Ma ca xmomojti, pampa desde aman xoc tiquintejtemos michimej para tiquinmajsis, yej tiquintejtemos tlacamej para tiquiminmachtis on itlajtol Dios.

¹¹ Niman ijcuac oquinquixtijquej on barcos itenco on atl, nochí ompa ocajtejquej niman oyajquej ihuan Jesús.

*Jesús oquipajtij se cocoxqui yejhuan oquipix on cuaolostli itoca lepra
(Mt. 8.1-4; Mr. 1.40-45)*

¹² Ijcuac Jesús nemiya ipan se pueblo, ompa oyejcoc se tlacatl yejhuan quipiaya se cuaolostli itoca lepra. On cuaolostli quipalanaltijtiaya san miyecan ipan itlalnacayo. Ijcuac yejhua on tlacatl oquitac Jesús, ixpan onotlacuenquetz niman ixayac hasta ipan tlajli oquitlalij. Niman yejhua ijquin sanoyej§ oquitlajtlanilij:

—Señor, tla ticnequi, huelis tinechpajtis.

¹³ Quemaj Jesús oquimatocac, niman oquijlij:

—Nicnequi. Aman xpajti.

Niman ijcuac Jesús ijcon oquijtoj, on cuaolostli nimantzin opopoliu ipan on tlacatl. ¹⁴ Quemaj Jesús oquinahuatij on tlacatl para ma ca yacaj quitlajtajtohuilis aquinon oquipajtij. Oquijlij:

—San xhuiya niman xmoteititi ne itech on tiopixqui para mitzitas ica xoc ticualo. Niman pampa yotipajtic, xcuentlali on tlen Moisés otlanahuatij. Ijcon, tej, on tlacamej quitasquej ica yotipajtic.

¹⁵ Pero on tlen Jesús quichihuaya más nohuiyan machiyaya, niman miyec tlacatl nosentlaliaya itech para caquisquej niman para yejhua quimpajtilis incuaololis. ¹⁶ Pero Jesús miyecpa quintlalcahuiyaya on tlacamej niman yaya ne campa tlapatlaco para ompa quichihuaya oración.

*Jesús oquipajtij se tlacatl yejhuan sepojtoya
(Mt. 9.1-8; Mr. 2.1-12)*

† 5:3 le pertenece; iaxca, ihuaxca, itlatqui ‡ 5:6 romperse § 5:12 mucho

¹⁷ Se tonajli ne campa Jesús temachtiaya, yejyehuaticatcaj sequimej fariseos, niman on temachtijquej ica on tlanahuatiltin yejhuan hualehuaya j san mijmiyecan nochimej ipan on pueblos de Galilea, de Judea niman no de on hueyican itoca Jerusalén. Niman Jesús oquipix ipoder Dios para quimpajtiaya on cocoxquej. ¹⁸ Sequimej tlacamej oyejcoquej yejhuan ocualajantiajquej ipan cojtlapechtli se tlacatl yejhuan sepojtoya. Niman quinequiya j calactisquej ne calijtic niman quitlalisquej ixpan Jesús. ¹⁹ Pero xohuelquej ocalaquej, pampa miyec tlacatl ompa nemiya. Yejhua ica otlejcoquej icuapan on cajli. Niman ijcuac yoquejcuani j quej on tejas, oquitemoltijquej on cocoxqui ipan icojtlapech intlajcotian on tlacamej, niman melajqui ixpan Jesús. ²⁰ Ijcuac Jesús oquitac ica on tlacamej otlaneltocaquej, oquijlij on yejhuan cualo:

—Tlacatl, motlajtlacolhuan yonimitzintlapojpolhuilij.

²¹ Quemaj on temachtijquej ica on tlanahuatijli niman on fariseos opeu ijquin quinemiliaj: “¿Aquinon in tlacatl? ¿Tlica* cuijhuicaltijtcaj Dios ican itlajtol? Xacaj hueli quitetlapojpolhuilia on tlajtlacojli, yej san Dios.”

²² Pero Jesús quimatzticatca tlinon yejhuamej quinemili jticatcaj, niman oquimijlij:

—¿Tlica ijcon nenquinemiliaj? ²³ ¿Catlejhua más xtepopolo niquijtos: “Motlajtlacolhuan yotlapojpolhuiloquej”, noso yej niquijtos: “Xmoquetztehua niman xnejnemi”? ²⁴ Aman cuajli nejhua nemechititis ica nejhua, yejhuan oninochiu Tlacatl, nicpia tequihuajyotl ipan in tlalticpactli para nitelapojpolhuilis on tlajtlacoltin.

Quemaj oquijlij on tlacatl yejhuan sepojtoya:

—Tejhua nimitzijlia, xmoquetztehua, xcajcocui motlapech niman xhuiya mochan.

²⁵ Nimantzin on yejhuan sepojtoya ohuajnotelquetz imixpan on tlacamej, ocajcocu itlapech yejhuan ipan onoya niman oyaj ichan. Niman cueyilijtiaya Dios. ²⁶ Nochimej on tlacamej omojcatlachixquej niman ocueyilijquej Dios, niman ican miyec nemotijli oquijtojquej:

—Aman yotiquitaquej on tlajtlamach† yejhuan xqueman tiquitayaj.

Jesús oquinotz Mateo para ihuan yas (Mt. 9.9-13; Mr. 2.13-17)

²⁷ Más saquin‡ ijcuac yopanoc yejhua on, Jesús oquis, niman oquitac se tlacatl itoca Leví yehuaticatca ne campa tlacobrarohuaya ica impuestos. Niman Jesús oquijlij:

—Xhuajla nohuan.

²⁸ Niman quemaj Leví ohuajnotelquetz, ocajteu nochí, niman oyaj ihuan Jesús.

²⁹ Más saquin, Leví oquichiu se hueyi ilhuitl para Jesús ne ichan, niman ompa miyequie j nemiyaj yejhuan tlacobrarohuaj ica impuestos niman osequimej más tlacamej yejhuan ompa inhuan san secan yejyehuaticatcaj itech mesa. ³⁰ Pero on fariseos niman on temachtijquej ican on tlanahuatijli yejhuan no nopolhuaj inhuan on fariseos opejquej quimichtacaajhuaj on inomachtijcahuán Jesús, niman oquimijlijquej:

—¿Tlica nemejhuamej nentlacuaj niman nenatlij inhuan on yejhuan tlacobrarojquej ica impuestos, niman inhuan on tlajtlacolejquej?

³¹ Jesús oquimijlij:

* ^{5:21} ¿por qué?; ¿tline? † ^{5:26} cosas ‡ ^{5:27} después

—On yejhuan xcualoj xquimpolohua on tepajtijquetl, pero on yejhuan cualoj quemaj. ³² Nejhua xonihuajlaj para niquinnotzas on yejhuan yolmelajquej, yej on yejhuan tlajtlacolejquej para amo ma quichihuacan on tlen xcuajli.

*Jesús oquijtoj tlica inomachtijcahuau xnosahuauj
(Mt. 9.14-17; Mr. 2.18-22)*

³³ Quemaj yejhamej oquitlajtoltijquej Jesús:

—¿Tlica miyecpa nosahuaj niman quichihuaj oraciones on yejhuan nohuicaj ihuan Juan niman on yejhuan nohuicaj ihuan on fariseos, pero monomachtijcahuau tlacuaj niman atlaj?

³⁴ Jesús oquimijlij:

—¿Nemejhuamej huelis nenquinnesahualtisquej on tlanotzaltil ne campa nonamictihua chica on montli ompa inhuan nemí? ³⁵ Pero xmatztiacan ica yejcos on tonajli ijcuac on montli quinquixtilisquej, niman ijcuacon quemaj nosahuasquej notemachtijcahuau.

³⁶ No oquintlahijlij in ocse ejemplo:

—Xacaj quitequi on tlaquentli yencuic para ica quitlamanilia on yejhuan tlaquentli ijsoltic. Tla se ijcon quichihua, quixpolohua on yencuic tlaquentli, niman no on tlaquentli yencuic xoc cuajli ihuan nocahua on tlaquentli ijsoltic. ³⁷ Niman no xacaj quitlalia on vino yencuic ipan on bolsas tlachijchiutin ican on cuetlaxtli ijsoltijquej, pampa on vino posonis niman on bolsas toponisquej, niman quemaj on vino ihuan on bolsas ixpolihuisquej.

³⁸ Yehua ica más cuajli notecas on vino yencuic ipan on bolsas tlachijchiutin ican cuetlaxtin yencuiquej para ijcon on ome tlamantin[§] cuajli quixicosquej.

³⁹ Niman xacaj yejhuan yoconic on vino yejhuan ye quipia tonaltin ica oncaj, quinequis conis on vino yencuic pampa quijtohua: “On vino yejhuan ye quipia tonaltin ica oncaj, más huelic.”

6

Jesús quipia tequihuayotl para quijtos tlinon cuajli para se quichihuas ipan on tonajli de nesehuijli

(Mt. 12.1-8; Mr. 2.23-28)

¹ Ipan se tonajli ijcuac on hebreos nosehuijli, Jesús nejnentiaya ne campa oncaj on tlatocatl de trigo. On inomachtijcahuau quimaxicopinayaj on trigo, niman quimateiniayaj niman quicuayaj on iteyo. ² Niman sequimej fariseos oquintlahijtoltijquej:

—¿Tlica* nenquichihuaj on tequitl yejhuan itlanahuatil Moisés xquitecahuilia nochihuas ipan on tonaltin de nesehuijli?

³ Jesús oquimijlij:

—¿Xqueman nenquimomachtianij on tlen oquichijca David ijcuac yejhua niman itetequipanojaxihuan oapismiquej? ⁴ Ocalac ne ipan itiopan Dios niman oquitilan on pan yejhuan tlatichiutli. Quemaj ocuaj on pan niman no oquiminmacac on yejhuan ompa inhuan nemiyaj, masqui on itlanahuatil Moisés san quimincahuiliaya on tiopixquej quicuayaj on pan.

⁵ No ijqui oquimijlij:

—Tej, nejhua yejhuan oninochiu Tlacatl nicpia tequihuayotl para niquijtos tlinon cuajli para se quichihuas ipan on tonajli de nesehuijli.

*Jesús oquipajtij se tlacatl yejhuan quipiaya se ima huaqui
(Mt. 12.9-14; Mr. 3.1-6)*

§ 5:38 cosas * 6:2 ¿por qué?; ¿tline?

⁶ Ipan ocse tonajli de nesehuijli, Jesús ocalac ipan se tiopan niman ompa temachtiaya. Ompa nemiya se tlacatl yejhuan quipiaya on iyecma huaqui.

⁷ Niman on temachtijquej ican on tlanahuatijli niman on fariseos quipijpi-ayaj Jesús para quitasquej tla quipajtis on tlacatl ipan on tonajli de nesehuijli. Ijcon oquichijquej para quinextilisquej tlinon ica huelis quiteixpanhuisquej.

⁸ Pero Jesús quimatzticatca tlinon yejhuan quinemiliyaj, niman oquijlij yejhua on tlacatl yejhuan quipiaya ima huaqui:

—Xmotelquetza niman xhuia ne tlajcotian.

On tlacatl onotelquetz niman ompa oyaj. ⁹ Quemaj Jesús oquimijlij on ocsequimej:

—Nejhua nemechtlajtoltis yejhua in: ¿Tlinon techcahuilia itlanahuatil Moisés ticchihuasquej ipan on tonajli de nesehuijli, on tlen cuajli noso on tlen xcuajli? ¿Techcahuilia ticmaquixtilisquej inemilis se tlacatl noso tiquixtilisquej inemilis?

¹⁰ Quemaj Jesús oquimixtlaloj on yejhuan quiyehualojticatcaj, niman oquijlij on tlacatl:

—Xmelahua moma.

On tlacatl oquimelau ima, niman opajtic. ¹¹ Pero on ocsequimej sanoyej† ocualanquej, niman opeu notlajtoltiaj tlinon huelis quichihuialisquej Jesús.

Jesús oquitlapejpenij majtlactli huan ome apóstoles

(Mt. 10.1-4; Mr. 3.13-19)

¹² Ipan on tonajli Jesús otepetlejcoc para quichihuas oración. Niman ne ipan on tepetl nochí tlayohua oquichiu oración itech Dios. ¹³ Ijcuac otlanes, oquiminnnotz inomachtijcahuán, niman de yejhuan oquintlapejpenij ma-jtlactli huan ome nomachtijquej yejhuan oquintocayotij apóstoles. ¹⁴ Ijquin intoca catca on apóstoles: Simón, yejhuan Jesús oquitocayotij Pedro, Andrés icniu Simón, Jacobo, Juan, Felipe, Bartolomé, ¹⁵ Mateo, Tomás, Jacobo iconeu Alfeo, Simón, yejhuan intech on cananistas nopohuaya, ¹⁶ Judas icniu Jacobo niman Judas Iscariote, yejhuan más saquin‡ oquitemactilij Jesús.

Jesús otemachtij niman oquimpajtij miyequej

(Mt. 4.23-25)

¹⁷ Jesús ihuan miyequej inomachtijcahuán ohuajtemoc ne ipan on tepetl, niman campa tlaixmanco ompa onoteltij. Niman ompa nemiyaj miyequej tlacamej yejhuan chanejquej nochihuiyan ne Judea, niman on hueyican Jerusalén niman ipan on huejhueyican de Tiro niman de Sidón yejhuan oncaj ipan itenco on mar. Yejhuan in ompa oyajquej para ocaquitoj Jesús niman para itech oquipajtitoj incualolis. ¹⁸ On yejhuan tlajyohuiyaj pampa quipiayaj on xcuajcuaultin espíritus no opajtiquej. ¹⁹ Nochi tlacatl quinequiya quimatocas Jesús, pampa ipoder quisaya itech niman quimpajtaya nochimej.

Jesús otemachtij aquinomej quipiasquej itlatiochihualis Dios

(Mt. 5.1-12)

²⁰ Ijcuac Jesús oquimixtlaloj on inomachtijcahuán oquimijlij:

—Dios mechtiochihua nemejhuamej pobres, pampa nencalaquisquej ne campa Dios tequihuajtiticaj.

²¹ 'Dios mechtiochihua nemejhuamej yejhuan nemapismiquij, pampa nemejhuamej nemixhuisquej.

'Dios mechtiochihua nemejhuamej yejhuan aman nenchocaj, pampa nemejhuamej nempaquisquej.

† 6:11 mucho ‡ 6:16 después

22 'Dios mechtióchihua nemejhuamej ijcuac on tlacamej mechtlahuelitasquej, ijcuac xmechséisquej, ijcuac mechhuijhuicaltisquej, niman ijcuac mechtejtenehuasquej san pampa nennechneltocaj nejhua yejhuan oninochiu Tlacatl. **23** Ijcuac ijcon nochihuas sanoyej xmopactican niman xtemican ican paquillistli, pampa ne ilhuicac nenquiselisquej se hueyi tlaxtlahuijli. On inachtojtajhuan no ijqui oquinchihuilijquej on tiotlajtojquej.

24 'Pero lástima para nemejhuamej ricos, pampa on paquillistli yejhuan nenquipiaj tlamis sa no ipan in tlalticpactli.

25 'Lástima para nemejhuamej yejhuan nemijixhuitoquej pampa nenquipiasquej apistli.

'Lástima para nemejhuamej yejhuan aman nempaquij, pampa nenchosasquej niman nemajmanasquej.

26 'Lástima para nemejhuamej ijcuac nochí tlacatl mechijtohuilia on tlen cuajli. On inachtojtajhuan no ijqui quinmijtohuiliayaj on yejhuan xmealahuac tiotlajtojquej.

Jesús otemachtij ica nonequi tiquintlajsojtlasquej totlahuelicnihuan

(Mt. 5.38-48; 7.12)

27 'Pero nemejhuamej yejhuan nennechcaquij nemechijlia: Xquintlajsojtlacan§ on nemotlahuelicnihuan; xquinchihuilican tlen cuajli on yejhuan mechtlahuelitaj. **28** Xtlajtlanilican Dios para ma quintiochihua on yejhuan mechhuijhuicaltiaj; xchihuacan oración impampa on yejhuan mechchihuilaj tlen xcuajli. **29** Tla yacaj mitzxayacahuitequi, no xcahuili ocse lado ma mitzxayacahuitequi. Niman tla yacaj mitzcivilia mogában, no xcahuili ma quitqui motlaquen. **30** San aquinon yejhuan quinequi itlaj mitztlajtlanilis, xmaca. Niman on yejhuan mitzcivilis tlen moyaxca*, ma ca sa xtlajtlanili para ma mitzmaca. **31** Xquinchihuilican ocsequimej on tlen nemejhuamej nenquinequisquiaj para yejhamej ma mechchihuilican.

32 'Tla nemejhuamej nenquintlajsojtlaj san yejhamej on yejhuan no mechtla jsojtlaj, ¿tlinon cuajli nenquichihuaj más xquen ocsequimej? pampa hasta on tlajtlacolejquej ijqui quichihuaj. **33** Noso tla on yejhuan mechchihuilaj on tlen cuajli san yejhamej nenquinchihuilaj on tlen cuajli, ¿tlinon cuajli nenquichihuaj más xquen ocsequimej? pampa on yejhuan tlajtlacolejquej no ijqui quichihuaj. **34** Niman tla itlaj nenquintlanejtiaj san yejhamej on yejhuan nenquinemiliaj intech nenquiselisquej ocsejpa sa no ijqui, ¿tlinon cuajli nenquichihuaj más xquen ocsequimej? Xitlaj más cuajli nenquichihuaj xquen ocsequimej pampa on tlajtlacolejquej no itlaj quintlanejtiaj on yejhuan no tlajtlacolejquej para intech quiseliaj ocsejpa sa no ijqui.

35 Pero nemejhuamej xquimintlajsojtlacan on nemotlahuelicnihuan niman xquinchihuilican on tlen cuajli. Niman itlaj xquimintlanejtican pero ma ca nenquichasquej itlaj intech nenquiselisquej. Tla ijcon nenquichihuasquej, nenquipiasquej se hueyi tetlayocolijli, niman nemejhuamej nentecone huan yesquej itech Dios yejhuan más hueyixticaj, pampa yejhua yolyemanqui† intech on yejhuan xitlaj‡ quitlajsojcamatij niman intech on yejhuan xcuajcualtin tlacamej. **36** Nemejhuamej, tej, xteicnelican§ ijcon quen nemoTajtzin teicnelia.

Jesús temachtia ica xcuajli para se tetlajtlacolmacas

(Mt. 7.1-5)

§ **6:27** ámenlos * **6:30** te pertenece; moaxca, mohuaxca, motlatqui † **6:35** humilde ‡ **6:35**
nada, coxtla § **6:36** sean misericordiosos

³⁷ 'Ma ca xquinmistlacocan ocsequimej, niman Dios xmechistlacos. Ma ca xquintlajtlacolmacacan ocsequimej, niman Dios xmechtlatlacoacmas. Xtetlapojpolhuican, niman Dios no mechlapojpolhuis. ³⁸ Xquinmacacan tlajtlamach* on ocsequimej, niman Dios no mechmacas. Xquinmacacan quen se cuajli tlanamacaquejl quitemaca ican se tlatemachihuajli yejhuan cuajli tenticaj, yejhuan cuajli quipachohua, niman yejhuan quicoxonia niman yejhuan quitehuitzoltia, pampa Dios mechmacas sa no ijqui quen nemejhuamej nenquiminmacaj ocsequimej.

³⁹ Jesús oquintlalilij yejhua in ocse ejemplo:

—¿Tlen se ciego huelis quiyecanas ocse ciego? Yejhua xhueli, pampa onxinisquej san secan ipan se pozo. ⁴⁰ Xacaj nomachtijquetl más hueyixticaj xquen on yejhuan quimachtia. Pero ijcuac tlamis nomachtis, no ijqui yes quen on yejhuan quimachtia.

⁴¹ '¿Quen ijqui, tej, hueli tiquita on quesqui tlajtlacojli yejhuan quichhua se mocniu niman xtiquita on miyec tlajtlacojli yejhuan tejhua ticchihua? ⁴² Noso, ¿quen ijqui hueli tiquijlia mocniu: "Ma nimitzcajcahuaulti on quesqui tlajtlacojli", ijcuac sa no tejhua ticipia miyec tlajtlacojli? ¡Omxayacyej! Achtopa xcajcahua on miyec tlajtlacojli yejhuan ticipia, niman quemaj huelis ticajcahuaultis mocniu on quesqui tlajtlacojli yejhuan yejhua quipia.

Cada tlacatl nixmati ica on tlen quijtohua

(Mt. 7.17-20; 12.33-35)

⁴³ 'On cuajli cojtlaquilyotl xhuelis quipias xcuajli itlaquilyo nion on xcuajli cojtlaquilyotl xhuelis quipias cuajli itlaquilyo. ⁴⁴ Ijcon, tej, nochi cojtlaquilyotl nixmati ica on itlaquilyo. Xqueman notequi higos ipan on huitzcojli, nion xnotequi uvas ipan on huitzcuamecatl. ⁴⁵ On cuajli tlacatl quijtohua nochi tlen cuajli, pampa on tlen cuajli oncaj ipan iyojlo, niman on xcuajli tlacatl quijtohua on tlen xcuajli, pampa on tlen xcuajli oncaj ipan iyojlo. On tlen se tlacatl quijtohua ican icamac, on sa no yejhua ica tenticaj iyojlo.

Jesús otemachtij inca omemmej tlacamej yejhuan oquichichijquej incal

(Mt. 7.24-27)

⁴⁶ '¿Tlica nennechijliaj, "noTeco, noTeco", niman xnenquichihuaj on tlen nemechijlia? ⁴⁷ Nemechijlis quen aquinon nesi on yejhuan notech huajlau niman nechcaqui niman quichihua on tlen nejhua nitlanahuatia. ⁴⁸ Nesi quen se tlacatl yejhuan oquitlalij se cajli. Yejhua achtopa huejcatlan ot-lachcuac para huejcatlan oquipehualtij on cimiento ipan on tepetlatl. Niman ijcuac ohueiyac on atepeyat†, on atl chicahuac oquichcuato on cajli, pero nion xoocolinij, pampa huejcatlan otzimpeu on cimiento ipan on tepetlatl. ⁴⁹ Pero on yejhuan nechcaqui niman xquichihua on tlen nitlanahuatia, nesi quen se tlacatl yejhuan san ixco tlajli oquitlalij ical niman xican cimiento. Yejhua ica ijcuac on atepeyatl ohueiyac niman chicahuac oquichcuato ohuetz, niman nochi cuajli oxoxoton.

7

Jesús oquipajtij itequichihuilijcau se soldado romano

(Mt. 8.5-13)

¹ Ijcuac Jesús otlan oquijtoj nochí in tlajtlamach* imixpan on tlacamej, oyaj ne Capernaum. ² Ompa nemiya se capitán romano yejhuan quipiaya se itequichihuilijcau niman sanoyej† quitlajsojtlaya‡. On itequichihuilijcau

* 6:38 cosas † 6:48 río * 7:1 cosas † 7:2 mucho ‡ 7:2 amaba

sanoyej cualohuaya niman ye micticatca. ³ Niman ijcuac on capitán oac quitenehuaj Jesús, oquinnahuatij on tlajtlajmatquej tlayecanquej yejhuan quisayaj intzajlan on hebreos para ma quicnotlajtlanilitij Jesús para ma quipajiti on itequichihuiliijcau. ⁴ Yejhamej oquinisihuijquej Jesús niman opeu sanoyej quicnotlajtlaniliaj, quilayaj:

—Yejhua in capitán quimelahua[§] niman cuajli para ticpalehuis, ⁵ pampa yejhua quitlajsojtlá topaís niman yejhua oquichijchiu totiopan ican itomin.

⁶ Quemaj Jesús inhuau oyaj. Pero ijcuac ye nisu nemiyaj ne ichan on capitán, yejhua on capitán oquinnahuatij sequimej itetlajsojcahuan* para ijquin ma quijlitij Jesús:

—NoTeco, ma ca xmopajsolo pampa nejhua xnechmelahua para ticalaquis nochan. ⁷ Nion xnechmelahua para nejhua nimitznotzas. San xtlanahuati niman notequichihuiliijcau pajtis. ⁸ Ijcon nochihuas pampa nejhua no nicmati quen niquntlacamati on notequihuajhuan ijcuac itlaj nechnahuatiaj, niman nejhua no niqumphia soldados yejhuan nechtlacamatij ijcuac niqunahuatia. Ijcuac se nicnahuatia canaj ma huiya, yau. Ijcuac ocse niquijlis ma huajla, huajlau. Niman ijcuac on notequichihuiliijcau nicnahuatia itlaj ma quichihua, quichihua.

⁹ Ijcuac Jesús ijcon ocac, sanoyej oquitlatlachaltij. Quemaj ohuajnocuep niman oquimixtlaloj on tlacamej yejhuan quicuitlapanhuijtayaj niman oquijtoj:

—Ica tlen melahuac nemechijlia ica nion se hebreo xqueman niquila sanoyej tlaneltoca quen yejhua in tlacatl.

¹⁰ On yejhuan oquintitlancaj onocuepquej ichan on capitán niman oquinextitoj on tequichihuiliijquetl yopajtic.

Jesús oquiyolihuitij iconeu se sihuacahualtzintli

¹¹ Achijtzin más saquin† Jesús yaya ipan se pueblo itoca Naín, niman ihuan yayaj on inomachtijcahuan niman miyequej ocsequimej tlacamej. ¹² Ijcuac ye quinisihuijtayaj icalaquiyan on pueblo, oquitac ica cuicayaj contocasquej se micatzintli. Yejhua san ica nochí catca teconeu itech se sihuacahualtzintli‡. Miyec tlacatl yejhuan chanejquej ipan on pueblo huajlayaj ihuan. ¹³ Ijcuac on toTeco oquitac on sihuacahualtzintli, oquicnelij, niman oquijlij:

—Ma ca xchoca.

¹⁴ Quemaj Jesús oquinnisihuij niman oquimatocac on caja, niman on yejhuan quechpanohuayaj onoteltijquej. Niman Jesús oquijlij on micatzintli:

—Telpochtli, nejhua nimitzijlia: ¡Xmoquetzehua!

¹⁵ Quemaj on yejhuan yomica onotlalij niman opeu tlajtlajtohua, niman Jesús oquimactilij inan. ¹⁶ Ijcuac nochimej ijcon oquitaquej, onomojtijquej niman opeu cueyiliaj Dios, quijtohuayaj:

—Sen hueyi tiotlajtojquetl ononextij totzajlan.

No quiptojuayaj:

—Dios yohuajlaj niman oquinnotzaco iconehuan.

¹⁷ Niman ipan nochí on iyehualican Judea niman ipan nochí on iyehualican omachiyac on tlen Jesús oquichiu.

Inomachtijcahuan Juan oquinotzquej Jesús (Mt. 11.2-19)

¹⁸ Niman Juan no oquimat nochí yejhua on, pampa inomachtijcahuan oquitlajtlajtohuiliijquej. Quemaj oquinnotz omemej inomachtijcahuan,

¹⁹ niman oquintitlan itech Jesús para quitlajtoltisquej tla yejhua melahuac

§ 7:4 merece * 7:6 amigo de él † 7:11 después ‡ 7:12 viuda; icnosihuatl

Cristo yejhuan ye oncaj para huajlas, noso yej quichasquej ocse. ²⁰ On yejhuan oquintitlan Juan, oquinisihuijquej Jesús niman oquijlijquej:

—On tlacuatequijquetl Juan, otechajtitlan para timitztlajtoltisquej tla tejhua tiCristo yejhuan ye oncaj para huajlas noso yej ticchasperuej ocse.

²¹ Sa no ipan on tonaltin chica inomachtijcahuán Juan ompa nemiyaj, Jesús oquimpajtij miyequej tlacamej ica on cualolistin niman cocolistins, niman ica on xcuajcualtin espíritus, niman no oquinmacac tlachalistli miyequej on yejhuan ciegos. ²² Quemaj Jesús oquinannquilij on inomachtijcahuán Juan:

—Xhuiyan niman xquijlican Juan on tlen nemejhuamej yonenquitaquej niman yonencaquej. Xtlajtlajtohuilican ica aman tlachaj on yejhuan ciegos catcaj, niman on yejhuan huilatzitzintin catcaj quistinemij, niman on yejhuan palaniyaj innacayo pajtij, niman on yejhuan nacastzatzamej catcaj tlacaquij, niman on yejhuan mimiquej yolihiuj* niman noquetztehuaj ipan intlalcon. Niman no xtlajtlajtohuilican ica on yejhuan mayanquej caquij on cuajli tlajtojli yejhuan quitemaca temaquixtilistli. ²³ Sanoyej tlatiochiutli on yejhuan xqueman ometlamatis san nopampa.

²⁴ Ijcuac oyajquej on yejhuan oquintitlanca Juan, Jesús opeu tenojnotza ica Juan niman oquimijlij:

—¿Aquin onenquitatoj ne tlapatlaco? ¿Onenquitatoj se tlacatl yejhuan nolinia itlaneltoc quen se ohuatl nolinijticaj ica on ajacatl? ²⁵ ¿Aquinon, tej, onenquitatoj? ¿Onenquitatoj se tlacatl yejhuan tlaquempepetlaca? Nemejhuamej nenquimatztoquej ica on yejhuan sanoyej tlaquempepetlaca niman cuelitaj nemisquej campa paquilyan, nemij inchan on yejhuan reyes. ²⁶ Aman, tej, ¿aquinon onenquitatoj? ¿Onenquitatoj se tiotlajtojquetl? Quemaj, on melahuac, niman yejhua más hueyixticaj xquen se tiotlajtojquetl. ²⁷ In Juan on tenojnotzquetl yejhuan ica in Yectlajcuilojli ijquin quijtohua:

On yejhuan notech tenojnojtzquetl nictitlanis moyecapan para yejhua mitzyectlalilis mojhui para tias ipan.

²⁸ Nemechijlia ica intzajlan nochimej on tlacamej, xqueman yacaj otlacat yejhuan más hueyixticaj tiotlajtojquetl quen Juan on tlacuatequijquetl. Pero in no melahuac ica on yejhuan quinocahuilis ma quimandaro Dios más hueyi tetlajsojtlalistli† quipias xquen Juan quipia, masqui yejhua xmás hueyixticaj quen Juan.

²⁹ Ijcuac ocacquej Juan, nochimej on tlacamej niman hasta on yejhuan tlapobrerojquej ica impuestos oquitaquej ica Dios melajcanemi, niman yejhua ica onocuatequijquej itech Juan. ³⁰ Pero on fariseos niman on temachtijquej ican on itlanahuatil Dios xoquiselijquej itemachtil Dios niman yejhua ica xonocuatequijquej itech Juan. ³¹ Niman on toTeco oquijtoj:

—¿Tlinon ica huelis niquimixtlalos on tlacamej yejhuan nemij ipan in tonaltin? ¿Quen aquinomej nesij? ³² Ijcomej quen on coconej yejhuan nahuiltiaj ne plaza niman on intehuicalhuan‡ quintzajtziliaj: “Otemechtlapichiliijquej ica on acatlapitzaltin quen quintlapichiliaj ipan se nonamictilistli, pero nemejhuamej xonemijtotijquej. Otemechcuicatlalijquej ica on tlacuicajli teajman yejhuan quinocuicatiaj ijcuac se miqui niman xonenchoaquej.” ³³ Ohuajlaj Juan on tlacuatequijquetl yejhuan nosahua niman xconi vino, niman nemejhuamej nenquijtohuaj ica quipia se xcuajli espíritu. ³⁴ Quemaj onihuajlaj nejhua yejhuan oninochiu Tlacatl. Ijcuac nejhua yejhuan nitlacuani niman niatlini onihuajlaj, nemejhuamej onenquijtojquej ica melahuac nitlacuani niman ica sanoyej niatlini. Niman onenquijtojquej

§ ^{7:21} plagas * ^{7:22} son resucitados; yolij † ^{7:28} amor ‡ ^{7:32} compañeros de ellos

ica nitetlajsojcau§ itech on tlajtlacojquej niman on yejhuan tlacobrarojquej ica on impuestos. ³⁵ Pero on itlamatquilis* Dios napanextia melahuac impan on yejhuan tlajmatquej.

Jesús nemiya ichan Simón on fariseo

³⁶ Semej yejhuamej on fariseos oquinotz Jesús para ihuan tlacuas. Niman Jesús oyaj ichan on fariseo niman onotlalij itech on mesa. ³⁷ Sa no ipan on pueblo nemiya se sihuatl yejhuan xcuajli nohuicaya. Niman ijcuac yejhua oquimat ica Jesús oyaj otlacuato ichan on fariseo, oyaj oquitquic se botella tlachijchiutli ican tetl yejhuan fino. On botella tentiaya ican aceite ajhuiyac. ³⁸ Niman chica chocaticatca, onotlalij icxitlan Jesús niman opeu quimpajpaca icxihuan ican ixayo. Quemaj oquinhuajhuachilij ican itzon. No oquintencualij† niman quemaj oquintequilij on aceite ajhuiyac. ³⁹ Ijcuac on fariseo yejhuan oquinotz Jesús, ijcon oquitac, oquinemilij: “Tla yejhua in tlacatl melahuac tioltajtojquetl yesquia, quimatisquia aquinon quimatocaticaj niman ica xcuajli nohuica, pampa yejhua se tlajtacolej.”

⁴⁰ Quemaj Jesús oquijlij on fariseo:

—Simón, nicpia tlinon nimitzijlis.

On fariseo oquijlij:

—Xnechijli, Temachtijquetl.

⁴¹ Jesús oquijtoj:

—Sen tlacatl oquintlanejtij tomin omemej tlacamej. Se tlacatl oquitlanejtij macuijli cientos denarios, niman ocse ompoajli‡ huan majtlactli.

⁴² Niman ica on omemej tlacamej xhueliyaj cuepayaj on tomin, on yejhuan oquintlanejtij on tomin oquimimpolohuiliij tlen quitehuiquiliayaj. Aman xnechijli, ¿catlejhua de on omemej más oquipialij tetlajsojtlalistli§?

⁴³ Simón oquijlij:

—Nejhua nicuitia ica yejhua on yejhuan más hueyi oquipopolohuiliij on tlen quitehuiquiliaya.

Jesús oquijlij:

—Cuaajli otiquijtoj.

⁴⁴ Quemaj Jesús onocuep para ocontac on sihuatl, niman oquijlij Simón:

—Onicalac mochan niman xotinechmacac atl para nocxihuan. Pero, ¿tiquita yejhua in sihuatl? Yejhua in sihuatl oquinpajpac nocxihuan ican ixayo, niman oquinhuajhuatz ican itzon. ⁴⁵ Nion xotinechtencuaj* ijcuac otinechtlajpaloj, pero yejhua desde ijcuac nican onicalaquico xajticaj ica quintencia nocxihuan. ⁴⁶ Xotinechtlalilij aceite ipan notzontecon, pero yejhua oquitoyau aceite ajhuiyac ipan nocxihuan. ⁴⁷ Nimitzilia ica on miyec itlajtlacol aman yotlapojpolhuiloc ipampa ihueyitetlajsojtlalis. Pero on yejhuan achijtzin itlajtlacol quitlapojpolhuiliaj san achijtzin quiteititia itetlajsojtlalis.

⁴⁸ Quemaj Jesús oquijlij on sihuatl:

—Motlajtlacol nochí yotlapojpolhuiloc.

⁴⁹ Niman on tenotzquej yejhuan ompa ihuan yejyehuaticatcaj opeu sa no yejhuamej quinojliaj:

—¿Aquin tlacatl in? ¿Tlica† quinemilia hueli quitlapojpolhuilia tetlajtlacol?

⁵⁰ Pero Jesús oquijlij on sihuatl:

§ 7:34 yo soy amigo * 7:35 su sabiduría † 7:38 los besó; oquinbesarohuiliij ‡ 7:41

Ompoajli quitosnequi cuarenta, niman ompoajli huan majtlactli quitosnequi cincuenta. § 7:42

amor * 7:45 no me besaste; xotinechmacac beso † 7:49 ¿por qué?; ¿tline?

—Aman yotimaquis pampa otitlaneltocac. Xhuiya ican yolsehuilistli.

8

Sequimej sihuamej quipalehuiyaj Jesús

¹ Más saquin* Jesús oquistinen ipan miyec huehueyican niman pueblos. Quiteijlijtiaya niman quitemacatiaya on cuajli temachtilistli quen Dios tlamandarohua. Niman majtlactli huan ome apóstoles cuicatinemiyaj. ² No ijqui cuicatinemiyaj sequimej sihuamej on yejhuan oquinquixtilijca on xcuajcualtin espíritus niman oquimpajtijca ica incualolis. Semej on sihuamej yejhuan ompa yayaj itoca María yejhuan no itoca catca Magdalena. Itech in sihuatl oquisquej on chicomemej xcuajcualtin espíritus. ³ No ompa tehuan yaya Juana, yejhuan isihuau Chuza. Chuza tlajtlajmatqui catca itech Herodes. No ijqui ompa tehuan yaya Susana niman miyequej ocsequimej más yejhuan quipalehuiyaj ican on tlen quipiayaj.

Jesús oquitlalij se ejemplo de on tocaquetl

(Mt. 13.1-9; Mr. 4.1-9)

⁴ Miyequej tlacamej oquisquej ipan on pueblos para quitasquej Jesús. Niman ijcuac miyec tlacatl onosentlalij, oquinnojnotz ican se ejemplo. Oquimijlij:

⁵ —Sen tocaquetl otlaxinito. Ijcuac tlaxiniaya, sequi xinachtli oxinito ipan ojtlí niman ipan ochojcholojquej, niman on totomej oquicuajquej. ⁶ Niman ocsequi xinachtli oxin ipan tepetlayoj, niman ijcuac in xinachtli oquis, nimantzin ohuajhuac pampa oquipoloto tlacuechahualistli. ⁷ Ocsequi xinachtli oxin intzajlan on huitzcojtin, niman on tlen oixhuac oxomic pampa semi ihuan oquis on huitzcojtin. ⁸ Pero ocsequi xinachtli oxin campa cuajli tlajli. Ijcuac oquis, onoscaltij niman oquipix cuajli itlaquilyo, niman cada xinachtli oquitlaquitij ciento iteyo.

Ijcuac Jesús otlan quijtohua yejhua in, ican chicahuac tlajtojli oquimijlij:

—Tla nemejhuamej nenquipiaj nemotlacaquilis, xcajsicamatican on ejemplo.

Jesús oquimijlij inomachtijcahuan tlica tenojnotza ican ejemplos

(Mt. 13.10-17; Mr. 4.10-12)

⁹ Quemaj on inomachtijcahuan oquitlajtoltijquej tlinon quijtosnequi on ejemplo. ¹⁰ Niman Jesús oquimijlij:

—Nemejhuamej Dios yomechcahuilij para nenquimatisquej on tlinon iyanticatca quen ijqui yejhua tlamandarohua. Pero on ocsequimej niquinnojnotza ican ejemplos para ijcuac quitasquej on tlen nicchihua niman caquisquej on ejemplos, ma ca ma cajsicamatican.

Jesús oquintlajtajtohuilij inomachtijcahuan tlinon quijtosnequi iejemplo on tocaquetl

(Mt. 13.18-23; Mr. 4.13-20)

¹¹ Niman on ejemplo yejhua in quijtosnequi: On xinachtli quijtosnequi itlajtol Dios. ¹² On ojtlí yejhuan ipan oxinito quesqui xinachtli quijtosnequi inyojlo on tlacamej yejhuan san caquij itlajtol Dios. Pero huajlau on diablo niman quejcuania ipan inyojlo itlajtol Dios para ma ca ma quineltocacan niman ma ca ma nomaquixtican. ¹³ On tepetlayoj yejhuan sequi xinachtli ipan oxin, quijtosnequi inyojlo on tlacamej yejhuan caquij on itlajtol Dios niman quiseliaj ican pactli. Pero san tlaneltocaj ipan quesqui tonaltin, pampa on itlajtol Dios xnonelhuayotia huejcatlan ipan inyojlo. Yejhua ica

* **8:1** después

ijcuac quintlatlata on tlen xcuajli noxelohuaj itech on tlaneltoctli. ¹⁴ On tlajli ne intzajlan on huitzcojin campa ipan oxin on xinachtli quijtosnequi on yejhuan caquij itlajtol Dios pero xhueli tlaqui pampa sa comatztoquej quen ijqui nopenoltisquej niman sanoyej† quinequij notomintisquej niman paquisquej ipan innemilis. ¹⁵ Pero on cuajli tlajli yejhuan ipan oxin on xinachtli quijtosnequi inyojlo on tlacamej yejhuan ican cuajli inyojlo melahuac cuelcaquij itlajtol Dios niman quiseliaj niman quixicohuaj nochi on tetlatlatalistli. Yejhuatej quipiaj cuajli intlaquilyo.

*Jesús oquixtij se ejemplo itech on tlahuijli
(Mr. 4:21-25)*

¹⁶ 'Xacaj quitlicultia itlahuil niman quemaj itlaj ica quitlapachohua noso quitlalia itzintlan tlapechtli, yej tlacpac quitlalia para on yejhuan ompa calaquij huelij tlachaj. ¹⁷ Xitlaj‡ oncaj yejhuan iyanticaj niman ijqui nocahua, yej quipantlantisquej. Niman xitlaj yejhuan ichtaca§ oncaj yejhuan xacaj quimatis, yej nochi nopenextis.

¹⁸ 'Yejhua ica, tej, xmotacan sa no nemejhuamej quen nenzaquij pampa on yejhuan quipia tlamachilistli, Dios quimacas más, pero on yejhuan xquipia tlamachilistli, hasta on yejhuan quinemilia quipia Dios quixtilis.

*On yejhuan quichihuas tlen Dios quinequi yejhua icniu Jesús niman inan
(Mt. 12:46-50; Mr. 3:31-35)*

¹⁹ Quemaj inan niman icnihuan Jesús ohualajquej campa yejhua nemiya, pero xhueliyaj quinisihuiayaj pampa miyec tlacatl ompa nemiya. ²⁰ Yacaj ijquin oquijlij Jesús:

—Monan niman mocnihuan ompa on nemij ipan ojtli niman quinequij mitzitasquej.

²¹ Pero yejhua oquinnanquijlij niman oquimijlij:

—On tlacamej yejhuan caquij itemachtil Dios niman quitlacamatij, yejhua nonan niman nocnihuan.

*Jesús oquiteltij on temojtij ajacatl
(Mt. 8:23-27; Mr. 4:35-41)*

²² Se tonajli Jesús ocalac ipan se barco ihuan on inomachtijcahuau, niman oquimijlij:

—Tiahuj ne ipan ocse ilado in atl.

Quemaj oyajquej. ²³ Niman chica quipanahuiayaj on atl, Jesús ococh. Niman ipan on atl opeu temojtij ajaca, hasta on barco opeu temi ican atl, niman ye mero polaquiayaj. Sanoyej temojtijcatca. ²⁴ Quemaj on nomachtijquej oquitlachaltitoj Jesús, niman oquijlijquej:

—¡Temachtijquet! ¡Temachtijquet! ¡Ye tiapolactoquej!

Quemaj Jesús onotelquetz niman ocajhuac on ajacatl niman on atl yejhuan najcocuiya. Nimantzin nochi onoteltil niman nochi cuajli onocau. ²⁵ Quemaj oquimijlij on inomachtijcahuau:

—¿Canon nenquipiaj ne motlaneltoc?

Pero yejhuatej sanoyej onomojijquej niman otlatlachixquej niman quinotlajtoltiayaj semej ihuan ocsequimej:

—¿Manin aquin tlacatl in ica hueli quimandarohua on ajacatl niman on atl, niman yejhuatej quitlacamatij?

*Jesús oquipajtij se tlacatl yejhuan quimpiaya on xcuajcualtin espíritus
(Mt. 8:28-34; Mr. 5:1-20)*

† **8:14** mucho ‡ **8:17** nada; coxtla § **8:17** secreto

26 Niman quemaj oquipanahuijquej on atl niman oyejcoquej ipan on pueblo itoca Gadara, yejhuan oncaj ipan on ocse ilado on atl ixpan Galilea.

27 Ijcuac Jesús otemoc ipan on barco, oquinisihuij se tlacatl yejhuan chanej ne Gadara. Yejhua in tlacatl ye quipiaya miyec tonaltin ica quipiaya on xcuajcualtin espíritus. Yejhua xquitlaliaya itlaquen nion chantiya ipan cajli, yej san neca nemiya ijtic on teostomej yejhuan imijtic quintocayaj on mimiquej.

28 Ijcuac in tlacatl oquitac Jesús, otzajtzic niman onotlacuenquetziaj ixpan. Niman quemaj oquijlij ican chicahuac tlajtoji:

—¿Tlinon ticnequi nohuan, Jesús, tejhua titeConeu itech Dios yejhuan más hueyixticaj? Sanoyej nimitztlajtlanilia ma ca tinechtlajyohuiltis.

29 Ijcon oquijtoj pampa Jesús quinahuatijticatca on xcuajli espíritu ma quisa ijtic on tlacatl. Niman masqui on tlacamej quimasajsalohuaya niman quicxisajsalohuaya ican teposcadenas, yejhua quitecojcotonaya niman on xcuajli espíritu quichihuaultiaya ma huiya neca campa tlacauyan. **30** Jesús oquitlajtoltij:

—¿Quen ijqui motoca?

Niman yejhua oquijlij:

—Nejhua nicpia miyec notoca.

Ijcon oquijtoj pampa sanoyej miyequej catcaj on xcuajcualtin espíritus yejhuan nemiyaj ijtic on tlacatl. **31** Niman on xcuajcualtin espíritus sanoyej oquitlajtlanilijquej Jesús para ma ca quintitlanis ne mictlan campa tetlajyohuiltloyan. **32** Niman ompa nemiyaj miyequej pitzomej ipan se tepetl campa tlacuajcuajtinemiyaj. On xcuajcualtin espíritus sanoyej oquitlajtlanilijquej Jesús para ma quincahuili calaquisquej ne impan on pitzomej, niman yejhua oquincahuilij. **33** Quemaj nimantzin on xcuajcualtin espíritus oquisquej ipan on tlacatl niman ocalaquej impan on pitzomej. Niman yejhuatej on pitzomej nochimej oquiquistequer niman ne ipan on teostol campa huejcatlan oxixinitoj hasta ijtic on mar niman nochimej oamimiquej.

34 On yejhuan tlapiayaj ica on pitzomej, ijcuac oquitaquej tlinon onochiu, ican innemojtil onotlajtlalojquej* para oquitlajtlajtohuilito ne ipan on hueyican niman nochihuiyan techachan yejhuan oncatcaj ipan tepemej.

35 Niman on tlacamej oyajquej oquitatoj on tlen onochiu. Ijcuac oajsiquej ne campa nemiya Jesús, oquinextitoj on tlacatl, yejhuan ipan oquisquej on xcuajcualtin espíritus, yehuaticatca icxitlan Jesús. Niman ye nemiya ican itlaquen niman ocsejpa oquipix cuajli itlamachilis, niman yejhuatej onomojtijquej. **36** Niman on yejhuan oquitaquej quen ijqui onochiu itech on yejhuan quipiaya on xcuajcualtin espíritus, oquitlajtlajtohuilijquej on yejhuan quemach ompa oyajquej quen ijqui onochiu. **37** Quemaj nochitlacatl yejhuan chanej ipan iregión on hueyican itoca Gadara opeu sanoyej quitlajtlaniliaj Jesús para ma nejcuani ompa, pampa yejhuatej sanoyej nomojetiayaj. Yejhua ica Jesús ocalac ipan barco niman oyaj ocse lado. **38** On tlacatl yejhuan ipan oquisquej on xcuajcualtin espíritus sanoyej oquitlajtlanilij Jesús para ma cahuili ihuan huiya, pero yejhua oquinahuatij para ma nocahua. **39** Ijquin oquijlij:

—Xmocuepa para mochan niman xtetlajtlajtohuili nochitlacatl yejhuatej tlajtlamach† tlen Dios omitzchihuilij.

Yejhua ica on tlacatl oyaj, niman oquintlajtlajtohuilij nochimej ipan on hueyican nochitlacatl yejhuatej tlajtlamach† tlen Jesús oquichihuilij.

* **8:34** corrieron † **8:39** cosas

Jesús oquiyolihuitij iichpocatzin se intlayecancau on hebreos niman oquipatij se sihuatl yejhuan yeshuetzinemiya

(Mt. 9:18-26; Mr. 5:21-43)

⁴⁰ Ijcuac Jesús onocuep ne ipan ocse ilado on atl, on tlacamej oquiselijquej ican pactli, pampa nochimej quichixticatcaj. ⁴¹ Quemaj itech ohuajlaj se tlacatl itoca Jairo, yejhuan tlayecanquetl catca ipan on tiopan. Yejhua in tlacatl onotlacuenquetz icxitlan Jesús niman oquicnotlajtlanilij para ma huiya ichan, ⁴² pampa on isihuasenteconeу yejhuan quipiaya canaj majtlactli huan ome xipan ye micticatca. Chica Jesús yaya, miyec tlacatl oyaj ihuan niman hasta quipitzmictiaya†.

⁴³ No ompa tehuan yaya se sihuatl yejhuan quipia majtlactli huan ome xipan ica yeshuetzinemiya. Niman nochi tlen quipiaya oquipopoloj intech on tlapajtijquej, niman xacaj ohuel oquipajtij. ⁴⁴ Yejhua ocuitlapannishuij Jesús niman ocajsic itempan itlaquen niman quemaj nimantzin onoteltij on ica yeshuetziya.

⁴⁵ Quemaj Jesús otetlajtoltij:

—¿Aquinon onechmatocac?

Ijcuac nochimej oquinenequej§, Pedro niman itehuicalhuan* oquijtojquej:

—Temachtijquetl, tiquitzticaj in tlacamej sa mitzmapehuaj niman mitzpitzmictiaj†, niman yej titlajtlani: “¿aquinon onechmatocac?”

⁴⁶ Pero Jesús oquijtoj:

—Yacaj onechmatocac, pampa onicmat ijcuac oquis notech on poder para aquinon on onicpajtij.

⁴⁷ Ijcuac on sihuatl oquitac ica yopanes, ican icuecuetlacalis ohuajlaj niman onotlacuenquetz icxitlan Jesús. Quemaj yejhua oquijlij imixpan nochimej on tlacamej tlica ocajsic itlaquen, niman ica nimantzin opajtic.

⁴⁸ Ijcuacon Jesús oquijlij:

—Noconeу, otipajtic pampa otitlaneltocac. Xhuiya ican yolsehuilistli.

⁴⁹ Jesús oc‡ tlajtlajtoticatca, ijcuac oyejcoc se tlacatl yejhuan ohualeu ne ichan Jairo, itlayecancau on tiopan. Niman on tlacatl oquijlij Jairo:

—Mochpocatzin yomic. Ma ca sa xpajsolo in temachtijquetl.

⁵⁰ Ijcuac Jesús ocac yejhua in, oquijlij Jairo:

—Ma ca xmomojti, yej san xtlaneltoca melahuac, niman mochpocatzin pajtis.

⁵¹ Ijcuac oajsiquej ichan Jairo, Jesús xocahuilij yacaj más ihuan ocalac, yej san Pedro, Jacobo, Juan niman itajhuan on ichpocatzin. ⁵² Nochimej quichoquilijtaticatcaj niman najmanticatcaj ipampa on ichpocatzin. Pero Jesús oquimijlij:

—Ma ca xchoquilican. In ichpocaconetl xmiqui, yej san cochtica.

⁵³ Pero yejhamej san ocuetzquilijquej, pampa quimatzticatcaj ica on ichpocaconetl yomic. ⁵⁴ Quemaj Jesús oquitzquij ipan ima on ichpocaconetl niman oquijlij chicahuac:

—Ichpocaconetl, xmoquetztehua.

⁵⁵ Niman yejhua ocsejpa otlachix niman oquipix nemilistli, niman nimantzin onotelquetz. Quemaj Jesús otlanahuatij ma quitlacualtican on ichpocaconetl. ⁵⁶ Itajhuan on ichpocaconetl sa tlachixticatcaj, pero Jesús oquimijlij ma ca yacaj quijlisquej on tlen onochiu.

‡ 8:42 lo apretaban; quitetztilayaj § 8:45 negaron * 8:45 compañeros de él † 8:45 te empuja; mitztetzeliaj ‡ 8:49 todavía; sanquen

9

Jesús oquintitlan on majtlactli huan ome apóstoles para temachtisquej niman tepajtisquej

(Mt. 10:5-15; Mr. 6:7-13)

¹ Jesú oquinsentlalij on majtlactli huan ome apóstoles niman oquinmacac poder niman tlanahuatijli para quintequivixtilisquej nochí on xcuajcualtin espíritus niman para tepajtisquej. ² Quemaj oquintitlan ma quiteijlitij on temachtijli ica Dios quinequi tlamandaros inca yejhuamej on yejhuan quinocahuiliaj, niman para quimpajtisquej on cocoxquej. ³ Niman oquimijlij:

—Ma ca itlaj xquictican para ipan ojtli, nion cojtopijli*, nion bolsa, nion tlacuajli, nion tomin. Niman san se nemotlaquen xquitquican. Ma ca ome. ⁴ Xmocahuacan ipan san catlejhua cajli campa nemajsisquej hasta ijcuac nemejcuaniisquej ipan on pueblo. ⁵ Niman campa xmechselsiquej, xquisacan ipan on pueblo niman xtzejtzelocan ipan nemocxi on talteutli, para ma quimatican ica yejhuamej cualaniaj Dios.

⁶ Yejhuamej, tej, oyajquej ipan nochí on pueblitos, niman temachtiayaj on cuajli tlajtojli yejhuan quitemaca temaquixtilistli niman quimpajtijtiayaj on cocoxquej nochihuiyan.

Herodes xquimatiya tlinon quinemilis itech ica Jesús

(Mt. 14:1-12; Mr. 6:14-29)

⁷ On gobernador Herodes ocac tlen Jesús quichihuaya, niman xquimatiya tlinon quinemilis, pampa sequimej quijtohuayaj ica Juan yoyoliu† niman yonoquetzteu ipan itlalcon, ⁸ niman ocsequimej quijtohuayaj ica on yejhua on tiotlajtojquetl Elías yejhuan yononextij. Niman ocsequimej quijtohuayaj ica semej on ye huejcahui tiotlajtojquej yoyoliu niman yonoquetzteu ipan itlalcon. ⁹ Pero Herodes oquijtoj:

—Sa no nejhua onitlanahuatij para ma quiquechtzontequican Juan. ¿Manin, tej, aquinon on tlacatl yejhuan nicaqui quitenehuaj quichihua miyec tlajtlamach‡?

Niman Herodes quichihuaya canica para quitas Jesús.

Jesús oquintlacualtij macuijli mil tlacamej

(Mt. 14:13-21; Mr. 6:30-44; Jn. 6:1-14)

¹⁰ Ijcuac on apóstoles onocuepquej, oquitlajtlajtohuilijquej Jesús nochí tlinon oquichijquej. Quemaj oquinhuicac niman oyajquej ipan se tlapat-laco nisiu ipan hueyican, itoca Betsaida. ¹¹ Pero ijcuac on tlacamej oquimatquej, oyajquej ihuan. Niman Jesús oquinselij niman oquinnojnotz ica on quen Dios tlamandarohua impan on yejhuan quinocahuiliaj, niman Jesús no oquimpajtij on cocoxquej.

¹² Ijcuac ye tiotlactitiaya, on majtlactli huan ome nomachtijquej oquijlijquej:

—Xquintijtitlani on tlacamej para ma quitejtemotij canon cochisquej niman tlen quicuasquej ipan on pueblitos niman mijmiyecan campa san nijnisiu, pampa nican campa tinemij xitlaj§ oncaj.

¹³ Pero Jesús oquimijlij:

—Nemejhuamej xquinmacacan tlen quicuasquej.

Niman yejhuamej oquijtojquej:

* 9:3 bastón † 9:7 resucitó; yoyol ‡ 9:9 cosas § 9:12 nada; coxtla

—Xticpiaj más tlacuajli yej san yejhuan in macuijli pan niman in ome michimej. ¿Ticnequi ma ticohuatij tlacuajli para nochimej in tlacamej?

¹⁴ On tlacamej canaj macuijli mil catcaj. Pero Jesús oquimijlij on inomachtijcahuau:

—Xquinnahuatican ma nosehuican ipan grupos de ompoajli* huan majt-lactli ne ipan on sacayo.

¹⁵ Yejhuamej ijqui oquichijquej niman nochimej onotlajtlalijquej.
¹⁶ Quemaj ijcuac Jesús ocontilan on macuijli pan niman on ome michimej, oajcotlachix ne ilhuicac niman oquimacac tlaxtlahuijli Dios para on tlacuajli. Niman quemaj ijcuac yoquitlatlapan on pan, oquinmacac on inomachtijcahuau para ma quinxexelohuilican on tlacamej. ¹⁷ Yejhuamej otlacuajquej niman nochimej oixhuiquej. Niman quemaj on nomachtijquej ica on tlatlajcotzitzintin tlen onocau oquitemiltilijquej majtlactli huan ome chiquiutin.

Pedro oquijtoj ica Jesús yejhua Cristo

(Mt. 16.13-19; Mr. 8.27-29)

¹⁸ Se tonajli ijcuac Jesús iselti quichijticatca oración, niman on inomachtijcahuau ompa ihuan nemiyaj, oquintlajtoltij:

—On tlacamej, ¿quen quijtohuaj aquin nejhua?

¹⁹ Yejhuamej oquijlijquej:

—Sequimej quijtohuaj ica tejhua tiJuan on tlacuatequijquetl, ocsequimej quijtohuaj ica tejhua tiElías, niman no sequimej quijtohuaj ica tise on ye huejcahui tiotlajtojquej yejhuan yoyoliu† niman yonoquetzteu ipan itlalcon.

²⁰ Quemaj oquintlajtoltij:

—Niman nemejhuamej, ¿quen nenquijtohuaj aquin nejhua?

Niman Pedro oquijlij:

—Tejhua tiCristo yejhuan ohualeu itech Dios.

Jesús oquinmachiltij on inomachtijcahuau ica yejhua quitlajyohuilitisquej niman quimictisquej

(Mt. 16.20-28; Mr. 8.30—9.1)

²¹ Pero yejhua sanoyej‡ cuajli oquinnahuatij para ma ca yacaj ijcon quijlisquej. ²² Niman oquimijlij:

—Nejhua yejhuan oninochiu Tlacatl ica oncaj niquijyohuis miyec tlajtlamach. On tlajtlajmatquej niman intlayecancahuau on tiopixquej niman on temachtijquej ican itlanahuatil Dios xnechselisquej. Nechmictisquej, pero ipan yeyi tonajli niyolihuis§ niman ninoquetztehuas ipan notlalcon.

²³ Niman nochimej oquimijlij:

—Tla yacaj quinequi nohuan yas, ma quelcahua on tlen quinequi, ma nemi listed para tlajyohuis mojmostla no ijqui quen se tlacatl tlayohuia sanoyej ijcuac quimamajtiu icojnepanol* ne campa quimictisquej, niman nohuan ma huajla. ²⁴ Yejhua in nemechijlia pampa yejhuan quinequis quimaquixtis inemilis ipan in tlalticpactli, quipolos ialma, pero yejhuan san nopampa quipolos inemilis ipan in tlalticpactli yejhua quiselis nemilistli para ialma.

²⁵ Xitlaj ica quipalehuis on tlacatl tla quinoyaxcatis† nochí tlen oncaj ipan in tlalticpactli niman sa no yejhua popolihuis noso noxoxotonis. ²⁶ Tla yacaj, tej, noca pinahua niman ica pinahua on tlen nictemachtia, nejhua yejhuan oninochiu Tlacatl no ica nipinahuas ijcuac nihuajlas ican nohueyilis, ican

* ^{9:14} Ompoajli quitosnequi cuarenta, niman ompoajli huan majtlactli quitosnequi cincuenta.

† ^{9:19} resucitó; yoyol ‡ ^{9:21} mucho § ^{9:22} voy a resucitar * ^{9:23} su cruz † ^{9:25} se posesionará; quinoaxcatis, quinohuaxcatis, quinotlatquitis

ihueyilis noTajtzin niman inhueyilis on yejyejtoquej iilhuicactequitcahuant‡.
 27 Ica tlen melahuac nemechijlia ica sequimej yejhuan aman nican nemij quitasquej Dios tlamandaros ijcuac xe mimiquij.

Jesús onixpatlac

(Mt. 17.1-8; Mr. 9.2-8)

28 Canaj ipan chicueyi tonajli más saquin§ ica ijcon oquijtoj, Jesús oquin-huicac Pedro, Jacobo niman Juan ihuan niman otlejcoc ipan se tepetl para oquichihuato oración. 29 Niman chica Jesús quichijtcatca oración, onixpat-lac niman on itlaquen sanoyej oistayac niman opetlan. 30 Quemaj ohua-jnonextijquej omemej tlacamej ihuan tlajtlajtohuayaj, niman on tlacamej yejhuamej catcaj Moisés niman Elías. 31 Yejhuamej huatlachixticatcaj ijtic on hueylistli sanoyej petlani niman tlajtlajtohuayaj quen Jesús miquis ne Jerusalén. 32 Masqui Pedro niman itehuicalhuan* sanoyej cochisnequiyaj, onotlachaltijquej, niman oquitaquej on ihueyilis Jesús niman on omemej tlacamej yejhuan ompa inhuan nemiyaj. 33 Ijcuac on tlacamej ye quitlalc-huijtiayaj Jesús, Pedro oquijlij:

—Temachtijquetl, ¡sanoyej cuajli ica nican tinemij! Ma ticchijchihuacan yeji caltzitzintin: se para tejhua, ocse para Moisés niman ocse para Elías.

Pero Pedro xquimatiya tlinon quijtohuaya. 34 Niman chica Pedro ijcon tlaj-tohuaya, ohuajlaj se moxtli yejhuan oquintlapacho niman ijcuac oquitaquej ica yomoxcalaquej, onomojtijquej. 35 Quemaj ne ipan moxtli ocaquistic se tlajtojli yejhuan oquijtoj:

—In yejhua notlajsojcaConeu. Yejhua xtancaquican.

36 Ijcuac yotlan caquisti on tlajtojli, oquitaquej ica Jesús sa iselti nemiya. Yejhuamej xoc onahuatquej niman xacaj itlaj oquijlijquej ipan on tonaltin on tlen oquitaquej.

Jesús oquipajtij se telpochtli yejhuan quipiaya se xcuajli espíritu

(Mt. 17.14-21; Mr. 9.14-29)

37 Ijcuac huajmostla, otemoquej ne ipan on tepetl, niman miyec tlacatl oquinamiquito Jesús. 38 Quemaj se tlacatl yejhuan nemiya ne intzajlan on tlacamej oquijlij ican chicahuac tlajtojli:

—Temachtijquetl, por favor xquita nosentecone, 39 pampa cajsi se xcuajli espíritu yejhuan quichihuaultia san tzajtzitehua niman quemaj sanoyej quitzejzelohua hasta camaposonalquisa. Sanoyej quitlajyohuiltia niman xquinequi quitlalcahuis. 40 Sanoyej yoniquinmicnotlajtlanilij on monomachtijcahuau para ma quixtilican on xcuajli espíritu, pero xohuelquej.

41 Jesús oquijtoj:

—¡Oh tlacamej yejhuan xtlaneltoca niman xmelajqui tlanemiliaj! ¿Hasta quemanon nemohuan ninemis niman nemechxicos? Nican xcuajhuica mocone.

42 Pero ijcuac on telpochtli quinisihuiaya Jesús, on xcuajli espíritu oquitla-jcal ipan tlajli niman sanoyej oquitzejzeloj. Pero Jesús nimantzin ocajhuc on xcuajli espíritu, oquipajtij on telpochtli niman quemaj oquimactilij itaj.

43 Niman nochimej oquintlatlachaltij on ihueyilis Dios.

Jesús ocsejpa oquimijlij on inomachtijcahuau ica miquis

(Mt. 17.22-23; Mr. 9.30-32)

Chica nochimej tlamocaitzicatcaj ica nochí on tlen Jesús quichihuaya, yejhua oquimijlij on inomachtijcahuau:

‡ 9:26 ángeles de El: Angeles tequitij ne ilhuicac niman nican ipan in tlalticpactli. § 9:28 después

* 9:32 compañeros de él

⁴⁴ —Cuajli xcaquican yejhua in, niman ma ca xquelcahuacan. Nejhua yejhuan oninochiu Tlacatl nechtemactilisquej intech on tlacamej.

⁴⁵ Pero on nomachtijquej xcajsicamatiyaj tlinon yejhua quimijliaya, pampa xe quincahuiliayaj quimatisquej. Niman yejhamej nomojetiayaj quitlajtoltisquej Jesús ma quinmelajcaili on tlen quimijlijticatca.

Jesús oquimijlij inomachtijcahuān aquinon más hueyixtīcāj ne campa tلاماروھا دیو

(Mt. 18.1-5; Mr. 9.33-37)

⁴⁶ Quemaj on nomachtijquej opejquej nocamatlanij yejhua ica on aquinon más hueyixtias ne intzajlan. ⁴⁷ Jesús oquimat on tlen yejhamej quinemilijticatcaj. Yejhua ica oquitilan se conetl niman inacastlan oquitlalij. ⁴⁸ Quemaj oquimijlij:

—San aquinon yejhuan nopampa quiselia yejhua in conetl, nejhua nechselia. Niman yejhuan nejhua nechselia, no quiselia on yejhuan onechajtitlan. Ijcon, tej, on yejhuan más xitlaj† quijtojticaj nemotzajlan, on yejhuan más hueyixtacaj.

On yejhuan xtechtlahuelita tohuan nōpohua

(Mr. 9.38-40)

⁴⁹ Quemaj Juan oquijlij:

—Temachtijquetl, otiquitaquej se tlacatl yejhuan ican motocatzin quinte-quixtiliya on xcuajcualtin espíritus, pero tejhamej oticnahuatijquej ma ca sa ijqui ma quichihua, pampa xtohuan quistinemi.

⁵⁰ Pero Jesús oquijlij:

—Ma ca xtlacahualtican, pampa on yejhuan xitlaj‡ ica techixnamiqui, tohuan nōpohua.

Jesús ocajhuac Jacobo niman Juan

⁵¹ Ijcuac ye nisu on tonajli ica Jesús tlejcos ne ilhuicac, opeu nejnemi ican yolchicahualistli para Jerusalén. Ijcon, tej, ocajsic iohui para Jerusalén. ⁵² Oquintitlan sequimej iyecapan, niman yejhamej oyajquej ipan se pueblito yejhuan oncaj ne ipan on iregión Samaria para oquitejtemotoj canon nosehuis. ⁵³ Pero on yejhuan chantiyaj ipan on pueblito xoquinequej quiselijquej pampa oquitaquej ica yau ne Jerusalén. ⁵⁴ Ijcuac on nomachtijquej Jacobo niman Juan ijcon oquitaquej, oquijlijquej Jesús:

—ToTeco, ¿ticnequi para ma titlanahuatican ma huajhuetzi tlitl ne ilhuicac ijcon quen oquichiu on tiotlajtojquetl Elías para nochimej ma tlatlacan?

⁵⁵ Quemaj Jesús oquimixtlaloj niman oquimajhuac, oquimijlij:

—Nemejhuamej xnenquimati tlinon nemojtic yocalac. ⁵⁶ Nejhua, tej, yejhuan oninochiu Tlacatl onihuajlaj xpara niquinxoxotonilis innemilis on tlacamej, yej para niquinmaquixtilis.

Quemaj oyajquej ipan ocse pueblito.

On yejhuan nohuicas ihuan Cristo ica oncaj tlajyohuis

(Mt. 8.19-22)

⁵⁷ Chica yejhamej yayaj ipan ojtli, se tlacatl oquijlij Jesús:

—NoTeco, nicnequi nias mohuan san canon tejhua tias.

⁵⁸ Jesús oquijlij:

—On ostotzitzintin quipiaj intecalhuan, niman on totomej quipiaj intepasol, pero nejhua yejhuan oninochiu Tlacatl xnicpia nion canon nicochi.

⁵⁹ Jesús oquijlij on ocse tlacatl:

—Xhuajla nohuan.

† 9:48 nada; coxtla ‡ 9:50 nada; coxtla

Pero yejhua oquijlij:

—NoTeco, xnechcahuili achtopa ma nihuiya para nicontocas notaj niman quemaj mohuan nias.

⁶⁰ Jesús oquijlij:

—Xquincahua on yejhuan mictoquej ixpan Dios ma quintocacan on imicatzitzihuan, pero tejhua xhuiya niman xteijli on temachtijli yejhuan quitemachiltia quen ijqui Dios tlamandarohua.

⁶¹ Quemaj ocse no ijqui oquijlij:

—NoTeco, nicnequi mohuan niyas, pero achtopa xnechcahuili ma niquin-nahuatiti nochanchanecahuans.

⁶² Pero Jesús oquijlij:

—On yejhuan pehua yau nohuan niman noteltia, nemi quen se tlacatl yejhuan pehua tequiti ica on tepostlaxoponajli*, niman quemaj icuitlapan on tlacha. On yejhuan ijcon quichihua xitlaj† ica hueli tlapalehuiya ne campa Dios tlamandarohua.

10

Jesús oquintlapejpenij setenta nomachtijkej para yasquej iyecapan

¹ Más saquin*, toTeco oquintlapejpenij yepoajli† huan majtlactli tlacamej, niman ojomemej iyecapan oquintitlan ipan nochis pueblos niman lugares campa yejhua yasquia. ² Antes yasquiaj oquimijlij:

—On pixquilitli sanoyej‡ hueyi, pero xmiyequej nemij on pixcaquej para pixcasquej. Yejhua ica, tej, xtlajtlanilican iTeco on pixquilitli para ma quinhuajtitlani más tequitquej para ma pixcaquij. ³ Nemejhuamej xhuiyan. Nemechtitlani quen borreguitos intzajlan on lobos. ⁴ Ma ca xquictican bolsa, nion tomin, nion cactin. Niman ma ca xmoteltican para yacaj nenquitlajpalosquej ipan ojti. ⁵ Ijcuac nencalaquisquej techan, achtopa xtetlajpalocan, xteijlican: “¡Xyolsejtiacan chanejquej!” ⁶ Niman tla ompa nemij yacaj yejhuan quinequi quipias yolsehuilistli, nocahuas nemotetlapalohualis. Pero tla ca, nemotetlapalohualis nocuepas nemotech. ⁷ San se cajli ipan xmocahuacan ne campa quiselisquej nemotetlapalohualis. Xtlacuacan niman xconican on tlinon yejhuan mechmacasquej, pampa on tequitquetl quimelahuas quej ipan se pueblo campa mechseliaj, xcuacan tlinon mechmacasquej. ⁹ Xquimpajtican on cocoxquej yejhuan ompa nemij niman xquimijlican on tlacamej yejhuan chantij ne: “Dios yomechnishuij para yejhua mechmandaros.” ¹⁰ Pero tla nemajsij ipan se pueblo campa xmechseliaj, xquisacan ipan on calles niman xquijtocan: ¹¹ “Hasta italteuyo nemopueblo yejhuan onocau ipan tocxiuhan tictzejzelohuaj para temechtitiaj ica nencualaniaj Dios. Pero xmatican ica Dios yomechnishuij para mechmandaros.” ¹² Nemechijlia ica ipan on tonajli ijcuac Dios teyolcuitis niman tetlajtlacolmacas, on pueblo más temojtij quiselis icastigo xquen on tlacamej yejhuan chantij ipan on hueyican Sodoma.

Jesús oquimajhuac on yejhuan xnoyolpatlayaj masqui oquitaquej imilagros (Mt. 11.20-24)

¹³ Tla on chanejquej ipan on huejhueyican intoca Tiro niman Sidón quitasquiaj on milagros yejhuan oquitaquej Corazín niman Betsaida,

§ **9:61** mi familia * **9:62** arado † **9:62** nada; coxtla * **10:1** después † **10:1** Yepoajli quitosnequi sesenta, niman yepoajli huan majtlactli quitosnequi setenta. ‡ **10:2** mucha § **10:7** merece * **10:7** casa; cajli

yejhuamej ye huejcahui cacahuasquia ica quichihuaj on tlen xcuajli. Niman yejhuamej notlaquentisquiaj ican tlaquentli yejhuan tlachijchiutli ican ichtli niman quinotemilisquiaj tliconextli ipan intzontecon para quiteititisquiaj ica yocajcajquej quichihuaj on tlen xcuajli. Yejhua ica temojtij yes para yejhuamej on yejhuan chantij ipan on pueblos itoca Corazín niman Bet-saida pampa ijcuac oquitaquej on milagros xonoyolcuepquej. ¹⁴ Niman nemechijlia ica ipan on tonajli ijcuac Dios teyolcuitis niman tetlajtlacolmacas, yejhuamej más hueyi castigo quiselisquej xquen on tlacamej ne Tiro niman Sidón. ¹⁵ Niman yejhuan chanejquej ipan on pueblo Capernaum sanoyej nohueyimatij ipampa on hueyilistli yejhuan quipia ipueblo. Yejhuan quinemiliaj quinmacas Dios hueyilistli ne ilhuicac pero quinmacas tlajy-ohuilistli ne mictlan.

¹⁶ 'On yejhuan mechcaqui, nejhua nechcaqui. Niman on yejhuan xmechsilia, nejhua xnechsilia, niman on yejhuan xnechsilia, xquiselia on yejhuan onechajtitlan.

On setenta nomachtijquej ohuajnocuepatoj ican pactli

¹⁷ Más saquin† ijcuac yotlanquej oquistinenquej, on yepoajli‡ huan majtlactli nomachtijquej onocuepquej ican pactli niman oquijlijquej Jesús:

—¡ToTeco, hasta on xcuajcualtin espíritus otechtlacamatquej ijcuac otiquin-nahuatijquej ican motocatzin yejhuan otitechmacac!

¹⁸ Jesús oquimijlij:

—Nejhua oniquitac ohuetzico Satanás ne ilhuicac quen itlaj tlapetlanajli.

¹⁹ Xquitacan, nejhua onenmechmacac poder para impan nencholosquej on cohuamej niman on colomej, niman para nenquitlanisquej noch icojtilis on totlahuelicniu, niman xitlaj§ huelis mechcocos*. ²⁰ Pero ma ca xpaquican pampa tla on xcuajcualtin espíritus mechtlacamati, yej xpaquican pampa nemotoca ye tlajcuiolnesticaj ne ilhuicac.

Jesús sanoyej opac

(Mt. 11.25-27; 13.16-17)

²¹ Quemaj on Espíritu Santo sanoyej oquipactij Jesús niman Jesús oquijtoj:

—Nimitzhueyilia noTajzin, iTeco ilhuicac niman tlalticpactli, pampa otiquinmiyanilij in tlajtlamach† on yejhuan tlajmatquej niman on tlacajsicamatquej, niman otiquimpantlantilij on yejhuan mitzneltocaj quen coconej. Quemaj, noTajzin, ijquin oticchii pampa tejhua ijqui oticnec.

²² Quemaj Jesús oquijtoj:

—NoTajzin onechmactilij noch tlajtlamach. Xacaj quimati aquinon nejhua yejhuan niteConeu, yej sa no noTajzin. Niman xacaj quimati aquinon noTajzin, yej san nejhua niteConeu, niman yejhuamej on yejhuan nicnequi niquimimpanextilia.

²³ Quemaj oquimixtlaloj inomachtijcahuan niman oquimijlij yejhuamej inseltimej:

—Melauc tlatiochiutin on yejhuan quitaj on tlen nemejhuamej nenquitaj. ²⁴ Nemechijlia ica miyequej tiotlajtojquej niman reyes oquinequej quitasquej niman caquisquej on tlen nemejhuamej nenquitaj niman nencaquij, pero xohuelquej.

Sen samaritano oquichiu on tlen cuajli

²⁵ Quemaj se temachtijquetl ican on itlanahuatil Dios, onotelquetz niman oquinotzato Jesús para quitlatlatas. Oquitlajtoltij:

† **10:17** después ‡ **10:17** Yepoajli quitosnequi sesenta, niman yepoajli huan majtlactli quitosnequi setenta. § **10:19** nada; coxtla * **10:19** les dolerá † **10:21** cosas

—Temachtijquetl, ¿tlinon cuajli nicchihuas para nicpias nemilistli yejhuan para nochipa?

²⁶ Jesús oquijlij:

—¿Tlinon tlajcuilolnesticaj ipan on tlanahuatijli? ¿Quen ijqui ticajsicamati?

²⁷ On temachtijquetl ican on tlanahuatijli oquinanquilij:

—Xtlajsojtla[†] moTeco Dios ican nochí moyojlo, ican nochí moalma, ican nochí mochicahualis niman ican nochí motlamachilis, niman xtlajsojtla motlalticpacicniu no ijqui quen tejhua timotlajsojtla.

²⁸ Quemaj Jesús oquijlij:

—Cuajli otitlananquilij. Ijcon xchihua, niman ticpias nemilistli para nochipa.

²⁹ Pero on temachtijquetl ican on tlanahuatijli quinequiya quimanahuis itlajtol. Yejhua ica, tej, ocsejpa oquitlajtoltij Jesús:

—¿Aquinonon notlalticpacicniu yejhuan nonequi nictlajsojtas?

³⁰ Ijcuacon Jesús oquitlalij se ejemplo, oquijlij:

—Sen tlacatl oquis Jerusalén niman temohuaya ipan on ojli yejhuan yau ipan on hueyican itoca Jericó. Niman ipan on ojli oquitzacuilijquej sequimej tlachtequej yejhuan nochí oquicuilijquej, hasta itlaquen. Oquimajmailijquej niman oquitlajcaltejquej sotlajtoc. ³¹ Niman onochiu ica se tiopixqui ompaca panotiaya ipan on ojli, pero ijcuac oquitac ica ompa tlajcaltoc on tlacatl, yej san oquipanahuij ocse lado ocomelau. ³² No ijqui se levita opanoc ompaca, niman ijcuac oquitac on tlacatl, san oquipanahuij niman no ocse lado ocomelau. ³³ Quemaj se tlacatl chanej ne ipan on iregión Samaria yejhuan panotiaya ipan on ojli. Ijcuac yejhua oquitac on tlacatl tlacocojli\$, oquicnelij*. ³⁴ Yejhua oquinisihuij, niman oquipajtilij ican aceite niman vino ne campa tlacocojli, niman oquitejcivilij ican pitzahuac tlaquentli\$. On samaritano cuajhuicaya iyolcau niman oquitejcoltiipan. Quemaj ocuicac ipan se chanyotl[†] campa nosehuij on nejnenquej niman ompa oquipalehuij. ³⁵ Huajmostla, ijcuac on samaritano ye yas, oquixtij tomin ipan ibolsa niman ome denarios oquimacac on iteco on chanyotl, niman oquijlij: “Xpalehui yejhua in tlacatl, niman tla itlaj más quipolos, nejhua nimitztlaxtlahuilis ijcuac nihuajlas ocsejpa.”

³⁶ Quemaj Jesús oquitlajtoltij on temachtijquetl ican on tlanahuatijli:

—¿Catlejhua de on yeyimej tlacamej ticnemilia ica yejhua nohuica quen itlalticpacicniu itech on tlacatl yejhuan oquitlachtequilijquej?

³⁷ On temachtijquetl ican on tlanahuatijli oquijtoj:

—On yejhuan oquicnelij.

Ijcuacon Jesús oquijlij:

—Tla ijcon, xhuiya niman no ijqui xteicneli.

Jesús oquinnottz Marta niman María

³⁸ Jesús ihuan inomachtijcahuán más onejnen niman oajsic ipan se pueblito, niman ompa se sihuatl itoca Marta oquiselij ichan. ³⁹ Marta quipaya se icniu sihuatl itoca catca María. Niman María onotlalij icxitlan Jesús para ocac on tlinon yejhua quijtohuaya. ⁴⁰ Pero Marta sanoyej tequimiquiya, niman yejhua oyaj itech Jesús niman oquijlij:

—NoTeco, ¿tlen xticmomaca cuenta ica nocniu nopal cahua in tequitl? Tej, xquijli ma nechpalehui.

⁴¹ Pero Jesús oquijlij:

‡ **10:27** ama § **10:33** lastimado * **10:33** movido a misericordia † **10:34** vendas ‡ **10:34** casa; cajli

—Marta, Marta, sa tlamach ticomatzticaj niman timopajsolohua ican miyec tlajtlamach§. ⁴² Pero san se tlamatli* oncaj yejhuan más hueyi quijtosnequi. Niman María oquitlapejpenij on tlen más cuajli, niman xacaj quicuilis.

11

*Jesús oquintitij on inomachtijcahuān quen ijqui quichihuasquej oración
(Mt. 6.9-15; 7.7-11)*

¹ Se tonajli Jesús quichijtacatca oración. Niman ijcuac otlan, semej ino-machtijcahuān oquijlij:

—ToTeco, xtechmachtí quen ijqui ticchihuasquej oración ijcon quen Juan oquinmachtij on inomachtijcahuān.

² Jesús oquimijlij:

—Ijcuac nenquichihuasquej oración xquijtocan ijquin:
ToTajtzin aquin tinemi ne ilhuicac, ma mitzyectenehua nochi tlacatl. Ma huajla on tonaltin ijcuac ticmandaros nochi tlacatl. Ipan in tlaltic-pactli on tlacamej ma quichihuacan on tlen ticnequis ijcon quen nochihua ne ilhuicac.

³ Aman xtechmaca tlen ticusquej on yejhuan mojmostla ica tipanotoquej.

⁴ Niman xtechtlapojpolhuili totlajtlacolhuan ijcon quen tejhuamej tiquint-lapojo-polhuiyaj on yejhuan tlajtlamach* xcujli techchihiliaj. Niman xtechpalehui para ma ca titlajtlacosquej, yej xtechejcuani nochi tlin xcujli.

⁵ No ijqui oquimijlij Jesús:

—Ma ticontlalican ica semej nemejhuamej quipia se itetlajsojcau† niman canaj ipan tlajcoyehuajli yau ichan on itetlajsojcau niman quijlia: “Notetlaj-sojcau, xnechtlanejti yeyi pan, ⁶ pampa se notetlajsojcau huejca ohualeu niman san quemach oyejcoc nochan, niman xnicipia tlhon nicualtis.” ⁷ Niman ma ticontlalican ica on ocse cuajnanquilis nepa icalijtic, niman quijlis: “Ma ca xnechpaj solo. Notlatzacuilyou‡ cuajli tzacuticaj, niman nocone huan nohuan nemij ipan tlapechtli. Xnihuelis ninoquetztehuas para nimitzon-macas.” ⁸ Nemechijlia ica masqui xnoquetztehuasnequisquia para con-macas, pero san pampa itetlajsojcau quitlajtlanilia, yejhua noquetztehuas niman quimacas nochi tlen quipolojticaj. ⁹ Yejhua ica nemechijlia: xtla-jtlanilican Dios on tlen mechpolohua, niman yejhua mechmacas. Xtejtemocan on tlen mechpolohua, niman nenquinextisquej. Xtetepinican on tlatzacuilyotl, niman Dios mechtlapohuilis. ¹⁰ Ijcon xchihuacan, pampa yejhuan quitlajtlani, quiselia, niman yejhuan quitejtemohua, quinextia, niman yejhuan quitetepinia on tlatzacuilyotl, quitlapohuiliaj.

¹¹ ’¿Tlen nemotzajlan yacaj tajtli nemi yejhuan noyolchicahuas para quimacas iconue se tetl ijcuac quitlajtlanilis se tlaxcajli? ¿Noso quimacas se cohuatl ijcuac quitlajtlanis se michin? ¹² ¿Noso quimacas se colotl ijcuac quitlajtlanis se totoltel? ¹³ Aman, tej, tla nemejhuamej yejhuan xnencua-jcualtin tlacamej nenquimatiq quen nenquinmacasquej nemocone huan on tlajtlamach tlen cuajli, sanoyej§ pantlannesticaj ica nemoTajtzin ilhuicac chanej quinmacas Espíritu Santo on yejhuan quitlajtlanilisquej.

*On fariseos oquijtohuilijquej Jesús ica quipia ipoder on Beelzebú
(Mt. 12.22-30; Mr. 3.19-27)*

14 Jesúz quixtilijticatca se tlacatl on xcuajli espíritu yejhuan oquinontilijca, niman ijcuac on xcuajli espíritu oquis, on nontzin otlajtoj. Niman yejhua ica on tlacamej otlamojcaitaquej. **15** Pero sequimej oquijtojquej:

—Yejhua in tlacatl quintequixtilia on xcuajcualtin espíritus ica ipoder on Beelzebú yejhuan intlayecancau.

16 Niman ocsequimej, san para quitlatlataisquej, quitlajtlaniliayaj ma quichihua se tlamajhuisojli milagrosa yejhuan ne ilhuicac quisticaj. **17** Pero Jesúz quimatzticatca tlinon quinemilijticatcaj, niman oquimijlij:

—San catlejhuá gobierno yejhuan notlajcoxelohua, xoxotoni. Niman tla ipan se chanyotl* on chanejquej noxelohuaj ican tlahuejli, no ijqui xoxotonij.

18 No ijqui, tej, tla on Satanás noxelos inhuan on xcuajcualtin espíritus, ¿quen ijqui huelis onyas nochipa ipoder? Yejhua in niquijtohua pampa nemejhuamej nenquijtohuaj ica nictequixtilia on xcuajcualtin espíritus ican ipoder on Beelzebú. **19** Pero tla ijqui yesquia quen nenuquinemiliaj, ¿aquinon quinmaca poder on yejhuan nemochantlacaj† para no quitequixtiliaj on xcuajcualtin espíritus? Sa no yejhuan quiteititiaj ica xcuajli nentlanemiliaj. **20** Pero tla Dios nechmaca poder para nictequixtilia on xcuajcualtin espíritus, yejhua in quijtosnequi ica Dios yohuajlaj para nemoca tlaman-daros.

21 Ijcuac se cojtiticaj tlacatl cuajli nemi armado niman quitlapia ichan, on tlen ompa quipia xacaj hueli quicuria. **22** Pero tla huajlau ocse tlacatl yejhuan más cojtic xquen yejhua niman quitlani, tla ijcon, on tlacatl yejhuan más cojtic cuilia nochí iarmas yejhuan ica noyolchicahuaya iteco on cajli, niman yejhua quixexelohua para ocsequimej.

23 'On yejhuan xitlaj‡ ica nechixnamiqui nohuan nophohua, niman on yejhuan xnohuan tlasantlalia tepopolohua.

*On xcuajli espíritu ocsejpa nochantia ipan iyojlo on tlacatl
(Mt. 12.43-45)*

24 Ijcuac se xcuajli espíritu quisa ipan se tlacatl, pajpanotinemi nochihuiyan campa tlahuactoc. Quitejtemojtinemi campa nosehuis, niman ijcuac xquinextia, quinemilia: "Ocsejpa nias ne ipan on tlacatl campa oniquis."

25 Ijcuac ocsejpa nocuepa, conextia on tlacatl quen itlaj cajli yejhuan ijtic caultzin tlachpancan niman cuajli tlaojoncaj. **26** Quemaj yejhua yau niman cominana ocsequi chicome yejhuan más xcuajcualtin espíritus xquen yejhua, niman nochimej nochantiaj ijtic on tlacatl. Yejhua ica on tlacatl más xoc cuajli nemi xquen achtopa nemija.

Jesúz oquijtoj on tlen más cuajli para se quichihua

27 Ijcuac Jesúz otlan quijtohua yejhua in tlajtlamach, se sihuatl yejhuan nemiya intzajlan on tojlamej, ican chicahuac tlajtojli oquijlij:

—Tlatiochiutli sanoyej on sihuatl yejhuan omitztlacatilij niman omitzchikitij.

28 Pero yejhua oquijtoj:

—¡Dios más quintiochihua on yejhuan caquij itlajtol niman quitlacamatij!

Yejhua on xcuajcualtin tlacamej oquitlajtlanilijquej Jesúz ma quintlamajhuisolti ican se milagro

(Mt. 12.38-40; Mr. 8.12)

29 On tlacamej más nosentlalijticatcaj iyehualican Jesúz, niman yejhua opeu tlajtlajtohua, quijtohuaya:

* **11:17** casa; cajli † **11:19** paisanos ‡ **11:23** nada; coxtla

—On tlacamej yejhuan nemij ipan in tonaltin yejhuamej xcuajcualtin. Nechtlatlaneliaj ma nicchihua se tlamajhuisojli milagrosa, pero xnicchihuas, yej san on itlamajhuisol on tiotlajtojquetl Jonás. ³⁰ Ijcon quen Jonás onochiu tlamajhuisojli para on tlacamej yejhuan chantiyaj ne Nínive, no ijqui nejhua yejhuan oninochiu Tlacatl ninochihuas tlamajhuisojli para on tlacamej yejhuan nemij ipan in tonaltin. ³¹ Ipan on tonajli ijcuac Dios teyolcuitis niman tetlajtlacolmacas, on sihuatequihua tlayecanquetl ne Sur noquetztehuas niman quintlajtlacolmacas on tlacamej yejhuan aman nemij. Ijcon huelis quichihuas pampa yejhua ohualeu ne campa más huejca oncaj on pueblo ipan in tlalticpactli para ocaquico itlamatquilis[§] Salomón, niman nejhua nican ninemi yejhuan más nihueyixtacaj xquen Salomón niman on yejhuan aman nemij xnechchihuijaj cuenta. ³² Ipan on tonajli, ijcuac Dios teyolcuitis niman tetlajtlacolmacas, on yejhuan chantiyaj ne ipan on hueyican itoca Nínive noquetztehuasquej niman quintlajtlacolmacasquej on tlacamej yejhuan aman nemij. Ijcon quichihuasquej pampa on yejhuan ochan-tiquej Nínive onoyolpatlaquej ijcuac Jonás oquintlajtlajtohuilij itemachtil Dios. Niman nejhua nican ninemi yejhuan más nihueyixtacaj xquen Jonás niman on yejhuan aman nemij xonoyolpatlaquej ijcuac oniquintlajtlajtohuilij itemachtil Dios.

*Jesús otemachtij itech ica on tlahuilji
(Mt. 5.15; 6.22-23)*

³³ Xacaj quitlicultia itlahuil niman quitlalia campa iyantias, nion itzintlan itlaj chiquiutli. Yej quitlalia campa tlacpac para quintlahuiliya on yejhuan calaquisquej ijtic on cajli. No ijqui, tej, ijcuac se quimati itech ica Dios xquitocarohua quiyanas. ³⁴ Ipan motlalnacayo ticpia mixtololojhuana para titlacha. Tla mixtololojhuana cuajli tlacha, hueli tiquita on tlen ticchihua. Pero tla xtitlacha, xhueli tiquita on tlen ticchihua. No ijqui tla motlamachilis cuajli, hueli ica ticajsicamati on tlen Dios quinequi para ticchihua. Pero tla motlamachilis xcuajli, tla ijcon xticajsicamati on tlen Dios quinequi para ticchihuas. ³⁵ Yejhua ica nonequi para tiquejehuas motlamachilis para ticajsicamatis on tlen Dios quinequi para ticchihuas, niman para ma ca ticpolos itlaj mocajsicamatilis. ³⁶ Ijcon, tej, tla motlamachilis cajsicamati nochitlen Dios quinequi para ticchihuas, tla ijcon, xmitzpolos nion achijtzin cajsicamatilistli, yej motlamachilis quen se lámpara yes yejhuan mitzititis nochitlajtlamach.

*Jesús oquiteijlij ma ca xmohuicacan quen nohuicaj on fariseos niman on temachtijquej ican itlanahuatil Dios
(Mt. 23.1-36; Mr. 12.38-40; Lc. 20.45-47)*

³⁷ Ijcuac Jesús otlan tlajtlajtohua, se fariseo oquinotz para ihuan ontlacuas ichan. Yejhua ica Jesús ocalac ichan on fariseo niman onotlalij itech mesa.

³⁸ On fariseo hasta omojcatlachix ijcuac oquitac ica Jesús xonomajtequij para tlacuas. ³⁹ Pero on toTeco oquijlij:

—Nemejhuamej fariseos san tlapani nemochipahuaj quen se quichipahua san icuitlapan on taza noso icuitlapan on plato, pero ipan nemoyojo lento quej ica on tlen nenquiteixpachohuiliaj niman ica on tlen xcuajli nenquichihuaj. ⁴⁰ ¡Ah tzonteconchicajquej!*! ¿Tlen xnenquimati ica on yejhuan omechchijchiu pani ipan nemotlalnacayo no oquichijchiu tlajtic ipan nemoyojo? ⁴¹ Pero xquinmacacan tetlayocolili on mayanquej niman nemocahuasquej nochitlajtlamach hasta nemoyojo.

§ 11:31 su sabiduría * 11:40 tontos

42 'Mela huac nemejhuamej fariseos nenquimacaj Dios nemodiezmo ican on menta, niman ruda niman noch i tlajtlamach quijli. Pero masqui ijcon nenquichihuaj, ¡lástima para nemejhuamej! pampa xnemohuicaj ihuan ocsequimej ican yolchipahualistli quen nonequi, nion xnenquitlajsojtlaj† Dios quen nonequi. Ijcuac nenquimacaj Dios nemodiezmo, no nonequi nenquichihuasquiaj yejhua in ocsequij tlajtlamach.

43 '¡Lástima para nemejhuamej fariseos!, pampa ne ipan tiopantin nenquinequij nemotlalisquej ipan on sietas campa notlalaj on huejhueyixtoquej, niman nenquinequij para ne ipan on plazas ma mechtlajpalocan ican miyec tetlacaitalistli.

44 '¡Lástima para nemejhuamej temachtijkej ican itlanahuatil Dios niman nemejhuamej fariseos! ¡Nemejhuamej nenomexayacyequej! Nemejhuamej quen nentlalcontin yejhuan xnestoquej, niman on tlacamej impan panohuaj. Ijcon tej, on tlacamej panohuaj nemotech niman xquimati ica nenquincaj cayahuaj ican nemotlamachtil.

45 Quemaj se temachtijkej ican itlanahuatil Dios oquinanquij niman oquijlij:

—Temachtijkej, ica on tlen tiquijtohua, tejhamej no tehuan titechcaquistilia.

46 Pero Jesús oquijtoj:

—¡Lástima para nemejhuamej no!, temachtijkej ican itlanahuatil Dios, pampa ocsequimej nenquintlamamaltiaj ica on tlamamajli yejhuan sanoyej yetic para quitquisquej. Pero nemejhuamej nion siquiera ican se nemomajpil nenquinequij nenconquictzisquej.

47 '¡Lástima para nemejhuamej!, pampa nenquinchijchihuaj inmicacal on tiotlajtoquej yejhuan sa no on nemoachtojtajhuan oquinmictijkej.

48 Ica on nenquiteititiaj ica nenquitlaliaj nemoyojo ipan on tlen oquichijkej on nemoachtojtajhuan. Yejhamej, tej, oquinmictijkej on tiotlajtoquej, niman nemejhuamej nenquinchijchihuiliaj on inmicacal. **49** Yejhua ica, tej, Dios ican itlamatquilis† oquijtoj: "Niquintitlanilis tiotlajtoquej niman apóstoles, niman sequimej yejhamej quinmictisquej niman ocsequimej quintlahuelitasquej niman tlamach ica quintlajyohuilitisquej."

50 Yejhua ica on tlacamej yejhuan aman nemij quinyolcuitisquej ipampa inmiquilis nochimej on tiotlajtoquej desde ijcuac otzimpeu in tlalticpactli.

51 Huajpehua ica iyesyo Abel niman ontلام hasta ica iyesyo Zacarías, yejhuan oquimictijkej itzajlan on tiopan niman on tlaixpan ne quiahuac. Yejhua ica ocsejpa nemechijlia ica on tlacamej yejhuan aman nemij quinyolcuitisquej ipampa on inyesyo on tiotlajtoquej.

52 '¡Lástima para nemejhuamej temachtijkej ican itlanahuatil Dios!, pampa xnenquincahuiliaj on tlacamej ma cajsicamatican on tlajtlamach ica Dios. Nemejhuamej xnenquiseliaj on tlajtlamach niman xnenquincahuiliaj ocsequimej quiselisquej yejhuan quinequij.

53 Ijcuac Jesús otlan quimijlia in tlajtlamach, on temachtijkej ican itlanahuatil Dios niman on fariseos opejquej quixnamiquij niman sa tlajtlamach quitlajtoltiaya. **54** Niman yejhamej quipayaj cuidado tlinon ica quitlajcalisquej para huelis itlaj ica quiteixpanhuisquej.

12

Jesús oquinmachtij inomachtijcahuán ma ca ma nohuicacan ican omexay-acalistli

† **11:42** no aman ‡ **11:49** su sabiduría

¹ Quemaj sanoyej* miyequej miles tlacamej onosentlalijquej hasta sa notlajtlajcaliyaj. Pero Jesús achtoj opeu quimijlia on inomachtijcahuau:

—Xmotacan sa no nemejhuamej ican intlaxocolilis† on fariseos. In quijtosnequi on inomexayacalis. ² Xmotacan sa no nemejhuamej, pampa nochitlen nenquichtacachihuasquej nopenextis, niman nochitlen nenquinemilisquej ica xacaj quimatis machiyas. ³ Yejhua ica, on tlen onenquijtoquej ipan tlayohuajlotl, caquistis ipan tonajli ijcuac tlastastoc. Niman on tlen onoichtacaijto calijtic, quijtosquej chicahuac ne icuapan on caltin.

*Jesús oquijtoj ica san Dios quitocarohua ticmacajsisquej
(Mt. 10.28-31)*

⁴ 'Nemejhuamej notetlajsojcahuau‡, nemechijlia ma ca xmacajsican on yejhuan huelij quimictiaj on tlalnacayotl niman quemaj xoc huelij itlaj más quichihuaj. ⁵ Yej quemaj nemechijlia aquinon quitocarohua nenquimacajsisquej. Xmacajsican Dios yejhuan ijcuac se yoquimictij, quemaj ican ipoder hueli contlajcali ne campa temojtij tetlajyohuaultiloyan. Melahuac, tej, nemechijlia yejhua xmacajsican.

⁶ ¿Tlica§ xnonamacaj macuijli tototzitzintin ican san ica macuijli centavos? Pero nion semej yejhuan xquimelcahua Dios. ⁷ Yejhua ica ma ca xmomojtican pampa nemejhuamej más nenhueyi quijtosnequi xquen miyequej tototzitzintin. Tej, hasta nemotzon cada sesentel oncaj tlapohuajli ixpan Dios.

*Jesús oquimijlij inomachtijcahuau tlinon quichihuas tla xnonenequi ipampa
(Mt. 10.32-33; 12.32; 10.19-20)*

⁸ 'Aman, tej, nemechijlia ica nochimej yejhuan quipantlantisquej imixpan on tlacamej ica nohuan nopohuaj, nejhua yejhuan niteConeu itech Dios no ijqui niquimpantlantis imixpan iilhuicactequitcahuau* Dios ica nohuan nopohuaj. ⁹ Pero on yejhuan nonenequisquej† nopaipa imixpan on tlacamej, nejhua no ijqui ninonenequis impampa ne imixpan iilhuicactequitcahuau Dios.

¹⁰ 'Niman san aquinon yejhuan itlaj xcuajli nechtenehuilis, nejhua yejhuan oninochiu Tlacatl huelis quitlapojpolhuilisquej on tlen quijtos. Pero on yejhuan cuijhuicaltis on Espíritu Santo, xhuelis quitlapojpolhuilisquej on tlen quijtos.

¹¹ 'Ijcuac mechhuicasquej para mechteixpanhuisquej ne ipan on tiopantin, noso imixpan on yejhuan tlanahuatia noso on tequihuajquej, ma ca xcomatztiakan quen ijqui nentlananquilisquej noso tlinon nenquijtosquej, ¹² pampa ijcuac ajsis on hora ica nentlajtosquej, on Espíritu Santo yejhua mechijlis tlinon nenquijtosquej.

Jesús oquitlalij se ejemplo itech ica on tlacatl yejhuan quinopiyaliaya miyec niman oquipoloj nochimej

¹³ Ne intzajlan on tlacamej ohuajtlajtoj se tlacatl yejhuan oquijlij Jesús:

—Temachtijquetl, xquijli nocniu ma nechxelohuili on herencia yejhuan nechtocarohua.

¹⁴ Pero Jesús oquijlij:

—Tlacatl, ¿aquinon onechlalij nemotzajlan quen se tequihuaj noso tlaxeloljquetl?

¹⁵ Quemaj oquimijlij nochimej:

* **12:1** mucho † **12:1** levadura ‡ **12:4** mis amigos § **12:6** ¿por qué?; ¿tline? * **12:8** ángeles de El: Angeles tequitij ne ilhuicac niman nican ipan in tlalticpactli. † **12:9** negarse

—Xmotacan sa no nemejhuamej niman xmotlapiacan para ma ca sanoyej xnequican nemoyaxcatisquej[‡] tlajtlamach[§] pampa inemilis se tlacatl xne hualejticaj itech on tlen miyec quipia.

16 Quemaj oquintlalilij yejhua in ejemplo:

—Nemiya se tlacatl yejhuan quinopiyaliaya miyec, niman ipan itlalhuan sanoyej otlatlac. **17** Niman quemaj on tlacatl yejhuan quinopiyaliaya miyec opeu ijquin quinemilia: “¿Tlinon nicchihuas? Xnicpia canon niquejehuas on tlen otlac.” **18** Niman oquinemilij: “Aman ye nicmati tlinon nicchihuas. Niquinxoxotonis nocuesconhuan, para ocsequimej niquinchijchihuas yejhuan más huejhueyimej, niman ompa niquejehuas nochí on tlen otlac niman nochí tlen ye nicipia.” **19** Niman quemaj ijquin oquinojlij: “Miyec tlajtlamach yejyejticaj niman ye ticpia para mitzajxilis miyec xipan. Xmosehui, xtacua, xatli, niman xmopacti.” **20** Pero Dios oquijlij: “¡Ah tlacatl tzonteconchicahuac*! Yejhua in mismo tlayohua timquis, niman on tlen yotiquejeu, ¿aquinon itech nocahuas?” **21** Ijcon impan nochihuas on tlacamej yejhuan quimiyequiliaj riquezas para san yejhuamej, niman ixpan Dios onesij xitlaj† quipia.

Dios quintlapia on iconehuan

(Mt. 6.25-34)

22 Quemaj Jesús oquimijlij on inomachtijcahuan:

—Aman, tej, nemechijlia: Ma ca xcomatztiacan on tlen nencuasquej para nenquipiasquej nemilistli, nion on tlen ica nenquitlaquentisquej nemotlalnacayo. **23** Nemonemilis más hueyi quijtosnequi xquen on tlacajli, niman nemotlalnacayo más hueyi quijtosnequi xquen on tlaquentli. **24** Xquimixtlalocan on cacalomej ica xtocaj nion pixcaj, nion quipiaj incuescon noso cajli para tlayejyehua. Pero Dios quintlacaultia. ¡Nemejhuamej, tej, más sanoyej nenhueyiquijtosnequij xquen on totomej! **25** Nion semej nemejhuamej ijcuac ye miquis huelis sa comatztias para quitlaquechilis ocse hora inemilis. **26** Tej, tla xhueli nenquimochihiliaj itlaj yejhuan xhueyi quijtosnequi quen nenquitlaquechilisquej nemonemilis se hora, “¿tlica, tej, nencomatztoquej on ocsequi tlajtlamach yejhuan mechpolohua?”

27 Xquimixtlalocan on xochimej quen ijqui noscaltiaj. Yejhuatej xtequitij nion tlajtzomaj. Pero nejhua nemechijlia masqui on rey Salomón notlaquentiaya ican itlaquen sanoyej pepetlaca, xqueman ijqui onotlaquentij cualtzin quen se xochitl. **28** Aman, tej, tla Dios ijcon quitlaquentia on xojtli, yejhuan aman oncaj ipan tepetl niman quemaj huajmostla quitlatiaj ipan horno, tla ijcon, tej, ¿yej xmás mechtaquentis nemejhuamej tlacamej? ¡Oh tlacamej semi xnentlaneltocaj! **29** Yejhua ica ma ca xcomatztiacan on tlen nencuasquej nion on tlen nenconisquej, nion ma ca xometlamatican **30** pampa on tlacamej yejhuan xquineltocaj Dios san yejhua on tlajtlamach quitejtemohuaj. Pero nemoTajzin ye quimatzticaj ica mechpolohua on tlajtlamach. **31** Yej xchihuacan canica para Dios ma mechmandaro niman ma quinmandaro ocsequimej. Tla ijcon nenquichihuasquej nenquiselisquej in tlajtlamach yejhuan mechpolohua.

Jesús otemachtij ica se nonequi quisentlalis riquezas ne ilhuicac

(Mt. 6.19-21)

32 Ma ca xmomojtican masqui xnenmiyequej, pampa nemoTajzin quipia pactli para mechcahuilis nencalaquisquej ne campa yejhua tlamandarohua.

[‡] **12:15** posesionarán; nemoyaxcatisquej, nemohuaxcatisquej, nemotlatquitisquej [§] **12:15** cosas

* **12:20** tonto † **12:21** nada; coxtla

³³ On tlen nenquipiaj xnamacacan, niman on tomin xquinmacacan on yejhuan mayanquej. Ijcon, tej, xpiacan riquezas yejhuan xqueman ijsolihuij, niman xsentlalicán riquezas ne ilhuicac campa xqueman tlámis, niman campa on tlachtequetl xhuelis calaquís nion itlacuanyo conixpolos. ³⁴ Tla ijcon, tej, campa nenquipiasquej nemoriquezas, no ompa nenquipiasquej nemoyojo.

Nonequi para tinemisquej listos pampa ye huajlau toTeco

³⁵ 'Xcololocan nemotlaquen niman xpiacan listo nemotlahuil yejhuan cuajli tlahuilohua ³⁶ quen tequitquej yejhuan quichixtoquej inteco ma huanjnocuepati ne campa nonamictihua, para nimantzin quitlatlapohuilisquej oc[‡] yejcotetzis niman quitetepinis on tlatzacuilyotl[§]. ³⁷ Tlatiochiutin yesquej para on tequitquej yejhuan ijcuac huajlas inteco quinhuajnextis tlajtlachixtoquej. Ica tlen melahuac nemechijlia ica sa no inteco nochihuas interquichihuili jcau. Quemaj quinnotzas ma huajlacan ipan mesa niman quemaj quintlamacas. ³⁸ Masqui yejhua yejcos canaj tlajcoihuan noso cualcan, tlatiochiutli yesquej on tequitquej tla inteco quinnextijtejco tlajtlachixtoquej. ³⁹ Niman xmatican yejhua in, ica tla iteco se cajli quimatisquia tlen hora yejcos on tlachtequetl ne ipan ical, yejhua tlachixtiasquia niman xcahuilisquia ma quitlapohuili ical para quitlachtequilis. ⁴⁰ Nemejhuamej no ijqui xtلامachixtiacan, pampa ijcuac xnenquinemilitiasquej, nihuajlas nejhua yejhuan oninochiu Tlacatl.

*Jesús oquijtoj aquin on yejhuan yolcuajli tequitquetl
(Mt. 24.45-51)*

⁴¹ Quemaj Pedro oquitlajtoltij:

—ToTeco, ¿otictlalij in ejemplo san para tejhuatej, noso para nochimej?

⁴² On toTeco oquijtoj:

—¿Aquinon on tequitquetl yejhuan nochipa quitlacamati iteco, niman cuajli tlanemilia, niman yejhuan iteco quimactilia ichanchanecahuan*, niman on osequimej itequitcahuán para quinmaca tlen quimpolohua ijcuac nonequis quiselisquej? ⁴³ Tlatiochiutli yes on tequitquetl yejhuan ijcuac huajlas iteco cuajnextis quichijticaj on tlen oquinahuatij. ⁴⁴ Ica tlen melahuac nemechijlia ica iteco quimactilis on tequitquetl nochí tlen yejhua quipia para quejehuas. ⁴⁵ Pero tla yejhua on tequitquetl quinemilis ica on iteco oc[†] polihui para huajlas, niman pehuas quinhuisoquis on tlacamej tequitquej niman on sihuamej tequitquej, niman san tlacuas, niman atlís niman tlahuantinemis, ⁴⁶ tla ijcon, iteco huajlas ipan on tonajli ijcuac yejhua xquichixticaj, niman ipan on hora ijcuac xquimati. Niman quemaj iteco temojtij quicastigaros, niman cahuas inhuan on yejhuan xquitlacamatij.

⁴⁷ 'On tequitquetl yejhuan quimati tlinon quinequi on iteco, pero xno-listoxtlalia para quichihuas nion quitlacamati, sanoyej quitlajyohuiltisquej.

⁴⁸ Pero on tequitquetl yejhuan xquimati tlinon quinequi iteco, niman quichihuas on tlajtlamach yejhuan nonequi quiselis san achijtzin castigo. On yejhuan miyec quinahuatiaj ica oncaj miyec quichihuas. Niman on yejhuan más miyec quinahuatiaj no ijqui ica oncaj más miyec quichihuas.

*Jesús oquitemachtij ica on yencuic tlaneltoctli quinxexelos on tlacamej
(Mt. 10.34-36)*

‡ 12:36 todavía; sanquen § 12:36 puerta * 12:42 su familia † 12:45 todavía; sanquen

⁴⁹ 'Nejhua onihuajlaj ipan in tlalticpactli para niquinmacas on tlacamej yencuic tlaneltoctli yejhuan tlicuis quen tlitl ipan inyojlo. Niman sanoyej nicnequisquia ica ye quipiasquiaj. ⁵⁰ Pero antes yejhuamej quipiasquej in, ica oncaj sanoyej nitlajyohuis. Niman sanoyej ninajmana hasta caman in nopan nochihuas. ⁵¹ ¿Nenquinemiliaj ica nejhua onihuajlaj para oniquinsentlalico on tlalticpactlacamej ican yolsehuilistli? Nemechijlia ica ca, yej nopampa noxexelosquej. ⁵² Desde aman ye pehua macuitimej chanchanejquej‡ ipan se chanyotl§ xexelijtiasquej. Yeyimej tlahuelpemis quej inhuan on ocse omemej niman on omemej inhuan on yeyimej. ⁵³ On tajtli tlahuelpemis ihuan on itelpoch niman on telpochtli ihuan itaj. Niman on nantli tlahuelpemis ihuan ichpoch, niman on ichpoch ihuan inan. On monantli tlahuelpemis ihuan on isihuamon, niman on sihuamontli ihuan on imonan.

Jesús oquimajhuac on tlacamej pampa xcajsicamatiaj tlinon nochihua ipan on tonaltin

(Mt. 16.1-4; Mr. 8.11-13)

⁵⁴ Jesúz no oquimijlij on tlacamej:

—Ijcuac nemejhuamej nenquitaj ica on moxtli noquetzehua ne ica icalaquian tonaltzintli, nimantzin nenquijtohuaj ica quiahuis, niman melahuac ijqui nochihua. ⁵⁵ Niman ijcuac on ajacatl hualehua ne ica sur, nenquijtohuaj ica tona yes, niman ijqui nochihua. ⁵⁶ ¡Omxayacyeque! Nemejhuamej hueli nencajsicamatij tlinon nochihuas ne ipan cielo* niman nican tlalticpac. ¿Tlica, tej, xhueli nencajsicamatij tlinon quijtosnequi on tlen nicchihua ipan in tonaltin?

Más cuajli para se noyolsehuis ihuan itlahuelicniu

(Mt. 5.25-26)

⁵⁷ ¿Tlica xsan no nemejhuamej nenquitaj quen nemoyoltlalijaj ica cuajli? ⁵⁸ Ijcuac yacaj mitzhuica para mitzteixpanhuiya ne imixpan on tequihuajquej, xchihua canica para ihuan xmoyolsehui ipan ojtli, para ma ca mitzhuicas ixpan on tequihuaj, niman on tequihuaj mitztemacas intech on policías, niman on policías mitzajsisquej. ⁵⁹ Ompa xtiquisas hasta tictlaxtaluas on sa ica nochí motomin yejhuan mitzquixtilisquej.

13

Sanoyej nonequi para se noyolpatlas

¹ Sa no ipan on tonajli ompa nemiyaj sequimej tlacamej yejhuan oquitlatlajtohuilijquej Jesúz quen ijqui Pilato otlanahuatijca para oquinmictijquej sequimej tlacamej yejhuan chanejquej ne Galilea niman ica on inyesyo oquinelojquej ihuan inyesyo on yolquej yejhuan on galileos oquinmictijquej para se huentli. ² Niman Jesúz oquimijlij:

—¿Nemejhuamej nenquinemiliaj ica on tlacamej galileos ijcon impan onochiu pampa más tlajtlacolejquej catcaj xquen on inchantlacaj*?
³ Nemechijlia ica ca. Yej, tla nemejhuamej xnencajcahuasquej ica nenquichihuaj on tlen xcuajli, nochimej nemejhuamej no ijqui nemiquisquej. ⁴ ¿Tlen nemejhuamej nenquinemiliaj ica on majtlactli huan chichuasen tlacamej yejhuan omiquej ijcuac impan oxoton on torre ne Siloé, yejhuamej más quipiayaj tlajtlacojli xquen on yejhuan chantiyaj ne Jerusalén? ⁵ Nemechijlia ica ca, yej tla nemejhuamej xnencajcahuasquej

‡ **12:52** familia § **12:52** casa; cajli * **12:56** Cielo quitosnequi nochí on lugar campa oncaj ajacatl, moxtli, metztli, tonajli niman sitlalimej. * **13:2** paisanos

ica nenquichihuaj on tlen xcuajli, nochimej nemejhuamej no ijqui nemquisquej.

Jesús oquixtij se ejemplo itech se higuera cojtli yejhuan xtlaqui

⁶ Quemaj Jesús oquintlalilij yejhua in ejemplo:

—Sen tlacatl quipiaya se higuera cojtli† ne ipan itlal, niman se tonajli yejhua oquitato tla yotlac, pero xitlaj‡ oquinextilij itlaquilyo. ⁷ Quemaj yejhua oquijlij on tlacatl yejhuan quinotequiyotiaya on tlajli: “Xquita, ye quipia yeyi xipan ica nicualitztinemi higos nican ipan in cojtl, niman xqueman niquila tla tlaqui. Más cuajli xtzontequi. ¿Tlinon para ne san tlalcuiticaj niman xtlaqui?” ⁸ Pero on yejhuan quinotequiyotiaya on tlajli oquijlij: “Señor, sa yejhua in xipan xcahua. Nejhua nictlalquejanilis niman nictemilis tlapalanajli. ⁹ Tla tlaquis cuajli yes, pero tla xotlac, ijcuacon quemaj titlanahuatis para ma quitzontequivian.”

Sen sihuatl yejhuan nopachojtinemiya oquipajtij Jesús ipan on tonajli de nesehuijli

¹⁰ Ipan se tonajli de nesehuijli, Jesús temachtijicatca ipan se tiopan.

¹¹ Niman ompa nemiya se sihuatl yejhuan ye quipiaya majtlactli huan chicueyi xipan ica cualohuaya, pampa on xcuajli espíritu yejhuan ijqui oquichihuili. Yejhua on sihuatl sa nopachojtinemiya, niman nion achijtzin xhueliya nomelajcatelquetzaya. ¹² Ijcuac Jesús ijcon oquitac on sihuatl, oquinotz niman oquijlij:

—Sihuatl, ye cuajli yotipajtic de yejhua on cualolistli.

¹³ Quemaj oquintlalilij imahuan ipan niman nimantzin on sihuatl onomelajcatelquetz, niman opeu quihueyilia Dios. ¹⁴ Pero on yejhuan tlayecanquetl catca ipan on tiopan ocualan pampa Jesús otepajtij ipan on tonajli de nesehuijli, niman yejhua oquimijlij on tlacamej:

—Chicuasen tonajli oncaj para tequitihuas. Ipan on tonaltin xhuajlacan para nemopajtisquej, niman ma ca ipan on tonajli de nesehuijli.

¹⁵ Ijcuacon on toTeco oquijlij:

—Omxayacyejquej, cada se nemejhuamej quitojtomá ihuacax noso ipoloco§ ipan on tonajli de nesehuijli niman cuica conatlitia. ¹⁶ Niman nican nemí yejhua in sihuatl yejhuan huejca teixhuii* itech Abraham niman ye quipia majtlactli huan chicueyi xipan ica Satanás ijcon oquichihualtij. ¿Xquitocarohuaya nomanahuis de on cualolistli ipan on tonajli de nesehuijli?

¹⁷ Ijcuac Jesús ijcon oquijtoj, nochimej on itlajhuelicnihuan opinajquej. Pero nochí tlacatl paquia ipampa on huejhueyi tlajtlamach† tlen Jesús quichihuaya.

*Jesús oquitlalij ome ejemplos quen ijqui noscaltia itequihuayo Dios
(Mt. 13:31-33; Mr. 4:30-32)*

¹⁸ Quemaj oquijtoj:

—¿Quen ijqui noscaltia itequihuayo Dios? ¿Tlinon ica huelis niquixnescayotis‡ on itequihuayo Dios? ¹⁹ Yejhua quen itlaj on xinachtli itoca mostaza yejhuan se tlacatl quitoca ipan itlal. On xinachtli noscaltia hasta ajsi quen itlaj hueyi cojtlis. Sanoyej hueyi hasta on totomej yejhuan pajpatlantine-mij quichijchihuaj intepajsol ipan imahuan.

²⁰ No ijqui oquijtoj Jesús:

† **13:6** árbol ‡ **13:6** nada; coxtla § **13:15** su burro * **13:16** descendiente † **13:17** cosas
‡ **13:18** lo simboliza § **13:19** árbol

—¿Tlinon ica más huelis niquixnescayotis on itequihuayo Dios? ²¹ Yehua quen tlaxocolilistli* yejhuan se sihuatl quimanelohua ican yeyi tlatemachihuajli harina niman quemaj najcocui nochi on tixtli de harina.

Jesús otemachtij ica oncaj se tlatzacuilyotl pitzahuac yejhuan tehuica ipan nemilistli
(Mt. 7.13-14, 21-23)

²² Ijcuac Jesús panohuaya ipan on ojtli para Jerusalén, opajpanotiaj ipan pueblos niman ipan pueblitos campa temachtiaya. ²³ Quemaj se tlacatl ijquin oquitlajtoltij:

—ToTeco, ¿san quesquimej on yejhuan nomaquixtisquej?

Niman yejhua oquijtoj:

²⁴ —On tlatzacuilyotl[†] yejhuan tlpojticaj ne ilhuicac pitzahuac. Xchihuacan canica para xcalaquican ne ipan on tlatzacuilyotl pampa nemechijlia ica miyequej quinequisquej calaquisquej pero xhuelisquej. ²⁵ Ijcuac iTeco on chanyotl notelquetzas niman quitzacuas on tlatzacuilyotl, tla nemejhuamej ipan ojtli onemocajquej, nenquitetelosquej on tlatzacuilyotl niman nenquijtosquej: “ToTeco, xtechtlatlapohuili.” Pero yejhua mechijlis: “Nejhua xnicmati canon nenhualehuaj.” ²⁶ Ijcuacon nemejhuamej pehuas nenquijtosquej: “Tejhuamej mohuan otitlacuajquej niman otatliquej, niman tejhuia otitemachtij ipan tocalles.” ²⁷ Pero yejhua mechijlis: “Nejhua nemechijlia ica xnicmati canon nenhualehuaj. Xnechtlalcahuican nochimej nemejhuamej yejhuan nenquichihuaj on tlen xcuajli.” ²⁸ Sanoyej nenchocasquej niman nemotlantotopotzasquej ijcuac nenquitasquej ica Abraham, Isaac, Jacob niman nochimej on tiotlajtojquej nemij ne campa Dios tequihuaticaj, chica nemejhuamej mechajquixtisquej. ²⁹ Niman on tlacamej yejhuan chanejquej ne iquisayan tonajli niman ne icalaquian tonajli, niman ne ica norte niman ne ica sur, huajlasquej para notlalisquej tlacuasquej ne ilhuicac ichan Dios. ³⁰ Ijcuacon on yejhuan aman xhuejhueyixtoquej ijcuacon huejhueyixtiasquej, niman on yejhuan aman huejhueyixtoquej ijcuacon xhuejhueyixtiasquej.

Jesús ochocac ipampa Jerusalén

(Mt. 23.37-39)

³¹ Sa no ipan on tonajli, itech ohualajquej sequimej fariseos niman oquijlijquej:

—Xmejcuani nican pampa Herodes quinequi mitzmictis.

³² Pero yejhua oquimijlij:

—Xhuiyan niman xquijlican on tlacajcayajquetl: “Xquita, aman niman mostla niquintequixtilia on xcuajcualtin espíritus niman niquimpajtia on cualoj, niman para huiptla nochi nitlamis.” ³³ Pero ica oncaj nicnejnemitis nojhui aman, mostla niman huiptla, pampa nochi tiotlajtojquetl ica oncaj miquis ne Jerusalén.

³⁴ ’¡Ah nemejhuamej chanejquej ne Jerusalén, nemejhuamej nenquinmictiaj on tiotlajtojquej niman nenquintemojmotlaj on yejhuan Dios mechihuajtitlanilia! ¡Miyecpa onicnec nemechsentlalis quen yejhua on cuanaca quinsentlalia iconehuan itzintlan imajtlapalhuan, pero xonenquinequej!

³⁵ Aman xcaquican. Dios xoc mechpalehuis pampa yejhua yomechtlalcahui. Aman, tej, nemechijlia ica xoc nennechitasquej hasta ipan on tonajli ijcuac nemejhuamej nenquijtosquej: “Ma toTeco Dios quitiochhua on yejhuan ocuajtitlan.”

* **13:21** levadura † **13:24** puerta

14

Ipan se tonajli de nesehuijli Jesús oquipajtij se tlacatl yejhuan pojposahuiya

¹ Ipan se tonajli de nesehuijli ijcua on hebreos nosehuij, Jesús oyaj otlacuato ichan se tlayecanquetl fariseo, niman on ocsequimej fariseos sa quipijpiayaj. ² No ompa nemija se tlacatl yejhuan imahuan niman icxihuan pojposahuiyaj. ³ Quemaj Jesús oquintlajtoltij on temachtijquej ican itlanahu-til Dios niman on fariseos:

—¿Totlanahuatil techcahuilia para ipan on tonajli de nesehuijli nopajtis se yejhuan cuelo? ¿Quemaj noso ca?

⁴ Pero yejhuanamej xonahuatquej. Quemaj Jesús oconquitzquij on yejhuan cuelo, niman oquipajtij niman oquijlij ma huiya. ⁵ Niman on fariseos oquimijlij:

—¿Aquinon de nemejhuamej xnimantzin conquixtia tla se ipoloco* noso ihuacax onhuetzi ijtic se pozo ipan on tonajli de nesehuijli?

⁶ Niman xohuelquej itlaj ica oquinanquiliquej.

Jesús otemachtij itech ica on nohueyimatilistli

⁷ Ijcua Jesús oquitac ica on tenotzalitn quitlapejpeniayaj on más hueyixtoquej sietas ne itech on mesa, oquitlalij yejhua in ejemplo:

⁸ —Ijcua yacaj mitznotzas para tehan ticpanos on ilhuitl campa non-amictihua, ma ca timosehuis ipan on lugar más hueyixticaj, pampa huelis yejcos ocse yejhuan más hueyixticaj tlanotzajli xquen tejhua. ⁹ Tla ijcon, tej, on yejhuan omechnotz yas motech niman mitzijlis: “On sieta xmaca yejhua in yejhuan más hueyixticaj.” Niman ijcuac ijcon ticaquis mitzijliaj, ican mopinahuilis tias timotlalis ipan on sieta campa notlaliaj on yejhuan xhuejhueyixtoquej. ¹⁰ Más cuajli tla ijcuac canaj mitznotzasquej, xmotlali ipan on sieta yejhuan para on yejhuan xhuejhueyixtoquej, para ijcuac motech huajlas on yejhuan omitznotz, mitzijlis: “Notetlajsojcau†, xmotlaliti ne ipan on más hueyixticaj sieta.” Ijqui ticselis tetlacaatalistli imixpan on tlanotzalitn yejhuan ompa itech on mesa mohuan yejyehuatiasquej. ¹¹ Ijcon xchihua, pampa on yejhuan nohueyilia, quicnotlalisquej, niman on yejhuan nocnotlalilia cueyilisquej.

Jesús otemachtij aquinon quitocarohua totenotzcau yes

¹² Niman on yejhuan oquinotz Jesús no oquijlij:

—Ijcua ticnequis titetlacualtis tiotlac noso tlayohua, ma ca xquinnotza motetlajsojcahuan‡, nion mocnihuan, nion on yejhuan sa huejca mocnihuan, nion on monisiuchantlacaj§ yejhuan xitlaj* quinpolohuaj, para ma ca sa no yejhuanamej no quemantica mitznotzasquej niman ijcuacon quen mitzcuepilisquej on tlen achtopa tiquincualtis. ¹³ Yej ocse tlamantic xchihua. Ijcua ticpias itlaj ilhuitl, xquinnotza on yejhuan mayanquej, on yejhuan macocoxquej noso icxitlajcomej, on yejhuan coxomej niman on yejhuan ciegos. ¹⁴ Niman Dios mitztiochiwas pampa masqui yejhuanamej xhuelisquej mitzcuepilisquej on tlacuajli, tejua ticpias motlaxtlahuil ipan on tonajli ijcuac on yejhuan yolchipajquej yolihiisquej niman noquetztehuasquej ipan intlalcon.

Jesús oquitlalij se ejemplo itech on se hueyixticaj tiotlac tlajcuajli

¹⁵ Ijcua semej yejhuanamej on yejhuan yejyehuaticatcaj ne itech on mesa ijcon ocac, oquijlij Jesús:

* **14:5** su burro † **14:10** mi amigo ‡ **14:12** tus amigos § **14:12** tus vecinos * **14:12** nada; coxtla

—Mela huac tlatiochiutli yes on yejhuan quicuas pan ne ilhuicac campa Dios tlamandarohua.

¹⁶ Quemaj Jesús oquijlij:

—Sen tlacatl oquitemacac se hueyi tiotlac tlajcuajli, niman otlanahuatij ma quinnojnotzatij miyequej tlacamej. ¹⁷ Niman ijcuac ye nisiu para tlacuasquej, oquititlan on itequichihuilijscau para ma quimijli on tlan-otzalti: “Xhuajlacan pampa ye oncaj tlachijchiutli nochí.” ¹⁸ Pero nochimej opejquej sa tlamach ica notlamiyaj ica xhuelisquej yasquej ipan on tiotlac tlajcuajli. On achtoj tlacatl oquijtoj: “Quinamantzin oniconcou se tlajli, niman ica oncaj nicontas. Nimitztlajtlanilia xnechtlapojojpolhui ica xnias ipan on tiotlac tlajcuajli.” ¹⁹ On ocse oquijtoj: “Nejhua onicou macuijli yunta huacax, niman ye niau niconmuntas tla huelij cuajli tequitij. Tla ijcon xnechtlapojojpolhui ica xnias ipan on tiotlac tlajcuajli.” ²⁰ Niman ocse oquijtoj: “Quemach oninonamictij, niman yejhua ica xnihue lis nias.” ²¹ Quemaj on tequichihuilijsquetl ohuajnocuepato niman nochí yejhua on tlen ica oquinanquilijquej, oquitlajtlajtohuilij on iteco. Ijcuacon on iteco ocualan niman oquijlij on itequichihuilijscau: “Amantzin xhuiya ipan icalles niman iojhui in hueyican, niman nican xquinhuajhuica on yejhuan mayanquej, niman on yejhuan macocoxquej, niman icxitlajcotzitzintin, niman on ciegos niman on coxomej.” ²² Más saquin† on tequichihuilijsquetl oquijtoj: “Señor, yonicchii tlen otinechnahuatij niman oc‡ oncaj campa notlalisquej ocsequimej más.” ²³ Ijcuacon on iteco oquijlij: “Xhuiya ipan on calles niman ipan on ojtin, niman xquinchihualti ocsequimej ma huajlacan para ma temi nochan. ²⁴ Ijquin xchihua, pampa nemechijlia ica nion aquin de on yejhuan achtopa oniquinnotz xquicuasquej on tiotlac tlajcuajli yejhuan nictemacas.”

Para se quitequipanos Jesucristo tlajyohuis

²⁵ Miyec tlacatl cuitlapanhuijtiayaj Jesús, niman yejhua ohuajnocuep niman oquimijlij:

²⁶ —Tla yacaj huajlau notech, niman yej quintlajsojtlá más itaj, inan, isihuau, iconehuan, icnihuan yejhuan tlacamej niman yejhuan sihuamej, niman hasta sa no yejhua más quitlajsojtlá inemilis xquen nejhua, yejhua xhuelis nonomachtijcau yes. ²⁷ Niman on yejhuan xquiselis on tlajyohuilstli ipan inemilis quen se tlacatl yejhuan quitqui icojnepanol§ ne campa quimictisquej niman xyas nohuan, xhuelis para yejhua nonomachtijcau yes. ²⁸ Cada semej nemejhuamej yejhuan quinequi quichijchihuas se torre, achtopa notlalia para quixtlalohua itomin tla caxilis para tlamis on torre. ²⁹ Tla quitlalia on cimiento niman quemaj xoc hueli tlami, tla ijcon, quitasquej ocsequimej niman pehuas cuejhuetzquilisquej. ³⁰ Niman quijtosquej: “Yejhua on tlacatl oquipehualtij on itequiu niman xohuel otlan.” ³¹ Cada rey yejhuan yau para onohuisoquij ihuan ocse rey, achtopa quixtlalohua tla huelis quixnamiquis ican majtlactli mil isoldados on ocse rey yejhuan huajlau ican sempaojli* mil isoldados. ³² Niman tla xhuelis, ijcuac on ocse rey oc‡ huejca nemi, itech quintitlanilis sequimej tlacamej para contlajtlanilisquej tlinon quinequi on ocse rey para ma nopiali yolsehuilstli. ³³ Ijcon, tej, san aquinon de nemejhuamej yejhuan achtoj quixtlalos ica quipias tlajyohuilstli niman cahuas nochí tlen quipia huelis para yejhua nonomachtijcau yes.

† **14:22** después ‡ **14:22** todavía; sanquen

§ **14:27** su cruz

* **14:31** veinte

† **14:32** todavía; sanquen

Jesús otemachtij ica ipan in tlalticpactli on tlaneltocaquej innemilis quen itlaj istatl

(Mt. 5.13; Mr. 9.50)

³⁴ 'On istatl sanoyej‡ cuajli, pero tla quipolos on ica poyec, ¿quen ijqui, tej, huelis ocsejpa poyec yes? On melahuac xhuelis. ³⁵ Xoc huelis quitequitiltisquej para on tlajli nion para se achitzin tlalpalanajli, yej san quixinisquej. Tla nemejhuamej nenquipiaj nemotlamachilis, xcajsicamatican on tlen niquipiojtohua.

15

Jesús oquitlalij se ejemplo ica se borreguito yejhuan opolija

(Mt. 18.10-14)

¹ Miyequej on yejhuan tlacobrarohua ica impuestos niman on tlajtlacolejquej quinisihuiayaj Jesús para caquisquej. ² Yejhua ica on fariseos niman on temachtijquej ican itlanahuatil Dios tlahueltlajtihuayaj niman ijquin quijtohuiayaj Jesús:

—Yejhua in tlacatl quinselia on tlajtlacolejquej niman inhuan tlacua.

³ Yejhua ica Jesús oquintlalilij yejhua in ejemplo:

⁴ —Ma ticonijtocan ica semej nemejhuamej quipia cien borreguitos niman se oquipoloj. ¿Xquincatehua on napoajli* huan majtlactli huan chicnahui ne campa tlacualcan niman yau contejtemohua on se borreguito yejhuan oquipoloj hasta caman quinextia? ⁵ Niman ijcuac conextia, ican pactli cuajnoquechpanoltia. ⁶ Niman ijcuac ajsi ichan, quinsentlalia itetlajsojcahuant niman inisiuchantlacaj‡ niman quimijlia: “Nohuan xpaquican, pampa yonicnextij on borreguito yejhuan onicpolojca.” ⁷ Nejhua, tej, nemechijlia ica ne ilhuicac no sa no ijqui nochihua. Ompa más oncaj pactli ipampa se tlajtlacolej yejhuan noyolpatla xquen impampa on napoajli huan majtlactli huan chicnahui cuajcualtin tlacamej yejhuan xquipiaj tlinon ica noyolpatlasquej.

Jesús oquitlalij se ejemplo ica on tomin yejhuan opolija

⁸ 'Noso ma ticonijtocan ica se sihuatl quipia majtlactli tomin tlachijchiutli ican plata niman se quipolohua. ¿Xquitlicultia itlahuil niman pehua tlachpana chica ican miyec cuidado quitejtemohua on tomin hasta caman quinextia? ⁹ Niman ijcuac quinextia, quinsentlalia itetlajsojcahuans§ niman inisiuchantlacaj* niman quimijlia: “Nohuan xpaquican pampa yonicnextij on tomin yejhuan onicpolojca.” ¹⁰ Nemechijlia ica no ijqui oncaj pactli ne intzajlan on iilhuicactequitcahuant niman noyolpatla Dios ipampa se tlajtlacolejquetl yejhuan noyolpatla.

Jesús oquitlalij se ejemplo ica se telpochtli yejhuan opolija

¹¹ No ijqui oquijtoj Jesús:

—Sen tlacatl quipiaya ome iconeu. ¹² Niman on yejhuan más conetl catca oquijlij itaj: “Notaj, xnechxelohuili aman on tlin ticpia yejhuan noyaxca‡ yes.” Niman on tajtli oquintlajcoxelohuili on tlen quipiaya. ¹³ Ipan quesqui tonajli más saquin§, on telpochtli yejhuan más conetl oquisentlalij nochitlajtlamach* tlen iyaxca niman oyaj huejca ipan ocse país campa otlan

‡ **14:34** muy * **15:4** Napoajli quitosnequi ochenta, niman napoajli huan majtlactli huan chicnahui quitosnequi noventa y nueve. † **15:6** amigos de él ‡ **15:6** vecinos de él § **15:9** amigos de ella * **15:9** vecinos de ella † **15:10** ángeles: Angeles tequitij ne ilhuicac niman nican ipan in tlalticpactli. ‡ **15:12** me pertenece; noaxca, nohuaxca, notlatqui § **15:13** después * **15:13** cosas

quinajahuiltia itomin ican se xcuajli nemilistli. ¹⁴ Pero ijcuac nochí yoquitlamijca on tomin, sanoyej[†] opeu tlasohti tlacuajli ne ipan on país, niman opeu ajapismiqui. ¹⁵ Quemaj oquitejtemoto tequitl itech se tlacatl yejhuan chanej ipan on país, niman on tlacatl oquititlan imijla para quintlapialis ica on ipitzohuan. ¹⁶ Niman sanoyej quinequiya quicuas on tlacuajli itoca algarrobas yejhuan quicuayaj on pitzomej, pero xacaj quimacaya. ¹⁷ Ijcuacon opeu ijquin quinemilia: “Nochi on tequitquej ichan notaj quipiaj más tlacuajli san quech quinequij quicuaj, niman nejhua nican ye nimicticaj ican apistli. ¹⁸ Ninoquetztehuas niman nias ne campa nemi notaj, niman ijquin niquijlis: Ay notaj, yonitlajtlacoj itech Dios niman motech. ¹⁹ Aman xoc nechmelahuat[‡] tinechitas quen nimocone. Aman sa xnechpohua quen semej yejhamej on motequichihuilijcahuau.” ²⁰ Quemaj onotelquetz ocajsic ojtlí niman oyaj ne ichan itaj.

’Ijcuac oc§ huejca huajlaya, on itaj ocontac niman oquicnelij. Onotlaloj oquinamiquito. Oquinapaloj niman oquitencuaj*. ²¹ Niman on teconeu oquijlij itaj: “Ay notaj, yonitlajtlacoj itech Dios niman motech. Aman xoc nechmelahuat tinechitas quen nimocone.” ²² Pero on tajtli oquimijlij on tequichihuilijcahuau: ¡Amantzin xcuauican on yejhuan más cuajli tlaquentli, niman xtlaquentican! Xtlaliltican se anillo ipan imajpil, niman no xcactican. ²³ Quemaj xcuajhuicacan on huacaxconetl yejhuan más tomahuac niman xmictican. ¡Aman titlacuasquej ican paquillisti! ¡Aman ticchihuasquej se ilhuitl! ²⁴ Ijcon ticchihuasquej, pampa yejhua in nocone quen yomica, pero aman ocsejpa ye quipia nemilistli. Yejhua yopolijca, pero aman yones. Quemaj opejquej quichihuaj on ilhuitl.

²⁵ ’Ijcuac in nochijicatca, on teconeu yejhuan yencuiyotl nemiya ipan tepetl. Niman ijcuac ohuajnocuepato niman oajsic nisu ichan, oconcac on tlapitzquej ichan niman no ocontac nijtotihua. ²⁶ Quemaj ocontza-jtzilij se tequichihuilijquetl niman oquitlajtoltij tlínón nochihuaya. ²⁷ On tequichihuilijquetl oquijlij: “Oncaj ilhuitl pampa mocniu yohuajlaj. Niman motaj otlanahuatij ma quimictican on huacaxconetl yejhuan más tomahuac, pampa mocniu oyejcoc chicajticas niman xcualo.” ²⁸ Pero on yencuiyotl teicniu ocualan hasta xquinequiya oncalaquej ne ichan. Yejhua ica itaj oquisaco para oquitlajtlanilij ma calaquit. ²⁹ Niman yejhua oquijlij itaj: “Tejhua ticmatzticaj miyec xipan yonimitztequichihuilij, niman nochipa nimitztlacamati, pero xqueman tinechmaca nion se chito conetl para nichihuas se ilhuitl inhuan notetlajsojcahuau†. ³⁰ Pero aman oyejcoc yejhua in mocone, yejhuan oquipopoloj motomin inhuan on sihuajahuilnemij, niman para yejhua ticmictia on huacax conetl yejhuan más tomahuac.” ³¹ Quemaj on tajtli oquijlij: “Nocone, tejhua nochipa nohuan tinemi niman nochí tlen nicpia tejhua moyaxca. ³² Pero aman nonequi ticchihuasquej ilhuitl niman tipaquisquej, pampa mocniu quen yomica, pero aman ocsejpa quipia nemilistli. Yejhua yopolijca, pero aman yones.”

16

Sen tequitquetl oquinempolohuilij itequiu on iteco

¹ Jesús no oquimijlij on inomachtijcahuau:

—Nemiya se tlacatl yejhuan quinopiyaliaya miyec niman quipia se tequitquetl tlayecanqui. Niman yejhua in tlacatl yejhuan iteco on tequitquetl

† **15:14** mucho ‡ **15:19** yo merezco § **15:20** todavía; sanquen
oquibesarohuilij † **15:29** mis amigos

* **15:20** le besó;

oquijlijquej ica on tequitquetl san quinempolohuilia itequiu. ² Quemaj on iteco oquinotz on tequitquetl tlayecanqui, niman oquijlij: “¿Tlinon quijtosnequi yejhua in yejhuan mocha nechijliaj? Xnechcahuili noch iquen yau motequiu yejhuan yoticchiu, pampa aman tejhua xoc tinotequitcau yes tlayecanqui.” ³ Quemaj on tequitquetl tlayecanqui opeu quinemilia: “¿Aman tlinon nicchihuas? Noteco nechquixtilia on tequitl. Xnicojtic para nictequitis on tlajli, niman nipinahua ninotlajtlayehuis*. ⁴ Ye nicmatzticaj tlinon nicchihuas para nicpias aquin nechselisquej inchan ijcuac nejhua xnicpias tequitl.” ⁵ Quemaj cada sesentemej oquinnotz on yejhuan cuiquiliayaj iteco. On achtoj tlacatl oquitlajtoltij: “¿Quech ticuiquilia noteco?” ⁶ Niman yejhua oquijlij: “Nicuiquilia cien hueyi tlatemachijtli ica on aceite.” Ijcuacon on tequitquetl tlayecanqui oquijlij: “Nican oncaj tlin tictehuiquilia. Nimantzin xmotlali niman ocse xchijchihua yejhuan san ompoajli† huan majtlactli.” ⁷ Quemaj on ocse no oquitlajtoltij: “Niman tejhua, ¿quech ticuiquilia noteco?” Niman yejhua oquijlij: “Cien tlatemachijtli ica on trigo.” Ijcuacon oquijlij: “Nican oncaj tlin tictehuiquilia, niman ocse xchijchihua yejhuan san de napoajli‡.” ⁸ Niman on tlacatl yejhuan iteco on xcuajli tequitquetl tlayecanqui oquiyecteneu pampa oquipix itlamachilis para oquichiu ijcon ipan on itequiu.

Quemaj Jesús oquijtoj:

—Lástima pampa on tlalticpactlacamej más quimatij quen ijqui quitequitilia on tlajtlamach§ ipan on tlin xcuajli, xijqui quen on iconehuan Dios quichihuaj ica on tlin cuajli.

Jesús otemachtij quen cuajli para se quitequitiltis itomin

⁹’Nejhua nemechijlia ica más cuajli ica nenquitequitiltiaj on riquezas de yejhua in tlalticpactli para quimpalehuisquej on mayanquej niman ijcon nenquipiasquej nemotetlajsojcahuan* yejhuan ijcuac on riquezas tlamis mechselisquej ne ilhuicac campa para nochipa nennemisquej.

¹⁰’Yejhuan quipia cuajli iyojlo itech on tlen achijtzin, no ipan on tlen miyec quipia cuajli iyojlo. Niman on yejhuan xcuajli quipia iyojlo itech on tlen achijtzin no ipan on tlen miyec xquipia cuajli iyojlo. ¹¹ Aman, tej, tla ipan on riquezas yejhuan oncaj ipan in tlalticpactli xcuajli nenquipiaj nemoyojlo, xacaj, tej, mechmactilis on tlen melahuac cuajli riquezas. ¹² Niman tla ipan on tlen xnemoyaxca xnenquipiaj cuajli nemoyojlo, xacaj, tej, mechmacas on tlen nemoyaxca yes.

¹³’Xacaj tetequichihuili quej hueli quitequichihuilia ome iteco, pampa se xcuelitas niman on ocse cuelitas, noso se quipialis cuajli iyojlo niman on ocse quitlalcahuis. Xhuelis tictequichihuils Dios san secan ihuan on tomin.

¹⁴ On fariseos, yejhuan quinejnequiyaj on tomin, cacticatcaj noch i on tlen Jesús quijtohuaya niman san cuehuetzquiliaya. ¹⁵ Ijcuacon Jesús oquimijlij:

—Nemejhuamej nenquichihuaj para nenesij quen sanoyej† nencuajcualtin tlacamej imixpan on tlacamej, pero Dios quixmati nemoyojlo. Xmatican ica on tlen on tlacamej quiseliaj quen hueyixticaj, Dios xcuelita.

Jesús oquitemelajcajli on itlanahuatil Moisés

¹⁶’Hasta ipan on tonaltin ijcuac nemiya Juan on tlacuatequijquetl, on itlanahuatil Moisés niman intlamachtilhuan on tiotlajtojquej ipan onohuicaquej. Niman desde ijcuacon, noteijliaj on yencuic tlajtojli yejhuan

* **16:3** pedir limosna; nictlajtlanis limosna † **16:6** Omipoajli quitosnequi cuarenta, niman omipoajli huan majtlactli quitosnequi cincuenta. ‡ **16:7** ochenta § **16:8** cosas * **16:9** amigos de ustedes

† **16:15** muy

techmachiltiaj quen ijqui Dios tlamandarohua. Niman aman nochimej quinchihualtiaj quen ijqui quinalactisquej campa Dios tlamandarohua.

¹⁷ 'Más huelis achtoj popolihuis on cielo‡ niman on tlalticpactli, xquen yejhua on itlanahuatil toTeco quipolos se pitelotzin yejhuan más pitentzin.

*Jesús otemachtij ica xcuajli para se tlacatl noxotonis ihuan isihuau
(Mt. 19.1-12; Mr. 10.1-12)*

¹⁸ 'Tla se tlacatl noxotonis itech isihuau niman ihuan ocse sihuatl nonamictis, quichihua sihuapajpatlalistli. Niman tla se tlacatl nonamictia ihuan on sihuatl yejhuan onoxotonij itech ihuehuentzin quichihua sihuapajpatlalistli.

Jesús otlajtlajtoj ica on tlacatl yejhuan ricoj catca niman Lázaro yejhuan mayanca tlacatl

¹⁹ 'Nemiya se tlacatl yejhuan ricoj catca. Yejhua notlaquentiaya quen yacaj rey ican on tlaquentli sanoyej patioj niman petlani. Niman mojmostla quichihuaya ilhuitl niman quicuayaj miyec tlajcuajli yejhuan sanoyej cuajli. ²⁰ Niman ne iquiahuatenco on tlacatl yejhuan ricoj catca notlaliaya se mayancatlacatl itoca Lázaro yejhuan nochí itlalnacayo tzotzoyoj catca.

²¹ Yejhua in mayancatlacatl quinequiya quicuas on tlen xiniya ne ipan imesa on tlacatl rico. Niman on chichimej quipajpalohuiliayaj itzotzohuan. ²² Se tonajli on mayanqui omic, niman on ilhuicactequitquej§ ocuicaquej para nemis ihuan Abraham ne ilhuicac. On tlacatl yejhuan ricoj catca no omic, niman oquitocato. ²³ On tlacatl yejhuan ricoj catca sanoyej tlajyohuiaya ne mictlan campa tetlajyohuilitoyan, niman oajcotlachix nepa tlacpac campa ocontac Abraham ihuan Lázaro. ²⁴ Quemaj ontzajtzic: "Notaj Abraham, ¡xnechpiali teicnelilistli!* Xnahuati Lázaro ma quipatzo icuatipan imajpil ican atl, niman ma huajla, ma quiseseliqui nonenepil, pampa sanoyej nitlajyohuijticaj ipan in tlitl." ²⁵ Pero Abraham oquijlij: "Nocone, xquelnamiqui ica tejhua oticselij nochí tlen cuajli ipan monemilis, niman Lázaro oquiselij nochí tlen xcuajli. Pero aman yejhua quiselia paquillistli, niman tejhua titlajyohuiya. ²⁶ Niman no oncaj se hueyi atlautli sanoyej tlacpac yejhuan techxelohua. Niman on yejhuan nican nemij yejhuan quinequij yasquej ompa on xhuelij, nion yejhuatej on yejhuan ompa on nemij xhuelij huajlahuij nican." ²⁷ Quemaj on tlacatl yejhuan ricoj catca oquijtoj: "Tla ijcon, tej, notaj Abraham, nimitzicnotlajtlanilia xcontitlani Lázaro ichan notaj ²⁸ campa niquimpia macuijli nocnihuan. Xcontitlani para ma quinmachiltiti, niman ijcon yejhuatej ma ca huajlasquej nican campa tetlajyohuilitoyan." ²⁹ Pero Abraham oquijlij: "Yejhuamej ompa quipiaj on tlen oquijcuilojquej Moisés niman on tiotlajtojquej. Ma yejhuatej quincaquican." ³⁰ On tlacatl yejhuan ricoj catca oquijlij: "Ca, notaj Abraham, yejhuatej xquincaquisquej. Pero tla yacaj comintas yejhuan yolihuis† niman noquetztehuas intzajlan on mimiquej, yejhuatej cajcahuasquej ica quichihuaj on tlen xcuajli." ³¹ Pero Abraham oquijlij: "Tla xquinequij caquisquej Moisés niman on tiotlajtojquej, no ijqui xtlaneltocasquej, masqui yacaj yolihuis niman noquetztehuas intzajlan on mimiquej niman quinnojnotzas."

17

*Jesús otemachtij ica on tlajtlacojli niman tetlapojpolhuilistli
(Mt. 18.6-7, 21-22; Mr. 9.42)*

‡ **16:17** On cielo oncaj ne campa oncaj ajacatl, moxtli, metztlij, tonajli niman sitlalimej. § **16:22**

ángeles: Angeles tequitij ne ilhuicac niman nican ipan in tlalticpactli. * **16:24** misericordia

† **16:30** resucitará; yolis

¹ Jesús oquimijlij on inomachtijcahan:

—Nochipa onyas on tlajtlamach* yejhuan quinchihualtis on tlacamej para ma tlajtlacocan. Pero jlástima para on tlacatl yejhuan quinchihualtia ocse-quimej tlajtlacohuaj! ² Más cuajli yesquia tla iquechpan quisalohuilisquiaj se tetl hueyi yejhuan imetl on molino, niman contlajcalisquiaj ipan mar, ijcuac xe quinchihualtia para semej in coconej ma tlajtlacocan. ³ Tla ijcon, xmotacan sa no nemejhuamej.

‘Tla mocniu tlajtlacohua motech, xmelajcanotza ica on tlen oquichiu, niman tla noyolpatla, xtlapojojalhui. ⁴ Masqui chicomepa mitzchihuilis tlajtlacojli ipan se tonajli niman cada ves huajlas niman mitzalijlis: “Aman xoc ocsejpa nicchihuas”, tla ijcon quitocarohua tictlapojojalhuis.

Jesús otemachtij ica on tlaneltoclistli

⁵ On apóstoles oquijijquej toTeco:

—Xtechmaca más tlaneltoctli.

⁶ Quemaj on toTeco oquimijlij:

—Tla nenquipiasquiaj nemotlaneltoc, masqui sanoyej† pitentzin quen yejhua on ixinachyo mostaza, huelisquia nenquijlisquiaj in cojtlí‡ sicómoro: “Xmohuihuitla nican niman xmotocati ne ipan mar”, niman on cojli mecht-lacamatisquia.

Itequichihuilijcau Dios xquitocarohua nohueyimatis

⁷ ‘Tla semej nemejhuamej quipia se itequichihuilijcau niman tla yejhua yohuajnocuepato ne campa tlaxoponia noso quintlapixtiaya on huacaxtin, ¿manin tiquijlia: “Xcalaqui; xmotlali niman titlacuas”? ⁸ Ca, tejhua yej tiquijlia: “Xnechchihuili tlen nicuas, niman xnemi nican para tiquitas tlen nechpolohua chica nejhua nitlacua niman natli. Quemaj quej tejhua huelis titlacuas niman tatlis.” ⁹ ¿Manin ticmaca tlaxtlahuijli on motequichihuilijcau pampa oquichiu on tlen oticnahuatij? Cuajli ticmatztoquej ica ca. ¹⁰ No ijqui ijcuac nemejhuamej tlamis nenquichihuasquej nochí tlen Dios mechnahuata, nonequi nenquijtosquej: “Tejhuamej xticuajcualtin titequitquej, pampa oticchijquej san on yejhuan nonequi ticchihuasquej.”

Jesús oquimpajtij majtlactlimej tlacamej yejhuan quipiayaj on temoji cuaololistli itoca lepra

¹¹ Ijcuac Jesús onojhuitlalij para Jerusalén, opanoc intzajlan on iregión Samaria niman Galilea. ¹² Ijcuac oajsic ipan se pueblito, oquisquej oquinamiquitoj majtlactlimej tlacamej yejhuan quipiayaj on cuaololistli yejhuan palania innacayo itoca lepra. Yejhuatej san huejca onomajman-quej ¹³ niman ijquin ocontzajtzilijquej Jesús:

—¡Jesús, Temachtijquetl, xtechicneli§ niman xtechpalehui!

¹⁴ Ijcuac Jesús oquintac, oquimijlij:

—Xhuiyan; xmoteitititij ne intech on tiopixquej.

Niman chica yejhuatej yayaj, opajtiquej. ¹⁵ Quemaj semej yejhuatej, ijcuac onotac yopajtic, onocuep, niman ican chicahuac tlajtojli cueyiliaya Dios. ¹⁶ Onotlacuenquetz ixpan Jesús onopachoj, niman ocajxitij ixayac hasta ipan tlajli, niman oquimacac tlaxtlahuijli. Niman on tlacatl chanej catca ne Samaria.

¹⁷ Quemaj Jesús oquijtoj:

* **17:1** cosas † **17:6** muy ‡ **17:6** árbol § **17:13** ten compasión de mí

—¿Xnochimej on majtlactlimej opajtiquej? ¿Canon nemij on ocse chicahuimej? ¹⁸ ¿San yejhua in yejhuan xhebreo ohuajnocuepato, para cueyilia Dios?

¹⁹ Quemaj Jesús oquijlij on tlacatl:

—Xmoquetztehua niman xhuiya. Otipajtic pampa otitlaneltocac.

*Jesús otemachtij quen ijqui niman quemanon Dios tlamandaros
(Mt. 24.23-28, 36-41)*

²⁰ On fariseos oquitlajtoltijquej Jesús quemanon pehuas tlamandaros Dios, niman yejhua oquimijlij:

—On ica yejcos ijcuac Dios tlamandaros, on xquen itlaj hueyilistli yejhuan huelis yacaj quitas. ²¹ Nion xnoteijlis: “Ye nican oncaj” noso “Nepa oncaj” pampa Dios ye nemotzajlan nemi listo para mechmandaros.

²² Quemaj oquimijlij on inomachtijcahuan:

—Yejcos on tonaltin ijcuac nemejhuamej nenquinequisquej para nejhua yejhuan oninochiu Tlacatl nihuajlas nemohuan masqui san se tonajli, pero xninemis nemohuan. ²³ Niman nemisquej sequimej yejhuan mechijlisquej: “Nican nemi” noso “Nepa nemi.” Pero nemejhuamej ma ca xhuiyan, nion ma ca xquinhuicacan, ²⁴ pampa ijcon quen ne iquisayan tonajli huajpehua nesi on tlacetlanajli niman on tlami hasta ne icalaquiyan on tonajli, sa no ijqui nochihuas ijcuac nejhua yejhuan oninochiu Tlacatl nihuajlas. ²⁵ Pero achtopa ica oncaj sanoyej nitlajyohuis, niman nechixnam quisquej on tlacamej yejhuan nemij ipan in tonaltin. ²⁶ Ijcuac nejhua yejhuan oninochiu Tlacatl nihuajlas, on tlacamej no ijqui nohuicasquej ijcon quen on tlacamej onohuicaquej ipan on tonaltin ijcuac nemiya Noé. ²⁷ Yejhuamej tlacuayaj niman atliyaj, niman nonamictiayaj niman quintemacayaj imichpochhuan para ma nonamictican, hasta ijqui oyejcoc on tonajli ijcuac Noé ocalac ijtic on barco. Niman quemaj ohuajlaj on apachihuolistli niman nochimej yejhuamej oamimiquej. ²⁸ Ijcuac nihuajlas no ijqui nohuicasquej on tlacamej quen onohuicaquej ipan on tonaltin ijcuac nemiya Lot. Tlacuayaj niman atliyaj, tlacohuayaj niman tlanamacayaj, tocayaj niman quinchijchi-huayaj incal. ²⁹ Pero ipan on tonajli ijcuac Lot oquis ne ipan on hueyican itoca Sodoma, otliquiau ican tlilt niman azufre, niman ijqui nochimej omiquej. ³⁰ Ijcon nochihuas ipan on tonajli ijcuac nejhua yejhuan oninochiu Tlacatl nihuajnonextis.

³¹ ’Ipan on tonajli, tla yacaj nemis ne ipan ical, ma ca ma temo para conquixtis on tlajtlamach quipia icalijtic. Niman tla yacaj nemis ne ipan tepetl, ma ca ma huajnocuepa para ichan. ³² Xquelnamiquican tlinon ipan onochiu isihuau Lot. ³³ On yejhuan quichihuas canica para quimaquixtis inemilis ipan in tlalticpactli, quipolos ialma. Pero on yejhuan quipolos inemilis san nopampa quimaquixtis ialma.

³⁴ ’Nemechijilia ica ipan on tlayohua cochisquej omemej san secan. On se cuicasquej niman ocse cajtehuasquej. ³⁵ Omemej sihuamej san secan tistiasquej. On se cuicasquej niman ocse cajtehuasquej. ³⁶ Omemej tlacamej nemisquej ne ipan tepetl. On se cuicasquej niman ocse cajtehuasquej.

³⁷ Ijcuac ijcon oquicaquilijquej, oquitlajtoltijquej:

—¿Canon ijcon nochihuas, toTeco?

Niman yejhua oquimijlij:

—Campa tlajcaltos on yolqui yejhuan yomic, ompa nosentlalisquej on tzopilomej.

Yejhua ijquin oquijtoj pampa no ijqui yes ne campa nemisquej on yejhuan xtlaneltocaj itech Dios. Ompa quinyolcuitisquej niman quintlajtlacolmacasquej.

18

Jesús oquixtij se ejemplo itech onjuez teyolcuitijquetl niman on sihuacahua-jli

¹ Jesús oquintlalilij se ejemplo para quintitis ica nonequi nochipa quichihuasquej oración, niman xqueman cajcahuasquej. ² Ijquin oquimijlij:

—Ipan se pueblo nemiya se juez teyolcuitijquetl. Yejhua xquitlacaitaya Dios, nion oquipix teicnelilistli* para on tlacamej. ³ Sa no ipan on pueblo no nemiya se sihuacahuajli† yejhuan nochipa contaya on juez para quitlatlaniliaya ma quipalehui para huelis quitlanis on yejhuan ihuan quipiaya tlahuejli. ⁴ Miyecpa on juez xoquinec quipalehui on sihuacahuajli, pero más saquin‡ ononemilij: “Masqui xnictlacaita Dios nion nicpia teicnelilistli para tlacamej, ⁵ nicpalehuis yejhua in sihuatl san pampa sanoyej§ huajlajtinemi niman nechpajsolohua niman ma ca yej nechyolajxitis.”

⁶ Niman on toTeco oquijtoj:

—Xcaquican on tlen oquijtoj on xcuajli juez teyolcuitijquetl. ⁷ Aman, tej, Dios no quimpalehuis on yejhuan oquintlapejpenij tla ican tonajli niman yehuajli itech nohueyicatzajtzilijtoquej*. ¿Nohuejcahuas ica quimpalehuis? ⁸ Nemechijlia ica xnohuejcahuas ica quimpalehuis. Pero ijcuac nejhua yejhuan oninochiu Tlacatl nihuajlas, ¿niquinhuajnextis on tlacamej ipan in tlalticpactli yejhuan tlaneltocaj?

Jesús oquixtij se ejemplo ica on fariseo niman on tlacobrarojquetl ican impuestos yejhuan oquichijkej oración

⁹ Jesús oquimijlij se ejemplo on yejhuan quinemiliaj ica yejhamej más cuajcualtin niman quinchichihuaj on ocsequimej. Oquijtoj:

¹⁰ —Omemej tlacamej oquichihuatoj oración ne ipan tiopan. Semej yejhamej se fariseo catca niman ocse yejhuan tequitiya quen tlacobrarojquetl ican impuestos. ¹¹ On fariseo ijcaticatca niman ijquin quichihuaya ioración: “Oh Dios, noTajzin, nimitzmaca tlaxtlahuijli pampa nejhua xnicchihua quen on ocsequimej yejhuan quiteixpachohuiliaj itlaj, niman xyolmelajquej niman sihuapajpatlaj. No ijqui nimitzmaca tlaxtlahuijli pampa xnicchihua quen yejhua in tlacobrarojquetl ican impuestos. ¹² Nejhua ocpa ninosahua ipan se semana, niman de nochí on tlen niestani ompa niquixtia on diezmo niman nimitzmaca.” ¹³ Pero on tlacobrarojquetl san huejca onocau niman xquinequiya nion achijtzin para ajcotlachas ne ilhuicac, yej san noyelpanhuitequiya ican ajmantli niman quijtohuaya: “¡Oh Dios, noTajzin, xnechicneli†! Nejhua sanoyej nitlajtlacolej.” ¹⁴ Nemechijlia ica ijcuac on tlacobrarojquetl oyaj ichan, xoc quipiaya tlajtlacojli. Pero on fariseo xoquitlapojpolhuijquej, pampa on yejhuan nohueyilia, masqui xquinequis nocnelis, niman on yejhuan nocnelia, quihueyilisquej.

Jesús oquintiochiu on coconej (Mt. 19.13-15; Mr. 10.13-16)

¹⁵ On tlacamej quinhuajhuicayaj inconetzitzihuan itech Jesús para ma quincuamatoca. Pero ijcuac on nomachtijquej ijcon oquitaquej, opejquej

* **18:2** misericordia † **18:3** viuda; icnosihuatl ‡ **18:4** después § **18:5** mucho * **18:7** clamando; teoyotl † **18:13** ten misericordia de mí

quimajhuaj on yejhuan quinhuajhuicayaj on coconej. ¹⁶ Pero Jesús oquinnotz on coconej ma huajlacan itech, niman oquimijlij inomachtijcahuan:

—Xquincahuacan on coconej notech ma huajlacan, niman ma ca xquin-teltican, pampa on yejhuan yolyemanquej[‡] quen in coconej calaquisquej ne campa Dios tlamandarohua. ¹⁷ Ica tlen melahuac nemechijlia ica on yejhuan xquiselis itequihuayo Dios quen yacaj conetl, xqueman calaquis campa Dios tlamandarohua.

Se telpochtli yejhuan ricoj catca quinequiya quimatis quen ijqui quipias on yencuic nemilistli yejhuan para nochipa

(Mt. 19.16-30; Mr. 10.17-31)

¹⁸ Semej yejhamej on tlayecanquej oquitlajtoltij Jesús:

—Cuajli temachtijquetl, ¿tlinon nonequi nicchihuas para nicselis on yencuic nemilistli yejhuan para nochipa?

¹⁹ Jesús oquijlij:

—¿Tlica[§] tiquijtohua ica nicuajli? Dios san yejhua iselti cuajli, niman tejhua ticnemilia ica nejhua xniDios. ²⁰ Tejhua tiquimixmati on tlen Dios tlanahuatia: “Ma ca xsihuapajpatla, ma ca xtemicti, ma ca xtlachtequi, ma ca yacaj xtlajtolquetztehuili, xtlacaita motaj niman monan.”

²¹ On tlacatl oquijlij:

—Nochi yejhua in desde niconetl nicuajtlacamatztiu.

²² Ijcuac Jesús ijcon ocac, oquijlij:

—Oc* mitzpolohua sa se cosa. Xhuiya mochan niman xnamaca nochi tlen ticpia niman on tomin xquinmaca on mayanquej. Tla ijcon ticchihuas, ticpias riquezas ne ilhuicac. Niman quemaj xhuajla niman xnechhuica.

²³ Pero ijcuac on tlacatl ijcon ocac, sanoyej onajman pampa sanoyej ricoj catca. ²⁴ Ijcuac Jesús oquitac ica on tlacatl onajman, oquijtoj:

—¡Sanoyej ohuiticaj[†] para Dios quinmandaros on yejhuan ricos! ²⁵ Más sanoyej ohuiticaj para se rico calaquis ne campa Dios tlamandarohua xquen para se camello panos ipan on campa tlacoyoniaj ican aguja.

²⁶ San yejhua ica on, yejhamej on yejhuan ocacquej oquitojquej:

—Tla ijcon, ¿jaquinon huelis maquisas?

²⁷ Jesús oquimijlij:

—On tlen on tlacamej xhuelij quichihuaj, Dios quemaj hueli quichihua.

²⁸ Pedro oquijlij:

—Xquita, tejhuamej yoticajquej nochi tlen ticpiayaj, niman tiquistinemij mohuan.

²⁹ Ijcuacon yejhua oquimijlij:

—Ica tlen melahuac nemechijlia ica san aquinon yejhuan quicahuas ichan, noso itajhuan, noso icnihuan, noso isihuau, noso iconehuan san ipampa itequiu Dios, ³⁰ quiselis miyec más ipan in tonaltin, niman ipan on tonaltin yejhuan huajlau quiselis nemilistli yejhuan para nochipa.

Jesús ica yexpa oquimijlij on inomachtijcahuan ica miquis

(Mt. 20.17-19; Mr. 10.32-34)

³¹ Jesús ocsecan oquinnotz on majtlactli huan ome nomachtijquej, niman oquimijlij:

—Aman tiahuij ne Jerusalén campa tenquisas nochi tlen on tiotlajtojquej oquijcuilojquej noca nejhua yejhuan oninochiu Tlacatl. ³² Nechtemacasquej, tej, intech on yejhuan xhebreos. Yejhamej nechhuetzcasquej, nechhui-jhuicaltisquej niman nechchijchasquej. ³³ Nechhuijhuitequisquej niman

[‡] **18:16** humilde § **18:19** ¿por qué?; ¿tline? * **18:22** todavía; sanquen † **18:24** difícil

quemaj nechmictisquej, pero ipan yeyi tonajli nejhua niyolihuis[‡] niman ninoquetztehuas ne ipan notlalcon.

³⁴ Nochi yejhua on tlen oquimijlij xocajsicamatquej, pampa nochi on tlajtlamach[§] tlen oquimijlij Dios xoquincahuilij ma cajsicamatican. Yejhuamej, tej, nion achijtzin xquimatiyaj tlinon ica tlajtlajtojticatca.

*Jesús oquipajtij se ciego yejhuan chanej ne Jericó
(Mt. 20.29-34; Mr. 10.46-52)*

³⁵ Ijcuac Jesús oquinisihuij on hueyican itoca Jericó, se ciego yehuaticatca ipan ojtlí notlajtlayehuiticatca. ³⁶ Ijcuac on ciego ocac miyec tlacatl panoticaj ne campaca yejhua nemiya, oquitelajtoltij tlinon nochijticaj. ³⁷ Niman oquijlijquej ica Jesús yejhuan hualehua Nazaret ompaca panoticatcaj. ³⁸ Quemaj on ciego otzajtzic:

—¡Jesús, huejca teixhuiu* itech David, xnechicneli† niman xnechpalehui!

³⁹ On yejhuan tlayecapan yayaj ocajhuaquej niman oquijlijquej para ma ca sa ma nahuati, pero yejhua oc‡ más tzajtziya:

—¡Huejca teixhuiu itech David, xnechicneli niman xnechpalehui!

⁴⁰ Quemaj Jesús onoteltij niman otlanahuatij ma canilitij. Ijcuac ixpan yocuajhuiquilijquej, Jesús ijquin oquijlij:

⁴¹ —¿Tlinon ticnequi ma nimitzchihuili?

Niman on ciego oquijlij:

—NoTeco, xchihua para ma nitlacha.

⁴²⁻⁴³ Jesús oquijlij:

—¡Xseli motlachalis!

Nimantzin on ciego ohuel otlachix. Quemaj Jesús oquijlij:

—Aman oticselij motlachalis pampa otitlaneltocac ica nimitzpajtisquia.

Ijcuacon yejhua oyaj ihuan Jesús, niman quihueyiliaya Dios. Niman nochimej tlacamej yejhuan oquitaquej yejhua on no oquiyectenejquej Dios.

19

Jesús oyaj ichan Zaquo

¹ Quemaj Jesús ocalac niman san opanotquis ne ipan on hueyican itoca Jericó. ² Ipan on hueyican nemiya se tlacatl yejhuan rico catca. Yejhua intlayecanau catca on tlacobrarojquej ican impuestos. Yejhua itoca catca Zaquo. ³ Yejhua quinequiya quitas aquinon Jesús, pero xhueliya quitaya pampa yejhua semi xhuejcapan catca niman sanoyej* tojlan catca. ⁴ Ne campaca Jesús opanoc, oncatca se cojtlí† itoca sicómoro. Niman Zaquo onotlaloj niman otlejcoto ne ipan on cojtlí para ohuel oquitac Jesús. ⁵ Ijcuac Jesús ompaca panotiaya, onajcotlinchix, niman oquijlij Zaquo:

—Zaquo, xhuajtemotetzi, pampa aman ica oncaj mochan ninocahuas.

⁶ Quemaj Zaquo nimantzin ohuajtemoc, niman ican pactli oquiselij Jesús.

⁷ Ijcuac ijcon oquitaquej, nochimej opejquej quichtacatlatoihuiliyaj, niman quijtohuayaj tlica‡ Jesús ocalaquito niman nocahua ichan se tlajtlacolej.

⁸ Quemaj Zaquo ohuajnotelquetz niman oquijlij on toTeco:

—Xcaqui, noTeco, on tlen nicpia tlajcotipan niquinmacas on yejhuan mayanquej. Niman tla yacaj onicajcayajca para ohuel onictlachtequilij, naupa sa no ijqui nicuepilis on quech oniquichtequilijca.

⁹ Jesús oquijlij:

‡ 18:33 resucitaré; niyolis § 18:34 cosas * 18:38 descendiente † 18:38 ten misericordia de mí ‡ 18:39 todavía; sanquen * 19:3 mucha † 19:4 árbol ‡ 19:7 por qué; tline

—Aman on yejhuan chantij nican ipan in cajli yoquiseliquej temaquixtilistli, pampa in tlacatl no tlaneltoca quen Abraham otlaneltocac. ¹⁰ Nejhua, tej, yejhuan oninochiu Tlacatl onihuajlaj para onictejtemoco niman oniquicmaquixtico on yejhuan ixpolijtoquej.

*Jesús oquixtij se ejemplo ica on majtlactli tomin
(Mt. 25.14-30)*

¹¹ Chica on tlacamej cacticatcaj on tlajtlamach[§] yejhuan Jesús quimijlijticatca, oquintlalilij ocse ejemplo, pampa ye nisu Jerusalén nemiya niman on tlacamej quinemiliayaj ica san yejcotetzis on ica Dios tlamandaros. ¹² Yehua ijquin oquimijlij:

—Nemiya se hueyixticaj tlacatl. In tlacatl ye qui piaya para yas huejca ipan ocse país campa conselis tlanahuatiijli para rey yes, niman quemaj ocsejpa huajlas. ¹³ Ijcuac xe yaya ipan on país, oquinnotz majtlactlimej itequichihuilijcahuán para cada se quimacas huejhueyi tomin. Quemaj oquinmijlij: “San chica nihuajlau, xtla cohuacan niman xtlanamacacan ica in tomin.” ¹⁴ Pero on tlacamej chanejquej ipan on país quitlahuelitayaj on tlacatl. Yehua ica yejhuamej oquintlanquej quesquimej tlacamej yejhuan san ocuitlapanhuijquej para oquitejlitoj: “Xticnequij para yejhua in tlacatl torey yes.” ¹⁵ On tlacatl oquiselij tlanahuatiijli para rey, niman quemaj onocuep para oyaj ipan ipaís. Ijcuac oajsic ichan, oquintlatitlanilij on yejhuan oquinahuilijtejca itomin. Yehua oquintecuitlan para quimatis quech yoquitlan cada se. ¹⁶ On achtoj tlacatl oyaj itech, niman oquijlij: “Señor, motomin ocse majtlactli yoquitlan.” ¹⁷ Niman on rey oquijlij on tlacatl: “Sanoyej cuajli tlen oticchiu. Tejhua ticuajli tequitquetl. Niman pampa oticpix cuajli moyojo ipan on tlen achijtzin onimitzmacac, nimitzmactilis majtlactli pueblos para titequihiuaj yes.” ¹⁸ Quemaj quej yejhua on ocse oyaj itech niman oquijlij: “Señor, motomin ocse macuijli yoquitlan.” ¹⁹ Niman on rey no ijqui oquijlij: “Tejhua nimitzmactilis macuijli pueblos para titequihiuaj yes.” ²⁰ Quemaj quej on ocse oyaj itech niman oquijlij: “Señor, nican oncaj motomin yejhuan oniquejeu ican se pañito. ²¹ Nejhua oninomojtij pampa tejhua tiyoltechicactic, niman ticmoyaxcatia on tlen xmoyaxca* niman tictlani on itlanca on tlen tictemaca.” ²² Ijcuacon on rey oquijlij: “¡Xcuajli tequichihuilijquet! Sa no ican motlajtol nimitztlajtlacolmaca. Tejhua ticmatzticatca ica niyoltechicactic, pampa nicnonyaxcatia on tlen xnoyaxca niman nictlani itlanca on tlen nictemaca. ²³ Tla ijcon, tej, ¿tlica xoticalactij notomin ipan banco para tla yonejcoc nochan nicselijtejcosquia on itlanca?” ²⁴ Quemaj on rey oquimijlij on yejhuan ompa nemiyaj: “Xcuilican on tomin niman xmacacan on yejhuan quipia majtlactli tomin.” ²⁵ Niman yejhuamej oquijlijquej on rey: “Pero Señor, yejhua ye quipia majtlactli.” ²⁶ On rey oquimijlij: “Nejhua, tej, nemechijlia ica on yejhuan quipia miyec, más quimacasquej. Pero on yejhuan san quipia achijtzin hasta on quech quipia cuilisquej. ²⁷ Niman on notlahuelicnihuan yejhuan xquinequiyaj niinrey yes, xnechinhuajhuiquili-can niman nixpan xquinmictican.”

*Jesús ocalac Jerusalén quen se rey
(Mt. 21.1-11; Mr. 11.1-11; Jn. 12.12-19)*

²⁸ Ijcuac Jesús otlan quiteijlia on ejemplo, otlejcoc ipan on ojli para Jerusalén ne inyecapan on ocsequimej. ²⁹ Ijcuac oquinisihuij on pueblos intoca Betfagé niman Betania, yejhuan onoquej nisu itech on tepetl itoca Olivos, oquintitan omemej inomachtijcahuán, ³⁰ niman ijquin oquimijlij:

§ 19:11 cosas * 19:21 te pertenece; moaxca, mohuaxca, motlatqui

—Xhuiyan ipan on pueblito yejhuan oncaj ne tlayecapan. Ne campa nemoncalactiasquej, nenquitasquej salijticaj se polocotzin[†] yejhuan xqueman yacaj ipan tlejcohua. Xtojtomacan, tej, niman xnechajhuiquilican. ³¹ Niman tla yacaj mechtlajtoltia tlica nenquitojtomaj, xquijlican ica nemoTeco quitequitiltis.

³² On nomachtijquej oyajquej ipan on pueblito niman oquinextijquej ijcon quen Jesús oquimijlij. ³³ Ijcuac yejhamej quitojtonicatcaj on polocotzin, on iteco oquintlajtoltij:

—¿Tlica nenquitojtomaj on polocotzin?

³⁴ On nomachtijquej oquinanquilijkej:

—Pampa on toTeco quitequitiltis.

³⁵ Niman ocuiquilijkej Jesús on polocotzin. Quemaj oquitlalijkej intlaquen ipan on polocotzin, niman oquitlejcoltijquej Jesús. ³⁶ Chica Jesús yetiaya ipan on polocotzin, on tlacamej quisojiayaj intlaquen ipan ojtli. ³⁷ Ijcuac Jesús oajsic ne campa pehuas temos ipan on tepetl itoca Olivos, nochimej on miyequej nomachtijquej opejquej paquij, niman quiyectenehuayaj Dios ican chicahuac tlajtoli pampa nochí on tlamajhuisoltin yejhuan oquitaquej. ³⁸ On nomachtijquej quijtohuayaj:

—¡Dios ma quitiochihua on Rey yejhuan huajlau ican itocatzin toTeco! ¡Ma onya yolsehuilistli ne ilhuicac, niman ma Dios quiseli hueyilistli!

³⁹ Quemaj sequimej fariseos yejhuan nemiyaj intzajlan on tlacamej oquijlikej Jesús:

—Temachtijquetl, xquintlacahualti monomachtijcahuan.

⁴⁰ Pero Jesús oquimijlij:

—Nejhua nemechijlia ica tla yejhamej nocamatzacuasquej, yej in temej tzajtzisquej.

Jesús ochocac ipampa Jerusalén

⁴¹ Jesús sa nisu yaya itech Jerusalén, niman ijcuac ocontac on hueyican, ochocac, ⁴² niman oquijtoj:

—¡Tla ticajsicamatisquia ica ipan in tonajli huelisquia ticselisquia yolsehuilistli, xticselisquia icastigo Dios! Pero aman yejhua on omitziyaniliijkej niman xhueli ticmati. ⁴³ Mopan yejcos on xcuajli tonaltin ijcuac on motlahuelicnihuan mitzyehualtzacuasquej ican se tepanchinantli. Sa no yejhamej mitzyehualosquej niman nochihuiyan mitzmajmasquej. ⁴⁴ Yejhamej, tej, hasta ixco tlajli mitzcahuasquej. Yejhamej quinmictisquej on mopan chanejquej, niman xmitzcahuilisquej nion se tetl nepanijtias, pampa xoticmat tlen tonajli omitznotzaco Dios para mitzmacas temaquixtilistli.

Jesús oquichipau ihueyi tiopan Dios (Mt. 21.12-17; Mr. 11.15-19; Jn. 2.13-22)

⁴⁵ Quemaj Jesús ocalaquito ne ijtic on hueyi tiopan niman opeu quinhaujquixtia on yejhuan ompa tlanamacayaj niman tlacohuayaj. ⁴⁶ Yejhua ijquin oquimijlij:

—Ipan on Yectlajcuilojli ijquin tlajcuilnesticaj: “Nochan itoca yes chanyotl[‡] campa quichihuasquej oración.” Pero nemejhuamej yonencuepquej quen teostocajli campa on tlachtequej nosentlaliaj.

⁴⁷ Jesús mojmostla temachtaya ipan on hueyi tiopan, pero intlayecanau on tiopixquej, niman on temachtijquej ican itlanahuatil Moisés niman on

† 19:30 burrito ‡ 19:46 casa; cajli

tlayecanquej ipan on hueyican quitejtemohuiliayaj quen ijqui huelis quimictisquej. ⁴⁸ Pero xquimatiyaj quen ijqui huelis quimictisquej, pampa nochi tlacatl sanoyej quinequiya caquis nochi tlinon yejhua cuitlahuaya.

20

On tlayecanquej tiopixquej niman on tlajtlajmatquej oquitlajtoltijkej Jesús aquinon oquimacac tlanahuatiji

(Mt. 21.23-27; Mr. 11.27-33)

¹ Se tonajli ne ipan on hueyi tiopan, Jesús quinmachtiaya on tlacamej niman quimijliaya on temachtijli yejhan quitemaca temaquixtilistli. Intlayecancahuon on tiopixquej niman on temachtijkej ican itlanahuatil Dios san secan ihuan on tlajtlajmatquej oajsiquej itech Jesús, ² niman oquijlijquej:

—Xtechijli ¿tlen tequihuajyotl ticpia para ticchihua yejhua in tlajtlamach*? ¿Aquinon, tej, omitzmacac yejhua on tequihuajyotl?

³ Niman Jesús oquimijlij:

—Nejhua no nicpia tlen nemechtlatoltis. ⁴ Xnechijlican, ¿quinon ocuajtitlan Juan para ma tlacuatequi? ¿Dios ocuajtitlan, noso on tlacamej ocuajtitlanquej?

⁵ Quemaj yejhamej opejquej ijquin quinochtacatlajtoltiayaj:

—¿Quen ijqui tiquijlisquej? Tla tiquijtosquej ica Dios ocuajtitlan, yejhua ijquin techijlis: “Tla ijcon, ¿tlica†, xonenquineltocaquej on tlen Juan oquijtoj nocanejhua?” ⁶ Niman tla tiquijtosquej ica on tlacamej ocuajtitlanquej, nochimej in tlacamej techmictisquej ican temej, pampa yejhamej xometlamatij ica Juan itiotlajtojcau Dios.

⁷ Yejhua ica, tej, yejhamej oquijlijquej Jesús ica xquimatiyaj aquinon ocuajtitlan Juan para ma tlacuatequi. ⁸ Niman Jesús oquimijlij:

—Yejhuela ica nejhua no xnemechijlis aquinon onechmacac tequihuajyotl para nicchihua yejhua in tlajtlamach.

Jesús oquitlalij se ejemplo interno on hebreos yejhuan xoquiselijquej Cristo
(Mt. 21.33-34; Mr. 12.1-11)

⁹ Quemaj Jesús opeu quinnojnotza on tlacamej niman oquintlalilij yejhua en ejemplo:

—Sen tlalejquetl oquitocac miyec uvas, niman ijcuac yoquitocac oquintlanejtij sequimej medieros para quitlapilisquej ican on uvas. Niman on tlalejquetl onejcuaniy niman oyaj ipan ocse país para miyec tonaltin. ¹⁰ Ijcuac oyejcoc on tonaltin para quitequisquej on uvas, on tlalejquetl yejhuan oquitocac on uvas oquititlan itequichihuiliycau para ma quintlajtlaniliti on medieros on quech yejhua quitocarohua quiselis. Pero yejhamej oquimaj-mailijquej on tequichihuiliycau niman ocotitlanquej. Xitlaj oquimacaquej.

¹¹ Quemaj on tlalejquetl oquititlan ocse itequichihuiliycau, pero yejhua on tequichihuiliycau no oquitlahuelixnamiquej niman oquimaj-mailijquej, niman oquititlanquej. Xitlaj oquimacaquej. ¹² Quemaj on tlalejquetl oquititlan on ica yeysi itequichihuiliycau, pero on medieros ipan on uvasyoj no ocojcoquej niman ocuajquixtijquej.

¹³ Quemaj iteco on tlatoctli ijquin oquinemilij: “¿Quen ijqui nicchihuas? ¡Ah, aman nicmati! Nictitlanis notlajsojcacone. Cas ijcuac quitasquej quitlacaitasquej.” ¹⁴ Pero ijcuac on medieros oquitaquej on teconeu, oquinojlijquej: “Yejhuela in iconeu on tlalejquetl. Ijcuac miquis itataj, yejhua yes iyaxca‡ nochi in tlajli. Aman, tej, ma ticmictican iconeu para tejhamej

* 20:2 cosas † 20:5 ¿por qué?; ¿tline? ‡ 20:14 le pertenece; iaxca, ihuaxca, itlatqui

toyaxca yes.” ¹⁵ Yejhuamej, tej, ocuajquixtijquej on teconeu ne ipan on uvasyoj, niman oquimictijquej.

Quemaj Jesús oquintlajtoltij:

—Aman, tej, iteco on uvasyo, ¿tlinon quinchihuilis on xcuajcualtin medieros? ¹⁶ Yejhua, tej, yas niman quinhuajmictis on medieros niman on tlatoctli ocsequimej quinmacasquej para cuidarosquej.

Ijcuac on tlacamej ijcon ocacquej on ejemplo, oquimatquej ica on iteco on uvasyo quijtosnequi Dios, niman on xcuajcualtin tequitquej quijtosnequi sa no yejhuamej. Yejhua ica oquijtojquej:

—¡Xnejli! Dios xquichihuas.

¹⁷ Pero Jesús oquimixtlaloj, niman oquimijlij:

—Tla xijqui tej, ¿tlinon quijtosnequi yejhua in Yectlajcuilojli? Ijquin tla-cuilohesticaj:

On tetl yejhuan xoquiselijquej on tepanchijquej aman yejhua yacatztica.

¹⁸ San aquinon ipan huetzis on tetl, tepojpostequis, niman tla on tetl yacaj ipan huetzis, quicuejcuechtilis.

On fariseos oquijtlajtoltijquej Jesús tla cuajli para quitlaxtlahuasquej on impuestos ne Roma

(Mt. 21.45-46; 22.15-22; Mr. 12.12-17)

¹⁹ Nimantzin on intlayecancahuan on tiopixquej niman on temachtijquej ican tlanaahuatiji oquejecojquej ocajsiquej Jesús para contzacuasquej, pampa quimatzticatca ica on ejemplo oquintenehuilij yejhuamej. Pero xocajsiquej, pampa quinmacajsiyaj on tlacamej. ²⁰ Yejhuamej, tej, oquintitanquej on yejhuan notenehuaj cuajcualtin tlacamej para oquipippiatoj Jesús. Yejhuamej oquichihualtijquej itlaj ma quijto yejhuan huelis ica quitemactilisquej itech on gobernador. ²¹ Yejhua ica ijquin oquitlajtoltijquej:

—Temachtijquetl, ticmatztoquej ica on tlen tiquijtohua niman tictemachtia yejhua tlen melahuac. Niman no ticmatztoquej ica xqueman titechicoita§ intech tlacamej, yej on tlacamej cuajli tiquintitia quen Dios quinequi para nohuicasquej. ²² Aman xtechijli: ¿Itlanahuatil Moisés techcahuilia tontlatlaxtlahuasquej ican impuestos itech César yejhuan itequihuaj on país Roma?

²³ Pero Jesús oquimat ica yejhuamej ican xcuajli inyojlo ijcon quitlajtoltijayaj san para cajcayahuasquej. Yejhua ica ijquin oquimijlij:

—¿Tlica nennechnequiliaj para ma niquijto itlaj yejhuan ica huelis nennechteixpanhuisquej? ²⁴ Se xnechititican on tomin. ¿Aquinon iyaxca yejhua in, niman aquinon itocayo nican tlajcuilohesticaj ipan in tomin?

Yejhuamej oquijlijquej:

—On tlanaahuatijquetl César yejhuan itequihuua nochí on país itoca Roma.

²⁵ Quemaj Jesús oquimijlij:

—Tla ijcon, tej, xmacacan César on tlen yejhua iyaxca, niman xmacacan Dios on tlen yejhua iyaxca.

²⁶ Yejhuamej, tej, xohuelquej ocajgayajquej ica on tlen imixpan on tlacamej quijtohuaya. Yej, yejhuamej otlamojcaitaquej, pampa Jesús ijcon oquinnan-quilij niman xoc onahuatquej.

On saduceos oquitlajtoltijquej Jesús tla yolihiisquej niman noquetzahuasquej on yejhuan yomicquej

(Mt. 22.23-33; Mr. 12.18-27)

§ **20:21** no tengas favoritos, no hagas acepción de personas

²⁷ Oquitatoj Jesús sequimej saduceos yejhuan quijtohuaj ica xhuelis yolihuisquej* niman noquetztehuasquej on mimiquej. Yejhuamej ijquin oquijlijquej Jesús:

²⁸ —Temachtijquetl, ipan itlanahuatil Moisés ijquin oquijcuiloj para tejhuamej. Tla se tlacatl miqui niman xican iconehuan cajtehua on sihuatl, icniu on tlacatl ica oncaj nonamictis ihuan on sihuacahuajli†, niman ihuan tlascaltis para on coconej nemisquej quen iconehuan yesquia on icniu yejhuan omic. ²⁹ Aman, tej, nemiyaj chicomemej icniutin yejhuan tlacamej. On yejhuan yencuiyotl ononamictij, niman quemaj omic, pero on sihuatl xoquitlascaltililij. ³⁰ Quemaj on ica ome teicniu ononamictij ihuan on sihuacahuajli, niman quemaj no omic in teicniu, niman on sihuatl xoquitlascaltililij. ³¹ Quemaj quej on ica yeyi teicniu ononamictij ihuan on sihuacahuajli, niman hasta ijqui oquijsoatoj nochimej on icniutin. Nochimej, tej, omiquej, niman nion se xoquitlascaltililij on sihuatl. ³² Quemaj on sihuatl no omic. ³³ Ijcuac yolihiilos, ¿catlejhuia itech tesihuau yes de yejhuamej on chicomemej icniutin, pampa nochimej oquipixquej quen insihuau?

³⁴ Quemaj Jesús oquimijlij:

—Chica nemij ipan in tlalticpactli, on tlacamej niman on sihuamej nonamictiaj niman on tatajtin quintemacasquej imichpochhuan para ma nonamictican. ³⁵ Pero ijcuac yolihiuisquej niman noquetztehuasquej intzajlan on mimiquej, on yejhuan Dios quincahuilis ajsisquej ne ilhuicac, xoc nonamictisquej nion on tatajtin quintemacasquej inconehuan para ma nonamictican. ³⁶ Xnonamictisquej pampa ompa xoc miquisquej. Yejhuamej, tej, quen on ilhuicactequitquej‡. Niman pampa yolihiij niman noquetztehuaj intzajlan on mimiquej, yejhuamej tecone huan itech Dios. ³⁷ Hasta Moisés otechmachiltij ica on mimiquej yolihiij niman noquetztehuaj. Ijcuac on tlacotepajsojli tlacacticatca, toTeco Dios ompa oquijlij Moisés ica yejhua iDios Abraham, Isaac niman Jacob. ³⁸ Ticmatij ica Dios xejhua inDios on mimiquej, yej yejhua inDios on yoltoquej, pampa para yejhua melahuac nochimej quipiaj nemilistli.

³⁹ Quemaj sequimej temachtijquej ican on tlanahuatijli oquijlijquej Jesús:

—Temachtijquetl, cuajli on tlen otiquijtoj.

⁴⁰ Niman on saduceos xoc oquinemilijquej itlaj más quitlajtoltisquej.

*Jesús otlajtoj ica on Cristo huejca teixhuiu itech David niman no iTeco
(Mt. 22.41-46; Mr. 12.35-37)*

⁴¹ Quemaj Jesús oquimijlij:

—¿Tlica nijtohua ica Cristo yejhuan Dios oquitlapejpenij para temaquixtis yejhua huejca teixhuiu§ itech David? ⁴² Tej, ipan on Salmos tlajcuilnesticaj ica sa no David ijquin quijtohua:

Dios oquijlij noTeco: “Xmotlali nican ipan noyecma,

⁴³ hasta caman ma nimitztlali tlayecanquetl intech on yejhuan motlahuelicnihuan.”

⁴⁴ Tla David ijcon oquijtoj ica Cristo yejhua iTeco, tla ijcon, tej, ¿Quen ijqui Cristo hueli huejca teixhuiu itech David?

*Jesús oquiteijlij ma ca xmohuicacan quen omexayacyejquej
(Mt. 23.1-36; Mr. 12.38-40; Lc. 11.37-54)*

⁴⁵ Nochi tlacatl tlacacticatca ijcuac Jesús ijquin oquimijlij inomachtijcahuau:

* ^{20:27} resucitarán; yolisquej † ^{20:28} viuda; icnosihuatl ‡ ^{20:36} ángeles: Angeles tequitij ne ilhuicac niman nican ipan in tlaticpactli. § ^{20:41} descendiente

46 —Xmotacan sa no nemejhuamej intech on temachtijquej ican tlanahuatjli yejhuan cuelitaj tlaquenhuejhueyacquistinemij, niman quinequij ican miyec tetlacaitalistli ma quintlajpalocan neca ipan plaza, niman quinequij on más cuajli sietas ne ipan on tiopantin, niman ipan on ilhuimej quinequij nosehuisquej ipan on más huejhueyixtoquej sietas. **47** Yehuamej, tej, no quinchancuiliaj on sihuacahualtzitzintin*, niman sanoyej† huejhueyac oraciones quijtohuaj imixpan on tlacamej para on tlacamej ma cuajli tlanemili-can intech. Yehuamej, tej, más hueyi castigo quiselisquej.

21

*On sihuacahualtzintli yejhuan mayanqui oquitlalij ihuentomin
(Mr. 12.41-44)*

1 Ijtic on hueyi tiopan Jesús ocomintac on ricos quitlaliyaj tomin ijtic on caja campa nosentlalia on huentomin. **2** No ijqui oquitac se mayanqui sihuacahualtzintli* yejhuan ocontlalij san ome cobre tomin ijtic on caja.

3 Niman yejhua oquijtoj:

—Ica tlen melahuac nemechijlia ica yejhua in mayanqui sihuacahualtzintli más hueyi oquitlalij ihuentomin xquen nochimej ocsequimej. **4** Nochimej on ocsequimej, tej, oquitlalijquej inhuentomin yejhuan yoquinsobraroj, pero in sihuatl, masqui mayanqui, oquitemacac nochi tlen quipiaya para notequipanos.

*Jesús oquimijlij on inomachtijcahuau ica on hueyi tiopan xoxotonis
(Mt. 24.1-2; Mr. 13.1-2)*

5 Ijcuac sequimej inomachtijcahuau tlajtlajtoticatcaj ica on hueyi tiopan niman quen tlachijchiutli ican cualtetzitzintin temej niman yejhua ica on cualtetzitzintin tlajtlamach† yejhuan ompa onotetlayocolijca quen ofrendas, Jesús oquijtoj:

6 —Yejes on tonajli ijcuac nochi on tlen amantzin nenquitztoquej xoxotonis, niman nion se tetl xnocahuas ipan ocse tetl.

*Jesús oquimijlij inomachtijcahuau tlinon nochihuas ijcuac nisu tlatlalpolihuis
(Mt. 24.3-28; Mr. 13.3-23)*

7 Quemaj oquitlajtoltijquej:

—Temachtijquetl, ¿quemanon nochihuas? ¿Tlen tlamajhuisojli noteititis ijcuac in tlajtlamach ye pehuas nochihuas?

8 Jesús oquijtoj:

—Xmotacan sa no nemejhuamej, niman ma ca nenquimocahuilisquej mechcajcyahuasquej, pampa huajlasquej miyequej yejhuan ican noTo-catzin cualijtojtiasquej: “Nejhua niCristo”, niman “Aman yoyejcoc on tonajli.” Pero nemejhuamej ma ca xhuiyan inhuan. **9** Niman ijcuac nen-caquisquej ica oncaj guerras niman revoluciones, ma ca nemomojtisquej. Tej, nochi yejhua on ica oncaj achtopa nochihuas. Pero ijcuac ijcon nochihuas, oc‡ xejhua tonajli para ipan in tlalticpactli tlatlajtlamis nimantzin.

10 Jesús ocsejpa más oquijtoj:

—On tequihuajquej nohuijsoquisquej ihuan ocsequimej tequihuajquej, niman on países nomijmictisquej ihuan ocsequimej países. **11** Temojtii tlalolinis ipan miyecan, niman onyas apistli niman miyec cualolistli. Niman

* **20:47** viudas; icnosihuamej † **20:47** muy * **21:2** viuda; icnosihuatl † **21:5** cosas ‡ **21:9** todavía; sanquen

ne ipan cielo§ miyec tlajtlamach temojtij nesis, niman huejhueyi tlama-jhuisoltin.

¹² Pero ijcuac xe nochihua nochi yejhua in, mechajsisquej, niman mecht-lahuelitasquej niman tlajtlamach ica mechtlajyohuiltisquej niman mecht-lajtlamacasquej ne impan on tiopantin. No ijqui mechtzajtzacuasquej, niman imixpan on reyes niman gobernadores mechhuicasquej. Nochi yejhua in nochihuas san nopampa. ¹³ Ijcuac ijcon nemopan nochihuas, huelis noca nentenojnotzasquej. ¹⁴ Xmoyolchicahuacan, tej, para ma ca sa nенcomatztiasquej tlen tlajtojli nenquijtosquej para nemomanahuisquej. ¹⁵ Ijcon xmoyolchicahuacan, pampa on tlen tlajtojli niman tlamatquilistli* mechpolos, nejhua nemechmacas yejhuan nion se nemotlahuelicniu xhuelis quixicos nion xhuelis quixnamiquis. ¹⁶ Nemejhuamej hasta nemotajhuan, nemocnihuan, on yejhuan sa huejca nemochanecahuan† niman nemotet-lajsojcahuan‡ sa no yejhuan mechtemajcasquej. Niman sequimej ne-mejhuamej mechchihuilisquej para mechmictisquej. ¹⁷ Niman san pampa nennechneltocaj, nochi tlacatl mechtlahuelitas. ¹⁸ Pero nion se nemotzon xpolihuis. ¹⁹ Niman tla nemelajcanemij ican nemotlaneltoc, ajsis on tonajli ijcuac nenquiselisquej on nemilistli yejhuan para nochipa.

²⁰ Ijcuac nenquitasquej ica miyec soldados yoquiyehualoj on Jerusalén, ijcuacon xmatican ica saniman xoxotonis. ²¹ Ijcuacon on yejhuan nemisquej ne Judea ma ontlatlacsakan neca ipan tepemej. Niman on yejhuan nemisquej ne Jerusalén ma quisacan ompa, niman on yejhuan ipan tepetl nemisquej ma ca ma calaquican ocsejpa ne Jerusalén. ²² Ijcon xchihuacan, pampa ipan on tonaltin onyas castigo. Ijcuacon, tej, tenquisas nochi tlen tlajcuiolnesticaj ipan in Yectlajcuilojli. ²³ Lástima para on sihuamej yejhuan ipan on tonaltin yocanquej inconetzin niman on sihuamej yejhuan ipan on tonaltin tlachichitisquej, pampa ipan on tonaltin miyec cocol-istli§ onyas ipan in país niman se temojtij castigo quipiasquej on hebreos. ²⁴ Sequimej miquisquej ipan guerra, niman ocsequimej quintzacuasquej nochihuiyan países. Niman on yejhuan xhebreos quichochochosquej on hueyican Jerusalén hasta tlamic on tonaltin quech quincahuilisquej ijqui quichihuasquej.

*Jesús oquimijlij on inomachtijcahuan quen ijqui huajlas ocsejpa
(Mt. 24.29-35, 42-44; Mr. 13.24-37)*

²⁵ Quemaj onyas tlamajhuisojli ipan on tonaltzintli, ipan on metztli, niman impan on sitlalimej. Niman nican ipan in tlalticpactli on tlacamej yejhuan chantij ipan on países xquimatisquej tlinon quichihuasquej niman sanoyej* nomojtisquej, pampa sanoyej temojtij caquistis on mar niman quen noquetztehuas on mar. ²⁶ Chica nochi tlacatl quitasquej on tlen nochihuas ipan in tlalticpactli, yolpopoliuisquej ican innemojtil, pampa nochi quech cojtiticaj ne ipan cielo† nolinis. ²⁷ Quemaj nechitasquej, nejhua yejhuan oninochiu Tlacatl, nihuajlas ipan se moxtli ican nohueyi poder niman ican nohueyilis. ²⁸ Ijcuac pehuas nochihuas in tlajtlamach, xmoyolehuacan niman sa xonajcotlachixtiacan, pampa saniman mechmaquixtisquej.

²⁹ Quemaj Jesús oquintlalilij yejhua in ejemplo:

§ **21:11** On cielo oncaj ne campa oncaj ajacatl, moxtli, metztli, tonajli niman sitlalimej. * **21:15**
sabiduría † **21:16** familias ‡ **21:16** amigos de ustedes § **21:23** dolor * **21:25** mucho
† **21:26** On cielo oncaj campa oncaj ajacatl, moxtli, metztli, tonajli niman sitlalimej.

—Xquitacan on cojtaquilyotl itoca higuera niman no ocsequi cojtaquilyotl. ³⁰ Ijcuac nenquitaj selia on cojtli‡, sa no nemejhuamej nenquimatiq ica ye nisiu xompantla yes. ³¹ Sa no ijqui, tej, ijcuac nenquitasquej ye nochijtacaj on tlamahuijsoltin yejhuan yonemechijlij, xmatican ica ye nisiu para Dios quinmandaros nochi tlacatl.

³² 'Ica tlen melahuac nemechijlia ica nochi in tlamahuijsoltin nochihuas ijcuac xe miquij on tlacamej yejhuan nemij ipan in tonaltin. ³³ On cielo niman in tlalticpactli popolihuis, pero notlajtol xqueman popolihuis.

³⁴ 'Xmotacan sa no nemejhuamej. Ma ca xmoyoltechicahuacan ica on tlen xcujli, nion ma ca xtlahuantinemican, nion itlaj xcomatztiacan on tlen ica nemotequipanosquej para ma ca huajlas on tonajli ijcuac xnencomatzttoquej ica huajlas. ³⁵ Ijcon quen se tlatlalilistli§ cajsi se yolqui ijcuac on yolqui quinemilia ica cuajli nemi, no yejcos on temojtij tonajli ipan nochi quech tlacatl yejhuan chanti ipan in tlalticpactli. ³⁶ Nemejhuamej, tej, xnemican listos. Niman nochipa xchijtiacan oración para ijqui huelis nemomanahuisquej ipan nochi on tlajyohuilistli yejhuan nochihuas, niman para huelis nemomanasquej nixpan nejhua yejhuan oninochiu Tlacatl.

³⁷ Mojmostla Jesús temachtiaya ne ipan on hueyi tiopan, niman ica tlayohua yaya ne ipan on tepetl itoca Olivos. ³⁸ Niman mojmostla saniman cualcan nochi tlacatl yaya ne hueyi tiopan para concacquiya Jesús.

22

On hebreos tlayecanquej san secan oquitlalijquej inyojlo para quimictisquej Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Ye nisiu catca para onyas on ilhuitl yejhuan nochihua ijcuac nocua on pan yejhuan xquipia tlaxocolilistli*. On ilhuitl itoca pascua. ² Niman intlayecan-cahuan on tiopixquej niman on temachtijquej ican tlanahuatijli ichtaca† quitejtemohuiliayaj quen ijqui quimictisquej Jesús, pampa quinmacajsiyaj on tlacamej.

³ Quemaj Satanás ijtic ocalac Judas. Judas no itoca Iscariote, niman yejhua inhuan on majtlactli huan ome nomachtijquej tlapohuajli catca. ⁴ Yejhua, tej, oyaj oquintato on intlayecan-cahuan on tiopixquej niman on yejhuan tlayecanquej ipan on hueyi tiopan para oquintlajtlajtohuilito ica quen ijqui huelis quinmactilis Jesús. ⁵ Yejhamej, tej, opacquej, niman onotlajtol-macaquej para Judas quimacasquej tomin. ⁶ Judas oquitlalij iyojlo san secan inhuan, niman opeu quitejtemohua quemanon cuajli para quitemactilis Jesús ijcuac on tlacamej xnemisquej itech.

Jesús otlacuaj inhuan inomachtijcahuan ipan on ilhuitl itoca pascua

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Oyejcoc on tonajli para onyas on ilhuitl yejhuan nochihua ijcuac nocua on pan yejhuan xquipia tlaxocolilistli‡. Niman ipan on tonajli ica oncaj qui-huentlaliaj on borreguito para quicuaj ipan on ilhuitl pascua. ⁸ Niman Jesús oquintitlan Pedro niman Juan ica in tlanahuatijli: "Xhuiyan. Xchijchihuatiq on tlacuajli para ticusquej ipan on ilhuitl pascua."

⁹ Yejhamej oquijlijquej:

—¿Canon ticnequi ma ticchijchihuatiq?

¹⁰ Jesús oquimijlij:

‡ 21:30 árbol § 21:35 trampa * 22:1 levadura † 22:2 secreto ‡ 22:7 levadura

—Ijcuac nemejhuamej nencalaquisquej ipan on hueyican, nenquinam quisquej se tlacatl yejhuan quitqui se tzotzocojli ican atl. Xcuitlapanhucan, tej, hasta ne campa oncalaqueis,¹¹ niman iteco on cajli ijquin xquijlican: “On Temachtijquetl oquijtoj: ¿Canon oncaj on calijtic campa niconcuas on tiotlac tlacuajli ipan on ilhuitl pascua inhuan on nonomachtijcahuan?”¹² Niman yejhua mechitis se hueyi calijtic ne tlapani campa ye tlaojoncaj. Ompa, tej, xchijchihuacan on tlacuajli.

¹³ Yejhuamej, tej, oyajquej niman ijqui oquinextijkej quen Jesús oquimijlij. Ompa, tej, oquichijchijquej on tlacuajli para tlacuasquej ipan on ilhuitl pascua.

¹⁴ Niman ijcuac oajsic hora para tlacuasquej, Jesús onosehuij itech on mesa inhuan inomachtijcahuan. ¹⁵ Quemaj Jesús oquimijlij:

—¡Sanoyej nicnequiya nemohuan nicuas in tlacuajli ijcuac xe nitlajyohuia!
¹⁶ Pampa aman nemechijlia ica xoc ocsejpa nemohuan nicuas hasta on tonajli ijcuac tenquisas on tlen in tlacuajli quiitosnequi ne campa Dios tlamandarohua.

¹⁷ Quemaj ocontilan se copa yejhuan quipia iyayo on uvas, niman ijcuac yoquimacac tlaxtlahujli Dios, ijquin oquijtoj:

—Xconican yejhua in niman xmopanoltijtiacan. ¹⁸ Nejhua, tej, nemechijlia ica xoc nemohuan niconis iyayo in uvas hasta ijcuac Dios pehuas tlamandaros.

¹⁹ Quemaj ocontilan on pan, niman ijcuac yoquimacac tlaxtlahujli Dios, oquitlatapan niman oquinmacac. Quemaj ijquin oquimijlij:

—In pan quixnescayotia[§] notlalnacayo yejhuan nohuentlalis nemopampa. In xcuacan para ica xnechelnamiquican.

²⁰ Ijcuac yocuajquej on tlacuajli, no ijqui oquinmacac on copa niman oquijtoj:

—Yejhua in tlen aman nenconisquej ica in copa quixnescayotia on yencuic pacto yejhuan notzimpehualtis ica noyesyo, niman san nemopampa toyahuis.

²¹ 'Xquitacan, aman on tlacatl yejhuan nechtemactilis, nohuan nemi ipan in mesa. ²² Ijcon, tej, nejhua yejhuan oninochiu Tlacatl nimquis quen Dios otlanahuatij, pero ¡lástima para on tlacatl yejhuan nechtemactilis!

²³ Quemaj yejhuamej opejquej quinotlajtoltiaj aquinon on quitemactilis.

*Inomachtijcahuan Jesús onotencuicuiquej ica on aquinon más hueyixtias
(Mt. 20.25-28; Mr. 10.42-45)*

²⁴ Quemaj yejhuamej opeu notencuicuij ica on aquinon más hueyixtias.

²⁵ Pero Jesús oquimijlij:

—On reyes yejhuan xhebreos nochihuaj quen inteco on países. Niman on tlacamej quintenehuiliaj cuajcualtin tlacamej. ²⁶ Pero nemejhuamej xmechtocarohua ijcon nemohuicasquej. Yej ocse tlamantic. Yejhuan nemotzajlan más hueyixticaj nonequi nohuicas quen xhueyixticaj, niman yejhuan tlamandarohua nonequi nohuicas quen on yejhuan tepalehuijquetl. ²⁷ ¿Aquinon, tej, más hueyixticaj, on tlayecanquetl yejhuan tlacua ipan mesa, noso on tetlamacajquetl? Niquijtohua ica on tlayecanquetl yejhuan tlacua. Pero nejhua, masqui nimotlayecancau, ninemi nemotzajlan quen se yejhuan tetlamaca.

²⁸ 'Nemejhuamej, tej, nochipa nohuan yonentlajyohuijtinenquej. ²⁹ Yejhua ica, tej, nejhua nemechmaca se tequihuajyotl quen noTajzin onechmacac.

§ 22:19 simboliza

³⁰ Nenmatlisquej niman nentlacuasquej ipan nomesa. Niman nemotlal-isquej ipan on huejhueyixtoquej sietas para nenquinyolcuitisquej niman nenquintlajtlacolmacasquej on majtlactli huan ome chanchanejquej* itech Israel.

*Jesús oquijlij Pedro ica quinenequis yexpa
(Mt. 26.31-35; Mr. 14.27-31; Jn. 13.36-38)*

³¹ No ijqui oquijtoj toTeco:

—Simón, Simón, xcaqui. Nemoca yotlajtlan Satanás para mechtzejtzelos quen itlaj trigo, ³² pero nejhua mocha yonictlajtlan itech Dios para ma ca ticpolos motlaneltoc. Niman ijcuac tejhua yotimoyolcuep, xquimpalehui mocnihuan para ma melajcanemican.

³³ Simón oquijlij:

—NoTeco, nejhua ninemi listo para mohuan nechzacuasquej niman hasta para mohuan nimiquis.

³⁴ Niman Jesús oquijlij:

—Pedro, nejhua nimitzijlia ica sa no aman ijcuac xe tzajtzi on caxtil†, tejhua tiquijtos yexpa ica xtinechixmati.

Ye huajlau on tetlatlatalistli

³⁵ Quemaj Jesús oquimijlij:

—Ijcuac onemechtitlan niman onemechijlij ma ca xquitquican itlaj bolsa, nion tomin, nion cactin, ¿itlaj omechpoloj?

Yejhuamej oquijtojquej:

—Xitlaj otechpoloj.

³⁶ —Pero aman tla ticipia mobolsa niman motomin, xquitqui, niman tla xticpia moespada xnamaca motlaquen para xcohua moespada. ³⁷ Pampa nejhua nemechijlia ica on tlen noca tlajcuilnesticaj ipan on Yectlajcuilojli ica oncaj nochihuas. On Yectlajcuilojli ijquin quijtohua: “Inhuan xcuajcualtin tlacamej oquipojquej.” Nochi, tej, tlen noca tlajcuilnesticaj tenquisas.

³⁸ Ijcuacon yejhuamej oquijtojquej:

—Xquita toTeco, nican oncaj ome espadas.

Yejhua oquimijlij:

—¡Ah, xnencajsicamatij tlinon niquijtosnequi! Ma ijqui.

Jesús oquichiu oración ne Getsemaní

(Mt. 26.36-46; Mr. 14.32-42)

³⁹ Quemaj Jesús oquis, niman oyaj ipan on tepetl itoca Olivos inhuan on inomachtijcahuán quen miyecpa oquichiu. ⁴⁰ Ijcuac oajsic, oquimijlij on inomachtijcahuán:

—Xchihuacan oración para ma ca on Satanás mechtlajcalis ipan tlajtlacojli.

⁴¹ Quemaj Jesús oquintlalcahuij huejca quen se ica mahuejca ijcuac tlamotla ican tetl, niman onotlacuenquetz niman onohueyicatzajtzilij†. ⁴² Niman oquijtoj:

—NoTajzin, tla ticnequi, xnechmanahui para ma ca niquijyohuis in tlen sanoyej§ teajman. Pero ma ca nochihua quen nejhua nicnequi, yej ma nochihua quen tejhua ticnequi.

⁴³ Quemaj se ilhuicactequitquetl* yejhuan ne ilhuicac ohualeu, oquinotitij niman oquimacac yolchicahualistli. ⁴⁴ Niman pampa yejhua sanoyej noyolcocojicatca, ican más yolchicahualistli onohueyicatzajtzilij. Yejhua, tej,

* 22:30 familias † 22:34 gallo ‡ 22:41 hizo oración § 22:42 muy * 22:43 ángel: Angeles tequitij ne ilhuicac niman nican ipan in tlalticpactli.

nitoniaya, niman itonil catca quen yestli huejhueyi yejhuan chipinticatca ipan tlajli.

⁴⁵ Ijcuac otlan onohueyicatzajtzilij, ohuajnotelquetz, niman oyaj ne intech on inomachtijcahuau. Ijcuac intech oajsic, oquintac cochtoquej, pampa yoquinsiahuitij inajman. ⁴⁶ Quemaj oquimijlij:

—¿Tlica[†] nencochtoquej? Xmotelquetzacan, niman xchihuacan oración para xmechtlatlatas on diablo.

Jesús ocajsiquej

(Mt. 26.47-56; Mr. 14.43-50; Jn. 18.2-11)

⁴⁷ Jesús oc[‡] tlajtojticatca, ijcuac miyec tlacatl itech oajsic. Niman Judas yejhuan inhuan on nomachtijquej tlapohuajli catca, huajlaya tlayecapan, niman oquinisihuij Jesús para oquitencuaj[§]. ⁴⁸ Niman Jesús oquijlij:

—Judas ¿ijcon tinechtencua para tinechtemactilia nejhua yejhuan oninochiu Tlacatl?

⁴⁹ Ijcuac inomachtijcahuau Jesús yejhuan ihuan ompa nemiyaj oquitaquej tlen ye nochijtacaj, oquijlijquej:

—ToTeco, ¿ma titeixnamiquican ican espada?

⁵⁰ Niman semej yejhamej oquinacastzon tec se tlacatl itlaquehual on más hueyi intlayecancau on tiopixquej. Oquitequilij inacas ipan iyecmacopa.

⁵¹ Pero Jesús oquijtoj:

—Xmoteltican. Ma ijqui.

Quemaj Jesús oquimatoquilij inacas on tlaquehuajli niman oquipajtij.

⁵² Quemaj ijquin oquimijlij intlayecancahuau on tiopixquej, niman on tlayecanquej ipan on hueyi tiopan niman on tlajtlajmatquej yejhuan ohualejquej ocanacoj:

—¿Onennechajsicoj ican espadas niman cojin^{*} quen yacaj nitlachtequel yesquia? ⁵³ Mojmostla nemohuan ninemiya ne ipan ihueyi tiopan Dios, niman xonennechajsiquej, pero ipan in hora Dios mechcahuilia nenquichihuaj on tlen nenquinequij. Aman ipoder Satanás tetlani.

Pedro oquinene nec Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Quemaj ocajsiquej Jesús, niman ocuicaquej ne ichan on más hueyi intlayecancau on tiopixquej. Niman Pedro san huejca cuitlapanhuijtiaya.

⁵⁵ Ompa itlajcotian on quahuac olatlatijquej, niman iyehualican on tlitl onotlajtlalijquej, niman Pedro no ompa intzajlan onotlalij. ⁵⁶ Quemaj ijcuac se sihuatl tetequichihuilijquetl oquitac Pedro yehuaticaj itech on tlitl, oquixquechij niman oquijtoj:

—Yejhua in tlacatl no ompa ihuan nemiya.

⁵⁷ Pedro oquinene[†] ican in tlajtojli:

—Sihuatl, nejhua xniquixmati.

⁵⁸ Achijtzin más saquin[‡], quej ocse oquitac Pedro niman oquijlij:

—Tejhua no inhuan tquistinemiya.

Pero Pedro oquijtoj:

—Ca, tlacatl, xnejhua.

⁵⁹ Canaj ipan se hora saquin, quej ocse oquimelajcailtoj:

—In tlacatl melahuac ihuan quistinemiya, pampa yejhua no hualehua Galilea.

⁶⁰ Ijcuacon Pedro oquijtoj:

[†] 22:46 ¿por qué?; ¿tline? [‡] 22:47 todavía; sanquen [§] 22:47 lo besó; oquibesaroj * 22:52 palos [†] 22:57 negó [‡] 22:58 después

—Tlacatl, xnicmati tlínón on tiquijtojticaj.

Quemaj nimantzin ijcuac Pedro ocs tlajtojticatca, otzajtzic on caxtil*.

⁶¹ Quemaj toTeco onomalaCachoJ niman ocontac Pedro. Ijcuacon Pedro oquelnamic on tlen yejhua yoquijlijca: “Sa no aman ijcuac xe tzajtzi on caxtil tejhua tiquijtos yexpa ica xtinechixmati.” ⁶² Quemaj Pedro oquis ompa niman sanoyej oajmancachocac.

On policías ocajsiquej Jesús

(Mt. 26.67-68; Mr. 14.65)

⁶³ On tlacamej yejhuan ipan inmahuan nemiya Jesús ica ohuetzcaquej niman oquihuijhuitequej. ⁶⁴ Oquixtlapachojquej niman oquixayacahuijhuitequej, niman ijquin oquijlijquej:

—Xtlajto tiotlajtojquetl. Xtechijli aquinon omitzhuitec.

⁶⁵ Niman miyec ocsequi tlamach quijliayaj para oquipijpinahuijquej.

Jesús onen ixpan on tequihuajyotl yejhuan más hueyixticaj ne tiapan

(Mt. 26.59-66; Mr. 14.55-64; Jn. 18.19-24)

⁶⁶ Ijcuac ohuajtlanes, intlajtlajmatcahuán on tlayecanquej hebreos, niman intlayecancahuán on tiopixquej niman on temachtijquej ican tlánuati-jli onosentlalijquej niman ocuicaquej Jesús imixpan on tetlacañonotzquej. Ompa ijquin oquitlajtoltijquej Jesús:

⁶⁷ —Xtechijli tla tejhua tiCristo.

Yejhua oquimijlij:

—Tla nemechijlis ica niCristo, xnennechneltocasquej. ⁶⁸ Niman tla it-laj nemechtajtoltis xnennechnanquilisquej nion xnennechmacahuasquej.

⁶⁹ Pero desde aman pehua nejhua yejhuan oninochiu Tlacatl niyehuatias iyecmacopa on Dios yejhuan nochí hueli.

⁷⁰ Quemaj nochimej oquijlijquej:

—¿Tla ijcon tejhua titeConeu itech Dios?

Jesús oquimijlij:

—Quemaj. Ijqui quen nemejhuatej nenquijtohuaj.

⁷¹ Quemaj yejhuatej oquijtojquej:

—Xpolihui más tlateixpanhuijquej. Sa no tejhuamej yoticaquej tlen quij-tohuaj.

23

Jesús ocuicaquej ne itech Pilato

(Mt. 27.1-2, 11-14; Mr. 15.1-5; Jn. 18.28-38)

¹ Quemaj nochimej ohuajnotelquetzquej niman ocuicaquej Jesús ixpan Pilato. ² Ompa ijquin opeu quiteixpanhuijaj Jesús, niman oquijtojquej:

—Yejhua in tlacatl oticaquej quimajcomantinemi in tochantlacaj*. Quimijlia ica xquitocarohua ontlatlaxtluasquej ica on impuestos ne itech César itequihuaj on país de Roma. Niman no notenehua yejhua Cristo, se rey.

³ Niman Pilato oquitlajtoltij:

—¿Tejhua tiinRey on hebreos?

Jesús oquinanquilij:

—Ijqui quen tejhua tiquijtohuaj.

⁴ Quemaj Pilato oquimijlij on intlayecancahuán on tiopixquej inhuan on tlacamej:

—Xitlaj† nicnextilia tla itlaj xcujli oquichiu in tlacatl.

§ 22:60 todavía; sanquen * 22:60 gallo * 23:2 nuestros paisanos † 23:4 nada; coxtla

⁵ Pero yejhuamej más notenco jtiliayaj para ipan más oquiteixpanhuijquej:
—Ican itlamachtil quimajcomantinemi nochí tlacatl chanej Judea. Ohua-peu ne Galilea, niman aman hasta nanica yotlamico.

Jesús onen ixpan Herodes

⁶ Ijcuac Pilato ijcon ocac, otlajtlan tla Jesús chanej ne Galilea. ⁷ Ijcuac oquijlijquej ica melahuac yejhua chanej ne Galilea, oquititlanilij Herodes on gobernador de Galilea, yejhuan ipan on tonaltin nemiya ne Jerusalén. ⁸ Ijcuac Herodes oquitac Jesús, sanoyej† opac, pampa miyec tonaltin quinectinemiya quitas. Yoquimachiltijcaj yejhua ica on miyec tlajtlamach§ oquichiu, niman yejhua ica quinectinemiya quitas ma quichihua se milagro. ⁹ Miyec tlajtlamach oquitlajtoltij, pero Jesús xitlaj* ica oquinanquilij. ¹⁰ On intlayecancahuau on tiopixquej niman on temachtijquej ican tlanahuajtijli yejhuan ompa nemiyaj sanoyej quiteixpanhuiyaj. ¹¹ Quemaj Herodes ihuan isoldados oquipijpinahuijquej niman ica onajahuitijquej. Quemaj oquitlaquentijquej quen se rey ican se tlaquentli patioj. Niman Herodes ocsejpa oquititlan Jesús itech Pilato. ¹² Sa no ipan on tonajli Pilato niman Herodes onoyolsehuiquej. Achtoj yejhuamej notlahuelitaya.

Pilato oquitecahuiliij para ma quimictican Jesús

(Mt. 27.15-26; Mr. 15.6-15; Jn. 18.39—19.16)

¹³ Quemaj Pilato san secan oquinsentlalij intlayecancahuau on tiopixquej, on tequihuajquej niman on tlacamej, ¹⁴ niman ijquin oquimijlij:

—Ijcuac onennechajhuijquijquej yejhua in tlacatl, onenquijtojquej ica yejhua quimajcomantinemi on tlacamej. Pero nemixpan yonicoyolcuitij, niman nion se tlajtlacojli yejhuan ica nenquiteixpanhuiyaj xonicnextilij. ¹⁵ Nion Herodes xoquinextilij tlajtlacojli, pampa ocsejpa yonechajtitlanilij. Xquitacan, xitlaj† oquichiu yejhuan quimelahuat para yejhua miquis. ¹⁶ Aman nicastigaros, niman quemaj nicmacahuas.

¹⁷ Pilato ica oncatca para quinmacahuilis se tlacatl yejhuan tzacuticatca on tlacamej ipan on ilhuitl. ¹⁸ Pero nochimej opejquej san secan ijquin otzajtziiquej:

—¡Yejhua on ma ca xmacahua, yej xmacahua Barrabás!

¹⁹ Barrabás ocajsiquej pampa onoquetztejca para quixtisquia on tequihuaj de Jerusalén, niman pampa otemictijca. ²⁰ Pilato ocsejpa oquinnottz on tlacamej, pampa quinequiya quimacahuas Jesús. ²¹ Pero yejhuamej ocsejpa más chicahuac otzajtziiquej:

—¡Xmajmasohualti§! ¡Xmajmasohaulti!

²² Pilato ica yexpa ijquin oquimijlij:

—¿Tlica*? ¿Tlinon, tej, xcuajli oquichiu? Nejhua xonicnextilij tlajtlacojli yejhuan quimelahuá para miquis. Yejhua ica san nicastigaros, niman quemaj nicmacahuas.

²³ Pero yejhuamej onotenco jtiliayaj niman otlanahuatijquej ma quimajmasohualtian ipan cojnepanojli. San secnec, tej, sanoyej otzajtziiquej in-huan intlayecancahuau on tiopixquej, niman tlen oquinequej ma nochihua, onochiu. ²⁴ Pilato onocalactij niman otlanahuatij ijcon quen yejhuamej quinequiya. ²⁵ Ijcon, tej, Pilato oquimacau on tlacatl yejhuan tzacuticatca pampa onoquetztejca para quixtisquia on tequihuaj de Jerusalén, niman

‡ 23:8 muy § 23:8 cosas * 23:9 nada; coxtla † 23:15 nada; coxtla ‡ 23:15 merece
§ 23:21 crucificale; xcajcipilo * 23:22 ¿por qué?; ¿tline?

pampa otemicijca. Oquimacau on yejhuan oquitlajtlanquej niman Jesú s oquinmactilij quen yejhuamej oquinequej.

*Jesús oquimajmasohuáltiquej ipan cojnepanojli
(Mt. 27.32-44; Mr. 15.21-32; Jn. 19.17-27)*

²⁶ Ijcuac cuicaticatcaj Jesús para conmajmasohuáltisquej† ipan cojnepanojli‡, oquinahuatijquej se tlacatl itoca Simón yejhuan chanejquetl catca ne Cirene. Yejhua ohualeu imijla. Oquichihuáltiquej ma quimama on cojnepanojli ne icuitlapan Jesús.

²⁷ Miyequej tlacamej ocuitlapanhuijquej inhuan miyequej sihuamej yejhuan ipampa chocatiayaj niman najmantayaj. ²⁸ Pero Jesús ohuajnocuep niman oquimijlij:

—Sihuamej de Jerusalén, ma ca nopampa xchocacan, yej sa no nemejhuamej nemopampa xchocacan niman impampa nemoconehuan. ²⁹ Ijcon xchocacan pampa yejcos on tonajli ijcuac ijquin nijtos: “Dios quintiochhua on sihuamej yejhuan tetzacamej, on sihuamej yejhuan xqueman canaj inconeu niman on chichihuáltin yejhuan xqueman tlachichitiaj.” ³⁰ Quemaj on tlacamej pehuas quimijlisquej on tepemej: “Topan xxinican”, niman no quimijlisquej on tepetzitzintin: “Xtechiyanagan.” ³¹ Tla nejhua yejhuan xnicpia tlajtlacojli nicselia in tlajyohuistli, tla ijcon †tlinon, tej, impan nochihuas on ocsequimej yejhuan quipiaj tlajtlacojli?

³² San secan ihuan Jesús no cuicayaj ome xcuajcualtin tlacamej para quinmictisquej. ³³ Ijcuac oajsiquej ne campa itoca “Micatzontecomatl”, ompa, tej, Jesús oquimajmasohuáltiquej ipan cojnepanojli, niman on omemej xcuajcualtin tlacamej no oquinmajmasohuáltiquej ipan cojnepanoltin. Se nemiya iyecmacopa Jesús niman ocse ipan iopochmacopa. ³⁴ Niman ijcuac Jesús ye quimajmasohuáltijtcatca ipan on cojnepanojli oquijtoj:

—NoTajtzin, xquintlapojpolhui, pampa xquimati tlen quichihuaj.

Niman on soldados onotlatlanquej para oquitaquej cada se tlinon quitquis de yejhua on itlaquen Jesús. ³⁵ On tlacamej yejhuan ompa nemiyaj quitzticatcaj nochitlen onochiu, niman on tequihuajquej ica melahuac quiuetzcayaj Jesús ica in tlajtojli:

—Yejhua oquinmaquixtij ocsequimej. Aman, tej, tla melahuac yejhua Cristo yejhuan Dios oquitlapejpenij, sa no yejhua ma nomaquixti.

³⁶ On soldados no huetzcayaj. Oquinisihuájquej niman oconitijquej vina gre. ³⁷ Niman ijquin oquijlijquej:

—Tla tejhua tiinRey on hebreos, sa no tejhua xmomaquixti.

³⁸ Niman icuapan oncatca se tlajcuilojli, ican tlajtoltin§ griego, latín niman hebreo. On tlajtojli ijquin quijtohuaya: “In yejhua inRey on hebreos.”

³⁹ Semej yejhuamej on xcuajcualtin tlacamej yejhuan ompa ihuan pilcaya j, ijquin quijixcomacaya:

—Tla tiCristo, sa no tejhua xmomaquixti, niman tejhuamej no xtechmaquixti.

⁴⁰ Pero on ocse xcuajli tlacatl ocajhuatiaj itehuical*, niman ijquin oquijlij:

—¿Xticmacajsí Dios, masqui sa no yejhua castigo tiquijyohuiya?

⁴¹ Tejhuamej techmelahua† ijquin ma titlajyohuican pampa on tlen xcuajli oticchijquej, pero yejhua in tlacatl xitlaj‡ tlajtlacojli quipia.

⁴² Quemaj on tlacatl oquijlij Jesús:

—Jesús, xnechelnamiqui ijcuac tinemis quen Rey.

† **23:26** crucificarlo; compilosquej ‡ **23:26** cruz § **23:38** lengua * **23:40** su compañero

† **23:41** nosotros merecemos ‡ **23:41** nada; coxtla

⁴³ Niman Jesús oquinanquili:

—Ica tlen melahuac nimitzijlia ica aman nohuan tinemis ne ilhuicac.

Jesús omic

(Mt. 27.45-56; Mr. 15.33-41; Jn. 19.28-30)

⁴⁴ Ye canaj tlacualispan catca otlayohuatiac nochihuiyan, hasta ijqui oajsic yezi hora ica tiotlac. ⁴⁵ Chica on tonajli xoc tlachaya, ne ijtic on hueyi tiopan on tlazacuilitlaquentli ohuajtlajcotetzayan. ⁴⁶ Quemaj Jesús otzajtzic chicahuac:

—NoTajzin, ipan momatzin nimitzmactilia nonemilis.

Ijcuac ijcon oquijtoj, omic.

⁴⁷ Ijcuac on capitán romano oquitac tlinon onochiu, ijquin ocueyilij Dios, niman oquijtoj:

—Ica tlen melahuac, in tlacatl yolchipahuac catca.

⁴⁸ Quemaj nochimej on tlacamej yejhuan ompa nemiyaj niman oquitaquej tlinon onochiu, oyajyajquej inchan niman noyelpanhuitequiyaj. ⁴⁹ Pero nochimej iteixmatcahuan Jesús, niman on sihuamej yejhuan ohuapejquej cuajhuicatiyaj de ne Galilea, san huejca conitzticatcaj on tlajtlamach.

Oquitlaltocaquej Jesús

(Mt. 27.57-61; Mr. 15.42-47; Jn. 19.38-42)

⁵⁰ Nemiya se cuajli tlacatl itoca catca José yejhuan nochipa onohuicac quen quitocarohua. Yejhua chanej catca ipan on pueblo itoca Arimatea ne Judea. Yejhua tlaphuajli catca itech on tequihuajyotl yejhuan más hueyixticas ne tiopan. ⁵¹ Masqui yejhua tlaphuajli catca itech on tequihuajyotl, yejhua xocuelitac on tlen oquinemilijquej on ocsequimej nion on tlen oquichijquej. Yejhua, tej, quichaya quemanon pehuas tlamandaros Dios. ⁵² Niman yejhua oyaj itech Pilato niman oquitlajtlanilito itlalnacayo Jesús. ⁵³ Ijcuac yocuajtemoltij ne ipan cojnepanojli[§] on itlalnacayo Jesús, oquitetejcuix ican se tlaquentli* patioj, niman quemaj ocahuato ijtic se teostotl campa xqueman yacaj quitocayaj. ⁵⁴ Yoajsica on tonajli ijcuac notlatlajtlalilisquej para quejahuasquej on tonajli de nesehuijli yejhuan ye nisu catca para pehuas.

⁵⁵ On sihuamej yejhuan ohuapequej cuajhuicatiaya Jesús de ne Galilea no oyajquej ihuan José. Yejhuatej oquitatoj on tlalcontli, niman quen ijqui oquitlalijquej itlalnacayo Jesús. ⁵⁶ Niman ijcuac onocuepquej inchan, oquicueltlaliquej on ajhuiyalistli tzacuanqui niman aceite para itlacayo Jesús. Quemaj quen tlanahuatia itlanahuatil Moisés, onosehuijquej ipan on tonajli de nesehuijli.

24

Jesús oyoliu niman onoquetzteu ipan tlalcontli

(Mt. 28.1-10; Mr. 16.1-8; Jn. 20.1-10)

¹ Ipan on achtoj tonajli ipeuyan on semana, on sihuamej sanoyej* huelipan oyajquej itech on tlalcontli. Yejhuatej oquitquipuej on chahualistli ajhuiyac yejhuan oquicueltlalijquej. Niman no oquinhuicaquej ocsequimej sihuamej.

² Ijcuac ompa oajsiquej, oquitaquej ica on tetl yejhuan ica tentzacuticatca on tlalcontli ye cueptoya. ³ Yejhuatej, tej, ocalajquitoj ijtic on tlalcontli, pero xoquinextijquej itlalnacayo Jesús. ⁴ Chica yejhuatej xcajsicamatijay tlinon onochiu, nimantzin omemej tlacamej ican petlanqui tlaquentli ohuajnonextijquej ompa intech majmaniyaj. ⁵ On sihuamej sanoyej onomojtijquej hasta ixco on tlajli onopachojquej. Pero on tlacamej oquimijlijquej on sihuamej:

—¿Tlica† intzajlan on mimiquej nenquitejtemohuaj on yejhuan yolticaj? **6** Yejhua xnican nemi. Yejhua, tej, yoyoliu‡ niman yonoquetzteu. Xquel-namiquican tlinon omechijlij ijcuaoc oc§ nemiya nemohuan ne Galilea. **7** Omechijlij ica yejhua yejhuan onochiu Tlacatl ica oncatca ipan inmahuan on tlajtlacolejquej quitemacasquej, niman ica quimajmasohuáltiquej* ipan cojnepanojli†, niman ipan yeji tonajli yolihuis niman noquetztehuas ipan itlalcon.

8 Quemaj on sihuamej oquelnamiquej on tlen Jesús oquimijlijca. **9** Niman ijcuaoc yohuajnocuepatoj ne itech on tlalcontli, nochi oquintlajtlajtohuil-ijquej on majtlactli huan se apóstoles niman nochimej on ocsequimej. **10** On sihuamej yejhuan oquinmachiltitoj on apóstoles yejhamej in: María yejhuan hualehua ne Magdala, Juana niman María on inan Jacobo inhuan on ocsequimej sihuamej. **11** Pero on apóstoles san oquilocojmatquej on tlen yejhamej oquimijlijquej niman xoquineltocaquej.

12 Pero Pedro ohuajnotelquetz niman onotlaloj hasta ne itech on tlalcontli. Ijcuaoc yejhua onopachoj para ontachix ijtic on tlalcontli, oquitac ica ocsecan onoquej on tlaquentin‡. Quemaj yejhua onocuep niman tlamojcaitaya ipampa on tlen onochiu.

*Jesús oquinnottij omemej on tlaneltocaquej yejhuan yayaj ne Emaús
(Mr. 16.12-13)*

13 Sa no ipan on tonajli, omemej on tlaneltocaquej yayaj ipan se pueblo itoca Emaús, yejhuan oncaj canaj majtlactli huan se kilómetros itech Jerusalén. **14** On omemej tlajtlajtojtiayaj nochi yejhua ica on tlen yonochijca.

15 Chica yejhamej tlajtlajtojtiayaj niman notencuicuitiayaj ica in tlajtlamach§, sa no Jesús oquinnishuij niman opeu inhuan nejnemi. **16** Niman masqui quitayaj Jesús, tlinonon quintzacuiliaya para ma ca ma quimatican aquin yejhua. **17** Quemaj Jesús oquimijlij:

—Chica nemejhuamej nennejnemij, ¿Tlinon ica nemotencuicuitihuij?
¿Tlica nemajmanaj?

18 Semej yejhamej, itoca Cleofas, oquinanquilij:
—Nochi tlacatl quimatzticaj tlinon yonochiu ipan in tonaltin ne Jerusalén.
¿Tlen san tejhua de noch quech ompa chanti ne Jerusalén xticmati on tlen yonochiu?

19 Niman Jesús oquimijlij:
—¿Tlinon, tej, onochiu?
Niman yejhamej oquijlijquej:
—On tlen onochiu itech Jesús yejhuan hualehua ne Nazaret. Yejhua tiotlajtojquetl catca niman ixpan Dios niman imixpan on tlacamej oquipix hueyi poder ica on tlen quichihuaya niman ica on tlen quijtohuaya. **20** Pero intlayecancahuau on tiopixquej niman on tequihuajquej ipan on tiopan oquitemactilijquej para ma quitlajtlacolmacacan ipan miquilistli niman ma quimajmasohuáltican* ipan cojnepanojli†. **21** Tejhamej ticuitiayaj yejhua quimaquixtisquia in país de Israel. Niman no, aman ye quipia yeji tonajli ica ijcon onochiu. **22** Masqui no ijqui sequimej sihuamej yejhuan tohuan nopohuaj otechmojcatlachaltijquej aman. Ijcuaoc sa nimantzin, oyajquej ne itech on tlalcontli, **23** pero xoquinextijquej itlalnacayo Jesús ne ijtic on tlalcontli. Ijcuaoc onocuepquej, oquijtojquej yej oquitaquej sequimej

† **24:5** ¿por qué?; ¿tline? ‡ **24:6** resucitó; yoyol § **24:6** todavía; sanquen * **24:7** crucificaron;
oquipiloquej † **24:7** cruz ‡ **24:12** sábanas § **24:15** cosas * **24:20** lo crucifiquen; ma
quipilocan † **24:20** cruz

ilhuicactequitquej[‡] quen intemicpan yejhuan oquimijlijquej ica Jesús nemí yolticaj. ²⁴ Quemaj sequimej totehuicalhuan[§] oyajquej itech on tlalcontli, niman oquitaquej quen on sihuamej oquijtojquej. Pero xoquitaquej Jesús.

²⁵ Quemaj Jesús oquimijlij:

—¡Sanoyej mechpolohua cajsicamatilistli, niman sanoyej nemohuejcahuaj para nenquineltocaj nochí on tlen oquijtojquej on tiotlajtojquej! ²⁶ ¿Tlen xoquijtojquej on tiotlajtojquej ica Cristo ica oncaj tlajyohuis ijcuac xe quiselia hueyilistli?

²⁷ Quemaj opeu quinmelajcailia nochí on temachtijli campa quijtohua itech ica yejhua ipan in Yectlajcuilojli. Ohuajpeu ipan itlajcuilojhuan Moisés niman quemaj on ocsequimej tlajcuiolotin yejhuan on ocsequimej tiotlajtojquej oquijcuilojquej.

²⁸ Ijcuac oajsiquej ipan on pueblo campa yayaj, ones quen Jesús nejnemiya más tlayecapan. ²⁹ Pero yejhamej onotencotilijquej para ompa inhuan ma nocahua ican in tlajtojli:

—Nican tohuan xmocahua, pampa ye tiotlactijtac, niman ye tlayohua.

Yejhúa ica Jesús ompa inhuan onocau. ³⁰ Niman ijcuac ipan on mesa inhuan yehuaticatca, ocontilan on pan niman oquitiochiu. Quemaj oquitlapan niman oquinmamacac. ³¹ Quemaj nimantzin oixtlajtlapojquej niman oquixmatquej ica yejhua Jesús, niman quemaj yejhua san ohuajnopoloj. ³² Niman ijquin quinojlayaj se ihuan ocse:

—¿Tlen xmelahuac sanoyej otechpactij chica techajnojnotztiaya ipan ojtlí niman techajpantlantilijtiaya on tlen itech ica yejhua tlajcuiolnesticaj ipan on Yectlajcuilojli?

³³ Sa no ipan on hora, yejhamej ocajsiquej inmojhui para Jerusalén campa oquinnextitoj on majtlactli huan se apóstoles niman on intehuicalhuan san secan nemiyaj. ³⁴ On majtlactli huan se apóstoles oquijtojquej:

—Melaúac, tej, toTeco yoyoliu niman yonoquetzteu ipan itlalcon. Niman Simón yoquitac.

³⁵ Quemaj on omemej tlaneltocaquej no oquitetlajtlajtohuilijquej tlinon impan onochiu ne ipan ojtlí, niman quen ijqui oquimatquej ica Jesús oquinnotz ijcuac oquitapan on pan.

Jesús oquinnotitij on inomachtijcahuán (Mt. 28.16-20; Mr. 16.14-18; Jn. 20.19-23)

³⁶ Yejhamej oc* quijitojticatcaj on quen impan onochiu, ijcuac Jesús onotelquetztajsc ne intlajcotian niman ijquin oquintlajpaloj:

—Xyolsejtiacan.

³⁷ Ican innemojtil niman incuecuetlacalis, quinemiliayaj quitztoquej san yacaj itonal. ³⁸ Pero Jesús oquimijlij:

—¿Tlica nemojcatlachaj? ¿Tlica nencahuiliaj on ometlamatilistli calaqui ipan nemoyojo? ³⁹ Xquitacan nomahuan niman nocxihuan, niman xmatican ica sa no nejhua. Xnechmatocacan niman xnechitacan. Tla san yacaj itonal xnacayojo nion omiyoj quen nenquitztoquej nicpia.

⁴⁰ Ijcuac ijcon oquimijlij, oquintitij imahuan niman icxihuan. ⁴¹ Pero oc xquineltocayaj, pampa tlamojcaitayaj niman sanoyej paquilstlamatiyaj. Yejhúa ica Jesús oquimijlij:

—Itlaj nenquipiaj para nicuas?

[‡] 24:23 ángeles: Angeles tequitij ne ilhuicac niman nican ipan in tlalticpactli. [§] 24:24 nuestros compañeros ^{*} 24:36 todavía; sanquen

⁴² Quemaj oquimacaquej sequi michin yejhuan tlhuaqui niman se achi-jtzin necutli. ⁴³ Yehua oquinselilij niman imixpan oquicuaj. ⁴⁴ Quemaj oquimijlij:

—Ijcuac oc nemohuan ninemiya, onemechijlij ijquin: Ica oncaj tenquisas nochí on tlen noca tlajcuilnesticaj ipan itlanahuatil Moisés niman ipan intlajcuilol on ocsequimej tiotlajtojquej niman on salmos.

⁴⁵ Quemaj oquincajsicamachiltij on tlen oncaj ipan on Yectlajcuilojli.

⁴⁶ Ijquin, tej, oquimijlij:

—Ijquin tlajcuilnesticaj, ica Cristo ica oncatca miquis, niman ipan yeji-tonajli yolihius† niman noquetztehuas ne ipan itlalcon. ⁴⁷ Niman no on yejhuan notenojnotzcahuau nonequi quinmachtisquej on tlacamej para ma noyolpatlacan, niman ijcon intlajtlacolhuan quintlapojpolhuilisquej. Yejhua in temachtijli quiteijlisquej ipan países nochihuiyan, pero yejhuatej ica oncaj pehuasquej nican Jerusalén. ⁴⁸ In tlajtlamach nemejhuamej xteix-pantilican. ⁴⁹ Niman aman xcaquican, nemopan nicuajtitlanis on Espíritu Santo yejhuan noTajzin omechilijca ica mechmacas. Pero xmocahuacan nican Jerusalén hasta ijcuac nenquiselisquej on poder yejhuan ne tlacpac hualehuas.

Jesús tlejcohua ne ilhuicac

(Mr. 16.19-20)

⁵⁰ Quemaj Jesús oquinquixtij ipan on hueyican niman hasta Betania oquinhuicac. Ompa oquinhuajquetzteu imahuan niman oquintiochii.

⁵¹ Chica quintiochijticatca, quintlalcahuijtiaya niman otlejcotiaj ne ilhuicac.

⁵² Quemaj yejhuatej oquiyectenejquej Jesús, niman ican pactli onocuepquej para Jerusalén. ⁵³ Niman yejhuatej onocajquej ipan on hueyi tiopan niman quiyectenehuayaj Dios. Ma ijqui nochihua.

† **24:46** resucitará; yolis

SAN JUAN

ON CUAJLI TLAJTOJLI YEJHUAN SAN JUAN OQUIJCUILOJ ICA INEMILIS JESUCRISTO

Itlajtol Dios onocuep Tlacatl

¹ Ijcuac nochí otzimpeu, ye nemiya iConeu Dios yejhuan Tlajtojli. Ni-
man yejhua on yejhuan Tlajtojli ihuan Dios nemiya niman sa no yejhua
Dios. ² Ijcon, tej, ye nemiya ihuan Dios ijcuac nochí otzimpeu. ³ Dios
oquitlalij nochí tlajtlamach* tlen oncaj niman tlen yolticaj itechcopa yejhua
on yejhuan Tlajtojli. Xijtlaj tlen oncaj nion on tlen yolticaj onochijchiu
tla xyejhua. ⁴ IConeu Dios quitemaca on nemilistli yejhuan para nochipa.
Niman on nemilistli quitemaca tlamachilistli quen tlahuijli para on tlacamej
cajsicamatisquej on tlajtlamach ica Dios. ⁵ Yejhua in tlamachilistli oncat-
caj intzajlan on xcuajcualtin tlacamej niman xcuajcualtin espíritus, niman
yejhamej xhuelij quipopolohuaj on tlamachilistli.

⁶ Dios ocuajtitlan se tlacatl itoca Juan. ⁷ Yejhua ohuajlaj quen se teix-
pantiliquetl para oquitexpantilico ica on yejhuan quitemaca tlamachilistli
para ijcon nochimej huelisquej tlaneltocasquej. ⁸ Juan xejhua on yejhuan
tequichihua para cajsicamatisquej on tlajtlamach ica Dios, yej yejhua san
quiteixpantilia ica oncaj on tlahuijli. ⁹ Yejhua in tlahuijli yejhua melahuac.
Yejhua ohuajlaj ipan in tlalticpactli niman tequichihua para nochí tlacatl
cajsicamatis on tlamachilistli yejhuan melahuac.

¹⁰ Yejhua on yejhuan Tlajtojli nemiya ipan in tlalticpactli. Masqui Dios
oquitlalij in tlalticpactli itechcopa yejhua, on tlalticpactlacamej xoquix-
matquej. ¹¹ Ohuajlaj intech on hebreos niman on hebreos xoquiselijquej.
¹² Pero nochimej on yejhuan oquiselijquej niman itech otlaneltocaquej,
oquinmacac permiso para onochijquej iconehuan Dios. ¹³ Yejhamej xte-
conehtuan intech tlalticpactlacamej yejhuan tlacatij quen nochí tlacatl, nion
huajtlacatij pampa innan niman intaj quinequij, yej otlacatico pampa Dios
oquinec para tlacatisquej itech.

¹⁴ Niman on yejhuan Tlajtojli otlacat niman totzajlan onen. Yejhua
sanoyej† otetlajsojtlac‡ niman otemachtij tlen melahuac. Niman otiqui-
taquej ihueyilis. On hueyilistli yejhua quipia pampa yejhua isenTeconeuh
toTajtzin. ¹⁵ Juan oquitexpantilij Cristo ijcuac oquijtoj: “In yejhua nictene-
huaya ijcuac oniquijtoj ica on yejhuan nechajtociatiaya ipan notequiu,
yejhua más hueyixticaj xquen nejhua pampa ijcuac onitlacat yejhua ye
nemiyá.” ¹⁶ Tinohimej ticselijtihuij itech ihueyilis sanoyej miyec tlatiochi-
hualistli. ¹⁷ Moisés oquitemacac on tlanahuatiijli pero on tetlajsojtlalistli
niman on tlen melahuac ocuajquic Jesucristo. ¹⁸ Xqueman yacaj quitaya
Dios. Pero isenTeconetzin yejhuan toTajtzin sanoyej quitlajsojtlá yejhua
yoquipantlantij.

*Juan on tlacuatequijquetl oquinnanquijlij on tiopixquej niman on levitas
(Mt. 3.11-12; Mr. 1.7-8; Lc. 3.15-17)*

¹⁹ Juan oteixpantilij ijcuac on tlayecanquej hebreos chanejquej ne
Jerusalén oquintitlanquej tiopixquej niman levitas itech para quitlaj-
toltisquej aquin yejhua. ²⁰ Yejhua ijquin oquinnanquijlij. Cuajli oquinmelaj-
caijlij:

* **1:3** cosas † **1:14** muy ‡ **1:14** amó

—Nejhua xniCristo yejhuan Dios oquitlalij para tlamandaros.

²¹ Quemaj oquitlajtoltijquej:

—Tla ijcon, ¿aquin tejhua? ¿Tejhua titiotlajtojquetl Elías?

Niman Juan oquijtoj:

—Ca, xnejhua.

Quemaj ijquin oquitlajtoltijquej:

—Tla ijcon, ¿Tejhua titiotlajtojquetl on yejhuan ica oncaj huajlas?

Niman yejhua oquijtoj:

—Ca.

²² Quemaj más oquitlajtoltijquej:

—Xtechijli, tej, aquin tejhua pampa ica oncaj ticpiasquej tlen tiquimilisquej on yejhuan otechajtitlanquej. ¿Tlinon tiquijtohua mocha tejhua?

²³ Ijcuacon Juan oquinnanquilij:

—Nejhua on aquin tzajtzi ne campa tlapatlaco: “Xmelajcatlalican nemoyojlo para nenhuelisquej nenquiselisquej toTeco.” No ijqui niquistohua quen oquijtoj on tiotlajtojquetl Isaías.

²⁴ On yejhuan oquinotzatoj Juan oquinhuajtitlancaj on fariseos. ²⁵ Niman yejhuamej oquijlijquej:

—Tla ijcon, tla xtejhua tiCristo, nion tiElías, nion yejhua on tiotlajtojquetl yejhuan ica oncaj huajlas, ¿tlica§, tej, titlacuatequiya?

²⁶ Juan oquimijlij:

—Nejhua nitlacuatequiya ican atl, pero nemotzajlan ocse nemi yejhuan xnenquixmatij. ²⁷ Yejhua nechajcuitlamanhuijtiu ipan notequi. Niman nejhua nion achijtzin xnechmelahua* nictojtomas icacmecayo, pampa más hueyixticaj xquen nejhua.

²⁸ Nochi yejhua in onochiu ne campa itoca Betábara yejhuan nocahua ne ica quisayan tonajli de on atentli Jordán campa Juan tlacuatequiaya.

Juan oquijtoj aquinon Jesús

²⁹ Huajmostla Juan oquitac Jesús ye ompa quinnishuijtiaya niman oquijtoj:

—Xquitacan yejhua on tlacatl. Yejhua quihuentlalisquej quen se borre-guito para Dios quintlapojpolhuilis intlatlaco colhuan nochimej on tlalticpactlacamej. ³⁰ In yejhuan nictenehuaya ijcuac oniquijtoj: “Se tlacatl yejhuan nechajcuitlapanhuiya ipan notequi yejhua más hueyixticaj xquen nejhua pampa ijcuac onitlacat, yejhua ye nemiya.” ³¹ Sa no nejhua xnicmatiya aquin yejhua. Pero yejhua ica nihuajtlacuatequiijtiu ican atl para on hebreos huelis quixmatisquej.

³² Niman no oquiteixpantilij Juan on tlen oquitac. Yejhua oquijtoj:

—Nejhua oniquitac quen ohuajtemoc ne ilhuicac on Espíritu Santo. Yejhua ohuajtemoc quen itlaj paloma niman ipan yejhua onocau. ³³ Nejhua hasta aman xnicmatisquia aquin yejhua, pero yejhua on yejhuan onechajtitlan ma nitlacuatequi ican atl onechijlij: “Ijcuac tiquitas temos on Espíritu Santo niman on aquin ipan nocahuas, ticmatis ica on yejhua tlacuatequis ican Espíritu Santo.” ³⁴ Nejhua yoniquitac niman aman nicteixpantilia ica yejhua iConeu Dios.

On achoj inomachtijcahuán Jesús oquisquej itech Juan

³⁵ Huajmostla Juan ocsejpa ompa nemiya ihuan omemej inomachtijcahuán. ³⁶ Niman ijcuac oquitac ompaca panohuaya Jesús, oquijtoj:

§ ^{1:25} ¿por qué?; ¿tline? * ^{1:27} no merezco

—Xquitacan on tlacatl. On iborreguito Dios. Dios ocuajtitlan para qui-huentlalisquej quen se borreguito.

³⁷ Quemaj ijcuac on omemej inomachtijcahuan Juan ocacquej on tlen yejhua oquijtoj, oquicuitlapanhuiquej Jesús. ³⁸ Quemaj Jesús ontlachix icuitlapan niman ica oquitac cuajcuitlapanhuiyaya on omemej tlacamej oquimijlij:

—¿Tlinon nenquitejtemohuaj?

Yejhuamej oquijlijquej:

—Temachtijquetl, ¿canon tichanti?

³⁹ Jesús oquimijlij:

—Xhuajlacan niman xquitacan.

Quemaj oyajquej niman oquitaquej canon chanti, niman ompa ihuan onocajquej hasta queman otlayohuac pampa ye tiotlac catca, canaj ipan nahui hora ijcuac oyejcoquej.

⁴⁰ Semej yejhuamej on omemej yejhuan ocacquej Juan niman oquicuitlapahuij Jesús, itoca Andrés yejhuan icniu Simón Pedro. ⁴¹ Achtoj ijcuac xe itlaj quichihuaya, Andrés oyaj quitejtemoto Simón on icniu, niman oquijlij:

—Yoticnextijquej on Mesías —yejhuan quijtosnequi Cristo yejhuan Dios oquitlalij para ma tlamandaro.

⁴² Quemaj Andrés ocuicac Simón ne campa Jesús nemiya. Niman ijcuac Jesús oquitac, oquijlij:

—Tejhua tiSimón iconeu Jonás, pero motoca yes Cefas —yejhuan quijtosnequi Pedro.

Jesús oquinnotz Felipe niman Natanael

⁴³ Huajmostla Jesús oquinemilij para yas ne Galilea. Niman ijcuac oquinextij Felipe, oquijlij:

—Xhuajla nohuan.

⁴⁴ Felipe chanej catca ipan on pueblo itoca Betsaida campa no chantiyaj Andrés niman Pedro. ⁴⁵ Quemaj Felipe oyaj niman oquinextij Natanael. Niman yejhua oquijlij:

—Yoticnextijquej on tlacatl yejhuan oquiteneu Moisés ipan on itlajcuilo-lamahuan ican tlanahuajtijli, niman no on tiotlajtojquej ica otlajcuilojcaj. Yejhua Jesús iconeu José yejhuan chanej ipan on pueblo itoca Nazaret.

⁴⁶ Quemaj Natanael oquijtoj:

—¿Intech on tlacamej yejhuan chantij ne Nazaret huelis quisas se yejhuan tepalehuis?

Felipe oquijlij:

—Xhuajla niman xquitaqui.

⁴⁷ Ijcuac Jesús oquitac Natanael quinisihuiaya, oquijtoj:

—Nican huajlau se yejhuan melahuac hebreo yejhuan xqueman tlacaj-cayahua.

⁴⁸ Quemaj Natanael oquitlajtoltij:

—¿Quen tinechixmati?

Niman Jesús oquijlij:

—Ijcuac Felipe xe mitznotzaya, nejhua onicmat ica tinemiya ne itzintlan on cojtli† itoca higuera.

⁴⁹ Quemaj Natanael oquijlij:

—Temachtijquetl, tejhua tiiConeu Dios. Tejhua tiiRey on hebreos.

⁵⁰ Jesús oquijlij:

† **1:48** árbol

—¿Tinechneltoca san ica onimitzijlij onimitzontac itzintlan on cojtlí higuera? Aman, tej, nimitzijlia ica más huejhueyi tlajtlamach tiquitas.

⁵¹ No ijqui oquijtoj Jesús:

—Ica tlen melahuac nemechijlia, ica nemejhuamej nenquitasquej tlapo-tjas on ilhuicac niman on iilhuicactequitcahuan[‡] Dios tlejcosquej niman temosquej nopal yejhuan oninochiu Tlacatl.

2

Oncatca sen tlanamictilistli ne Caná

¹ Ipan yeyi tonajli más saquin*, oncatca se tlanamictilistli ne ipan on pueblo itoca Caná de Galilea. Inan Jesús ompa nemiya. ² Niman Jesús ihuan inomachtijcahuan no oquinnotzquej ipan on tlanamictilistli. ³ Inan Jesús, ijcuac otlan on vino ipan on ilhuitl, oquijlij Jesús:

—Xocuitlaj vino.

⁴ Pero Jesús oquijlij:

—Sihuatl, ¿tlica[†] tinechijlia nejhua? Hasta aman xe ajsi on tonajli para nicchihuas milagros.

⁵ Quemaj inan ijquin oquimijlij on yejhuan ompa tequichihuayaj:

—Xchihuacan nochí tlen yejhua mechijlis.

⁶ Ompa oncatcaj chicuasen contin tlachijchiutin ican tetl niman ipan se contli hueli calaquiya canaj napoajli[‡] noso cien litros de atl. On hebreos quitequitiltiayaj on atl para nomajtequiayaj, niman ijcon nocahuayaj chipajquej ixpan Dios. ⁷ Jesús oquimijlij on tequichijquej:

—Xquintemacan in contin ican atl.

Niman cuajli oquintemiltiquej. ⁸ Niman quemaj Jesús oquimijlij:

—Aman xquixtican achijtzin niman xquitquilican on yejhuan tlayecan-quetl ipan in ilhuitl.

Niman yejhamej ijqui oquichijquej. ⁹ On tlayecanquetl ipan on ilhuitl xquimatiya canon ohualeu, yej san yejhamej on tequichijquej quimatzticatcaj yejhuan oquixtijquej on atl. On tlayecanquetl oquimat on atl yejhuan tlacueptli vino niman quemaj oquinotz on montli ¹⁰ niman oquijlij:

—Nochi tlacatl achtoj quitemaca on más huelic vino niman ijcuac on tenotzaltin miyec yoconiquej, quinmacaj on vino yejhuan xmás huelic. Pero tejhua yej otiquejeu on más huelic vino para más saquin tictemaca.

¹¹ Yejhua in tlen Jesús oquichiu ne Caná de Galilea, yejhua iachtoj milagro. Yejhua in tlamajhuisojli oquiteititij ihueyilis, niman on inomachtijcahuan oquineltocaquej.

¹² Ijcuac ijcon yonochiu, Jesús ihuan inan, icnihuan niman inomachtijcahuan oyajquej ne ipan on pueblo itoca Capernaum campa onenquej quesqui tonajli.

Jesús oquichipau on hueyi tiopan

(Mt. 21.12-13; Mr. 11.15-18; Lc. 19.45-46)

¹³ Quemaj ica ye nisiu huajlaya on ilhuitl itoca pascua yejhuan on hebreos quejehuayaj, Jesús oyaj ne ipan on hueyican Jerusalén. ¹⁴ Ne ipan iquiahuac on hueyi tiopan, Jesús oquinnextito on yejhuan quinnamacayaj huacaxtin, borregos niman palomas. Niman no ompa oquinnextito on yejhuan quimpatiliayaj tomin on tlacamej ne campa yejyeahuaticatcaj ipan inmesas.

¹⁵ Ijcuac yejhua ijcon oquitac, oquichijchiu se tlachijchihualmecatl niman

[‡] 1:51 ángeles de él: Angeles tequitij ne ilhuicac niman nican ipan in tlalticpactli. * 2:1 después

† 2:4 ¿por qué?; ¿tline? ‡ 2:6 ochenta

nochimej oquintlahuelhuijhuitec ihuan inborregos niman inhuacaxhuan. On yejhuan quitepatiliayaj tomin, oquinxixinilij intomin ipan tlajli, niman oquinxixinilij inmesa. ¹⁶ On tlanamacaquej ican palomas oquimijlij:

—¡Yejhua on xquejcuancan nican! ¡Ma ca xmercado chihuacan ipan ical noTajzin!

¹⁷ Quemaj on inomachtijcahuan oquelnamiiquej on Yectlajcuilojli yejhuan quijtohua: “Ican nochí noyojlo nictlacaita motiopan.”

¹⁸ Quemaj on hebreos oquijlijquej:

—¿Catlejhua tlamañuisojli titechititis para tiquitasquej ica mitzmelahuas ticchihuas yejhua in?

¹⁹ Jesús oquimijlij:

—Xroxotonican yejhua in tiopan niman ipan yeyi tonajli ocsejpa niquetztehuas.

²⁰ Quemaj on hebreos oquijlijquej:

—Yejhua in tiopan ompoajli* huan chichuasen xipan ohuecjajquej ica oquichijchijquej, ¿niman tejhua san ipan yeyi tonajli ticchijchihuas ocsejpa?

²¹ Pero on tiopan yejhuan Jesús quitenehuayaj sa no de yejhua itlalnacayo.

²² Yejhua ica, ijcuac Jesús oyoliu† niman onoquetzteu ipan itlalcon, on inomachtijcahuan oquelnamiiquej in tlen yejhua oquijtoja. Yejhua ica oquineltocaquej on Yectlajcuilojli niman on tlajtojli yejhuan oquimijlijca.

Jesús quixmati iyojlo nochí tlacatl

²³ Ijcuac Jesús nemiya ne Jerusalén ipan on ilhuitl pascua, miyequej oquineltocaquej ijcuac oquitaquej on milagros yejhuan quichihuaya. ²⁴ Pero yejhua xoquitlalij iyojlo itech intlaneltoc pampa quimixmatiya ipan inyojlo nochimej. ²⁵ Xquipolohuaya para yacaj quijlis quen ijquimej on tlacamej pampa sa no yejhua quimatzticatca linon oncaj ipan inyojlo on tlacamej.

3

Jesús otlajtlajtoj ihuan Nicodemo

¹ Nemiya se fariseo itoca Nicodemo yejhuan tlayecanquetl catca intech on hebreos. ² Yehua in Nicodemo oyaj oquinotzato Jesús ijcuac tlayohua, niman oquijlij:

—Temachtijquetl, ticmatztoquej ica Dios omitzajtitlan para otitech-machtico, pampa xacaj hueli quiteititia ipoder ican milagros quen tejhua ticchihua tla Dios xihuan nemi.

³ Quemaj Jesús oquijlij:

—Ica tlen melahuac nimitzijlia, tla yacaj xoc sejpa tlacatis, xhuelis calaquis campa Dios tlamandarohua.

⁴ Niman Nicodemo oquitlajtoltij:

—Pero ¿quen ijqui se tlacatl yejhuan yonoscaltij huelis ocsejpa tlacatis? ¿Tla ijcon huelis calaquis ijtic inan para ocsejpa tlacatis?

⁵ Niman Jesús oquijlij:

—Ica tlen melahuac nimitzijlia, tla yacaj tlacatl xnocuatequia ican atl niman xtlacati itechcpa on Espíritu Santo, xhuelis calaquis ne campa tlamandarohua Dios. ⁶ Ijcuac se tlacati itech inan quiselia san nemilistli ipan itlalnacayo para nemis quen inan, pero ijcuac tlacati itech on Espíritu Santo quiselia yencuic nemilistli ipan ialma. ⁷ Ma ca mitzmojcatlachalti on ica nimitzijlia: “Ica oncaj ocsejpa titlacatis.” ⁸ On ajacatl tlalpitzá san canon

§ ^{2:18} mereces * ^{2:20} Ompoajli quitosnequi cuarenta, niman ompoajli huan chichuasen quitosnequi cuarenta y seis. † ^{2:22} resucitó; oyol

quinequi. Ticaqui on tlen yejhua caquistilia, pero xticmati canon hualehua niman canon yau. No ijqui, tej, on yejhuan tlacatij ican on Espíritu Santo.

⁹ Quemaj Nicodemo oquitlajtoltij:

—¿Quen ijqui huelis nochihuas yejhua in?

¹⁰ Jesús oquinanquijilij:

—¿Tejhua tihueyitemachtijquetl ipan Israel niman xticmati yejhua in tlajtlamach*? ¹¹ Ica tlen melahuac nimitzijlia ica tejhuamej titlajtlajtohuaj ica on tlen ticmatij, niman ica on tlen yotiquitaquej ticteixpantiliaj, pero nemejhuamej temachtijquej xnenquineltocaj tlen temechijliaj. ¹² Tla xnen-nechneeltocaj ijcuac nemechnojnotza ica on tlajtlamach yejhuan quisa ipan in tlalticpactli, ¿quen ijqui nennechneeltocasquej tla nemechnojnotzas ica on tlajtlamach yejhuan quisa ne ilhuicac? ¹³ Xe yacaj tlejcohua ne ilhuicac, yej san nejhua yejhuan oninochiu Tlacatl onihuajtemoc ne ilhuicac. ¹⁴ Niman ijcon quen Moisés oquipiloj on cohuatl ne campa tlapatlaco, ica oncaj no ijqui nechajcopilosquej nejhua yejhuan oninochiu Tlacatl ¹⁵ para nochon yejhuan nechneeltocas xmiquis, yej quipias nemelistli para nochipa.

¹⁶ Tej, Dios sanoyej† oquintlajsojtlac‡ on tlalticpactlacamej hasta oquitemacac isenteConetzin para nochon aquin quineltocas xpolihuis, yej quipias yencuic nemelistli para nochipa. ¹⁷ Dios xocuajtitlan iConetzin, intech on tlalticpactlacamej para quintlajtlacolmacas, yej para on tlalticpactlacamej ma nomaquixtican itechcopia.

¹⁸ On yejhuan quineltoca xquitlajtlacolmacasquej, pero on yejhuan xquineltoca ye quipia tlajtlacolmacalistli san pampa xquineltoca isente-Conetzin Dios. ¹⁹ Yejhuamej quiseliaj tlajtlacolmacalistli pampa ohuajlaj iConetzin Dios ipan in tlalticpactli niman oquintitij on cuajli ojtli para ipan nohuicasquej, pero xquinequij nohuicasquej ipan on cuajli ojtli, pampa yejhuamej quichihuaj on tlen xcuajli. ²⁰ Nochimej yejhuan quichihuaj on tlen xcuajli quitlahuelitaj iConetzin Dios niman on cuajli ojtli yejhuan oquiteititij. Yejhuamej xhuajlahuij itech pampa xquinequij nopantlantis intlajtlacol. ²¹ Pero on yejhuan quichihuaj on tlen cuajli huajlahuij itech para nopantlantis ica quichihuaj on tlen Dios quinnahuatia.

Ocsejpa Juan on tlacuatequijquetl otlajtoj ica Jesús

²² Ijcuac in yopanoc, Jesús oyaj inhuan inomachtijcahuán ne Judea campa quesqui tonaltin ompa inhuan onocau. Niman Jesús oquinnahuatij inomachtijcahuán ma tlacuatequican. ²³ No ijqui Juan tlacuatequiaya ne Enón nisu Salim pampa ompa oncatca miyec atl. On tlacamej huajlayaj itech niman yejhua quincuatequiaya. ²⁴ Yejhua in onochiu ijcuac Juan xe cajsiyaj.

²⁵ Quemaj sequimej inomachtijcahuán Juan opejquej nocamatlanij inhuan sequimej hebreos yejhua ica on tlacuatequilistli. Yejhuamej quinequiya quimatisquej catlejhua tlacuatequilistli más cuajli, tla on yejhuan de Jesús noso on de Juan. ²⁶ Yejhua ica oyajquej niman oquijlijtoj Juan:

—Temachtijquetl, cuajli xcaqui ica on yejhuan mohuan nemiya ne ica iquisayan tonajli on atentli Jordán yejhuan tejhua ica otiteixpantili, aman tlacuatequiya niman nochon tlacatl huajlau itech.

²⁷ Quemaj Juan oquimijlij:

—Xacaj huelis quipias itlaj tla Dios ne ilhuicac xcahuilis. ²⁸ Nemejhuamej cuajli onennechcaquej ijcuac onemechijlij ica nejhua xniCristo, yej se yejhuan Dios ocuajtitlan iyecapan. ²⁹ Ne campa nonamictilo, on montli

* ^{3:10} cosas † ^{3:16} mucho ‡ ^{3:16} amó

yejhua quiselia sihuamontli. Niman itetlajsojcau§ on montli no sanoyej paqui ijcuac caqui tlajtlajtohua on montli. Nejhua quen itetlajsojcau on montli. Ijcon, tej, sanoyej nipaqui ijcuac nicaqui ica noch i tlacatl yau itech Jesús. ³⁰ Yehua ica, tej, ica oncaj más hueyixtias niman nejhua yej más nitemotias.

Iconeu Dios ohuajtemoc ne ilhuicac

³¹ On yejhuan huatemohua ne ilhuicac más hueyixticaj xquen noch i tlacatl. On yejhuan chanej ipan in tlalticpactli san tlalticpactlacatl niman tlajtlajtohua ica on tlajtlamach yejhuan quisticaj ipan in tlalticpactli. Pero on yejhuan hualehua ne ilhuicac más hueyixticaj xquen noch i tlacatl. ³² Yehua quitexpantilia ica on tlen yoquitac niman yocac, pero xacaj quineltoca on tlen yejhua quijtohua. ³³ Pero tla yacaj quineltoca on tlen quijtohua on yejhuan ohuajtemoc ne ilhuicac, quitexpantilia ica Dios quijtohua on tlen melahuac. ³⁴ On yejhuan Dios ocuajtitlan quitojhuia on itlajtol Dios, pampa Dios oquimacac iEspíritu ican noch ihueyilis. ³⁵ On Tajtli quitlajsojtlá* iConetzin, niman yoquimactilij noch itequihuajyo ipan noch i tlen oncaj. ³⁶ Yehuan quineltoca iConetzin Dios quipia nemilstli para nochipa, pero on yejhuan xquitlacamatxi xquipias yejhua in nemilstli, yej quiselis on temojtij itlahuel Dios.

4

Jesús otlajtlajtoj ihuan on sihuatl yejhuan chanej ne Samaria

¹ ToTeco Jesús oquimat ica on fariseos oquimatquej ica yejhua quimpia más nomachtijquej niman tlacuatequiaya más xquen Juan. ² Pero Jesús xtacuatequiaya, yej san inomachtijcahuan tlacuatequiayaj. ³ Niman ijcuac Jesús ijcon oquimat, oquis ne Judea para ocsejpa oyaj ne Galilea.

⁴ Niman ipan iojhui, ica oncatca para panos ipan on yehualican itoca Samaria. ⁵ Oajsic, tej, ipan se pueblo ne Samaria itoca Sicar. Yejhua in pueblo oncatca san nisu itech on tlajli yejhuan Jacob oquimacac José on iconue. ⁶ Ompa oncatca se pozo yejhuan quipiaya atl. On pozo cuitiayaj ipozo Jacob. Jesús onotlalij itenco on pozo pampa ye huajsiautiaya ipan iojhui. Ijcuacon canaj tlacualispan catca. ⁷⁻⁸ Inomachtijcahuan oyajquej ipan on pueblo para ocohuatoj itlaj tlen quicuasquej. Quemaj ohuajlaj se sihuatl yejhuan chanej ne Samaria. Yejhua ohuajlaj para oquixtico atl ijtic on pozo, niman Jesús oquijlij:

—Xnechmaca atl.

⁹ Quemaj on sihuatl samaritana oquijlij Jesús:

—¿Quen ijqui tejhua yejhuan tihebreo tinechtlajtlanilia atl nejhua yejhuan nisamaritana?

Ijquin oquijtoj pampa on hebreos xcuajli nohuicaj inhuan on samaritanos.

¹⁰ Quemaj Jesús oquijlij:

—Tla ticmatisquia on tlen cuajli tetlayocolijli Dios quinequi mitzmacas, niman aquin nejhua yejhuan nimitztlajtlanilijtcaj atl, tla ijcon, yej tejhua tinechtlajtlanilisquia atl niman nejhua nimitzmacasquia on atl yejhuan quitemaca nemilstli.

¹¹ On sihuatl oquijlij:

—Señor, nion siquiera xticpia tlinon ica tiquixtis on atl niman in pozo sanoyej* huejcatlan. ¿Canon ticoncuitetzis on atl yejhuan quitemaca nemilstli para tinechmacas? ¹² ¿Tlen tejhua ticnemilia más tihueyixticaj xquen

on achtoj totaj Jacob yejhuan otechmacac in pozo? Yejhua atliya nican niman no iconehuan, niman iyolcahuan atliyaj nican.

13 Jesús oquijlij:

—On aquin coni yejhua in atl ocsejpa amiquis. **14** Pero aquin conis on atl yejhuan nicmacas xqueman amiquis, pampa on atl yejhuan nicmacas yejhua nochihuas ijtic quen itlaj ameyajli yejhuan quimacas nemilstli para nochipa.

15 Quemaj on sihuatl oquijlij:

—Señor, xnechmaca yejhua on atl para ma ca ocsejpa namiquis, nion nihuajlas nicuajquixtis atl ijtic in pozo.

16 Jesús oquijlij:

—Xhuiya xcanati mohuehuentzin niman quemaj xhuajlacan nican.

17 Niman on sihuatl ijquin oquinanquijilij:

—Xnicpia nohuehuentzin.

Quemaj Jesús oquijlij:

—On ica otiquijtoj xticpia mohuehuentzin, on melahuac, **18** pampa macuili mohuehuentzitzihuan yotiquimpix, niman on yejhuan aman ticpia xmohuehuentzin. Yejhua ica on melahuac tlen otiquijtoj.

19 Niman ijcuac on sihuatl ijcon ocac, oquijlij Jesús:

—Señor, nejhua niquita ica tejhua titiotlajtojquetl. **20** On noachtojtajhuan samaritanos oquimahuistiliquej Dios nican ipan in tepetl, pero nemejhuamej yejhuan nenhebreos nenquijtohuaj ica nonequi ticmahuistilisquej ne Jerusalén.

21 Jesús oquijlij:

—Sihuatl, xnechneltoquili ica huajlau on tonaltin ijcuac nion nican ipan in tepetl nion ne Jerusalén xnenquimahuistilisquej Dios. **22** Nemejhuamej yejhuan nensamaritanos xnenquimatiq aquilon nenenquimahuistiliaj, pero tejhamej yejhuan tihebreos ticmati j aquilon ticmahuistiliaj pampa on temaquixtilistli quisa totech. **23** Pero huajlau on tonajli niman sa no aman ijcuac on yejhuan melahuac quinequij quimahuistiliaj toTajtzin, quimahuis tilisquej ne impan inyojlo niman ica tlen melahuac quen Dios quinequi. ToTatzin, tej, ijqui quinequi ma quichihuacan on yejhuan quimahuistiliaj. **24** Dios yejhua Espíritu, niman on yejhuan quimahuistiliaj ica oncaj quichihuasquej impan inyojlo niman ica tlej melahuac quen Dios quinequi.

25 On sihuatl oquijlij:

—Nejhua nicmatzticaj ica huajlas on Mesías yejhuan itoca Cristo. Ijcuac yejhua huajlas, nochil tlahtlamach[†] techmelajcailis.

26 Niman Jesús oquijlij:

—Sa no nejhua yejhuan nimitznojnotza.

27 Niman quemaj oyejcoquej on inomachtijcahuan niman otlamoj caitaquej ica Jesús tlajtlajtohuaya ihuan se sihuatl. Pero xacaj oquitlajtoltij tlilon quinequia on sihuatl, noso tlica[‡] tlajtlajtohuaya Jesús ihuan on sihuatl.

28 Quemaj on sihuatl ocajteu itzotzocol niman oyaj ne ipan on hueyican, niman oquimijlito on tlacamej:

29 —Xhuajlacan, xquitaquij se tlacatl yejhuan onechpanextijlij nochil tlen yonicchiu. ¿Manin yejhua Cristo?

30 Ijcuacon on tlacamej oquisquej ne ipan on hueyican niman oyajquej ne campa nemiya Jesús.

31 Chica yejhua in onochiu, on inomachtijcahuan quitlajtlaniliayaj Jesús:

[†] 4:25 cosas [‡] 4:27 por qué; tline

—Temachtijquetl, nimantzin xtlacua.

³² Pero yejhua oquimijlij:

—Nejhua nicpia tlen nicas yejhuan nemejhuamej xnenquimati.

³³ Ijcuac on nomachtijquej ijcon ocacquej, opeu notlajtoltiaj:

—¿Manin yej yacaj yoquitlacualtico?

³⁴ Pero Jesús oquimijlij:

—Ijcon quen nemotlalnacayo cojtiticaj ijcuac nentlacuaj, no ijqui noalma cojtiticaj ijcuac nicchihua tlen quinequi on yejhuan onechajtitlan para nitlamis itequiu. Yejhua ica, tej, in tequitl sa no ijqui quen notlacual.

³⁵ Nemejhuamej nenquijtohuaj: “Oc§ polihui nahui metzli para pixcalos.” Pero nejhua nemechijlia: Xquitacan nochimej on tlalticpactlacamej. Yejhuanamej no ijqui quen se hueyi tlatoctli yejhuan yochicau para nopixcas.

³⁶ On yejhuan quimpixca inalmas on tlacamej quiselia itlaxtlahuil, niman on yejhuan quimpixca quiselis nemilstli para nochipa. Tla ijcon, tej, on yejhuan tlatoca niman on yejhuan pixca san secan paquisquej. ³⁷ Tla ijcon, melahuac quen quijtohu se tlajtojli: “Se tlatoca niman ocse pixca.”

³⁸ Nejhua onemechtitlan xpixcatij ne campa xonentocaquej. Ocsequimej otequitquej niman nemejhuamej sa nenquiseliaj on tlen yoquitequitquej.

³⁹ Niman miyequej samaritanos yejhuan chanejquej ipan on hueyican oquineltocaquej Jesús ipampa on tlen oquimijlij on sihuatl ijcuac oquiteix-pantijlij: “Onechpanextijlij nochi tlen nejhua yonicchiu.” ⁴⁰ Yejhua ica, ijcuac on chanejquej Samaria ohualajquej, sanoyej oquitlajtlanilijquej para ompa inhuan ma nocahua niman Jesús ome tonajli ompa onocau. ⁴¹ Niman miyequej más otlaneltocaquej ijcuac ocacquej on tlen sa no yejhua quijto-huaya. ⁴² Quemaj oquijlijquej on sihuatl:

—Aman ticneltocaj xsan pampa yejhua on tlen otitechijlij, yej no pampa sa no tejhuanamej yoticacquej. Niman ticmatztoquej ica melahuac yejhua on temaquixtiquetl yejhuan quinmaquixtis on tlalticpactlacamej.

Jesús oquipajtij iconeu se tlacatl yejhuan sen itequitcau on rey

⁴³ Quemaj ipan ome tonajli Jesús oquis ne Samaria niman ocajsic iohui para oyaj ne Galilea. ⁴⁴ Jesús sa no yejhua oquijtoj ica se tiotlajtojquetl xquit-lacaitaj on yejhuan chanejquej. ⁴⁵ Ijcuac oajsic ne Galilea, on yejhuan ompa chanejquej cuajli oquiselijquej, pampa yejhuanamej no oyajcay ne Jerusalén ipan on ilhuitl pascua, niman oquitaquej nochi tlen yejhua ompa oquichiu.

⁴⁶ Quemaj Jesús ocsejpa ohuajlaj ne Caná campa on atl oquicuepca vino. Ompa nemiya se hueyixticaj itequitcau on rey, yejhuan ne ipan on hueyican Capernaum quiipiaya se iconeu cualohuaya. ⁴⁷ Ijcuac on hueyixticaj tequit-quetl oquimat ica Jesús ohuaquis ne Judea niman ica yoyejcoc Galilea, oyaj oquitato niman oquicnotlajtlanilij para ma huiya ichan niman ma quipajti iconeu yejhuan ye micticatca. ⁴⁸ Quemaj Jesús oquijlij:

—Nemejhuamej xnentlaneltocaj tla xnenquitaj tlamajhuisoltin niman milagros.

⁴⁹ Pero on hueyixticaj tequitquetl oquijlij:

—Señor, nimantzin xhuajla antes miquis nocone.

⁵⁰ Niman Jesús oquijlij:

—Xhuiya mochan. Mocone u xmiquis.

On tlacatl oquineltocac tlilon Jesús oquijlij, niman oyaj. ⁵¹ Ijcuac ye asiticatca ichan on itequitcahan oquinamiquitoj niman oquijlijquej:

—Mocone u yopajtic.

⁵² Quemaj oquintlajtoltij tlen hora opeu pajtitiu iconeu, niman oquijlijquej:

—Yalohua ipan la una ijcuac tiotlac ocau on totonqui*.

⁵³ Ijcuacon on tajtli oquelnamic ica sa no ipan on hora ijcuacon ijcuac Jesús oquijlij: “Mocone u xmiquis.” Yehua ica, tej, ihuan noch i chanchanejcahuant oquineltocaquej Jesús.

⁵⁴ In yejhua ica ome milagro oquichiu Jesús ijcuac ohuajquis ne Judea niman oyaj ne Galilea.

5

Ne campa naltilo itoca Betesda, Jesús oquipajtij se tlacatlyejhuan sepohuiya

¹ Ijcuac in tlajtlamach* yonochiu, Jesús oyaj ne Jerusalén campa on hebreos quichijtacaj se ilhuitl para Dios. ² Ipan on hueyican, nisu i tech on tlatzacuilyotl† itoca de las Ovejas, oncatca se campa naltilo yejhuan ica tlajtojli hebreo itoca Betesda. Ne campa naltilo quipiaya macujli tlazacuiltyenco. ³ Niman ompa ipan on tlatzacuiltyenco tejtemiyaj miyequej co-coxquej yejhuan coxomej, ciegos niman on yejhuan sepohuiyaj. Yejhuatej quichixtacaj ma nolini on atl, ⁴ pampa san ajsiya on tiempo ijcuac se ilhuicactequitquetl‡ temohuaya ne ijtic campa naltilo niman quinehuaya on atl. Quemaj on yejhuan achtopa calaquiya ne ijtic on atl pajtiya masqui san catlejhua cualolistli quipiaya. ⁵ Ompa nemiya se tlacatl yejhuan ye quipiaya sempoajli§ huan majtlactli huan chichueyi xipan ica cualohuaya. ⁶ Ijcuac Jesús oquitac ompa onoc, niman oquitac ica ye huejcahui cualo, oquitlajtoltij:

—¿Ticnequi tipajtis?

⁷ On cocoxqui oquijlij:

—Señor, xnicpia aquin nechcalactis ijtic on atl ijcuac nolinia. Ijcuac nicnequi nicalaquis, ocse achtopa calaqui.

⁸ Jesús oquijlij:

—Xmotelquetza. Xcajocui moperl niman xhuiya.

⁹ Nimantzin on tlacatl opajtic, ocontilan ipetl niman onejnen.

Pero yejhua in onochiu ipan on tonajli ijcuac nosehuiaj on hebreos.

¹⁰ Yejhua ica intlayecancahuau on hebreos oquijlijquej on yejhuan opajtic:

—Aman in tonajli para titosehuiaj. Itlanahuatil Moisés xmitzcahuilia para ticmomamaltis moperl.

¹¹ On tlacatl oquimijlij:

—On yejhuan onechpajtij onechijlij: “Xcajocui moperl niman xhuiya.”

¹² Quemaj oquitlajtoltijquej:

—¿Aquinon omitzijlij: “Xcajocui moperl niman xhuiya”?

¹³ Pero on tlacatl xquimatiya aquinon oquipajtij, pampa Jesús onejcuani i tech on miyec tlacatl yejhuan ompa nemiya.

¹⁴ Más saquin* Jesús oquinextij ne ipan on hueyi tiopan, niman oquijlij:

—Xcaqui, aman yotipajtic. Ma ca ocsejpa titlajtlacos para ma ca mopan nochihuas tlaj yejhuan más temojtij.

¹⁵ Quemaj on tlacatl oyaj niman oquinmachiltjtetzito itlayecancahuau on hebreos ica on yejhuan oquipajtij yejhua Jesús. ¹⁶ Yejhua ica, tej, on tlayecanquej tlamach ica oquipaj solojquej Jesús niman quimictisnequiyaj,

* 4:52 fiebre † 4:53 su familia * 5:1 cosas † 5:2 puerta ‡ 5:4 ángel: Angeles tequitij ne ilhuicac niman nican ipan in tlalticpactli. § 5:5 Sempoajli quitosnequi veinte, niman sempoajli huan majtlactli huan chichueyi quijtosnequi treinta y ocho. * 5:14 después

pampa on tlen oquichiu ipan on tonajli ijcuac nosehuiaj on hebreos. ¹⁷ Pero Jesús oquimijlij:

—NoTajzin hasta aman tequiti, niman nejhua no nitequiti.

¹⁸ Yehua ica on itlayecancahuan on hebreos más quinequiyaj quimictisquej, pampa xsan xquitlacaitaya on nesehuitlonajli, yej no oquijtoj ica Dios yehua iTaj, niman ijcon, tej, onoteneu ica yehua nemí sa no ijqui quen Dios.

Iconeu Dios quipia tequihuayotl

¹⁹ Quemaj Jesús oquimijlij:

—Ica tlen melahuac nemechijlia ica nejhua yehuan niiConeu Dios xhueli nicchihua itlaj noselti, yej san nihueli nicchihua on tlen niquila quichihua noTaj. On tlen noTaj quichihua no nicchihua. ²⁰ Tej, noTaj nechtlaſoſtla† niman nechititia nochi tlen yehua quichihua. Yehua nechititis tlajtlamach yehuan más huejhueyi xquen yehua in para nicchihuas. Ijcon tej, nemejhuamej mechmojcatlachaltis. ²¹ Ijcon quen noTaj quinyolitis on mimiquej niman quinmacas nemilistli, nejhua yehuan niiConeu no ijqui nicmacas nemilistli on yehuan nicnequis nicmacas. ²² Niman noTaj xquiyolcuitia nion quitlajtlacolmaca yacaj flacatl, yej nejhua onechmacac nochi on tequihuajyotl para niteyolcuitis niman nitetlajtlacolmacas, ²³ para nochimej ma nechtlacaitacan quen quitlacaſtaj noTaj. Yehuan xnechtlacaitaj, no xquitlacaſtaj noTaj yehuan onechajtitlan.

²⁴ Ica tlen melahuac nemechijlia: Yehuan cuajli caqui on tlen niquiajtohua niman quineltoca on yehuan onechajtitlan quipia nemilistli para nochipa. Niman xquitlajtlacolmacasquej, yej ialma yonomanahuij itech miquilistli, niman aman quipia nemilistli para nochipa. ²⁵ Ica tlen melahuac nemechijlia ye huajlau on tonajli niman sa no aman yoyejcoc ijcuac on mimiquej caquisquej notlajtol nejhua yehuan niiConeu Dios, niman on yehuan quitlacamatisquej nemisquej. ²⁶ Ijcon quen noTajzin quitemaca nemilistli para nochipa, no ijqui nejhua yehuan niiConeu nictemaca nemilistli para nochipa. ²⁷ Niman yonechmacac itlanahuatil para niteyolcuitis niman nitetlajtlacolmacas pampa oninochiu Tlacatl. ²⁸ Ma ca yehua ica in xmojcatlachacan, pampa yejcos on tonajli ijcuac nochimej on mimiquej caquisquej notlajtol ²⁹ niman quisasquej ipan intlalcon. On yehuan oquichijquej on tlen cuajli, yolisquej niman noquetztehuasquej ipan intlalcon para quipiasquej yencuic nemilistli yehuan para nochipa. Pero on yehuan oquichijquej on tlen xcuajli, yolisquej niman noquetztehuasquej para quintlajtlacolmacasquej.

Quesqui teixpantiliquej quiteititiaj ica Jesús quipia tequihuajyotl

³⁰ Nejhua xhueli itlaj nicchihua itechcopia notequiyo. Nejhua niteyolcuitia niman nitetlajtlacolmaca quen Dios nechijlia. Yehua ica niteyolcuitia niman nitetlajtlacolmaca quen quitocarohua pampa xnicchihua tlen nejhua nicnequi, yej tlen quinequi noTajzin yehua onechajtitlan. ³¹ Tla sa no nejhua noca ninoteixpantilia nenhuelisquiaj nenquijtosquiaj ica on tlen niquiajtohua xmelahuac. ³² Pero nemi ocse yehuan noca quiteixpantilia, niman nejhua nicmati ica on tlen noca quijtohua melahuac. ³³ Onenquintilanquej sequimej itech Juan, niman on tlen yehua noca oquijtoj melahuac. ³⁴ Pero on tlen Juan noca oquijtoj xnechpolohua, yej san nemechelnamictia on tlen yehua noca oquijtoj para huelis nennechneltocasquej niman nemaquisasquej. ³⁵ Juan quen itlaj tlahuilji catca yehuan tlicuiya niman cuajli

† ^{5:20} me ama

tlahuilo huaya. Itlahuil omechititij on cuajli ojtli para ipan nemohuicasquej. Niman quesqui tonaltin onenquitlalijquej nemoyojo ican paquelistli para nenyasquej ipan on cuajli ojtli. ³⁶ Pero nejhua nicpia noteixpantilijcau yejhuan más hueyi quijtosnequi xquen yejhua on tlen oquijtoj Juan. On tlen noTajtzin onechmacac para ma nicchihua quiteixpantilia ica melahuac noTajtzin onechajtitlan niman no in tlajtlamach nicchihua. Yejhuatej quiteititia ica melahuac noTajtzin onechajtitlan. ³⁷ Niman noTajtzin yejhuan onechajtitlan no noca teixpantilia. Nemejhuatej xqueman onencacquej ijcuac tlajtlajtohua, xqueman onenquitaquej quen tlajtlacha. ³⁸ Nion itlajtol xhueli calaqui ipan nemoyojo, pampa xnennechneltocaj nejhua yejhuan onechajtitlan. ³⁹ Nemejhuatej sanoyej nenquimomachtiaj on Yectlajcuilojli, pampa nenquinemiliaj ica nenquinextisquej nemilistli yejhuan para nochipa ijcuac yejhua nenquimomachtiaj. Yejhua ica mechtocarohua nenquimatisquej ica on Yectlajcuilojli yejhua mechtenquixtilia noca nejhua. ⁴⁰ Pero nemejhuatej xnенquinequij notech nenhuajlasquej para nenquipiasquej yejhua on nemilistli.

⁴¹ 'Nejhua xnictejtemohua para on tlacamej ma nechtlacaitacan. ⁴² Pero nemechixmati niman nicmatzticaj ica xnenquitlajsojta‡ Dios. ⁴³ Nejhua onihuajlaj nemotech ican itocatzin noTajtzin, niman nemejhuatej xnennech-seliaj. Pero tla huajlas ocse yejhuan tlajtlajtos ica sa no itlamachilis, on quemaj nenquiselisquej. ⁴⁴ ¿Quen ijqui, tej, huelis nentlaneltocasquej tla sa no nemejhuatej nenquimoseliliaj on tlacaitalistli niman xnenquitejtemohua on tetlacamatilistli yejhuan san yejhua Dios quitemaca? ⁴⁵ Ma ca xnemilican ica nejhua nemechteixpanhuis itech noTajtzin. Yej mechteixpanhuis Moisés yejhuan itech yonenquitlalijquej nemotlamachalis. ⁴⁶ Tla nemejhuatej melahuac nenquineltocasquiaj on tlen oquijtoj Moisés, no nennechneltocasquiaj, pampa yejhua otlajcuiloj noca nejhua. ⁴⁷ Pero xnenquineltocaj on tlen yejhua oquijcuiloj. Yejhua ica, ¿quen ijqui, tej, huelis nenquineltocasquej on tlen nejhua nemechijlia?

6

Jesús oquintlacualtij majcuijli mil tlacamej (Mt. 14.13-21; Mr. 6.30-44; Lc. 9.10-17)

¹ Saquin ijcuac yejhua on onochiu, Jesús oyaj ipan ocse ilado on mar itoca Galilea yejhuan no itoca Tiberias. ² Sanoyej miyec tlacatl yayaj ihuan, pampa yoquitacaj on milagros yejhuan oquichiu ica oquimpajtij on cocoxquej. ³ Quemaj Jesús otlejcoc ipan se tepetl niman ompa onotlalij ihuan inomachtijcahan. ⁴ Ipan on tonaltin ye nisu catca para on hebreos quichihuasquej on ilhuitl itoca pascua. ⁵ Niman Jesús oquitac iyehualijcan ica miyec tlacatl quinisihuiya. Yejhua ica oquijlij Felipe:

—¿Canon ticohuasquej tlacuajli para nochí yejhua in tlacatl?

⁶ Cuajli Jesús ye quimatzticatca tlinon quichihuas, pero yejhua ijcon oquijlij san para quitas tlinon quijtos Felipe. ⁷ Niman Felipe oquijlij:

—Se tlacatl nonequi tequitis canaj ome ciento tonaltin para huelis cohuas pan para nochimej in tojlamej. Masqui Ijcon quichihuasquia xcajxilis nion siquiera para cada se quicuas pitentzin.

⁸ Quemaj Andrés, yejhuan semej on inomachtijcau niman yejhuan icniu Simón Pedro, oquijlij:

‡ 5:42 no le aman

9 —Nican nemi se oquichconetl yejhuan quipia macujli pan tlachijchiutin ican cebada niman ome michintzitzintin. Pero ¿tlinon quijtojticaj yejhua in achijtzin tlacuajli para in miyec tlacatl?

10 Ijcuacon Jesús oquijtoj:

—Xquimijlican ma nosehuican nochimej.

Ne campa nemiyaj oncatca miyec sacatl niman ompa onosehuijquej canaj macujli mil tlacamej, niman on sihuamej xtlapohualtij inhuan.

11 Quemaj Jesús ocontilan on pan niman, ijcuac yoquimacac tlaxtlahuijli Dios, oquinmacac on inomachtijcahuan, niman on nomachtijquej oquinx-exelohuilijquej nochimej on yejhuan ompa yejyehuaticatcay. Sa no ijqui oquichiu ica on michimej niman nochimej yejhuatej oquimajxilij san quech quinequiyaj. **12** Ijcuac yoixhuiquej, Jesús oquimijlij on inomachtijcahuan:

—Xsentlalican nochi on tlen onocau para ma ca itlaj ma ixpolihui.

13 Ijcon, tej, oquisentlalijquej on tlatlajcotzitzintin tlen onocau itech on macujli pan tlachijchiutin ican cebada niman oquitemiltiquej majtlactli huan ome chiquiutin. **14** Quemaj ijcuac on tlacamej oquitaquej on milagro yejhuan Jesús oquichiu, oquijtojquej:

—Mela huac in yejhua tiotlajtojquetl on yejhuan ye oncatca para hualasquia ipan in tlalticpactli.

15 Quemaj Jesús oquimat ica quinequiyaj quitehuilanasquej para quitlaisquej inrey. Yejhua ica ocsejpa onejcuani niman iselti oyaj ne ipan on tepetl.

Jesús onejnen ipan mar

(Mt. 14:22-27; Mr. 6:45-52)

16 Ijcuac ohuajtlayohuac on inomachtijcahuan Jesús otimotoj ne itech mar. **17** Niman otleycoquej ipan se barco niman opeu quipanahuiyaj on mar para ajsisquej ne Capernaum. Ye tlayohua catca niman Jesús oc* xe huajnocuepaya intech. **18** Niman opeu chicahuac ajaca, niman tejmotij coxoniya on mar. **19** Niman ijcuac yoquinejnenquej macujli noso chicuasen kilómetros, oquitaquej Jesús nejnentiu ipan on atl niman ye quinisihuijtiaya on barco. Niman yejhuatej onomojtijquej. **20** Pero yejhua oquimijlij:

—¡Nejhua niJesús, ma ca xmomojtican!

21 Ijcuacon yejhuatej ican pactli oquiselijquej ne ipan barco, niman nimantzin sa oquitaquej yoajsiquej ne ipan on tlajli campa yayaj.

On tlacamej oquitejtemojquej Jesús

22 Ijcuac huajmostla, on tlacamej yejhuan onocajcaj ipan on ocse itenco on mar oquimatquej ica on nomachtijquej oyajquej ipan on san ica nochí barco ompa nemiya, niman ica Jesús xinhuan oyaj. **23** Pero saniman oyejcoquej sequimej barcos yejhuan ohualejquej ipan on hueyican itoca Tiberias. Yejhuatej oyejcoquej ne campa nisiu ocuajquej on pan ijcuac on toTeco oquimacac tlaxtlahuijli Dios. **24** Niman ijcuac on tlacamej oquitaquej ica xompa nemiya Jesús nion inomachtijcahuan, ocalaquej ipan on barcos niman oyajquej oquitejtemotoj ne Capernaum.

Jesús sa no yejhua pan yejhuan quitemaca nemilistli para nochipa

25 Ijcuac on tlacamej oajsiquej ipan on ocse ilado on mar, oquinextitoj Jesús, niman oquitlajtoltijquej:

—Temachtijquetl, ¿camanon otejcoc nican?

26 Pero Jesús oquimijlij:

* **6:17** todavía; sanquen

—Ica tlen melahuac nemechijlia nemejhuamej nennechtejtemohuaj xpampa onencajsicamatquej tlen quijtosnequi on milagro yejhuan onicchiu yalohua ijcuac onemechtlacuaultij, yej san pampa onentlacuajquej hasta campa onemixhuiquej. ²⁷ Ma ca xtequitican ica on tlacuajli yejhuan saniman tlami, yej xtequitican ica on tlacuajli yejhuan quisa itech Dios yejhuan quitemaca nemilistli para nochipa. Nejhua yejhuan oninochiu Tlacatl mechmacas yejhua in tlacuajli pampa toTajtzin oquipantlatij ica nicipia on tlanahuatijli para ijquin nicchihuas.

²⁸ Quemaj oquitlajtoltijquej:

—¿Tlinon nonequi ticchihuasquej para tictequitisquej on tlajtlamach† yejhuan Dios quinequi ma ticchihuacan?

²⁹ Niman Jesús oquimijlij:

—On tlen Dios quinequi xchihuacan sa no yejhua in: Xnechneltocacan nejhua yejhuan onechajtitlan.

³⁰ Niman quemaj ijquin oquitlajtoltijquej:

—¿Tlen tlamajhuisojli titechititis para ma tiquitacan niman timitzneltocasquej? ¿Tlinon, tej, ticchihuas? ³¹ On Yectlajcuilojli quijtohua ica ne tlapatlaco on toachtojtajhuan ocuajquej on tlen itoca maná. Ijquin, tej, quijtohua on Yectlajcuilojli: “Dios oquintlacuaultij ica on pan yejhuan ne ilhuicac hualejticaj.”

³² Jesús oquimijlij:

—Ica tlen melahuac nemechijlia: Moisés xejhua oquitemacac on pan yejhuan ilhuicac hualejticaj. Yej noTajtzin yejhua quitemaca on pan yejhuan melahuac ne ilhuicac hualejticaj. ³³ Yejhua on pan yejhuan Dios quitemaca sa no yejhua on pan yejhuan ohuajtemoc ne ilhuicac niman quinmaca yencuic nemilistli on tlalticpactlacamej.

³⁴ Quemaj oquijlijquej:

—ToTeco, nochipa xtechmaca yejhua in pan.

³⁵ Niman Jesús oquimijlij:

—Nejhua nipan yejhuan quitemaca yencuic nemilistli. Yejhuan notech huajlau xqueman apismquis, niman yejhuan nechneltocas xqueman am quis. ³⁶ Pero quen nejhua yonemechijlij, nemejhuamej xnennechnechtocaj masqui yonennechitaquej. ³⁷ Nochimej on quech nechinmacas noTajtzin huajlasquej notech, niman on yejhuan huajlasquej notech niquinselis. ³⁸ Ijquin nicchihuas pampa nejhua onihualeu ne ilhuicac xpara nicchihuas tlen nejhua nicnequi, yej para nicchihuas on tlen quinequi on yejhuan onechajtitlan. ³⁹ Niman noTajtzin yejhuan onechajtitlan xquinequi nicpolos nion se on yejhuan yejhua onechmacac, yej ipan on sa ica noch tonajli ma niquinyoliti niman ma niquimquetzehua ipan intlalcon. ⁴⁰ Yejhua quinequi para nochimej on yejhuan quimatij aquinon nejhua yejhuan niiConeu Dios niman nechneltocaj, ma quipiacan nemilistli para nochipa. Niman nejhua niquinyolitis niman niquimquetzehuas ipan intlalcon ipan on sa ica noch tonajli.

⁴¹ On hebreos opejquej tlahueltlajtohuaj pampa Jesús ijquin oquijtoj: “Nejhua niyejhua on pan yejhuan ne ilhuicac hualejticaj.”

⁴² Niman oquijtojquej:

—¿Manin in xejhua Jesús, on iconeu José? Tejhuatej tiquixmatij itaj niman inan. Yejhua ica ¿quen ijqui, tej, aman quijtohua ica hualejticaj ne ilhuicac?

⁴³ Quemaj Jesús oquimijlij:

—Ma ca sa xtlahueltlajtotiacan. ⁴⁴ Xacaj hueli notech huajlau tla xquinotza noTajzin. Niman nejhua nicyolitis niman niquetztehuas ipan itlalcon ipan on sa ica noch i tonajli. ⁴⁵ Ipan intlajcuilolamahuas on tiotlajtojquej ijquin quijtohua: “Dios quinmachtis nochimej.” Ijcon, tej, nochimej yejhuan quitenciaquij toTajzin niman quiseliaj on tlen yejhua quinmachtia, notech huajlahuij. ⁴⁶ Xacaj oquitac on toTajzin, yej san nejhua yejhuan itech onihualeu oniquitac yejhua. ⁴⁷ Ica tlen melahuac nemechijlia, ica on yejhuan nechneltoca quipia on nemilistli yejhuan para nochipa. ⁴⁸ Nejhua niyejhua on pan yejhuan quitemaca on yencuic nemilistli yejhuan para nochipa. ⁴⁹ On nemoachtojtajhuan ocuajquej yejhua on maná ne campa tlapatlaco. Xonenquej para nochipa, yej omiquej. ⁵⁰ Pero on yejhuan quicuasquej on pan yejhuan ne ilhuicac hualejticaj xmiquisquej. ⁵¹ Nejhua niyejhua on pan yejhuan quitemaca nemilistli niman yejhuan ne ilhuicac ohualeu. Yejhuan quicuas yejhua in pan nemis para nochipa. On pan yejhuan nejhua nicmacas sa no yejhua nonacayo yejhuan nicuentlalis para on tlalticpactlacamej huelisquej nemisquej para nochipa.

⁵² Quemaj on hebreos opejquej sa no yejhamej nocamahuisojquij. Quijtohuayaj:

—¿Quen ijqui, tej, huelis sa no inacayo techcualtis?

⁵³ Jesús oquimijlij:

—Nejhua yejhuan onochiu Tlacatl ica tlen melahuac nemechijlia, tla nemejhuamej xnenquicuaj nonacayo niman xnenconij noyesyo, xnenne- misquej para nochipa. ⁵⁴ Yejhuan quicua nonacayo niman coni noyesyo quipia nemilistli para nochipa, niman nejhua nicyolitis niman niquetztehuas ipan itlalcon ipan on sa ica noch i tonajli. ⁵⁵ Ijcon nochihuas pampa nonacayo yejhua melahuac tlacuajli, niman noyesyo yejhua melahuac atlilikstli. ⁵⁶ Yejhuan quicua nonacayo niman coni noyesyo nemis san secan nohuan, niman nejhua no ninemis san secan ihuan. ⁵⁷ ToTajzin yejhuan onechajtitlan quipia nemilistli, niman nejhua itechcopa ninemi. Niman no ijqui, tej, yejhuan nechcuas san notechcopa nemis para nochipa. ⁵⁸ Nejhua nidan yejhuan ne ilhuicac ohualeu. Yejhua in pan xijqui quen yejhua on maná yejhuan ocuajquej nemoachtojtajhuan niman omiquej. Yejhuan quicuas in pan yejhuan nictenehua, nemis para nochipa.

⁵⁹ Jesús oquitemachtij yejhua in tlajtlamach ne ipan on tiopan yejhuan oncaj ne Capernaum.

Jesús quipia on tlajtojli yejhuan quitemaca nemilistli yejhuan para nochipa

⁶⁰ Ijcuac miyequej inomachtijcahuas ijcon ocacquej, oquijtojquej:

—Yejhua in tlen quijtohua sanoyej‡ ohuiticaj§ para ticselisquej. ¿Aquinon huelis quiselis in temachtijli?

⁶¹ Jesús oquimat ipan iyojlo ica xpacatlajtlajtohuayaj yejhua ica on, niman oquintlajtoltij:

—¿Mechtlahuelcuitia on yejhuan oniquijto? ⁶² ¿Tlinon nenquinemilisquiaj tla nennechitasquiaj nejhua yejhuan oninochiu Tlacatl nitlejcohua ne campa achtoj ninemiya? ⁶³ Ialma se tlacatl yejhua quimaca nemilistli itlalnacayo. Itlalnacayo xitlaj* quijtosnequi tla quipolohua ialma. On notlajtol yejhuan yonemechijlij mechmaca nemilistli para nochipa ijcon quen ialma se tlacatl quimaca nemilistli itlalnacayo. ⁶⁴ Pero nemotzajlan oc† nemij sequimej on yejhuan xe tlaneltocaj.

‡ **6:60** muy § **6:60** difícil * **6:63** nada; coxtla † **6:64** todavía; sanquen

Jesús, tej, ye quimatzticatca aquinamej on yejhuan xtlaneltocayaj, niman aquinon on yejhuan quitemactilis. ⁶⁵ Niman oquijtoj:

—Yejhua ica in onemechijlij ica xacaj huelis notech huajlas, tla toTajzin xquitlalia ipan iyojlo para ma huajla.

⁶⁶ Desde ijcuacon opeu miyequej on yejhuan cuicatinemiyaj onocuepquej, niman xoc ihuan oquistinenquej. ⁶⁷ Yejhua ica Jesús oquintlajtoltij on majtlactli huan ome inomachtijcahuau:

—¿Nemejhuamej no nenquinequij nennechtalcahuisquej?

⁶⁸ Pero Simón Pedro oquijlij:

—NoTeco, ¿aquinon huelis itech tiasquej? San on motlajtoltzin yejhuan tiquijtohua yejhua quitemaca nemilistli yejhuan para nochipa. ⁶⁹ Niman aman tejhuamej yoticneltocaquej niman ye ticmatztoquej ica tejhua tiCristo, tiiConeu Dios yejhuan nochipa nemi.

⁷⁰ Jesús oquimijlij:

—Masqui onemechtlapejpenij nemejhuamej majtlactli huan ome, nemotzajlan nemi se yejhuan quitequipanohua on diablo.

⁷¹ Ijcuac Jesús ijcon oquijtoj, quitenejticatca Judas Iscariote, iconue Simón, pampa Judas quitemactilisquia masqui yejhua tlapohuajli intech on majtlactli huan ome nomachtijquej.

7

Icnihuan Jesús no xquineltocayaj

¹ Ijcuac in yonochiu, Jesús quistinemiyia ne Galilea. Xquinequiya quistinemis ne Judea pampa ompa itlayecancahuau on hebreos quinequiyyaj quimictisquej. ² Inlhui on hebreos itoca tabernáculos ye nísiu catca ³ niman icnihuan oquijlijquej:

—Ma ca nican xmocahua. Xhuiya ne Judea para on monomachtijcahuau yejhuan ompa nemij no ma quitacan on milagros yejhuan tictenehua ticchihua. ⁴ Tej, on yejhuan quinequi ma cuajli quixmatican xquichtacachihua on tlajtlamach* yejhuan quichihua. Niman pampa tictenehua ica ticchihua in quen in tlajtlamach, xchihua ixpan nochi tlacatl.

⁵ On icnihuan ijcon oquijlijquej pampa nion yejhuatej xquineltocayaj.

⁶ Quemaj Jesús oquimijlij:

—Oc† xe yejco on tonajli para nias, pero para nemejhuamej san catlejhua tonajli cuajli para nenyasquej. ⁷ On tlalticpactlacamej xhuelis itlaj ica mechtlahuelitasquej nemejhuamej. Pero nejhua quemaj nechtlahuelitaj pampa niquinmixcomaca nochi on tlen tlajtlamach xcuajli quichihuaj. ⁸ Xhuiyan nemejhuamej ne ipan on ilhuitl. Nejhua xe niau pampa oc xe ajsi on tonajli para nias.

⁹ Niman ijcuac ijcon oquimijlij, onocau ne Galilea.

Jesús oyaj ne ipan on ilhuitl itoca tabernáculos

¹⁰ Saquin ijcuac yoyajquej icnihuan, yejhua no oyaj ne ipan on ilhuitl. Pero xoyaj teixpan, yej san ichtaca‡. ¹¹ Itlayecancahuau on hebreos quitejtemohuayaj ne campa ilhuitl, niman quijtohuayaj:

—¿Manin canon nemi yejhua on tlacatl?

¹² Niman intzajlan on tlacamej miyequej tlajtlajtohuayaj. Sequimej quijtohuayaj: “Yejhua se cuajli tlacatl.” Pero ocsequimej quijtohuayaj: “Ca. Xcuajli tlacatl pampa quincajayahua on tlacamej.” ¹³ Pero xacaj teixpan ica tlajtlajtohuaya pampa quinmacajsiyaj itlayecancahuau on hebreos.

* ^{7:4} cosas † ^{7:6} todavía; sanquen ‡ ^{7:10} en secreto

¹⁴ Yejhua on ilhuitl ye tlajcotipan yaya ijcuac Jesús ocalac ne ipan on hueyi tiopan, niman opeu temachtia. ¹⁵ Niman itlayecancahuan on hebreos tlamojcaitayaj, niman quijtohuayaj:

—¿Quen quimati yejhua in miyec tlajtlamach, niman xonomachtij?

¹⁶ Jesús oquimijlij:

—Notemachtil xnoyaxca§. Onicselij itech on yejhuan onechajtitlan. ¹⁷ Tla yacaj quipia iyojlo para quichihuas on tlen Dios quinequi, huelis quimatis tla notemachtil hualehua itech Dios noso tla san nitemachtia on tlen nicnemilia.

¹⁸ On yejhuan tlajtlajtohua san on tlen yejhua quinemilia, quichihua san para on tlacamej ma cueyilican. Pero on yejhuan quichihua canica para yej ma quihueyilican on yejhuan otehuajtitlan, on yejhua quijtohuia tlen melahuac niman xqueman tlacajcayahua.

¹⁹ Masqui Moisés omechmacac on tlanahuatijli, nion semej nemejhuamej xnenquitlacamatij on tlanahuatijli. Yejhua ica, ¿tlica* nenquinequij nennechmictisquej?

²⁰ On tlacamej oquinanquilijquej:

—Mojtic nemí se xcuajli espíritu. ¿Aquinon quinequi mitzmictis?

²¹ Jesús oquimijlij:

—San ica on se tequitl onicchiu ipan on tonajli ijcuac on hebreos nosehuiaj niman nemochimej† nentlamojcaitaj. ²² Moisés omechnahuatij xtlalican on nescayotl itoca circuncisión ipan nemoquichcone huan. Moisés xejhuela oquipehualtij, yej on iachtojtajhuan. Yejhua ica nenquitlaliaj on nescayotl ipan se oquichconetl niman nenquichihuaj masqui ipan on nese huitlonajli.

²³ Tla nenquitlaliaj on nescayotl ipan se oquichconetl ipan on tonajli ijcuac on hebreos nosehuiaj para nenquitlacamatij itlanahuatil Moisés, tla ijcon ¿tlica nennechtlahuelitaj ica onicpajtilij nochitlalnacayo se tlacatl ipan on tonajli? ²⁴ Ma ca xtetlajtlacolmacakan san isijcapan. Yej san xtetlajtlacolmacakan yacaj tla melahuac nenquimati ica oquichiu tlen xcuajli.

Jesús oquijtoj canon ohualeu

²⁵ Sequimej yejhuan chantiyaj ne Jerusalén opeu quinotlajtoltiaj:

—¿Tlen xejhuela in quitejtemojtinemij para quimictisquej? ²⁶ Aman, tej, nican tlajtlajtojticaj teixpan, niman xacaj itlaj quijlia. ¿Manin on tequihuajquej melahuac quineltocaj ica in tlacatl yejhua Cristo yejhuan Dios oquitlalij para tlanahuatiquetl yes? ²⁷ Pero xejhuela Cristo pampa tejhuamej ticmatztoquej canon ohualeu. Ijcuac huajlas Cristo, xacaj quimatis canon hualehuas.

²⁸ Ijcuac Jesús ijcon ocac, chica temachtijtcatca ne ipan on hueyi tiopan, ican chicahuac tlajtojli oquijtoj:

—¿Melahuac nennechixmatij niman nenquimatztoquej canon nihualehuas? Nejhua xonihuajlaj san pampa nejhua onicnec, yej onihuajlaj pampa onechajtitlan on yejhuan melahuac. Niman nemejhuamej xnenquixmatij.

²⁹ Pero nejhua quemaj niquixmati pampa itech nihualehuas, niman yejhua onechajtitlan.

³⁰ Quemaj quinequiyaj cajsiscuaj, pero xacaj ocajsic pampa oc‡ xe ajsiya on tonajli para yejhua in nochihuas. ³¹ Pero miyequej oquineltocaquej, niman oquijtoquej:

—Ticneltocaj ica in tlacatl yejhua Cristo pampa xacaj huelis huajlas yejhuan quichihuas más milagros quen yejhua in tlacatl.

§ ^{7:16} no me pertenece; xnoaxca, xnohuaxca, xnotlatqui * ^{7:19} ¿por qué?; ¿tline? † ^{7:21} todos ustedes; nannochti, yemochimej, anochimej, innochimej, emmochimej ‡ ^{7:30} todavía; sanquen

On fariseos oquintitlanquej policías para ma cajsican Jesús

³² On fariseos ocacquej tlinon quijtohuayaj ica Jesús, niman yejhua ica yejhuamej inhuan intlayecancahuan on tiopixquej oquintitlanquej on policías yejhuan tequitij ne ipan on tiopan para cajsiscquiaj. ³³ Niman Jesús oquijto:

—San quesqui tonaltin nemohuan ninemis, niman quemaj nias itech on yejhuan onechajtitlan. ³⁴ Nemejhuamej nennechtejtemosquej pero xnenechnextisquej, pampa xhuelis nenyasquej ne campa nejhua ninemis.

³⁵ Quemaj on hebreos opeu sa no yejhuamej quinotlajtoltiayaj:

—¿Canon, tej, yas campa xhuelis ticonextisquej? ¿Manin yas intech on hebreos yejhuan chajchayajcachantij§ intzajlan on griegos niman comimachtis on griegos? ³⁶ ¿Tlinon quijtosnequi on ica otechijlij: “Nennechtejtemosquej pero xnenechnextisquej”, niman “Xhuelis nenyasquej ne campa nejhua ninemis”?

Jesús oquiteneu on atl yejhuan tepan nochihuas ameyajli

³⁷ On sa ica nochitonaljli ipan on ilhuitl yejhua más hueyi quitosnequi. Ipan on tonajli Jesú onotelquetz niman ican chicahuac tlajtojli oquijto:

—Tla yacaj amiqui, ma huajla notech niman ma atl. ³⁸ On Yectlajcuilojli quijtohuia ica yejhuan nechneltocas, ipan iyojlo ameyas se atl yejhuan quimacas nemilistli para nochipa. Niman on atl miyec yes quen itlaj atentli.

³⁹ Yejhua in Jesús oquijto ica on Espíritu Santo yejhuan quiselisquej on yejhuan quineltocasquej. Ipan on tonaltin oc* xe huajlaya on Espíritu Santo, pampa Jesús oc xe tlejcohuaya ne ilhuicac para quiselis hueyilistli.

On tlacamej onotlajcoxelojquej

⁴⁰ Sequimej yejhuan nemiyaj intzajlan on tlacamej, ijcuac ijcon ocacquej, oquijtoquej:

—Tlacaj melahuac, in tlacatl yejhua tiotlajtojquetl yejhuan ica oncatca para huajlas.

⁴¹ Niman sequimej quijtohuayaj:

—Yejhua in yejhua Cristo yejhuan Dios oquitlalij para tlanahuatiquetl yes.

Pero ocsequimej oquijtoquej:

—Yejhua in xejhua Cristo pampa Cristo xhualehuas Galilea. ⁴² On Yectlajcuilojli quijtohuia ica Cristo ica oncaj huejca teixhui† yes itech rey David niman ica tlacatis ne Belén sa no ipan on pueblo campa onen David.

⁴³ Yejhua ica on tlacamej onotlajcoxelojquej ipampa Jesús. ⁴⁴ Sequimej quinequiyaj cajsiscquiaj, pero xacaj oquimayau.

On hebreos yejhuan tequihuajquej xoquineltocaquej Jesús

⁴⁵ On policías yejhuan quitlajpiaj on tiopan onocuepquej ne campa nemiyaj on fariseos niman intlayecancahuan on tiopixquej. Quemaj ijquin oquintlajtoltiquej on policías:

—¿Tlica‡ xonencuajhuicaquej?

⁴⁶ Niman on policías otlananquilijquej:

—¡Xqueman yacaj tlajtlajtohuaya quen tlajtlajtohuia yejhua on tlacatl!

⁴⁷ Quemaj on fariseos oquimijlijquej:

—¿Omechcrajcayau nemejhuamej no? ⁴⁸ ¿Nenquitaj yacaj totlayecancau noso se fariseo yotlaneltocac? ⁴⁹ Pero on quech tojlamej yejhuan xquimatiq itlanahuatil Moisés quiselisquej tlajtlacolmacalistli yejhuan Dios quinmacas.

§ 7:35 esparcidos * 7:39 todavía; sanquen † 7:42 descendiente ‡ 7:45 ¿por qué?; ¿tline?

⁵⁰ Nicodemo, yejhuan oquitatoya Jesús ijcuac tlayohua, niman yejhuan inhuan nopohua on fariseos, oquimijlij:

⁵¹ —Ipan totlanahuatil quijtohua ica xtihuelisquej tictlajtlacolmacasquej se tlacatl tla xachtopa ticyolcuitisquej para tcmatisquej on tlen oquichiu.

⁵² Quemaj oquijlijquej:

—¿Tejhua no tihualehua ne Galilea? Xmomachtli on Yectlajcuilojli, niman tiquitas ica ne Galilea xqueman hualehuaj tiotlajtojquej.

On sihuatl yejhuan otlacapajpatlac nemiya ixpan Jesús

⁵³ Quemaj cada se oyaj ichan,

8

¹ pero Jesús oyaj ne ipan on tepetl itoca Olivos.

² Huajmostla ijcuac ohuajtlanes, ocsejpa oyaj ne ipan on hueyi tiopan. Nochi tlacatl oquinisihuij, niman yejhua onotlalij niman opeu quinmachtia.

³ Quemaj on temachtijquej ica on tlanahuatijli niman on fariseos ocua-jhuicaquej se sihuatl yejhuan oquinextiquej ipan tlajtlacojli ihuan itlacau. Oquitlalijquej ne tlajcotian imixpan nochimej.

⁴ Niman ijquin oquijlijquej Jesús:

—Temachtijquetl, yejhua in sihuatl oticnextijquej ihuan se tlacatl ipan tlajtlacojli. ⁵ On itlanahuatil Moisés technahuatia tictemojmotlasquej niman tcmictisquej in quen in sihuatl. ¿Tejhua tej, quen tiquijtohua?

⁶ Yejhuamej ijcon oquijlijquej san para oquitlatlataquej, niman ijqui ye huelisquiaj quiteixpanhuisquiaj. Pero Jesús ohuajnopachoj niman opeu tlajcuilojua ipan tlajli ican imajpil. ⁷ Pero ica más quitlajtoltiayaj, yejhua ohuajnahuatequetz, niman oquimijlij:

—San aquinon yejhuan xqueman tlajtlacohua, yejhua achtoj ma quimotla.

⁸ Niman ocsejpa onopachoj niman otlajcuiloj ipan tlajli. ⁹ Pero ijcuac yejhuamej ijcon ocacquej, oquimatquej ica oquintlajtlacolmacac intlamachilis, niman cada se de yejhuamej oquisquej. Achtoj opejquej on yejhuan más huehuetquej. Niman ijcuac nochimej yoquisquej, Jesús iselti onocau ihuan on sihuatl yejhuan ompa onocau ne ixpan. ¹⁰ Quemaj Jesús ohuajnahuatequetz niman ica xoc yacaj oquitac yej san yejhua on sihuatl, oquijlij:

—Sihuatl, ¿canon nemij on yejhuan mitzteixpanhuiyaj? ¿Xacaj omitztlajtlacolmacac?

¹¹ Yejhua oquijlij:

—Ca, noTeco, xacaj.

Quemaj Jesús oquijlij:

—Tej, nion nejhua xnimitztlajtlacolmaca. Aman xhuiya, pero ma ca ocsejpa titlajtlacos.

Jesús quen se tlahuijli ipan in tlalticpactli

¹² Jesús ocsejpa oquinnotz on tlacamej niman oquimijlij:

—Nejhua quen se tlahuijli ipan in tlalticpactli yejhuan huelis quintlahuil-huis intlamachilis on tlalticpactlacamej para cajsicamatisquej. Yejhuan nechhuicas cajsicamatis tlajtlamach* ica Dios niman on cajsicamatilistli quimacas yencuic nemilistli.

¹³ Ijcuacon on fariseos oquijlijquej:

—Tejhua sa no moca titlajtohua, niman on tlen tiquijtohua xmelahuac.

¹⁴ Jesús oquimijlij:

* **8:12** cosas

—Tlen nejhua niquijtohua quemaj melahuac masqui sa no nejhua noca nitlajtohua, pampa nicmati canon nihualehua niman canon niau. Pero nemejhuamej xnenquimati canon nihualehua nion canon niau. ¹⁵ Nemejhuamej nentetlajtlacolmacaj quen on tlalticpactlacamej quichihuaj. Pero nejhua xacaj nictlajtlacolmaca. ¹⁶ Pero tla nitetlajtlacolmacasquia, notetlajtlacolmacalis melajqui yesquia, pampa xnoselti nitetlajtlacolmacas. NoTajtzin yejhuan onechajtitlan ihuan nitetlajtlacolmacasquia. ¹⁷ Ipan nemotlanahuatil tlajcuiolnesticaj ijcuac omemej teixpantiliuej san se tla-jitojli quijtohuaj, on tlen quijtohuaj melahuac. ¹⁸ Sa no nejhua noca ninoteix-pantilia, niman noTajtzin yejhuan onechajtitlan, no yejhua noteixpantilis.

¹⁹ Quemaj oquitlajtoltijquej:

—¿Canon nemi moTajtzin?

Jesús oquinnanquilij:

—Nemejhuamej xnennechixmatij, niman nion noTajtzin xnenquixmatij. Tla nennechixmatisquiaj, no nenquixmatisquiaj noTajtzin.

²⁰ Jesús oquijtoj in tlajtlamach chica temachtiaya ne ijtic on hueyi tiopan campa quejehuaya on huentomin. Pero xacaj ocajsic, pampa oc† xe yejcoya on tonajli para ijqui nochihuas itech.

Jesús oquijtoj ica yas ne campa ocsequimej xhuelisquej yasquej

²¹ Jesús ocsejpa oquimijlij:

—Nejhua niau, niman nemejhuamej nennechtejtemosquej, pero nemiquisquej ipan nemotlajtlacol. Tej, campa nejhua niau, nemejhuamej xhuelis nenyasquej.

²² Quemaj on hebreos oquijtojquej:

—¿Manin yej nomictis sa no yejhua? Cas quemaj, niman yejhua ica quijtohuax xhuelis tiasquej campa yejhua yas.

²³ Jesús oquimijlij:

—Nemejhuamej nenquistoquej nican ipan tlalticpactli, pero nejhua onihualeu ne ilhuicac. Nemejhuamej onenhualejquej ipan in tlalticpactli, pero nejhua xonihualeu ipan in tlalticpactli. ²⁴ Onemechijlij ica nemiquisquej ican nemotlajtlacol. Tla xnennechneltocaj ica nejhua niCristo yejhuan Dios onechtlalij para nitlamandaros, nemiquisquej ipan nemotlajtlacol.

²⁵ Quemaj oquitlajtoltijquej:

—Tej, ¿tlen aquin tejhua?

Niman Jesús oquimijlij:

—Nejhua desde ijcuac onipeu nitemachtia yonemechijlijca aquin nejhua.

²⁶ Nicpia miyec tlajtlamach tlen nemoca niquijtos niman tlen nemechtajtlacoltis. Pero noTajtzin yejhuan onechajtitlan yejhua quijtohuax tlen melahuac. Niman tlen niquijtohuax ipan in tlalticpactli on yejhua onicac itech.

²⁷ Pero yejhuamej xocajsicamatquej ica quitenehuaya on iTajtzin.

²⁸ Yejhua ica oquimijlij:

—Ijcuac nemejhuamej nennechmajmasohualtisquej‡ ipan se cojnepano-jili§, nejhua yejhuan oninochiu Tlacatl, ijcuacon nenquimatisquej aquin nejhua. Niman nenquimatisquej ica xitlaj* nicchihua yejhuan san nejhua nicnequi, yej san niquijtohuax on tlen noTajtzin yonechmachtij. ²⁹ On yejhuan onechajtitlan nohuau nemi. NoTajtzin xnoselti nechcahua, pampa nejhua nochipa nicchihua tlen yejhua cuelita.

³⁰ Ijcuac Jesús ijquin oquijtoj, miyequej oquineltocaquej.

† 8:20 todavía; sanquen ‡ 8:28 ustedes me crucificarán § 8:28 cruz * 8:28 nada; coxtla

Yejhuan tlajtlacohua yejhua tlanamactli itech on tlajtlacojli

³¹ Quemaj Jesús oquimijlij on hebreos yejhuan oquineltocaquej:

—Tla nemelajcanemisquej ipan on tlen nemechijlia, nemochihuasquej melahuac nennomachtijcahuan. ³² Nenquixmatisquej tlen melahuac, niman on tlen melahuac yejhua mechmanahuis.

³³ Yejhuamej oquijlijquej:

—Tejhuamej tiihuejcacone huan Abraham niman xqueman yacaj otechpix tlanamactin. ¿Quen ijqui, tej, tiquijtohua ica ticpiasquej temanahuilistli?

³⁴ Jesús oquimijlij:

—Ica tlen melahuac nemechijlia ica nochimej yejhuan tlajtlacohuaj, yejhuamej tlanamactin itech on tlajtlacojli. ³⁵ Sen tlanamactli xqueman tehuan tlapohuajli ipan se chanyotl†, pero se teconeu quemaj nochipa tehuan tlapohuajli ipan on chanyotl. ³⁶ Tla nejhua yejhuan niiConeu Dios nemechmanahuis, nemejhuamej melahuac nennemisquej tlamanahuiltin intech nemotlajtlacolhuan. ³⁷ Ye nicmatzticaj ica nemejhuamej nenihuejcacone huan Abraham. Pero nenquinequij nennechmictisquej, pampa xnenquiseliaj tlen nemechijlia. ³⁸ Nejhua nitlajtohua ica on tlen noTajzin nechititia, niman nemejhuamej nenquichihuaj tlen nemotaj mechijlia.

³⁹ Yejhuamej oquijlijquej:

—Tejhuamej totaj Abraham.

Pero Jesús oquimijlij:

—Tla nemejhuamej melahuac nentecone huan yesquiaj itech Abraham, nenquichihuasquiaj on tlajtlamach yejhuan oquichiu. ⁴⁰ Pero masqui nemechijlia on tlen melahuac yejhuan Dios yonechijlij, nemejhuamej nenquinequij nennechmictisquej. ¡Abraham xqueman itlaj ijcon oquichiu!

⁴¹ Nemejhuamej sa no yejhua nenquichihuaj on tlen quichhua nemotaj.

Quemaj yejhuamej oquijlijquej:

—Tejhuamej xtiteichtacacone huan. San se tajtli ticpiaj niman on yejhua Dios.

⁴² Niman Jesús oquimijlij:

—Tla melahuac Dios nemoTaj yesquia, nemejhuamej nennechtlajsojtlasquiaj‡, pampa nejhua niuhalehua itech Dios niman aman nican ninemi. Xonihuajlaj san pampa onicnec, yej onihuajlaj pampa Dios onechajtitlan.

⁴³ ¿Tlica§ xhueli nencajsicamatij on tlen nemechijlia? On pampa xnenquinequij nenquiselisquej notemachtl. ⁴⁴ Nemejhuamej nemotaj yejhua on diablo, niman nenquinequij nenquichihuasquej tlinon yejhua quinequi. On diablo desde otzimpeu in tlalticpactli temictijquetl. Xqueman quijtohua on tlen melahuac, pampa xquipia ipan iyojlo on tlen melahuac. Ijcuac quijtohua on tlen xmelahuac, san quijtohua quen nochipa nohuica, pampa yejhua tlacajcayajquetl niman yejhua intaj on yejhuan tlacajcayahuaj. ⁴⁵ Pero nejhua pampa niquijtohua on tlen melahuac, xnennechne ltocaj. ⁴⁶ ¿Aquinon de nemejhuamej huelis nechititis ica nicpia se tlajtlacojli? Niman tla niquijtohua tlen melahuac, ¿tlica xnennechne ltocaj? ⁴⁷ On yejhuan iconehuan Dios caquij on itlajtoltzin Dios. Pero nemejhuamej xneniconehuan Dios. Yejhua ica xnenquinequij nenzaquisquej.

Ijcuac Abraham otlacat, Cristo ye nemiya

⁴⁸ Quemaj on hebreos oquijlijquej:

—¿Xtiquijtohua tlen melahuac ijcuac tiquijtohua ica tejhuam tisamaritano niman mojtic huajlau on xcualji espíritu?

† **8:35** casa; cajli ‡ **8:42** me amarían § **8:43** ¿por qué?; ¿tline?

⁴⁹ Jesús oquimijlij:

—Nejhua xhuajlau notic nion se xcuajli espíritu. Yehua in nopenextia pampa nictlacaita noTajzin, pero nemejhuamej xnennechtlacaitaj.

⁵⁰ Nejhua xnictejtemohua para on tlacamej ma nechtlacaitacan. Nemi ocse yejhuan quintejtemohua tlacamej para ma nechtlacaitacan. Yehua teyolcuitia niman tetlajtlacolmaca. ⁵¹ Ica tlen melahuac nemechijlia ica on yejhuan quichihua on tlen nejhua niquijtohua, xqueman miquis.

⁵² Ijcuacon on hebreos oquijlijquej:

—Aman cuajli ticmatij ica ticpia se xcuajli espíritu. Abraham niman nochimej on tiotlajtojquej omiquej, niman tejua tiquijtohua: “Yehuan quichihua on tlen nejhua niquijtohua, xqueman miquis.” ⁵³ ¿Tla ijcon, tejua más tihueyixticaj xquen totaj Abraham yejhuan omic? Niman on tiotlajtojquej no omiquej. ¿Aquinon ticuitia timochihua tejua?

⁵⁴ Jesús oquimijlij:

—Tla sa no nejhua ninotlacaita, notlacaitalis xitlaj* quijtosnequi. Pero noTajzin quemaj nechtlacaita, on yejhuan nemejhuamej nenquijtohuaj ica nemoDios. ⁵⁵ Nemejhuamej xnenquixmatij, yej nejhua quemaj niquixmati. Tla niquijtosquia xniquixmati, tla ijcon nitlacajcayajqui yesquia no quen nemehuamej. Pero nejhua melahuac niquixmati niman nicchihua nochí on tlen yejhua quijtohua. ⁵⁶ Abraham on nemoachtojtaj opac pampa oquimat ica nihuajtlacatisquia ipan in tlalticpactli. Yehua itechcopa itlaneltoc onechitac niman yejhua ica opac.

⁵⁷ Quemaj on hebreos oquijlijquej Jesús:

—Nion ompoajli† huan matlactli xipan xe ticpia, ¿niman tiquijtohua ica otiquitac Abraham?

⁵⁸ Jesús oquimijlij:

—Ica tlen melahuac nemechijlia: ijcuac Abraham xe nemiya, nejhua ye ninemiya.

⁵⁹ Quemaj ocontilancaj temej para quimojomotlasquiaj. Pero Jesús oniyan, niman oquisteu ne ipan on hueyi tiopan.

9

Jesús oquipajtij on tlacatlyejhuan otlacat ciego

¹ Ijcuac Jesús panotiaya, oquitac se tlacatl yejhuan otlacat ciego. ² Niman on inomachtijcahuan oquitlajtoltijquej:

—Temachtijquetl, ¿tllica* otlacat ciego in tlacatl? ¿Tlen manin pampa otlajtlacojquej itajhuan, noso sa no yejhua otlajtlacoj?

³ Jesús oquimijlij:

—Otlacat ciego xpampa tla yejhua otlajtlacoj, noso itajhuan otlajtlacojquej. Yej ijcon tlacat para itech nopantlantis on tlen Dios hueli quichihua.

⁴ Nejhua nicchihuas itequiu on yejhuan onechajtitlan ipan in tonaltin. Tej, huajlau on tonaltin ijcuac xacaj huelis tequitis. ⁵ Chica ninemi ipan in tlalticpactli, niquintlamachilistia on tlacamej para cajsicamatisquej tlajtlamach† itech ica Dios.

⁶ Ijcuac ijcon yoquijtoj, ochijchac ipan tlajli, oquichijchiu achijtzin soquitl ican icualac, niman oquitlalilij ipan ixtololojhuan on ciego. ⁷ Quemaj oquijlij:

—Xhuiya xmixpajpacati ne campa naltilo itoca Siloé.

Siloé quijtosnequi “on yejhuan notitlani.”

* ^{8:54} nada; coxtla † ^{8:57} Ompoajli quitosnequi cuarenta, niman ompoajli huan matlactli quitosnequi cincuenta. * ^{9:2} ¿por qué?; ¿tline? † ^{9:5} cosas

Yejhua ica on ciego oyaj niman onixpajpac, niman ijcuac ohuajnocuepato ye hueliya tlachaya. ⁸ Quemaj inisiuchantlacaj[‡] niman on yejhuan quix-matiyaj ica ciego catca oquijtojquej:

—¿Tlen yejhua in tlacatl xejhua on yejhuan notlajtlanechicohuiliaya?

⁹ Sequimej quijtohuayaj:

—Quemaj, yejhua.

Ocsequimej quijtohuayaj:

—Ca, xejhua, pero ijqui tlajtlachasnequi.

Pero sa no yejhua quijtohuaya:

—Quemaj, melahuac nejhua.

¹⁰ Quemaj oquitlajtoltijquej:

—¿Quen ijqui, tej, onochiu ica aman hueli titlacha?

¹¹ Yejhua oquimijlij:

—Yejhua on tlacatl yejhuan itoca Jesús oquichijchiu soquitl niman onecht-lalilij ipan nixtololojhuan. Quemaj onechijlij: “Xhuiya ne campa naltilo itoca Siloé niman xmixpajpaca.” Oniaj, tej, niman ijcuac oninixpajpac, ohuel onitlachix.

¹² Quemaj oquitlajtoltijquej:

—¿Canon nemí on tlacatl?

Yejhua oquimijlij:

—Xnicmati.

On fariseos oquiyolcuitijquej on ciego yejhuan opajtic

¹³ Quemaj on yejhuan ciego catca ocuicaquej intech on fariseos. ¹⁴ Ijcuac Jesús oquichijchiu on soquitl niman oquixtlapoipan ciego, on tonajli catca ijcuac on hebreos nosehuiayaj. ¹⁵ On fariseos oquitlajtoltijquej on tlacatl ica quen ijqui aman hueli tlachaya. Yejhua oquimijlij:

—Onechtlalilij soquitl ipan nixtololojhuan, niman oninixpajpac, niman aman nitlacha.

¹⁶ Quemaj sequimej fariseos oquijtojquej:

—On tlacatl ica ijcon oquichiu xhualehua itech Dios, pampa xquitlacamati on tlanahuatijiyejhuan technahuatia para ma ca ma titequitican ipan on tonajli ijcuac titosehuiayaj yejhuan tihebreos.

Pero ocsequimej quijtohuayaj:

—¿Quen ijqui huelisquia quinchihuasquia in huejhueyi milagros tla yejhua tlajtlacolej yesquia?

Niman ijquin onotlajcoxelojquej. ¹⁷ Quemaj ocsejpa oquitlajtoltijquej on yejhuan ciego catca:

—Niman tejhua, ¿tlilon tiquijtohua ica on tlacatl yejhuan omitzimpajtilij mixtololojhuan?

Niman yejhua oquijtoj:

—Nejhua niquijtohua ica yejhua se tiotlajtojquetl.

¹⁸ Pero itlayecancahuan on hebreos xquinequiyaj quineltocasquej ica yejhua ciego catca niman ica aman hueliya tlacha, hasta oquinnotzquej itajhuan on yejhuan opajtic, ¹⁹ niman oquintlajtoltijquej:

—¿In yejhua nemotelpoch yejhuan nenquijtohuaj ciego otlacat? ¿Quen ijqui, tej, aman hueli tlacha?

²⁰ On itajhuan oquijtojquej:

[‡] 9:8 vecinos de él

—Ticmatij ica in yejhua totelpoch niman ica ciego otlacat. ²¹ Pero xticmatij quen ijqui aman hueli tlacha, nion xticmatij aquinon oquimpajtilij ixtololojhan. Yejhua xtlajtoltican. Yejhua xoc conetl niman sa no yejhua huelis mechijlis quen ijqui opajtic.

²² On itlayecancahuan hebreos yonotlajtolmacacaj para cuajquixtisquej ne tiopan san aquinon yejhuan quiteixpantilis ica Jesús yejhua Cristo. Yejhua ica ijcon oquijtojquej on itajhuan pampa quinmacajsiyaj itlayecancahuan on hebreos. ²³ Yejhua ica itajhuan oquijtojquej: “Yejhua xtlajtoltican. Yejhua xoc conetl.”

²⁴ Quemaj on hebreos ocsejpa oquinotzquej on tlacatl yejhuan ciego catca, niman oquijlijquej:

—Xtechijli ixpan Dios tlen melahuac. Tejhuamej ticmatztoquej ica on tlacatl tlajtlacolej.

²⁵ Ijcuacon yejhua oquimijlij:

—Nejhua xnicmati tla yejhua tlajtlacolej noso ca. Yej tlinon nejhua nicmatzticaj, niciego catca niman aman nitlacha.

²⁶ Niman ocsejpa oquitlajtoltijquej:

—¿Tlinon omitzchihuilij? ¿Quen ijqui oquichiu para omitzimpajtilij mixtololojhan?

²⁷ Oquimijlij:

—Yonemechijlij niman xnennechneltoquiliaj. ²⁸ ¿Tlica§ ocsejpa nenquinequij ma nemechijli? ¿Tlen no nenquinequij neninomachtijcahuan yesquej?

²⁸ Quemaj ocajhuaquej, niman oquijlijquej:

—Tejhua tiinomachtijcau yejhua on tlacatl, pero tejhuamej tiinomachtijcahuan Moisés. ²⁹ Tejhuamej ticmatztoquej ica Dios oquinotz Moisés, pero yejhua on tlacatl, nion achijtzin xticmatij canon hualehua.

³⁰ On tlacatl ijcuacon oquimijlij:

—¡Yejhua in nechtlatlachaltia ica nemejhuamej xnenquimati canon hualehua niman nejhua onechimpajtilij nixtololojhan! ³¹ Cuajli ticmatztoquej ica Dios xquincaqui on tlajtlacolejquej, yej san quincaqui on yejhuan quitlacaítaj niman quichihuaj on tlen yejhua quinequi. ³² Xqueman oticaquej tla yacaj quimpajtilia ixtololojhan se tlacatl yejhuan otlacat ciego. ³³ Tla yejhua in tlacatl xhualehuasquia itech Dios, xhuelisquia itlaj quichihuasquia.

³⁴ Quemaj oquijlijquej:

—Tejhua yejhuan otitlacat tenticaj ican tlajtlacojli, ¿ticnemilia yej tejhuamitechmachtis?

Niman ocuajquixtijkej ipan on tiopan.

Jesús otlajtlatoj ica on yejhuan coxcatzitzintin impan intlamachilis

³⁵ Jesús oquimat ica on yejhuan ciego catca ocuajquixtijkej ne ipan on tiopan. Niman ijcuac oquinamic, oquijlij:

—¿Ticneltoca iConetzin Dios?

³⁶ On tlacatl oquijlij:

—Señor, xnechijli aquinonon para huelis nicneltocas.

³⁷ Jesús oquijlij:

—Yotiquitaca, niman sa no nejhua yejhuan ihuan titlajtojticaj.

³⁸ Quemaj on tlacatl onotlacuenquetz ixpan Jesús, niman oquijlij:

—NoTeco, nimitzneloca.

³⁹ Quemaj oquijtoj Jesús:

—Nejhua onihuajlaj ipan in tlalticpactli para niquintlaxtlahuilis on tla-camej quen nonequi quiselisquej. On yejhuan xhuelij cajsicamatij on tlajtlamach ica Dios, yejhuamej niquimpalehuis para huelis cajsicamatiquej. Niman on yejhuan notenehuaj cajsicamatij, masqui xnejli, xniqumimpalehuis para ma cajsicamatican. Ijcon tej, yejhuamej quen ciegos impan intlamachilis pampa xcajsicamatij on tlajtlamach itech ica Dios.

⁴⁰ Quemaj sequimej fariseos yejhuan ompa ihuan nemiyaj, ijcuac ijcon ocacquej, oquitlajtoltijquej:

—¿Tiquitosnequi ica tejhuamej quen ticiegos impan totlamachilis niman yejhua ica xticajsicamatij on tlajtlamach itech ica Dios?

⁴¹ Jesús oquimijlij:

—Tla xnencajsicamatisquiaj, xnenquipiasquiaj tlajtlacojli. Pero pampa nenquijtohuaj ica nencajsicamatij, on tlajtlacojli nemopan oncaj.

10

Jesús oquixtij se ejemplo itech se corral

¹ Ica tlen melahuac nemechijlia, on yejhuan xcalaquis ipan itlatzacuilyou* on corral campa nemij borregos, yej calaquis san canon, yejhua tlachtequetl.

² Pero on yejhuan calaquis ipan on tlatzacuilyotl, yejhua tlajpixqui ica on borregos. ³ Se tlacatl quitlapohulia on tlatzacuilyotl para ma calaqui on tlajpixqui. Quemaj on borregos yejhuan iyaxcahuan† quitencaquij ijcuac quintocayotia. Quemaj quinquixtia. ⁴ Niman quemaj ijcuac yoquinhuajquixtij nochimej iborregos, nejnemi inyecapan, niman on borregos quicuit-lapanhuaj pampa quitencaquij itlajtol. ⁵ Pero yejhuan xquixmatij xquicuit-lapanhuaj, yej ontlatlacsaj‡ pampa xquitencaquij on yejhuan xquixmatij.

⁶ Jesús oquintlalilij yejhua in ejemplo, pero yejhuamej xocajsicamatquej tlinon quinequiya quimijlis.

Jesús yejhua cuajli tlajpixqui

⁷ Yejhua ica Jesús ocsejpa oquimijlij:

—Ica tlen melahuac nemechijlia: nejhua nitlatzacuilyotl§ campa calaqui on borreguitos. ⁸ Nochimej yejhuan achtoj de nejhua ohualajquej tlachtequej, pero on borregos xoquitencaquej. ⁹ Nejhua nitlatzacuilyotl. Yejhuan notechcopa calaquis, nomaquixtis. Niman yejhua yes quen on se borrego yejhuan calaqui niman quisa ipan on corral niman quinextia tlen quicua. ¹⁰ On tlachtequetl huajlau san para tlachtequi, temictia niman tlaxoxotonía. Pero nejhua onihuajlaj para quipiasquej nemilistli, niman ipan innemilis nochí cuajli quisas.

¹¹ 'Nejhua nicuajli tlajpixqui. On cuajli tlajpixqui quitemaca inemilis im-pampa on borregos. ¹² Pero on yejhuan tequiti san pampa quitlaxtlahuiliaj, ijcuac quita huajlau on yolqui lobo, quincahua on borregos niman cholojte-hua, pampa yejhua xtlajpixqui niman on borregos xiyaxcahuan. Quemaj on yolquej quinmarsi on borregos niman quinchajchayahuaj. ¹³ Yejhua in tlacatl cholojtehua pampa tequiti san ica quitlaxtlahuiliaj, niman para yejhua xitlaj quijtosnequi on borregos. ¹⁴⁻¹⁵ Nejhua nicuajli tlajpixqui. Ijcon quen noTajzin nechixmati niman nejhua niquixmati, no ijqui niquinmixmati noborregos, niman yejhuamej no nechixmatij. Niman impampa on noborregos nictemaca nonemilis. ¹⁶ No niquimpia ocsequimej borregos yejhuan xtlapohualti ipan in corral. No ica oncaj niquinhuajhucas. Yejhuan cuajli

* **10:1** puerta † **10:3** le pertenecen; iaxcahuan, ihuaxcahuan, itlatquihuan ‡ **10:5** huyan de él § **10:7** yo soy la puerta

quitencaquisquej notlajtol niman nechtlacamatisquej. Ijcon, tej, san secan nemisquej niman no san se tlapixqui nemis.

¹⁷NoTajtzin nechtlajsojtla* pampa nictemaca nonemilis para noborregos. Niman quemaj ocsejpa ninoyolihuitis†. ¹⁸Xacaj nechcuilia nonemilis, yej nejhua nictemaca ican cuajli noyojlo. Nihueli nictemacas nonemilis, niman no nihueli ocsejpa ninoyolitis. Ijcon noTajtzin onechnahuatij para nicchihuas.

¹⁹Ijcuac on hebreos ocacquej on tlajtoltin, ocsejpa xoquipixquej san se inyojlo. ²⁰Miyequej yejhuamej quijtohuayaj:

—¿Tlica‡ nenquicaquij in tlacatl? Yejhua quipia se xcuajli espíritu niman loco.

²¹Pero ocsequimej quijtohuayaj:

—Xacaj yejhuau quipia se xcuajli espíritu hueli ijcon tlajtohua. ¿Tlen hueli se xcuajli espíritu quimpajtia imixtololojhuau on coxcatzitzintin?

On hebreos xoquiselijquej Jesús

²²Niman ne Jerusalén quipanoticatcaj on ilhuitl yejhuau nochihuaya para quimelnamictia on tlacamej ijcuac on tiopan yencuic catca. Ijcuacon invierno ijcuac sehua catca. ²³Jesús quistinemiya ne ipan on icorredor on hueyi tiopan itoca Icorredor Salomón. ²⁴Niman on hebreos oquiteyehualo-jquej, niman oquijlijquej:

—¿Hasta quemanon titechometlamachilispias? Tla tejhuau tiCristo, amantzin cuajli xtechijli.

²⁵Jesús oquimijlij:

—Yonemechijlij niman xonennechneltocajquej. On tlajtlamach§ yejhuau nicchihua ipan itocatzin noTajtzin nechtexpantiaj aquin nejhua. ²⁶Pero nemejhuamej xnennechneltocaj pampa xnentejhuamej nentlapohualtin in-tech on noborregos. ²⁷Noborregos nechtencaquij, niman nejhua niquim-ixmati niman nechcuitapanhuaj. ²⁸Nejhua niquinmaca on nemilistli yejhuan para nochipa, niman yejhuamej xqueman miquisquej, niman xacaj huelis nechincuijcivilis. ²⁹NoTajtzin yejhuau onechinmacac noborregos, yejhua más hueyi xquen yacaj ocse. Yejhua ica xacaj huelis quintecuilis itech.

³⁰Nejhua niman noTajtzin san se tinemij.

³¹Quemaj on hebreos ocsejpa ocontilanquej temej para quimojmot-lasquiaj. ³²Niman Jesús oquimijlij:

—Nemixpan yonicchiu miyec tlajtlamach tlen cuajli itechcopia ipoder noTajtzin. ¿Catlejhua de in tlajtlamach ica nennechmojmotlasnequij?

³³On hebreos oquijlijquej:

—Nion se ica on tlen cuajli oticchiu timitzmojmotlasnequij, yej pampa ticuijhuicaltia Dios ican motlajtol. Tejhua san titlacatl, pero timotenehua tiDios.

³⁴Jesús ijcuacon oquimijlij:

—Ipan nemotlanahuatil tlajcuilolnesticaj ica Dios oquijtoj: “Nemejhuamej nendioses.” ³⁵Ticmatij ica tlen quijtohua on Yectlajcuilojli xqueman huelis nopatlas. Dios oquintocayotij dioses yejhuamej on tlacamej yejhuan oquiselijquej itlajtoltzin. ³⁶Yejhuau ica, tej, tla Dios onechtlapejpenij niman onechajtitlan ipan in tlalticpactli, ¿quen ijqui, tej, hueli nenquijtohuaj ica nicuijhuicaltia pampa oniquijtoj ica niiConeu? ³⁷Tla xnicchihua itequiu noTajtzin, ma ca xnechneltocacan. ³⁸Pero tla melahuac nicchihua itequiu, xneltocacan impampa on tlen tlajtlamach nicchihua masqui xnenquinnelto-caj on tlen onemechijlij. Ijcon tej, xneltocacan para xmatican ica melahuac

* **10:17** me ama

† **10:17** resucitaré por mí mismo; ninoyolitis

‡ **10:20** ¿por qué?; ¿tline?

§ **10:25** cosas

noTajzin san se nohuan nemí, niman nejhua san se ihuan ninemi noTatzin.
³⁹ Ocsejpa quinequiyaj cajsisquej, pero Jesús ocholojteu intech.

⁴⁰ Quemaj Jesús onocuep para oyaj ne ica iquisayan tonajli de on atentli Jordán niman onocau campa otlacuatequij Juan. ⁴¹ Miyec tlacatl oyaj oquijatoj, niman quijtohuayaj:

—Masqui Juan xitlaj* tlamajhuisoqli oquichiu, nochi tlen oquijtoj ica in tlacatl melahuac.

⁴² Niman ompa miyequej oquineltocaquej Jesús.

11

On tlacatl itoca Lázaro omic

¹ Nemiya se tlacatl itoca catca Lázaro yejhuan cualohuaya. Yejhua chanej catca ne ipan on pueblo itoca Betania yejhuan no ipueblo María niman icniu Marta. ² Yejhua in María yejhuan on yejhuan oquitequilijs toTeco, on ajhuiyalistli itoca nardo ipan icxihuan niman oquinhuajhuatz ican itzon. In María icniu Lázaro yejhuan cualohuaya. ³ On omemej sihuamej icniutin otlatitlanquej ma quijlitij Jesús:

—ToTeco, on motejtlajsocau* cualo.

⁴ Ijcuac Jesús ijcon ocac, oquijtoj:

—Yejhua on cuaclistli xquimictis, yej san para noteititis ihueyilis Dios niman no itechcopia nechteititis nohueyilis nejhua yejhuan niiConeu Dios.

⁵ Jesús quitlajsojtlaya† Marta inhuan icnihuan María niman Lázaro. ⁶ Pero masqui oquijlijquej ica Lázaro cualohuaya, ome tonajli más onocau ne campa nemiya. ⁷ Quemaj oquimijlij on inomachtijcahuan:

—Ma tihuian ne Judea ocsejpa.

⁸ Ijcuacon on nomachtijquej oquijlijquej:

—Temachtijquetl, san quemach catca on hebreos yejhuan ompa chanejquej quinequiyaj mitzmictisquej ican temej, ¿niman ocsejpa ticnequi tias ompa?

⁹ Jesús oquimijlij:

—¿Tlica‡ xmelahuac quipia majtlactli huan ome horas on tonajli? Tej, tla se quistinemi ican tonajli, xnajantiquisa pampa nochi nesi ican on tlahuijli yejhuan oncaj ipan in tlalticpactli. ¹⁰ Pero tla se quistinemi ican yehuajli, najantiquisa pampa quipolohua tlahuijli.

¹¹ Quemaj oquimijlij Jesús:

—Totetlajsojcau Lázaro cochi, pero nicontlachaltis.

¹² Quemaj on nomachtijquej oquijlijquej:

—ToTeco, tla san yococh, quijtosnequi huelis pajtis.

¹³ Pero Jesús quijtosnequia ica Lázaro yomic, niman on nomachtijquej quinemiliayaj ica Lázaro san cochiya. ¹⁴ Yejhua ica Jesús más cuajli oquimijlij:

—Lázaro yomic. ¹⁵ Más cuajli para nemejhuamej ica xompa ninemiya ijcuac Lázaro cualohuaya, pampa aman huelis nicchihuas itlaj yejhuan mechpalehuis nentlaneltocasquej. Yejhua ica nipaqui. Ma tihuian, ma tiquitati.

¹⁶ Quemaj Tomás, yejhuan no quijliayaj cohuatzin§, oquimijlij on ocsequimej nomachtijquej:

—No ma tihuian para san secan ihuan Jesús timiquisquej.

Jesús quitemaca nemilistli niman yolihuclistli

* **10:41** nada; coxtla * **11:3** tu amigo † **11:5** lo amaba ‡ **11:9** ¿por qué?; ¿tline? § **11:16** gemelo

¹⁷ Ijcuac Jesús oajsic oquimachiltijquej ica Lázaro ye quipia nahui tonajli ica tlaltoctoc. ¹⁸ Betania nisu Jerusalén catca. San quipiaya canaj ome kilómetro huan tlajco ica huejca, ¹⁹ niman miyequej hebreos oyajquej quinnotzatoj Marta niman María para quinyoltlalisquej pampa omic inicniu.

²⁰ Ijcuac Marta oquimat ica Jesús ompa ye ajsitiaya, oquis oquinamiquito, pero María onocau ne inchan. ²¹ Niman Marta oquijlij Jesús:

—NoTeco, tla nican tinemisquia, nocniu xmiquisquia. ²² Pero nejhua nicmatzticaj ica Dios mitzmacas nochi tlen tictlajtlanilis.

²³ Jesús oquijlij:

—Mocniu ocsejpa yolihius*.

²⁴ Marta oquijlij:

—Quemaj, nejhua nicmatzticaj ica ocsejpa yolihius ijcuac yolihiisquej niman noquetztehuasquej on mimiquej ipan on sa ica nochi tonajli.

²⁵ Quemaj Jesús oquijlij:

—Nejhua niquinyolihiutia on yejhuan mimiquej niman niquinmaca nemilstli ocsejpa. Yejhuan nechneltucas, masqui miquis, nemis ocsejpa.

²⁶ Niman nochi yejhuan sanquen nemi niman nechneltoca, nemis para nochipa ne ilhuicac. ¿Ticneltoca yejhua on?

²⁷ Yejhua oquijlij:

—Quemaj noTeco. Nejhua nicneltoca ica tejhua tiCristo yejhuan Dios ocuajtitlan para tlamandaros. Niman nicneltoca ica tejhua tiiConeu Dios yejhuan ye ijqui oncatca para huajlas ipan in tlalticpactli.

Jesús ochocac

²⁸ Ijcuac ijcon yoquijtoj, Marta oyaj oquinotzato on icniu María, niman san oquichtacaijlij yejhua in:

—On Temachtijquetl nican nemi niman mitznotza.

²⁹ Ijcuac María ijcon ocac, nimantzin onotelquetz niman oyaj oquitato Jesús. ³⁰ Jesús oc† xe calaquiya ne ipan on pueblo, yej nemiya campa Marta oquinamiquito. ³¹ Niman ijcuac on hebreos yejhuan quiyoltlaliayaj María ne ichan oquitaquej ica María nimantzin oquis, oquicuitlapanhuiquej. Yejhuatej quinemiliayaj ica María yau ne itech on tlalcontli para ompa onchocas.

³² Quemaj, ijcuac oajsic ne campa nemiya Jesús, María onotlacuenquetz icxitlan, niman oquijlij:

—NoTeco, tla nican tinemisquia, nocniu xmiquisquia.

³³ Ijcuac Jesús oquitac ica María niman on hebreos yejhuan ompa ihuan oyejcoquej sanoyej‡ chocaj, sanoyej onajman niman onomau inhuan, ³⁴ niman oquintlajtoltij:

—¿Canon onenquitocaquej?

Niman oquijlijquej:

—ToTeco, xhuajla xquitaqui.

³⁵ Niman Jesús ochocac. ³⁶ Quemaj on hebreos oquijtojquej:

—Xquitacan quen sanoyej quitlajsojtlaya§.

³⁷ Pero semej yejhuatej oquijtojquej:

—In yejhuan oquimpajtij ixtololojhuan on ciego, ¿xhuelisquia itlaj quichihuasquia para Lázaro ma ca miquisquia?

Lázaro oyoliu niman onoquetzteu ipan itlalcon

* ^{11:23} resucitará; yolis † ^{11:30} todavía; sanquen ‡ ^{11:33} mucho § ^{11:36} lo amaba

38 Jesú斯 ican miyec iyolquexanalis oquinisihuij on tlalcontli. On tlalcontli se teostotl catca niman quipiaya se tetl yejhua quitzacuticatca on itenco.

39 Jesú斯 oquijtoj:

—Xquejcuánican on tetl.

Pero Marta yejhuan icniu on micatzintli, oquijlij:

—NoTeco, amantzin sanoyej yomoloniac pampa ye quipia nahui tonajli ica omic.

40 Pero Jesú斯 oquijlij:

—¿Tlen xonimitzijlij ica tla titlaneltoca tiquitas ihueyilis Dios?

41 Quemaj oquejcuaniiquej on tetl. Niman Jesú斯 oajcotlachix ne ilhuicac, niman oquijtoj:

—NoTajtzin, nimitzmaca tlaxtlahuijli pampa tinechcaqui. **42** Nejhua nicmatzticaj ica nochipa tinechcaqui, pero aman ijquin niqijtohua impampa in tlacamej yejhuan nican nemij, para ma quineltocacan ica tejhua otinechajtitlan.

43 Ijcuac ijcon oquijtoj, quemaj ica chicahuac tlajtojli oquinotz:

—¡Lázaro, xhuajquisa on pon!

44 Niman on micatzintli ohuajquis ipan imahuan niman icxihuan tecuixticatca ican ilpicatl niman ixayac tecuixticatca ican tlaquentli. On hebreos ijcon quitequitiliayaj ijcuac quintejcuiyaj on mimiquej. Jesú斯 oquimijlij:

—Xtojtomacan niman xcahuilican ma huia.

On fariseos oquinejnemilijquej quen ijqui cassisquej Jesú斯

(Mt. 26.1-5; Mr. 14.1-2; Lc. 22.1-2)

45 Miyequej hebreos yejhuan ohualejquej ihuan María oquineltocaquej ijcuac oquitaquej on tlen Jesú斯 oquichiu. **46** Pero sequimej oyajquej oquin-tatoj on fariseos niman oquintlajtlajtohuilijquej on tlen Jesú斯 oquichiu.

47 Yejhua ica on fariseos niman intlayecancahuan on tiopixquej onosentlali-jquej inhuan on tetlaca-notzquej niman oquijtojquej:

—¿Tlinon ticchihuasquej? Yejhua in tlacatl quichijtacaj miyec milagros.

48 Tla ijqui ticahuilisquej ma quichihua, nochi tlacatl quineltocas niman on romanos quixoxotonisquej tohueyi tiapan niman in topaís.

49 Pero se de yejhuatej, itoca Caifás, yejhuan ipan on xipan on más hueyi intlayecancau catca intech on tiopixquej, oquimijlij:

—Nemejhuamej xitlaj* nenquimati. **50** Nemejhuamej xnencajsicamatij ica para tejhuamej más cuajli yes tla se tlacatl miquis para ma ca quixoxo-tonisquej nochi in país.

51 Pero Caifás ijcon oquijtoj xpampa melahuac ijqui oquis ipan iyojlo. Yejhua oquijtoj pampa yejhua on más hueyi intlayecancau catca intech on tiopixquej ipan on xipan, niman Dios oquitlamachilistij para ma quipto ica Jesú斯 miquis ipampa on país campa chanejquej on hebreos. **52** Niman ijcon oquijtoj xsan ipampa on país, yej no para quinsentlalis nochimej on iconehuan Dios yejhuan nochajchayajtinemij†. **53** Yejhua ica desde ipan on tonajli on tequihuajquej hebreos oquinejnemilijquej quen ijqui quimictisquej Jesú斯. **54** Yejhua ica, tej, Jesú斯 xoc quistinemiyá ne intzajlan on hebreos, yej oquis ne Judea niman oyaj ne ipan se pueblo itoca Efraín yejhuan nisiu tlapatlaco. Ompa onocau inhuan inomachtijcahuan.

55 Ye nisiu catca para on hebreos quichihuasquej on ilhuitl pascua, niman miyec tlacatl yejhuan hualehuayaj nochihuiyan ipan on país oyaj ne Jerusalén para nochipahuasquej quen intlanahuatil on hebreos tlanahuatia.

* **11:49** nada; coxtla † **11:52** andan esparcidos

⁵⁶ Jesúz quitejtemojtinemiyaj. Niman ijcuac ye nemiyaj ne ipan on hueyi tiapan, ijquin quinotlajtoltiayaj:

—¿Tlinon nenquinemiliaj? ¿Nenquinemiliaj ica huajlas ipan in ilhuitl, noso ca?

⁵⁷ On fariseos niman intlayecancahuan on tiopixquej yotlanahuatijcaj ica tla se quimati canon nemi Jesúz, ma quitemachiltican para huelis cajsisquej.

12

María oquitlalilij Jesúz ajhuiyalistli

(Mt. 26.6-13; Mr. 14.3-9)

¹ Chicuasen tonajli polihuia ica ajsis on ilhuitl pascua, Jesúz oyaj ne ipan on pueblo itoca Betania. Lázaro on tlacatl yejhuan Jesúz yoquiyolitijca niman yoquetztejca ne ipan itlalcon, chantiya ipan on pueblo. ² Ompa oquichichiquej se tlacuajli para quitlajsojcamachilisquej Jesúz ica on tlen oquichiu. Marta quintlamacaya niman Lázaro tehuan ompa ihuan tlacuajticatca ipan on mesa. ³ Quemaj María ocuajquic canaj tlajco litro ajhuiyalistli itoca nardo, yejhuan sanoyej* patioj. Niman ican on ajhuiyalistli oquimaltij icxihuan Jesúz niman quemaj oquinhuajhuatz ican itzon. Ijtic on cajli oten ican iahuiyalis on ajhuiyalistli. ⁴ Quemaj Judas Iscariote, iconeu Simón, yejhuan no tehuan tlapohuajli catca intech on majtlactli huan ome inomachtijcahuan Jesúz niman sa no yejhua, yejhuan quitemactilis, oquijlij:

—¿Tlica† xmás cuajli nonamacasquia in ajhuiyalistli ica yeyi ciento denarios niman ica on tomin tiquimpalehuisquiaj on mayanquej?

⁶ Pero Judas ijcon oquijtoj xpampa melahuac quimicneliaya on mayanquej, yej pampa yejhua tlachtequetl. Yejhua quejehuaya on bolsa ican tomin niman quichtequiya sequi on tlen ipan on bolsa quitlaliayaj. ⁷ Quemaj Jesúz oquijlij:

—Ma ca xpaj solo. Yejhua quejehuaya in ajhuiyalistli para nechmatlalosquia ipan notlalnacayo ipan on tonajli ijcuac nechtocasquej ne ipan notlalcon. ⁸ Nochipa nemotzajlan nenuimpiasquej on mayanquej, pero nejhua xnochipa nican nennechpiasquej.

On hebreos quimictisnequiyaj Lázaro

⁹ Miyequej on hebreos oquimatquej ica Jesúz nemiya ne Betania niman ompa oyajquej. Oyajquej xsan para contasquej Jesúz, yej no para contasquej Lázaro yejhuan Jesúz oquiyolihuitij niman oquetzteu ne intzajlan on mimiquej. ¹⁰ Yejhua ica intlayecancahuan on tiopixquej oquitlalijquej inyojo para no quimictisquiaj Lázaro, ¹¹ pampa san yejhua ipampa miyequej on hebreos ye notzijtzinquixtiayaj ne intech niman yej quineltocayaj Jesúz.

Jesúz ocalac ne Jerusalén quen se tetlanquetl

(Mt. 21.1-11; Mr. 11.1-11; Lc. 19.28-40)

¹² Huajmostla miyec tlacatl yejhuan ye nemiya ne Jerusalén para quipanosquej on ilhuitl pascua ocacquej ica Jesúz ajsis ne Jerusalén. ¹³ Yejhua ica oquitequej imahuan on soyatl niman oquisquej oquinamiquitoj Jesúz. Yejhuatej ijquin tzajtziayaj:

—¡Ma quiseli yectenehualistli! ¡Ma Dios quitiochihua yejhua on yejhuan hualajticaj ican itocatzin toTeco! ¡Ma Dios quitiochihua on iRey Israel!

¹⁴ Jesúz oquinextij se poloco‡ niman ipan otlejcoc quen quijtohua on Yectlajcuilojli:

* ^{12:3} muy † ^{12:5} ¿por qué?; ¿tline? ‡ ^{12:14} burro

15 Ma ca xmomojtican nemejhuamej yejhuan nenchantij ipan on hueyican itoca Sión. Xquitacan, nemoRey. Hualetiu ipan se poloco.

16 Ijcuac on onochiu, inomachtijcahuan Jesús xocajsicamatquej on tlajtlamach§. Pero ijcuac Jesús otlejcoc ne ilhuicac, oquelnamiquej ica nochí yejhua on ye ijqui tlajcuilolnesticatca yejhua itech, niman ica ijqui mero ipan onochiu.

17 On tlacamej yejhuan ihuan Jesús nemiyaj ijcuac oconotz Lázaro ne ipan itlalcon ijcuac oquiyolitij niman oquetzteu, quitetlajtlajtohuiliayaj nochí tlen oquitaquej. **18** Yejhua ica miyec tlacatl oyajquej quinamiquitoj Jesús pampa oquimatquej on milagros yejhuan oquichiu. **19** Quemaj on fariseos oquinojlijquej:

—¡Xquitacan, xitlaj* otictlanquej! ¡Xquitacan, nochí tlacatl ipan in tlalticpactli oquiselijquej yejhua!

Sequimej griegos oquitejtemojquej Jesús

20 Intzajlan on tlacamej yejhuan oyajquej Jerusalén para quimahuistiliaj Dios ipan on ilhuitl, nemiyaj sequimej yejhuan chanejquej catcaj ne Grecia.

21 Yejhuatej oquinisihuijquej Felipe yejhuan chanej catca ne Betsaida de Galilea, niman ijquin oquijlijquej:

—Señor, ticnequij tiquitasquej Jesús.

22 Felipe oyaj niman oquitlajtlajtohuilij Andrés on tlen oquijlijquej. Niman quemaj on omemej san secan oyajquej oquitlajtlajtohuilito Jesús on tlen quijtohuayaj. **23** Niman Jesús oquimijlij:

—Yoyejcoc on tonajli ijcuac nejhua yejhuan oninochiu Tlacatl nechhueyilisquej. **24** Ica tlen melahuac nemechijlia ica tla xachtopa nim quis, xhuelis nictemacas yencuic nemilistli. Nejhua no nijqui quen se iteyo on trigo. Tla se iteyo on trigo xnotoca ipan tlajli, xhueli quitlaquitia miyec, yej nocahua iselti. Pero tla notoca ipan tlajli, tla ijcon, noscaltia niman quitlaquitia miyec.

25 Yejhuan quichihua canica para ma ca quipolos inemilis ipampa Cristo xquipias nemilistli yejhuan para nochipa. Pero on yejhuan quitemaca inemilis ipampa Cristo, quiselis nemilistli para nochipa. **26** Tla yacaj quinequi nechtequipanos, ica oncaj yas nohuan, niman ijcon campa nejhua ninemis, no ompa nemis on yejhuan nechtequipanos. Tla yacaj nechtequipanos, noTajzin quitlacaitas.

Jesús oquitejmachiltij ica miquis

27 'Aman sanoyej ninoyolcocohua. ¿Tlinon niquijlis noTajzin? ¿Niquijlis: "NoTajzin, xnechmanahui itech on tlajyohuclistli tlen aman nopan nochihuas"? ¡Ca! Xijcon niquijlis pampa yejhua ica on onihuajlaj ipan in tlalticpactli. **28** NoTajzin, xchihua para ma mitzhueyilican.

Quemaj ocaquistic se tlajtojli ne ilhuicac yejhuan oquijtoj: "Yonicchiu para ma nechhueyilican, niman ocsejpa nicchihuas para ma nechhueyilican."

29 Niman on tlacamej yejhuan ompa tlacacticatcaj oquijtojquej ica ocaquistic se tlacomonajli, niman ocsequimej quijtohuayaj ica se ilhuicactequiquetl† ocuajnotz.

30 Quemaj Jesús oquimijlij:

—On tlajtojli ocaquistic xpara nejhua nicaquis, yej para nemejhuamej nenaquisquej. **31** Aman yoyejcoc on tonaltin ijcuac Dios quinyolcuitis niman quintlaxtlahuilis nochimej in tlalticpactlacamej. Niman aman yejhua quixtilis itequihuajyo on yejhuan itequihuia in tlalticpactli. **32** Niman ijcuac

§ **12:16** cosas * **12:19** nada; coxtla † **12:29** ángel: Angeles tequitij ne ilhuicac niman nican ipan in tlalticpactli.

nechmajmasohualtisquej ipan cojnepanojli nican ipan in tlalticpactli, sa no nejhua niquinyoltilanas nochimej notech.

³³ Ijcuac ijcon oquijtoj, oquitecaquistilij quen miquis ipan on cojnepanojli.
³⁴ Niman ijcuac on tlacamej ijcon ocacquej, oquijlijquej:

—On Yectlajcuilojli techmachiltia ica Cristo nemis para nochipa. Yehua ica ¿tlica, tej, tejhua tiquijtohua ica on yejhuan onochiu Tlacatl ica oncaj cajcopilosquej? ¿Aquinon on yejhuan onochiu Tlacatl?

³⁵ Ijcuacon Jesús oquimijlij:
 —Nejhua yejhuan nitequichihua para cajsicamatisquej on tlajtlamach ica Dios nemis nemotzajlan san quesqui tonaltin más. Yehua ica xselican on tlaixmachilistli chica nenhuelij para ma ca on xlaixmachilistli tetlanis. Yejhuan xcajsicamatii, xquimati canica yau. ³⁶ Nejhua nitequichihua para cajsicamatij tlajtlamach itech ica Dios. Yehua ica, chica ninemi nemotzajlan, xnechneltocacan para nenquipiasquej tlaixmachilistli.

Ijcuac Jesús otlan quijtohua in tlajtlamach, oyaj niman yejhamej xoc oquimatquej canica oyaj.

On hebreos xoquineltocaquej Jesús

³⁷ Masqui Jesús oquichiu miyec milagros imixpan, xquineltocayaj. ³⁸ Ijcon yej oncatca para nochihuas on tlen oquijcuiloj on tioltajtojquetl Isaías: ToTeco, ¿aquinon yoquineltocac totemachtil? Masqui oquitaquej mopoder, ¿aquinon tlaneltoca?

³⁹ No xhueliyaj quineltocayaj, pampa Isaías ijquin no oquijcuilojca:

⁴⁰ Dios oquinciegotilij niman oquinyoltechijcau. Ijquin oquichiu para ma ca ma cajsicamatican tlilon quijtosnequi on tlen oquitaquej, niman ma ca tlaneltocasquej impan inyojo, niman para ma ca ma huanocuepacan notech para niquintlapojpolhuis.

⁴¹ Yehua in tlajtlamach‡ oquijtoj Isaías pampa oquitac ihueyilis Jesús niman otlajtoj ica yejhua.

⁴² Masqui ijcon, miyequej on hebreos xoquineltocaquej Jesús, hasta on yejhuan tequihuajquej. Pero xquipantlantiyaj intlaneltoc pampa quinmacajsiyaj ica on fariseos quinhuajquixtisquej ipan on tiopan. ⁴³ Ijcon, tej, xquipantlantiyaj intlaneltoc pampa yejhamej más cuelitayaj para tlacamej ma quintlacaitacan xej para Dios ma quintlacaita.

Intlajtol Jesús quintlajtlacolmacas on tlacamej

⁴⁴ Jesús oquijtoj ican chicahuac tlajtojli:

—Yehuan nechneltoca xsan nejhua nechneltoca, yej no quineltoca no Tajzin yejhuan onechajtitlan. ⁴⁵ Niman on yejhuan nechita no quita on yejhuan onechajtitlan. ⁴⁶ Nejhua onihuajlaj ipan in tlalticpactli para nictemacas cajsicamatilistli, niman ijcon, tej, san aquinon yejhuan nechneltocas quiselis tlamachilistli. ⁴⁷ Tla yacaj caqui notlajtol niman xquitlacamatii, xnejhua niquiyolcuitis nion niquitlajtlacolmacas, pampa nejhua onihuajlaj xpara niquinyolcuitis niman niquintlajtlacolmacas in tlalticpactlacamej, yej para niquinmaquixtis. ⁴⁸ Pero ye nemi aquin quiyolcuitis niman quitlajtlacolmacas on yejhuan xnechselia niman xquitlacamatii notlajtol. On tlajtojli yejhuan yoniquijtoj on yejhua quiyolcuitis niman quitlajtlacolmacas ipan on sa ica nochitlajtol. ⁴⁹ Ijcon nochihuas pampa nejhua xniquijtohua on tlen nicnemilia, yej noTajzin, yejhuan onechajtitlan, onechnahuatij yejhua ica on tlen niquijtos niman nicteitis. ⁵⁰ Niman nicmatzticaj ica on tlen noTajzin onechnahuatij para nemechijlis, quitemaca on nemelistli yejhuan

‡ **12:41** cosas

para nochipa. Yehua ica on tlen nejhua niquijtohua, niquijtohua quen yejhua onechijlij.

13

Jesús oquinmicxipajpac on inomachtijcahuau

¹ Sa se tonajli polihuiya ijcuac on hebreos quipanohuaj on ilhuitl itoca pascua. Jesús quimatzticatca ica yoyejcoc on tiempo para yejhua cajtehuas in tlalticpactli niman yas itech iTajtzin. Yejhua nochipa oquintlaajsojtlac* on iyaxcahuau† yejhuan nemij ipan in tlalticpactli, pero aman quintitiaj quech ica sanoyej‡ quintlaajsojtlac.

²⁻⁴ On diablo yoquitlalijca ipan iyojlo Judas Iscariote, itelpoch Simón, on tlamachilistli para quitemacas Jesús intech on tlayecanquej hebreos. Jesús quimatzticatca ica sa no yejhua ohualeu ne itech Dios, niman ica ocsejpa yas itech. No ijqui quimatzticatca ica toTajtzin yoquimacac nochi tlanahuatiijli. Yejhua ica, ijcuac tlacuajtlicatcaj, ohuajnoquetzteu ne itech on mesa, ocuajquixtij on itlaquen pani niman onoxijlansaloj ican se tlaquentli§ huan ica nohuajhuatzaj. ⁵ Niman quemaj on atl oquitecac ipan se hueyi teposhuajcali niman opeu quimicxipajpac on inomachtijcahuau niman quimicxihuajhuatzaya ican on tlaquentli yejhuan quipiaya ixijlan. ⁶ Ijcuac ye quimpajpacasquia icxihuau Simón Pedro, Simón Pedro oquijlij:

—No Teco, ¿tejhua tinechimpajpaquilis nocxihuau?

⁷ Jesús oquinanquilij:

—Aman xticajsicamati tlinon nicchijticaj, pero más saquin* ticajsicamatis.

⁸ Pero Pedro oquijlij:

—Nejhua xqueman tinechimpajpaquilis nocxihuau.

Jesús oquijlij:

—Tla xnimitzimpajpaquilis, xoc nohuau timopohuas.

⁹ Simón Pedro oquijlij:

—Tla ijcon, no Teco, ma ca san xnechimpajpaquili nocxihuau, yej no xnechimpajpaquili nomahuan niman notzontecon.

¹⁰ Pero Jesús oquijlij:

—On yejhuan quemach otlan naltia xoc nonequi nochi nopajpacas, yej san icxihuau, pampa nochihuiyan chipajticaj. Nemoyjlo chijchipajtoquej, masqui xnochimej.

¹¹ Oquijtoj: “Xnochimej chipajtoquej”, pampa quimatzticatca aquinon quitemacas.

¹² Más saquin ijcuac yoquimicxipajpac, Jesús ocsejpa oquinaquij on itlaquen pani, ohuajnotlalij itech on mesa niman oquimijlij:

—¿Nencajscamatij on tlen onemechchihuaj? ¹³ Nemejhuamej nennech-tocayotiaj Temachtijquetl niman nemoTeco, niman cuajli quen nenquijto-huaj, pampa melahuac nejhua. ¹⁴ Aman, tej, tla nejhua yejhuan melahuac nemoTemachtijcau niman nemoTeco yonemechicxipajpac, tla ijcon no ijqui nonequi nenquimochihuilisquej. ¹⁵ Nejhua nemechchihuilia in para ne-mejhuamej no xchihuacan quen nejhua yonicchii. ¹⁶ Ica tlen melahuac nemechijlia ica se tetequichihuilijquetl xejhua más hueyixticaj xquen on iteco, niman nion on yejhuan canaj quititlanij xejhua más hueyixticaj xquen on yejhuan quititlanij. ¹⁷ Tla nencajscamatij in tlajtlamach† niman pehua ijqui nenquichihuaj, Dios mechtiochihuas.

* ^{13:1} los amó † ^{13:1} le pertenecen; iaxcahuau, ihuaxcahuau, itlatcahuau ‡ ^{13:1} mucho
§ ^{13:2-4} toalla * ^{13:7} después † ^{13:17} cosas

18 'In tlen niquijtohua xpara nochimej nemejhuamej. Nejhua niquix-matzticaj inyojlo nochimej on yejhuan yoni quintlapej penij. Pero ica oncaj nochihuas on tlen quijtohua on Yectlajcuilojli: "On yejhuan nohuan tlacua, yonocuep notlahuelicniu." **19** Aman nemechijlia yejhua in ijcuac xe nochihua, para ijcuac nochihuas, nemejhuamej nenquineltocasquej ica nejhua melahuac nejhua. **20** Ica tlen melahuac nemechijlia ica yejhuan quiselia on yejhuan nictitlani, no nejhua nechselia. Niman on yejhuan nejhua nechselia, no quiselia on yejhuan onechajtitlan.

*Jesús oquijtoj aquinon quitemactilis
(Mt. 26.20-25; Mr. 14.17-21; Lc. 22.21-23)*

21 Ijcuac ijcon yoquijtoj, Jesús onoyolajman, niman imixpan oquijtoj:
—Ica tlen melahuac nemechijlia, semej nemejhuamej nechtemacas.

22 Quemaj on nomachtijquej opeu nootaj. Yejhamej xquimatiyaj aquinon quitenehuaya Jesús. **23** Niman semej inomachtijcahuan, yejhuan Jesús sanoyej quitlajsojtlaya[‡], nemiya inacastlan ne campa tlacuajticas. **24** Niman Simón Pedro oquixnotz para ma quitlajtolti aquinon on yejhuan quitenehuaya quitemacas. **25** Yejhua ica on nomachtijquetl oquinishuij más iyelpan ica Jesús, niman oquitlajtoltij:

—NoTeco, ¿aquinon on yejhuan mitztemacas?

26 Jesús oquinanquilij:

—Nicpatzos se tlajcotipantzин pan, niman on aquin nicmacas, on yejhua. Ijcon, tej, oquipatzoj se tlajcotipantzин pan niman oquimacac Judas Iscar-iote, iconeu Simón. **27** Niman ijcuac Judas yoquicuaj on pan, nimantzin ipan iyojlo ocalac Satanás. Quemaj Jesús oquijlij:

—On tlen ticchihuas, nimantzin xchihua.

28 Pero nion semej on yejhuan tlacuajticas ne ipan on mesa ocajsicamat tlica§ ijcon oquijlij. **29** Judas quipiaya on bolsa campa quejehua tomin. Yejhua ica sequimej oquinemilijquej ica Jesús quijliaya itlaj ma cohuati tlen quitequitiltisquej ipan on ilhuitl, noso itlaj ma quinmaca on mayanquej. **30** Ijcuac Judas yoquicuaj yejhua on pan, nimantzin oquis. Ijcuacon ye tlayahua catca.

Jesús oquitemacac se yencuic tlanahuatijli

31 Más saquin* ijcuac Judas yoquis, Jesús oquijtoj:

—Aman noteititia nohueyilis, nejhua yejhuan oninochiu Tlacatl. Niman no ihueyilis Dios noteititia notechcopa. **32** Niman tla nejhua nicteititia ihueyilis Dios, tla ijcon Dios no quiteititis nohueyilis, niman saniman ijqui quichihuas. **33** Notlajsojcacone huan, xoc ninemis miyec tonaltin nemohuan. Nemejhuamej nennechtejtemosquej, pero sa no ijqui quen oniquimijlij on hebreos no ijqui nemechijlia aman: Xhuelis nenyasquej campa nejhua niau.

34 Nemechmaca yejhua in yencuic tlanahuatijli: xmotlajsojtlacan† semej ihuan ocsequimej. Ijcon quen nejhua nemechtlajsojtlal, nemejhuamej no ijqui xmotlajsojtlacan semej ihuan ocsequimej. **35** Tla nemotlajsojtlaj semej ihuan ocsequimej, nochí tlacatl quitas ica nennotemachtijcahuan.

*Jesús oquijtoj ica Pedro quinenequis
(Mt. 26.31-35; Mr. 14.27-31; Lc. 22.31-34)*

36 Simón Pedro oquitlajtoltij Jesús:

—ToTeco, ¿canon tiau?

Niman Jesús oquijlij:

‡ **13:23** amaba § **13:28** por qué; tline * **13:31** después † **13:34** ámense

—Campa nejhua niau, xhuelis tias aman, pero más saquin[†] quemaj tias.

³⁷ Quemaj Pedro oquijlij:

—NoTeco, ¿tlica[§] xhuelis nias aman? Nicpia noyojlo para nimquis san mopampa tla nonequi.

³⁸ Jesús oquijlij:

—¿Melahuac ticpia moyojo para timquis san nopampa? Ica tlen melahuac nimitzijlia ica ijcuac xe tzajtzi on caxtil*, tejhua yexpa tiquijtos ica xtinechix-mati.

14

Jesús yejhua ojtli para se ajsis ne itech on toTajtzin

¹ 'Nemejhuamej ma ca xmoyolajmanacan. Xneltocacan Dios niman nejhua no xnechneltocacan. ² Ne ichan noTajtzin oncaj miyec chanyotl* campa huelis chantihuas. Tla xonyasquia miyec chanyotl, xnemechijlisquia. Aman, tej, niau para niconyeclalis ne campa nemonchantisquej. ³ Niman ijcuac yonitlan, ocsejpa nihuajlas para nemechhuicas para nemejhuamej no nennemisquej campa nejhua ninemis. ⁴ Niman nemejhuamej ye nenquimatztoquej canon niau, niman ye nenquixmatztoquej on ojtli.

⁵ Quemaj Tomás oquijlij:

—ToTeco, tejhuamej xticmatij canon tiau. ¿Quen ijqui tiquixmatisquej on ojtli?

⁶ Jesús oquinanquilij:

—Nejhua niojtlí, niman nitlin melahuac, niman no ninemilistli. Tej, san nejhua notechcpa huelis ajsisquej ne itech on Tajtli. ⁷ Tla nemejhuamej nennechixmatisquiaj, no nenquixmatisquiaj noTajtzin. Niman desde aman nenquixmatij niman ye nenquitztoquej.

⁸ Quemaj Felipe oquijlij:

—NoTeco, xtechcahuili ma tiquitacan on toTajtzin, niman san yejhua ica on tiyolpachihuisquej.

⁹ Jesús oquijlij:

—Felipe, masqui ye quipia miyec tonaltin ica nemohuan ninemi, ¿oc[†] xtinechixmati? On yejhuan nechita, no quita on Tajtli. Yejhua ica ¿tlica[‡] tinechtatlajtlanilia ma nemechititi on Tajtli? ¹⁰ ¿Xticneltoca ica nejhua ninemi ihuan noTajtzin niman noTajtzin nohuan nemi? On tlajtlamach[§] tlen nemechijlia ocse onechijlij. On tequitl yejhuan nesi ica nicchihua, noTajtzin yejhuan nopen nocahua quichihua notechcpa.

¹¹ Quemaj Jesús oquimijlij inomachtijcahuau:

—Xneltocacan ica nejhua ninemi ihuan noTajtzin, niman noTajtzin nohuan nemi. Pero tla xnenhuelij nenquineltocaj itechcpa on tlen nemechijlia, xneltocacan itechcpa on tequitl tlen nicchihua. ¹² Ica tlen melahuac nemechijlia, ica yejhuan nechneltocas quichihuas on tequitl tlen nicchihua. Niman yejhua quichihuas on tequitl yejhuan más huejhueyi, pampa nejhua niau itech noTajtzin. ¹³ Niman nochí tlen nemejhuamej nentlajtlanisquej ican notoca, nejhua nicchihuas para noTajtzin quiselis hueyilistli notechcpa yejhuan niiConeu. ¹⁴ San tlinon yejhuan nemejhuamej nentlajtlanisquej ican notoca, nicchihuas.

Jesús oquitoj ica cuajtitlanis on Espíritu Santo

[‡] 13:36 después § 13:37 ¿por qué?; ¿tline? * 13:38 gallo * 14:2 casa, cajli † 14:9 todavía;
sanquen ‡ 14:9 ¿por qué?; ¿tline? § 14:10 cosas

15 'Tla nemejhuamej nennechtlajsojlaj, xtlacamatican notlanahuatilhuan.
16 Niman nejhua nictlajtlanilis noTajzin ma mechajtitlanili ocse yejhuan mechylchicahuas, mechpalehuis niman nemohuan nemis para nochipa.
17 Yejhua, tej, on Espíritu Santo yejhuan mechtlamachilistis ica on tlen melahuac. On tlalticpactlacamej xhuelij quiselaj, pampa xhuelij quitaj nion quixmatij. Pero nemejhuamej nenquixmatij, pampa yejhua nemohuan nemi niman nemohuan nocahuas. **18** Nejhua xnemechcahuas quen icnamej, yej ninocuepas para nemohuan nichantis. **19** Sa quesqui tonaltin niman on tlalticpactlacamej xoc nechitasquej, pero nemejhuamej nennechitasquej. Niman nemejhuamej nennemisquej pampa nejhua ninemi. **20** Ipan on tonajli nemejhuamej nenquimatisquej ica ninemi ihuan noTajzin, niman nemejhuamej nohuan nennemij, niman nejhua ninemi nemohuan. **21** Yejhuan quimati niman quitlacamati notlanahuatilhuan, melahuac nechtlajsojtlá*. Niman on yejhuan nechtlajsojtlá noTajzin no quitlajsojtlas. Niman nejhua no nictlajsojtlas niman ninoteititis itech.

22 Judas, on yejhuan xejhua Iscariote, oquijlij:
 —NoTeco, ¿tlica timoteititis san totech tejhuatej, niman xintech on tlalticpactlacamej?

23 Jesús oquijlij:
 —Yejhuan nechtlajsojtlá† quejehuas on tlen niquijtohua. Niman noTajzin quitlajsojtlas, niman noTajzin niman nejhua tihuajlasquej para ihuan tichantisquej. **24** Yejhuan xnechtlajsojtlá xquejehua on tlen niquijtohua. In cuajli tlajtojli yejhuan yonemechijlij xquisa notech, yej quisa itech noTajzin yejhuan onechajtitlan.

25 'Nochi yejhua in nemechijlijticaj chica nemohuan ninemi. **26** Pero ijcuac noTajzin cuajtitlanis on Espíritu Santo ican notocatzin para mechylchicahuas niman mechpalehuis, yejhua nochi mechmachtis niman mechelnamictis nochi tlen yonemechijlij.

27 'Ninonahuatia nemohuan ican yolsehuilistli. Nejhua nemechmaca noyolsehuilis, pero xnemechmaca on yolsehuilistli yejhuan quitemacaj on tlalticpactlacamej. Ma ca xmoyolajmanacan, nion ma ca xmomojtican. **28** Aman yonencaquej quen niquijtohua ica ye niau, niman ica ninocuepas para ocsejpa nemohuan ninemis. Tla melahuac nennechtlajsojtlasquiaj, nenquipaquismatisquiaj on ica niau itech noTajzin, pampa yejhua más hueyixticaj xquen nejhua. **29** Aman nemechijlia yejhua in chica xe nochihua, para ijcuac nochihuas, nemejhuamej nentlaneltocasquej.

30 'Nitlajtlajtos nemohuan san achijtzin más, pampa ye huajlau on diablo yejhuan tlamandarohua ipan in tlalticpactli. Masqui yejhua xquipia poder para nechtlanis, **31** nicchihuas on tlen noTajzin onechnahuatij para in tlalticpactlacamej quimatisquej ica nejhua nictlajsojtlá noTajzin. Xmotelquetzacan, ma titejcuanicán nican.

15

Jesús quen itemecayo on uvas

1 'Nejhua niquen tlen melahuac itemecayo on uvas, niman noTajzin quen on yejhuan quitlapia on temecatl. **2** Yejhua quitequi nochi nomatzitzihuan yejhuan xtlaqui, pero quitlacuijcilia niman quichipahua on nomatzitzihuan yejhuan tlaquij para más ma tlaquican. **3** Nemejhuamej yej yonenchipajquej itechcopa on temachtijli yejhuan yonemechijlij. **4** Nochipa xnemican nohuan, niman nejhua no nochipa ninemis nemohuan. Tla

* **14:21** me ama † **14:23** me ama

xnenemisquej nohan, xhuelis nentlaquisquej sa no ijqui quen imahuan on uvas xhuelisquej tlaquisquej tla xquipia itemecayo. ⁵ Nejhua quen se itemecayo on uvas niman nemejhuamej quen nennomatztizhuan. Xitlaj huelis nenquichihuasquej tla xnenemisquej nohan. On yejhuan nochipa nemis nohan niman nochipa ninemis ihuan quipias miyec itlaquilyo. ⁶ On yejhuan xnochipa nemis nohan, quitequechehuasquej notech niman huaquis quen se cuamatli. Tla ijcon nochihuas on cuamatli ye quisentlalijtiasquej para quitlatisquej.

⁷ 'Tla nemejhuamej nennemisquej nohan niman nenquejehuasquej notlajtol impan nemoyojlo, nenhuelisquej nentlajtlanisquej san tlen nenquinequisquej, niman ijqui nochihuas. ⁸ Ijcuac nemejhuamej nenquipiaj miyec tlacyotl, noTajzin quiselia hueyilistli, niman ijqui nenquiteititiaj ica nemejhuamej melahuac nennotemachtijcahuan. ⁹ Nejhua nemechtajsojtlá* ijcon quen noTajzin nechtajsojtlá. Xchihuacan quen nenhuelisquej para nenuiseliytiasquej notetlajsojtlalis. ¹⁰ Tla nenuquitlacamatztiasquej notlanahuatilhuan, nenuiseliytiasquej notetlajsojtlalis ijcon quen nejhua nictlacamatztli itlanahuatilhuan noTajzin niman nicselijtiu itetlajsojtlalis.

¹¹ 'Nejhua ijcon nemechnojnotza para nipaquis nemopampa niman nemejhuamej nemopaquilis ajsitias. ¹² In yejhua notlanahuatil: Xmotlajsojtlacan ihuan ocsequimej ijcon quen nejhua nemechtajsojtlá. ¹³ On tetlajsojtlalistli más hueyi yejhuan se huelis quipias sa no yejhua on ica ma miqui impampa itetlajsojcahuan†. ¹⁴ Niman nemejhuamej nennotetlajsojcahuan tla nenuquichihuaj tlen nejhua nemechnahuatia. ¹⁵ Xoc nemechtocayotia tequichijquej pampa se tequichijquetl xquimati tlen quichihua iteco. Pero nemechtocayotia notetlajsojcahuan pampa yonemechijlij nochi tlen noTajzin onechijlij. ¹⁶ Nemejhuamej xonennechtapejpenijquej, yej nejhua onechtlapejpenij niman onemechtalij ipan notequivu para xhuiyan niman xpiacan miyec tlacyotl yejhuan nocahuas para nochipa. Quemaj noTajzin mechmacas nochi tlen nenuquitlajtlanilisquej ican notoca. ¹⁷ Yehua in, tej, nemechnahuatia: Xmotlajsojtlacan nemejhuamej ihuan ocsequimej.

On tlalticpactlacamej quitlahuelitaj Jesús ihuan inomachtijcahuan

¹⁸ 'Tla on tlalticpactlacamej mechtlahuelitaj, xmatican ica achtopa onechtahuelitaquej nejhua. ¹⁹ Tla nemejhuamej nemohuicasquiaj quen on tlalticpactlacamej yejhuan xnechneltocaj, yejhuamej mechtajsojtlasquiaj‡ quen yejhuamej notlajsojtlaj. Pero nejhua onemechtapejpenij intzajlan on tlalticpactlacamej. Yejhua ica on tlalticpactlacamej mechtlahuelitaj pampa xoc nemohuicaj quen yejhuamej. ²⁰ Xquelnamiquican on tlen onemechijlij: "Xacaj tlaquehuajli más hueyixticaj xquen on iteco." Tla nejhua nechtajlyohuiltiaj, nemejhuamej no mechtajlyohuiltisquej. Niman tla oquitlacamatquej notemachtil, no quitlacamatisquej on yejhuan nemejhuamej nemotemachtil. ²¹ Nuchi in sa nopampa mechchihuilisquej, pampa xquixmatij on yejhuan onechajtitlan.

²² 'Tla nejhua, tej, xniquinhuajnojnotzasquia, yejhuamej xquipiasquiaj tlajtlacojli. Pero aman xacaj huelis quijtos: "Ijcuac onitlajtlacoj, xonicmat ica on tlen onicchiu tlajtlacojli." ²³ Tej, on yejhuan nechtahuelitaj, no quitlahuelitaj noTajzin. ²⁴ Xquipiasquiaj tlajtlacojli, tla xnicchihiwasquia intzajlan on tlen xqueman yacaj oquichiu. Pero miyec tlajtlamach yoquitaquej onicchiu, niman yej nechtahuelitaj niman no quitlahuelitaj noTajzin.

* ^{15:9} les amo † ^{15:13} amigos de él ‡ ^{15:19} amor

²⁵ Pero yejhua in ijquin nochihua para tenquisa on tlajtojli yejhuan tla-jcuiolnesticaj ipan intlanahuatil yejhuan quijtohua: “Onechtlahuelitaquej, pero nion oncaj tlinon ica.”

²⁶ 'Pero nicuajtitlanis on tlapalehuijquetl yejhuan quisas itech noTajtzin. Yejhua on Espíritu Santo yejhuan tecajsicamachiltis on tlen melahuac. Ijcuac yejhua huajlas nechteixpantilis. ²⁷ Niman nemejhuamej no nennechteix-pantilisquej, pampa desde onipeu nitemachtia, nohuan nennemij.

16

¹ 'Nemechijlia in tlajtlamach para ma ca nenmojometlamatisquej niman nennechtlalcahuisquej. ² Mechajquixtisquej ne ipan on tiopantin. Niman aj-sis on tonajli ijcuac san aquinon mechmictis quinemilis ica quitequipanohua Dios. ³ Yejhua in quichihuasquej pampa xqueman oquixmatquej noTajtzin nion nejhua. ⁴ Pero yejhua in nemechijlia para ijcuac ajsis on tonaltin ijcuac ijcon mechchihuilisquej, nenquelnamiquisquej ica nejhua yonemechijlijca.

Jesús oquijtoj on tlen itequiyo on Espíritu Santo

'Ijcuac onipeu onenmechmachtij, xonenmechijlij in tlajtlamach* pampa nejhua nemohuan ninemiya. ⁵ Pero aman ye niau para ninemis ihuan on yejhuan onechajtitlan, niman nion se nemejhuamej nechtlajtoltia ¿canon tiau? ⁶ Yej sanoyej† yonenmajmanquej pampa onemechijlij in tlajtlamach. ⁷ Pero nemechijlia tlen melahuac. Más cuajli para nemejhuamej ma nihuiya, pampa tla nejhua xnias, xhuajlas on tlapalehuijquetl. Pero tla nias, nejhua nicuajtitlanis nemotech. ⁸ Ijcuac yejhua huajlas, quintitis on tlalticpactlacamej ica nemij ipan tlajtlacojli, niman ica huelis quipiasquej yolmelahualistli, niman ica Dios quinyolcuitis niman quintlajtlacolmacas. ⁹ Yejhua quintitis ica tlajtlacolejquej pampa xnechneltocaj. ¹⁰ Yejhua quintitis ica huelis quipiasquej yolmelahualistli, pampa nejhua niau campa nemi noTajtzin, niman nemejhuamej xoc más nennechitasquej. ¹¹ Niman yejhua quintitis ica quinyolcuitis niman quintlajtlacolmacas, pampa on diablo, yejhuan tlamandarohua ipan in tlalticpactli, ye cuajli yoquitlajtlacolmacaquej.

¹² 'Nicpia miyec tlinon más nemechijlis, pero nemejhuamej xhuelis nенcajsicamatisquej aman. ¹³ Pero ijcuac huajlas on Espíritu Santo, yejhuan tecajsicamachiltis on tlen melahuac, yejhua mechmachtis nochitl tlen melahuac pampa xmechijlis sa no yejhua itlamachilis, yej quiijtos nochitl tlen caqui itech noTajtzin. Niman no mechititis on tlajtlamach yejhuan más saquin‡ nochihuas. ¹⁴ Yejhua nechmacas hueyilistli pampa quiselis on tlen melahuac noca nejhua niman mechpantlantilis. ¹⁵ Nochi tlen iyaxca§ noTajtzin, no noyaxca. Yejhua ica oniquijtoj ica on Espíritu Santo quiselis tlen melahuac noca nejhua niman mechpantlantilis.

On ajmantli nocuepas paquilistli

¹⁶ 'Xhuejcajtica yes xoc nennechitasquej, niman quemaj san xhuejcajtica nennechitasquej ocsejpa pampa nejhua niau campa nemi noTajtzin.

¹⁷ Quemaj sequimej nomachtijquej oquinotlajtoltijquej se ihuan ocse:

—¿Tlinon quiijtosnequi ijcuac oquijtoj: “Xhuejcajtica yes niman xoc nennechitasquej, niman quemaj san xhuejcajtica nennechitasquej ocsejpa”, niman ica no oquijtoj: “Pampa nejhua niau campa nemi noTajtzin”? ¹⁸ ¿Tlinon, tej, quiijtosnequi yejhua on ica quijtohua, “xhuejcajtica yes”? Xticajsicamatij tlinon ica technojnotza.

* **16:4** cosas † **16:6** muy ‡ **16:13** después § **16:15** le pertenece; iaxca, ihuaxca, itlatqui

19 Jesús oquimat ica yejhuamej quinequiyaj quitlajtoltisquej, niman oquimijlij:

—Nejhua onemechijlij ica xhuejcäftica yes xoc nennechitasquej niman quemaj san xhuejcäftica más ocsejpa nennechitasquej. ¿In yejhua nenuquimotlajtoltijoquej? **20** Ica tlen melahuac nemechijlia, nemejhuamej nenchocasquej niman nenmajmanasquej, niman on tlalticpactlacamej paquisquej. Pero masqui nenmajmanasquej, nemoajmanalis nocuepas paquillistli. **21** Ijcuac se sihuatl ye quitlacatilis se conetzintli, najmana pampa yoyejcoc on hora para nococos. Pero ijcuac yotlacat on conetzintli, xoc quelnamiqui on tla onococoj, pampa sanoyej paqui ica otlacat se conetl ipan in tlalticpactli. **22** No ijqui nochihuas nemohuan. Aman nenmajmanaj, pero nejhua nihuajlas nemechalitas, niman ijcuacon nemoyojo sanoyej paquis. Niman yejhua on paquillistli xacaj huelis mechcuilis.

23 'Ipan on tonajli xoquitlaj nennechlajtoltisquej. Ica tlen melahuac, tej, nemechijlia ica noTajzin mechmacas nochi tlen nenquitlajtlanilisquej ican notoca. **24** Hasta aman nemejhuamej xe itlaj nenquitlajtlanij ican notoca. Xtlajtlanican tlen nenuquinequisquej niman nenquiselisquej para ajsistas nemopaquilis.

Jesús yoquitlan on yejhuan nochí quech oncaj niman nemij ipan in tlalticpactli

25 'In tlajtlamach yonemechijlij ican ejemplos. Pero yejcos on tonajli ijcuac xoc nemechnojoztas ican ejemplos, yej cuajli nemechnojoztas itech ica noTajzin. **26** Ipan on tonajli nemejhuamej nenquitlajtlanilisquej noTajzin tlajtlamach ican notoca. Niman xniquijtohua tla nejhua nictlajtlanilis itlaj nemopampa, **27** pampa sa no yejhua toTajzin mechtlajsojtlá*. Mechtlajsojtlá pampa nemejhuamej nennechlajsojtlaj niman nenquineltocaj ica nejhua itech onihualeu. **28** Melahuac nejhua oniquis itech noTajzin niman onihuajlaj ipan in tlalticpactli. Niman aman nicajtehuas in tlalticpactli niman ocsejpa nias itech noTajzin.

29 Quemaj on inomachtijcahuan oquijlijquej:

—Aman quemaj cuajli titechnojnotza xoc ican ejemplos. **30** Aman ticmatij ica ticmati nochí tlajtlamach. Niman xpolihui yacaj itlaj mitztlajtoltis, pampa ticmati tlinon se mitztlajtoltisnequi ijcuac xe mitznotza. Yejhua ica in ticneltocaj ica otihualeu itech Dios.

31 Jesús oquimijlij:

—¿Tla ijcon, aman nentlaneltocaj? **32** Tej, ye huajlau on tonajli niman sa no amantzin ijcuac nemejhuamej nemoxeyelosquej. Cada se yas sa canica niman noselti nennechcahuasquej. Pero xnoselti ninemis pampa noTajzin nohuan nemis. **33** Nochi yejhua in nemechijlia para nenquipiasquej yolsehuilistli, pampa san secan nennemij nohuan. Ipan in tlalticpactli nentlajyohuisquej, pero xpiacan yolchicahualistli pampa nejhua yonictlan nochí quech oncaj niman nemij ipan in tlalticpactli.

17

Jesús oquichiu oración impampa on inomachtijcahuan

1 Ijcuac Jesús yotlan quijtohua in tlajtlamach*, oajcotlachix ne ilhuicac, niman oquijtoj:

—NoTajzin, yoyejcoc yejhua on hora. Xnechhueyili nejhua yejhuan nimoConeu para nejhua no ma nimitzhueyili. **2** Tejhua, tej, yotinechmacac

* **16:27** les ama * **17:1** cosas

on poder ipan nochí tlacatl, para niquinmacas nemilistli para nochipa nochimej on yejhuan yotinechinmacac.³ Niman ijcuac se mitzixmati tejhua yejhuan san moselti melahuac tiDios, niman nejhua niJesucristo yejhuan otinechajtitlan, yejhua quipia on nemilistli yejhuan para nochipa.⁴ Nejhua yonitlan on tlen otinechnahuatij nicchihuas. Ijcon, tej, yonimitzhueyilij ipan in tlalticpactli.⁵ Aman, tej, noTajzin, ne campa tinemi, xnechmaca sa no yejhua on hueyilistli yejhuan mohuan nicpiaya ijcuac in tlalticpactli xe oncatca.⁶ On tlacamej yejhuan tejhua otinechinmacac intzajlan on tlalticpactlacamej oniquinmachiltij aquin tejhua. Moyaxcahuan[†] catcaj, niman tejhua otinechinmacac, niman yoquitlacamatquej on tlen otiquijtoj.⁷ Aman quimatztoquej ica nochí tlajtlamach yejhuan otinechmacac hualehua motech,⁸ pampa yoniquinmacac motemachtil yejhuan otinechmacac, niman yejhuatej yoquiselijquej. Aman yejhuatej quimatiij ica melahuac motech onihualeu, niman quineltocaj ica tejhua otinechajtitlan.

⁹ 'Nejhua impampa motech nitlajtlani. Xictlajtlani impampa on tlalticpactlacamej, yej impampa on yejhuan otinechinmacac pampa yejhuatej moyaxcahuan.¹⁰ Nochimej yejhuan noyaxcahuan no moyaxcahuan, niman nochimej yejhuan moyaxcahuan noyaxcahuan, niman yejhuatej nechhueyiliaj.

¹¹ 'Aman nejhua niau para mohuan ninemis. Xoc ninocahuas ipan in tlalticpactli, pero yejhuatej nocahuasquej ipan in tlalticpactli. NoyecTajtzin, xquinmanahui ican mopoder yejhuan otinechinmacac para san secan ma nemican ijcon quen tejhua nohuan tinemi.¹² Ijcuac nejhua inhuan ninemiya ipan in tlalticpactli, on yejhuan otinechinmacac oniquinmanahuij ican mopoder. Oniquinmanahuij niman nion se xopoliu, yej san yejhua on yejhuan ye ijqui oncatca para polihuis para otenquis on tlen quijtohua on Yectlajcuilojli.

¹³ 'Aman ye niau campa tejhua tinemi, pero chica oc‡ ninemi ipan in tlalticpactli niquijtohua in tlajtlamach para yejhuatej ma quipiacan sa no yejhua on paquelistli yejhuan nejhua nicpia.¹⁴ Nejhua yoniquinmacac motemachtil, pero on tlalticpactlacamej quintlahuelitaj, pampa yejhuatej xoc nohuicaj quen on tlalticpactlacamej no ijqui quen nejhua xninojhuica quen on tlalticpactlacamej.¹⁵ Nejhua xnimitztlajtlanilia xquinquixti intzajlan on tlalticpactlacamej, yej nimitztlajtlanilia xquinmanahuij itech on diablo.¹⁶ Ijcon quen xninojhuica quen on tlalticpactlacamej, yejhuatej no xninojhuica quen on tlalticpactlacamej.¹⁷ Xquinchipahuili innemilis itechcopa on tlen melahuac. Motlajtol yejhua tlen melahuac.¹⁸ Ijcon quen tejhua otinechajtitlan campa nemij in tlalticpactlacamej, no ijqui nejhua niquintitlaní campa nemij on tlalticpactlacamej.¹⁹ Niman impampa yejhuatej sa no nejhua ninotemaca para yejhuatej huelis chipahuilosquej ica motlajtoltzin.

²⁰ 'Pero xnicchihua oración san impampa yejhuatej, yej no impampa on yejhuan nechnebtocasquej itechcopa on temachtilistli yejhuan quiteijlisquej on yejhuan yotinechinmacac.²¹ Nimitztlajtlanilia para nochimej yejhuatej ma san secan nemican. Oh, noTajzin, ma yejhuatej san secan tohuan nemican ijcon quen tejhua tinemi niman nejhua mohuan ninemi. Melahuac, tej, ma san secan nemican tohuan para on tlalticpactlacamej ma quineltocacan ica tejhua otinechajtitlan.²² Yejhuatej yoniquinmacac sa no yejhua on hueyilistli yejhuan tejhua otinechmacac para san secan ma nemican, ijcon quen tejhua niman nejhua tinemij san secnec.²³ Nejhua ninemi inhuan

† 17:6 te pertencen; moaxcahuan, mohuaxcahuan, motlatcahuan ‡ 17:13 todavía; sanquen

niman tejhua tinemi nohuan para yejhuamej huajnochihua san se niman ijqui on tlalticpactlacamej huelis quimatisquej ica tejhua otinechajtitlan, niman ica moconeihuán tiquintlajsojtlas quen nejhua tinechtljajsojtlas.

²⁴ 'NoTajtzin, nicnequi para on yejhuan tejhua otinechinmacac nohuan nemisquej campa ninemis para ma quitacan on hueyilistli yejhuan otinechinmacac. Nicpia on hueyilistli pampa otinechtljajsojtlac desde ijcuac in tlalticpactli xe oncatca. ²⁵ NoyecTajtzin, on tlalticpactlacamej xmitzixmatij, pero nejhua nimitzixmati, niman yejhuamej in yejhuan achtopa otinechinmacac ye quimatztoquej ica tejhua otinechajtitlan. ²⁶ Yoniquinmachiltij aquin tejhua, niman oc mocha nitemachiltis para on tetlajsojtlalistli yejhuan tinechpialia ma intech onya, niman para sa no nejhua intech ma ninemi.

18

Jesús ocajsiquej

(Mt. 26.47-56; Mr. 14.43-50; Lc. 22.47-53)

¹ Ijcuac Jesús yotlan quijtohua in tlajtlamach*, oquis inhuan inomachtijcahuán niman oquipanahuitoj on atentli itoca Cedrón. Ompa oncatca se cojtlaquilyoj campa Jesús ocalac inhuan on inomachtijcahuán. ² Judas, on yejhuan quitemactilisquia Jesús, no quixmatia ompa, pampa Jesús miyecpa onosentlalitoya inhuan inomachtijcahuán ompa ne. ³ Niman Judas oajsic ompa inhuan miyequej soldados. Niman oajsic inhuan sequimej ipolicías on tiapan yejhuan ohualajquej ican intlanahuatil on fariseos niman intlayecancahuán on tiopixquej. Yejhuamej yayaj ican armas niman quitquiyyaj inlámparas niman ocopiltin. ⁴ Jesús ye quimatzticatca tlinon ipan nochihuas. Yejhua ohuajnonextij, niman oquintlajtoltij:

—¿Aquinon nenquitejtemohuaj?

⁵ Yejhuamej oquijlijquej:

—Jesús on chanej Nazaret.

Jesús oquimijlij:

—Nejhua ijqui notoca.

Judas, on yejhuan quitemactilij Jesús no ompa inhuan nemiya. ⁶ Niman ijcuac Jesús oquimijlij: “Nejhua ijqui notoca”, ohuajquetztiajquej ipan tlajli.

⁷ Quemaj Jesús ocsejpa oquintlajtoltij:

—¿Aquinon nenquitejtemohuaj?

Niman yejhuamej oquijtojquej:

—Jesús on yejhuan chanej Nazaret.

⁸ Niman Jesús oquimijlij:

—Yonemechijlij ica nejhua. Tla nejhua nennechtejtemohuaj, tla ijcon in ocequimej xquincahuilican ma huiyan.

⁹ Yejhua in onochiu san para otenquis on tlen sa no Jesús oquijtoca: “On yejhuan otinechinmacac nion se xopoliu.” ¹⁰ Quemaj Simón Pedro, yejhuan quipiaya se espada, oquixicopintiaj niman oquitequilij iyecmacopanacas se tlacatl itoca Malco. Yejhua itlaquehual on más hueyi tlayecanquetl catca itech on tiopixquej. ¹¹ Pero Jesús oquijij Pedro:

—Xcalacti moespada ne campa oticxicopin. ¿Tlen ticnemilia xijqui nonequi niquijyohuis on tlajyohuilistli yejhuan noTajtzin oquitlalij para niquijyohuis?

Jesús ocuicaquej ixpan Anás

(Mt. 26.57-58; Mr. 14.53-54; Lc. 22.54)

¹² Quemaj on miyequej soldados ihuan intlayecancau niman impolicías on hebreos ocajsiquej Jesús, niman oquisalojquej. ¹³ Quemaj ocuicaquej itech Anás. Anás imonta catca Caifás yejhuan ipan on xipan más hueyi tlayecanquetl catca intech on tiopixquej. ¹⁴ Yejhua in Caifás sa no yejhua yejhuan oquimijlijca on hebreos ica más cuajli para yejhuamej tla miquis se tlacatl ipampa on país.

Pedro oquineneç Jesúç

(Mt. 26.69-70; Mr. 14.66-68; Lc. 22.55-57)

¹⁵ Simón Pedro ihuan ocse nomachtijquetl quicuitlapanhuijtiayaj Jesús. On ocse nomachtijquetl quixmatiya on más hueyi intlayecancau on tiopixquej. Yejhua ica no ihuan Jesús ocalac ipan iquiahuac on tlayecanquetl. ¹⁶ Pero Pedro onocajca ne quiahuatenco. Yejhua ica on nomachtijquetl yejhuan quixmatiya inmás hueyi tlayecancau on tiopixquej oquisaco niman otlajtlajtoj ihuan on sihuatl yejhuan tlapixqui ne quiahuatenco, niman ocalactij Pedro. ¹⁷ Quemaj on sihuatl yejhuan tlapixqui ne quiahuatempan ijquin oquitlajtoltij Pedro:

—¿Tlen tejhua xno tiitemachtijcau on tlacatl?

Pedro oquijtoj:

—Ca, nejhua ca.

¹⁸ On tetequichihuiliijquej niman on policías oquitlalijcaj tlilt de tecoji niman majmaniyaj ica nototonijticatcaj pampa seuaya. Pedro no ompa inhuan nemiya chica nototonijticatca itech on tlilt.

On más hueyi intlayecancau on tiopixquej oquiyolcuitij Jesúç

(Mt. 26.59-66; Mr. 14.55-64; Lc. 22.66-71)

¹⁹ On tlayecanquetl intech on tiopixquej oquitlajtoltij Jesús ica on ino-machtijcahuau, niman ica on tlen quitemachtiaya. ²⁰ Jesús oquimijlij:

—Nejhua teixpan onitlajtlajtoj ixpan nochitlacatl. Nochipa nitemachtiaya ipan on tiopantin niman ipan on hueyi tiopan campa nosentlaliaj nochimej on hebreos. Ijcon, tej, xitlaj† san oniquichtacajtoj. ²¹ ¿Tlica† nejhua tinechtlajtoltia? Xquintlajtolti on yejhuan nechcaquiyaj. Yejhuatej ma quijtocan tlilon niquimijliaya. Yejhuatej quimatztoquej tlilon notemachtil.

²² Ijcuac Jesús ijcon oquijtoj, se ipolicía on hueyi tiopan yejhuan ompa nemiya oquixayacahuitectiaj, niman oquijlij:

—¿Ijcon ticnanquilia on más hueyi intlayecancau on tiopixquej?

²³ Jesús oquijlij:

—Tla itlaj xmelahuac oniquijtoj, xquijto tlica xmelahuac. Pero tla melahuac on tlen oniquijto, ¿tlica, tej, tinechmailia?

²⁴ Quemaj Anás oquititlan itech Caifás on yejhuan inmás hueyi tlayecancau on tiopixquej. Jesús oc§ salijtiaya.

Pedro oquineneç Jesúç ocpa más

(Mt. 26.71-75; Mr. 14.66-72; Lc. 22.58-62)

²⁵ Chica Pedro oc nototonijticatca ne itech on tlilt, oquijlijquej:

—¿Tejhua xnotiitemachtijcau on tlacatl?

Niman Pedro oquineneç*, oquijtoj:

—Ca, nejhua ca.

²⁶ Quemaj se itequichihuiliijcau on tlayecanquetl itech on tiopixquej, yejhuan quen quitaya on tlacatl yejhuan Pedro oquinacastzonoteca, ijquin oquitlajtoltij Pedro:

† 18:20 nada; coxtla ‡ 18:21 ¿por qué?; ¿tline? § 18:24 todavía; sanquen * 18:25 negó

—¿Xihuan onimitzitac ne ipan cojtlaquilyoj?

²⁷ Pedro ocsejpa oquinene, niman nimantzin otzajtzic se caxtil†.

Pilato oquiyolcuitij Jesús

(Mt. 27.1-2, 11-14; Mr. 15.1-5; Lc. 23.1-5)

²⁸ Quemaj oquejcuani quej Jesús ne ichan Caifás niman ocuicaquej ne ipan ipalacio on gobernador. Ye huajtlanestiaya niman on hebreos xocalaquej ne ipan on palacio para ma ca njtlacosquej ixpan Dios. Tla njtlacosquej ixpan Dios xhuelis quicuasquej on tiotlac tlajcuajli ipan on ilhuitl pascua. Yehua ica xocalaquej ne ipan on palacio. ²⁹ Yehua ica Pilato ohuajquis para oquinnotz, niman oquimijlij:

—¿Tlinon ica nenquiteixpanhuiyaj yejhua in tlacatl?

³⁰ Yehuamej oquijlijquej:

—Tla yejhua xquichihuasquia on tlen xcuajli xtimitzajhuiquilisquiaj.

³¹ Quemaj Pilato oquimijlij:

—Xcuicacan. Nemejhuatej xyolcuitican niman xtlajtlacolmacacan quen no nemotlanahuatil.

On hebreos oquijlijquej:

—Pero itlanahuatil César xtechcahuilia yacaj ticmictisquej.

³² Ijcon otenquis on tlen Jesús oquijtojca ica yejhua ijcon miquis.

³³ Pilato ocsejpa ocalquito ne ipan ipalacio, oconotz Jesús niman ijquin oquitlajtoltij:

—¿Tejhua tiinRey on hebreos?

³⁴ Jesús oquijlij:

—¿Yehua on tlen tictlajtlani san tejhua ticonnemilia, noso pampa yej ocequimej omitzijlijquej aquin nejhua?

³⁵ Pilato oquijlij:

—¿Tlen ticnemilia ica nejhua nihebreo? On mochantlacaj‡ niman on tlayecanquej tiopixquej yejhuatej omitztemacaco notech. ¿Tlen tlinon oticchii?

³⁶ Ijcuacon Jesús oquinanquilij:

—Nejhua xnitlamandarohua nican ipan in tlalticpactli quen se rey. Tla nitlanahuatisquia nican, on yejhuan nohuan quistinemij nechmanahuisquiaj para nejhua xnechtemacasquiaj intech on hebreos. Pero nejhua xnitlamandarohua nican ipan in tlalticpactli.

³⁷ Quemaj Pilato oquijlij:

—Tla ijcon, tej, ¿tejhua tiRey?

Jesús oquinanquilij:

—Nejhua niRey quen tejhua tiquijtohua. Nejhua onitlacat niman onihualaj ipan in tlalticpactli para onicteixpantilico on tlen melahuac. Nochimej yejhuan quitlacamatij on tlen melahuac, caquij tlen nejhua niquijtohua.

³⁸ Pilato oquijlij:

—¿Niman catlejhua on tlen melahuac?

Jesús oquitlajtlacolmacaquej ican miquilistli

(Mt. 27.15-31; Mr. 15.6-20; Lc. 23.13-25)

Ijcuac ijcon yoquitlajtoltij, ocsejpa ohuajquis para oquinnotz on hebreos, niman oquimijlij:

—Xitlaj nicnextilia tla itlaj tlanahuatiijli xoquitlacamat in tlacatl. ³⁹ Pero ye ijqui huajnochijtiu para nocahua para nemechmacahuilia se yejhuan tzacuticaj ipan in hueyi ilhuitl pascua. ¿Nenquinequij, tej, ma nemechmacahuili inRey on hebreos?

† 18:27 gallo ‡ 18:35 tus paisanos

40 Ijcuacon nochimej otzajtziquej:
—¡Yejhua on ma ca xmacahua! ¡Xmacahua Barrabás!
Niman Barrabás, se tlachtequel catca.

19

1 Quemaj Pilato oquimayau Jesús niman otlanahuatij ma quitlatzhuitequican. **2** Yehuamej on soldados oquichijchijquej se huitzcorona niman oquimaniltijquej Jesús. Niman no oquitlaquentijquej ican se tlaquentli morado. **3** Quemaj oquinisihuijquej, niman oquijlijquej:

—¡Cuajli xnemi, tiinRey on hebreos!
Niman oquixayacahuijhuitequej.

4 Quemaj Pilato ocsejpa ohuajquis, niman oquimijlij on hebreos:
—Xquitacan, nican nicuajhuica para xmatican ica xitlaj* nicnextilia tlen xcuajli oquichiu.

5 Niman Jesús ohuajquis cuajmantiaya ihuitzcorona niman huajtlaquemejtitiaya ican on tlaquentli morado. Quemaj Pilato oquimijlij:

—¡Xquitacan, nican nemi in tlacatl!

6 Ijcuac on tlayecanquej tiopixquej niman on policías oquitaquej Jesús, opejquej tzajtzi:

—¡Xmajmasohualti† ipan cojnepanojli‡! ¡Xmajmasohualti ipan cojnepanojli!
Pilato oquimijlij:

—Nemejhuamej xcuican niman xmajmasohaultican ipan cojnepanojli, pampa nejhua nion se itlajtlacol xonicnextili.

7 Pero on hebreos oquijlijquej:

—Tejhuamej ticpiaj se tlanahuatijli niman totlanahuatil quijtohua ica oncaj miquis, pampa yonoteneu iConetzin Dios.

8 Ijcuac Pilato ijcon ocac, más sanoyej§ onomojtij. **9** Ocsejpa ocalaquito ne ijtic on palacio, niman oquitlajtoltij Jesús:

—¿Canon tihualehua tejhua?

Pero Jesús xitlaj ica oquinanquilij.

10 Niman Pilato oquijlij:

—¿Xitlaj ica tinechnanquila? ¿Tlen xticmati ica nicpia tequihuajyotl para nimitzmajmasohaultis ipan cojnepanojli niman no nicpia tequihuajyotl para nimitzmacahuas?

11 Jesús oquijlij:

—Xticpiasquia itlaj tequihuajyotl nopan tla Dios xmitzmacasquia. Yejhua ica quipia más hueyi tlajtlacojli xquen tejhua on yejhuan motech onechtemacac.

12 Quemaj Pilato quitejtemohuiliaya quen ijqui quimacahuasquia Jesús, pero on hebreos ijquin oquitzajtzilijquej:

—¡Tla ticmacahuas, xtiitetlajsojcau* César on hueyi tlayecanquetl yejhuan tequihuaj ipan on país itoca Roma! ¡San aquinon yejhuan nochihua rey, yejhua nochihua itlahuelicniu César!

13 Quemaj ijcuac Pilato ijcon ocac, otlanahuatij ma cuajquixtitij Jesús niman yejhua ohuajnotlalij ne ipan nesehuilpan campa tequihuajti niman tetlajtlacolmaca. Ne campa onotlalij ican tlajtojli hebreo quitocayotiayaj Gabata. Quijtosnequi on tepejpechyoj†. **14** Ijcuacon canaj tlacualispán catca ipan on tonajli ijcuac xe ajsi on ilhuitl pascua. Quemaj Pilato oquimijlij on hebreos:

* **19:4** nada; coxtla † **19:6** crucifícale ‡ **19:6** cruz § **19:8** muy * **19:12** no eres amigo

† **19:13** empedrado o enlosado

—¡Nican nemi nemoRey!

¹⁵ Pero yejhuamej otzajtziquej:

—¡Ma miqui! ¡Ma miqui! ¡Xmajmasohuáltican ipan cojnepanojli!

Pilato oquimijlij:

—¿Tla ijcon, nenquinequij ma nicmajmasohuáltia ipan cojnepanojli nemoRey?

Pero on tlayecanquej tiopixquej oquijlijquej:

—Tejhuamej xticpiaj ocse rey. Torey san yejhua César.

¹⁶ Yejhua ica on, Pilato oquinmactilij para ma quimajmasohuáltican ipan cojnepanojli, niman on soldados ocuicaquej.

Jesús ocacopilojquej

(Mt. 27.32-44; Mr. 15.21-32; Lc. 23.26-43)

¹⁷ Jesús, tej, oquis oquimamajtiaj icojnepanol† para oyaj ne campa quito-cayatiaj Micatzontecomatl, yejhuan ican on tlajtojli hebreo itoca Gólgota.

¹⁸ Ompa, tej, oquimajmasohuáltiquej§ ipan cojnepanojli. Niman ihuan yejhua omemej más oquinmajmasohuáltiquej ipan cojnepanoltin inaj-nacastlan niman Jesús intlajcotian. ¹⁹ Pilato oquijcuiloj se tlajcuilojli niman otlanahuatij ma quitlalitij ne ipan on cojnepanojli. On tlajcuilojli quijtohuaya: “In Jesús yejhuan chanej Nazaret yejhua inRey on hebreos.”

²⁰ Miyequej hebreos oquinomachtijkej on tlajcuilojli pampa on campa oquimajmasohuáltiquej Jesús ipan cojnepanojli xhuejca oncatca itech on hueyican. Niman on tlajcuilojli tlajcuilnesticatca ican tlajtojli hebreo, griego niman latín. ²¹ On tlayecanquej tiopixquej hebreos oquijlijquej Pilato:

—Ma ca xquijcuilo “InRey on hebreos.” Más cuajli xquijcuilo: “In tlacatl notenehua inRey on hebreos.”

²² Pero Pilato oquimijlij:

—Tlen yoniquijcuiloj, yoniquijcuiloj.

²³ Ijcuac on soldados yoquimajmasohuátiquej Jesús ipan cojnepanojli, oquitilanquej itlaquen niman naucantipan oquixelojquej, niman sejsetemej oquicuiquej. Niman no oquitilanquej itlaquen pani, itoca manto, yejhuan xtlajtzontli catca yej san se hueyi catca. ²⁴ On soldados oquinojlijquej:

—Ma ca ma tictzajtzayanacan. Más cuajli ma titotlatlanican para tiquitasquej aquinon tetlanis yejhua quicuis.

Ijcon, tej, otenquis on Yectlajcuilojli yejhuan quijtohua: “Oquinoxex-elohuilijquej notlaquen niman ica on nomanto onotlatlanquej para ones aquinon iyaxca* yes.” Ijcon, tej, oquichijquej on soldados.

²⁵ Itech icojnepanol Jesús ompa nemiya inan niman icniu on inan yejhuan sihuatl. María on isihuau Cleofas no ompa nemiya ihuan María yejhuan hualehua Magdala. ²⁶ Ijcuac Jesús oquitac inan ihuan ijcac on nomachtijquetl yejhuan sanoyej oquitlajsojtlac†, oquijlij inan:

—Sihuatl, ompon nemi moconeу.

²⁷ Quemaj oquijlij on nomachtijquetl:

—Ompon nemi monan.

Niman ijcuacon on nomachtijquetl oquiselij ne ichan quen inan.

Jesús onotlamiliј

(Mt. 27.45-56; Mr. 15.33-41; Lc. 23.44-49)

²⁸ Quemaj ijcuac nochí yejhua in yopanoc, Jesús quimatzticatca ica nochí itequiu yotlan, niman para otenquis on Yectlajcuilojli, oquijtoj:

‡ 19:17 su cruz § 19:18 le crucificaron * 19:24 le pertenece; iaxca, ihuaxca, itlatqui † 19:26 le amó

—Namiqui.

²⁹ Ompa oncatca se jarro tenticatca ican on xococ vino. Yehua ica oquipatzojquej se esponja ican on vino. Quemaj oquitlalijquej ipan se acatl, niman ocontlalilijquej ne ipan icamac. ³⁰ Ijcuac Jesús oquimat on xococ vino, oquijtoj:

—Nochi cuajli yonitenquis.

Quemaj onotzonacapiloj, niman ohuajnotlamilij.

Sen soldado oquitzopinij Jesús ijtinacastlan ican ilanza

³¹ On hebreos oquitlajtlanilijquej Pilato ma tlanahuati ma quimicxipo-ipostequeican on yejhuan oquinmajmasohuaultiquej† ipan incojnepanol§, niman ma quimejcuancan on intlalnacayo ne ipan incojnepanol. Ijcon oquitlajtlanilijquej Pilato pampa ye viernes catca niman xquinequiyaj para on tlalnacayomej nocahuasquej ne ipan cojnepanoltin ipan sábado on tonajli ijcuac nosehuijaj on hebreos. Niman yehua in sábado más hueyixticatca xquen ocsequi sábados pampa ye ajsiticatca on ilhuitl pascua. ³² Quemaj on soldados oyajquej niman oquicxipostequej on achtoj tlacatl, niman quemaj quej on ocse tlacatl yejhuan nopilcaya itech ica Jesús. ³³ Pero ijcuac on soldados oyajquej itech Jesús oquitaquej ica yomic. Yehua ica xoc oquicxipostequej.

³⁴ Pero se soldado oquitzopinij ijtinacastlan ican ilanza. Quemaj nimanzi oquis yestli niman atl. ³⁵ Nochi yehua in cuajli oniquitac. Nemehijlia on tlen oniquitac niman toTeco quimati ica nemehijlia on tlen melahuac. Nejhua nemehijlia yejhua in para nemejhuamej no xneltocakan. ³⁶ In tlajtlamach* onochiu para otenquis on Yectlajcuilojli campa quiytohua: “Nion se iomiyo xquipostequilisquej.” ³⁷ Niman ocsecan no quiytohua: “Quitasquej on yejhuan oquitzopinijquej.

Jesús oquitlaltocaquej

(Mt. 27.57-61; Mr. 15.42-47; Lc. 23.50-56)

³⁸ Más saquin† ijcuac ijcon yonochiu, José, on yejhuan chantiya ne Arimatea, oquitlajtlanilij permiso Pilato para quitquis itlalnacayo Jesús. José san ichtaca‡ inomachtijcau catca Jesús, pampa quinmacasiya on hebreos. Pilato ocahuilij, niman José oyaj niman oquitquic itlalnacayo Jesús. ³⁹ No ijqui Nicodemo, on yejhuan achtoj oyajca quinotzato Jesús ijcuac tlayohua, oajsic niman cuajquiya canaj sempaojli§ huan majtlactli kilos ajhuiyalistin tlachijchiutli ican mirra niman iyayo se xojtli itoca áloes. ⁴⁰ Ijcon, tej, José niman Nicodemo oquitquiquej itlalnacayo Jesús, niman oquitetejcuixquej ica on tlaquentli* fino itoca lienzo yejhuan oquitlalilijquej on se tlaneloltipan ajhuiyalistli. Oquichijquej quen quichihuaj on hebreos ijcuac quintocaj on mimiquej. ⁴¹ Ne campa oquimajmasohuaultiquej† Jesús ipan cojnepanolji‡ oncatca se cojtlaquilyoj. Niman ipan on cojtlaquilyoj oncatca se yencuic tlalcontli ijtic se teostotl campa xe yacaj contocayaj. ⁴² Ompa oquitlalijquej itlalnacayo Jesús pampa on tlalcontli nisu oncatca, niman pampa ye pehuaya on tonajli ijcuac nosehuisquej on hebreos.

‡ **19:31** le crucificaron § **19:31** cruces de ellos * **19:36** cosas † **19:38** después ‡ **19:38**

secreto § **19:39** Sempoajli quitosnequi veinte, niman sempaojli huan majtlactli quitosnequi treinta.

* **19:40** vendas † **19:41** le crucificaron ‡ **19:41** cruz

20

*Jesús oyoliu niman onoquetzteu ipan itlalcon
(Mt. 28.1-10; Mr. 16.1-8; Lc. 24.1-12)*

¹ Saniman ipan on achtoj tonajli ipeuyan on semana, ijcuac oc* tlayohuatox catca, María, yejhuan chantiya ne ipan on pueblo itoca Magdala, oyaj ne itech on tlalcontli. Niman ijcuac oajsic, oquitac ica xoc ompa oncatca on tetl yejhuan quitentzacuticatca on teostotl. ² Quemaj onotlaloj ne campa nemiyaj Simón Pedro niman on nomachtijquetl yejhaun Jesús sanoyej† quitlaosjtolaya‡, niman oquimijlij:

—Yoquejcuanijquej toTeco ne ipan itlalcon niman xticmatij canon ocahuatoj.

³ Quemaj Pedro niman on ocse nomachtijquetl oquisquej niman oyajquej ne itech on tlalcontli. ⁴ On omemej notlajtlalohuayaj, pero on ocse más sanoyej onotlaloj xquen Pedro niman achtopa yejhua oajsic itech on tlalcontli ne ijtic on teostotl. ⁵ Onopachoj para ontlachix ijtic on tlalcontli niman san oquitac ompa oncaj on tlaquentin§ istaquej, pero xocalaquito.

⁶ Quemaj Simón Pedro oajsic icuitlapan niman ocalaproto ne ijtic on tlalcontli. Yejhua no oquitac ompa oncaj on tlaquentin istaquej. ⁷ Niman no oquitac on tlaquentli* yejhuan ica ocuatejcuixcaj Jesús. On tlaquentli yejhuan ica ocuatejcuixcaj xsan secan oncatca ihuan on tlaquentin istaquej, yej tepayolijtacca niman ocsecan oncatca. ⁸ Quemaj no ocalaproto on ocse nomachtijquetl yejhuan achtopa oajsic. Ijcuac cuajli oquitac tlinon yonochiu, oquineltocac ica Jesús nemi. ⁹ Yejhuamej, tej, oc xe cajscamatijay on Yectlajcuilojli yejhuan quijtohua ica Jesús ica oncatca yolihuis niman noquetztehuas ne ipan itlalcon. ¹⁰ Quemaj yejhuamej on nomachtijquej oyajquej para inchan.

*Jesús oquinotitij María yejhuan chanej Magdala
(Mr. 16.9-11)*

¹¹ Pero María onocau ne quiahuac itech on tlalcontli niman chocaya. Chica chocaya, onopachoj para ontlachix ijtic on tlacontli, ¹² niman oquintac omemej ilhuicactequitquej† ican intlaquen istac. Yejhuamej yejyehuaticatcaj ne campa oncatca on itlalnacayo Jesús. Ocse yehuaticatca ne campa itzontlan niman se ne icxitlan. ¹³ Niman on ilhuicactequitquej oquitlajtoltijquej:

—Sihuatl, ¿tlica‡ tichocaticaj?

Yejhua oquimijlij:

—Pampa yoquejcuanijquej noTeco niman xnicmati canon ocahuatoj.

¹⁴ Quemaj ijcuac ijcon oquijtoj, onocuep niman oquitac Jesús ica ompa nemija, pero xquimatiya ica yejhua Jesús. ¹⁵ Quemaj Jesús oquitlajtoltij:

—Sihuatl, ¿tlica tichocaticaj? ¿Aquinon tictejtemohua?

Yejhua oquinemilij ica on aquin oquinotz, yejhua on yejhuan quitlapia on cojtlaquilyoj. Yejhua ica oquijlij:

—Señor, tla tejhua oticuicac, xnechijli canon oticau para nejhua nicuicas.

¹⁶ Ijcuacon Jesús oquijlij:

—¡María!

Yejhua onocueptiquis itech, niman oquijlij ican tlajtojli hebreo:

—¡Raboni! —yejhuan quijtosnequi Temachtijquetl.

* **20:1** todavía; sanquen † **20:2** mucho ‡ **20:2** amaba § **20:5** sábanas * **20:7** tela † **20:12** ángeles: Angeles tequitij ne ilhuicac niman nican ipan tlalticpactli. ‡ **20:13** ¿por qué?; ¿tline?

17 Jesús oquijlij:

—Ma ca xnechquitzqui pampa oc§ xe nitlejcohua ne itech noTajzin. Pero xhuiya niman xquimijliti on nocnihuan ica nitlejcohua ne itech noTajzin niman nemoTajzin, itech noDios niman nemoDios.

18 Quemaj María on yejhuan chanej ne Magdala oyaj quinmachiltito on nomachtijquej ica yejhua yoquitac inTeco, niman ica yejhua oquijlij in tlajtlamach*.

Jesús oquinnotitij on inomachtijcahuán

(Mt. 28.16-20; Mr. 16.14-18; Lc. 24.36-49)

19 Sa no ipan on tonajli, on achtōj tonajli ipeuyan on semana ijcuac tlayohua, on nomachtijquej onosentlalijquej ipan se cajli. Cuajli oquintza-jtzacuquej on tlatzacuiloj† pampa quinmacajsiyaj on hebreos. Masqui cuajli tlatzajtzacutoyaj, Jesús ocalac niman onotelquetztajsic ne intlajcotian, niman ijquin oquintlajpaloj:

—Xyolsejtiacan nemejhuamej.

20 Ijcuac ijcon yoquimijlij, oquintitij imahuan campa oquitzopinijcaj, niman no ijtinacastlan. Niman on nomachtijquej sanoyej opacquej ica oquitaquej inTeco. **21** Quemaj Jesús ocsejpa oquimijlij:

—Xyolsejtiacan nemejhuamej. Ijcon quen noTajzin onechajtitlan, no ijqui nemechtitlani.

22 Niman ijcuac ijquin oquijtoj, oquimilpitz niman oquimijlij:

—Xselican on Espíritu Santo. **23** Tla nemejhuamej nenquintlapojoahuiliaj intlajtlacolhuan on tlacamej, intlajtlacolhuan pojpolihuisquej. Niman tla xnenquintlapojoahuiliaj intlajtlacolhuan, intlajtlacolhuan xpojpolihuis.

Jesús oquinotitij Tomás

24 Pero Tomás yejhuan tehuan caxitia on majtlactli huan ome nomachtijquej, niman yejhuan cuitiaj cohuatzin‡, xompa inhuan nemiya ijcuac ohualajca Jesús. **25** Yejhua ica on ocsequimej nomachtijquej oquijlijquej:

—Yotiquitaquej toTeco.

Pero Tomás oquimijlij:

—Tla nejhua xniquita imahuan campa otlajtlacaj on clavos, niman xompa nicalactia nomajpil, niman no xnicalactia noma ipan ijtinacastlan, xnicneltocas ica nemí.

26 Chicueyi tonajli más saquin§, on nomachtijquej ocsejpa onosentlalijquej ipan se cajli, niman ijcuacon ompa inhuan nemiya Tomás. Quemaj, masqui tlatzajtzacutoya cuajli, Jesús ocalac, onotelquetz intlajcotian niman oquintlajpaloj, oquimijlij:

—Xyolsejtiacan nemejhuamej.

27 Quemaj oquijlij Tomás:

—Nican xcalacti momajpil ipan nomahuan. Xquintaj nomahuan. Niman xcuajqui moma niman xcalacti nican nojtinacastlan. Ma ca sa xometlamatz-tia, yej xnechneltoca.

28 Ijcuacon Tomás oquijlij:

—¡NoTeco niman noDios!

29 Jesús oquijlij:

—Tomás, tejhua otitlaneltocac pampa otinechitac. Quintiochihiwasquej sanoyej on yejhuan xonechitaquej niman otaneltocaquej.

On tlinon para onijcuiloj in tlajcuilolamatl

³⁰ Niman Jesús oquichiu ocsequi miyec milagros imixpan on inomachti-cahuau yejhuan xtlajcuilolnesticaj ipan in tlajcuilolamatl. ³¹ Pero yejhua in tlen onijcuiloj, onijcuiloj para nemejhuamej xneltocacan ica Jesús yejhua Cristo iConetzin Dios, niman para ijcuac nenquineltocasquej nenquipiasquej yencuic nemilistli itechcopa Jesucristo.

21

Jesús oquinnottitij chicomemej inomachtijcahuau

¹ Ijcuac ijcon yonochiu, Jesús ocsejpa oquinnottitij on inomachtijcahuau ne itenco on mar itoca Tiberias. Ijcuacon ijquin oquinnottitij. ² Simón Pedro, Tomás, on yejhuan cuitiayaj cohuatzin*, niman Natanael yejhuan chantiya ne Caná de Galilea, iconehuan Zebedeo, niman ocse omemej inomachtijcahuau Jesú san secan nemiyaj. ³ Simón Pedro oquimijlij:

—Nejhua nomichajsis.

Yejhuamej on ocsequimej oquijlijquej:

—Tejhuamej no mohuan tiasquej.

Yejhua ica oyajquej niman otlejcoquej ipan se barco. Pero ipan nochí on tlayohua xitlaj† michin ocajsiquej. ⁴ Ijcuac ye huajtlanestiaya, Jesús nemiyaj ne itenco on mar, pero on nomachtijquej xquimatiyaj ica yejhua. ⁵ Quemaj oquimijlij:

—Noconeuhan, ¿xitlaj michin nencajsij?

Niman yejhuan oquijlijquej:

—Ca. Xitlaj ticajsij.

⁶ Quemaj Jesús oquimijlij:

—Xconchapanican nemomatlau iyecmacopa on barco niman nenquimajsisquej michimej.

Ijqui oquichijquej niman quemaj xoc hueliyaj quixtiayaj on inmatlau ne ijtic on atl pampa sanoyej‡ miyec michin ijtic huajlaya. ⁷ Quemaj on nomachtijquetl yejhuan Jesús sanoyej quitlajsojtlaya§, oquijlij Pedro:

—¡Yejhua toTeco!

Niman ijcuac Simón Pedro ocac ica yejhua inTeco, nimantzin onotlaquentijtihuetz pampa onotlaquenquixtijca. Quemaj ijcuac onotlaquentij, onatlaical. ⁸ Xhuejca nemiyaj de ne atentli, san canaj cien metros. Niman on ocsequimej nomachtijquej oajsiquej ne itenco on atl ipan on barco. Yejhuan quitejchihuilantiajquej on inmatlau yejhuan tentiaya ican michimej. ⁹ Ijcuac oajsiquej ipan tlajli, oquitaquej tlitl niman ipan on tlixochtli oncatcaj michin niman pan. ¹⁰ Jesús oquimijlij:

—Xquinhuajhuicacan sequimej michimej yejhuan quemach onenquimasiquej.

¹¹ Simón Pedro otlejcoc ipan on barco niman oquitejchihuilantiaj on matlatl hasta ne ipan on atentli tentiaya ican michimej huejhueyimej. Ocajsiquej yeysi ciento huan tlajco ipan yeysi huejhueyi michin. Niman masqui sanoyej miyec catca, on matlatl xotzayan. ¹² Quemaj Jesús oquimijlij:

—Xhuajlacan niman xtlacuacan.

Niman nion se nomachtijquetl xoquinemilij quitlajtoltis aquin yejhua pampa quimatzticatcaj ica yejhua inTeco. ¹³ Quemaj Jesús oquinnisihiij, niman ocontilan on pan niman oquinmacac, niman sa no ijqui oquichiu ican on michin.

* ^{21:2} gemelo † ^{21:3} nada; coxtla ‡ ^{21:6} muy § ^{21:7} quería

¹⁴ In, tej, ica yexpa oquinnotitij Jesús on inomachtijcahuān ijcuac yoyoliu* niman yonoquetzteu ne ipan itlalcon.

Jesús oquiyolcuitij Simón Pedro

¹⁵ Ijcuac yotlacuajquej, Jesús oquitlajtoltij Simón Pedro:

—Simón, iconeu Jonás, ¿más tinechtlajsojtla† xquen yejhamej in?

Pedro oquijlij:

—Quemaj. NoTeco, tejhua ticmati ica nimitztlajsojtla.

Jesús oquijlij:

—Tla ijcon xquintlacuālti noborreguitos.

¹⁶ Ica ocpa ocsejpa oquitlajtoltij:

—Simón, iconeu Jonás, ¿tinechtlajsojtla?

Pedro oquijlij:

—Quemaj. NoTeco, tejhua ticmatzticaj ica nimitztlajsojtla.

Yejhua oquijlij:

—Tla ijcon xquintlapia noborregos.

¹⁷ Ica yexpa oquitlajtoltij:

—Simón, iconeu Jonás, ¿tinechtlajsojtla?

Pedro onajman pampa ica yexpa oquitlajtoltij tla quitlajsojtla, niman yejhua oquijlij:

—NoTeco, tejhua nochī ticmati. Tejhua ticmatzticaj ica nimitztlajsojtla.

Jesús oquijlij:

—Tla ijcon xquintlacuālti noborregos. ¹⁸ Ica tlen melahuac nimitzijlia ica ijcuac más ticonetl catca, san tihuajmotlaquentiaya niman tiaya campaca tejhua ticnequiya, pero ijcuac ye tihuehuentzin yes, san tiquinhuajmelahuas momahuan niman ocse mitztlquentis, niman mitzhuicas campa xticnequis tias.

¹⁹ Ijcuac Jesús ijcon oquijtoj, oquipantlantilij quen ijqui Pedro miquis niman ijqui quihueyilis Dios. Quemaj oquijlij:

—¡Xhuajla nohuan!

²⁰ Quemaj Pedro ohuajnocuep, niman oquitac ica quicuitlapanhuiya on nomachtijquetl yejhuan Jesús sanoyej quitlajsojtlaya. On yejhua on nomachtijquetl yejhuan ijcuac otlacuaquej inacastlan Jesús nemiya, niman oquitlajtoltij: “NoTeco, ¿aquinon on yejhuan mitztemacas?” ²¹ Niman ijcuac Pedro ocontac, ijquin oquitlajtoltij Jesús:

—NoTeco, niman yejhua in yej †tlinon ipan nochihuas?

²² Jesús oquijlij:

—Tla nejhua nicnequi para yejhua ma nemi hasta ijcuac ocsejpa nihuajlas, †tlin ticmati tejhua? Tejhua xhuajla nohuan.

²³ Yejhua ica omachiyato intech on nomachtijquej ica on nomachtijquetl xmiquis. Pero Jesús xoquijlij ica yejhua xmiquis, yej oquijtoj: “Tla nejhua nicnequi para yejhua nemis hasta ijcuac ocsejpa nihuajlas, †tlin ticmati tejhua?”

²⁴ Yejhua in nomachtijquetl yejhua quiteixpantilia nochī quen oquitac in tlajtlamach‡, niman oquijcuiloj nochī in tlajtlamach ipan in tlajcuilolamatl. Niman ticmatij ica on tlen quijtohua, yejhua tlen melahuac. ²⁵ Niman no oncaj ocsequi miyec tlajtlamach yejhuan Jesús oquichiu. Niman nicnemilia ica tla niquijcuilosquia cada se de nochī on tlajtlamach, xonyasquia canon quintalisquia ipan in tlalticpactli para nochī on tlajcuilolamamej. Ma ijqui nochihuas.

* ^{21:14} resucitó; yoyol

† ^{21:15} me amas

‡ ^{21:24} cosas

LOS HECHOS ON TLIN OQUICHIJQUEJ ON APOSTOLES

Jesús oquimijlij ica huajlas on Espíritu Santo

¹ NotlajsojcaTeófilo, ipan on achtoj tlajcuilolamatl oniquicuiloj noch i ca on tlajtlamach* tlen Jesús oquichiu niman oquitemachtij ijcuac opeu ite-
quiui ² hasta ijcuac yejhua otlejcoc ne ilhuicac. Ijcuac yejhua xe tlejco-
huaya ne ilhuicac, ica ipoder on Espíritu Santo, Jesús oquinnahuatij tli-
non quichihuasquej on tlacamej yejhuan oquintapejpenij quen iapóstoles.
³ Oquinnotitij saquin† ijcuac yotlajyohuij niman yomic, niman oquichiu
miyec tlajtlamach para yejhuan quimatisquej ica melahuac yolticaj. Ijcon
quinnonextijtinemiya hasta ipan ompoajli‡ tonaltin, niman quinnojnotzaya
quen Dios tlanahuatia.

⁴ Chica oc§ nemiya ihuan on iapóstoles ijquin oquinnahuatij Jesús:
—Ma ca xquisacen Jerusalén, yej xchacan para nenquiselisquej on Espíritu
Santo yejhuan toTajzin oquijtoj ica mechajtitlanilis ijcon quen nejhua one-
mechijlij. ⁵ On melahuac ica Juan otlacuatequij ican atl, pero xhuejcajticaj
yes nemejhuamej nentlacuatequiltiyesquej ican on Espíritu Santo.

Jesús otlejcoc ne ilhuicac

⁶ Ijcuac on apóstoles onosentlalijquej ihuan Jesús, ijquin oquitlajtoltijquej:
—ToTeco, ¿ipan in tonaltin ticmanahuis yejhua in país de Israel para
ocsejpa iselti noyecanas?

⁷ Jesús oquinnanquilij:
—Aman xnemotequiu nenquimatisquej quemanon niman tlen tonajli
toTajzin oquitlalij para nochihuas. San yejhua quipia tequihuajyotl para
quijtohua quemanon nochihuas. ⁸ Yej, ijcuac on Espíritu Santo huajlas
nemopan, nenquiselisquej on poder. Niman nennechteixpantilisquej ne
Jerusalén, niman imanyan Judea, niman Samaria, niman nochihuiyan ipan
in tlalticpactli.

⁹ Ijcuac yotlan quijtohua on tlajtlamach, Jesús otlejcotiaj ne ipan cielo*
chica on apóstoles sa conitzticatcaj. Niman quemaj se moxtli oquitlapachojo
niman xoc ohuel más oquitaquej. ¹⁰ Chica Jesús tlejcotiaya ne ilhuicac niman
yejhuan quimatisquej on poder. Niman nennechteixpantilisquej ne
intech, ¹¹ niman oquimijlijquej:

—Tlacamej galileos, ¿man tlica† sa nemonajcotlachixtoquej ne ipan cielo?
Yejhua in Jesús sa no yejhua quen nemotzajlan yoquis para otlejcoc ne
ilhuicac, ocsejpa huajlas sa no ijqui quen onenquitaquej oyaj.

Oquitejtemoquej on aquin quipatlas Judas

¹² Ijcuacon on apóstoles ohuajtemoquej ne ipan on tepetl, yejhuan quito-
cayotiaj Olivos, niman ocsejpa oyajquej ne Jerusalén. On tepetl Olivos oncaj
sa ompaca nisu ne Jerusalén, san on quech itlanahuatil Moisés quitecahuilia
para se nejnemis ipan sábado ijcuac on hebreos nosehuiaj. ¹³ Ijcuac oa-
jsiquej ne ipan on hueyican, otlejcoto ipan on cajli yejhuan oncaj ipan ome
caltlanepantli campa nosentlaliayaj. Ompa nemiyaj Pedro, Jacobo, Juan,
Andrés, Felipe, Tomás, Bartolomé, Mateo, Jacobo on iconeu Alfeo, Simón

* **1:1** cosas † **1:3** después ‡ **1:3** cuarenta § **1:4** todavía; sanquen * **1:9** On cielo oncaj
ne campa oncaj ajacatl, moxtli, metztli, tonajli niman sitlalimej. † **1:11** ¿por qué?; ¿tline?

on yejhuan nopolhua ipan on partido itoca cananista, niman Judas iconue Jacobo. ¹⁴ Nochimej yejhamej san se inyojo quipiayaj niman nosentlaliaya mojmostla para quichihuayaj oración. Ijcon oquichijquej ihuan icnihuan Jesús, niman María on inan Jesús niman ihuan ocsequimej sihuamej.

¹⁵ Niman ipan on tonaltin ompa nemiyaj canaj se ciento ipan sempoajli‡ yejhuan nosentlalijticatcaj. Niman quemaj Pedro ohuajnotelquetz intlajcotian nochimej, niman oquijtoj:

¹⁶ —Nocnihuan, ye ijqui oncatca para nochihuas on tlen oquijtoca on Espíritu Santo itechcopia David ipan on Yectlajcuilojli yejhua ica on Judas on aquin oquinycan on yejhuan ocajsiquej Jesús. ¹⁷ Judas, tej, tohuan nopolhuaya, niman yejhua no otequit san secan tohuan. ¹⁸ Pero oquitlaxtlau se tlajli ica on tomin yejhuan oquitlanca ican on tlen xcuajli oquichiu. Niman ohuajnotlajcal campa tlacpac niman oijtitetzayan niman nochi on icuitlaxcol ochajchapan. ¹⁹ Niman nochimej on chanejquej ne Jerusalén cuajli oquimatzquej quen onochiu, niman ijcon, tej, on tlajli oquitocayotijquej Acéldama, yejhuan ican intlajtol quijtosnequi Yestlajli. ²⁰ Ipan on tlajcuilolamatl itoca Salmos ijquin quijtohua:

Ma tla cajtehua ne ichan niman ma ca sa yacaj chantis ompa. Niman ocsecan no ijquin quijtohua:

Ma ocse cajsi itequiu.

²¹ 'Yejhua ica nonequi, tej, ma tictlapejpenijcan se intech in tlacamej yejhuan onenquej sa secan tohuan nochipa ijcuac toTeco Jesús quistinemiya totzajlan. ²² Nonequi se yejhuan oixpantic nochi ijcuac Juan oquicuatequij Jesús hasta on tonajli ijcuac yejhua oyaj ne ilhuicac. Ijqui nonequi ma se nochihua teixpantiliquetl tohuan ica melahuac Jesús onoyolihuitij niman onoquetzteu ne ipan itlalcon.

²³ Niman yejhamej oquintlapejpenijquej omemej: sen tlacatl itoca José, yejhuan no itoca Barsabás yejhuan no san quixmatiyaj Justo, niman ocse yejhuan itoca Matías. ²⁴ Niman quemaj ijquin oquichiquej oración:

—ToTeco, tejhu yejhuan tiquixmati inyojo nochihua tlacatl, xtechititi catlejhua tictlapejpenia intech in omemej ²⁵ para ma quichihua on tequitl quen apóstol, pampa Judas oquipoloj on tequitl ipampa itlajtlacol niman oyaj ne campa quitocarohua. ²⁶ Quemaj onotlatlanquej niman on suerte ohuetz ipan Matías. Yejhua ica Matías opeu inhuan nopolhua on majtlactli huan se apóstoles.

2

On Espíritu Santo ohuajlaj

¹ Niman ijcuac oajsic on ilhuitl itoca Pentecostés, nochimej on tlanelto-caquej san secan ompa nemiyaj niman san se inyojo quipiayaj. ² Quemaj nimantzin ohuajtlacocomocac ne ilhuicac quen ijcuac sanoyej* chicahuac ajaca. Niman on ajacatl ocaquistic ijtlic nochihua tlacatl, xtechititi catlejhua tictlapejpenia intech in omemej ²⁵ para ma quichihua on tequitl quen apóstol, pampa Judas oquipoloj on tequitl ipampa itlajtlacol niman oyaj ne campa quitocarohua. ²⁶ Quemaj onotlatlanquej niman on suerte ohuetz ipan Matías. Yejhua ica Matías opeu inhuan nopolhua on majtlactli huan se apóstoles.

‡ ^{1:15} veinte * ^{2:2} muy † ^{2:4} lenguas

⁵ Ipan on tonaltin chantiyaj ne Jerusalén hebreos yejhuan cuajli quitlacaityaj Dios. Yejhuamej huajhualehuayaj de nochihuiyan ipan in tlalticpactli. ⁶ Niman ijcuac ocaquistic yejhua on cocomocalistli, onosentlalijtetzquej on tojlamej. Ijcuacon on tlacamej xquimatiyaj tlinon quinemilisquej pampa cada se caquiliayaj tlajtlajtohuayaj ican intlajtol. ⁷ Yejhuamej sa ometlamatiyaj niman mojcatlachayaj. Niman quijtohuayaj:

—¿Tlen xchanejquej ne Galilea nochimej in yejhuan tlajtlajtohuaj? ⁸ ¿Man tlica‡ cada se de tejhuamej tiquincaquij tlajtohuaj ican totlajtol yejhuan tejhuamej ipan otixtlamatquej? ⁹ Nican nemij tlacamej yejhuan chanejquej ipan on miyecan. Sequimej chantij ne Partia, sequimej ne Media, sequimej ne Elam, sequimej ne Mesopotamia, sequimej ne Judea, sequimej ne Capadocia, sequimej ne Ponto niman sequimej ne Asia. ¹⁰ No nican nemij on yejhuan chanejquej ne Frigia niman Panfilia niman ne Egipto, niman ne ipan iregíones Africa yejhuan nisu oncaj itech Cirene. Niman no nican nemij yejhuan hualehuaj ne Roma, sequimej hebreos pampa ijcon otlacatquej, niman ocsequimej onocuepquej hebreos pampa oquineltocaquej intlaneltoc on hebreos. ¹¹ No nican nemij on tlacamej yejhuan hualehuaj ne Creta niman ne Arabia. Tinochimej tiquincaquij on apóstoles tlajtlajtohuaj ica on itlamajhuisolhuan Dios cada se ican itlajtol.

¹² Niman nochimej sa mojcatlachixticatcaj niman xquimatiyaj tlinon quinemilisquej. Quinotlajtoltiayaj ihuan ocsequimej:

—¿Tlinon quijtosnequi yejhua in?

¹³ Pero sequimej san tepipinahuiayaj, niman quijtohuayaj:

—On yej tlajtlahuanquej.

Pedro oquiteijlij on tiotlajtojli

¹⁴ Ijcuacon Pedro ohuajnotelquetz inhuan on majtlactli huan se apóstoles, niman ican chicahuac tlajtojli, oquijtoj:

—Tlacamej hebreos niman nemochimej§ aquin nenchantij nican Jerusalén, xmatican nemejhuamej yejhua in, niman cuajli xcaquican tlinon nemechijlis. ¹⁵ Yejhuamej in tlacamej xtlajtlahuanquej quen sequimej nemejhuamej nenquinemiliaj, pampa quemach cualcan ijcuac chicnahui hora. ¹⁶ Yej yejhua in sa no yejhua on yejhuan oquipantlantijca on tiotlajtojquetl Joel ijcuac oquijtoj:

¹⁷ Dios quijtohua: “Ijcuac sa itlajtlancan on tonaltin, nictitlanis noEspíritu itech nochí tlacatl. Niman nemocone huan tlacamej niman nemocone huan sihuamej quiteijlisquej on tiotlajtojli yejhuan quiseliaj itech Dios. Niman nemotelpochhuan quitasquej tlachalistli yejhuan quen intemicpan, niman on huehuentzitzintin incochpan temquisquej.

¹⁸ Niman melahuac ipan on tonaltin nictitlanis noEspíritu itech notequitcahuac tlacamej niman notequitcahuac sihuamej, niman quiteijlisquej on tiotlajtojli yejhuan quiselisquej itech Dios.

¹⁹ Ne tlacpac ipan cielo* nicteititis tlamajhuisoltin, niman ipan tlalticpactli nicteititis miyec milagros. Onyas yestli, tlilt niman moxtli yejhuan tlapoctemas.

²⁰ On tonaltzintli capotzehuis niman on metztli chichilihuis quen itlaj yestli. In nochihuas ijcuac xe huajnopantlantia on hueyi quijtosnequi ilhui toTeco.

‡ **2:8** ¿por qué?; ¿tline? § **2:14** todos ustedes; nannochti, yemochimej, anochimej, innochimej, emmochimej * **2:19** On cielo oncaj ne campa oncaj ajacatl, moxtli, metztli, tonajli niman sitlalimej.

²¹ Niman san aquinon yejhuan quitlajtlanilia toTeco para ma maquisa, toTeco quimaquixtis.

²² Pedro no oquijtoj:

—Tlacamej hebreos, xcaquican in tlen niquijtos. Dios cuajli omechititij ica Jesús yejhuan hualehua ne Nazaret melahuac yejhua iConeu. Ijcon, tej, Dios omechititij ican huejhueyi tetlatlachaltilistli, milagros niman tlama-jhuisoltin yejhuan yejhua oquichiu nemotzajlan itechcopia Jesús ijcon quen nemejhuamej cuajli nenquimatztoquej. ²³ Dios ye huejcahui quimatzticatca on tlen nenquichihuilisquiaj Jesús niman yejhua oquitlalij ipan iyojlo para notecahuilis nenquitemactilisquej intech on xcuajcualtin tlacamej para ma quimajmasohuálticant ipan cojnepanojli†. ²⁴ Pero Dios oquiyolhuitij niman oquetzteu ne ipan itlalcon. Yejhua oquimanahuij ipan ipoder on miquilistli pampa ipoder on miquilistli xohuel oquiteltlalij Jesús. ²⁵ On rey David otlajtlatoj itech ica Jesús. Oquijtoj:

Nejhua nochipa niquitaya toTeco Dios nixpan nemi. Xoncaj itlaj yejhuan nechmojts pampa yejhua noyecmacopa nemi.

²⁶ Yejhua ica noyojlo sanoyej paqui niman nipacatlajtohua. Niman masqui notlalnacayo miquis, ninosehuis ican tlamachalistli§,

²⁷ pampa xticahuilis noalma nocahuas ne mictlan nion xticahuilis itlal-nacayo moyolchipajcau para ma ijtlacahui.

²⁸ Otinechititij on ojti yejhuan nechhuica ne campa oncaj on nemilistli. Niman ne mixpan tinechyoltemitis ican pactli.

²⁹ 'Nocnihuan, in cuajli panesticaj ica toachtojtata David omic niman oquitlaltocaquej ipan itlalcon, niman on itlalcon oc* nican tohuan oncaj.

³⁰ Pero David tiotlajtojquetl catca niman yejhua quimatzticatca ica Dios oquijtojca quichihuas niman oquimelajcailoj ica semej ihuejcaconeheuan notlalis ne ipan inesehuilpan para tequihuaj yes. ³¹ Ye huejcahui chica nemiya David ocajsicamat tlinon nochihuas. Yejhua ica otlajtoj itech ica Cristo yolhuis† niman noquetztehuas ne ipan itlalcon, niman ica ialma xnocahuas ne mictlan, nion inacayo ijtlacahuis. ³² Aman, tej, Dios oquiyolhuitij niman oquetzteu ne ipan itlalcon sa no yejhua sa no in Jesús. Yejhua ica tej, tinochimej ticteixpantiliaj. ³³ Ijcon, tej, Dios oquittlejcoltij ne iyecmacopa para más hueyixtias. Quemaj Jesús oquiselij itech iTaj on Espíritu Santo yejhuan Dios oquijtocac quitecas, niman aman yoquichayau nochí in yejhuan nenquitaj niman nenzaquij. ³⁴ David xotlejcoc ne ilhuicac, pero sa no yejhua quijtohua:

On toTajzin Dios oquijlij toTeco: "Xmotlali nican ipan noyecmacopa

³⁵ hasta ma nimitztlali tetlanqui intech on yejhuan motlahuelicnihuan."

³⁶ 'Yejhua ica nochí quech nenhebreos ipan in país de Israel xmatican cuajli niman ma ca xometlamatican ica in Jesús yejhua on yejhuan nemejhuamej onenquimajmasohuáltiquej ipan cojnepanojli, Dios oquitlalij para yejhua toTeco niman yejhua Cristo.

³⁷ Ijcuac ocacquej yejhua in, sanoyej onoyolcocojquej niman oquitlajtoltijquej Pedro niman on ocsequimej apóstoles:

—Tocnihuan, ¿tlinon ticchihuasquej?

³⁸ Quemaj Pedro oquimijlij:

—Xmoyolcuepacan niman xmocuatequican cada se de nemejhuamej ican itocatzin Jesucristo para nemotlajtajcolhuan mechtlapojojpolhuilisquej, niman nenuqiselisquej itetlayocolil Dios yejhuan on Espíritu Santo. ³⁹ Yejhua

† 2:23 que lo crucifiquen, xcajcopilocan ‡ 2:23 cruz § 2:26 esperanza * 2:29 todavía; sanquen † 2:31 resucitará; yolis

in ipromesa Dios para nemejhuamej, niman para nemoconehuan, niman para nochimej on yejhuan huejca nemisquej, niman para nochimej on quech toTeco Dios quinnotzas.

⁴⁰ Niman ica ocsequi miyec tlajtojli Pedro oquiteixpantilij niman oquintlacacanojnotz, oquimijlij:

—Xmejcuican itech on tlajyohuilistli yejhuan quiselisquej on tlacamej yejhuan xcuajli nohuicaj.

⁴¹ Ijcon, tej, on yejhuan oquiselijquej itemachtil onocuatequijquej. Niman ipan on tonajli canaj yeyi mil tlacamej tehuan onopojquej intech on tlaneltocaquej. ⁴² Niman nochimej cuajli nohuicayaj quen on apóstoles quitemachtiaj, niman quisepamatiyaj niman nosentlaliayaj para quicuayaj on Santa Cena, niman quichihuayaj oraciones.

On tlaneltocaquej nemiyaj ica san se inyojo

⁴³ On apóstoles miyec milagros niman tlamajhuisoltin oquichijquej, niman yejhua ica nochimej tlamojcaitayaj. ⁴⁴ Nochimej yejhuan otlaneltocaquej cuajli nohuicayaj san secan ican san se inyojo. Niman se ihuan ocse quinomacayaj nochi tlajtlamach[‡] tlen quipiayaj. ⁴⁵ Quinamacayaj intal niman nochi tlen quipiayaj, niman on tomin quinxelohuiliayaj quen cada se quipolojticatca. ⁴⁶ Mojmostla nosentlaliayaj ne ipan on hueyi tiopan, niman inchajchan quicuayaj on Santa Cena, niman tlacuayaj san secan ican pactli niman yolyemanilistli. ⁴⁷ Quiyectenehuayaj Dios, niman nochi tlacatl quinmixpacaitaya cuajli. Niman on toTeco más quinmiyequilijtiaya mojmostla on yejhuan maquisasquej.

3

Sen huilatzin opajtic

¹ Se tonajli Pedro niman Juan san secan tlejcotiayaj ne ipan on hueyi tiopan ipan yeyi hora ica tiotlac, on hora ijcuac nochihuaya oración. ² Mojmostla ompa nemiya se tlacatl yejhuan huilatzin catca desde ijcuac onen. Concahuayaj ne ipan hueyi tiopan niman quitlaliayaj ne tiopanquiahuatenco yejhuan quitocayotiayaj “Cualtetzin” para notlajtlayehuiaya* intech on yejhuan calaquij ne hueyi tiopan. ³ Ijcuac on huilatzin oquitac Pedro niman Juan ica oncalaquisquej ne ipan on hueyi tiopan, oquintlajtlanilij se tetlayocolijli. ⁴ Quemaj Pedro ihuan Juan oquixquechijquej, niman Pedro oquijlij:

—Xtechalita.

⁵ Ijcuacon on tlacatl sa cominitzticatca quinemiliaja ica quiselis itlajtzin intech yejhuamej. ⁶ Quemaj Pedro oquijlij:

—Xnicpia plata nion oro, yej tlen nejhua nicpia nimitzmaca. Ican itocatzin Jesucristo, yejhuan hualehua Nazaret, nimitznahuatia xmotelquetza niman xnejnemi.

⁷ Quemaj Pedro ocontilan on huilatzin ipan iyecma niman oquipalehuij para ma notelquetza. Nimantzin on huilatzin opajtiquej icxihuan niman ica-cayolhuan†. ⁸ Ijcuacon on huilatzin otzicuin, niman ijcuac onotelquetz, opeu nejnemi. Quemaj inhuan Pedro niman Juan ocalac ne ipan on hueyi tiopan, nejnentiaya, niman tzicuintiaya niman quiyectenetiajaya Dios. ⁹ Ijcuac nochi tlacatl oquitac nejnemi niman cueyilia Dios, ¹⁰ sanoyej‡ otlamojcaitaquej yejhua ica on tlen ipan onochiu. Ijcon onochiu pampa quixmatiyaj on tlacatl

‡ **2:44** cosas * **3:2** quintlajtlaniliaya limosna † **3:7** tobillos de él ‡ **3:10** mucho

niman quimatiyaj ica sa no yejhua on aquin notlaliaya ne tiopanquiahuatenco itoca “Cualtetzin”, para notlajtlayehuiya.

Pedro oquiteijlij on tiotlajtojli ne ipan icorredor Salomón

¹¹ Chica on huilatzin yejhuan opajtic quimayantiaya Pedro niman Juan, nochí tlacatl isijcapan oyajquej ican mojcatlachalistli intech ne quiahuac campa itoca iCorredor Salomón. ¹² Niman ijcuac ijcon oquitac, Pedro oquimijlij on tlacamej:

—Tlacamej hebreos, ¿tlica§ nentlamojcaitaj ica in? ¿Tlica nentechtlajtlataj quen tla tejhuamej ticpajtisquiaj in tlacatl ican topoder, noso toyolchipahualis para ma nejnemi? ¹³ On iDios Abraham niman Isaac, niman Jacob niman yejhuan no inDios on ocsequimej toachtojtajhuan ocueyiliij Jesús on iConetzin. Pero nemejhuamej onenquitemactilijquej, niman onenquinenequej* ne itech Pilato ijcuac yejhua quinequiya quimacahuas. ¹⁴ Xonenquiselijquej yejhua on yejhuan yolchipahuac niman yolkmelajqui, yej onenquitlajtlanilijquej Pilato ma mechmacahuili se temictijquetl. ¹⁵ Ijcon, tej, nemejhuamej onenquimictijquej on yejhuan quitemaca yencuic nemilistli. Pero Dios oquiyolihuitij† niman oquetzteu ne ipan itlalcon, niman yejhua ica on tejhuamej ticteixpantiliaj. ¹⁶ San ican itocatzin Jesús, niman itechcopa totlaneltoc itech itocatzin, yejhua in tlacatl yejhuan nemejhuamej nenquitaj niman nenquixmatij, opajtic ipan icxihuan. Niman ica itlaneltoc itech Jesús, in tlacatl cuajli opajtic ijcon quen nemejhuamej nenquitaj.

¹⁷ 'Ye nicmatzticaj, nocnihuan, ica ijcuac nemejhuamej niman nemotlayecancahuau onenquimictijquej Jesús xnenquimatiyaj tlinon nenquichijticatcay. ¹⁸ Pero ijquin Dios oquichiu on tlen ye huejcahui nochí on quech tiotlajtojquej oquijtojcaj nochihuas. Nochimej yejhuan oquijtojquej ica iCristo Dios tlajyohuis. ¹⁹ Tla ijcon, tej, xmoyolcuepacan niman xpatlacan nemonemilis para nemotlajtlacol popolihuis. Niman toTeco Dios mechatitlanilis on tonaltin ijcuac mechyottlalis, ²⁰ niman cuajtitlanis on Jesús on yejhuan Cristo yejhuan Dios yoquitlalij para tequihuaj yes. ²¹ Pero Cristo ica oncaj nocahuas ne ilhuicac hasta ijcuac Dios nochí tlajtlamach‡ cuajli quitlalis, ijcon quen oquijtoj intechcopa on iyectiotlajtojcahuau yejhuan onenquej ye huejcahui. ²² Ijquin, tej, Moisés oquimijlij on toachtojtajhuan: “Ijcon quen toTeco Dios onechajtitlan no ijqui cuajtitlanis se tiotlajtojquetl, niman yejhua on tiotlajtojquetl quisas intzajlan nemocnihuan. Xtancaquican nochí on quech tlajtlamach tlen yejhua mechijlis, ²³ pampa san aquinon xquitencaquis tlen quijtohua on tiotlajtojquetl, xoxotonis, niman quixelosquej itech on ipaís Israel.” Ijcon, tej, oquijtoj Moisés. ²⁴ Nochí on tiotlajtojquej desde Samuel hasta aman otlajtlajtojquej ica ijcon nochihuasquia ipan in tonaltin. ²⁵ On promesas, yejhuan Dios oquitemacac intechcopa on tiotlajtojquej, on para nemejhuamej. Niman no para nemejhuamej on pacto yejhuan Dios oquitlalij inhuan on toachtojtajhuan ijcuac oquijlij Abraham: “Nochí chanej§ ipan in tlalticpactli quiselisquej tlatiochihualistli itech mohuejcaconeu.” ²⁶ Ijcuac Dios oquiyolihuitij niman oquetzteu iConeu yejhuan Jesús, achtoj omechajtitlanilij nemejhuamej para mechtiochihuas para cada se de nemejhuamej nenquipatlasquej nemonemilis niman nenquitlalcahuisquej on tlen xcujli.

§ 3:12 ¿por qué?; ¿tline? * 3:13 negaron † 3:15 lo resucitó; oquiyolitij ‡ 3:21 cosas § 3:25 familias

4

Oquihuicaquej Pedro niman Juan ne imixpan on tequihuajquej

¹ Chica Pedro niman Juan oc* quinnojnotzayaj on tlacamej, ohualajquej on tiopixquej ihuan on intlayecancau on policía ipan on hueyi tiopan niman on saduceos. ² Yehuamej cualaniyaj pampa Pedro niman Juan quinmachtiayaj on tlacamej ica Jesús onoyoliutij niman onoquetzteu ne ipan itlalcon niman yejhua ica on mimiquej no yolihuisquej. ³ Oquimajsiquej niman oquintza-cuquej hasta huajmostla, pampa ijcuacon ye tiotlac catca. ⁴ Pero miyequej yejhuan ocacquej on temachtilistli otlaneltocaquej. Niman oquimpojquej san on yejhuan tlacamej oajsic canaj macuijli mil tlacamej.

⁵ Niman huajmostla onosentlalijquej ne Jerusalén on intlayecancahuan on hebreos, on tlajtlajmatquej niman on temachtijquej ican on tlanahuatiji. ⁶ No ompa nemiyaj Anás yejhuan on más hueyixticaj tlayecanquetl intech on tiopixquej, Caifás, Juan, Alejandro niman on osequimej yejhuan nopo-huaj ipan ichanchanecahuan† on más hueyixticaj tlayecanquetl intech on tiopixquej. ⁷ Niman ijcuac oquintlalijquej Pedro niman Juan ne imixpan, oquintlajtoltijquej:

—¿Aquinon itlanahuatil, noso aquinon ica itoca onenquipajtiquej yejhua on tlacatl?

⁸ Ijcuacon on Espíritu Santo noch ica quiyecanaya Pedro. Niman Pedro oquijto:

—Nemejhuamej tlayecanquej intech on tlacamej, niman nemejhuamej aquin nentlajtlajmatquej hebreos, ⁹ tla nemejhuamej nentlajtlanij ica on tlen cuajli yejhuan onochiu ipan in tlacatl huilatzin, niman quen ijqui opajtic, nemechijlis. ¹⁰ Cuajli xmatziacan nemochimej‡ nemejhuamej, niman nochimej on quech chanejquej ipan in país de Israel, ica yejhua in tlacatl, yejhuan nican nemixpan nemi, yopajtic ican ipoder Jesucristo yejhuan hualehua Nazaret. Sa no yejhua on yejhuan onenquimajmasohuaultiquej§ ne ipan cojnepanojli*, niman yejhuan Dios oquiyolihuitij† niman oquetzteu ne ipan itlalcon. ¹¹ Yejhua on Jesús, yejhua quen se tetl yejhuan nentepanchijquej xonenquiseliquej. Pero aman yejhua yonochiu yacatztica. ¹² Niman xacaj ocse hueli temaquixtia, pampa Dios xocuajtitlan yacaj ocse tlacatl ipan in tlalticpactli yejhuan itechcopa huelis timaquisasquej.

¹³ Ijcuac on tequihuajquej oquitaquej quen yolchicajquej Pedro niman Juan, niman ica yejhuan xoyajquej ipan escuela nion xhueyixtoquej, yej quen san yacaj tlacamej, otlamojcaitaquej niman oquinomacaquej cuenta ica yejhuan ihuan nemiyaj Jesús. ¹⁴ Niman pampa on tlacatl yejhuan oquipajtiquej ompa inhuan ijcaticatca, yejhuan xohuelquej itlaj oquimixcomacaquej. ¹⁵ Yejhua ica oquinnahuatijquej ma huajquisacan ne campa onosentlalijquej on tetlacanojnotzquej, niman quemaj on tequihuajquej onotlajtlajtoltijquej. ¹⁶ Quijtohuayaj:

—¿Tlinon tiquinchihuialisquej, tej, in tlacamej? Nochimej yejhuan chantij Jerusalén quimatztoquej ica yejhuan oquichijquej se hueyi milagro niman tejhuamej xhuelis tiquianasquej. ¹⁷ Pero san para ma ca más nopantlantis intzajlan on tlacamej on tlen oquichijquej, ma tiquinmojomotican ica tiquincastigarosquej para ma ca sa ma tenojnotzacan ican itoca Jesús.

* 4:1 todavía; sanquen † 4:6 su familia ‡ 4:10 todos ustedes; nannochti, yemochimej, anochimej, innochimej, emmochimej § 4:10 crucificaron; onenquipiloquej * 4:10 cruz
† 4:10 lo resucitó; oquiyolitij

18 Niman quemaj ocsejpa oquinnotzquej niman oquinnahuatijquej para ma ca más tenojnotzasquej nion temachtisquej ican itocatzin Jesú.

19 Ijcuacon Pedro niman Juan otlananquilijquej:

—Xtechijlican sa no nemejhuamej on tlen Dios quinequi. ¿Aquinon más nonequi tictlacamatisquej, nemejhuamej noso Dios? **20** Tejhuamej, tej, xhuelis ticajcahuasquej ica tiquijtosquej on tlajtlamach† yejhuan yotiquataquej niman yoticaquej.

21 Ijcuacon on tequihuajquej quinmojmotsnequiya ica quincastigarosquej, niman quemaj oquinmacajquej. Xoquinextijquej quen ijqui huelis quincastigarosquej pampa nochí tlacatl quiyectenehuaya Dios ipampa on tlen onochiu. **22** On tlacatl, yejhuan opajtic ican on milagro, quipiaya más de ompoajli§ xipan.

On tlaneltoaquej oquitlajtlanilijquej Dios para ma quinyolchicahua

23 Ijcuac Pedro niman Juan yoquinmacajquej, oyajquej ne campa nemiyaj on intehuicalhuan*, niman oquintlajtlajtohuilijquej nochí tlen oquimiliijquej intlayecancahuau on tiopixquej niman on tlajtlajmatquej. **24** Niman ijcuac on tlaneltoaquej yocacquej, nochimej yejhamej onohueyicatzitzilijquej itech Dios ican san se inyojo. Oquijlijquej:

—ToTeco, tejhua tiDios yejhuan oticchijchiu on cielo†, niman in tlalticpactli, niman on mar niman nochí tlajtlamach tlen impan oncaj. **25** Tejhua otiquijtoj itechcopia moEspíritu Santo niman itechcopia motequitcau David: ¿Tlica† najcomanaj on países? ¿Tlica on tlalticpactlacamej quinemiliaj on tlen xitlaj§ quijtosnequi?

26 Ireyes in tlalticpactli san secan nemiyaj niman on tlayecanquej onosentlalijquej para quixnamiquisquej ican tlahuejli toTeco Dios niman iCristo yejhuan oquitlapejpenij para techmandaros.

27 Melahuac ijcon onochiu pampa Herodes niman Poncio Pilato onosentlalijquej nican ipan in hueyican inhuan on yejhuan xhebreos niman no inhuan hebreos. Yejhamej, tej, onosentlalijquej para oquixnamiquij ican tlahuejli on moyecConetzin Jesú yejhuan otictlapejpenij para techmandaros. **28** Ijcon, tej, yejhamej oquichijquej nochí tlen tejhua oticnec niman yotictlalijcaj moyojo para nochihuas. **29** Niman aman toTeco Dios, xquita quen techchicajcanahuatiaj, niman xquincahuili motequitcahuau para ma quiteijlijcan motlajtol ican nochí yolchicahualistli. **30** Niman ican mopoder ma quimpajtican on cocoxquej niman ma quinchihuacan tlamajhuisoltin niman milagros ican itocatzin moyecConetzin Jesú.

31 Ijcuac otlanquej ica nohueyicatzitzilaj, ne campa onosentlalijquej otlatolin, niman on Espíritu Santo nochí ica quinyecanaya nochimej, niman otemachtijquej itlajtol Dios ican yolchicahualistli.

On yejhuan tlaneltoaj nochí tlen quipiayaj oquitexexelohuilijquej

32 Nochimej on tlaneltoaquej san se inyojo niman san se intlamachilis quipiayaj. Niman xacaj quijtohuaya tla itlaj iyaxca* catca on tlen quipiaya, yej nochí on tlajtlamach insepanyaxca catca. **33** Niman ican hueyi chicahualistli on apóstoles oc† quiteixpantiliayaj quen toTeco Jesú onoyolihuitij† niman onoquetzteu ne ipan itlalcon. Niman Dios sanoyej§ oquintiochiu

‡ 4:20 cosas § 4:22 cuarenta * 4:23 compañeros de ellos † 4:24 On cielo oncaj ne campa oncaj ajacatl, moxtli, metztlí, tonajli niman sitlalimej. ‡ 4:25 ¿por qué?; ¿line? § 4:25 nada; coxtla * 4:32 le pertenece; iaxca, ihuaxca, itlatqui † 4:33 todavía; sanquen ‡ 4:33 resucitó; onoyolitij § 4:33 mucho

nochimej yejhuamej. ³⁴ Intzajlan xacaj nemiya yejhan itlaj quipolojticatca, pampa nochimej on yejhan quipiayaj intlahuan noso incalhuan quinamacayaj, niman on tomin cuajcuiyaj ³⁵ niman quinmactiliyaj on apóstoles. Niman on apóstoles quinxelohuiliyaj ocsequimej quen se quipolojticaj. ³⁶ Ne tetzajlan nemiya se levita, itoca catca José, yejhan ijqui oquichiu. Yejhua otlacat ne ipan on tlahuactli itoca Chipre. Niman on apóstoles oquitocayotijquej Bernabé yejhan quijtosnequi teyoltlalijquetl. ³⁷ Yejhua in tlacatl oquinamacac se tlajli niman on tomin ocuajquic niman oquinmactilij on apóstoles para quimpalehuisquej on yejhan quimpolojticaj.

5

Ananías niman isihuau Safira otlaatlacojquej

¹ Pero se tlacatl itoca catca Ananías ihuan Safira isihuau no oquinamacaquej se tlajli. ² Yejhua in tlacatl sequi oquixpachoj on tomin niman on ocsequi oquinmactilij on apóstoles quen nochí yesquia. Niman isihuau nochí quimatzticatca. ³ Niman quemaj Pedro oquijlij:

—Ananías, ¿tlica^{*} oticahuilij Satanás ocalac ipan moyojo niman omitzchihualtij para ticajcayahuasnequiya on Espíritu Santo? ¿Tlica, tej, sequi otiquixpachoj on tomin yejhan ica omitztlaxtlahuilijquej on motlal? ⁴ Ijcuac xe ticnamacaya ¿xmoyaxca† catca on tlajli? Niman ijcuac oticnamacac ¿xmoyaxca catca on tomin? ¿Tlica, tej, ijcon oticnemilij ticchihuas? Ticnemilia tejhuamej otitechcrajcayau, yej xmati ica Dios ticajcayahuasnequiya.

⁵ Ijcuac Ananías ijquin ocac, ohuetztiaj niman omic. Niman nochimej yejhuamej yejhan oquimatquej on tlen onochiu sanoyej‡ onomojtijquej.

⁶ Quemaj ohualajquej semej telpocamej, niman oquitejcuixquej itlalnacayo. Quemaj ocuicaquej niman oquitocatoj.

⁷ Canaj ipan ocse yeyi hora ocalaquito on isihuau Ananías. Yejhua xquimatiya tlínón yonochiu. ⁸ Ijcuacon Pedro oquitajtoltij:

—Xnechijli, ¿melahuac san ichquich§ in onenquinamacaquej nemotlal?

Niman yejhua oquinanquili:

—Quemaj, san ichquich.

⁹ Ijcuacon Pedro oquijlij:

—Man, ¿tlica onemotlajtolmacaquej para nenquitlatlatasquej iEspíritu toTeco? Aman nican quiahuatenco huajlahuij on yejhan yoquitocatoj mohuehuentzin, niman aman tejhua no mitzhuicasquej niman mitzontocasquej.

¹⁰ Quemaj nimantzin ohuetztiaj icxitlan Pedro niman omic. Ijcuac ocalaquitoj on telpocamej, oquitatoj yomic. Yejhamej oquixtijquej niman oquitocatoj inacastlan ihuehuentzin. ¹¹ Niman nochimej on tlaneltoquej, niman nochimej yejhan oquimatquej on tlen onochiu, sanoyej onomojtijquej.

Miyec milagros niman tlamajhuisoltin oquichijquej on apóstoles

¹² On apóstoles quichihuayaj miyec milagros niman tlamajhuisoltin ne intzajlan on tlacamej. Niman nochimej on tlaneltoquej nosentlaliyaj ne campa itoca iCorredor Salomón. ¹³ Niman nochimej on ocsequimej xquinequiyaj tehuan nonelosquej, masqui quipiayaj miyec tetlacaítalitli intech on apóstoles niman on tlaneltoquej. ¹⁴ Niman on yejhan tlaneltocayaj itech toTeco más miyequiayaj, sanquen tlacamej niman sihuamej. ¹⁵ Ijcon,

* ^{5:3} ¿por qué?; † ^{5:4} no te pertenece; xmoaxca, xmohuaxca, xmoitlatqui ‡ ^{5:5} mucho

§ ^{5:8} en este precio

tej, quinhuauixtiayaj on cocoxquej ne ipan calles niman quintlaliayaj ipan intlapech noso ipan impetl para ijcuac panos Pedro masqui san itlasehualo* quimajsis semej yejhuamej ijcuac panos. ¹⁶ Niman ipan on pueblos nijnisiu iyehualican, no yayaj tojlamej ne Jerusalén. Quinhuicayaj incocoxcahuau niman on yejhuan quipiayaj on xcuajcualtin espíritus. Niman nochi pajtiyaj.

Oquintlahuelitaquej niman tlajtlamach ica oquintlajyohuiltijquej on apóstoles

¹⁷ Ijcuacon inmás hueyi tlayecancau on tiopixquej niman nochimej on yejhuan ihuan nemiyaj yejhuan nopohuayaj inhuan on saduceos sanoyej quinnexicolitayaj on apóstoles. ¹⁸ Yejhua ica, tej, yejhuamej oquimajsiquej on apóstoles niman oquintzacuatoj. ¹⁹ Pero ijcuac tlayohua se ilhuicacte-quitquetl†, yejhuan toTeco ocuajtitlan, oquitlapoj itlatzacuilyo‡ on cárcel, oquinquixtij, niman oquimijlij:

²⁰ —Xhuiyan niman xmomanacan ne ipan on hueyi tiopan. Xquintlajtlajtohuilican on tlacamej on temachtijli ica in yencuic nemilstli.

²¹ On apóstoles oquitlacamatquej niman ijcuac otlanes ocalaquej ne ipan on hueyi tiopan niman opeu temachtiaj.

Ijcuac yoajsic inmás hueyi tlayecancau on tiopixquej niman on yejhuan ihuan ompa nemiyaj, oquinsentlalijquej nochimej on tetlacanojnotzquej niman nochimej on tlajtlajmatquej hebreos. Quemaj oquintitlanquej on policías ne ipan cárcel para cominnanasquiaj on apóstoles. ²² Pero ijcuac on policías oajsiquej xoquinnextijquej on apóstoles. Yejhua ica ohuajnocuepquej niman oquitemachiltitoj. ²³ Oquijtojquej:

—Ijcuac otajsiquej, oticnextijquej on cárcel cuajli tzacuticaj ican llave niman on soldados majmantoquej ne ixpan on tlatzacuilomej. Pero ijcuac otitlatlapojquej xacaj oticnextijquej ne tlajtic.

²⁴ Ijcuac ocacquej on tlajtojli, intlayecancahan on tiopixquej niman intlayecancau on policía ne ipan on hueyi tiopan niman on huejhueyi tiopixquej oometlamatquej, niman quinotlajtoltiayaj canon onquisas nochi yejhua in tlen onochiu. ²⁵ Quemaj oyejcoc se tlacatl yejhuan oquimijlij:

—Xcaquican. On tlacamej yejhuan onenquintzacuaj nemij ne hueyi tiopan, niman quinmachtiaj on tlacamej.

²⁶ Ijcuacon on intlayecancau on policía niman on policías oyajquej niman oquimanatoj on apóstoles san ica cuajloticaj, pampa quinmacajsiaj on tlacamej. Cuitiayaj ica on tlacamej quinmojmotlasquiaj. ²⁷ Ijcuac oquinhuajhuicaquej, oquinmanquej ixpan on tetlacanojnotzquej, niman on más hueyi tlayecanqui intech on tiopixquej oquintlajtoltijquej. ²⁸ Ijquin oquimijlijquej:

—Sanoyej otimechchicajcanahuatiijquej para ma ca sa xtemachtican ican itoca Jesús. Aman xquitacan on tlen onenquichijquej. Yonenquitemiltijquej ican nemotemachtil imanyan nochi Jerusalén niman nenquinequij nentechtlajtlacoltisquej ica imiquilis on tlacatl.

²⁹ Quemaj Pedro niman on ocsequimej apóstoles otlananquilijquej:

—Quimelhua§ tictlacamatisquej achtoj Dios xquen nemejhuamej yejhuan san nentlacamej. ³⁰ InDios on toachtojtajhuan oquiyolihuitij* niman oquetzteu Jesús on yejhuan onenquimictijquej ijcuac onenquimajmasohualtiquej† ne ipan cojnepanojli‡. ³¹ Dios oquitlalij Jesús hueyi tlayecanquetl niman temaquixtijquetl ne iyecmacopa para cahuilis on

* ^{5:15} su sombra; itlayecananyotl
† ^{5:19} ángel: Angeles tequitij ne ilhicac niman nican ipan in tlaticpactli.
‡ ^{5:19} su puerta
§ ^{5:29} merece

* ^{5:30} lo resucitó; oquiyolitij
† ^{5:30} crucificándole; onenquipilojquej
‡ ^{5:30} cruz

hebreos ma noyolcuepacan niman para quipopolosquej nochí quech tlajtlacojli. ³² Niman tejhuamej ticteixpantiliaj nochí in quech tlajtlamach§, niman no quiteixpantilia on Espíritu Santo yejhuan oquinmacac Dios on yejhuan quitlacamatij.

³³ Ijcuac on tetlacanojnotzquej ocacquej on, cualaniyaj sanoyej hasta quinequiliayaj para quinmictisquej on apóstoles. ³⁴ Pero ne intzajlan on tetlacanojnotzquej nemiya se fariseo, itoca Gamaliel, yejhuan temachtijquetl catca ica on tlanahuatiji. Nochi tlacatl sanoyej quitlacaitayaj. Yejhua onotelquetz niman otlanahuatij ma quinquixtican on apóstoles achijtzin ne quiahuac. ³⁵ Quemaj oquimijlij on tetlacanojnotzquej:

—Tlacamej hebreos, xmotacan sa no nemejhuamej tlinon nenquinchi-huilisquej on tlacamej. ³⁶ Xquelnamiquican nemejhuamej ica nemiya se tlacatl itoca Teudas yejhuan quijtohuaya ica yejhua se tlacatl hueyixticaj, niman oquistinen ihuan canaj nahui ciento tlacamej. Pero se tonajli yacaj oquimictij niman nochimej yejhuan ihuan oquistinenquej onochajchaya-jquej, niman nochí ompa otlan. ³⁷ Más saquin* Judas, yejhuan chanej ne Galilea, ohuajlaj ipan on tonaltin ijcuac onijcuiloloc ne ipan on censo. Niman miyequej ihuan oquistinenquej, pero no omic niman nochimej yejhuan ihuan oquistinenquej onochajchaya-jquej. ³⁸ Yejhua ica, nemechijlia xquinc-ahuacan in tlacamej. Ma ca itlaj ica xmocalactican, pampa on intemachtil on apóstoles noso on tlen nochihua tla san intech tlacamej quisa, popolihiis. ³⁹ Pero tla yejhua in quisa itech Dios, xnenhuelisquej nenquioxotonisquej, yej nenquitlahuelixnamictiasquej Dios.

⁴⁰ Niman yejhuan oquiselijquej on tlen Gamaliel oquijtoj. Quemaj ijcuac oquinhuajhuicaquej on apóstoles, oquinnotzquej, niman ijcuac yoquinhu-jiuitequej, oquinnahuatijquej ma ca sa tenojnotzacan ican itoca Jesús. Que-maj oquinmacaquej. ⁴¹ On apóstoles ohuajquisquej ne imixpan on tetla-cananojnotzquej ican pactli, pampa Dios oquincahuilij oquimpipinahuijquej pampa quineltocayaj Jesús. ⁴² Niman mojmostla ne hueyi tiopan niman techajchan xcajcahuayaj ica temachtiayaj niman tenojnotzayaj ica Jesucristo.

6

Oquintlapejpenijquej chicomemej tlapalehuijquej

¹ Ipan on tonaltin on nomachtijquej más sanoyej* miyequixtiayaj. Ni-man on yejhuan tlajtlajtohuaj griego opeu chicotlajtohuayaj† intech on yejhuan tlajtlajtohuaj hebreo, pampa on sihuacahualtin‡ de on griegos xijqui quiseliayaj tlajcuajli quen on sihuacahualtin intech on hebreos ijcuac mojmostla quinxelohuiliayaj on tlajcuajli. ² Ijcuacon on majtlactli huan omemej apóstoles oquinsentlalijquej nochimej on nomachtijquej, niman oquimijlijquej:

—Xcuajli para tejhuamej ticajcahuasquej ica ticteijlisquej on itlajtol Dios para titexelohuiliisquej on tlajcuajli. ³ Yejhua ica, tej, nocnihuan, xquintlapejpenican chicome tlacatl nican nemotzajlan yejhuan quintlacaitaj, niman yejhuan on Espíritu Santo nochí ica quinyecana ipan inemilis niman yejhuan quipiaj miyec tlamatquilistli§. Quemaj yejhuan tiquinalactisquej ipan yejhua on tequitl. ⁴ Niman ijcon, tej, tejhuamej xticajcahuasquej ica ticchi-huasquej oración niman ica tictemachtisquej itlajtol Dios.

§ 5:32 cosas * 5:37 después * 6:1 muchos † 6:1 murmuraban ‡ 6:1 viudas; icnosihuamej § 6:3 sabiduría

⁵ Niman nochimej ocuelcaquej yejhua ica in, niman oquitlapejpenijquej Esteban yejhuan quineltocaya Jesús ican nochi iyojlo, niman yejhuan quinocahuiiliaya quiyecanaya ipan nochi inemilis on Espíritu Santo. No oquintlapejpenijquej Felipe, Prócoro, Nicanor, Timón, Parmenas niman Nicolás yejhuan hualehuaj ne Antioquía. Ijcuac Nicolás xe quineltoca Cristo, oquineltocac Dios quen on hebreos masqui xhebreo. ⁶ Quemaj oquinhuajhuicaquej imixpan on apóstoles, niman on apóstoles impampa onohueyi-catzatzilijquej on niman oquitlalijquej inmahuan impan.

⁷ On itlajtol Dios nochayajtiaya intech miyequej ocsequimej. Niman on nomachtijquej sanoyej miyequixtiayaj ne Jerusalén, niman hasta miyequej tiopixquej quiseliayaj on tlaneltoctli.

Esteban ocajsiquej

⁸ Dios sanoyej oquitiochiu Esteban niman oquimacac poder. Yejhua ica, Esteban quichihuaya milagros niman tlamajhuisoltin intzajlan on tlacamej.

⁹ Ijcuacon semej on yejhuan nopohuaj ipan intiopan on hebreos, itoca “Tlanamactin Tlamacahualtin”, inhuan ocsequimej yejhuan hualehuaj ne intech on huejhueyican Cirene niman Alejandría, niman ne Cilicia niman Asia, opejquej quitlajtolixnamiquij Esteban. ¹⁰ Pero xhueliyaj quitent-laniyaj, pampa yejhua tlajtohuaya ica on tlamachilistli yejhuan quimacaya on Espíritu Santo. ¹¹ Yejhua ica quimichtacanahuatiayaj ocsequimej tlacamej para ma quijtocan ica yejhuatej ocaquilijcaj cuijhuijhuicaltia Moisés niman Dios. ¹² Niman ijquin, tej, oquimajcomanquej on tlacamej inhuan on tlajtlajmatquej niman on temachtijquej ican tlanahuatiqli. Yejhuatej oyajquej itech Esteban, ocajsiquej niman ocuajhuicaquej ne imixpan on tetlacanojnotzquej. ¹³ Niman no oquintlalijquej on istlacatquej para ijquin ma quijtocan:

—Yejhua in tlacatl xcajcahua on ica cuijhuiicaltia in yectiticaj tiopan, niman itech on itlanahuatil Moisés. ¹⁴ Ticaquiliaj quijtohua ica Jesús yejhuan hualehua Nazaret cuajxoxotonis in yectiticaj tiopan, niman cuajpatlas in tlajtlamach* tlanahuatiqli yejhuan Moisés otechmacac.

¹⁵ Ijcuacon nochimej on tetlacanojnotzquej yejhuan ompa yejyehuaticat-caj ontlachixquej ixco Esteban, niman oquitaquej ixayac yonocau quen ixayac se ilhuicactequitquetl†.

7

Esteban oteixnamic

¹ Quemaj inmás hueyi tlayecancau on tiopixquej oquitlajtoltij Esteban:

—¿Tlen melahuac nochi yejhua in quen mitzteixpanhuiyaj?

² Niman yejhua oquinanquilij:

—Notlajsojcaicnihuan niman tatajin, xnechcaquican. On hueyixticaj Dios oquinotitij totataj Abraham ijcuac yejhua nemiya ne Mesopotamia, ijcuac xe onchantiya ne Harán. ³ Niman Dios oquijlij: “Xquisa nican motlalpan niman xquincajtehua mochanejcahuan*, niman xhuiya ne ipan on tetlalpan yejhuan nimitzititis.” ⁴ Ijcuacon Abraham oquis ne intlalpan on caldeos niman ochantito ipan on pueblo itoca Harán. Niman ijcuac yomic itataj, Dios oquititlan Abraham ipan in tlajli campa aman nemejhuamej nenchantij.

⁵ Pero xoquimacac nion se herencia ipan in tlajli, nion siquiera campa quitlalis se icxi. Pero Dios oquimacac ipromesa ica quimacas yejhua niman sanquin ijcuac miquis quincahuilijtejhua ihuejcacone huan, masqui ipan on

* **6:14** cosas † **6:15** ángel: Angeles tequitij ne ilhuicac niman nican ipan in tlalticpactli. * **7:3** tu parentela

tonaltin Abraham oc† xquimpiaya iconehuan. ⁶ Niman Dios oquijlijca ica ihuejcacone huan chanejquej yesquej ipan se tlajli yejhuan xinyaxca†, niman ica ompa tlanamactin yesquej, niman quintlajyohuiltisquej nahui ciento xipan. ⁷ Pero Dios no oquijlij: “Nictlajtlacolmacas on país yejhuan quimpas tlanamactin niman quemaj yejhuamej quisasquej ompa, niman nechajtequipanosquej nican.” ⁸ Quemaj Dios oquitlalij se pacto ihuan Abraham niman oquinahuatij ma quitlali se nescayotl, itoca circuncisión, ipan inacayo para nestias ica oquiselij on pacto. Quemaj Abraham onochiu tajtli ican Isaac niman ipan oquitlalij on nescayotl de circuncisión ijcuac quipiaya chicueyi tonajli ica onen. Niman no ijqui oquichiu Isaac ihuan Jacob on iconeu, niman Jacob no ijqui oquichiu inhuan iconehuan on yejhuan onochijquej tatajtin intech on majtlactli huan ome chanejquej de Israel.

⁹ ’Iconehuan Jacob oquinexicolita quej José on imicniu, niman oquinamacaquej para ocuicaquej ne ipan on país Egipto. Pero Dios xqueman ocau José ¹⁰ niman oquimanahuij ipan nochitlen teyolcocoj. Oquimacac tlamachilistli niman oquipalehuij para quipactis Faraón on irey on país Egipto. Niman on rey oquitlalij José quen más hueyi tlayecanquetl itech on país Egipto niman no sa no itech nochitlen iyaxca on rey.

¹¹ ’Quemaj ohuajlaj se mayantli yejhuan sanoyej§ oquintlajyohuilitij on chanejquej nochihuiyan ne Egipto niman Canaán. Ijcon, tej, on totajhuan xquinextiayaj tlen quicuasquej. ¹² Niman ijcuac Jacob oquimat ica ne Egipto oncatca trigo, ompa oquintitlan iconehuan yejhuan toachtojtajhuan. Ipan in tonaltin quemach yeica oyajquej. ¹³ Ijcuac on toachtojtajhuan ica ocpa oyajquej ne Egipto, José oquichiu para ma quixmatican on icnihuan, niman no oquichiu para irey Egipto ma quimati aquinon itech hualejticaj. ¹⁴ Quemaj José otlatitlan ma cuajhuiquilican itaj Jacob ne Egipto niman nochitlen ichanchanejcahuan yejhuan canaj yepoajli* huan majtlactli ipan macujli tlacamej catcaj. ¹⁵ Niman ijcon Jacob otemoc, niman ochantic ne Egipto campa saquin† ompa omic niman campa no omiquej on toachtojtajhuan. ¹⁶ Saquin oquinhuicaquej on micatzitzintin ne Siquem niman ompa oquin-tocaquej ipan on tlalcontli yejhuan Abraham oquincohuilijca on iconehuan Hamor ne Siquem.

¹⁷ ’Ijcuac ye nisu para nochihuas on tlen Dios yoquimelajcajlicia Abraham, on hebreos ne Egipto sanoyej omiyequiaquej. ¹⁸ Quemaj ne Egipto opeu tequihuajti se rey yejhuan xoquimat itech ica José. ¹⁹ Yehua in yencuic rey oquincajca yau tlamach ica on tochantlacaj‡ hebreos, niman xcuajli oquimpix on toachtojtajhuan hasta quinchihualtiaya para ma quincahuatij inconehuan ne tlapatlaco yejhuan quemach tlacatij para ompa ma miquican. ²⁰ Sa no ipan on tonaltin otlacat Moisés niman yejhua oquipacaitac Dios. Niman Moisés oquiscaltijquej yeyi metztli ichan itaj. ²¹ Niman ijcuac oquicahuatoj Moisés ne tlapatlaco, ichpoch on rey ne Egipto oquinextito, niman oquiscaltij quen iconeu yesquia. ²² Niman oquimachti-jquej Moisés nochitlen tlajtlamach§ yejhuan on egipios nomachtiaj, niman Moisés nochitlen hueliya quijtohuaya niman quichihuaya.

²³ ’Ijcuac Moisés ye quipiaya ompoajli* xipan, oquinec cominnotzas on ichantlacaj† hebreos. ²⁴ Ompa oquitac ica se egipcio cuijsoquia se de

† ^{7:5} todavía; sanquen ‡ ^{7:6} no le pertenece; xinaxca, xinhuaxca, xintlatqui § ^{7:11} muy

* ^{7:14} Yepoajli quitosnequi sesenta, niman yepoajli huan majtlactli ipan macujli quitosnequi setenta y cinco. † ^{7:15} después ‡ ^{7:19} nuestros paisanos § ^{7:22} cosas * ^{7:23} cuarenta

† ^{7:23} su raza

yejhuamej on hebreos. Yejhua, tej, oquimanahuij on hebreos, niman ocuepiltij on egipcio yejhuan temailiaya hasta oquimictij. ²⁵ Ijcuac ijcon oquichiu quinemiliaya ica on ichanchanejcahuan hebreos cajsicamatisquiaj ica Dios yejhuia itechcopia quinmaquixtisquia, pero yejhuamej xocajsicamatquej. ²⁶ Niman ijcuac huajmostla, Moisés oquinnextito omemej hebreos yejhuan nohuijsoquiyaj. Pampa quinequiya quintlahuelsehuis, yejhuia oquimijlij: “Tlacamej, nemejhuamej nemicniutin. ¿Tlica‡, tej, ijcon nenquimochihuliaj?”

²⁷ Ijcuacon on yejhuan cuijsoquia on itehuical oquimapejtiaj Moisés, niman oquijlij: “¿Aquinon omitztlalij para toca titequihuaj yes niman para titechtlajtlacolmacas? ²⁸ ¿No ticnequi tinechmictis quen yalohua oticmictij on egipcio?” ²⁹ Niman ijcuac Moisés oquimat ica on tlacamej oquimatquej ica oquimictijca se egipcio, ocholojteu niman oyaj ne ica Madián. Ómpa ochantic quen se yejhuan xchanej, niman oquipix ome iconeu.

³⁰ Niman ijcuac yopanoc on ompoajli xipan, se ilhuicactequitquetl§ oquinotitij ican se tlimilinajli ipan se tlacotepajsojli ne campa tlapatlaco, nisu on tepetl itoca Sinaí. ³¹ Ijcuacon Moisés sa tlamojcaitzticatca ica on tlen oquitac. Niman ijcuac oquinisihuij para más cuajli quitas, ocac itlajtol toTeco yejhuan quijtohuaya: ³² “Nejhua niinDios on moachtojtajhuan. NiiDios Abraham, Isaac niman Jacob. Ijcuacon Moisés opeu mojcacuecuetlacaya, niman xquichihuaya canica para ontlachas.” ³³ Quemaj on toTeco oquijlij: “Xquinquixti mocachuan pampa nican campa ticholojticasanoyej tlayecan. ³⁴ Melahuac yoniquintac quen tlajyohuijaj nocone huan yejhuan chantij ne Egipto, niman niquincaqui quen chocaj ican ajmantli. Aman yonitemoc para niquinmanahuis. Xhuajla, tej, nimitztitlanis ne Egipto.” ³⁵ Aman, tej, sa no yejhua on Moisés on yejhuan xoquitlacamatquej niman oquijlijquej: “¿Aquinon omitztlalij para toca tequihuaj yes niman para titechtlajtlacolmacas?” Dios oquititlan para tlayecanquetl niman para temaquixtijquetl yes. Ijcon oquititlan itechcopia on ilhuicactequitquetl yejhuan oquinotitij ne ipan on tlacotepajsojli. ³⁶ Moisés, tej, yejhua oquinquixtij on hebreos ne Egipto. Niman yejhua oquichiu milagros niman tlamajhuisojli ne Egipto niman ne ipan on mar Rojo, niman ne tlapatlaco campa onenquej ompoajli xipan. ³⁷ Aman sa no yejhua on Moisés yejhuan oquimijlij on hebreos: “Dios mechajtitlanilis se tiotlajtojquetl yejhuan sa no nemotzajlan quisas ijcon quen nejhua onechajtitlan. Xcaquican tlinon yejhua mechijlis.” ³⁸ Niman Moisés no yejhua onen inhuan on tlacamej yejhuan onosentlalijquej ne campa tlapatlaco. Yejhua onen ihuan on ilhuicactequitquetl yejhuan oquinotz ne ipan on tepetl itoca Sinaí niman inhuan on toachtojtajhuan. Niman no yejhua oquiselij on cuajli tlajtojli yejhuan quitemaca nemilistli para otechpanoltilij.

³⁹ Pero on toachtojtajhuan xoquinequej oquitlacamatquej, yej neca ocomapejquej, niman ocsejpa quinequiya para nocuepasquej ne Egipto. ⁴⁰ Yejhuamej oquijlijquej Aarón: “Xtechchijchihuli totajtzitzihuan para techyecanasquej tejhuamej, pampa Moisés, on aquin otechquixtij ne tetlapan Egipto, xticmatij tlinon ipan yonochiu.” ⁴¹ Quemaj oquichijchijquej se huacaxconetl niman oquinmictijquej yolquej para ocuentlalilijquej itech on intotajzin, niman opacquej yejhua ica on tlen oquichijchijquej ican inmahuan. ⁴² Ijcuacon Dios oquintlalcahuij niman oquincahuilij para ma

‡ ^{7:26} ¿por qué?; ¿tline? § ^{7:30} ángel: Angeles tequitij ne ilhuicac niman nican ipan in tlalticpactli.

quinmahuistilican on tlahuiltin yejhuan quech tlahuilohuaj ne ipan cielo* ijcon quen tlajcuilolnesticaj ipan on intlajcuilolamau on tiotlajtojquej: Nemehuamej chanejquej ne Israel, ¿zonenquinmictijquej on yolquej para nenechixpantilisquej nejhua ipan on ompoajli xipan ne tlapatlaco?

43 Ca. Yej nenquituiyaj on itiopantzin on dios Moloc niman on isitlalin on dios Renfán. Yejhua in tlajtlamach onenquinmachijchijquej para onenquinmahuistilijquej. Yejhua ica, tej, nejhua nemechquixtis ne ipan nemopáis niman nemechtitlanis más huejca iyacapan on Babilonia.

44 'Ne campa tlapatlaco on toachtojtajhuan quipiayaj on tlaquentiopan hueyi campa quejehuayaj on temej yejhuan ipan tlajcuilolnesticatca on tlanahuatiqli. Ijcon, tej, quipiayaj on quen Dios oquinahuatij Moisés para ma quichijchihua ijcon quen yejhua oquititij. **45** Quemaj más saquin toachtojtajhuan oquinmacaquej inconehuan on tlaquentiopan. Niman quemaj yejhuatej oquitquej ijcuac oyajquej ihuan Josué niman oquinoyaxcatijquej intlal on xhebreos yejhuan Dios oquinquixtij imixpan on toachtojtajhuan. Ijcon, tej, onochiu hasta ipan on tonaltin ijcuac David nemiya.

46 Dios ican iteicnelilis oquiselij David, niman David oquitlajtlanilij para cahuilis ma quichijchihuili se tiopan para iDios Jacob chantis. **47** Pero Salomón yejhua oquichijchihuili ihueyi tiopan Dios. **48** Pero tohueyi Dios xchanti ipan tiopantin yejhuan tlacamej quichijchihuaj. Ijquin quijtohua on tiotlajtojquetl:

49 ToTeco Dios quijtohua: "On ilhuicac on campa nehuaticaj niman on tlalticpactli on campa nicholojticaj. Tla ijcon, tej, xhuelis tinechchijchihuili tiopan campa nichantis. Nion xoncaj canon campa ninosehuis.

50 ¿Tlen xnejhua ican nomahuan onicchijchiu nochí in tlajtlamach?"

51 Quemaj Esteban oquimijlij:

—Nemejhuamej nochipa ijcon nenquichihuaj, sanoyej nenyoltechicajquej. Xnenquinequij nenaquisquej itlajtol Dios nion xnenquinequij nenequitlacamatiquej. Yej nochipa xipan nenquitaj on Espíritu Santo. Ijcon quen nemotajhuan onohuicajquej, no ijqui nemejhuamej nemohuicaj.

52 Nemoachtojtajhuan oquintlahuelitaquej niman tlajtlamach ica oquitlayohuilitijquej nochimej on tiotlajtojquej. Oquinmijmictijquej on yejhuan oquiteijlijquej ica huajlas on yolmelajqui, niman aman ica yohuajlaj nemejhuamej onenquitemactilijquej niman onenquimictijquej. **53** Masqui onenquiselijquej itlanahuutil Moisés intechcopia on ilhuicactequitquej, xnenquitlacamatij.

Oquimictijquej Esteban

54 Ijcuac yejhuatej ocacquej on tlajtlamach, ocualanquej sanoyej ipan inyøjlo itechcopia Esteban, hasta notlantisijaj ican intlahuel. **55** Pero on Espíritu Santo nochí ica quiyecanaya Esteban, niman yejhua ontlachix ne ilhuicac niman oquitac ihueyilis Dios, niman Jesús ompa ijcaticatca iyecmacopa Dios.

56 Ijcuacon oquijtoj:

—¡Xquitacan! Nejhua niquita on ilhuicac tlajtlicaj, niman yejhua on yejhuan onochiu Tlacatl ompa ijcaticaj iyecmacopa Dios.

57 Ijcuacon yejhuatej ononacastzajtzacuquej niman chicahuac otzajtziquej niman quemaj nochimej san secan ipan oyajquej. **58** Oquixtijquej ne ipan on hueyican. Quemaj on yejhuan oquiteixpanhuijquej Esteban oquitlalijquej intlaquen ne icxitlan se telpochtli itoca Saulo, niman opeu

* **7:42** On cielo oncaj ne campa oncaj ajacatl, moxtli, metztli, tonajli niman sitlalimej.

quitemojmotlaj. ⁵⁹ Niman chica quitemojmotlayaj, Esteban onohueyicatzatzilij. Ijquin oquijtoj:

—NoTeco Jesús, xnechselili nonemilis.

⁶⁰ Quemaj onotlacuenquetz niman chicahuac otzajtzic:

—NoTeco, ma ca tiquintlajtlamacas yejhua ica in tlajtlacojli.

Niman quemaj ijcuac ijquin oquijtoj, ohuajnotlamilij.

8

¹ Niman Saulo tehan quimatiya para ma quimictican Esteban.

Saulo oquintlahuetotocatinen niman oquintlajyohuiltij on yejhuan tlaneltocaj

Ipan on tonajli opeu quintlahuetotocatinemij niman quintlajyohuiltiaya sanoyej* on yejhuan tlaneltocaquej ne Jerusalén. Ijcon, tej, nochimej on tlaneltocaquej ochojcholojquej ne ica miyecan ipan iregión Judea niman ne ica Samaria, pero on apóstoles onocajquej. ² Quemaj sequimej tlacamej yejhuan cuajli quitlacamatij Dios oquitocatoj Esteban, niman sanoyej oqui-choquilijquej. ³ Niman Saulo opeu quintlahuetotocatinemi niman quintlajyohuiltiaya on yejhuan tlaneltocaj. Yejhua calaquiya techajchan niman quinhuaquixtiaya hasta quintejchihuilanaya on tlacamej niman sihuamej para comintzazuaya.

Onoteijlij on cuajli tlajtojli yejhuan quitemaca temaquixtilistli ne Samaria

⁴ Yejhuatej on yejhuan onochajchayajquej† oyajquej nochihuayan quiteijlijiayaj on cuajli tlajtojli yejhuan quitemaca temaquixtilistli. ⁵ Ijcuacon Felipe otemoc ipan se hueyican ne Samaria niman opeu tenojnotzaya ica Cristo. ⁶ On tojlamej nosentlaliayaj niman ican se inyojo cuelcaquiyaj on tlajtlamach‡ yejhuan Felipe quitoihuaya. Caquiyaj niman quitayaj on tlama-jhuisoltin yejhuan quichihiaya. ⁷ Ijcon, tej, miyequej tlacamej yejhuan quip-iyaj on xcuajcualtin espíritus quimpajtiaya niman on xcuajcualtin espíritus tzajtziyaj chicahuac ijcuac quisayaj impan on tlacamej. Niman miyequej on yejhuan sepohuiyaj niman huilatzitzintin quimpajtiaya. ⁸ Ijcon, tej, ipan on hueyican nochimej sanoyej paquiyaj. ⁹ Pero ipan on pueblo nemiya se tlacatl itoca catca Simón. Yejhua nahuaqli catca, niman yoquincajcayajca on chane-jquej ne Samaria, quimiliaya ica yejhua se tlacatl hueyixtacaj. ¹⁰ Nochimej caquiyaj cuajli desde on pipitijkej hasta on yejhuan huejhueyimej, quijto-huayaj: “Yejhua in tlacatl yejhua ihueyi poder Dios.” ¹¹ Niman sanoyej cueli-tayaj caquiyaj, pampa ye quipiaya miyec tonaltin yoquimixcajcajyajca ica inajhuajlo yejhuan hueliya quichihiaya. ¹² Pero ijcuac oquineltocaquej on cuajli tlajtojli yejhuan Felipe quiteijliaya ica quen ijqui Dios tlamandarohua niman ica Jesucristo, nocuatequiayaj sanquen tlacamej niman sihuamej. ¹³ Niman hasta Simón no otlaneltocac niman onocuatequij. Yejhua opeu cuicatinemi Felipe, niman ica oquitac on huejhueyi tlamajhuisoltin niman milagros yejhuan nochihuaya sanoyej tlapacaitaya.

¹⁴ Ijcuac on apóstoles yejhuan nemiyaj ne Jerusalén oquimatquej ica miyec tlacatl ne Samaria yoquiselijquej itemachtil Dios, ompa oquintilanquej Pedro niman Juan. ¹⁵ Ijcuac oajsiquej, oquichijquej oración impampa on tlaneltocaquej ne Samaria para ma quiselican on Espíritu Santo. ¹⁶ Ijcon oquichijquej pampa xe yacaj ipan huajtemohuaya on Espíritu Santo, yej san onocuatequiçaj ican itocatzin Jesús. ¹⁷ Quemaj Pedro niman Juan

* **8:1** mucho † **8:4** se esparcieron ‡ **8:6** cosas

oquintlalijquej inmahuan impan yejhuamej, niman ijqui oquiselijquej on Espíritu Santo.

¹⁸ Ijcuac Simón oquitac ica on Espíritu Santo huajlaya ijcuac on apóstoles quitlaliajaj inmahuan impan on tlaneltocaquej, oquintequivultij tomin, ¹⁹ oquimijlij:

—Nejhua no xnechmacacan in poder para ijcuac nejhua nictalis nomahuan san ipan aquinon, yejhua no quiselis on Espíritu Santo.

²⁰ Quemaj Pedro oquimijlij:

—Motomin mohuan ma popolihui, pampa ticnemilia ica in poder yejhuan Dios quitemaca huelis ticoahuas. ²¹ Xhuelis timopohuas tohuan nion xmitzmelahuas ticchihuas yejhua in tequitl, pampa xtiyolchipahuac ixpan Dios. ²² Xcajcahua on tlen xcuajli ticchihua, niman xtlajtlanili Dios para tiquitas tla mitzlapojpolhuilis on tlen ticnemilia ipan moyojlo, ²³ pampa niquita ica ticpia nexicolistli ipan moyojlo, niman mitzpira on motlajtlacol quen tlanamactli.

²⁴ Quemaj Simón oquimijlij:

—Nopampa xchihuacan oración itech on toTeco para ma ca nopenochihuas on tlen yonennechijlijquej.

²⁵ Ijcuac yoquiteixpantilijquej niman yotenojnotzquej ican itlajtoltzin Dios, Pedro niman Juan onocuepquej para Jerusalén. Niman ipan miyec pueblitos ne Samaria campa huajpanotiayaj ompa quiteijliayaj on cuajli tlajtojli yejhuan quitemaca temaquixtilistli.

Felipe oquinotz se tlacatlyejhuan ohualeu ne Etiopía

²⁶ Niman ijcuac yonochiu nochí yejhua on, toTeco oquititlan se ilhuicacte-quitquetl* yejhuan oquinotz Felipe, niman oquijlij:

—Xmotelquetza niman xhuiya ne ica ipan sur ipan on ojli yejhuan temohua ne Jerusalén niman yau hasta Gaza.

Yejhua on ojli panohua ne campa tlapatlaco. ²⁷ Ijcuacon Felipe ohua-jnotelquetz niman oyaj. Niman ipan ojli oquinamic se tlacatl yejhuan hualehua ne Etiopía. On tlacatl eunucoj catca. Yejhua hueyi tequihuaj catca yejhuan nemiya quen tesorero ica on quech tomin quipiaya on sihuatl itoca Candace yejhuan tequihuaj catca nochí on iregión Etiopía. Yejhua on tlacatl oyajca ne Jerusalén para oquimahuistilito Dios. ²⁸ Yejhua in tlacatl nocue-paya para ichan ipan icarreta, niman huajnomachtijtiaya itlajcuilolamau on tiotlajtojquetl Isaías. ²⁹ Quemaj on Espíritu Santo oquijlij Felipe:

—Xhuiya niman xnisihi on carreta.

³⁰ Niman Felipe oquinisihuij niman ocac ica nomachtiaya on itlajcuilolamau on tiotlajtojquetl Isaías. Niman oquitlajtoltij, oquijlij:

—¿Ticajscamati on tlen tictmomachtia?

³¹ Niman yejhua oquinanquilij:

—¿Quen ijqui, tej, nicajscamatis tla xacaj nechmachtia?

Ijcuacon oquitlajtlanilij Felipe para ma tlejco niman ma notlali ihuan.

³² Niman ipan on Yectlajcuilojli campa quinomachtijtiaya ijquin quijtohua: Ocuicaquej para miquis quen itlaj borrego. Niman ijcon quen on borreguito xnahuati ijcuac quiximaj, no ijqui yejhua xtlaj† oquijtoj.

³³ Oquipijpinahuijquej niman oquitlajtlacolmacaquej masqui yejhua xo-quichiu itlaj tlen xcuajli. Xqueman yacaj huelis quintenehuas iconehuan, pampa oquixtilijquej on inemilis nican tlalticpac.

§ ^{8:21} no mereces * ^{8:26} ángel: Angeles tequitij ne ilhuicac niman nican ipan in tlalticpactli.

† ^{8:32} nada; coxtla

³⁴ On hueyi tequihuaj oquitlajtoltij Felipe:

—Xchihua se favor. Xnechijli, on tiotlajtojquetl, ¿aquinon quijtohuilia in tlajtlamach? ¿Sa no yejhua notenehuaya, noso quijtohuilia yacaj ocse?

³⁵ Quemaj Felipe oquipehualtij quinojnotza desde on Yectlajcuilojli yejhuan quinomachtijticatca, niman hasta nochí oquitlajtlajtohuilij on cuajli tlajtojli itech ica Jesús. ³⁶ Niman ijcuac panotiaya ipan ojtli, oyejcoquej campa oncatca atl. Niman on hueyi tequihuaj oquijlij Felipe:

—Nican oncaj atl. ¿Xhuelis tinechcuatequis?

³⁷ Felipe oquijlij:

—Tla ticneltoca Cristo ican nochí moyojlo, huelis.

On tlacatl oquijlij:

—Nicneltoca ica Jesucristo yejhua iConetzin Dios.

³⁸ Niman quemaj on hueyi tequihuaj otlanahuatij ma quiteltican on carreta. Quemaj Felipe niman on hueyi tequihuaj otemoquej ompa ne itech on atl, niman Felipe ocuatequij. ³⁹ Niman ijcuac huajtlejcojtiaya ne itech on atl, on iEspíritu toTeco oquejcuanij Felipe nimantzin, niman on hueyi tequihuaj xoc oquitac, pero yejhua oyaj ipan iohui ican pactli. ⁴⁰ Felipe ononextito ne ipan on hueyican itoca Azoto. Yejhua panotiaya niman quiteijlijtiaya on cuajli tlajtojli yejhuan quitemaca temaquixtilistli. Ijcon quichihuaya ipan nochimej on pueblos hasta ijqui oajsic ne Cesarea.

9

Saulo onoyolpatlac

(Hch. 22.6-16; 26.12-18)

¹ Saulo oc* tlamomojtijtinemiya niman quintlajtohuilijticatca ica quinmijmictis on tlaneltocaquej itech toTeco. Yejhua ica, tej, oyaj itech on inmás hueyi tlayecancau on tiopixquej, ² niman oquitlajtlanilij se amatlanahuatijli yejhuan ica nopresentarosquia ne ipan intiopanhuan on hebreos ne hueyican Damasco, niman comintejtemosquia on yejhuan quitlacamatiyaj on cuajli temachtijli. Niman ijcuac quinnextisquia sanquen tlacamej niman sihuamej, quinhaujtzacuasquia ne Jerusalén. ³ Pero chica yaya ipan ojtli ne nisu Damasco, nimantzin ohuajpetlan ne iyehualican se tlahuijli yejhuan hualejticatca ne ilhuicac. ⁴ Ijcuacon Saulo ohuetz ipan tlajli, niman ocac se tlajtojli yejhuan oquijlij:

—Saulo, saulo, ¿tlicat tinechtlahuelita niman tinechtlajyohuilitijtinemi?

⁵ Niman yejhua oquinanquilij:

—¿Aquin tejhua Señor?

Niman on tlajtojli oquinanquilij:

—Nejhua niJesús aquin tinechtlahuelita niman tinechtlajyohuilitijtinemi. Sa no tejhua timocojcocohua ijcon quen nocojcocohua se huacax ijcuac quitejtelicsa ipunta on tlen ica quitzopinijtihuij ijcuac tequiti.

⁶ Ijcuacon yejhua sa mojacacuecuetlacaticatca, niman oquijlij:

—Señor, ¿tlinon nonequi ma nicchihua?

Niman on toTeco oquijlij:

—Xmotelquetza niman xhuiya ne ipan on hueyican, niman ompa mitzijlisquej tlinon ticchihuas.

⁷ On tlacamej yejhuan yayaj ihuan Saulo onomojtijquej pampa ocacquej on tlajtojli pero xacaj oquitaquej. ⁸ Quemaj Saulo onotelquetz ne ipan tlajli, pero ijcuac oquintlapoj ixtololojhuán xoc tlachaya. Yejhua ica oquimayantiajquej

* ^{9:1} todavía; sanquen † ^{9:4} ¿por qué?; ¿tline?

hasta ne Damasco. ⁹ Ompa yeji tonajli xotlachix. Niman xotlacuaj nion xitlaj[†] oconic.

¹⁰ Ne Damasco chantiya se nomachtijquetl itoca Ananías. Niman toTeco oquinotz ipan se tlatlachalistli yejhuan quen itemicpan, niman oquijlij:

—Ananías.

Niman yejhua oquinanquili:

—Nican ninemi noTeco.

¹¹ Niman on toTeco oquijlij:

—Xmotelquetza niman xhuiya ne ipan on calle quitocayotiaj “Melajqui”. Niman ompa xtejtemo ne ichan Judas se tlacatl itoca Saulo yejhuan hualehua ne Tarso. Aman, tej, yejhua nohueyicatzajtzilijticaj, ¹² niman ipan se tlatlachalistli yejhuan quen itemicpan yejhua oquitac se tlacatl itoca Ananías yejhuan ocalaquito, niman ipan oquitlalij imahuan para ocsejpa huelis tlachas.

¹³ Ijcuac Ananías ijcon ocac, oquijlij:

—NoTeco, ye niquincaquilijtinemi miyequej ica on tlacatl quech san tlajtlamach[§] yoquinchihuilij on yejhuan otiquintlapejpenij para moyaxcahuan* ne Jerusalén. ¹⁴ Niman aman yejhua ohuajlaj nican ican se amatlanahuatiiji yejhuan intlayecancahuan on tiopixquej oquimacaquej para quinmajsis nochimej on yejhuan quiyectenehuaj motocatzin.

¹⁵ Pero on toTeco oquijlij:

—Xhuiya, pampa on tlacatl yonictlapejpenij para tenojnotzas noca nejhua intech on yejhuan xhebreos, niman inreyes niman on hebreos. ¹⁶ Nejhua niquititis quech san tlajtlamach quiyohuis nopampa.

¹⁷ Quemaj Ananías oyaj ne ipan on cajli campa nemiya Saulo. Ijcuac ocalaquito, oquitlalij imahuan ipan Saulo, niman oquijlij:

—Nocniu Saulo, on toTeco Jesús yejhuan omitznotitij ne ipan on ojti campa tihuajlaya, onechajtitlan para ocsejpa huelis titlachas, niman para on Espíritu Santo nochim ica mitzyecanas.

¹⁸ Quemaj nimantzin oxinquej ipan on ixtololojhuan on quen ixcacahuayohuan[†], niman ocsejpa ohuel otlachix. Quemaj Saulo ohuajnotelquetz, niman onocuatequij. ¹⁹ Niman ijcuac yotlacuaj, ocsejpa ocajsic chicahualistli. Niman Saulo onocau quesqui tonajli inhuan on tlaneltocaquej yejhuan ompa chanejquej ne Damasco.

Saulo oquiteijlij on cuajli tlajtojli yejhuan quitemaca temaquixtilistli ne Damasco

²⁰ Quemaj nimantzin Saulo opeu temachtia ipan itiopanhuan on hebreos ica Jesús yejhua iConetzin Dios. ²¹ Niman nochimej on yejhuan caquiyaj sa mojcatlachayaj, niman quijtohuayaj:

—¿In tlacatl xejhua quintlahuelita niman quintlajyohuiltia on yejhuan ne Jerusalén quiyectenehuayaj itocatzin Jesús? ¿Xsa no yejhua yejhuan ohuajlaj nican para quinhuicas presos on yejhuan tlaneltocaquej itech Jesús, niman comintemactilis intech intlayecancahuan on tiopixquej?

²² Pero Saulo quimijliaya ican más yolchicahualistli on hebreos ica Jesús melahuac yejhua on Cristo yejhuan Dios oquitlalij para techmaquixtis. Ijcon oquichiu hasta opejquej ometlamatij on yejhuan chantiyaj ne Damasco.

Saulo ocholoj intech on hebreos

‡ 9:9 nada; coxtla § 9:13 cosas * 9:13 te pertenecen; moaxcahuan, mohuaxcahuan, motlatquihuan † 9:18 escamas de sus ojos

²³ Miyec tonaltin más saquin[‡] on hebreos yoquitlajtohuilijcaj Saulo para quimictisquej. ²⁴ Pero yejhua oquimat tlinon quichihuasnequiyaj on hebreos. Ican tonajli niman yehuajli yejhuatej quipijpiayaj ipan itlatzacuijlohuans[§] on hueyican para quimictisquej. ²⁵ Pero ijcuac tlayohua, on tlaneltoquej oquitlalijquej Saulo ijtic se hueyi chiquitli ne campa tlajiticaj on tepanchinantli yejhuan quiyehualojtoya on hueyican. Quemaj oquitemoltijquej niman ijqui ocholoj.

Saulo oyaj ne Jerusalén

²⁶ Ijcuac Saulo oajsic ne Jerusalén, quichihuaya canica para nosentlalis inhuan on tlaneltoquej, pero nochimej quimacasiyaj pampa xquinelto-cayaj tla yejhua no yotlaneltocac itech Jesús. ²⁷ Ijcuacon Bernabé ocontilan Saulo niman oquimixpantilij on apóstoles. Oquintlajtlajtohuilij quen ijqui Saulo oquitac toTeco ne ipan ojtli, niman quen ijqui toTeco oquinotz. Niman no oquitetlajtlajtohuilij quen ne Damasco Saulo otemachtij ican yolchicahualistli pampa Jesú. ²⁸ Quemaj Saulo onocau ne Jerusalén niman inhuan quistinemiya. ²⁹ Niman tenojnotzaya ican yolchicahualistli ipampa toTeco. Yejhua tlajtlajtohuaya niman nocamatlaniya inhuan on hebreos yejhuan tlajtlajtohuaj on tlajtojli griego, pero yejhuatej quinequiliayaj quimictisquej. ³⁰ Niman ijcuac on tocniuhan oquimatquej yejhua on, ocuicaquej Saulo ne Cesarea, niman ompa ocontitanquej para Tarso.

³¹ Ijcuacon on yejhuan tlaneltocaj nohuiyan ipan on inyehualican Judea, Galilea niman Samaria quipiayaj yolsehuillistli niman noyolchicahuaya. Quitlacaítayaj on toTeco, niman quimpalehuiya on Espíritu Santo. Ijcon, tej, más miyequixtiyaj.

Pedro oquipajtij Eneas

³² Pedro quinnojnotztinemiya on tocniuhan nochihuiyan, niman oyaj para oquintato on teyaxcahuan* itech Dios yejhuan chantiyaj ne ipan on pueblo Lida. ³³ Ompa oquinextito se tlacatl itoca Eneas yejhuan ye quipiaya chicueyi xipan ica onoya ipan itlapech, pampa sepojtoya. ³⁴ Niman Pedro oquijlij:

—Eneas, Jesucristo mitzpajtia. Xmotelquetza niman xcuectlali motlapech.

Quemaj nimantzin Eneas onotelquetz. ³⁵ Nochimej yejhuan chantiyaj ne Lida niman Sarón oquitaquej ica opajtic. Yejhua ica yejhuatej oquitlalcuhuijquej inachtoj tlaneltoc niman oquineltocaquej toTeco.

Pedro oquiyolihuitij Dorcas yejhuan yomica

³⁶ Ne ipan on hueyican itoca Jope nemiya se sihuatl tlaneltoquaetl itoca catca Tabita, yejhuan ipan griego quijtosnequi Dorcas. Yejhua in sihuatl nochipa quichihuaya on tlen cuajli niman quimpalehuiyaya on yejhuan tla itlaj quimpolohuaya. ³⁷ Ipan on tonaltin Dorcas oqualoc niman omic. Niman ijcuac yoquipajpacquej itlalnacayo, ocahuatoj ipan se cajlitic campa ica ome caltlaneptantli niman ompa oquitecaquej. ³⁸ Lida sa nisiu quitzticatca Jope. Yejhua ica ijcuac on tlaneltoquej ne Jope ocacquej ica Pedro nemiya ne Lida, oquintitanquej omemej tlacamej para oquijlijtoj:

—Ma ca tihuejcahuis para tihuajlas Jope campa tejhuamej tinemij.

³⁹ Ijcuacon Pedro ohuajnotelquetz niman oyaj inhuan. Ijcuac oajsic, ocuicaquej ne ipan on cajlitic campa oncatca on itlalnacayo on micatzintli. Niman nochimej on sihuacahualtin† chocayaj niman oquiteyehualojquej

[‡] 9:23 después [§] 9:24 sus puertas * 9:32 pertenecen; teaxcahuan, tehuaxcahuan, tetlatquihuayan † 9:39 viudas; icnosihuamej

para oquititijquej on tlaquentin niman on cuetin yejhuan Dorcas oquinchi-jchiu ijcuac nemiya. ⁴⁰ Quemaj Pedro oquinquixtij nochimej, niman quemaj onotlacuenquetz niman oquichiu oración. Quemaj ohuajnocuep niman ocontac on sihuatl yejhuan mictoya. Niman oquijlij:

—Tabita, xmotelquetza.

Ijcuacon yejhua oquinhuajlapoj ixtololojhuan, niman ijcuac oquitac Pedro, ohuajnotlalij. ⁴¹ Pedro oquitzquij ipan ima niman oquipalehuij para onotelquetz. Quemaj ocominnottz on sihuacahaultin niman on tocnihuan, niman oquimixpantilij yolticaj. ⁴² Yehua in omachiyato nohuiyan ipan on hueyican de Jope, niman miyequej otlaneltocaquej itech on toTeco. ⁴³ Niman Pedro onocau miyec tonaltin ne Jope ipan ichan se curtidor itoca Simón.

10

Pedro oyaj ne ichan Cornelio

¹ Nemija ne ipan on hueyican itoca Cesarea se tlacatl itoca Cornelio. Yejhua on tlacatl tlayecanqui catca ica se ciento soldados niman yejhua on se ciento soldados notocayotiaya Italiano. ² Cornelio quitlacaitaya Dios niman san secan ihuan nochi ichanchisejcahuan* quimahuistiliayaj Dios ican nochi inyojo. No quitemacaya miyec tomin para quimpalehuiyaya on hebreos yejhuan quimpolohuaya, niman nochipa oquichiu oración itech Dios. ³ Se tonajli, canaj ipan yeyi hora ica tiotlac, oquitac se tlatlachalistli quen itemicpan, se ilhuicactequitquetl† yejhuan Dios ocuajtitlan. On ilhuicactequitquetl oquijlij:

—¡Cornelio!

⁴ Cornelio oquimojcaitac on ilhuicactequitquetl, niman oquitlajtoltij:

—¿Tlinon Señor?

Niman on ilhuicactequitquetl oquijlij:

—Dios yoquinselij mooraciones niman yoquitac on tlen tictetlayocolia para tiquimpalehuiya on yejhuan itlaj quimpolohua. Ijcon, tej, yomitzel-namic. ⁵ Aman, tej, xquintitlani tlacamej ne Jope para ma cuajhuicacan se tlacatl itoca Simón, yejhuan no san quixmatij Pedro. ⁶ Niman yejhua mitzijlis tlinon tejhua ticchihuas. Yejhua chanti ihuan ocse tlacatl itoca Simón yejhuan curtidor. Ichan on curtidor oncaj ne nisiu itech on mar.

⁷ Ijcuac oyaj on ilhuicactequitquetl yejhuan ihuan tlajtohuaya, Cornelio oquinnotz omemej itlaquehualhuan. Niman no oquinotz se soldado yejhuan no cuajli quitlacaitaya Dios. ⁸ Nochi oquintlajtlajtohuilij tlen onochiu, niman quemaj oquintitlan ne Jope.

⁹ Niman huajmostla, chica yejhuatej yajtiayaj ipan ojtli niman sa nisiu para ajsisquej ne Jope, Pedro otlejcoc ne icuapan on cajli, canaj tlacualispan, para quichihuas oración. ¹⁰ Yejhua sanoyej‡ apismiquiya niman oquinec tlacuas. Pero chica quichijchihuiayaj tlen quicuas, oquitac se tlatlachalistli quen itemicpan. ¹¹ Oquitac ne ajcopa tlajtohuaya niman huajtemotiya ipan tlajli se hueyi manta istac, huajsajsalijtiaya ipan nochii inahui yacapitzco. ¹² Ipan on hueyi manta huajlayaj nochii tlajtlamach§ yolqui yejhuan najnahui imicxihuan, niman on quech yolquej yejhuan notilanaj ipan tlajli niman on quech totomej yejhuan patlanij. ¹³ Quemaj ocac se tlajtojli yejhuan oquijlij:

—Xmotelquetz, Pedro. Xtlamicti niman xtacua.

¹⁴ Pero Pedro oquijlij:

* **10:2** su familia † **10:3** ángel: Angeles tequitij ne ilhuicac nimn nican ipan in tlaticpactli.

‡ **10:10** mucho § **10:12** diferentes

—Ca, noTeco, pampa nejhua xqueman nicua itlaj on tlen xchipahuac yejhuan itlanahuatil Moisés xtechcahuilia ticusquej.

¹⁵ Ijcuacon on tlajtojli ocsejpa oquinotz, niman oquijlij:

—Tlen Dios oquichipau, ma ca xquijo ica xchipahuac.

¹⁶ Yehua in onochiu yexpa, niman quemaj nimantzin on hueyi manta istac ocsejpa otlejcoc. ¹⁷ Chica Pedro ometlamatzticatca niman sa comatzticatca tlinon quijtosnequi on tlatlachalistli yejhuan oquitaca quen itemicpan, on tlacamej yejhuan oquinhuajtitlan Cornelio, tlajtlantiayaj canon ichan Simón. Quemaj oajsiquej ne iquiahuatenco. ¹⁸ Niman ontzajtliquej oquitetlajtoltijquej tla ompa ipan on cajli nemiya Simón, on yejhuan no itoca Pedro.

¹⁹ Niman chica Pedro oc* quinemilijtacca tlinon quijtosnequi on tlen oquitaca, on Espíritu Santo oquijlij:

—Xquita. Mitztejtemohuaj yeyimej tlacamej. ²⁰ Xmotelquetz, xtemoti niman ma ca xometlamati, yej inhuan xhuiya, pampa nejhua oniquinhua-jtitlan.

²¹ Quemaj Pedro otimoto campa nemiyaj on tlacamej yejhuan Cornelio oquinhuajtitlan, niman oquimijlij:

—Nejhua on aquin nemejhuamej nenquitejtemohuaj. ¿Tlica† onenhualajquej?

²² Yehuamej oquijlijquej:

—Sen tlacatl itoca Cornelio, yejhuan tlayecanquetl ica se ciento soldados, otechajtitlan. Yehua in tlacatl yolmelajqui niman quitlacaita Dios. Nochi quech hebreos quitlacaitaj in tlacatl. Sen iilhuicac tequitcau Dios oquijlij para ma mitzlatitlanili ichan, niman tiquijlis on tlen ticpia para tiquijlis.

²³ Quemaj Pedro oquincalactij, niman ompa onocajquej ipan on tlayohua. Niman huajmostla ohuajnotelquetz niman oyaj inhuan. Niman oyajquej san secan inhuan ocsequimej tocnihuan on yejhuan chanejquej ne Jope.

²⁴ Niman huajmostla oajsiquej ne Cesarea campa Cornelio quinchixticatca inhuan ocsequimej yejhuan achi quen quinmita niman on yejhuan más cuajli itetlajsojcahuanc‡ yejhuan yoquinsentlalijca. ²⁵ Ijcuac Pedro oajsic ipan on cajli, Cornelio ohuajquis para oquinamiquito niman onotlacuenquetz ixpan para quimahuistilisquia. ²⁶ Pero Pedro ocontilan, niman oquijlij:

—Xmotelquetz, pampa nejhua no san nitlalticpactlacatl quen tejhua.

²⁷ Niman chica ihuan tlajtlajtohuaya, ocalac campa oquinnextijtajsic miye-quej tlacamej yonosentlalijcay. ²⁸ Niman Pedro oquimijlij:

—Nemejhuamej nenquimatztoquej ica itlanéltoc se hebreo xcahuilia nosentlalis ihuan se yejhuan xhebreo noso calaquis ichan. Pero Dios one-chititij ica xcuajli para yacaj nicuitis ijtlacauquej noso xchipahuac ixpan Dios. ²⁹ Yehua ica, tej, ijcuac onennechnotzquej, onihuajlaj niman xitlaj§ oniquijtoj. Aman, tej, nicnequi nicmatis tlinon ica onennechlatlaniijquej.

³⁰ Ijcuacon Cornelio oquinanquilij:

—Ye quipia nahui tonajli ipan in hora nejhua ninosahuaya. Niman ipan yeyi hora ica tiotlac ijcuac nicchijtacca nooración ne nochan, nimantzin se tlacatl tlaquemej ican se tlaquentli petlanqui onotelquetz nixpan. ³¹ Niman onechijlij: “Cornelio, Dios yoquiselij mooración, niman yoquitac on tlen tejhua tictetlayocolia para tiquimpalehuiya on yejhuan itlaj quimpolojticaj.

³² Xtlanahuati, tej, ma canatij Simón, yejhuan no itoca Pedro, ne ipan on hueyican itoca Jope. Yehua nemi ne ichan se tlacatl, no itoca Simón, yejhuan curtidor niman chanti nisu iitech on mar. Ijcuac huajlas, tlajtlajtos

* **10:19** todavía; sanquen † **10:21** ¿por qué?; ¿tline? ‡ **10:24** amigos de él § **10:29** nada; coxtla

mohuan.” ³³ Ijcon, tej, nimantzin onitlatitlan ma mitztejtemotij, niman oticchiu cuajli ica otihuajlaj. Aman, tej, titochimej tinemij nican ixpan Dios para ticaquisquej nochi tlen on toTeco omitznahuatiij.

Pedro otenojnotz ne ichan Cornelio

³⁴ Quemaj Pedro opeu tlajtlajtohua, niman oquijtoj:

—Aman nicmati ica melahuac Dios xquichicoita se tlacatl ihuan ocse, ³⁵ yej quiselia san catlejhua tlacatl yejhuan quitlacaita niman cuajli quichihua masqui hualehua san catlehua país. ³⁶ Dios oquinhuajtitlanilij in tlajtojli on hebreos. Oquiteijlij on cuajli tlajtojli yejhuan quitemaca yolsehuilistli niman hueli ticseliaj itechcopia Jesucristo. Yejhua iTeco nochi tlacatl. ³⁷ Nemejhuamej cuajli nenuquimatztoquej tlinon onochiu nochihuiyan ne ipan iyehualijyan Judea. Ohuajpeu ne ipan iyehualijyan Galilea, saquin* ijcuac Juan yotemachtij niman yotlacuatequij. ³⁸ Nemejhuamej nenuquimatztoquej yejhua ica on quen Dios oquititlan on Espíritu Santo itech Jesús, yejhuan hualehua ne Nazaret, para quipia poder. Niman no ijqui, tej, nemejhuamej nenuquimatztoquej quen ijqui Jesús nohuiyan oquichijtinen on tlen cuajli niman nochimej on yejhuan itlaj ica quintlajyohuiliaya ica ipoder on diablo oquimpajtijnen, pampa Dios ihuan nemiya. ³⁹ Niman tejhuamej ticteixpantiliaj nochi ica on tlajtlamach tlinon oquichiu ne Judea niman ne Jerusalén. Niman más saquin oquimictijquej, oquimajmasohualtijquej† ipan cojnepanojli‡, ⁴⁰ pero ipan yeyi tonajli Dios oquiyolihuitij§ niman oquetzteu ipan itlalcon, niman oquichiu para ma cuajli noteititi. ⁴¹ Xoquinotitij nochi tlacatl, yej san tejhuamej yejhuan Dios otecht-lapejpenij para ticteixpantilisquej, tejhuamej yejhuan ihuan otitlacaujquej niman ihuan otatliquej saquin ijcuac yonoyolihuitij niman yonoquetzteu ne ipan itlalcon. ⁴² Niman yejhua otechnahuatij ma ticteijlican in cuajli tlajtojli yejhuan quitemaca temaquixtilistli niman ma ticteixpantilican ica yejhua on Jesús Dios yoquitlalij para quinyolcuitis niman quintlajtlacol-macas on yejhuan nemij niman on yejhuan yomiquej. ⁴³ Niman no ye huejcahui nochimej on quech tiotlajtojquej yoquiteixpantilijcaj ica nochimej on yejhuan tlaneltocasquej itech quiselisquej tetlapojpolhuilistli intlajtlacol itechcopia itocatzin Jesús.

On yejhuan xhebreos oquiselijquej on Espíritu Santo

⁴⁴ Chica Pedro oc* tlajtlajtojticatca, on Espíritu Santo impan oyejcoc nochimej on yejhuan caquiyaj on tlajtojli. ⁴⁵ Niman on tlaneltocaquej hebreos yejhuan ohualajquej ihuan Pedro omojcatlachixquej ica ne impan on yejhuan xhebreos no oquiseliquej on Espíritu Santo yejhuan itetlayocolil Dios. ⁴⁶ Ijcon omojcatlachixquej pampa quincaquiyaj on xhebreos tlajtlajtohuaj ica sesetlamantic yencuic tlajtoltin†, niman no quincaquiliayaj quiyectenehuayaj Dios. ⁴⁷ Quemaj Pedro oquijtoj:

—¿In tlacamej yejhuan no yoquiselijquej on Espíritu Santo sa no ijqui quen tejhuamej, huelis yacaj tlatzacuilis para nocuatequisquej?

⁴⁸ Niman Pedro otlanahuatij ma quincuatequican ican itocatzin toTeco Jesús. Quemaj oquitlajtlanilijquej Pedro para ma nocahua quesqui tonajli inhuan.

* ^{10:37} después † ^{10:39} colgaron ‡ ^{10:39} cruz § ^{10:40} ha resucitado; oquiyolitij * ^{10:44} todavía; sanquen † ^{10:46} lenguas

11

Pedro oquinmachiltij on tlaneltoaquej ne Jerusalén on tlen onochiu intech on yejhuan xhebreos

¹ On apóstoles niman on tocnihuan yejhuan nemiyaj imanyan ne Judea ocacquej ica on yejhuan xhebreos no yoquiselijquej on itlajtoltzin Dios.

² Niman ijcuac Pedro ohuajlaj Jerusalén, on tlaneltoaquej hebreos yejhuan quejehuayaj on circuncisión ocajhuaquej. ³ Oquijlijquej:

—¿Tlica* oticalac inchan on tlacamej xhebreos yejhuan xoquiselijquej on nescayotl de circuncisión, niman otitlacuaj inhuan?

⁴ Ijcuacon Pedro oquintlajtlajtohuilij desde ijcuac opeu nochí tlen ipan onochiu, niman oquijtoj:

⁵ —Nejhua ninemiya ne ipan on hueyican itoca Jope. Niman ijcuac nicchihuaya nooración, oniquitac se tlatlachalistli quen notemicpan. Oniquitac on quen itlaj hueyi manta istac yejhuan ne ajcopia huajtemohuaya. Huajsajsalijtiaya ipan on inaucan yacapitzco niman yejcotoya hasta campa nejhua ninemiya. ⁶ Ijcuac onicchiu para cuajli niquitas tlinon huajlau ijtic, oniquitac on yolquej yejhuan najnahui imicxi niman on quech yolquej yejhuan notilanaj ipan tlajli niman on quech totomej yejhuan patlanij. ⁷ Quemaj onicac se tlajtojli yejhuan onechijlij: “Xmotelquetz, Pedro. Xtlamicti niman xtlacua.” ⁸ Pero oniquijtoj: “Ca, no Teco, pampa nejhua xqueman nicua itlaj on tlen xchipahuac yejhuan itlanahuatil Moisés xtechcahuilia ticusquej.”

⁹ Ijcuacon on tlajtojli onechajnanquilij ne ilhuicac ica ocpa quijtohua: “Tlen Dios oquichipau, ma ca xquijto ica xchipahuac.” ¹⁰ Yejhua in onochiu yexpa, niman quemaj nimantzin on hueyi manta istac ocsejpa otlejcoc.

¹¹ Quemaj nimantzin oyejcoquej yeyimej tlacamej ne ipan on cajli campa nejhua ninemiya. Oquinhuajtitlancaj ne Cesarea. ¹² Niman on Espíritu Santo onechijlij ma nihuiya inhuan niman ma ca itlaj ica ma niometlamatí. Niman no nohan oyajquej in chicuasemej tocnihuan. Niman ijcuac otejcoquej, oticalaquej ichan on tlacatl yejhuan quinequiya nechnotzas.

¹³ Yejhua otechtatlajtlajtohuilij quen ijqui oquitac se ilhuicactequitquetl† ne ichan yejhuan ijcaticatca, niman oquijlij: “Xquintilani tlacamej ne Jope para ma cuajhuicacan se tlacatl itoca Simón, yejhuan no itoca Pedro.” ¹⁴ Yejhua mitzijlis on cuajli tlajtojli yejhuan mitzmacas temaquixtilistli ihuan nochí mochanchanejcahuán‡. ¹⁵ Niman ijcuac opeu niquinnojnotza, on Espíritu Santo impan ohuajlaj ijcon quen topan ohuajlaj ijcuac quemach yeica topan oyejcoc. ¹⁶ Ijcuac in onochiu, oniquelnamic on tlen oquijtoj toTeco. Oquijtoj: “On melahuac ica Juan otlacuatequij ican atl, pero nemejhuamej nentlacuatequiliyesquej ican Espíritu Santo.” ¹⁷ Ijcon, tej, tla aman yejhamej Dios no oquinmacac sa no yejhaj on tetlayocolijli yejhuan tejhuamej otechmacac ijcuac oticneltocaquej toTeco Jesucristo, ¿aquin nejhua para niquixnamiquis Dios?

¹⁸ Ijcuac nochimej on tlaneltoquej hebreos ne Jerusalén yocaquej on tlajtlamach§, xoc itlaj oquijtohuilijquej Pedro, yej oquiyectenejquej Dios, oquijtoquej:

—Tla ijcon, Dios no yoquincahuilij on yejhuan xhebreos ma noyolcuepacan niman ijcon quipiásquej yencuic nemilistli para nochipa.

Nemiyaj tlaneltoaquej ne ipan on hueyican itoca Antioquia

* **11:3** ¿por qué?; ¿tline? † **11:13** ángel: Angeles tequitij ne ilhuicac niman nican ipan in tlalticpactli.
‡ **11:14** su familia § **11:18** cosas

¹⁹ Ijcuac on xcuajcualtin tlacamej oquimictijquej Esteban, no opeu quintlahuelitaj niman quintlajyohuiltaj on ocsequimej tlaneltocaquej. Niman ochochojlojquej hasta neca Fenicia niman Chipre, niman hasta neca ipan on hueyican Antioquía. Niman quiteijlijtiayaj itlajtoltzin Dios, pero san quimijliayaj on hebreos. ²⁰ Pero sequimej tlaneltocaquej yejhuan hualehuaj ne Chipre niman ne Cirene ocalaquej ne Antioquía campa oquinnojnotzquej on xhebreos. Oquintlajtlajtohuilijquej on cuajli tlajtojli ica toTeco Jesús. ²¹ On ipoder toTeco quipiayaj niman yejhua ica miyequej otlaneltocaquej niman onopatlaquej itech toTeco. ²² Ijcuac on tlaneltocaquej ipan on tiopan ne Jerusalén oquimatquej in tlajtlamach, yejhuamej oquititlanquej Bernabé hasta Antioquía. ²³ Ijcuac oajsic niman oquitac quen ijqui Dios yoquintochiu, sanoyej* opac. Quemaj yejhua oquintlacanonotz on tlaneltocaquej para nochipa ma tlaneltocatiacan itech toTeco niman ma quitocatiacan ican nochí inyojlo. ²⁴ Bernabé se cuajli tlacatl catca yejhuan on Espíritu Santo nochí ica quiyecanaya. No ijqui oquipix sanoyej hueyi tlaneltoctli. Yejhua ica on yejhuan tlaneltocayaj itech toTeco más omiyequiyequej.

²⁵ Ijcuac ijquin yopanoc, Bernabé oquitejtemoto Saulo ne Tarso, niman ijcuac oquinextij, ocuicac ne Antioquía. ²⁶ Niman ompa onocajquej inhuan on tlaneltocaquej quen canaj se xipan, niman oquinmachtijquej sanoyej miyequej. Ompa ne Antioquía on tlaneltocaquej quemach ye ica oquintocayotijkej cristianos.

²⁷ Ipan on tonaltin semej tiotlajtojquej ohuajtemoquej ne Jerusalén niman oyajquej para Antioquía. ²⁸ Niman ohuajnotelquetz se tiotlajtojquetl itoca Agabo, niman oquitemachiltij itechcopa on Espíritu Santo ica onyas chichahuac mayantli imanyan in tlalticpactli. Niman yejhua in onochiu ijcuac Claudio tequihuaj catca. ²⁹ Ijcuacon on nomachtijquej cada se oquitlalij ipan iyojlo para tlapalehuis san quech huelis niman quintitlanilisquej on tocnihuan yejhuan chantiyaj ne Judea. ³⁰ Niman ijcon oquichijquej. Oquititlanquej Bernabé niman Saulo para ocahuatoj on intetlayocolil intech on tlajtlajmatquej ipan on tiopantin ne Judea.

12

On rey Herodes oquimictij Jacobo niman oquitzacquej Pedro

¹ Ipan on tonaltin on rey Herodes opeu quintlahuelita niman quintlajyohuiltia sequimej yejhuan tlaneltocaj itech toTeco. ² Niman Herodes otlanahuatij ma quimictican Jacobo, icniu Juan, ican machete. ³ Niman ica oquitac ica on hebreos ocuelitaquej on tlen oquichiu, no ocajsic niman oquitzacu Pedro. Yejhua in onochiu ipan on ilhuitl ijcuac nocua on pan yejhuan xquipia tlaxocolilistli*. ⁴ Saquin ijcuac yocajsiquej Pedro, ocalauquiquej ipan cárcel campa oquitemactilijquej intech najnahuitapan soldados niman on cada se nahuitapan soldado quipiaya nahui soldado. Herodes quinemiliaya quixtis ixpan on chanejquej para quiyolcuitis ijcuac yopanoc on ilhuitl pascua. ⁵ Ijcon, tej, Pedro nemiya ne ipan cárcel pero on tlaneltocaquej ipampa nohueyica tzajtziliayaj itech Dios ican nochí inyojlo.

Dios oquixtij Pedro ne ipan cárcel

⁶ Sa no ipan on tlayohua, ijcuac para huajmostla Herodes quinequiya quixtis Pedro ixpan on chanejquej, Pedro cochticatca intzajlan omemej soldados. Yejhua salijticatca ican ome teposcadenas, niman on ocsequimej

* 11:23 muy * 12:3 levadura

soldados tlajpiayaj ne carcejquiahuatenco. ⁷ Niman nimantzin se ilhuicactequitquetl† yejhuan toTeco ocuajtitlan ohuajnonextij, niman on cárcel oten ican tlahuijli. Quemaj on ilhuicactequitquetl ocuihuixoto Pedro inacastlan, niman oquitlachaltij. Quemaj oquijlij:

—Xmotelquetza nimantzin.

Ijcuacon on teposcadenas oxixinquej ne ipan imahuan Pedro. ⁸ Quemaj on ilhuicactequitquetl oquijlij:

—Xmotlaquenti niman xquintlali mocachuan.

Ijcuac Pedro yoquichiu, on ilhuicactequitquetl oquijlij:

—Xtlali motlaquen hueyac niman xnechcuitlapanhui.

⁹ Pedro oquicuitlapanhuij on ilhuicactequitquetl, niman xquimatiya tla melahuac noso ca on tlen quichihuaya on ilhuicactequitquetl. Yejhua quinemiliaya ica quitzticatca se tlatlachalistli yejhuan quen itemicpan. ¹⁰ Oquimpanahuijquej on secan tlajpixquej, quemaj quej yejhua on ica ocan tlajpixquej. Quemaj ijcuac oajsiquej itech on tepostlatzacuilojli yejhuan tlapohui para ipan calle, on tepostlatzacuilojli san iselti otlapou. Oquisquej, niman quemaj ijcuac yoquipanahuijquej se calle, on ilhuicactequitquetl nimantzin oquitlalcahuij. ¹¹ Ijcuacon, tej, Pedro oquimat on tlen onochiu, niman oquijtoj:

—Aman nicajscamati ica melahuac on toTeco ocuajtitlan iilhuicactequitcau para onechmanahuico itech ipoder Herodes niman itech nochí tlen on hebreos quinemiliaya nechchihuilisquej.

¹² Niman ijcuac ocajsicamat yejhua in, oyaj ichan María, yejhuan inan Juan. Juan no itoca Marcos. Ompa miyequej on tlaneltocaquej san secan nemiya nohueyicatzajtzilijtacatcaj. ¹³ Niman ijcuac Pedro oconteteloj on tlatzacuilyotl‡ de on quiahuac, se ichpochtli itoca Rode oyaj para quitas aquinon. ¹⁴ Niman ijcuac oquitencac ica Pedro, sanoyej§ opac. Yejhua ica xoquitlatlapohuilij, yej onotlaloj ne calijtic niman oquiteijlito ica Pedro nemi ne quiahuatenco. ¹⁵ Niman oquijlijquej:

—¡Tejhua yej tiloca!

Pero yejhua quiteijliaya ica melahuac. Ijcuacon yejhuamej quijtohuayaj:

—On xejhua Pedro. Cas san iángel.

¹⁶ Chica ijcuacon Pedro oc* quitetelohuaya on tlatzacuilyotl. Niman ijcuac otlatlapoquej niman oquitaquej ica yejhua, omojcatlachixquej. ¹⁷ Quemaj yejhua oquintlajtlanilij ican ima para ma ca ma nahuatican niman quemaj oquintlajtlajtohuilij quen ijqui toTeco oquixtij ne ipan cárcel. No ijqui oquimijlij:

—Yejhua in quen nopen onochiu xquinmachiltican on tocniu Jacobo niman on ocsequimej tocniuhan.

Quemaj oquis niman oyaj ne ica ocsecan.

¹⁸ Ne ipan cárcel, ijcuac otlanes, sanoyej onajcomanquej on soldados pampa xquimatiyaj thilon onochiu ihuan Pedro. ¹⁹ Herodes otlanahuatij ma quitejtemotij, pero xohuel oquinextijquej. Yejhua ica oquinyolcuitij on soldados niman quemaj otlanahuatij ma quinmictican. Quemaj Herodes oquis ne Judea niman oyaj ne Cesarea campa onocau quesqui tonaltin.

Herodes omic

²⁰ Herodes cualaniya intech on tlacamej yejhuan chantiyaj ipan on huejhueyican intoca Tiro niman Sidón. Yejhua ica on chanejquej Tiro niman

† **12:7** ángel: Angeles tequitij ne ilhuicac niman nican ipan in tlalticpactli. ‡ **12:13** puerta

§ **12:14** muy * **12:16** todavía; sanquen

Sidón onocajquej san se tlajtojli niman oyajquej itech Herodes. Pero achtoj oquinoamigarojquej niman oquitlaquejquej se tlacatl itoca Blasto yejhuan hueyi tlayecanqui catca ichan on rey Herodes. Quemaj oyajquej itech Herodes niman oquitlajtlanilijquej ma ca sa ma quintlahuelita. Ijquin oquitlajtlanilijquej, pampa yejhamej quiseliayaj tlacuajli yejhuan quisaya ipan on región de on rey. ²¹ Quemaj ipan se tonajli Herodes oquitlalij para tlajtos inhuan on chanejquej ne Tiro niman Sidón. Niman quemaj ipan on tonajli onotlaquentij ica on tlaquentli yejhuan san reyes ica notlaquentiaj. Quemaj ohuajnotlalito ipan inesehuilpan campa tequihuajti niman oquinnotz on tlacamej ican se cualtzin tenojnotzalistli. ²² Quemaj on tlacamej opejquej tzajtzij:

—¡Yehua in yejhuan tlajtohua xan yacaj tlacatl, yej se dios!

²³ Herodes oquiselij inyectenehualis on tlacamej quen Dios yesquia. Yejhua ica nimantzin se ilhuicactequitetl yejhuan toTeco ocuajtitlan ocas-tigaroj ican ocuilimej niman opeu quicuaj hasta ijqui omic, pampa yejhua xocueyijilij Dios.

²⁴ Pero on itlajtoltzin toTeco nochayajtiaya niman noteijliaya nochihuiyan.

²⁵ Ijcuac Bernabé niman Saulo otlanquej intequiu ne Jerusalén, ohua-jnociupequej. Niman no ocuajhuicaquej Juan yejhuan no itoca Marcos.

13

Bernabé niman Saulo oquiselijquej intequiyo para temachtisquej

¹ Nemiyaj intzajlan on yejhuan tlaneltocaj ne Antioquía semej tiotlajtojquej niman temachtijquej. Yejhamej catcaj Bernabé, Simón yejhuan no itoca Niger, Lucio on yejhuan hualehua ne Cirene, Manaén yejhuan ihuan onoscaltij Herodes on yejhuan gobernador ne Galilea niman Saulo. ² Se tonajli, ijcuac yejhamej in quitequipanohuayaj toTeco niman nosahuayaj, on Espíritu Santo oquijtoj:

—Xquincalactican Bernabé niman Saulo ipan on tequitl yejhuan onict-lapejpenij para quichihuasquej.

³ Quemaj ijcuac yoquichijquej oración niman yonosauquej, oquitlalijquej inmahuan impan yejhamej niman oquintitlanquej ipan inojhui.

Bernabé ihuan Saulo otemachtijkej ne Chipre

⁴ On Espíritu Santo oquintitlan Bernabe niman Saulo, niman yejhamej otemotoj ne Seleucia niman ompa onatlalijquej para oyajquej ne ipan on tlal-huactli itoca Chipre yejhuan oncaj ne itlajcotian on mar. ⁵ Ijcuac oajsiquej ne Chipre, ocalaquej ipan se hueyican itoca Salamina. Ompa opejquej quiteijliaj on itlajtoltzin Dios ne ipan intiopanhuan on hebreos, niman Juan yejhuan no itoca Marcos quimpalehuiyaya. ⁶ Yejhamej oquistinenquej imanyan on tlal-huactli hasta oajsiquej ne ipan on pueblo itoca Pafos. Ompa oquinamiquej se tlacatl hebreo itoca Barjesús, yejhuan nahuajli catca. Yejhua se tlaca-jcayajquetl catca pampa quiteijliaya yejhua tenojnotzaya itech ica Dios.

⁷ Yejhua nohuicaya ihuan on gobernador Sergio Paulo, se tlacatl yejhuan quipia cajsicamatilistli. On gobernador otlanahuatij ma quinotzatij Bernabé niman Saulo pampa quinequiya caquis on itlajtoltzin Dios. ⁸ Pero on nahuajli Barjesús, yejhuan no itoca catca Elimas, quimixnamiquiya Bernabé niman Saulo. Quinequiya quiyolmajxalos on gobernador para ma ca tlaneltocas.

⁹ Pero on Espíritu Santo noch ika quiyecanaya Saulo, yejhuan no itoca Pablo, niman Pablo opeu quitlajtlata Elimas. ¹⁰ Ijquin oquijlij:

—¡Hueyi tlacajcayajquetl niman xompayejyehua! Tejhua tiiconeu on di-ablo niman tiquixnamiqui noch ika on tlen cuajli. ¿Xqueman ticajcahuas ica

titepopolojtinemis ipan on imelajcajhuitzin toTeco? ¹¹ Aman, tej, on toTeco mitzcastigaros ican ipoder. Tixpajpayatis niman quesqui tonaltin xhuelis tiquitas on tonatzintli.

Quemaj nimantzin oixpajpayat niman ipan otlayohuatiac. Opeu nopalacachohua niman quitejtemohuaya aquinon quitzquis ipan ima pampa xoc tlachaya. ¹² Ijcuac on gobernador oquitac on tlen onochiu, otlaneltocac, niman quipacaitaya on itemachtil toTeco.

Pablo ihuan Bernabé nemiyaj ne Antioquía ipan iregión Pisidia

¹³ Pablo niman itehuicalhuan* ocalaquej ipan barco ne Pafos niman oyajquej ne ipan on pueblo Perge de Panfilia. Pero Juan oquincau niman onocuep para Jerusalén. ¹⁴ Quemaj oquisquej Perge niman oyajquej ne ipan on pueblo itoca Antioquía de Pisidia. Niman ipan on nesehuitlonajli, ocalaquej ne ipan intiopan on hebreos niman onotlalijquej. ¹⁵ Niman ijcuac yacaj yoquinomachtij on itlanahuatil Moisés niman on intlajcuilolamau on tiotlajtojquej, on huejhueyixtoquej tlayecanquej olatitlanquej ma quimijlijtij Pablo niman itehuicalhuan:

—Nocnihuan, tla nenquipiaj itlaj tlajtojli para nentechtlacanonotzasquej, huelis nenquijtosquej.

¹⁶ Ijcuacon Pablo ohuajnotelquetz, niman oquintlajtlanilij ican ima para ma ca ma nahuatican. Quemaj oquijtoj:

—Tlacamej hebreos niman xhebreos yejhuan nenquitlacaitaj Dios, xcaquican. ¹⁷ On inDios in hebreos oquintlapejpenij toachtojtahuan, niman oquinmiyequilih on hebreos ijcuac chantiyaj ne tetlalpan itoca Egipto. Niman ican ipoder oquinquixtij ompa. ¹⁸ Niman ipan canaj ompoajli† xipan Dios oquimijyohuili on quen yejhuamej nohuicayaj ne campa tlapatlaco. ¹⁹ Niman on chicome países yejhuan oncatca ne ipan on tlajli itoca Canaán oquinxoxotonij para oquinmacac intlahuan on hebreos quen inherencia. ²⁰ Más saquin‡ canaj ipan 450 xipan, oquinyecan on hebreos intechcopia on jueces, hasta ipan on tonaltin ijcuac onemico on tiotlajtojquetl Samuel. ²¹ Quemaj ijcuacon on tlacamej oquitlajtlanquej se rey para yejhua quinyecanas, niman Dios oquinmacac Saúl quen rey para ompoajli xipan. Saúl on iconeu Cis niman on huejca teixhuiu§ catca itech Benjamín. ²² Más saquin Dios oquinquixtilij Saúl quen rey, niman ocalactij David para rey. Oquiteixpantilij quijtohua: “Nejhua niquixmati David, iconeu Isaí. Yejhua se tlacatl yejhuan sanoyej nechpactia niman quichihuas nochitlen nicnequis.” ²³ Niman Dios oquinmacac on hebreos se temaquixtijquetl itoca Jesús yejhuan ihuejcaixhuiu David quen Dios yoquitlalica ipan ipromesa. ²⁴ Ijcuac xe huajlaya Jesús, Juan oquimijlij nochimej on chanejquej Israel ica nonequi noyolcuepasquej niman nocuatequisquej. ²⁵ Niman ijcuac Juan tlamiya on itequiyo, oquijtoj: “¿Quen nenuquinemiliaj aquin nejhua? Xnejhua on aquin nemejhuamej nenuquinemiliaj. Yejhua huajlau saquin de nejhua niman nejhua xnechmelahua* para nictomilis icachuan ipan icxiuhan.”

²⁶ ’Nocnihuan, huejca teixhuihuan itech Abraham, niman nemejhuamej xhebreos yejhuan nenquitlacaitaj Dios, yejhua in cuajli tlajtojli yejhuan quitemaca temaquixtilistli omechajtitlanilijquej nemejhuamej. ²⁷ On chanejquej ne Jerusalén niman intlayecancahuan xquimatiyaj aquinon catca Jesús, nion xcajsicamatijay on tlen quinomachtiyaj ipan inamau on tiotlajtojquej ipan nochitlen quech sábados. Pero sa no yejhamej otenquisquej

* ^{13:13} compañeros de él † ^{13:18} cuarenta ‡ ^{13:20} después § ^{13:21} descendiente * ^{13:25} no merezco

intlajtol on tiotlajtojquej ijcuac oquimictijkej Jesús. ²⁸ Niman masqui xoquinextilijquej tlinon ica huelis quimictisquej, yejhuamej oquitlajtlanilijquej Pilato para ma tlanahuati ma quimictican. ²⁹ Quemaj ijcuac yoquichi-huilijquej nochí on tlajtlamach[†] ijcon quen on Yectlajcuilojli quijtohua ica nochihuas itech, oquitemoltijkej ipan on cojnepanojli[‡] niman oquitocaquej ipan se tlalcontli. ³⁰ Pero Dios oquiyolihuitij niman oquetzteu ipan itlalcon. ³¹ Niman quemaj miyec tonajli oquinnotitijnen on yejhuan ihuan otlejcocaj ne ica Galilea para Jerusalén. Aman, tej, yejhuamej quiteixpantiliaj intech in tlacamej.

³² 'Niman aman tejhuamej no temechmachiltiaj on cuajli tlajtojli ica on tlen Dios oquitlalij ipan ipromesa on toachtojtajhuan. ³³ Aman yotechten-quixtilij tejhuamej yejhuan tiincone huan. Otechtenquixtilij ijcuac oquiyolihuitij[§] niman oquetzteu Jesús ne ipan itlalcon. Ijcon onochiu quen tlajcuilo nesticaj ipan on ica ome salmo: "Tejhua tinoConeu niman aman on tlacamej quimatisquej ica tejhua tinoConeu." ³⁴ Niman ica oquetzteu intech on mimiquej para xoc queman ijtzacahuis itlalnacayo huelis nenquitasquej ipan yejhua in Yectlajcuilojli yejhuan quijtohua: "Nemejhuamej nemechmacas on melahuac yectlatiochihualistli yejhuan onicprometerohuilij David." ³⁵ Niman no quijtohua yejhua ipan ocse salmo: "Xticahuilis para ma ijtzacahui itlalnacayo moyecTequitcau." ³⁶ Ica tlen melahuac, David ipan on tonaltin ijcuac nemiya niman ijcuac otlan itequiyo ijcon quen quinequiya Dios, yejhua omic. Niman quemaj ocahuatoj ne campa toctoquej itajhuan niman otlalpalan itlalnacayo. ³⁷ Pero itlalnacayo on yejhuan Dios oquiyolihuitij niman oquetzteu xotlalpalan. ³⁸ Xmatztiacan, tej, nocni huan, ica san itechcopia Jesús hueli temechmachiltiaj quen Dios mechtlapojo polhuilia nemotlajtlacol. ³⁹ Niman de nochí yejhua on tlajtlamach yejhuan ica itlanahuatil Moisés xohuel omechtlapojo polhuilijquej, itechcopia Jesús nochimej yejhuan quineltocaj quiselisquej tetlapojo polhuilistli. ⁴⁰ Xmotacan sa no nemejhuamej, tej, ma ca nemopan nochihuas on tlen oquicuilojquej on tiotlajtojquej ijcuac oquijtojquej:

⁴¹ Xquitacan, tepipinahuijquej, xmojcatlachacan niman xixpolihuican, pampa nejhua, yejhuan niDios, nicchi huas ipan in tonaltin chica nenenmij se tequitl sanoyej hueyi yejhuan xnenquineltocasquej masqui yacaj mechtlajtlajtohuilis.

⁴² Ijcuac Pablo niman itehuicalhuan* oquisquej ne ipan intiopan on hebreos, on yejhuan xhebreos sanoyej oquintlajtlanilijquej ocsejpa ma quinnojnotzacan yejhua ica in tlajtlamach tlajtojli ipan ocse sábado. ⁴³ Niman ijcuac yotlanquej nomachtiaj ne ipan on tiopan, miyequej hebreos niman on xhebreos yejhuan oquiselijquej intlaneltoc on hebreos yejhuan no quitlaca itayaj Dios, oyajquej inhuan Pablo niman Bernabé. Niman yejhuamej quintlacanonatzayaj on tlacamej ma nemican melajqui ipan itetlajsojtlalis[†] Dios.

⁴⁴ Niman ipan on ocse sábado onosentlalijquej sa quen nochimej on chanejquej para caquisquej on itlajtoltzin Dios. ⁴⁵ Ijcuac on hebreos oquitaquej on tojlamej, sanoyej otlahuelmiquej. Quemaj opeu quitlajtolixnamiquij Pablo niman cuijhuicaltiayaj. ⁴⁶ Ijcuacon Pablo niman Bernabé onixcojtilijquej, niman oquimijlijquej:

—Ijqui nonequiya para achtopa nemejhuamej yejhuan nenhebreos temechmacasquej itlajtoltzin Dios. Pero aman pampa xnenquinequij

[†] 13:29 cosas [‡] 13:29 cruz [§] 13:33 lo resucitó; oquiyolitij * 13:42 compañeros de él
[†] 13:43 su amor

nenquiselisquej, niman pampa nencuitiaj xmechmelahua[‡] on nemilistli yejhuan para nochipa, temechtlalcahuisquej niman yej tiasquej intech on yejhuan xhebreos. ⁴⁷ Ijquin ticchihuasquej pampa ijqui otechnahuatij toTeco, quijtohuaya:

Onimitztlalij para ticteixpantilis intech on yejhuan xhebreos, niman para tejhua ticuicas on temaquixtijli nochihuiyan imanyan in tlalticpactli.

⁴⁸ Niman ijcuac yejhuamej on yehuan xhebreos ocacquej on tlajtojli, paquiyaj niman opejquej quijtohuaj ica on itlajtoltzin toTeco sanoyej cuajli. Niman otlaneltocaquej nochimej on yejhuan Dios oquintlapejpenij para quipiasquej nemilistli para nochipa.

⁴⁹ Niman itlajtoltzin on toTeco nochayahuaya imanyan nochi yejhua on régión. ⁵⁰ Pero on hebreos oquinyolchicajquej on sihuamej yejhuan quitlacaityaj Dios niman yejhuan más huejhueyixtoquej niman on tlacamej yejhuan más huejhueyixtoquej ipan on régión. Quemaj opeu quintlahuelitaj niman quintlayohuiltaj Pablo niman Bernabé hasta quemana oquintotocaquej ipan on yehualican. ⁵¹ Ijcuacon on apóstoles oquitzejtzelojquej imicxihuan para oquixinijquej on tlalteutli. Ijcon oquichijquej para oquintitijquej ica Dios xquinselis, yej quintlajtlacolmacas. Quemaj oyajquej ne ipan on hueyican itoca Iconio. ⁵² Niman on nomachtijquej sanoyej paquiyaj niman on Espíritu Santo nochi ica quinyecanayaj.

14

Pablo niman Bernabé nemiyaj ne ipan on hueyican itoca Iconio

¹ Ne Iconio Pablo niman Bernabé san secan ocalaquej ipan intiopan on hebreos niman cualtzin oquinnojnotzquej. Ijcon, tej, miyequej otlaneltocaquej, sanquen on hebreos niman on yejhuan xhebreos. ² Pero on hebreos yejhuan xtlaneltocayaj oquimajcomanquej tlamach* oquimijlijquej on yejhuan xhebreos para ma cuanican intechcopa on tocnihuan. ³ Pero Pablo niman Bernabé onocajquej miyc tonaltin niman otlajtojquej ican yolchicahualistli. Quitlaliayaj inyojlo itech toTeco. Niman toTeco quinmacaya on apóstoles ipoder para ma quichihuacan tlamahuisoltin niman milagros. Ijcon, tej, quiteititiaya ica melahuac on tlen on apóstoles quitehuayaj ica itetlajsojtlalis† Dios. ⁴ Pero on chanejquej ipan on hueyican tlajcoxelijticatcaj. Sequimej nopohuayaj inhuan on hebreos niman sequimej inhuan on apóstoles. ⁵ Quemaj on hebreos niman on yejhuan xhebreos onotlajtolmacaquej inhuan on tequihuajquej para quinhuijhuicaltisquej niman quintemojomotlasquej on apóstoles. ⁶ Pero ijcuac Pablo niman Bernabé oquimatquej tlinon quinchihuilisquej, ocholojtejquej niman oyajquej ne ipan on huejhueyican intoca Listra niman Derbe yejhuan oncaj ipan Licanonia. Niman no quistinemyaj imanyan ompaca. ⁷ Niman ompa quiteijliayaj on cuajli tlajtojli yejhuan quitemaca temaquixtilistli.

Pablo oquitemojmotlaquej ne Listra

⁸ Ne Listra yehuaticatca se tlacatl yejhuan xhueliya nejnemiya pampa icxihuan xcojiquej catca desde ijcuac otlacat. Xqueman ohuel onejnen.

⁹ Yejhua on huilatzin cacticatca tlinon Pablo quijtohuaya. Quemaj Pablo oquixquechij niman oquitac ica on huilatzin quineltocaya ica Dios huelis quipajtis. ¹⁰ Ijcuacon Pablo oquichicajcailij:

—Xmoquetzehua niman xmomelajcatelquetza.

[‡] 13:46 no merecen * 14:2 cosa † 14:3 su amor

Quemaj on coxo otzicuin niman opeu nejnemi. ¹¹ Ijcuac oquitaquej on tlen Pablo oquichiu, on chanejquej opeu tzajtzij ican intlajtol licaonia, quijtohuayaj:

—¡On dioses yonopanextijquej quen tlacamej niman yotemoquej totzajlan!

¹² Quijtohuayaj ica Bernabé yejhua dios Júpiter, niman Pablo yejhua dios Mercurio, pampa yejhua más tlajtlajtohuaya. ¹³ Itiopan Júpiter oncatca ne ixpan on hueyican. Niman itiopixcau Júpiter oquinhuajhuicac huacaxtin niman xochicoscamej ne ixpan itlatzacuilohuan† on hueyican pampa yejhua niman on chanejquej quinequiyaj quinhuentlalilisquej on huacaxtin para ijqui quinmahuistilisquej Pablo niman Bernabé. ¹⁴ Pero ijcuac Bernabé niman Pablo oquimatquej yejhua in, onotlaquentetzatzayanquej para oquiteititijquej ica on tlacamej quichihuayaj on tlen xcuajli. Quemaj isijcapan onocalaquijquej ne intzajlan on tojlamej tzajtzitihuij, ¹⁵ niman quijtohuayaj:

—Tlacamej, ¿tlica§ nenquichihuaj yejhua in? Tejhuamej san titlacamej no quen nemehhuamej. Niman temechijliaj on cuajli tlajtojli yejhuan quitemaca temaquixtilistli para in tlajtlamach* yejhuan xitlaj† ica mechpalehuiyaj xcajcahuacan. Yej xmopatlacan itech Dios on yejhuan melahuac yolticaj, on aquin oquichijchiu cielo‡, niman in tlalticpactli, niman on mar niman nochí tlen impan oncaj. ¹⁶ Ipan on tonaltin yopanoquej, Dios ocahuilij nochí tlacatl ma quichihuia quen quinequi. ¹⁷ Yejhua nochipa quinnotitiaya aquin yejhua ica on tlen cuajli quinchihuiyaya. Yejhua quichihuia para quiahui niman para cuajli tlatlaqui. Yejhua, tej, techmaca on tlen ticiuaj niman on tlen ica tipaquij.

¹⁸ Pero masqui oquijtojquej in tlajtlamach, hasta axcan ohuelquej quintel-lalijquej on tlacamej yejhuan quinequiyaj quinhuentlalilisquej huacaxtin para yejhuamej niman ijqui quinmahuistilisquej.

¹⁹ Quemaj oyejcoquej semej hebreos yejhuan hualehuaj ne Antioquia niman ne Iconio. Niman yejhuamej oquinyolejquej on tlacamej ne Listra para oquitemojmotlaquej Pablo. Quemaj ica cuitiayaj ye cuajli yomic, oquitejchihuiyanquej para neca caltenco. ²⁰ Pero ijcuac oquiteyehualotoj on tlaneltocaquej, onotelquetz niman ocsejpa ocalac ipan on hueyican de Listra. Niman huajmostla oquis ihuan Bernabé niman oyajquej ipan on hueyican itoca Derbe. ²¹ Niman ijcuac yoquiteijlijquej on cuajli tlajtojli yejhuan quitemaca temaquixtilistli ne ipan on hueyican, miyec otlanelto-caquej. Quemaj onocuepquej para on huejhueyican Listra, Iconio niman Antioquia. ²² Ipan on huejhueyican oquinyolejtiajquej on tlaneltocaquej niman quintlacanonatzayaj para ma ca queman quitlalcahuisquej intlanel-toc. No quimijliyaj ica para se calaquis ne campa Dios tlamandarohua nonequi quijyohuis miyec. ²³ Niman ipan cada tiopan oquintlalijquej on tlajtlajmatquej tlayecanquej itech tocnihuan. Niman ijcuac yoquichiquej oración niman yonosauquej, ocomintlatlautijquej itech toTeco on yejhuan itech tlaneltocayaj.

Pablo niman Bernabé oyajquej ocsejpa para Antioquía de Siria

²⁴ Más saquin opanoquej ipan iregión Pisidia, niman oajsiquej ipan on iregión Panfilia. ²⁵ Niman ijcuac oquiteijlijquej on itlajtol Dios ne ipan on hueyican Perge, otemotoj ne ipan on hueyican Atalia. ²⁶ Niman ompa onatlalijquej oyajquej para Antioquia on hueyican campa on tlaneltocaquej

‡ **14:13** sus puertas § **14:15** ¿por qué?; ¿tline? * **14:15** cosas † **14:15** nada; coxtla ‡ **14:15** On cielo oncaj ne campa oncaj ajacatl, moxtli, metztli, tonajli niman sitlalimej.

oquitlajtlanijcaj Dios para ma quintiochihua ipan on tequitl yejhuan aman cuajli yotlanquej. ²⁷ Ijcuac oajsiquej ne Antioquía, oquinsentlalijquej on tlaneltoquej niman oquintlajtlajtohuilijquej nochí tlajtlamach yejhuan Dios oquichiu intechcopia, niman quen ijqui toTeco oquincahuilij on yejhuan xhebreos ma huelican tlaneltocacan. ²⁸ Niman Pablo ihuan Bernabé miyec tonaltin onocajquej ompa inhuan on tlaneltoquej.

15

On tlajtlajmatquej tlayecanquej itech tocnihuan onosentlalijquej ne Jerusalén

¹ Ipan on tonaltin semej tlacamej ohualejquej ne Judea niman quinmachtiayaj on tocnihuan ica tla xquiselisquej on nescayotl ipan innacayo itoca circuncisión ijcon quen Moisés oquinahuatij on hebreos, xhuelisquej maquisasquej. ² Pablo niman Bernabé sanoyej* onotencuicuiquej inhuan on tlacamej ica on circuncisión. Quemaj oquinemilijquej oquintitlanquej Pablo niman Bernabé inhuan ocsequimej on yejhuan ompa nemiyaj para oyajquej ne Jerusalén niman oquinnotzatoj on apóstoles niman on yejhuan tlajtlajmatquej tlayecanquej itech tocnihuan. Ijcon, tej, nochimej quimatisquej catlejhua temachtijli yejhuan melahuac más cuajli.

³ On tlaneltoquej oquintitlanquej niman chica panohuayaj ipan inregión Fenicia niman Samaria, quitetlajtlajtohuiliyaj quen ijqui on yejhuan xhebreos oquipatlaquej innemilis niman aman quitlacamatij Dios. Niman nochimej on tocnihuan paquiyaj yejhua ica in tlen quimijliyaj.

⁴ Ijcuac Pablo niman Bernabe oajsiquej ne Jerusalén, cuajli oquinseliijkej on tlaneltoquej, on apóstoles niman on tlajtlajmatquej tlayecanquej itech tocnihuan. Quemaj yejhuatej oquitetlajtlajtohuilijquej nochí on tlajtlamach† tlen Dios oquichiu intechcopia yejhuatej. ⁵ Ijcuacon sequimej yejhuan nopohuaj intech on fariseos on yejhuan otlaneltocacaj, ohuajnotelquetzquej niman oquijtojquej:

—On xhebreos yejhuan tlaneltocaj ica oncaj quiselisquej on nescayotl de circuncisión ipan innacayo, niman nonahuatisquej ma quitlacamatican itlanahuatil Moisés.

⁶ Quemaj onosentlalijquej on apóstoles niman on tlajtlajmatquej tlayecanquej itech tocnihuan para quimatisquej tlinon quichihuasquej yejhua ica on tlen onijtoj. ⁷ Niman ijcuac sanoyej yonotencuicuiquej, ohuajnotelquetz Pedro niman oquijtoj:

—Nocnihuan, nemejhuamej nenquimatztoquej ica ye huejcahui Dios onechtlapecpenij nemotzajlan para on yejhuan xhebreos niquimijlis on cuajli tlajtojli yejhuan quitemaca temaquixtilistli para yejhuatej no ma tlaneltocacan. ⁸ Niman Dios yejhuan nochí tlacatl quixmati ipan iyojlo otechpantlantilij ica no quinselia ijcuac oquititlan on iEspíritu Santo ijcon quen tejhuamej otechajtitlanilij. ⁹ Niman Dios xacaj oquichicohuij nican totech yejhuan tihebreos nion yejhuatej intech on xhebreos, yej oquinyolchipau pampa otlaneltocaquej. ¹⁰ Aman, tej, ¿tlica† nenquitlatlataj Dios yejhua on ica nenquintlaliliaj yejhuatej in tlaneltoquej se tlamamajli yejhuan nion tejhuamej nion on toachtojtajhuan xtihuelij tiquitquij? ¹¹ Yej tejhuamej, tej, ticneltocaj ica yotimaquisquej ican itetlajsojtlalis§ toTeco Jesús no ijqui quen yejhuatej.

* **15:2** mucho † **15:4** cosas ‡ **15:10** ¿por qué?; ¿line? § **15:11** su amor

¹² Ijcuacon nochimej xoc onahuatquej, niman san tlacaquiyaj chica Bernabé niman Pablo quitemachiltiayaj ica on tlamahuisoltin niman milagros yejhuan Dios oquichiu intechcopa yejhuamej intzajlan on yejhuan xhebreos.

¹³ Ijcuac otlanquej tlajtlajtohuaj, Jacobo oquijtoj:

—Nocnihuan, xnechcaquican: ¹⁴ Simón Pedro yotechtlajtlajtohuilij quen ijqui Dios achtopa oquinnotzato on xhebreos para quintlapejpenis yejhuan notenehuasquej ican itocatzin. ¹⁵ In cuajli nesi ica tenquisa on tlen oquicuilojcaj on tiotlajtojquej. Yejhuamej ijquin oquicuilojcaj ipan in Yectlacuilojli:

¹⁶ Ijcuac yopanoc yejhua in tlajtlamach, ocsejpa nihuajlas niman nicalactis quen rey se tlacatl yejhuan tehuan tlacatis intech ihuejcacone huan David. Ijcon quen se tlacatl ocsejpa quichijchihua ical ijcuac tlaxixini, nejhua no nicchihuas para on hebreos ma quipiacan se rey,

¹⁷ para nochimej ocsequimej tlalticpactlacamej ma quitejtemocan on toTeco hasta on yejhuan xhebreos yejhuan notenehuaj ican notoca.

¹⁸ Ijcon quijtohua toTeco yejhuan oquitemachiltij in tlajtlamach desde ne ye huejcahui.

¹⁹ 'Yejhu ica, tej, niquijtohua ica xcujli para tiquimpajsolosquej on xhebreos yejhuan cajcahuaj on inachtojtaneltoc para quitlacamatij Dios.

²⁰ Yej san ma tiquintlajcuilhuican para ma ca quicuasquej on nacatl yejhuan yacaj quihuenchihua intech on tlamachijchihualtin itajtitzihuan, ma ca yacaj ahuilnemis, niman ma ca cuasquej innacayo on yolquej yejhuan san noquechmictiaj, niman no ma ca cuasquej yestli. ²¹ Ijcon, tej, ma tiquinmijlican in pampa ye huejcahui hasta aman ye ticmatztoquej ica ijqui ipan cada pueblo nemij yejhuamej yejhuan quitecaquistiliaj itlanahuatil Moisés, niman nemij on yejhuan quinomachtiaj cada sábado ipan intiopan on hebreos.

²² Quemaj on apóstoles niman on tlajtlajmatquej tlayecanquej itech tocni huan, ihuan nochi on tlaneltocaquej ne ipan on tiopan, oquinemilijquej ica cuajli yes para quintlapejpenisquej sequimej tlacamej intech niman quintitlanisquej ne Antioquía ihuan Pablo niman Bernabé. Yejhuamej in oquitlapenijquej Judas, yejhuan no itoca catca Barsabás, niman Silas. Yejhuamej in omemej tlacamej hueyixticatcaj intzajlan on tocni huan. ²³ Niman inhuan oquititlanquej yejhua in tlajcuilolamatl:

Tejhuamej tiapóstoles, niman titlajtlajmatquej tlayecanquej itech tocni huan, niman tejhuamej titeicnihuan temechontlajpalohuaj nemochimej* tocni huan xhebreos yejhuan chantij ne Antioquía niman yejhuan chantij ipan on inregión Siria niman Cilicia.

²⁴ Ticaquij ica totzajlan oquisquej sequimej tlacamej yejhuan xican totlanahuatil oyajquej niman yomechnojnotzatoj. Yejhuamej mechonpajsolohuaj ican intlajtol niman yomechtlamachilispolojquej, pampa yomechijlijquej nonequi nenquiselisquej on nescayotl itoca circun cisión ipan nemonacayo niman nonequi nenquitlacamatisquej itlanahuatil Moisés.

²⁵ Yejhua ica san secan cuajli otitlanemilijquej ica cuajli para tiquintlapejpenisquej sequimej tlacamej yejhuan totzajlan quisaj para mechontasquej. Yejhuamej yahuij san secan inhuan in totlajsojcaicnihuan Bernabé niman Pablo

²⁶ yejhuan innemilis yoquitlalijquej ipan peligro san ipampa toTeco Jesucristo.

* **15:23** todos ustedes; nannochti, yemochimej, anochimej, innochimej, emmochimej

- ²⁷ Ijcon, tej, tiquintitlanij Judas niman Silas on yejhuan no ijqui mech-machiltisquej ica yejhua in tlen temechtlajcuihuiyaj.
- ²⁸ On Espíritu Santo oquinemilij niman tejhuamej no oticnemilijquej ica cuajli yes para xitlaj† ocse más tlamacajli temechmacasquej, yej san yejhua in tlajtlamach tlen más polijtacaj:
- ²⁹ Ma ca xcuacan innacayo on yolkuej yejhuan yoquinhuenchijquej intech on tlamacijchihualtin tetajtzitzihuan; no ijqui ma ca xcuacan yestli nion innacayo on yolkuej yejhuan san noquechmictiaj, niman ica ma ca yacaj ahuilnemis. Tla nenquitlacamatiquej yejhua in, cuajli nenquichihuasquej. Xyolsejtiacan nemejhuamej.
- ³⁰ Quemaj yejhuan on yejhuan oquintitlanquej oajsiquej ne Antioquia, niman ijcuac yoquinsentlalijquej on tlaneltoquej, oquinmacaquej on tlajcuilolamatl. ³¹ Niman ijcuac on tocniuhan oquinomachtijquej on tlajcuilolamatl, sanoyej opacquej ipampa on yoltlalilistli yejhuan oquiselijquej. ³² Quemaj Judas niman Silas, yejhuan no tiotlajtojquej, sanoyej oquinyolejquej niman oquinyolchicajquej on tocniuhan ican miyec tlajtojli. ³³ Niman ijcuac ompa nemiyaj canaj quesqui tonajli, on tocniuhan ne Antioquia ononahuatiquej. Oquinnequilijkej ican yolsehuilistli ma nocuepacan intech on yejhuan oquintitlanquej. ³⁴ Pero Silas oquitlalij iyojlo para nocahuas ne Antioquia. ³⁵ Pablo niman Bernabé no onocajquej ne Antioquia campa inhuan miyequej ocsequimej temachtiayaj niman quiteijliayaj itlajtol toTeco.

Pablo niman Bernabé onoxexelojquej

³⁶ Ipan quesqui tonajli Pablo oquijlij Bernabé:
—Ocsejpa tiahuij ticominnnotzaj on tocniuhan yejhuan chantij ne ipan nochii on huejhueyican campa oticteijlijquej on itlajtol toTeco, para tiquitasquej quen nemij.

³⁷ Bernabé quinequiya ma cuicacan Juan, yejhuan no itoca Marcos. ³⁸ Pero Pablo quinemiliaya xcuajli para cuicasquej pampa ne Panfilia onoxelojca intech niman xoyaj inhuan ne ipan on tequitl. ³⁹ San ipampa Marcos xonotenquej niman yejhua ica onoxexelojquej. Bernabé ocuicac Marcos niman ocajsiquej inojhui ipan barco para Chipre. ⁴⁰ Niman Pablo oquitlapejpenij Silas. Quemaj on tocniuhan oquintemactilijkej ipan itetlajsojtalis‡ toTeco, niman Pablo ihuan Silas oyajquej. ⁴¹ Yehuamej opanoquej ne Siria niman Cilicia, niman ompaca quinyolchicajtiayaj on yejhuan tlaneltoquej.

16

Timoteo oyaj ihuan Pablo niman Silas

¹ Pablo niman Silas oajsiquej ipan on pueblo itoca Derbe niman quemaj ipan ocse itoca Listra campa nemiya se tlaneltoquaetl itoca Timoteo. Yejhua teconeu catca itech se sihuatl hebrea yejhuan tlaneltoca, pero itaj griego catca. ² On tocniuhan yejhuan chanejquej catcaj ne Listra niman ne Iconio cuajli quitlacaityaj Timoteo. ³ Pablo oquinec para Timoteo ihuan ma huiya, niman yejhua oquitlalij on nescayotl ipan inacayo itoca circuncisión. Ijquin oquichiu para ma ca cuanisquej on hebreos, pampa on hebreos yejhuan ompa chantiyaj quimatzticatcaj ica yejhua itaj se griego. ⁴ Niman ipan on pueblos campa panotiayaj quinmachiltitiayaj on tlanahuatiltin yejhuan otlanahuatijkej on apóstoles niman on tlajtlajmatquej tlayecanquej itech tocniuhan yejhuan nemiyaj ne Jerusalén. ⁵ Ijcon tej, on tlaneltoquej ipan

† **15:28** nada; coxtla ‡ **15:40** su amor

on tiopantin noyolchicahuayaj ipan intlaneltoc niman on tlaneltocaquej mojmostla más miyequixtiayaj.

Ipan se tlatlachalistli quen itemicpan Pablo oquitac se tlacatl de Macedonia quinotzticaj

⁶ Yejhuamej oquipanahuijquej on inregión Frigia niman Galacia, pampa on Espíritu Santo xoquincahuilij para quiteijlisquej on tiotlajtojli ne Asia.

⁷ Niman ijcuac oajsiquej ne campa onotlalnamiqui Misia niman Bitinia, quichihuayaj canica para san panosquej ipan on iregión Bitinia, pero on Espíritu Santo xoquincahuilij. ⁸ Yehua ica san opanoquej itechica Misia niman otomotoj ne ipan on pueblo itoca Troas. ⁹ Ompa ijcuac tlayohua, Pablo oquitac se tlatlachalistli quen itemicpan. Oquitac se tlacatl yejhuan chanej ne Macedonia. Niman yejhua ijcaticatca ixpan niman ijquin sanoyej* quitlajtlaniliaya: “Xhuiya ne Macedonia niman xtechpalehui.” ¹⁰ Niman ijcuac Pablo oquitac on tlatlachalistli, nimantzin oticchijquej canica para otiajquej ne Macedonia. Ye cuajli ticyolmatzticatcaj ica Dios technotzticatca para tiquimijlisquej on cuajli tlajtojli yejhuan quitemaca temaquixtilistli.

Oquintzacuquej Pablo niman Silas ne Filipos

¹¹ Ijcuac otiquisquej ne Troas, oticasiquej tojhui ipan barco melajqui hasta otajsiquej ipan on tlalhuactli yejhuan oncaj atlajcotian itoca Samotracia. Niman huajmostla otajsiquej hasta on pueblo itoca Neápolis. ¹² Quemaj otiajquej ipan on hueyican itoca Filipos yejhuan más hueyixticaj ne Macedonia. On hueyican inyaxca† on romanos. Ompa otinenquej quesqui tonajli. ¹³ Se tonajli de nesehujli otiquisquej ipan on hueyican niman otiajquej itech se atentli campa on hebreos quichihuaj oración. Ompa otihuajtotlalijquej niman otiquinnotzquej on sihuamej yejhuan yonosentlalijcaj. ¹⁴ Semej yejhuamej itoca Lidia. Yehua hualehuaya ipan on hueyican itoca Tiatira, niman tlanamacajquetl catca ica on tlaquentin‡ finos yejhuan morado. Yejhua in sihuatl quitlacaitaya Dios. Yejhua tlacacticatca niman on toTeco oquitlapohuilij iyojlo niman oquiselij on tlen Pablo quijtohuaya. ¹⁵ Yejhua onocuatequij niman ichanchanejcau§. Quemaj ijquin otechtlatlanilij:

—Tla nemejhuamej nenquitaj ica melahuac yonicneltocac toTeco, tiahuj nochan niman nemosehuisquej ompa.

Niman otechteltij para ma titocahuac ichan.

¹⁶ Quemaj ipan se tonajli ijcuac tejhuamej tiayaj ne campa quichihuaj oración, oticnamiquej se ichpochtli yejhuan quipiaya se xcuajli espíritu yejhuan quichihualtiaya para quimatiya tlinon nochihuas. Yejhua tlamaactli catca itech se familia niman quitlaniya miyec tomin para on yejhuan intech nemiya. ¹⁷ Yejhua on ichpochtli opeu techcuitlapanhuia tejhuamej niman Pablo. Niman tzajtziya chicahuac ijquin:

—Yejhuamej in tlacamej quitequipanohuaj on más hueyixticaj Dios, niman mechpantlantiliaj on quen hueli Dios temaquixtia.

¹⁸ Miyec tonaltin oquichiu yejhua in hasta ijcuac Pablo yoquiyolajxitij, ohuajnocuep niman oquijlij on xcuajli espíritu yejhuan ipan nemiya:

—Ican itocatzin Jesucristo nimitznhahuatia xquisa itech on ichpochtli.

Niman on espíritu semi nimantzin oquitlalcahuij.

¹⁹ Niman ijcuac itecohuan on sihuatlanamactli oquitaquej ica xoc huelis quitlanisquej tomin yejhua itechcopa, ocajsiquej Pablo niman Silas niman oquinhuicaquej ne ipan on plaza yejhuan hueyixticaj campa nemij on

* **16:9** mucho † **16:12** les pertenece; inaxca, inhuiaxca, intlatqui ‡ **16:14** telas § **16:15** su familia

tequihuajquej. ²⁰ Ijcuac oquimixpantilijquej on huejhueyi tequihuajquej, oquijtojquej.

—Yejhuamej in tlacamej hebreos, niman cajcomantinemij in tohueyican. ²¹ Yejhuamej quite machtiaj costumbres yejhuan tejhuamej xtihuelisquej ticselisquej, nion ticchihuasquej, pampa tiromanos.

²² Quemaj on tojlamej ohuajnotelquetzquej para impan Pablo niman Silas, niman on huejhueyi tequihuajquej oquinnaahuatijquej sequimej tlacamej ma quintlaquenquixtican niman ma quinhuitequican. ²³ Niman ijcuac sanoyej yoquincojcocojquej ica sanoyej yoquintlacohuijhuitequej, oquintzazuatoj. Niman on carcejtlajpixqui oquinahuatijquej sanoyej cuajli ma quinmita. ²⁴ Ijcuac on carcejtlajpixqui oquiselij on tlanahuatijli, oquintzacu Pablo niman Silas más hasta tlajtic. Niman ompa oncatca se cojtlí* yejhuan cojcoyonqui catca itoca cepo. Niman ompa oquincalactilijquej imicxiuhan niman cuajli oquintepitzcualtilijquej.

²⁵ Niman ijcuac canaj tlajcoihuau catca, Pablo niman Silas quichihuayaj oración niman quinocuicatiaya tlacuicaltin itech ica Dios. On ocsequimej yejhuan tzacuticatcaj comincacticatcaj. ²⁶ Ijcuacon amanaman chicahuac ohuajtlalolin hasta ohuihuixcac icimiento on cárcel. Quemaj nimantzin nochi on tlatzacuiloſtint otlapojoquej niman onomajmacajquej on teposcadenas on yejhuan ica sasalijtacatcaj on huan tzacuticatcaj. ²⁷ Quemaj on carcejtlajpixqui otlačix, niman ijcuac oquitac ica ipuertas on cárcel tlapojoquej, ocuajxicopin iespada para nomictisquia, pampa quinemiliaya on yejhuan tzacuticatcaj yochojcholojquej. ²⁸ Pero Pablo oquitajtzilitiaj chicahuac, oquijlij:

—Ma ca itlaj xmochihuili. Tinochimej nican tinemij.

²⁹ Quemaj on carcejtlajpixqui oquitajtlan tlahuijli, niman ocalactiquis ne ipan cárcel. Niman mojacacuecuetlacatiaya onotlajcaltajsic icxitlan Pablo niman Silas. ³⁰ Quemaj oquinhuajquixtij, niman oquintajtoltij:

—Tlacamej, ¿tlinon nonequi nicchihuas para nimaquisas?

³¹ Niman yejhuamej oquinanquilijquej:

—Xneltoca toTeco Jesucristo niman timaquisas, tejhua niman mochan-chanejcahuan‡.

³² Quemaj oquitajtlajtohuilijquej on itlajtoltzin toTeco niman nochimej on ocsequimej yejhuan ihuan chantiyaj. ³³ Niman sa no ipan hora de on tlayohua, on carcejtlajpixqui oquinhuajquixtij niman oquimpajpaquij on campa oquinhuajhuitequej. Niman quemaj nimantzin yejhua niman nochimej ichanchisejcahuan onocuatequijquej. ³⁴ Niman ijcuac oquinhuicac ichan, ompa oquintlacualtij. Niman sanoyej opac inhuan nochimej pampa yoquineltocac Dios.

³⁵ Niman ijcuac yotlanes, yejhuamej on huejhueyi tequihuajquej oquin-titlanquej on policías ican se tlanahuatijli para ma quinmacahuacan.

³⁶ Ijcuacon on carcejtlajpixqui oquimachiltij Pablo, oquijlij:

—On huejhueyi tequihuajquej nechnahuatiaj para ma nemechmacahua. Amantzin huelis nenyasquej. Xhuiyan ican yolsehuilistli.

³⁷ Pero Pablo oquimijlij:

—Tejhuamej, yejhuan no tiromanos, otechhuijhuitequej teixpan niman xachtoj otechixtlalojquej, yej otechtzajtzacuquej. ¿Niman aman quinequij san ichtaca§ techmacahuasquej? ¡Ca, ijcon ca! Ma huajhuiyan yejhuamej, ma techquixtiquij.

* **16:24** tablón † **16:26** puertas ‡ **16:31** su familia § **16:37** a escondidas

³⁸ Quemaj on policías oquinmachiltijquej on huejhueyi tequihuajquej yejhua on tlajtojli. Niman onomojtijquej ijcuac ocacquej ica romanos. ³⁹ On huejhueyi tequihuajquej, tej, oyajquej niman oquitlajtlanitoj tetlapo-jpolhuilistli intech Pablo niman Silas. Niman quemaj oquinquixtijquej niman oquintlajtlanilijquej yej ma quisacan ne ipan on hueyican. ⁴⁰ Ijcuac oquisquej ne ipan cárcel, yejhuamej oyajquej ne ichan Lidia. Ompa oquin-taquej Pablo niman Silas on tocnihuan. Niman ijcuac Pablo niman Silas yoteyoltlalijquej, oyajquej.

17

On yejhuan chanejquej ne Tesalónica onajcomanquej

¹ Ipan inojhui, Pablo niman Silas opanoquej ipan inhueyican intoca Anfípolis niman Apolonia niman quemaj oajsiquej ne ipan on hueyican itoca Tesalónica, campa on hebreos quipayaj intiopan. ² Pablo, ijcon quen nochipa quichihuani, oyaj ne ipan on tiopan niman yeyi sábados inhuan on tlacamej otlajtlajto. ³ Ijcon tej, quitemelajcailiaya niman quiteititiaya ican iyectlajcuilol Dios ica Cristo ye oncatca para tlajyohuis niman ocsejpa noyolihuitis* saquin ijcuac yomic. Niman quimijliaya:

—Sa no yejhua in Jesús, yejhuan nejhua ica nemechnojnotza, yejhua Cristo yejhuan Dios oquitlalij para techmaquixtis. ⁴ Ijcuacon otlaneltocaquej sequimej hebreos, niman onosentlalijquej ihuan Pablo niman Silas. No otlaneltocaquej miyequej griegos yejhuan quitlacaitayaj Dios, niman miye-quej sihuamej yejhuan huejhueyixtoquej.

⁵ Pero on hebreos yejhuan xtlaneltocayaj oquinexicolitaquej Pablo, niman yejhua ica oquinsentlalijquej sequimej xcuajcualtin tlacamej yejhuan san quijquistinemiyaipan calles. Yejhuamej oquimajcomanquej on chanejquej ipan on hueyican. Yejhuamej ipan oyajquej ical Jasón niman quitejtemo-jiatiyaj Pablo niman Silas para quinquixtisquej niman quintemactilisquej intech on tlacamej. ⁶ Pero pampa ompa xoquinnextijquej, ocuajtejchihuilan-quej Jasón inhuan ocsequimej tocnihuan ne imixpan on tequihuajquej ipan on hueyican, niman otzajtzitiazquej:

—Yejhuamej in tlacamej nochí huiyan yocajcomanquej nochí tlalticpact-lacatl. Aman yohualajquej nican, ⁷ niman Jasón oquinselij ichan. Niman nochimej yejhuan xipan quitaj on itlanahuatil César tohueyi tlayecancau ne Roma, pampa quijtohuaj ica nemi ocse rey yejhuan itoca Jesú. ⁸ Ijcuac on tlacamej niman on tequihuajquej ipan on hueyican ocacquej in tlajtlamach†, onajcomanquej. ⁹ Niman ijcuac oquitemacaquej sequi tomin, Jasón niman on ocsequimej, oquinmacaquej.

Pablo niman Silas nemiyaj ne Berea

¹⁰ Nimantzin, ijcuac tlayohua, on tocnihuan oquintitlanquej Pablo niman Silas ne ica Berea. Niman ijcuac oajsiquej ompa ipan on hueyican, ocalaquej ne ipan intiopan on hebreos. ¹¹ On tlacamej ne Berea más cuajli tlaneltocayaj xquen on yejhuan chantiyaj ne Tesalónica. Ican cuajli inyojlo ocacquej on temachtilistli, niman mojmostla quitejtemohuayaj ipan on Yectlajcuilojli para quitasquej tla melahuac on tlen quimijliaya. ¹² Ijcon tej, miyequej hebreos otlaneltocaquej niman intzajlan on griegos no miyequej otlanelto-caquej, sanquen on sihuamej yejhuan más quintlacaitaj niman on tlacamej. ¹³ Pero ijcuac on hebreos ne Tesalónica oquimatquej ica Pablo quiteijlijticatca itlajtoltzin Dios ne Berea, ompa oyajquej niman oquimajcomanquej on

* **17:3** resucitará; noyolitis † **17:8** cosas

tlacamej. ¹⁴ Nimantzin on tocnihuan oquititlanquej Pablo para ne ica campa oncaj mar, pero Silas ihuan Timoteo onocajquej ne Berea. ¹⁵ On yejhuan oyajquej ihuan Pablo ocuicaquej hasta ne ipan on hueyican itoca Atenas. Quemaj ohuajnocuepquej ican se tlanahuatiijli para Silas niman Timoteo ma huiyan itech Pablo más nimantzin quen huelisquej.

Pablo nemiya ne Atenas

¹⁶ Chica Pablo quinchaya Silas niman Timoteo ne Atenas, noyolcocohuaya, pampa oquitac ica on hueyican tenticaj ica on tlamachijchijhualtin tetajtzitzihuan. ¹⁷ Yejhua ica, tlajtlajtohuaya ipan intiopan inhuan on hebreos niman inhuan on griegos yejhuan quitlacaitayah Dios, niman mojmostla notentlaniya ne ipan plaza inhuan on yejhuan ompa nemiyaj. ¹⁸ Niman semej on tlajtolmatquej, on yejhuan notocayotiaj epicúreos niman on estoicos, opejquej ihuan notencuicuij. Niman sequimej quijtohuayaj:

—¿Tlinon techijlisnequi yejhua in istlacatqui‡?

Niman ocsequimej quijtohuayaj:

—Nesi quen quiteijlijtinemi inca ocsequimej dioses.

Ijquin quijtohuayaj pampa Pablo quimijliaya ica Jesús niman quen onoyolhuitij§ niman onoquetzteu ipan itlalcon. ¹⁹ Quemaj ocanatoj Pablo niman ocuicaquej ne hueyi tetlakanonatzaloyan itoca Areópago. Ompa oquijlijquej:

—Xtechijli tlinon quijtosnequi yejhua in yencuic temachtijli yejhuan ticuajqui. ²⁰ Titechijlia tlajtlamach yejhuan xqueman ticaquiyaj niman ticnequij tcmatisquej tlinon quijtosnequi yejhua in.

²¹ Nochimej on chanejquej ne Atenas niman on huejca chanejquej yejhuan no ompa chantiyaj xitlaj* quinequiyaj, yej san quinequiyaj quitetlajtlajtohuilisquej noso caquisquej itlaj yejhuan yencuic.

²² Quemaj Pablo ohuajnotelquetz intlajcotian ne ipan on Areópago, niman oquijtoj:

—Tlacamej yejhuan nenchantij nican Atenas, nejhua niquita ica nemejhuamej sanoyej† nentlaneltocaj. ²³ Ijquin niquijtohua pampa campaca onihuajpanotiaj oniquitac nochí on tlamachijchijhualtin nemotajtzitzihuan yejhuan nenquimmahuistiliaj. Niman no oniquitac se tlaixpan campa tlajcuilolnesticaj in tlajtojli: “Para on Dios yejhuan xacaj quixmati.” On, tej, yejhuan nemejhuamej nenquimmahuistiliaj masqui xnenquixmatij, on yejhua Dios yejhuan nejhua nemechmachiltia.

²⁴ ’Itech san se tlacatl yejhua oquichijchiu in tlalticpactli niman nochí tlajtlamach yejhuan ipan oncaj. On ilhuicac niman in tlalticpactli yejhua iyaxca‡ niman quimandarohua. Yejhua xchanti ipan on tiopantin yejhuan on tlacamej quichijchihuaj. ²⁵ Nion xhuelis itlaj ica quitequipanosquej on tlacamej, pampa yejhua xitlaj quipolohua, yej sa no yejhua otechmacac tinochimej tijyo§ niman tonemilis, no ijqui nochí tlajtlamach.

²⁶ ’Itech san se tlacatl yejhua oquixtij nochí quech tlacamej nemij ipan in países yejhuan onoquej imanyan in tlalticpactli. Niman cuajli oquitlalij quemanon niman canon tlamandarosquej, ²⁷ para ma quitejtemocan Dios niman ma quixtlalocan tla hueli quinextiaj, masqui melahuac yejhua xhuejca nemi cada se de tejhuamej. ²⁸ Niman san ipampa yejhua tiyolihuitoquej, niman titoliniaj niman tinemij. In nochihua quen on sequimej nemocuicati-jcahuauan oquijtojquej: “Tejhuamej titecone huan itech Dios.” ²⁹ Yejhua

‡ **17:18** que habla tanto § **17:18** resucitó; onoyolitij * **17:21** nada; coxtla † **17:22** muy
‡ **17:24** le pertenece; iaxca, ihuaxca, itlatqui § **17:25** nuestro aliento; tijyo

ica tla tejhuamej tihualejtoquej itech Dios quen tiiconehuan, xquitocarohua ticnemilisquej tla Dios quen on tlamachijchijhaultin nemotajtzitzihuan yejhuan tlachijchiutin ican oro, noso plata noso itlaj tetl, on yejhuan san tlachijchiutli cualtzin noso tla on yejhuan san tlacamej quinejnemiliaj. ³⁰ Dios oquimijyohuilij on tlacamej ipan on ye huejcahui tonaltin ica on tlen xcuajli yejhuatej quichihuayaj, pampa xquimatiyaj tlinon cuajli para se quichihuas. Pero aman nochi tlacatl quinnahuatia nohuiyan para ma cajcahuacan ica quichihuaj on tlen xcuajli. ³¹ Ijquin Dios oquinahuatij pampa yoquitlalij on tonajli ijcuac nochi tlacatl quiyolcuitis ican iyolmelahualis itechcopa Cristo. Dios nochi tlacatl oquititij ica melahuac quichihuas ijcuac oquiyolhuitij* Jesús niman oquetzteu ne ipan itlalcon.

³² Ijcuac ocacquej ica on mimiquej yolhuisquej niman noquetztehuasquej ipan intalcon, sequimej san cuejhuetzquiliayaj, pero ocsequimej quijtohuayaj:

—Ticnequij timitzcaquisquej ocsejpa yejhua ica on.

³³ Niman Pablo oquis ompa intajcotian yejhuatej. ³⁴ Pero sequimej onosentlalijquej ihuan niman otlaneltocaquej. Se yejhuan otlaneltocac itoca Dionisio yejhuan tetlacanonotzquetl ne Areópago. Niman se sihuatl itoca Dámaris inhuan ocsequimej no otlaneltocaquej.

18

Pablo nemiya ne Corinto

¹ Ijcuac yopanoc on tlajtlamach*, Pablo oquis ne Atenas niman oyaj ne ipan on hueyican itoca Corinto. ² Niman ompa oquinamic se hebreo itoca catca Aquila yejhuan tlacat ne Ponto. Xe huejcajtica ica ohuajlaj ne Italia ihuan Priscila isihuau, pampa on más hueyi tlayecanquetl ne Roma itoca Claudio otlanahuatij ma quisacan ne Roma nochimej on hebreos. Pablo oyaj oquinnotzato ³ niman ica sa no yejhua itequiyo quipiaya quen yejhuatej para quichijchihuaj tlaquencaltint†, yejhua ompa inhuan onocau para san secan tequityaj. ⁴ Niman cada nesehuiltonajli Pablo yaya ipan intiapan on hebreos campa inhuan notentlaniya hasta queman quintlaneltoquiltiaya on hebreos niman on griegos.

⁵ Niman ijcuac Silas niman Timoteo ohuajlajquej Macedonia niman oyejcoquej campa nemiya Pablo, Pablo xoc oquinchijchi on tlaquencaltin, yej sa ica nocahuaya quiteijliaya on temachtijli niman quimixpantiliaya on hebreos ica Jesús yejhua Cristo yejhuan Dios oquitlalij para ma tlamandaro. ⁶ Pero on hebreos opeu quitlajtolixnamiquij niman opeu cuijhuicaltiaj Pablo. Ijcuacon ocuajtejzeloj itlaquen para oquintitij ica quincajtehua, niman oquimijlij:

—Nemejhuamej nenquipiasquej tlajtlacojli tla nemixpolihuisquej. Nejhua xoc ninotequimacas para nemejhuamej. Aman nejhua ye niau intech on yejhuan xhebreos.

⁷ Quemaj Pablo oquis ipan on tiapan niman oyaj inacastlan on tiapan campa chantiya se tlacatl itoca Justo yejhuan quimahuistiliaya Dios. ⁸ Niman Crispo, on tlayecanquetl ipan intiapan on hebreos, oquineltocac toTeco ihuan nochi ichanchanejcahuan‡. Niman no miyequej yejhuan chanejquej ne Corinto, ijcuac ocacquej on temachtijli, otlaneltocaquej niman onocuatequijquej.

* **17:31** los resucitó; oquiyolitij * **18:1** cosas † **18:3** casa de campaña ‡ **18:8** su familia

⁹ Ipan se tlayohua itechcopa se tlatlachalistli yejhuan quen se temictli, on toTeco oquijlij Pablo:

—Ma ca xmomojti, yej oc§ xteijli on temachtijli niman ma ca xmocamatzacua, ¹⁰ pampa nejhua mohuan ninemi. Xacaj huelis itlaj mitzchihuilis, pampa miyec tlacatl noyaxcahuan* ipan in hueyican.

¹¹ Ijcon tej, Pablo onocau se xipan huan tlajco ne Corinto, niman oquinmachtij on itlajtoltzin Dios.

¹² Pero ijcuac Galión gobernador catca ne Acaya, on hebreos san secan oquixnamiquej Pablo. Yejhuatej ocasijquej niman ocuicaquej ne campa tetlacanonotzalo. ¹³ Niman oquijlijquej on gobernador:

—Yejhua in tlacatl quitaneltoquiltijtinemi nochí tlacatl para ma quimahuistilican Dios ocsetlamantic xijqui quen on tlanahuatiji tlanahuatia.

¹⁴ Niman ijcuac Pablo ye tlajtosquia, Galión oquimijlij on hebreos:

—Tla nennechajcuilisquiaj itlaj tlen sanoyej† xcuajli noso itlaj sanoyej hueyi tlajtlacojli yesquia, quemaj nemechtancaquisquia nemejhamej hebreos. ¹⁵ Pero nennechajnotztihuij yejhua ica on temachtiltin niman on tetocayohuan niman on nemotlanahuatil. Yejhua ica sa no nemejhamej ompa xquitilican. Nejhua xnicnequi nitequihua yes yejhua ica on quen on tlajtmach. ¹⁶ Niman oquinhuajtotocac ne campa tetlacanonotzalo. ¹⁷ Yejhua ica, tej, nochimej on griegos ocajsiquej Sóstenes, on yejhuan tlayecanquetl ipan intiopan on hebreos, niman ocuijhuihuitecquej. Masqui ijcon oquichihuili-quej sa no ompa ixpan on gobernador, yejhua xoquinchihiuilij cuenta.

Pablo oyaj ne Antioquía niman ica yexpa ocajsic iojhui para oquiteijilito itiotlajtoltzin toTeco

¹⁸ Pablo miyec tonajli ompa onocau. Quemaj ononahuatij inhuan on tocnihuan niman onatlalij ipan barco para oyaj ne ica Siria. Niman ihuan oyaj Priscila niman Aquila. Pero ne Cencrea, ijcuac xe natlaliaya ipan barco, Pablo achtopa onoxin pampa quipiaya se promesa itech Dios niman ijcon otenquis. ¹⁹ Ijcuac oajsiquej ne ipan on hueyican itoca Efeso, Pablo oquincau Priscila niman Aquila, niman yejhua oyaj ipan intiopan on hebreos niman notentlaniyaj inhuan yejhuan ompa nosentlaliayaj. ²⁰ Yejhuatej sanoyej oquitlajtlanilijquej para ompa ma nocahua inhuan quesqui tonajli, pero yejhua xoquinec. ²¹ Pero ijcuac ononahuatij inhuan, oquimijlij:

—Ica oncaj nias ne Jerusalén para ompa nicpanos on ilhuitl yejhuan huajlau. Pero ocsejpa nemechalitas tla Dios quinequi.

Quemaj ocsejpa onatlalij ipan barco niman ijqui oquis ne Efeso. ²² Quemaj ijcuac oajsic ne Cesarea, oyaj para Jerusalén. Niman ijcuac ompa yoquintlajpaloto on tlaneltocaquej, otemoc para Antioquía. ²³ Niman ijcuac yohuejcau ompa nemiya, ocsejpa oquis niman oquistinen imanyan inregiónes Galacia niman Frigia. Quinyolchicajtiaya nochimej on nomachtijquej.

Apolos oquiteijlij on cuajli tlajtojli ne Efeso niman Acaya

²⁴ Ipan on tonaltin oajsic ne Efeso se hebreo itoca catca Apolos yejhuan otlacat ne Alejandría. Yejhua sanoyej cuajli quiteijliaya on temachtijli niman cuajli quixmatiya on Yectlajcuilojli. ²⁵ Yejhua cuajli oquimachtijquej on iojhui toTeco, niman tlajtohuaya ican miyec yolchicahualistli. Yejhua temachtiajya melajqui itech ica Jesúz, masqui yejhua san quixmatiya itlacuatequil Juan. ²⁶ Apolos opeu tenojnotza ipan intiopan on hebreos ican

§ 18:9 todavía; sanquen * 18:10 me pertenecen; noyaxcahuan, nohuaxcahuan, notlatquihuan

† 18:14 muy

yolchicahualistli. Pero ijcuac Priscila niman Aquila ocacquej, oquinotzquej san iselti niman más cuajli oquitlajtlajtohuilijquej on iohui Dios.

²⁷ Quemaj ijcuac Apolos oquinec panos ne ica Acaya, on tocnihuan ne Efeso oquiyolejquej. Niman yejhuamej oquimijcuilo huilijquej se tlajcuilolamatl on tlaneltocaquej yejhuan chanejquej ne Acaya para ma cuajli quiselican. Ijcuac yejhua oajsic ne Acaya, sanojej oquimpalehuij on yejhuan Dios ican itetlajsojtalis‡ oquichiu para ma tlaneltocakan. ²⁸ Niman ican nochí poder niman melajquitlajtojli, oquin camatlan on hebreos teixpan. Yejhua quiteititiyaya ican on Yectlajcuilojli itech ica Jesús yejhua Cristo yejhuan Dios oquitlalij para tlamandaros.

19

Pablo nemiya ne Efeso

¹ Quemaj chica Apolos nemiya ne Corinto, Pablo oquistinen ne ipan on tetlalpan más tlajtlacpac niman oajsic ne Efeso. Niman ica ompa oquin nextij sequimej tlaneltocaquej. ² Niman oquintlajtoltij:

—¿Onenquiselijquej on Espíritu Santo ijcuac onentlaneltocaquej?

Yejhuamej oquin anquilijquej:

—Ca, tejhuamej xqueman oticaquej tla nemi on Espíritu Santo.

³ Ijcuacon Pablo oquintlajtoltij:

—¿Tlinon ica onemocuatequijquej?

Niman yejhuamej oquijlijquej:

—Ican itlacuatequilis Juan.

⁴ Quemaj Pablo oquimijlij:

—Juan quincuatequiyaya on tlacamej para quiteititiyaj ica yejhuamej yocajcajquej ica quichihuaj on tlen xcuajli. Niman quemaj quimijliaya ica nonequi quineltocasquej on aquin huajlas saquin*. On aquin huajlas saquin quijtosnequi Jesús on Cristo yejhuan Dios oquitlalij para tlamandaros.

⁵ Niman ijcuac ocacquej yejhua in, onocuatequijquej ican itocatzin toTeco Jesús. ⁶ Niman ijcuac Pablo impan oquitlalij imahuan, on Espíritu Santo impan ohuajlaj, niman opeu tlajtlajtohuaj ican sesetlamantic yencuic tlajtojli niman oquitojquej on tiotlajtojli yejhuan oquiselijquej itech Dios. ⁷ Nochimej on tlacamej quen canaj majtlactli huan omemej catcaj.

⁸ Yeyi metztipan Pablo nochipa yaya ipan intiopan on hebreos campa quiteijliaya itlajtol Dios ican yolchicahualistli. Yejhua notentlaniya niman quintlane toquiltiaya on tlacamej itechica on quen Dios tlamandarohua. ⁹ Pero sequimej onoyoltechicajquej niman xoquinequej otlaneltocaquej, yej ixpan on tlacamej opeu cuijhuicaltiaj on iohui Dios. Yejhua ica, tej, Pablo onoxeloj intech niman oquin huicac on tlaneltocaquej ipan iescuela se tlacatl itoca Tiranno. Niman mojmostla ompa tlajtlajtohuaya. ¹⁰ Niman ome xipan oquin machtij. Ijcon tej, sanquen on hebreos niman on griegos yejhuan chantiyaj Asia ocacquej on itlajtoltzin toTeco Jesús.

¹¹ Niman Dios quichihuaya huejhueyi milagros itechcopia Pablo. ¹² Hasta opajtiquej on cocoxquej ijcuac ica quintemoltiayaj on pañitos niman on tlaquentin on yejhuan oquintelos Pablo ican itlalnacayo. Niman on xcua-jcualtin espíritus no quisayaj intech.

¹³⁻¹⁴ Pero sequimej hebreos yejhuan quintequixtilijinemiyaj on xcua-jcualtin espíritus oquinequej quitequitlitisquej itocatzin toTeco Jesús para quitequixtilisquej on xcua-jcualtin espíritus. Yejhua in quichihuaya on

‡ **18:27** su amor * **19:4** después

chicomemej iconehuan on hebreo itoca Esceva yejhuan tlayecanqui intech on tiopixqui. Quimijliayaj on xcuajcualtin espíritus:

—Temechnahuatia xquisacan ican itocatzin Jesús on yejhuan Pablo quiteijliaj.

¹⁵ Pero se tonajli ijcuac ijcon oquichiu, on xcuajli espíritu ijquin oquinnanquij, oquijtoj:

—Niquixmati Jesús, niman nicmati aquinonon on Pablo, pero nemejhuamej, ¿nenaquinomej?

¹⁶ Ijcuac ijcon oquimijlij, on tlacatl yejhuan quipiaya on xcuajli espíritu impan onotlajcal niman quechica cojtic oquintlajtlan. Ijcon, tej, on tlacamej onotlajtlalojquej† para ipan calle tetzotzoltiquej niman tlacocoltin.

¹⁷ Ijcuac nochimej on hebreos niman xhebreos yejhuan chantiyaj ne Efeso oquimatquej yejhua in, onomojtijquej niman sanoyej‡ oquitlacaitaquej toTeco Jesús. ¹⁸ Niman miyequej on yejhuan otlaneltocaquej yayaj niman noyolcuitiayaj ica on tlin xcuajli tlajtlamach§ yejhuan oquichijquej. ¹⁹ Ijcon miyequej yejhuan quichihuayaj ica on innahuajlo ocuajquiquej inlibros niman oquintlatijquej teixpan. Ijcuac oquipojquej quech valerohuayaj nochi on quech libros, valerohuayaj canaj ompoajli* huan majtlactli mil tomin tlachijchiutin ican plata. ²⁰ Niman ijcon on itlajtoltzin toTeco nochayajtiaya niman napanextiaya ipoder.

²¹ Ijcuac yopanoc yejhua in tlajtlamach, Pablo oquitlalij iyojlo ontentzas ne ica Macedonia niman Acaya, niman quemaj yas ne Jerusalén. Niman quijtohuaya ica saquin ijcuac yotenojnotzato ne Jerusalén, ica oncaj no yas Roma. ²² Quemaj oquintitlan ne Macedonia omemej itlapalehuijcahuán Timoteo niman Erasto, niman yejhua onocau quesqui tonajli ne Asia.

On yejhuan chanejquej ne Efeso onajcomanquej

²³ Ipan on tonaltin onajcomanaloc ica on cuajli tlajtojli. ²⁴ Sen tlacatl itoca Demetrio yejhuan platero catca, quinchijchihuaya ican plata tiopantzitzintin yejhuan quen itiopan on tonantzin Diana. Sa no yejhua in tequitl ica quitlaniyaj miyec tomin para on yejhuan tequitij ihuan. ²⁵ Demetrio oquinsentlalij yejhamej niman ocsequimej yejhuan no yejhua tequitl quipayaj, niman oquimijlij:

—Tlacamej, nemejhuamej nenquimatztoquej ica yejhua ica in tequitl titopanoltiaj sanoyej cuajli. ²⁶ Pero nemejhuamej nenquitaj niman nencaquij tlinon quichihua in tlacatl itoca Pablo. Yejhua quiteijlijtinemi ica on dioses yejhuan tlamachijchiutin xmelahuac dioses. Ijcon, tej, yoquintlaneltoquiltij miyequej in chanejquej, niman xsan nanica Efeso yej san quen nochi in Asia. ²⁷ Yejhua in sanoyej xcuajli xsan pampa totequiyo xoc yacaj quitlacaitas, yej no itiopan tonantzin Diana xoc yacaj quitlacaitas. Niman ijqui xoc quitlacaitasquej ihueyilis in tonantzin yejhuan nochi chanej Asia niman nochihuiyan imanyan in tlalticpactli quihueyiliaj.

²⁸ Ijcuac ocacquej yejhua in, sanoyej ocualanquej niman otzajtziequej:

—¡Hueyi tonantzin Diana para tejhuamej efesios!

²⁹ Saniman nochimej on ichantlacaj on hueyican onajcomanquej niman oometlamatquej. Yejhamej nimantzin impan oyajquej niman oquinmajsiquej tocnihuan Gayo niman Aristarco yejhuan chanejquej ne Macedonia niman yejhuan ihuan Pablo quistinemiyaj. Ijcuac oquinmajsiquej, nochimej san secan oquintejchihuilanquej hasta ne ipan on plaza campa onosentlaliaj

† **19:16** corrieron ‡ **19:17** mucho § **19:18** cosas * **19:19** Ompoajli quitosnequi cuarenta, niman ompoajli huan majtlactli quitosnequi cincuenta.

ijcuac itlaj noteititia. ³⁰ Pablo quinequiya calaquis ompa para quinnotzas on tlacamej, pero on tlaneltocaquej xocahuilijquej. ³¹ No ijqui semej itetlaj-sojcahuant Pablo yejhuan tequihuajquej ne Asia oquitlatitlanilijquej niman oquijlijquej ma ca calaquis ipan on plaza. ³² Ne ipan on plaza on yejhuan onosentlalijquej sa tzajtziyaj sesetlamantic. Semej tzajtziyaj ocse ica niman ocsequimej no ocse ica, pampa on tojlamej yonajcomancaj, niman on más miyequej xquimatiyaj tlica[†] onosentlalijquej. ³³ On hebreos ocomapejquej Alejandro ne teixpan niman semej tlacamej yejhuan nemiyaj ne intzajlan on tojlamej oquitlajtajtohuilijquej on tlen nochihua. Quemaj Alejandro oquintlajtlanilij ican ima on tlacamej para ma ca sa ma nahuatican, pampa quinequiya tlajtos ne teixpan para quinmanahuis on yejhuan quintlahuelitaj. ³⁴ Pero ijcuac oquimatquej ica yejhua hebreo, sa setipan nochimej otzajtiquej hasta canaj ome hora:

—¡Hueyi tonantzin Diana para tejhuamej efesios!

³⁵ Quemaj ijcuac on yejhuan itlajcuilojcau on hueyican ohuel oquintlacahualtij on tlacamej, oquimijlij:

—Tlacamej yejhuan nenchanejquej nican Efeso, nochí tlacatl quimatzticaj ica in hueyican Efeso yejhua oquimactilijquej para quitlapias itiopan in tohueyi nantzin Diana, niman on tetonantzin yejhuan ohualeu ne ilhuicac. ³⁶ Niman pampa yejhua in xacaj huelis quiyanas, nonequi ma ca sa xnahuatican niman ma ca itlaj xchihuacan tla xachtopa cuajli nenquinemiliaj tlinon nenquichihuasquej. ³⁷ In tlacamej yejhuan nemejhuamej onenquinhuajhuicaquej nion ichtequej ipan tiopantin nion cuijhuicaltiaj tonantzin. ³⁸ Tla Demetrio niman on yejhuan ihuan tequitij quipiaj itlaj para quinteixpanhuisquej in omemej tlacamej, on tequipan tlapojtacaj niman on yejhuan huejhueyi tequihuajquej nemij. Cuajli huelis quinixcomacasquej ixpan on tequihuajquej niman in omemej tlacamej no huelis nomanahuisquej quen quitocarohua. ³⁹ Pero tla nentlajtlanij itlaj ocse más hueyi quijtosnequi, nonequi nenyasquej ijcuac nosentlalisquej on huejhueyi tequihuajquej. ⁴⁰ Cas huelis techajajhuasquej yejhua ica in tlen aman onochiu niman xticpiaj tlinon ica titenanquilisquej tla techtlajtoltisquej tlica otajcomanquej. ⁴¹ Niman ijcuac oquijtoj on, oquinnahuatij on tojlamej ma huijhuiyan.

20

Pablo oyaj ne Macedonia niman ne Grecia

¹ Niman ijcuac yopanoc on ica onajcomanaloc, Pablo oquinnotz nochimej on nomachtijquej. Niman quemaj ijcuac yoquintlacanonotz niman yoquinajnapaloj, otlajtlanahuatij, niman oyaj ne Macedonia. ² Chica panohuaya nochihuiyan, oquinyolchicajtiaj on tocnihuan ican itlajtol. Quemaj oajsic ne Grecia ³ campa onocau yeyi metztli. Niman ijcuac ye yasquia para natlalischquia ipan barco para yas ne Siria, oquimat ica on hebreos oquipijpiyatoj para quimictisquej. Yejhua ica oquinemiliij para nocuepas niman ocsejpa panos ne Macedonia. ⁴ Niman ihuan oyajquej hasta ne Asia Sópater, on yejhuan chanej Berea, Aristarco niman Segundo, yejhuan chanequej ne Tesalónica, Gayo, on yejhuan chanej Derbe, niman Tíquico niman Trófimo, on yejhuan chanequej ne ica iregión Asia. Timoteo no oyaj ihuan. ⁵ Yejhuatej in tocnihuan oyacatztiajquej niman otechchatoj ne ipan on hueyican itoca Troas. ⁶ Niman ijcuac yopanoc on ilhuitl ijcuac nocua on pan yejhuan xquipia tlaxocolilistli*, tejhuamej otiquisquej ne Filipos ipan barco, niman

[†] 19:31 su amigo [‡] 19:32 por qué; tline ^{*} 20:6 levadura

ipan macuijli tonajli otiquimajsitoj ne Troas campa otitocajquej chicome tonajli.

Pablo oquiyolihuitij se telpochtli ne Troas

⁷ Niman icalaquiyan on semana, tinochimej otitosentlalijquej para san secan otitlacuajquej niman no oticpixquej Santa Cena. Niman Pablo otech-machtij hasta tlajcoihuán, pampa oquinec quisas ijcuac huajmostla. ⁸ Niman oncatcaj miyequej tlahuiltil ne ipan on ica yezi caltlanepantli campa tine-miyaj san secan. ⁹ Niman se telpochtli yejhuan itoca catca Eutico yehu-aticatca ipan on ventana. Niman ica Pablo onohuejcau ica temachtia, on telpochtli opeu sanoyej† cochisnequi. Ijcuac cochticatca sanoyej, ohuet-zetzico ipan on yezi caltlanepantli hasta ipan tlajli. Niman oquetztehuato yomic. ¹⁰ Ijcuacon Pablo otemoco niman onixacamán ipan on telpochtli niman oquinapaloj. Niman oquimijlij on tocnihuán:

—Ma ca xmomojtican, yejhua yolticaj.

¹¹ Quemaj Pablo otlejco, niman ijcuac yoquixelo on pan niman yotlacuaj tohuan, ocsejpa otlajtlajtoj hasta ijqui otlanes. Ijcuac nochí otlan, oquis ompa. ¹² Quemaj ocuicaquej on telpochtli yolticaj, niman sanoyej onoyolt-lalijquej.

Pablo oyaj ne Miletó

¹³ Tejhuamej otiyacatztiajquej niman otitotlalijquej ipan barco hasta ne Asón. Nepa oticantiquisquej Pablo quen yejhua oquijtoj, pampa yejhua san onejnentiaj neca. ¹⁴ Niman ijcuac otonamiquej ne Asón, ompa oticselijquej ipan barco, niman otiajquej ne Mitilene. ¹⁵ Ompa otiquisquej, niman huajmostla otajsiquej ne ixpan Quió. Niman ipan ocse tonajli más, otajsiquej ne iatlatenco on tlalhuactli yejhuan oncaj atlajcotian itoca Samos, niman otitosehuijquej ne Trogilio. Niman huajmostla otajsiquej ne Miletó. ¹⁶ Ipan iojhui, Pablo xoyaj ne Efeso para xmás miyec tonaltin nemis ne Asia. Ijcon oquichiu pampa quinequiya saniman ajsis ne Jerusalén para ompa nemis ipan on ilhuitl itoca Pentecostés tla yejhua huelisquia.

Pablo otlajtlajtoj intech on tlajtlajmatquej tlayecanquej itech tocnihuán yejhuan hualehuaj ne Efeso

¹⁷ Quemaj ne Miletó Pablo oquintlatitlanilij on tlajtlajmatquej tlayecan-quej intech on tlaneltoquej ne Efeso. ¹⁸ Niman ijcuac ohuajlajquej itech oquimijlij:

—Nemejhuamej ye nenquimatiq quen oninohuicac nemotech desde ipan on achtoj tonajli ijcuac onihuajlaj nican Asia. ¹⁹ Nochipa onictequipanoj toTeco ican nochí yolyemanilistli, niman ican miyec choquistli niman itza-jlan miyec tlajyohuclistli yejhuan onechchihuilijquej on hebreos. ²⁰ Pero xqueman onicajcau ica onemechtlatlajtohuilij niman onemechmachtij nochí on tlen mechpalehuis. Ijcon onicchii ne campa tojlan teixpan niman ipan techajchan. ²¹ Nochimej oniquintlagonotz sanquen on hebreos niman on yejhuan xhebreos ica nonequi noyolcuepasquej itech Dios niman para ma quineltocacan toTeco Jesucristo.

²² 'Aman, tej, on Espíritu Santo nechchihuaultia nias ne Jerusalén, niman nion nicmati tlínón ompa nopen nochihuas. ²³ Nejhua san yejhua in nicmati ica ipan nochí huejhueyican campa niau, on Espíritu Santo nechmachiltia ica nechzacuasquej niman on tlen teyolcocoj tlajyohuclistli nechcha. ²⁴ Pero nejhua xitlaj† nicchihuilia cuenta, nion nonemilis xitlaj quijsosnequi para

† 20:9 mucho ‡ 20:24 nada; coxtla

nejhua. Yej san nicnequi nicnejnemis in ojtli ican pactli hasta campa tlamis nonemilis, niman nicnequi cuajli nitlamis on tequitl yejhuan onechmacac toTeco Jesús para noteixpantilis on cuajli tlajtojli ihueyiteicnelilis§ Dios.

²⁵ 'Xcaquican cuajli. Ipan noyojlo nicmati ica nion nensemēj nemejhuamej yejhuan nemotzajlan onitlajtlajtoj quen ijqui Dios tlamandarohua, xoc ocsejpa nennechitasquej. ²⁶ Yejhua ica, aman nicnequi nemechilis ica nejhua xoc nicpias tlajtlacojli tla yacaj ixpolihuis, ²⁷ pampa yonemechpantlantilij nochi on quech itetlacanonotzalis Dios. ²⁸ Niman aman sa no nemejhuamej xmotacan niman no xquintacan nochimej on tlaneltoaquej yejhuan on Espíritu Santo intech omechtalij quen tlajpixquej para nenzquintlajpiasquej. Xquintlacualtican on tlaneltoaquej yejhuan iyaxcahuan* Dios toTeco, yejhuan oquinco ican iyesyo. ²⁹ Nicmatzticaj, tej, ica ijcuac nejhua yoniaj, huajlasquej xcuajcualtin tlacamej yejhuan quinequisquej quinchajchayahuasquej on tlaneltoaquej yejhuan iyaxcahuan Dios ijcon quen on yolquej lobos quinchajchayahuaj on borreguitos. ³⁰ Niman sa no nemotzajlan quisasquej on yejhuan quitemachtisquej on tlen xmelahuac, para on tlaneltoaquej quinhuicasquej. ³¹ Xmotacan sa no nemejhuamej. Xquelnamiquican ica yeji xipan ican tonajli niman yehuajli xoninoteltij onemechtlacanonotz cada se ican nixayo.

³² 'Aman, nocnihuan, nemechtemactilia itech Dios niman itech on itlajtoltzin ica ihueyiteicnelilis yejhuan quipia poder para mechylchicahuas ipan nemotlanelto, niman mechmacas se herencia ne intech on yejhuan yolchipajquej. ³³ Xacaj oniquelehuilij† itomin nion itlaquen para nejhua. ³⁴ Yej nemejhuamej cuajli nenquimatztoquej ica onitequit ican nomahuan para onictlan on tlen nechpolohuaya niman no niquimpalehuiya on yejhuan nohuan nemiyaj. ³⁵ Ijcon nochi yejhua in tlajtlamach‡ onemechititij ica ijquin nonequi nentequitisquej niman nenquimpalehuisquej on yejhuan itlaj quimpolohua. Niman xquelnamiquican on itlajtoltzin toTeco Jesús quen yejhua oquijtoj: "Más paqui on yejhuan quitemaca xquen on yejhuan quiselia."

³⁶ Ijcuac otlan quijtohua in tlajtlamach, Pablo onotlacuenquetz inhuán niman oquichiu oración. ³⁷ Nochimej ochocaquej, niman oquinajnapalojquej niman oquitejtencuajquej§ Pablo. ³⁸ Niman más najmanayaj pampa oquimijlij ica xoc queman quitasquej. Quemaj ihuan oyajquej hasta ne itech on barco.

21

Pablo ocajsic iohui para Jerusalén

¹ Ijcuac otiquincajquej on tocnihuán, otitatlalijquej ipan barco niman melajqui otiajquej hasta on tlalhuactli yejhuan oncaj atlajcotian itoca Cos. Niman huajmostla otajsiquej on ocse tlalhuactli itoca Rodas yejhuan oncaj atlajcotian. Niman ompa otiquisquej otiajquej para on hueyican ne itenco on mar itoca Pátara. ² Ne Pátara oticnextijquej se barco yejhuan yaya para Fenicia. Oticalaquej niman otiajquej. ³ Chica ompa tipanohuaya, otiquitaquej on tlalhuactli itoca Chipre yejhuan oncaj atlajcotian. Niman oticajquej on tlalhuactli ipan toopochmacopa niman oticomelajquej hasta ne ica Siria. Quemaj otajsiquej hasta on hueyican itoca Tiro campa on barco oquitlatemoltilijquej. ⁴ Niman otiquinnextijquej on tlaneltoaquej

§ **20:24** su gran misericordia * **20:28** le pertenecen; iaxcahuan, ihuaxcahuan, itlatquihuan

† **20:33** no codicié ‡ **20:35** cosas § **20:37** lo besaron; oquibesarojquej

yejhuan chantiyaj ne, niman ompa inhuan otitocajquej chicome tonajli. On tlaneltoquej oquijlijquej Pablo para ma ca ma huiya ne Jerusalén quen on Espíritu Santo oquinmachiltij. ⁵ Pero ijcuac oajsic on chicome tonajli, otiquisquej. Nochimej on tlaneltoquej ihuan insihuahuan niman inconehuan otechcahuatoj hasta ne atlatenco. Niman ne itenco on mar otitolacuenquetzquej niman oticchiquej oración. ⁶ Niman ijcuac yotitonajnapaloliquej, ottitlecoquej ne ipan barco niman yejhuatej onocuepquej para incha-jchan. ⁷ Ijcuac otiquisquej ne Tiro ipan barco, otajsiquej ne ipan on hueyican itoca Tolemaida. Ompa otiquintlajpaloquej on tocnihuan niman se tonajli inhuan otitocajquej. ⁸ Niman huajmostla otiquisquej niman otajsiquej ne Cesarea. Ompa otitocajquej ne ichan Felipe on yejhuan tenojnotzaya on cuajli tlajtojli yejhuan quitemaca temaquixtilistli. Yejhua tehuan calacticatca diácono inhuan on ocsequimej chicuasen diáconos. ⁹ Yejhua quimpiaya nahui ichpocahuan xe nonamictiayaj. Yejhuatej quiteijliayaj on tiotlajtojli yejhuan quiseliayaj itech Dios. ¹⁰ Ijcuac ye ompa tinemiyaj quesqui tonajli, se tiotlajtojquetl itoca Agabo ohualeu Judea. ¹¹ Yejhua ohuajlaj totech niman ocontilan ilpicau Pablo. Quemaj ica onocxisaloj niman imahuan no oquinsasaloj, niman oquijtoj:

—On Espíritu Santo quiijtohua ica ne Jerusalén on hebreos ijquin quisajsaslosquej on yejhuan iyaxca* in ilpicatl, niman quitemactilisquej intech on yejhuan xhebreos.

¹² Ijcuac ijcon oticaquej, tejhuatej niman on tocnihuan yejhuan chanejquej ipan on hueyican Cesarea sanoyej† ticajmancatlajtlaniliayaj Pablo para ma ca ma huiya ne Jerusalén. ¹³ Pero yejhua oquijtoj:

—¿Tlica‡ nenchocaj niman nennechylajmanasnequij? Nejhua, tej, nicpia noyojlo xsan para nechsalosquej, yej no para ipampa toTeco Jesús nimquis ne Jerusalén.

¹⁴ Niman ica xotihuelquej oticchijquej ma techtencaqui, ijqui oticajquej, yej otiquijtojquej:

—Ma nochihua tlen toTeco quinequis.

¹⁵ Más saquin§ otitotlatlajtlalilijquej niman otiajquej ne Jerusalén.

¹⁶ Niman tohuan oyajquej semej on nomachtijquej yejhuan hualehuaj ne Cesarea para otechhuicaquej ne ichan se tlacatl, itoca Mnasón, on yejhuan hualehuaj ne Chipre. Niman yejhua ye huejcahui tlaneltoquej catca. Ompa ihuan otitosehuijquej.

Pablo oquinotzato Jacobo

¹⁷ Ijcuac otajsiquej ne Jerusalén, on tocnihuan otechselijquej ican pactli.

¹⁸ Niman huajmostla Pablo niman tejhuatej otiajquej para oticnotzato Jacobo, niman no ompa nemiyaj nochimej on tlajtlajmatquej tlayecanquej itech tocnihuan. ¹⁹ Ijcuac Pablo oquintlajpaloj, niman quemaj oquintlajtlajtohuij nochi on tlajtlamach* yejhuan Dios oquichiu, ne intzajlan on yejhuan xhebreos itechcopia itequiyo. ²⁰ Ijcuac yocacquej in tlajtlamach, ocueyilijquej Dios. Quemaj oquijlijquej Pablo:

—Cuajli, tocniu, pero ye tiquita ica intzajlan on hebreos miyec miles nemij yejhuan yotlaneltocaquej, niman nochimej yejhuatej sanoyej quinequi, para ma notlacamati itlanahuatil Moisés. ²¹ Niman nochimej quimijlianij ica tejhua tiquinmachtia nochi quech hebreos yejhuan nemij intzajlan on yejhuan xhebreos ne ipan ocsequi regíones, ma quitlalcahuican on tlen

* **21:11** le pertenece; iaxca, ihuaxca, itlatqui † **21:12** mucho ‡ **21:13** ¿por qué?; ¿tline? § **21:15** después * **21:19** cosas

otlanahuatij Moisés. Yejhuamej quimijliaj ica tiquinmachtia ma ca ma quitlalican on nescayotl itoca circuncisión ipan inconehuan nion ma ca ma nohuicacan quen on hebreos. ²² Aman ¿Tlinon ticchihuasquej, tej? On tojlamej caquisquej ica yotihuajlaj, niman ijcuacon nosentlalisquej. ²³ Más cuajli para ticchihuas in quen timitzilisquej. Nican totzajlan nemij nahuimej tlacamej yejhuan oquitlalijquej se promesa itech Dios, niman aman ye quinequij quichihuasquej. ²⁴ Xquinhuica niman xmochipahua san secan inhuan. Quemaj xtlaxtlahua para noximasquej. Ijqui nochimej quitasquej ica xnejli on tlen moca oquimijlijquej, yej quitasquej ica tejhua no cuajli tictlacamati on tlanahuatiji. ²⁵ Aman, tej, on xhebreos yejhuan yotlaneltocaquej, yotiquintlajcuilhuijquej ica xnonequi quejehuasquej on ocsequi tlajtlamach tlanahuatiltin, yej san ma ca ma cuacan itlaj nacatl yejhuan oquihuentlalijquej ne ixpan on tlamachijchijhaultin tetajtzitzintin, nion yestli, nion on yolquej yejhuan san quinquechmictiaj. Niman no ma ca yacaj ahuilnemis.

Pablo ocajsiquej ne ipan on hueyi tiopan

²⁶ Ijcuac huajmostla, Pablo oquinhuicac on tlacamej, niman onochipahuatecato inhuan. Quemaj ocalac ne hueyi tiopan para quinmachiltis on tiopixquej quemanon tlamis on tonajli de chipahualistli, niman quemanon quintlaxtahuilis inofrenda on nahuimej tlacamej.

²⁷ Pero ijcuac ye ajsiticatca on chicome tonajli de chipahualistli, semej on hebreos yejhuan hualehuaj Asia oquitaquej Pablo ne ipan on hueyi tiopan. Niman yejhuamej oquimajcomanquej on tlacamej niman ocajsiquej.

²⁸ Niman ijquin otzajtziquej:

—¡Tlacamej hebreos, xtechpalehuican! In yejhuam on tlacatl yejhuan nohuiyan quimachtia nochilacatl para más ma quintlahuelitacan on hebreos, niman para ma ca quitlacematican on itlanahuatil Moisés niman para ma ca quitlacaitacan in hueyi tiopan. Niman aman yoquincalactij semej griegos nican ipan in hueyi tiopan niman yotlajtlacojquej nican campa tlayeccan.

²⁹ Ijcon quijtohuayaj ica achtopa oquitacaj Pablo ipan on hueyican ihuan Trófimo, on yejhuan chanej ne Efeso. Yejhuam ica quinemiliayaj ica Pablo yocuicac ne ipan on hueyi tiopan.

³⁰ Nochi quech chanej ipan on hueyican onajcoman niman nochimej ohuajnotlajtlalojquej. Yejhuamej ocajsiquej Pablo niman ocuajtehuilanquej ne iquiahuac on tiopan, niman nimantzin oquintzacuquej on itlatzacuilo-huan[†] on tiopan. ³¹ Niman chica quinequiyaj quimictisquej, oquimachiltito on hueyi comandante ica on soldados ica nochil quech chanej ipan Jerusalén yonajcoman. ³² Quemaj nimantzin on comandante oquinsentlalij isoldados niman on intlayecanahuan niman nochimej yejhuamej onotlajtlalojquej ne campa nemiyaj on tlacamej. Ijcuac on tlacamej oquitaquej on comandante niman isoldados, xoc oquimailijquej Pablo. ³³ Quemaj on comandante oquinisihuij niman ijcuac yocajsic Pablo, otlanahuatij ma quisalocan ican ome teposcadenas. Quemaj oquintlajtoltij on tojlamej aquinonon yejhuam niman tlinon oquichiu. ³⁴ Niman ompa intzajlan on tojlamej semej tzajtziyah niman quijtohuayaj de ocse tlajtlamach niman ocsequimej no de ocse tlajtlamach. Niman ica xitlaj[‡] hueliya cajsicamati on tlen melahuac yejhuam ica on pampa onajcomanaloc, otlanahuatij ma cuicuacan Pablo ne ijtic on hueyi tepancajli itoca cuartel campa chantij on soldados. ³⁵ Niman ijcuac oajsiquej campa on ttlejcotiasquiaj ipan igradas on tepancajli, oquichijquej para

† **21:30** sus puertas ‡ **21:34** nada; coxtla

oquechpanoxtiajquej Pablo pampa on tlacamej sanoyej cualaniyaj. ³⁶ Niman nochimej huajlayaj icuitlapan, huajtzajtzitiayaj:

—¡Ma miqui! ¡Ma miqui!

Pablo nomanahuiya imixpan on tlacamej

³⁷ Niman ijcuac ye concalactisquiaj ne ijtic on hueyi tepancajli itoca cuartel, Pablo oquijlij on comandante:

—¿Tinechcahuilia ma nitlajto achijtzin?

Niman yejhua oquijlij:

—¿Hueli titlajtohua griego? ³⁸ ¿Tlen xtejhua on egipcio aquin oquipehualtij on ica onajcomanaloc ye huejcajticatzin niman oquinhuicac on nahui mil tlacatl temictianimej ne campa tlacauyan?

³⁹ Ijcuacon Pablo oquijlij:

—Nejhua nihebreo. Onitlacat ne ipan on iregión itoca Cilicia ipan on hueyixticaj hueyican itoca Tarso. Nimitztlajtlanilia, tej, xnechcahuili para ma niquinnotza in tlacamej.

⁴⁰ Niman ica on comandante ocahuilij, Pablo ompa ohuajnotelquetz ne ipan igradas on cajli niman oquintlajtlanilij on chanejquej ican ima para ma ca nahuatican. Ijcuac xoc yacaj onahuat, oquinnottz Pablo ican tlajtojli hebreo, oquimijlij:

22

¹ —Nocnihuan niman tatajin, xcaquican tlinon nicnequi niquijtos nemixpan para ninomanahuis.

² Ijcuac on tojlan ocacquej ica quinnojnotza ican tlajtojli hebreo, más xoc onahuatquej, niman Pablo oquimijlij:

³ —Nejhua nihebreo. Onitlacat ne Tarso yejhuan oncaj ne Cilicia, pero oninoscaltij nican Jerusalén. Gamaliel onechmachtij. Yejhua sanoyej* onechmachtij quen melahuac tlanahuatia on tlanahuatijli yejhuan toach-tojtajhuan otlanahuatijquej. Niman nicchihuaya canica para ican nochinoyojlo nictlacamatiya Dios ijcon quen nemejhuamej nenquichihuaj aman.

⁴ Niquintlahuelitaya niman niquintlajyohuiliyasta sequimej omiquej on yejhuan quitocayaj iojhui Cristo. Niman sanquen tlacamej niman sihuamej niquinhuicaya para niquintzacuaya ipan cárcel. ⁵ On más huejhueyi tiopixqui tlayecanqui niman nochimej on tlajtlajmatquej huelis quiteixpan-tilisquej ica melahuac ijcon onicchiu. Yejhuatej hasta onechmacaquej sequimej amatlanahuatiltin para niquintitisquia on tlayecanquej hebreos ne Damasco. Niman ompa oniaj para niquinhuajhuicasquia quen presos nican Jerusalén on yejhuan quineltocaj Jesucristo para ma quintlajyohuilitican.

Pablo quiteijlia quen ijqui onoyolpatlac

(Hch. 9.1-19; 26.12-18)

⁶ Pero canaj tlacualispan ijcuac niaya ipan nojhui, niman sa nisu catca para najsis ne Damasco, nimantzin opetlan noyehualican se cojtic tlahuijli yejhuan ohualeu ne ilhuicac. ⁷ Ijcuacon onihuetz ipan tlajli. Quemaj onicac se tlajtojli nechijliaya: “Saulo, Saulo, ¿tlica† sanoyej tinechtlahuelita niman tinechtlajyohuilitia? ⁸ Quemaj onicnanquilij, oniquijlij: “¿Aquin tejhua Señor?” Niman yejhua onechijlij: “Nejhua niJesús yejhuan onihualeu ne Nazaret, sa no yejhua on yejhuan tictlahueltotocatinemi.” ⁹ Niman on

* 22:3 mucho † 22:7 ¿por qué?; ¿tline?

yejhuan nohuan nemiyaj oquitaquej melahuac on tlahuijli niman onomojiti-jquej, pero xocacquej itlajtol on yejhuan nechnotzticatca. ¹⁰ Quemaj oniquijitoj: “¿Tlinon nonequi nicchihuas noTeco?” Niman on toTeco onechijlij: “Xmotelquetz niman xhuiya ne Damasco. Ompa mitzijlisquej nochi on tlen Dios oquitlalij para ticchihuas.” ¹¹ Niman ica on itlampetlanalis on tlahuijli onechcoxcatzintilij, on yejhuan nohuan nemiyaj onechmayantiajquej hasta ne Damasco.

¹² ‘Ompa nemiya se tlacatl itoca Ananías. Yehua sanoyej cuajli quitlaca-matiya itlanahuatil Moisés niman nochimej on hebreos yejhuan chantiyaj ne Damasco sanoyej cuajli quitlacaítayaj yejhua. ¹³ Yehua ohuajlaj nechitaco, niman ijcuac oyejcoc onechijlij: “Nocniu Saulo, ocsejpa xseli motlachalis.” Niman nimantzin onitlachix niman oniquitac yejhua. ¹⁴ Quemaj onechijlij: “On yejhuan inDios toachtojtajhuan omitztlapejpenij para tiquixmatis on tlen yejhua quinequi, niman para tiquitas on yejhuan yolmelajqui ni-man para ticaquis itlajtol yejhuan quisa icamac. ¹⁵ Tejhua ticteixpantilis itech nochi tlacatl on tlen otiquitac niman oticac. ¹⁶ Aman, tej, ¿tlinon ticcha? Xmotelquetz niman xmocuatequi, niman xquijli toTeco para ma mitzchipahua ica on motlajtlacolhuan.”

Pablo quiteijlia quen ijqui toTeco oquititlan intech on yejhuan xhebreos

¹⁷ Ijcuac onejcoc nican Jerusalén niman nicchihuaya oración ne ipan on hueyi tiapan, oniquitac se tlatlachalistli quen notemicpan. ¹⁸ Oniquitac on toTeco, niman onechijlij: “Xmotlasihuiti. Nimantzin xquisa nican Jerusalén pampa xquiselisquej on tlen noca tiquijtos.” ¹⁹ Ijcuacon nejhua oniquijlij: “ToTeco, yejhamej quimatztoquej ica nohuiyan ipan intiopan on hebreos niquintzajtzacutinemiya ipan cárceles, niman niquinmajmailiaya on yejhuan mitzneltocaj. ²⁰ Niman ijcuac oquimictijquej Esteban moteixpan-tilijcau, nejhua no tehuan ompa ninemiya. Nejhua no onictemacac not-lajtol para oquimictijquej. Niman oniquimpialij intlaquehuan on yejhuan oquimictijquej Esteban. ²¹ Pero toTeco onechijlij: “Xhuiya, pampa nejhua nimitztitlani huejca intech on yejhuan xhebreos.”

Pablo nemiya ipan imahuan on comandante

²² Hasta nican ipan in tlajtojli yejhamej on tlacamej ocacquej, pero ijcuac ijquin ocacquej opejquej tzajtizj chicahuac, quijtohuayaj:

—¡Ma miqui on tlacatl! ¡Xoc quimelahuá‡ nemis!

²³ Niman pampa tzajtziyaj niman tlacpac quichapaniayaj intlaquen niman tlacpac quixinaiyaj tlajli, ²⁴ on comandante otlanahuatij para ma cuicacan ne ijtic on hueyi tepancajli. Quemaj otlanahuatij ma cuijhuitequican para ma quijto tlica on tlacamej itechcopia tzajtziyaj ican tlahuejli. ²⁵ Pero ijcuac yoquisasalojcaj para quimajmailisquiaj, Pablo oquijlij on capitán yejhuan ompa nemiya:

—¿Tlen on tlanahuatijli romano mechcahuiliaj para nencuijhuitequisquej se romano yejhuan nion xe quiyolcuitiaj niman quitlajtlacolmacaj?

²⁶ Ijcuac on capitán ijcon ocac, oyaj oquimachiltito on comandante, oquijlij:

—Xmota sa no tejhua tlinon ticchihuas, pampa tlacaj yejhua in tlacatl romano.

²⁷ Quemaj on comandante oquinisihuij Pablo, niman oquijlij:

—¿Tlen melahuac tiromano?

Niman yejhua oquijlij:

—Quemaj, melahuac.

‡ 22:22 merece

²⁸ Ijcuacon on comandante oquijlij:

—Nejhua ica miyec tomin onictlaxtlau para oninochiu romano.

Niman Pablo oquijlij:

—Pero nejhua ca pampa ijqui onitlacat.

²⁹ Yehua ica in, on yejhuau cuitequisquiaj Pablo nimantzin onejcuani-jquej. Niman on comandante, ijcuac ocajsicamat ica Pablo yejhuau romano no, onomojtij ica oquisalojca.

Pablo nemi imixpan on yejhuau huejhueyixtoquej tetlacañonotzquej intech on hebreos

³⁰ On comandante quinequiya cajsicamatis on tlen melahuac on tlinon ica on hebreos quiteixpanhuiyaj Pablo. Yejhuau ica huajmostla oquitojton Pablo ica on teposcadena niman otlanahuatiij ma huajhuiyan niman ma nosent-lalican on tiopixquej tlayecanquej niman nochimej on tetlacañonotzquej. Quemaj oquixtij Pablo niman oquitelquetz imixpan.

23

¹ Ijcuacon Pablo oquimixquechij on tetlacañonotzquej niman oquimijlij:

—Nocnihuan, hasta ipan in tonajli nejhua ninemi ixpan Dios ican notlamachilis chipahuac.

² Quemaj Ananiás, yejhuau on más hueyi tiopixqui tlayecanqui, oquin-nahuatiij on yejhuau nisiu nemiyaj itech Pablo ma camahuitectiacan. ³ Pero Pablo oquijlij:

—¡Dios mitzmailis tejhuau, omexayacyej! ¿Tehuaticaj ompa on para tinecht-lajtlacolmacas quen quijtohua on tlanahuatiijli? ¿Tlica* titlanahuatia ma nechmajmailican niman ijcon xtictlacamat on tlanahuatiijli?

⁴ Niman on yejhuau ompa nemiyaj itech Pablo oquijlijquej:

—¿Ijcon ticuijhuicaltia on más ihueyi tiopixcau Dios?

⁵ Pablo oquijtoj:

—Xnechtlapojpolhuican nocnihuan. Xijcon niquijtosquia tla nicmatisquia ica on yejhuau más hueyi tiopixqui tlayecanquetl, pampa ijquin quijtohua on Yectlajcuilojli: “Ma ca ticuijhuicaltis on yejhuau tlayecana intech mochant-lacaj†.”

⁶ Pablo oquimat ica ne ipan on tetlacañonotzaloyan nemiyaj sequimej sa-duceos niman sequimej fariseos. Yejhuau ica ican chicahuac tlajtojli oquijtoj:

—Nocnihuan, nejhua nifariseo niman niteconeu itech se fariseo. Ni-man nemejhuamej nennechtlajtlacolmacatoquej pampa nicneltoca ica yoli-huisquej‡ niman noquetztehuasquej on mimiquej.

⁷ Ijcuac ijquin oquijtoj, on fariseos ihuan on saduceos opeu notencuicuij niman on tetlacañonotzquej onotlajcoxelojquej. ⁸ Ijcon onochiu pampa on saduceos quijtohuaj ica on mimiquej xyolihuisquej ocsejpa niman ica xnemij ilhuicactequitquej§ nion espíritus, pero on fariseos quineltocaj noch i in tlajtlamach*. ⁹ Niman nochimej sanoyej† otzajtiquej. Quemaj ohua-jnotelquetztejquej semej on temachtijquej ican itlanahuatl Dios on yejhuau nopohuaj intech on fariseos, niman chicahuac onotencuicuiquej. Ijquin quijtohuayaj:

—Xitlaj tlen xcuajli ticnextiliaj in tlacatl. Cas se espíritu noso se ilhuicacte-quitquetl melahuac ihuan otlajtoj. Ma ca ma titoxixicojtiacan ihuan Dios.

* ^{23:3} ¿por qué?; ¿tline? † ^{23:5} paisanos ‡ ^{23:6} resucitarán; yolisquej § ^{23:8} ángeles: Angeles tequitij ne ilhuicac niman nican ipan in tlalticpactli. * ^{23:8} cosas † ^{23:9} mucho

¹⁰ Niman ica más sanoyej notencuicuiyaj, on comandante onomojij niman quinemiliaya cojcocosquej Pablo. Yejhua ica, on comandante oquintlatitlanilij on soldados para conquixtisquej Pablo ne intzajlan on tlacamej niman ma cuicacan ne ipan on hueyi tepancajli.

¹¹ Niman huajmostla tlayohua, on toTeco oquinotitij Pablo niman oquijlij:
—Xmoyolchicahua Pablo. Ijcon quen otinechteixpantilij nican Jerusalén, no ijqui ica oncaj tinechteixpantilis ne ipan on hueyican Roma.

Oquinejnemilijquej quen ijqui quimictisquej Pablo

¹² Niman huajmostla ijcuac yotlanes, semej on hebreos onosentlalijquej niman onocalactijquej ican intlajtol para quimictisquej Pablo. Yejhamej onocalactijquej ican intlajtol para xtlacuasquej nion xitlaj‡ conisquej hasta queman quimictiaj Pablo. ¹³ Niman on yejhuan ijcon oquitlalijquej on promesa más de ompoajli§ tlacamej catca. ¹⁴ Yejhamej oyajquej intech on tiopixquej tlayecanquej niman on tlajtlajmatquej niman oquimijlijquej:

—Tejhamej yotictlalijquej in promesa para xitlaj ticusquej hasta que-man ticmictiaj Pablo. ¹⁵ Aman, tej, nemejhamej inhuan on tetlacamontzquej xquijlican on comandante ma mechajhuiquili Pablo mostla. Xquijlican ica nemejhamej nenquinequij nenquimatisquej más itech itlaj tlajtlamach para nenquimatisquej tla melahuac. Niman tejhamej tine-misquej listos para ticmictisquej ijcuac oc* xe yejco.

¹⁶ Pero iconeu on sihuatl yejhuan icniu Pablo oquimat yejhua in tlen onijtoj. Yejhua ica oyaj ne ipan on hueyi tepancajli niman oquimachiltij Pablo. ¹⁷ Ijcuacon Pablo oquinotz se on capitán niman oquijlij:

—Xcuica yejhua in telpochtli ne itech on comandante, pampa quipia tlinon comachiltis.

¹⁸ On capitán ocuicac on telpochtli ne itech on comandante niman oquijlij:
—Pablo yejhuan tzacuticaj onechnotz niman onechtlajtlanilij para ma nicuajhuica motech yejhua in telpochtli, pampa quipia tlinon mitzilis.

¹⁹ Quemaj on comandante ocontilan on telpochtli ipan ima, niman ocuicac neca ocsecan niman oquitlajtoltij:

—¿Tlinon ticnequi tinechijlis?

²⁰ Quemaj yejhua oquijlij:

—On hebreos onocalactijquej ican intlajtol para mitztlajtlanilisquej para mostla xcuica Pablo ne imixpan on tetlacamontzquej hebreos, pampa quinequij caquisquej más itech itlaj tlajtlamach para quimatisquej tla melahuac. ²¹ Niman tejhua ma ca xquinneltoquili, pampa más de ompoajli tlacamej quipijpiaj, niman onocalactijquej ican intlajtol para xtlacuasquej nion xitlaj conisquej hasta queman quimictiaj Pablo. Aman, tej, ye nemij listos niman sa quichaj para tiquinnanquilis ica on tlen quitlajtlanij.

²² Quemaj on comandante oquijlij ma huiya on telpochtli, niman oquinahuatij ma ca yacaj quijlis tla yoquitemachiltij yejhua on.

Pablo oquititlanquej itech on gobernador Félix

²³ Quemaj on comandante oquinnotz omemej icapitanes, niman oquinahuatij para ma quinsentlalican ome ciento soldados yejhuan nejne-misquej, niman yepoajli† huan majtlactli yejhuan yasquej ipan caballos niman ome ciento más yejhuan quitquisquej lanzas para yasquej ne Cesarea ipan chicnahui hora ica tlayohua. ²⁴ Niman no otlanahuatij ma quimpiacan caballos para yetias Pablo, niman no otlanahuatij para ma ca itlaj ipan

‡ 23:12 nada; coxtla § 23:13 cuarenta * 23:15 todavía; sanquen † 23:23 Yepoajli quitosnequi sesenta, niman yepoajli huan majtlactli quitosnequi setenta.

nochihuas, yej cuicasquej cuajli hasta itech on Félix gobernador. ²⁵ Inhuan oquititlan yejhua in tlajcuilolamatl:

²⁶ Nejhua ni Claudio Lisias. Nimitzontlajpalohua tejhua hueyi gobernador Félix.

²⁷ Yejhua in tlacatl ocajsiquej on hebreos niman quimictisquiaj, pero nejhua onicmanahuij ican nosoldados pampa onicajsicamat ica yejhua romano.

²⁸ Nejhua nicnequiya nicmatis tlica quiteixpanhuiyaj. Yejhua ica onicuicac imixpan on hebreos tetlaca nonotzquej.

²⁹ Niman onicnextij ica san quiteixpanhuiyaj yejhua ica on intlanahuatil, pero xoncatca tlinon ica quimictisquiaj nion siquiera para calactisquej ipan cárcel.

³⁰ Niman ijcuac onechmachiltijquej ica yotlatlajtlajcraj para quimictisquiaj in tlacatl, nimantzin onimitzontlanilij. Niman no oniquimijlij on aquin quiteixpanhuiyaj ma quitatij motech tlinon ica on ica quitlahuelitaj. Cuajli xnemi.

³¹ Quemaj on soldados ocantequej Pablo ijcon quen oquinnaahuati quej. Niman ijcuac tlayohua ocuicaquej hasta ne ipan on hueyican itoca Antípatris. ³² Niman huajmostla on soldados yejhuan nejnemiyaj ohuajnocuepquej para ipan on hueyi tepancajli, niman on yejhuan yayaj ipan caballos ocuicaquej Pablo. ³³ Ijcuac oajsiquej ne Cesarea, on gobernador oquimacaquej on tlajcuilolamatl niman no oquimactilijquej Pablo. ³⁴ On gobernador oquinomachtij on tlajcuilolamatl niman quemaj otlatl canon otlatcat Pablo. Niman ijcuac oquimat ica yejhua otlatcat ne Cilicia, ³⁵ oquijlij:
—Nimitzcaquis ijcuac yejcosquej on aquin mitzteixpanhuiyaj.

Quemaj otlanahuatij ma cuicakan niman ma quejehuatij ne ipan on ipalacio Herodes.

24

Pablo onomanahuij ne ixpan on gobernador Félix

¹ Niman ipan macuijli tonajli Ananías, on más hueyi tlayecanqui intech on tiopixquej, ohuajlaj ne Cesarea inhuan quesquimej on tlajtlajmatquej niman ihuan se tepantlajtojquetl yejhuan itoca catca Tértulo. Yejhuamej in oyajquej itech on gobernador niman oquiteixpanhuijquej Pablo. ² Ijcuac intech ocuajhuicaquej Pablo, Tértulo opeu quiteixpanhuiya, niman ijquin oquijlij on Félix:

—Timitztlajsojcamachiliaj tejhua hueyi señor gobernador pampa san mopampa tla tipactoquej niman cuajlotica tinemij. Niman no miyec nochijticaj tlen cuajli ica motlamatquilis* intech in chanejquej yejhuan chantij ipan in región. ³ Niman yejhua in nochipa niman nochihuiyan cuajli ticseliaj. Yejhua ica sanoyej† timitztlajsojcamachiliaj tejhua hueyi gobernador Félix. ⁴ Tej, para ma ca timitzhuejcahuitij, sanoyej timitztlajtlaniliaj ica motetlajsojtlalis‡ xtechtencaqui san ica quesqui tlajtojli. ⁵ Cuajli, tej, yoticpanextijquej ica in tlacatl quen se cualolistli sanoyej tepajsoloj. Yejhua quichijtinemi para ma najcomanacan on hebreos nohuiyan imanyan in tlalticpactli. Niman yejhua tlayecanqui intech on yejhuan noxelojtinemij quintenehuaj nazarenos. ⁶ Niman no oquichiu canica para tlaijtlacos ipan on hueyi tiapan. Pero oticajsiquej niman oticnequej ticyolcuitisquej niman tictlajtlacolmacasquej ijcon quen tlanahuatia on totlanahuatil. ⁷ Pero on comandante Lisias ohuajlaj niman xsan cuajli otechcuijcuilij. ⁸ Niman oquijtoj

* 24:2 sabiduría † 24:3 mucho ‡ 24:4 tu amor

ica on yejhuan quiteixpanhuiyaj ica oncaj huajlasquej motech. Aman sa no tejhua huelis ticyolcuitis niman ijcon ticmatis ica noch i tlajtlamach§ yejhuan tejhuamej ica tictexpanhuiyaj melahuac.

⁹ On hebreos yejhuan ompa nemiyaj nochimej quijtohuayaj ica noch i tlajtlamach yejhuan ica quiteixpanhuiyaj melahuac.

¹⁰ Quemaj on gobernador oquixnotz Pablo ma tlajto, niman Pablo oquijto:

—Ican pactli nicchihua para ninomanahuis mixpan, pampa nicmatzticaj ica tejhua ye quipia miyec xipan ica titequihuaj itech in país. ¹¹ Tejhua, tej, huelis cuajli tictetlajtoltis ica quemach quipia majtlactli huan ome tonajli ijcuac oniaj ne Jerusalén para onicmahuistilito Dios. ¹² On hebreos xonechnextijquej tehuan ninotencuicui, nion niquinmajcomantinemiya on tlacamej ne ipan on hueyi tiopan, noso ne ipan intiopanhuan on hebreos, niman xcanaj ipan on hueyican. ¹³ Yejhuatej in tlacamej nion xquipiaj tlinon ica quiteititisquej tla melahuac onicchiu on tlajtlamach yejhuan ica nechteixpanhuiyaj. ¹⁴ Pero tlinon nejhua nicnociitia niman xniuiyana, yej ica nejhua nictequipanohua inDios notajhuan ijcon quen quitocarohua yejhuan aman cuitiaj yencuic ojtli yejhuan on hebreos quijtohuaj ica xcuajli ojtli. Niman nicneltoca noch i tlen tlajcuilnesticaj ipan itlanahuatil Moisés niman ipan intlajcuilolhuan on tiotlajtojquej. ¹⁵ Niman nicpia tlamaclistli itech Dios no ijquin quen quipiaj yejhuatej in tlacamej, ica on mimiquej yolihiisquej* nochimej, sanquen on yejhuan yolmelajquej niman on yejhuan xyolmelajquej. ¹⁶ Yejhua ica nochipa nicchihua canica para notlamachilis xnechtlahtlacolmacas ixpan Dios niman ixpan noch i tlacatl.

¹⁷ 'Tej, ye quipia quesqui xipan ica xniaya Jerusalén, niman aman oniaj para onictecahuilito on tetlayocoliltin intech on nochantlacaj† niman para niconcahuas ofrendas. ¹⁸ Niman chica nicchihuaya on, semej on hebreos yejhuan hualehuaj ne Asia onechnextitoj ne ipan on hueyi tiopan. Nichipahuac catca ijcon quen tlanahuatia on tlanahuatijli. Xmiyec tlacatl nemiya ompa nion xyacaj niquinmajcomanaya. ¹⁹ Pero yejhua on hebreos yejhuan hualehuaj ne Asia niman yejhuan ompa nemiyaj nonequi huajlasquiaj nican mixpan niman nechteixpanhuisquia tla itlaj ica nechtlahuelitaj. ²⁰ Noso on yejhuan nican nemij, ma quijtocan tla itlaj xcuajli oquinextijquej notech ijcuac nejhua oninen imixpan on tetlacañonotzquej, ²¹ noso tla cas ica oniquijtoj ican chicahuac tlajtojli ijcuac ompa oninen ne intlajcotian. Ompa, tej, ijquin oniquijtoj: "Aman nemejhuatej nen-nechtlajtlacolmacatoquej pampa nicneltoca ica yolihiisquej niman noquetztehuasquej on mimiquej."

²² Ijcuac Félix ocac noch i, yejhua ye cuajli cajsicamatiya quen on cristianos nohuicaj ipan iohui Dios. Ijcuac ocac in tlajtlamach oquintlalilij para ocse tonajli quichihuasquej itlaj. Ijquin oquimijlij:

—Ijcuac huajlas Lisias on comandante, tlamis nicmatis on tlinon nicchihuas.

²³ Quemaj Félix oquinahuatij on capitán ma quejehuati Pablo, pero no ma cahuilican quistinemi. Niman no ma quincahuili itetlajsojcahuant† ma quitaquij niman ma quipalehuican itlaj ica.

²⁴ Niman ipan quesqui tonajli, ohuajnocuepato Félix ihuan Drusila isihuau, yejhuan hebrea catca. Quemaj oquitlatitlanilij Pablo niman ocac yejhua ica on tlaneltoctli itech Jesucristo. ²⁵ Pero ijcuac Pablo tlajtohuaya ica

§ 24:8 cosas

* 24:15 resucitarán; yolisquej

† 24:17 mis paisanos

‡ 24:23 amigos de él

on yolmelacalistli, niman on quen titoyecanasquej, niman on ijcuac Dios techyolcuitis niman techtlajtlacolmacas, Félix onomojtij niman oquijlij:

—Aman ye cuajli. Xhuiya. Ijcuac nihuelis ocsejpa nimitzlatitlanilis.

²⁶ Félix no quinequiya niman quichixticatca para Pablo ma quimaca tomin para quimacahuas. Yejhua ica miyecpa quitlatitlaniliaya para ihuan tlajtohuaya.

²⁷ Quemaj ipan canaj ome xipan Porcio Festo oquipatlac on Félix quen gobernador. Niman pampa Félix quinequiya inhuan cuajli nocahuas on hebreos, ocau Pablo ipan cárcel.

25

Pablo nemiya ixpan Festo

¹ Festo ohuajlaj para calaquis quen gobernador ne Judia. Niman ijcuac ye quipiaya yeyi tonajli, oquis ne Cesarea niman ojtlejcoc para Jerusalén.

² Ompa on intlayecancahuau on tiopixquej niman on hebreos yejhuan más huejhueyixtoquej oyajquej itech niman opeu quiteixpanhuiyaj Pablo.

³ Sanoyej oquitlajtlanilijquej, quen hueyi favor, para ma quinhuajtitlanili Pablo ne Jerusalén. Ijquin oquijlijquej pampa yejhuamej quinemiliaya compijpiasquej ne ipan ojtli para quimictisquej. ⁴ Pero Festo oquinanquilij ica Pablo tzacuticaj ne Cesarea, niman ica yejhua yas nimantzin ompaca.

⁵ Quemaj ijquin, tej, oquimijlij:

—Ma temocan nohuan ne Cesarea on yejhuan más huejhueyixtoquej nemotech, niman tla itlaj oncaj tlen xcuajli itech on tlacatl, huelis quiteixpanhuisquej.

⁶ Festo ompa onocau Jerusalén canaj chicueyi tonajli noso majtlactli, niman quemaj oyaj ne Cesarea. Niman huajmostla onotlalij ne campa tetlacanonotzalo. Quemaj otlanahuatij ma cuajhuiquican Pablo. ⁷ Ijcuac ocalajquitoj Pablo, oquinisihuijquej on hebreos yejhuan ohualejquej Jerusalén. Niman oquiteixpanhuijquej ican miyec tlajtlamach* yejhuan temojtij, pero xhueliyaj itlaj quiteititiayaj tla melahuac. ⁸ Quemaj Pablo opeu tlajtohua para nomanahuis, niman oquijtoj:

—Xitlaj ica nitlajtlacohua ipan intlanahuatil on hebreos, nion itech on hueyi tiopan, niman nion itech César yejhuan más hueyi tlayecanquetl ne Roma.

⁹ Pero pampa Festo quinequia inhuan cuajli nocahuas on hebreos, oquitlajtoltij Pablo:

—¿Ticnequi tias ne Jerusalén niman ompa niquixtlalos ica in tlajtlamach?

¹⁰ Ijcuacon Pablo oquinanquilij:

—Ninemi nican campa tetlacanonotza igobierno César campa quimelahuat† nechyolcuitis. On hebreos xitlaj‡ niquinchihuiliaya tlen xcuajli, ijcon quen tejhua cuajli ticmatzticaj. ¹¹ Tla itlaj xcuajli onicchiu niman melahuac cuajli para nim quis, xninonenequi§ nim quis. Pero tla ipan noch i on tlen tlajtlamach ica nechteixpanhuiyaj xitlaj oncaj yejhuan melahuac onicchiu, tla ijcon xacaj quimelahu para intech nechtemacasquej. Nejhua nictlajtlani para ma nipano itech César para yejhua nechyolcuitis.

¹² Quemaj Festo, ijcuac yoquintlajtoltij on itetlacanonotzcahuau, oquinanquilij Pablo:

—Oticlajtlan para tipanos itech César. Aman, tej, itech César tias.

Pablo onen ixpan on rey Agripa

* ^{25:7} cosas † ^{25:10} merece ‡ ^{25:10} nada; coxtla § ^{25:11} no me niego

¹³ Ipan quesqui tonajli más saquin* on rey Agripa ihuan Berenice oyajquej ne Cesarea para oquitlajpalotoj Festo. ¹⁴ Niman ica ompa onenquej miyec tonaltin, Festo oquitlajtlajtohuilij on tlinon ica quiteixpanhuiyaj Pablo. Oquijlij:

—Nican nemi se tlacatl yejhuan Félix ocajteu tzacuticaj. ¹⁵ Niman ijcuac oniaj ne Jerusalén, on tiopixquej tlayecanquej niman on tlajtlajmatquej ne intech on hebreos ohualajquej notech ipampa on tlacatl. Yejhuatej quiteixpanhuiyayaj niman nechtlatlaniliyaj ma nictlajtlacolmaca. ¹⁶ Nejhua oniquinnanquilij ica xijqui nohuicaj on romanos para yacaj quitemactilisquej ma quimictican on aquin quiteixpanhuiyaj, yej achtopa huajlahuij on tlateixpanhuijquej ixpan on aquin quiteixpanhuisnequij niman quiteixpanhuij. Quemaj ijcon notejtemohuilia tla hueli nomanahuiya. ¹⁷ Yejhua ica, ijcuac ohualajquej nican san secan, xhuejcajticaj, yej huajmostla nimantzin oninotlalij ne campa niteyolcuitia niman onitlanahuatij ma nechanilitij on tlacatl. ¹⁸ Niman ijcuac ye ompa nemiyaj on tlateixpanhuijquej, xitlaj† ocuajquiquej tlinon ica quiteixpanhuij más temojtij quen nejhua nicnemiliaya. ¹⁹ Yejhuatej yej quiteixpanhuiyaj yejhua ica intlaneltoc niman yejhua ica on se tlacatl itoca Jesús aquin yomic yejhuan Pablo quijtohua ica nemi. ²⁰ Ica nejhua xnicmatiya quen ijqui huelis nicyolcuitis yejhua ica in, nejhua onictlajtoltij tla quinequisquia yas ne Jerusalén niman yej ompa quiyolcuitisquej yejhua ica in tlajtlamach. ²¹ Pero ica Pablo otlajtlan ajsis hasta itech on más hueyi tlayecanquetl romano para ompa quiyolcuitis, ijcuacon nejhua onitlanahuatij para ma quejehuatij hasta ijcuac nihuelis nictitlanis ne itech César.

²² Quemaj Agripa oquijlij Festo:

—Nejhua no nicnequisquia nicaquis on tlacatl.

Niman Festo oquijlij:

—Mostla ticaquis.

²³ Niman huajmostla Agripa niman Berenice oajsiquej ne ipan on hueyi cajli campa teyolcuitihua. Niman yejhuatej cuajli huajcualnestiajquej niman ompa ocalajtoj inhuan on capitanes niman on tlacamej más huejhueyixtoquej ne ipan on hueyican. Quemaj ican itlanahuatil Festo, ocanatoj Pablo. ²⁴ Ijcuacon Festo oquijtoj:

—Rey Agripa, niman tlacamej yejhuan nican tohuan onemosentlalijquej, nican nenquitaj yejhua in tlacatl yejhuan nochí tlacatl hebreo quiteixpanhuiyaj sanquen on yejhuan chanejquej Jerusalén niman on yejhuan chanejquej nican Cesarea. Yejhuatej onechtlatlanilijquej sanoyej‡ chicahuac tzajtziyaj quijtohuayaj ica xoc quimelahuas in tlacatl para nemis. ²⁵ Pero nejhua xonicnextilij itlaj tlen xcuajli oquichiu para yejhua miquis. Niman ica sa no yejhua otlajtlan para panos itech César Augusto, onicnemilij nictitlanis itech.

²⁶ Niman ica xnicpia tlinon niquipuiloohuilis on tohueyi tlayecancau César yejhua ica in tlacatl, onicuajhuicac nemixpan, niman más tejua mixpan, rey Agripa, para ticyolcuitisquej niman ijqui nejhua nicpias tlinon niquipuilos.

²⁷ Ijquin nicnequi nicchihuas pampa nicuitia xcuajli notitlanis itech César se yejhuan tzacuticaj niman xnoteijlis tlinon ica quiteixpanhuiyaj.

26

Pablo nomanahuiya ixpan Agripa

¹ Ijcuacon Agripa oquijlij Pablo:

* ^{25:13} después † ^{25:18} nada; coxtla ‡ ^{25:24} muy § ^{25:24} merece

—Huelis titlajtos para xmomanahui, tejhua.

Pablo ijcuacon oquitelquetz ima niman opeu tlajtohua ijquin para no-manahuis:

² —Tejhua rey Agripa, sanoyej nipaqui pampa aman ninomanahuis mix-pan yejhua ica on nochí quech tlajtlamach* ica nechteixpanhuiyaj on hebreos. ³ Niman más nipaqui pampa tejhua tiquixmati nochí on quen nohuicaj yejhuan hebreos niman nochí on tlen tlajtlamach ica notencuicuij. Yejhua ica nimitztlajtlanilia cuajli xnechcaqui ican ikyohuilstli.

Pablo oquijtoj quen nemiya ijcuac xe noyolpatlaya

⁴ 'Nochimej on hebreos quimatztoquej quen ijqui ninohuicaya intzajlan desde ijcuac niconetl. Yejhuatej quimatztoquej quen ninemiya ne nochan niman ne Jerusalén. ⁵ Yejhuatej no quimatztoquej, niman huelis quiteix-pantilisquej ica desde ye huejcahui nifariseo. Tejhuatej yejhuan tifariseos más titohuicaj ipan totlaneltoc xquen on ocsequimej hebreos. ⁶ Niman aman nechyolcuitiaj san ipampa on tlamachalistli† yejhuan nicpia ica Dios quinyolihuitis‡ on mimiquej ijcon quen yoquimijlijcaj on toachtojtajhuan. ⁷ On majtlactli huan ome families yejhuan hualehuaj itech toachtojtaj Israel quichixtoquej para tenquisas ipromesa Dios chica quitequipanohuaj ican tonajli niman ican yejhujli. Yejhua ica in tlamachalistli yejhuan nicpia, tejhua rey Agripa, aman nechteixpanhuijaj on hebreos. ⁸ ¿Man tlica§ neme-jhuamej xnenquineltocaj ica Dios huelis quichihuas para quinyolihuitis on mimiquej?

Pablo oquijtoj quen ijqui quintlahuelitiya niman quintlajyohuiliyay on tlaneltocaquej

⁹ 'Sa no nejhua nicnemiliaya ica oncatca para niquinchihuils miyec tlajtlamach tlen xcualji on yejhuan quineltocaj Jesús yejhuan hualehua Nazaret. ¹⁰ Niman ijqui onicchiu ne Jerusalén. Ican intlanahuatil on yejhuan tlayecan-quej intech on tiopixquej, miyequej teyaxcahuan* itech Dios niquintzajtza-cuaya. Niman nejhua no tehan onicmat para ma quinmictican. ¹¹ Miyecpa nejhua niquintlahuelitiya niman niquintlajyohuiliyay ne ipan on tiopantin pampa nicnequiya ma quinenequican† intlaneltoc. Niman ica sanoyej nechcualaniyaj, miyecan niquintejtemojtinemiya para niquintlajyohuilitis.

Pablo ocsejpa oquiteijlij quen ijqui onoyolcuep

(Hch. 9.1-19; 22.6-16)

¹² 'Niman ipan se tonajli niaya ne ipan on hueyican itoca Damasco para niconminanasquia on yejhuan quineltocaj Jesús. Ijquin niaya ican on amat-lanahuatiltin yejhuan on tlayecanquej intech on tiopixquej onechmacaquej. ¹³ Quemaj canaj tlacualispan, oh rey, chica niajtiaya ipan nojhui, oniquitac se tlahuijli yejhuan ohualeu ne ilhuicac. On tlahuijli más sanoyej petlaniya xquen on itlahuil tonatzintli. Niman noyehualican opetlan niman no inyehualican on yejhuan nohuan yayaj. ¹⁴ Quemaj tinochimej otihuetzquej ipan tlajli. Niman nejhua onicac se tlajtojli yejhuan nechijliaya ican tlajtojli hebreo: "Saulo, Saulo, ¿tlica tinechtlahuelita niman tinechtlajyohuiliya? Sa no tejhua timococohua sa no ijqui quen on huacax quichihuas ijcuac quitelicsa icuatipan on yejhuan ica quitzopiniaj." ¹⁵ Ijcuacon oniquijtoj: "¿Aquin tejhua Señor?" Niman on toTeco onechijlij: "Nejhua niJesús on yejhuan tejhua tictlahueltocatinemi. ¹⁶ Aman xmotelquetz, pampa nejhua

* **26:2** cosas † **26:6** esperanza ‡ **26:6** los resucitará; quinyolitis § **26:8** ¿por qué?; ¿tline?

* **26:10** le pertenecen; teaxcahuan, tehuaxcahuan, tetlatquihuan † **26:11** que negaran

yonimitztlapejpenij para tejhua tinechtequipanos niman para tejhua ticteix-pantilis on tlajtlamach on tlen noca yotiquitac niman on tlen noca tiquitas.

¹⁷ Nejhua nimitzmanahuis intech on hebreos niman intech on yejhuan xhebreos, yejhuan aman intech nimitztitlani. ¹⁸ Nejhua intech nimitztitlani para tiquintitis on tlen melahuac. Ijcon, tej, tiquintitis para huelisquej xoc yasquej ipan on ojli yejhuan quinhuica para ipan miquisquej, yej para huelis cajsiquej on ojli yejhuan quinhuica itech temaquixtilistli. No ijqui, tej, tiquintitis para ma ca sa ma quinyecana ipoder on Satanás, yej ma quicuitlapanhucan Dios. Ijcon, tej, nochimej on yejhuan nechneltocaj quiselisquej on tetlapojpolhuilistli ica on intlajtlacol niman se chanyotl[‡] intzajlan on yolchipajquej.”

Pablo otlajtoj ica itequiu

¹⁹ 'Yejhua ica, tejhua rey Agripa, onictlacamat itlajtol Jesús yejhuan ne ilhuicac ohualeu. ²⁰ Achtoj oniaj ne intech on yejhuan nemij ne Damasco, quemaj intech on yejhuan nemij ne Jerusalén niman quemaj oniaj ipan noch iregion Judea niman no intech on yejhuan xhebreos. Onictemachtij para ma cajcahuacan ica quichihua on tlen xcuajli niman para ma quicuit-lapanhuican Dios, niman ma quichihuacan cuajli tlajtlamach yejhuan ica quiteititisquej ica yonoyolpatlaquej. ²¹ Niman san yejhua ica on onechaj-siquej on hebreos ne ipan on hueyi tiopan niman quichihuayaj canica para nechmictisquej. ²² Pampa ica Dios onechpalehuij hasta ipan in tonajli, niquimixpantilia sanquen on yejhuan xhueyixtoquej niman on yejhuan hueyixtoquej. Niman xqueman itlaj ocse más niquimijlia, yej san on yejhuan on tiotlajtojquej niman Moisés oquijtojquej ica nochihuas. ²³ Yejhuatej oquijcuilojquej ica Cristo yejhuan Dios oquitlalij para tlamandaros ye oncatca para tlajyohuis niman ica ijcuac yomic yejhua achtopa yolihius[§] ne intech on mimiquej, niman quimijlis on yejhuan hebreos niman on yejhuan xhebreos quen ijqui huelis quiselisquej temaquixtilistli.

Pablo oquiyolehuas nec on Agripa para ma tlaneltoca

²⁴ Ijcuac Pablo oquijtoj yejhua in tlajtlamach para nomanahuis, Festo otzajtzic:

—¡Tejhua tiloco, Pablo! Pampa sanoyej yotimomachtij, yotilocojtiac.

²⁵ Pero Pablo oquijlij:

—Nejhua xniloco, hueyixticaj Festo, yej in tlen niquijtohua melahuac niman quipia cajsicamatlistli. ²⁶ Nican nemi in rey Agripa yejhuan cuajli quix-mati in tlajtlamach. Xninomojquia para nitlajtohua nican ixpan pampa cuajli nicyolmatzicaj ica yejhua no quimati noch yejhua in, pampa xonochiu iyanticaj canaj neca campa xomolco. ²⁷ Tejhua rey Agripa, ¿ticneltoca on tlen oquijtojquej on tiotlajtojquej? Nejhua nicmatzicaj ica ticneltoca.

²⁸ Niman Agripa oquijlij:

—¿Ticnemilia ica san ica on quesqui tlajtojli tinechyolehuas para ninocuepas cristiano?

²⁹ Quemaj Pablo oquijtoj:

—Ica quesqui tlajtojli noso tla miyec yesquia, nejhua nictlajtlanilia Dios ica xsan moselti tejhua timocuepasquia cristiano, yej hasta nochimej on yejhuan nechcaquij, aman nocuepasquiaj quen nejhua. Pero xnicnequisquia para no nensalijtiasquiaj ican in teposcadenas quen nejhua.

[‡] **26:18** casa; cajli [§] **26:23** resucitará; yolis

³⁰ Niman ijcuac otlan quijtohua in tlajtlamach, ohuajnotelquetz on rey, niman on gobernador, niman Berenice, niman on yejhuan tehuan onotlalijcaj ompa. ³¹ Niman ijcuac onejcuaniiquej san oncuaj, otlajtlajtojquej, quijtohuayaj:

—Yejhua in tlacatl xitlaj* oquichiu para ica miquis, nion para quitzacuasquej.

³² Niman Agripa oquijlij Festo:

—Yejhua in tlacatl huelisquia ticmpacahuasquiaj tla xquitlajtlanisquia para ajsis itech César.

27

Pablo oquititlanquej ne Roma

¹ Ijcuac oquijtojquej tlen tonajli para techtitlanisquej ne Italia, Pablo niman ocsequimej yejhuan tzacutoquej oquintemactilijquej itech se capitán itoca Julio. Yejhua quisa intech on miyequej soldados yejhuan itoca Augusto.

² Otitlecoquej ipan se barco yejhuan teyaxca* ne ipan on hueyican itoca Adramitio yejhuan oncaj ne atlantico. Yejhua ye hueli para quisas para yas ne ica ipan on huejhueyican atlantico ne Asia. Quemaj otitatlalijquej, niman no ompa tohuan nemiya Aristarco, yejhuan hualehua ne ipan on hueyican itoca Tesalónica yejhuan ihueyican Macedonia. ³ Niman huajmostla otajsiquej ne ipan on hueyican itoca Sidón yejhuan oncaj ne atlantico. Niman Julio opeu cuajli quinotza Pablo. Yejhua quitaya quen on yejhuan xpresso yesquia. Ijcon, tej, ocahuilij para ma quinnotzati itetlajsojcahuant para yejhuamej huelisquej itlaj ica quipalehuisquej. ⁴ Quemaj otiquisquej ne Sidón ipan barco, niman pampa on ajacatl techixnamiquiya, otiajquej ipan topochma inacastlan on tlalhuactli itoca Chipre yejhuan oncaj atlajcotian campaca xnojhuitia más on ajacatl. ⁵ Otictlajcoajsiquej on mar ixpan on atempan ne Cilicia niman Panfilia, niman otajsiquej ne Mira, yejhuan se hueyican ne Licia. ⁶ Quemaj on capitán Julio oquinextij se barco yejhuan teyaxca Alejandría yejhuan yaya para Italia. Niman ipan yejhua on barco otechcalaquij. ⁷ Miyec tonajli sanoyej† yolic yaya on barco niman sa axcan§ otajsiquej ixpan on hueyican Gnido. Niman ica oc* techixnamiquiya on ajacatl, xoc tihueliyaj tinejnemiyaj. Yejhua ica otiajquej ocsecan inacastlan on tlalhuactli itoca Creta yejhuan oncaj atlajcotian campaca xnojhuitiaya más on ajacatl niman otipanoquej imelakan Salmón. ⁸ Sa axcan otipanoquej ihueyacan on mar san nisu on tlalhuactli niman otajsiquej ne campa itoca Buenos Puertos. Sa nisu ompaca oncatca on pueblo itoca Lasea. ⁹ Sanoyej yotihuejcajcaj tinejnemiyaj, niman ye temojtij catca para tiasquiaj ipan atl, pampa ye nisu on tonaltin invierno ijcuac sanoyej sehua niman ajaca. Yejhua ica Pablo ijquin quintlacanonotzaya, oquimijlij:

¹⁰ —Tlacamej, niquila ica ipan in tojhui nochihuas on tlen temojtij. Sanquen in barco niman itlamamat ticpolosquej, niman hasta no huelis timquisquej tejhuamej.

¹¹ Pero incapitán on soldados más oquitlacamat iteco on barco niman on yejhuan quiyecana on barco xquen Pablo. ¹² Ompa, tej, xoncatca canon cuajli ticpanosquiaj on tonaltin invierno ijcuac sanoyej sehua. Yejhua ica sa quen nochimej oquinemiliijquej ica más cuajli quisasquej ompa, para quitasquej tla huelij ajsij ne ipan on hueyican itoca Fenice. Fenice oncaj ipan

* **26:31** nada; coxtla * **27:2** le pertenece; teaxca, tehuaxca, tetlatqui † **27:3** amigos de él
‡ **27:7** muy § **27:7** difícilmente * **27:7** todavía; sanquen

iatlatenco on tlalhuactli yejhuan oncaj atlajcotian on mar itoca Creta. Yejhua quipia canon cuajli nocahuasquiaj on invierno, pampa on tlachixticaj neca iquisayan tonajli.

Oajacac chicahuac ipan mar

¹³ Niman ijcuac opeu ajaca achijtzin ica on tonalajacatl yejhuan huale-huaya ne ica sur, yejhamej cuitiayaj ye cuajli para ocsejpa yasquej. Yejhua ica oquintlejcoltijquej on huejhueyi tepostin intoca anclas, niman oyajquej san atlanteli imelacan ica Creta. ¹⁴ Pero san xhuejcajticaj itech on barco sanoyej chicahuac otlahuitec on ajacatl itoca Nordeste. ¹⁵ Opeu techmapehua niman ica xoc ohuel otiajquej campa ticnequiyaj tiasquiaj pampa on ajacatl sanoyej cojtic, otictocahuilijquej ma techhuica san canica. ¹⁶ Niman ijcuac yotiajquej otipanoquej itech se tlalhuactzintli itoca Claudia yejhuan oncaj atlajcotian. Otipanoquej icuitlapan on tlalhuactzintli campaca xnojhuitia más on ajacatl. Niman ompa salijitacatca se barquito itech on hueyi barco. Niman sa axcan† otictilanquej on barquito. ¹⁷ Niman ijcuac yoquitlejcoltijquej ipan on hueyi barco, quemaj quichihuayaj canica para quitlajcosalosquej on hueyi barco. Quemaj pampa nomojetiayaj calaquisquej ipan on xajli itoca Sirte, oquintemoltijquej on tlaquentli‡ intoca velas niman ijqui oquinhuicac on ajacatl san canica. ¹⁸ Niman ica oc§ sanoyej chicahuac ajacaya, niman on ajacatl sanoyej techcojcoxoniaya, huajmostla sequi itlamamal on barco opeu cominxiniaj ne ipan mar. ¹⁹ Niman ipan yeji tonajli más, tejhuamej ican tomahuan oticominxinijquej ipan mar ocsequi tlajtlamach* on tlen tequiti ne ipan on barco. ²⁰ Miyec tonajli xotiquitaquej on tonaltzintli nion on sitlalimej, niman ica sanoyej temojtij techhuitequiya on ajacatl, yoticpolojca nochi on tlamachalistli† tla huelisquia titomaquix-tisquiaj.

²¹ Pampa ye ticpiayaj miyec tonajli ica xtitlacuayaj, Pablo ohuajnotelquetz ne totlajcotian niman oquijtoj:

—Señores, más cuajli nennechtancaquisquiaj niman xtiquisasquiaj ne Creta para xtitlajyohuisquiaj nion xitlaj‡ ixpolihuisquia. ²² Pero aman, xmoyolchicahuacan pampa xacaj quipolos inemilis nican nemotzajlan. San yejhua in barco polihuis. ²³ Aman, tej, ipan in thayohua onechnotitij se ilhuicactequitquetl§ yejhuan ocuajtitlan Dios, on yejhuan itech niteyaxca niman nictequipanohua. ²⁴ Niman on ilhuicactequitquetl onechijlij: “Ma ca xmomojti, Pablo, pampa ica oncaj timoteititis ne itech César, on más hueyi tlayecanquetl romano, niman san mopampa Dios xcahuilis yacaj miquis on yejhuan mohuan nemij ipan in barco.” ²⁵ Yejhua ica, tej, xmoyolchicahuacan, señores, pampa nicyolmelajcamati ica nochi nochihuas ijcon quen onechijlij on iilhuicactequitcau Dios. ²⁶ Pero ica oncaj tonxinisquej ipan se tlalhuactzintli yejhuan oncaj atlajcotian.

²⁷ Ipan ome semana on ajacatl oc techhuijhuicaya ne ipan on atl itoca Mar Adria. Niman on sa ica nochí yejhaujli canaj tlajcoihuan on tlacamej yejhuan quitequitiltia on barco oquimatquej ica on barco ye ajsiticatca itech tlajli. ²⁸ Quemaj oquitemachijquej on atl para quimatisquej quech ica huejcat-lan, niman oquipoquej quipia sempaojli* huan majtlactli huan chicuasen metros. Niman ijcuac otinejenquej achijtzin, ocsejpa oquitemachijquej

† **27:16** difícilmente ‡ **27:17** telas; tojtontin § **27:18** todavía; sanquen * **27:19** cosas
 † **27:20** esperanza ‡ **27:21** nada; coxtla § **27:23** ángel: Angeles tequitij ne ilhuicac niman nican ipan in tlalticpactli. * **27:28** Sempoajli quitsosnequi veinte, niman sempaojli huan majtlactli huan chicuasen quitosnequi treinta y seis.

on atl, niman oquipojquej quipia san sempaojli† huan chicomej metros. ²⁹ Yehuamej quimacasiyaj, cuitiayaj tla onotechacuanitoj ica on temej ne ijtic atl. Yehua ica ne icuitlapan on barco oquimpilohuilijquej on nahui huejhueyi tepostin intoca anclas ne ijtic atl, niman sanoyej quinequiyaj ma tlanestetzi. ³⁰ Quemaj on tlacamej yejhuan quiyecanaj on barco quichihuayaj canica para quisasquej ne ipan on barco. Yehuamej oquijtojquej ica quimpilohuilisquiaj anclas ipan mar ne iyecapan on barco masqui tla xnejli. Yej yoquitemoltijcaj on barquito ne ipan mar. ³¹ Pero Pablo oquimachiltij on capitán niman isoldados:

—Tla yejhamej in xnocahuaj nican ipan in barco, nemejhamej xnenhuelisquej nemmaquisasquej.

³² Quemaj on soldados oquintejtequej imecayohuan on barquito niman ocahuilijquej ma huiya.

³³ Quemaj ijcuac ye huajtlanestiu, Pablo oquintlacanonotz nochimej para ma tlacuacan, oquimijlij:

—Aman quipia majtlactli huan nahui tonajli ica nenquichixtoquej niman ijqui nennemij xnenatlajtlacuaj. ³⁴ Nemechtlajtlanilia para xtlacuacan para nencoijtiquej yesquej, pampa xacaj quipolos nion se itzon.

³⁵ Ijcuac ijcon oquijtoj, Pablo oconcuic pan niman imixpan nochimej oquimacac tlaxtlahuijli Dios. Quemaj ocuajtlapan niman opeu tlacua.

³⁶ Quemaj nochimej oyolchicajquej niman no otlacuajquej. ³⁷ Niman on quech tinemiyaj ompa ipan barco titlapohualtin 276. ³⁸ Quemaj ijcuac cuajli yotlacuajquej, oconxiniijkej on trigo ipan on mar para ma ca sa yetixtias on barco.

On barco oapolac

³⁹ Niman ijcuac yotlanes, xtlaixtlaliayaj ipan on tlalhuactli, pero contayaj on campa nesiya quen oncalactoc on atl campa quipia on xalatentli itoca bahía. Ompaca, tej, quinequiyaj concalaquisquej on barco tla huelisquej.

⁴⁰ Yehua ica oquintejtequej imecayohuan on yejhuan ica notilanayaj on anclas niman oquincajquej ipan on mar. Quemaj nimantzin oquexanijquej on mecamej yejhuan ica sasalijtacaj on cojtlitijquej yejhuan quiyecanayaj on barco. Niman ijcuac oquitlejcoltijquej ipan ajacatl on tlaquentli§ itoca vela yejhuan tlayecapan yau, on barco opeu quinisihuiya on atlantico. ⁴¹ Pero ocalaquito ne campa nomalacachohua on mar tlajtic quen itlan ome atentli yesquia, niman ompa otلالac on barco ipan on xajli. Niman on yejhuan tlayecapan yau ompa otlinito ijtic on xajli niman xoc ohuel onolinij. Niman on yejhuan tlacuitlapan yau otlapou ica on atl, pampa sanoyej cojtacaj nahuiltiaya on mar yejhuan noquetztehuaya.

⁴² Quemaj ijcuacon on soldados oquinemilijquej para nochimej on tzacutoquej quinmictisquej para ma ca chojcholosquej ijcuac tlanelojtiasquej.

⁴³ Pero ica incapítán on soldados quinequiya quimanahuis Pablo, xoquincahuilij para ijcon quichihuasquej. Yej otlanahuatij yejhuan huelij tlanelohuaj ma natlajcalican achtopa niman ma quisatiq ne ipan tlajli. ⁴⁴ Niman quemaj otlanahuatij para on ocsequimej ma huiyan ipan tablas noso ipan itlajcotzitzihuan on barco. Niman ijcon onochiu ica tinochimej otajsiquej ne ipan on tlajli niman otimaquisquej.

28

Pablo nemiya ipan on tlalhuactli itoca Malta yejhuan oncaj atlajcotian

† **27:28** Sempoajli huan chicomej quitosnequi veintisiete. ‡ **27:40** el timón que servía para guiar el barco § **27:40** tela; totontli

¹ Ijcuac tinochimej yotimaquisquej otechijlijquej ica on tlalhuactli campa tinemiyaj itoca Malta. ² On yejhuan ompa chanejquej sanoyej* cuajli otechchihuilijquej. Sanoyej cuajli otechselijquej, niman pampa quiahuiya niman ica sanoyej sehua catca, yejhamej oquitlalijquej se hueyi tlilt para ompa ma titototonican. ³ Pablo oquisentlalij quesqui cojtli† yejhuan huaqui niman ocontlalij ne tlco. Ijcuacon se cohuatl ompa ohuajquis ica ye tlatlaya niman ipan ima Pablo ocuaj niman onopiloj. ⁴ Quemaj ijcuac on chanejquej oquitaquej on cohuatl onopiloj ipan ima niman oquicuaj, opeu quinojliaj:

—Sa ica melahuac in tlacatl cas se hueyi temictiani. Masqui tla omaquis ipan mar, ica oncaj quiselia itlaxtlahuil. Itlaj tlajtlacol xcahuilia nemis.

⁵ Pero Pablo onomatzejzeloj ne ipan tlilt niman on cohuatl ompa ohuetzito niman xitlaj‡ ipan onochiu. ⁶ Yejhamej on chanejquej quichixticatcaj tla posahuis ima noso tla nimantzin huetzis niman miquis. Pero ijcuac yohuejcau quichixtoquej niman ica oquitaquej xitlaj ipan nochihuaya, oquipataquej intlamachilis niman opeu quijtohuaj ica Pablo yejhua se dios.

⁷ Nisiu sa ompacatzin oncatcaj itlalhuan on tlacatl itoca Publio yejhuan yacatzticaj ne ipan on tlalhuactli. Yejhua sanoyej cuajli otechselij niman ompa otinenquej ihuan yeyi tonajli. Yejhua sanoyej tenotzqui. ⁸ Niman on itaj Publio onoya tlapecchco, cualohuaya ican totonqui§ niman yestlalijli*. Pablo oyaj oquinotzato, niman ijcuac yoquichiu oración, ipan oquintlalij imahuan niman oquipajtij. ⁹ Quemaj ijcuac yonochiu on, nochimej osequimej yejhuan cualoj ipan on tlalhuactli no oyajquej itech, niman no oquimpajtij. ¹⁰ Niman yejhamej otechtlausojcaitaquej sanoya. Niman ijcuac otiquisquej, otechtlayocolijquej ica nochí tlajtlamach yejhuan tictequitlitisquej ipan tojhui.

Pablo oajsic ne Roma

¹¹ Quemaj ijcuac yotinenquej yeyi metztli ipan on tlalhuactli, oticajsiquej tojhui ipan se barco yejhuan ompa onocajca ijcuac sehua. On barco teyaxca† ne Alejandría niman ipan ixnestiaya para iixmachyo on dioses Cástor niman Pólux. ¹² Niman ijcuac otajsiquej ipan on hueyican itoca Siracusa yejhuan oncaj ipan itenco on mar, ompa otinenquej yeyi tonajli. ¹³ Quemaj ompa otiquisquej otiajquej san atlalentli hasta otajsiquej ipan se hueyican itoca Regio. Niman ijcuac huajmostla opeu ajaca achijtzin ica on tonalajacatl yejhuan quisa ne sur. Niman huajmostla otajsiquej ne ipan on pueblo itoca Puteoli. ¹⁴ Ompa otiquinnextijquej sequimej tocnihuan, niman otechnotzquej para se semana ompa inhuan ma titocahuacan. Niman quemaj ompa otiquisquej niman otiajquej para on hueyican itoca Roma. ¹⁵ Niman ica oquimatquej on tocnihuan ne Roma ica sa nisiu tinemij, oquisquej para otechnamiquitoj hasta ne ipan on pueblito itoca Tres Tabernas. Niman ocsequimej oyajquej más tlayecapan hasta on plaza itoca Apio. Niman ijcuac Pablo oquintac, oquimacac tlaxtlahuijli Dios, niman más onoyolchicau. ¹⁶ Ijcuac otajsiquej ne Roma, on capitán oquinmactilij on carcejtlapixqui. Pero Pablo ocahuilijquej nemis ocsecan ihuan se soldado yejhuan oquitlali-jquej para quitlapias.

Pablo quiteijliaj on cuajli tlajtojli ne Roma

* **28:2** muy † **28:3** leña ‡ **28:5** nada; coxtla § **28:8** fiebre; totonalistli * **28:8** disentería;
cuitlatlayejli, tlajejli † **28:11** le pertenece; teaxca, tehuaxca, tetlatqui

¹⁷ Ijcuac quipiaya yeyi tonajli ica otajsiquej ne Roma, Pablo oquintecuitlan on hebreos yejhuan más yacatztoquej. Niman ijcuac yonosentlalijquej, oquimijlij:

—Nocnihuan, masqui nejhua xonicchiu itlaj yejhuan xcuajli intech on hebreos nion itech on incostumbres on toachtojtajhuan, onechtemacaquej preso ne Jerusalén intech on tequihuajquej romanos. ¹⁸ Ijcuac onechyolcuitijquej, quinequiyaj nechmacahuasquej, pampa xonechnextilijquej itlaj yejhuan ica nechmelahuasquia nimquis. ¹⁹ Pero pampa sanoyej onechtlahuelixnamiquej on hebreos, oniquitac ica nonequiya nipanos nican itech César, masqui tla xnicpia tlinon ica niquinteixpanhuis on nochantlacaj‡. ²⁰ Yehua ica, tej, onemechtecuitlan para nemechitas niman nemechnotzas. Aman, tej, nican ninemi nisalijtcaj ica in teposcadena san ipampa on totlamachalis§ itech Cristo on Mesías yejhuan ticipia tehuamej tihebreos.

²¹ Ijcuacon yejhamej oquijlijquej:

—Tejhamej xitlaj* amatlajcuilojli ticseliaj on yejhuan hualehua ne Judea moca tejhua. Nion yacaj tocniu hebreo yejhuan ne hualehuaj xitlaj cuajtetlatlajtohuliaj tlen xcuajli moca tejhua. ²² Pero ticnequisquiaj ticaquisquiaj tlinon tejhua ticnemilia, pampa ticmatztoquej ica nochihuiyan xcuajli quitenehuliaj on yejhuan quineltocaj on yencuic tlamachtijli.

²³ Ijcon, tej, oquitlalijquej se tonajli para tlajtlajtosquej, niman ijcuac oajsic on tonajli, oyajquej sanoyej miyequej tlacamej ne campa Pablo chantiya. Niman cualcan hasta tiotlac quinmelajcailiaya niman quimixpantiliaya quen Dios tlamandarohua. Quichihuaya canica para itechcopia on itlanahuatil Moisés niman on tlen oquijcuilojquej on tiotlajtojquej quinyolehuas ica Jesús. ²⁴ Sequimej oquineltocaquej on tlen Pablo quijtohuaya, pero ocsequimej xoquiselijquej. ²⁵ Niman ica xsan se tlajtojli oquipixquej, opeu nosesemanaj. Pero ijcuac xe nosesemanayaj, Pablo oquimijlij in tlajtojli:

—Cuajli otlajtoj on Espíritu Santo itechcopia on tiotlajtojquetl Isaías ijcuac oquimijlij on toachtojtajhuan:

²⁶ Xhuiya niman ijquin xquimijlij on tlacamej: Ica nemonacashuan nentlacactiasquej, pero xitlaj nencajsicamatisquej. Niman ica nemixtololohuan nentlachixtiasquej, pero xitlaj nenquitasquej.

²⁷ Ijquin nochihuas, pampa inyojlo in tlacamej yotechicajquej para ma ca cajsicamatisquej ican inyojlo on tlen melahuac. Niman innacashuan tzatzacutoquej para ma ca cuelcaquisquej ican innacashuan on tlen melahuac. Niman imixtololojhuan xtlacha para ma ca quitasquej on tlen melahuac. Tla ijcon nochihuasquiaj noyolpatlasquiaj niman niquinpajtisquia inalma.

²⁸ Quemaj Pablo oquimijlij:

—Aman xmatican ica desde aman para tlayecapan yejhua in itemaquixtil Dios quititlanisquej intech on yejhuan xhebreos, niman yejhamej caquisquej.

²⁹ Ijcuac Pablo oquijtoj yejhua in, on hebreos oquisquej, niman sa no yejhamej sanoyej onocamatlanquej.

³⁰ Pablo cuajli ome xipan ompa onocau ne ipan on cajli yejhuan oquitlaneu. Niman yejhua quinseliaya nochimej on yejhuan yayaj itech. ³¹ Niman quitejliaya on quen Dios tlamandarohua niman quitemachtiaya itech ica toTeco Jesucristo. Niman Pablo xitlaj ica ontelihuiya chica temachtiaya, niman xacaj quipajsolohuaya.

‡ 28:19 mis paisanos

§ 28:20 nuestra esperanza

* 28:21 nada; coxtla

ROMANOS

ITLAJCUIOL ON APÓSTOL SAN PABLO PARA ON ROMANOS

Pablo oquintlacuilhuij on tlaneltocaquej ne Roma

¹ Nejhua, Pablo, niitequitcau Jesucristo. Dios onechnotz niman onechcalactij para niapóstol. Yejhua onechtlapecpenij para nicteijlis on cuajli tlajtojli yejhuan quitemaca temaquixtilistli.

² Yejhua in temachtijli yoquimelajcrajtojca ipan on Yectlajcuilojli intechcopa on itiotlajtojcahuau. ³ In temachtijli technojnotza ica toTeco Jesucristo. Yejhua iConetzin Dios, niman ijcuac otlatcat, yejhua huejca teixhuiu* catca itech on rey David. ⁴ Pero ijcuac onoyolihuitij† niman onoquetzteu ipan itlalcon, on Espíritu Santo oquipanextij ica poder ica yejhua iConeu Dios.

⁵ Itechcopia niman ipampa Jesucristo, Dios onechmacac iteicnelilis‡. Niman ican iteicnelilis onechtitlan quen apóstol para ma niquinnojnotzati on xhebreos yejhuan chantij ipan nochí países. Niconminnojnotza para ma quineltocacan niman ma quitlacamatican Dios. ⁶ Niman nemejhuamej no nentehuamej omechnotzquej para no nenteyaxcahuau§ itech Cristo.

⁷ Nemechtlajcuilhuiya, tej, nochimej nemejhuamej yejhuan nenchantij ipan on hueyican itoca Roma yejhuan nenitetlajsojcayaxcahuau Dios. Ma Dios toTajzin niman toTeco Jesucristo mechmacacan intlatiochihualis niman inyolsehuilis.

Pablo quinequi comintlajpalos on tlaneltocaquej yejhuan chantij ne Roma

⁸ Aman, tej, itechcopia Jesucristo nicmaca tlaxtlahuijli noDios nemopampa nemochimej* pampa on tlacamej nochihuiyan chantij yocaquej quen nemejhuamej nentlaneltocaj. ⁹ Nictequipanohua Dios ican nochí noyojlo ica nicteijlia on cuajli tlajtojli ica on iConetzin. Dios cuaalitzticaj ica nochipa nemechelnamiqui ipan nooración. ¹⁰ Desde ye huejcahui onicnec nemechonnotzas. Yejhua ica, tej, nictlajtlanilia Dios ma nechcahuili nemechnotzati tla yejhua quinequi. ¹¹ Sanoyej nicnequi nemechitas para nemechmacas itlaj tetlayocolijli yejhuan quisa itech on Espíritu Santo para xmelajcanemican. ¹² Niquijtosnequi ma titoyolehuacan se ihuan ocse ica on tlaneltoctli yejhuan ticipiaj.

¹³ Nocnihuan, nicnequi xmatican ica miyecpa onicnec nemechonnotzas, pero hasta aman xnechcahuiliaj niau. Nicnequi nias para yacamej niquinyolchicahuas niman niquinyolcuepas para más ma quineltocacan Dios ijcon quen nicchihua inhuau on ocsequimej yejhuan xhebreos. ¹⁴ Nicmati ica oncaj nitequitis intech on yejhuan griegos niman yejhuan xgriegos, niman intech on yejhuan tlamatquej niman on yejhuan xtlamatquej. ¹⁵ Yejhua ica, aman ica yoninocau para no nemechmachtis on yejhuan nenchanejquej ne Roma on temachtijli ica temaquixtilistli.

On temachtijli ica temaquixtilistli quipia poder

* **1:3** descendiente † **1:4** resucitó; onoyolitij ‡ **1:5** misericordia § **1:6** le pertenecen; nentexcahuau, nentehuaxcahuau, nentetlatquihuau * **1:8** todos ustedes; nannochti, yemochimej, anochimej, innochimej, emmochimej

¹⁶ Xnipinahua, tej, para nictejilis on cuajli tlajtojli yejhuan quitemaca temaquixtilistli, pampa on yejhua ipoder Dios para quinmaca temaquixtilistli nochimej on yejhuan quineltocaj. On temaquixtilistli achtój opeu quipiaj on hebreos, pero aman no pehua intech on yejhuan xhebreos. ¹⁷ Yejhua in cuajli tlajtojli yejhuan quitemaca temaquixtilistli techmachiltia quen ijqui Dios quimaca se tlacatl yolmelahualistli. Dios quimaca yolmelahualistli san ipampa itlaneltoc niman xitlaj† ocse ipampa ijquin quen quijtohua in Yectlajcuilojli: “On tlacatl yejhuan yolmelajqui san itechcopa itlaneltoc nemis.”

On yejhuan xquineltocaj Cristo quipiaj tlajtlacojli

¹⁸ Tiquitaj, tej, ica on itlahuel Dios, desde ne ilhuicac hualehua para yejco intech on xcuajcualtin niman xyolmelajquej tlacamej yejhuan, impampa intlaajtlacolhuan xcahuiliaj ma nopantlanti on tlen melahuac. ¹⁹ Yejhuatej cuajli quimatztoquej on tlajtlamach‡ se hueli quimati itech ica Dios, pampa sa no yejhua Dios yoquintitij. ²⁰ Nochi tlen Dios itequiu yejhuan xtiquitaj hueli ticmatij itechcopa on tlajtlamach yejhuan oquitlalij. Desde ijcuac in tlalticpactli oquitlalij, cuajli pantlantiticaj ica yejhua Dios niman ica ipoder xqueman tlamic. Yejhua ica, tej, ijcuac quintlajtlacolmacasquej, xhuelisquej itlaj ica tenanquilisquej yejhuan quimpalehuis para nomanahuisquej. ²¹ Masqui yejhuatej oquimatzquej ica Dios nemi, xoquitlacaitaquej quen Dios nion xoquimacaquej tlaxtlahuijli. Pero intlamachilis xoc hueli quinemilia on tlamach yejhuan tepalehuij, niman inyoltechicahualis hasta xoc hueli itlaj tlen cuajli cajsicamatij. ²² Masqui notenehuaj tlamatquej, yejhuatej onquisaj tontos. ²³ Yejhuatej xquimahuistiliaj ihueyilis Dios yejhuan xqueman miqui, yej quimahuistiliaj on yejhuan tlamachijchijhualti intajtzitzihuan. In intajtzitzihuan tlajtlacha quen tlacamej yejhuan miquij noso ican intlachalis on totomej, cohuamej niman on yolquej yejhuan quipiaj nahui imicxi.

²⁴ Yejhua ica, tej, Dios oquincahuilij ma quichihuacan on tlajtlamach tlen xchipahuac yejhuan inelehuis oquinec. Niman ijqui oquinochihuiliiquej on tlen tepinajti quen on tlacamej noelehuij§ niman on sihuamej no noelehuij. ²⁵ Yejhuatej oquipatlaquej on tlen melahuac itech ica Dios yejhua ica on tlen tlacajcayahualistli. Yejhuatej quitlacaitaj niman cueyiliaj on tlen Dios oquitlalij, pero xquitlacaitaj niman xcueyiliaj Dios aquin quitocarohua quiselis yectenehualistli para nochipa. Ma ijqui nochihua.

²⁶ Dios, tej, yejhua ica oquincahuilij ma quichihuacan on xcuajli tlajtlamach yejhuan inelehuis oquinec. Niman inelehuis tepinajti. Hasta on sihuamej onopatlaquej yej insihuaxihuan quinelehuiyayaj. ²⁷ On tlacamej no ijqui yej intlacaxihuan quinelehuiyayaj hasta campa xoc hueli. Yejhuatej, tej, quinochihuiliaj tlajtlamach tlen tepinajtij, niman pampa ijcon nonejnequiyaj, quijyohuiyaj on castigo yejhuan quipiaj ipan intlalnacayo quen quitocarohua.

²⁸ Pampa xoc quinequij quimatisquej tlajtlamach itech ica Dios, Dios oquincau, niman oquinemilijquej on tlen sanenca. Yejhua ica yejhuatej quichihuaj on tlen xquitocarohua quichihuasquej. ²⁹ Innemilis tenticaj ican noch i tlajtlamach tlen xcuajli. Ahuinemij, xyolmelajquej, quitejelehuiliaj tlajtlamach quen xquitocarohua niman quinchihuiliaj xcuajli ocsequimej. Yejhuatej ican noch i nyojo nexicolmiquij, temictiaj, quipejpehualtiaj tlahuejli, tlacajcayahua, quichihua noch tlin xcuajli niman chacuamej.

† **1:17** nada; coxtla ‡ **1:19** cosas § **1:24** se deseán

³⁰ Yejhuamej teijijtohuaj, istlacatij, quitlahuelitaj Dios, xtetlacaia, nohueyimati niman nohueyitenehuaj. Quinemiliaj tlajtlamach más tlen xcuajli para quichihuaj niman xquitlacamatij intajhuan. ³¹ Yejhuamej tontos, xquichihuaj tlen quijtohuaj, xacaj quitlajsojtlaj*, xtetlapojo polhuiyaj niman xteicneliaj†. ³² Masqui cuajli quimatztoquej ica Dios otlanahuatij ma miquican on yejhuan quichihuaj on tlen xcuajli tlajtlamach, yejhuamej oc‡ más quichihuaj. Niman hasta ican pactli quintaj on yejhuan no ijqui quichihuaj.

2

Dios quintlaxtlahuilia on tlacamej quen quitocarohua

¹ Yejhua ica on tlacatl yejhuan tetlajtlacolmaca xhuelis itlaj ica quinanquilis Dios para ica normanahuis itech. Ximportarohua aquin yejhua. Ijcuac ocse quitlajtlacolmaca, sa no yejhua notlajtlacolmaca pampa sa no yejhua tlajtlamach* quichihuaj. ² Ticmatztoquej, tej, ica ijcuac Dios tetlajtlacolmaca, itetlajtlacolmacalis quixtia ipan on tlen melahuac se quichihuaj. ³ On tlacatl yejhuan no quichihuaj on tlen quichihuaj on tlacamej yejhuan quintlajtlacolmaca, quitocarohua quimati ica quiselis on tejmoti tlajtlacolmacalistli yejhuan Dios quimacas. ⁴ San pampa Dios ican itetlajsojtlalis† quijyohuilia, yejhua xquitocarohua quinemilis ica ijyohuilis Dios xhueyi quiyosnequi. Dios quijyohuilia ican itetlajsojtlalis pampa quinequi quimacas tiempo para ma nopatla iyojlo. ⁵ Pero ijcuac se tlacatl yoltechicactic niman xquinequi noyolpatlas, on tlajyohuclistli sa no yejhua quinomiyequilijticaj para quiselis ipan on tonajli ijcuac Dios tetlaxtlahuilis. Ipan on tonajli Dios quipantlantis itetlajtlacolmacalis quen quitocarohua. ⁶ Ijcuacon, tej, cada se quitlaxtlahuilis quen quitocarohua ica on tlen se oquichiu. ⁷ Niman on yejhuan quichihuaj canica para quitejtemohuaj on hueyilistli, niman tetlacaialistli niman nemilistli yejhuan para nochipa itechcopia on tlen cuajli quichijtoquej, Dios quinmacas yencuic nemilistli yejhuan para nochipa quipiasquej. ⁸ Pero on yejhuan nohueyimati niman xquitlacamatij on tlen melahuac, yej quitlacamatij on tlen xcuajli, ica itlahuel Dios quinmacas intlajyohuilis. ⁹ Nochimej on yejhuan quichihuaj on tlen xcuajli quipiasquej tlajyohuclistli niman ajmantli. Achtoj on hebreos quipiasquej niman no on yejhuan xhebreos. ¹⁰ Pero nochimej on yejhuan quichihuaj on tlen cuajli quipiasquej hueyilistli, tetlacaialistli niman yolsehuclistli. Achtoj on hebreos quipiasquej niman no on yejhuan xhebreos.

¹¹ Ijcon, tej, tiquitaj ica Dios xquichicoita‡ se tlacatl ihuan ocse. ¹² Yejhua ica on yejhuan xquixmatij itlanahuatil Moisés niman tlajtlacohuaj popolhuisquej, masqui itlanahuatil Moisés xquintlajtlacolmacas. No ijqui, tej, on yejhuan quixmatij itlanahuatil Moisés niman tlajtlacohuaj, no quintlajtlacolmacasquej quen yejhua on tlanahuatijli tlanahuatia. ¹³ Dios, tej, xquijtohua ica intlajtlacolhuan on tlacamej yoquintlaxtlau san pampa caquij itlanahuatil Moisés, yej tla quitlacamatij nochí tlen tlanahuatia on tlanahuatijli. ¹⁴ Pero ijcuac on xhebreos yejhuan xquipiaj itlanahuatil Moisés, quichihuaj sa no ijqui quen tlanahuatia on tlanahuatijli, yejhuamej quiteititaj ica itlanahuatil Dios oncaj ipan inyojlo, masqui xquipiaj itlanahuatil Moisés. ¹⁵ Ijcon, tej, quen yejhuamej nohuicaj quiteititaj ica on tlanahuatijli tlajcuiloncaj ipan inyojlo. Intlamachilis no quitexpantiliaj yejhua on, pampa quemantica quintlajtlacolmaca noso quemantica quinmanahuiya.

* **1:31** aman † **1:31** no tienen misericordia ‡ **1:32** todavía; sanquen * **2:1** cosas † **2:4** su amor ‡ **2:11** no hace aceptación

¹⁶ Yehua in no nochihuas ipan on tonajli ijcuac Dios itechcopa Jesucristo quintlajtlacolmacas on tlen iyanticaj ipan inyojlo on tlacamej. Nochi yejhua in nochihuas quen on cuajli tlajtojli ica temaquixtilistli quijtohua yejhuan nictejlia.

On hebreos quipiaj itlanahuatil Moisés pero xquitlacamatij

¹⁷ Aman ma ticnemilican ica on hebreos. Yejhuamej quitlaliaj inyojlo itech itlanahuatil Moisés niman ican nohueyimatelistli notenehuaj iconehuan Dios. ¹⁸ Quimatiж on tlen Dios quinequi para quichihuasquej, niman itechcopa on tlanahuatijli no quimatztoquej quen ijqui quitlapejpenisquej on tlen más cuajli. ¹⁹ Cuitiaj ica huelis itech Dios quinyecanasquej on yejhuan xquixmatij niman huelis quinmachtisquej on yejhuan xquixmatij on itemachtilhuan Dios yejhuan tlen melahuac. ²⁰ Quinemiliaj huelis quintlamachilis-
tisquej on yejhuan xitlaj§ quimajmatij niman huelis quinmachtisquej on yejhuan quen coconej ixpan Dios, pampa ipan on tlanahuatijli quipiaj nochí on tlaixmachilistli niman nochí on tlen melahuac. ²¹ Tla yejhuamej, tej, hueli quintlamachilistiaj ocsequimej, ¿tlica*, tej, xsa no yejhuamej no notlamachilistiaj? Niman tla yejhuamej quiteijliaj xcuajli para tlachtequilos, ¿tlica, tej, yejhuamej no tlachtequij? ²² Niman tla sa no yejhuamej no quiteijliaj xcuajli para ahuilnemilos, ¿tlica, tej, sa no yejhuamej no ijqui quichihuaj? Niman tla sa no yejhuamej no quintlahuelitaj on tlamachi-
jchihualtin intajtzitzihuan, ¿tlica, tej, conichtequij on tlen ipan intiopan nosentlaliaj? ²³ Yejhuamej nohueyimatij pampa quipiaj itlanahuatil Moisés, pero xquitlacaitaj Dios pampa xquichihuaj on tlen tlanahuatia sa no yejhua on tlanahuatijli. ²⁴ Yejhua ica on Yectlajcuilojli ijquin quijtohua: “On yejhuan xhebreos san nemopampa quijtohiliaj Dios on tlen xcuajli.”

²⁵ On nescayotl itoca circuncisión melahuac quimpalehuisquia tla quitlacamatisquiaj nochí itlanahuatil Moisés. Pero tla xquitlacamatij on tlanahuatijli, tla ijcon on nescayotl xitlaj quijtosnequi. ²⁶ Niman tla on yejhuan xquipiaj on nescayotl itoca circuncisión niman quichihuaj on tlen tlanahuatia on tlanahuatijli, tla ijcon quinselis Dios quen quipiasquiaj on nescayotl, masqui xmelahuac quipiaj. ²⁷ On yejhuan xquipiaj on nescayotl ipan intlalnacayo, pero quitlacamatiж itlanahuatil Moisés, quintlajtlacolmacasquej on yejhuan xquitlajcamatiж on tlanahuatilij masqui quipiaj on nescayotl niman quitlajcuilpiaj on tlanahuatijli. ²⁸ Se tlacatl xmelahuac hebreo san pampa tlacati itech se familia yejhuan hebreo, nion xejhua melahuac circuncisión yejhuan notetlaliliaj ipan tlalnacayo. ²⁹ Yej melahuac hebreo on yejhuan hebreo ipan iyojlo. Niman on nescayotl itoca circuncisión yejhuan melahuac, oncaj ipan teyojlo. On nescayotl yejhuan melahuac se tlacatl quiselia itechcopa on Espíritu Santo niman xpampa on ica quitlacamati itlanahuatil on tlanahuatijli. On yejhuan melahuac hebreo xquiselia yectenehualistli intech on tlacamej, yej itech Dios.

3

¹ Tla ijcon ¿tlinon ica quipalehuiya tla se hebreo? Noso tla on hebreos quipiaj on circuncisión, ¿on yejhua quimpalehuis? ² Quemaj, sanoyej* miyec quipia tlinon ica quimpalehuiya. On achtoj ica Dios oquinmacac para que-
jehuasquej iYectlajcuilol. ³ Pero ¿tlinon nochihuas tla semej hebreos xquichi-
huasquej on tlen Dios oquitlalij ipan ipromesa? ¿Yejhu in quijtosnequi ica
Dios xoc quichihuas on tlen oquitlalij ipan ipromesa? ⁴ ¡Melahuac, tej, Dios

§ 2:20 nada; coxtla

* 2:21 ¿por qué?; ¿tline?

* 3:2 mucho

quichihuas on tlen oquitlalij ipan ipromesa! Masqui nochimej tlacamej xquichihuaj quen quijtohuaj, Dios nochipa quichihua quen yejhua quijtohuaj. Ijquin, tej, quijtohuaj on Yectlajcuilojli: Ica on tlen tiquijtos, yejhua ica timopanextis ica ticuajli. Niman xhuelis mitztlajtlacolmacas ijcuac mitzyolcuitisquej.

⁵ Pero tla totlajtlacol quipanextia ica Dios yolmelajqui, ¿tlinon, tej, quijtosnequi ijcuac Dios techcastigarohua? ¿Huelis tiquijtosquej ica Dios xcuajli quichihua pampa techcastigarohua? (Ijquin tlajtlajtohuaj on tlalticpactlacamej itech ica Dios.) ⁶ ¡Melahuac, tej, ica ca! Tla Dios xcuajli quichihuasquia ijcuac techcastigarohua, ¿quen ijqui, tej, huelisquia quintlajtlacolmacasquia on tlalticpactlacamej?

⁷ Yacaj yejhuan xcuajli iyojlo ijquin hueli quijtohuaj: “Aman tla xnicchihua on tlen onictlalij ipan nopromesa, ocsequimej más hueli cajsicamatij ica Dios nochipa quichihua quen quijtohuaj. Ijquin, tej, yejhua más quiselia hueyilistli. Tla ijcon, ¿tlica† nechtlajtlacolmaca quen quitlajtlacolmaca on tlacatl tlajtlacolej?” ⁸ Tla para ijcon, ¿tlica, tej, xnicchihua on tlen xcuajli para Dios más ma quiseli on hueyilistli?” Sequimej quijtohuaj ica yejhua on nictemachtia, pero yejhamej xican cuajli inyojlo quijtohuaj. Dios quintlajtlacolmacas quen quitocarohua.

Nochimej ticpiaj tlajtlacoljli

⁹ ¿Aman, tej, tlinon? ¿Tejhuamej hebreos más tihuejhueyixtoquej ixpan Dios xquen on yejhuan xhebreos? ¡Melahuac, tej, ica ca! Nejhua yonicteititij ica nochimej tlajtlacohuaj, sanquen on hebreos niman on yejhuan xhebreos.

¹⁰ Niman ipan on Yectlajcuilojli ijquin tlajcuilolnesticaj:

Nion siquiera se xnemi yejhuan yolmelajqui tlacatl.

¹¹ Xnemi yejhuan cajsicamati iojhui Dios; xnemi yejhuan quinequi quitejetemos Dios.

¹² Nochimej on tlacamej oquitlalcahuijquej Dios; nochimej sanencaj nemij. Nion se xquichihua on tlen cuajli.

¹³ Incamac molonqui ijnecuisti quen on tlalcontli yejhuan quitentlapojhuaj. Ican intlajtol quijtohuaj on tlen ica tlacajcayahuaj. Niman intlajtol quipia quen iascayo† yejhuan ica teijtlacohuaj quen on cohuatl quichihua ijcuac tecua.

¹⁴ Nochi on tlahuijhuicaltilistli niman tlahuejli hasta incamac yonomat.

¹⁵ Yejhamej sa quimachixtoquej aquinon huelis quimictisquej.

¹⁶ Yejhamej texoxotonij niman tetlajyohuiltiaj nochihuiyan campa yahuij.

¹⁷ Xquimatiij, tej, quen ijqui nohuicasquej inhuan ocsequimej ican yolsehuilistli.

¹⁸ Yejhamej xqueman quimacasij Dios.

¹⁹ Nochi yejhua in tlajcuilolnesticaj ipan on tlajcuilolamatl yejhuan itlanahuatil Moisés. Ticmatztoquej, tej, ica nochi tlen quijtohuaj on tlajcuilolamatl, quimijlia on yejhuan on tlanahuatijli quinnahuatia. Ijcon quimijlia para nochi tlacatl ma ca sa ma quipia tlinon ica tenanquilisquej yejhuan quimpalehuis para nomanahuisquej, yej ixpan Dios ma noyolcuitican quen onohuicaquej. ²⁰ Yejhua ica, tej, Dios xacaj quijlis ica itlajtlacolhuan yoquitlaxtlau pampa quichihua on tlen tlanahuatia on tlanahuatijli. Xmatziacan, tej, ica on tlanahuatijli tepalehuiya san para techmachiltia ica titlajtlacolejquej.

Itechcopa totlaneltoc ticseliaj on temaquixtilistli

† **3:7** ¿por qué?; ¿tline? ‡ **3:13** veneno

²¹ Aman, Dios yotechpanextilij quen ijqui hueli techselia quen tiyolme-lajquej, pero xpampa tla tictlacamatij on tlanahuatijli. Niman yejhua on nomelajcaita ipan on itlajcuilolamahuan Moisés niman ipan intlajcuilo-lamahuan on tiotlajtojquej. ²² Dios quinselia on tlacamej quen yolmelajquej ipampa intlaneltoc yejhuan quipiaj itech Jesucristo. Ijcon Dios quichihua para nochimej yejhuan quineltocaj Cristo, pampa yejhua xquinchicoita on hebreos inhuan on xhebreos. ²³ Nochimej on tlacamej tlajtlacolejquej niman xquipiaj on yolmelajcanemilistli yejhuan Dios oquinec ma quipiacan. ²⁴ Pero itechcpa iteicnelilis§ yejhuan oquintlayocolij, quijtohua ica intlajtlacol-huan yoquintlaxtlau. Yejhua in quichihua itechcpa Jesucristo yejhuan oquitlaxtlau para totlajtlacol. ²⁵ Dios oquitlalij Cristo quen se huentli. Yejhua oquitoyau iyesyo para ma quimpopolohuili intlajtlacol on tlacamej ijcuac quineltocasquej. Ijquin, tej, quiteititia ica yejhua yolmelajqui pampa achtoj nesiya ipan iiyyohuilis ica xoquichihuili cuenta intlajtlacol on tlacamej yejhuan achtoj nemiyaj. ²⁶ Aman ipan in tonaltin quiteititia ica yejhua yolmelajqui niman quimijlia yejhuan quineltocaj Cristo ica intlajtlacolhuan yoquintlaxtlau.

²⁷ ¿Canon, tej, oncaj on tohueyimatilis ica titotenehuaj ticuajcualtin? To-hueyimatilis opopoliu. ¿Tlica opopoliu? Opopoliu pampa xothuelquej oticchijquej on tlen tlanahuatia on tlanahuatijli niman yejhua ica oticnel-tocaquej Jesucristo. ²⁸ Ijcon, tej, tiquitaj ica Dios quiselia se tlacatl quen yoquintlaxtlau itlajtlacolhuan pampa quineltoca Cristo, niman xpampa tla quichihua tlen tlanahuatia on tlanahuatijli.

²⁹ ¿Tlen Dios san on hebreos inDios? ¿Tlen xno inDios on yejhuan xhebreos? Melahuac, tej, ica on xhebreos no yejhua inDios ³⁰ pampa xnemi más de se Dios. Yejhua, tej, quimaca cuenta ica intlajtlacolhuan on hebreos yoquit-laxtlau ipampa intlaneltoc niman on xhebreos no ipampa intlaneltoc quin-maca cuenta ica intlajtlacolhuan yoquitlaxtlau. ³¹ ¿Yejhu in quijtosnequi ica ticahuaj quen xitlaj* quijtosnequi yejhua on tlanahuatijli? ¡Melauc, tej, ica ca! Yej ticipantlantiaj ica on tlanahuatijli hueyi quijtosnequi.

4

Abraham quipia itemaquixtilis itechcpa itlaneltoc

¹ ¿Tlinon, tej, tiquijtosquej ica Abraham yejhuan toachtojtaj? ² Tla Dios quimaca cuenta ica itlajtlacolhuan yoquitlaxtlau ipampa on tlajtlamach* yejhuan oquichiu, sa no Abraham huelisquia nohueyimatisquia ipampa on tlen cuajli oquichiu. Pero Abraham xitlaj† oquichiu para huelis nohuiyimatis ixpan Dios. ³ ¿Tlinon, tej, quijtohua on Yectlajcuilojli? On Yectlajcuilojli ijquin quijtohua: “Abraham oquineltocac Dios niman san yejhua ica on, Dios oquiselij quen se yejhuan yolmelajqui.” ⁴ Aman, tej, tla yacaj tequiti, quimacaj itlaxtlahuil niman on xsan quitlayocoliaj, yej quimacaj pampa quitlani ica on itequiu. ⁵ Pero xacaj hueli quitlani temaquixtilistli ican on tlen quichihua, pampa in temaquixtilistli se tetlayocolijli para tlajtlacolejquej. Yejhua ica se tlacatl ica oncaj quineltocas Dios para Dios quimaca cuenta ica itlajtlacolhuan yoquitlaxtlau. ⁶ No ijqui David quijtohua ica on tlacatl quipia hueyi tlatichihualistli yejhuan Dios quiselia quen yolmelajqui masqui xo-quichiu tlajtlamach tlen cuajli. ⁷ Ijquin oquijtoj David:

Tlatichihtin on yejhuan Dios yoquintlapojpolhuili nochí on tlen xcuacli oquichijquej niman quipopolohua intlajtlacol.

§ 3:24 su misericordia * 3:31 nada; coxtla * 4:2 cosas † 4:2 nada; coxtla

8 Sanoyej tlatiochiutli on tlacatl yejhuan aquin toTeco xquichihuilia cuenta itlajtlacolhuan.

9 ¿San on yejhuan hebreos quipiasquej in tlatiochihualistli? ¡Ca! On yejhuan xhebreos no quipiasquej in tlatiochihualistli. Otiquijtojquej san pampa Abraham oquineltocac, Dios oquiselij quen se yejhuan yolmelajqui. **10** Pero ¿quemanon ijcon oquiselij? ¿Ijcon oquiselij ijcuac ye quipia on nescayotl itoca circuncisión noso achtoj? Dios oquiselij Abraham quen yolmelajqui ijcuac xe quiseliaya on nescayotl. **11** Abraham saquin[‡] oquiselij on nescayotl. Niman icircuncisión yejhua señal noso sello ipampa itlaneltoc ica Dios oquiselij quen se yejhuan yolmelajqui. Pampa Dios oquiselij Abraham quen yolmelajqui ijcuac xe quinotlaliliaya icircuncisión, Abraham nochihua quen se tajtli para nochimej on yejhuan quineltocaj Dios, masqui xquipiaj circuncisión. Ijcon, tej, Dios quinselia quen on yejhuan yolmelajquej. **12** Abraham no quen se tajtli para on yejhuan quipiaj on nescayotl itoca circuncisión. Pero yejhua xintaj pampa quipiaj on nescayotl ipan inacayo, yej pampa yejhamej quipiaj intlaneltoc quen totataj Abraham oquipix ijcuac xe quinotlaliliaya circuncisión.

Itechcopia intlaneltoc quiseliaj on tlen Dios oquimrometerohuilij

13 Dios oquinmelajcaijlij Abraham ihuan ihuejcacone huan ica quiselisquej in tlalticpactli quen inherencia. Pero Dios xoquimelajcaijlij yejhua in pampa Abraham oquitlacamat on tlanahuatijli, yej pampa oquineltocac Dios niman yejhua ica Dios oquiselij quen se yejhuan yolmelajqui. **14** Tla Dios quinmacasquia herencia san pampa quitlacamatij on tlanahuatijli, tla ijcon xitlaj[§] ica tlapalehuisquia on tlaneltoctli, niman on tlen Dios oquimelajcaijlij quipolosquia ihueyilis. **15** Campa oncaj on tlanahuatijli niman xquitlacamatij, no oncaj castigo. Pero campa xoncaj on tlanahuatijli, no xoncaj on xtetlacamatilistli.

16 Yejhua ica Dios oquimrometerohuilij se herencia para quiselisquej tla quineltocasquej. On tlen Dios oquimelajcaijlij sa melajcaoncaj para nochimej ihuejcacone huan Abraham pampa yejhua quimpialia ican iteicnelilis*. Yejhua on tlen Dios oquinmelajcaijlij xsan para yejhamej on yejhuan on tlanahuatijli quintlacamatij, yej no para nochimej on yejhuan tlaneltocaj quen Abraham otlaneltocac. Yejhua quen totaj para tinochimej. **17** On, tej, Yectlajcuilojli ijquin quijtohua: “Onimitztlalij titajtli niman mohuejcacone huan nochayahuasquej ipan miyec países.” Ixpan Dios yejhuan Abrajam oquineltocac, Abraham yejhua tajtli. Dios sa no yejhua quinyolitia on mimiquej, niman yejhua san ican itlanahuatil quichihua para ma onyaj on yejhuan hasta aman xe oncaj.

18 Masqui nesiya ica in tlen Dios oquinmelajcaijlij xhuelisquia nochihuasquia, Abraham otlamachix niman otlaneltocac niman yejhua ica Dios oquitlalij tajtli yejhuan ihuejcacone huan onochayajquej ipan miyec países ijcon quen Dios yoquijlijca: “Mohuejcacone huan miyequej yesquej.” **19** Ijcuac Abraham oquixtlaloj itetzacalis† Sara niman ica sa no yejhua Abraham ye nisu para miquis pampa itlalnacayo ye quipiyaya canaj cien xipan, xoquipoloj itlaneltoc. **20** Yejhua, tej, xoometlamat nion oquipoloj itlaneltoc itech on tlen Dios oquimelajcaijlica. Yej itlaneltoc onoscaltij más cojtic niman oquihueyilij Dios. **21** Yejhua ican nochí iyojlo quimatzticatca ica Dios quipia poder para quichihuas nochí tlen oquimelajcaijlij. **22** Yejhua ica, tej, ipampa itlaneltoc, Dios oquiselij quen se yejhuan yolmelajqui.

‡ 4:11 después § 4:14 nada; coxtla * 4:16 su misericordia † 4:19 esterilidad

²³ On tlajtoltin yejhuan quijtohua ica Dios oquiselij quen se yejhuan yolme-lajqui, xonijcuiloj san para Abraham. ²⁴ Yej no onijcuiloj para tejhuamej yejhuan Dios no techselia quen on yejhuan tiyolmelajquej. Ijquin techselia pampa ticneltocaj yejhua aquin quiyolitij toTeco Jesucristo ijcuac omic, niman oquetzteu ipan itlalcon. ²⁵ San ipampa totlajtlacol, toTeco Jesús oquimictijquej. Niman quemaj yejhua oyoliu† san para Dios huelis tech-macas cuenta ica totlajtlacolhuan yoquitlaxtlau.

5

On yejhuan Dios quinmaca cuenta ica intlajtlacolhuan yoquintlaxtlau quip-iaj intlanca

¹ Aman, tej, ipampa totlaneltoc Dios techmaca cuenta ica totlajtlacolhuan yoquintlaxtlau. Yejhua ica ihuan yejhua ticpiaj yolsehuilistli itechcopa toTeco Jesucristo. ² Ipampa totlaneltoc Jesucristo yotechmacac iteicnelilis Dios niman aman timelajcanemij ipan iteicnelilis*. Niman totlamachalis techpactia ica Dios tinochimej techmacas hueyilistli. ³ Niman xsan yejhua ica on tipaquij, yej no tipaquij ijcuac tlamach ica tipajsoliuuj pampa tic-matztoquej ica on tlapajsoliuistli techpalehuiyaj para ticxicohuaj noch. ⁴ Niman ijcuac ticxicohuaj on tlajyohuilstli ixpan Dios, ticpactiaj. Niman ijcuac ijcon ticpactiaj Dios, ticchaj on tlen otechmelajcaijlij. ⁵ Niman ticmatij ica ticselisquej on tlen techmelajcaijlia pampa Dios yoquitemitij toyojlo ican itetlajsojtlalist†. Yejhua in oquichiu itechcopa on Espíritu Santo yejhuan otechmacac.

⁶ Ipan on tonajli yejhuan Dios oquitlapejpenij, ijcuac tejhuamej xotihuelquej otitomaquixtijquej, Cristo omic impampa on xcuajcualtin tlacamej.

⁷ Sanoyej ohuitjcij‡ para yacaj miquis ipampa se yolmelajqui tlacatl. Cas nemi se yejhuan quipia iyojlo para miquis ipampa on yejhuan semi sanoyej§ cuajli tlacatl. ⁸ Pero masqui oc* titlajtlacolejquej catcaj, Cristo topampa omic. Ijquin, tej, Dios otechtititij quen sanoyej techtlajsojtl. ⁹ Aman, tej, Dios techmaca cuenta ica totlajtlacolhuan yoquintlaxtlau pampa Cristo yotoyau iyesyo niman yomic topampa. Tla ijcon, tej, oncaj más tlinon ica Cristo techmanahuis itech itlahuel Dios. ¹⁰ Tla ijcuac tiitlahuelicnihuan catcaj Dios, yejhua otechmacac yolsehuilistli itechcopa imiquilis iConetzin, tla ijcon, tej, aman oncaj más tlinon ica huelis timaquisasquej itechcopa inemilis pampa otechmacac yolsehuilistli. ¹¹ Niman xsan yejhua in, yej no tipaquij itech Dios itechcopa toTeco Jesucristo. Ipampa on tlen oquichiu, ticpiaj yolsehuilistli ihuan Dios.

Pablo oquiteititij quen Adán niman Cristo sesetlamantic tlacamej

¹² Ipan in tlalticpactli on achtoj tlacatl otlajtlacoj niman ipampa on tlajtlacojli oncaj miquilistli. Niman aman nochimej miquisquej pampa nochimej tlajtlacohuaj. ¹³ Ijcuac xe oncatca itlanahuatil Moisés ye oncatca tlajtlacojli ipan in tlalticpactli, masqui Dios xoquintlajtlacolmacac on tlacamej ijcuac xe oncatca on tlanahuatijli. ¹⁴ Pero nochimej on tlacamej yejhuan onenquej desde Adán hasta Moisés omiquej masqui intlajtlacolhuan xijqui catca quen itlajtlacol Adán. Yejhua xoquitlacamat itlanahuatil Dios. Adam quixnescay-otiaya on yejhuan huajlasquia.

¹⁵ Itlajtlacol Adán xhuelis para notemachihuas ihuan itetlayocolil Dios yejhuan techmaca. Ijcon, tej, ipampa itlajtlacol Adán miyequej omiquej.

‡ 4:25 resucitó; oyol * 5:2 su misericordia † 5:5 amor ‡ 5:7 difícil § 5:7 muy * 5:8 todavía; sanquen

Pero on temaquixtilistli yejhuan Dios yotetlayocolij itechcopa Jesucristo, más sanoyej hueyi niman yej para ijcuajlilis miyec tlacatl. ¹⁶ On itlajtlacol Adán xhuelis para notemachihuas ihuan on temaquixtilistli yejhuan Dios techmaca. San ipampa se tlajtlacojli, tlajtlacolmacalistli oyejcoc. Pero on temaquixtilistli oyejcoc saquin[†] ijcuac yoquichijquej miyec on tlen tlajtlacojli, niman Dios otechmacac cuenta ica totlajtlacolhuan yoquitlaxtlau. ¹⁷ Ipampa itlajtlacol se tlacatl, nochí tlacatl ica oncaj miquis. Pero xijqui yes para on tlacamej yejhuan quiselisquej ihueyi teicnelilis[‡] Dios, niman Dios quimaca cuenta ica intlajtlacolhuan yoquintlaxtau. Yehuamej quipiasquej poder ipan inyencuicanemilis ipampa Jesucristo.

¹⁸ Niman ijcon quen Dios oquintlajtlacolmacac nochimej ipampa itlajtlacol Adán, no ijqui Dios quimaca cuenta ica intlajtlacolhuan yoquintlaxtlau niman quinmaca yencuic nemelistli nochí tlacatl ipampa imelajcatequiyo Jesucristo. ¹⁹ Ijcon quen miyequej onocuepquej tlajtlacolejquej san ipampa se tlacatl xoquitlacamat Dios, no ijqui Dios miyequej quinselis quen on yejhuan yolmelajquej pampa se tlacatl oquitlacamat Dios. ²⁰ On tlanahuatijli onijcuiloj para techititia quech tlajtlacojli ticpiaj. Niman ijcuac ticmatij ica ticpiaj sanoyej miyec tlajtlacojli, no ijqui ticmatij ica más hueyi iteicnelilis Dios. ²¹ Yehua ica, ijcon quen on tlajtlacojli oquipix poder para otemicij, iteicnelilis Dios no ijqui quipia poder para techmaca on nemelistli yejhuan para nochipa. Yehua in nochihua ipampa on yolmelajcalistli yejhuan ticselia itechcopa toTeco Jesucristo.

6

On tlajtlacojli xoc mechchihualtis nenquichihuasquej on tlin xcuajli

¹ ¿Tlinon, tej, tiquijtosquej? ¿Titlajtlacosquej más para Dios más techmaca iteicnelilis^{*}? ² ¡Melauc, tej, ica ca! On tlajtlacojli xhueli techtilana pampa tejhuamej yotimiquej itech tlajtlacojli para ma ca más titlajtlacosquej. Yehua ica, tej, tla yotimiquej, ¿quen ijqui huelis más titlajtlacojtasquej? ³ ¿Tlen xnenquimatij ica tinochimej yejhuan yotitocuatequijquej para ticteiti-tiaj ica titosentlaliaj ihuan Cristo Jesús, no yotitocuatequijquej para ticteiti-tiaj ica ihuan otimiquej? ⁴ Ijcuac otitocuatequijquej, otitoltalcoaquej ihuan Cristo niman timictoyaj ihuan para ijcon quen Cristo oyoliu[†] niman onoquet-zteu ipan itlalcon ican ihueyilis toTajzin, tejhuamej no ma tinemican ican on yencuic nemelistli.

⁵ Tla otitosentlalijquej ihuan Cristo ipan imiquilis, tla ijcon, tej, on no melahuac ica ihuan tiyolisquej niman titoquetztehuasquej. ⁶ Ticmatztoquej ica on tonemilis yejhuan oticpixquej ijcuac xe ticneltocayaj Cristo, onomaj-masohualtiquej[‡] ipan cojnepanojli[§] ihuan Cristo para ipoder on tlajtlacojli yejhuan ipan tonemilis oncatca oxoxoton, niman ijcon on tlajtlacojli ipan tonemilis xoc techpia tlanamactin. ⁷ Xoc techpia tlanamactin, pampa ijcuac se miqui, nomanahuiya de ipoder on tlajtlacojli. ⁸ Tla tejhuamej yotimiquej ihuan Cristo, ticneltocaj ica no tinemisquej yejhua ihuan. ⁹ Ijquin ticneltocaj pampa ticmatztoquej ica Cristo oyoliu niman onoquetzteu ipan itlalcon niman yejhua ica xoqueman ocsejpa miquis. On yej, miquilistli xoc quipias. ¹⁰ Cristo, tej, san sejpa omic para yeyica oquipopoloj tlajtlacojli, pero ijcuac oyoliu, oyoliu para quichihua on tlen Dios quinequi. ¹¹ Nemejhuamej, tej,

[†] 5:16 después [‡] 5:17 misericordia ^{*} 6:1 su misericordia [†] 6:4 resucitó; oyol [‡] 6:6 fueron crucificados; onopiloquej [§] 6:6 cruz

xmatican ica on tlajtlacojli xhueli mechtilana pampa nemejhuamej yonenmiquej ihuan Cristo. Niman no xmomatican ica nennemij ihuan Jesucristo para Dios mechtequitiltia.

¹² Yejhua ica, tej, ma ca sa xcahuilican ma mechtilana on tlajtlacojli ipan nemotlalnacayo para nenquitlacamatisquej on xcuajcualtin elehuilistin*.

¹³ Ma ca xcahuilican on tlajtlacojli ma quitequitilti nion se parte nemotlalnacayo para ma quichihua on tlen xcuajli. Yej xcahuilican ma Dios mechtequitilti quen on tlacamej yejhuan omiquej pero ocsejpa oyolihuiquej niman onoquetztejquej ipan intlalcon. Xtemacakan, tej, cada parte nemotlalnacayo itech Dios para ma quichihua on tlen cuajli. ¹⁴ On tlajtlacojli xhuelis mechchihualtis nenquichihuasquej on tlen xcuajli, xpampa on tlanahuatijli mechyecana, yej mechyecana iteicnelilis† Dios.

Aman xoc tinemij tlanamactin itech on tlen xcuajli

¹⁵ ¿Tlinon, tej, ticchihuasquej? ¿Más titlajtlacosquej pampa on tlanahuatijli xejhua techyecana yej techyecana iteicnelilis Dios? ¡Melauc, tej, ica ca!

¹⁶ Nemejhuamej cuajli nenquimatztoquej ica tla nemotemacaj quen tlanamactin itech se teteco‡ para nenquitlacamatisquej, nemejhuamej nentlanamactin yesquej itech on yejhuan nenquitlacamatisquej. Ijcon, tej, ijcuac nenquitlacamatij on tlajtlacojli, yejhua nochihua quen nemoteco niman mechajcilia on miquilistli. Noso tla nenquitlacamatisquej Dios, yejhua nochihua quen nemoteco niman ijcon nenyolmelajcanemisquej. ¹⁷ Pero tlaxtlahui Dios ica masqui nemejhuamej nentlanamactin catcaj itech on tlajtlacojli, aman ican nochinemoyojo nenquitlacamatztoquej on itemachtil Dios yejhuan yonenquiselijquej. ¹⁸ Dios omechmanahuij itech on tlajtlacojli yejhuan nemoteco catcaj, niman aman onemochijquej tlanamactin itech on yolmelajquillistli. ¹⁹ Nemechtlajcuilhuiya ica in quen in ejemplos de tlanamactin pampa xhueli cuajli nencajsicamatij in tlajtlamach§. Aman, tej, ijcon quen achtoj onenquitemacaquej nemotlalnacayo quen tlanamactin ipan on tlen xchipahuac niman ipan on tlen xcuajli para nenquichihuayaj on tlajtlacojli, no ijqui aman xtemacakan nemotlalnacayo quen tlanamactin ipan on yolmelajquillistli para nemonemilis cuajli yejyejtias itech Dios.

²⁰ Ijcuac nemejhuamej oc* nentlanamactin catcaj ipan on tlajtlacojli, xnenemiyaj ipan on yolmelajquillistli. ²¹ ¿Tlinon, tej, ica mechpalehuij ica onenquichijquej on tlajtlacoltin yejhuan aman nenquipinahuismatij? On tlajtlacoltin san quitemacaj miquilistli. ²² Pero aman xoc nentlanamactin ipan on tlajtlacojli, yej nentlanamactin itech Dios. Yejhua ica nemonemilis cuajli yejyejtias itech Dios niman ijcon, tej, no nенquiselijaj on nemilistli yejhuan para nochipa. ²³ On tlajtlacojli quitemaca tlaxtlahuijli ican miquilistli, pero Dios quitemaca tetlayocolijli ican nemilistli yejhuan para nochipa. Niman on nemilistli ticseliaj itechcopa Cristo Jesús toTeco.

7

Ipan on namictilistli quixtiaj se ejemplo

¹ Nocniuhan, nemechtlajcuilhuiya nemejhuamej yejhuan nenquixmatij on tlanahuatijli. Nemejhuamej ye nenquimatztoquej ica on tlanahuatijli san hueli quimandarohua yacaj chica yejhua yolticaj. ² In se ejemplo. Ijcuac se nonamictia, on tlanahuatijli quinahuatia on sihuatl para ma nosentlalijtia ihuan ihuehuentzin hasta queman miqui. Pero tla yomic ihuehuentzin, on

* **6:12** deseos, pasiones † **6:14** su misericordia ‡ **6:16** amo o dueño § **6:19** cosas * **6:20** todavía; sanquen

tlanahuatijli xoc hueli quinahuatia ihuan ma nemi. ³ Yehua ica, tej, tla on sihuatl nosentlalia ihuan ocse tlacatl chica ihuehuentzin nemi, yejhua nochihua tlacapajpatlaquetl. Pero tla ihuehuentzin miqui, on tlanahuatijli yejhuan quinahuatia on sihuatl xoc hueli quinahuatia, niman masqui yejhua nonamictis ihuan ocse tlacatl, xnochihua tlacapajpatlaquetl.

⁴ No ijqui nocnihuan, nemejhuamej yonenmiquej itech on tlanahuatijli pampa yonenmiquej ihuan Cristo. Niman aman nennemij san secan ihuan Cristo yejhuan oyoliu* niman onoquetzteu ipan itlalcon. Yejhua in onochiu para tictequichihuaj Dios. ⁵ Ijcuac xe timiquiyaj ihuan Cristo, titlajtlacohuayaj quen toyoljo quinequiya. Niman ijcuac oticmatquej tlen oquijtoj on tlanahuatijli, toyoljo más quinequiya tlajtlacos, niman yejhua in otecha-jcuijli on miquilistli. ⁶ Pero itech on tlanahuatijli yejhuan techyecanaya ican itequihuajyo, aman yotimiquej. Yejhua ica aman tihuelij tictequichihuaj Dios ica on yencuic nemilistli yejhuan techmaca on Espíritu Santo niman xejhua ica on tlanahuatijli isoltic.

On tlanahuatijli ocsetlamantic xquen on tlajtlacojli

⁷ Tla ijcon, ¿tlinon, tej, tiquijtosquej? ¿Tiquijtosquej ica on tlanahuatijli xcuajli? ¡Melauc, tej, ica ca! Yej ocse tlamantic. Nejhua xnicmatisquia catlehua on tlajtlacojli tla on tlanahuatijli xnechititisquia. In se ejemplo. Nejhua xnicmatisquia tlinon quijtosnequi niquelehuis on tlen teyaxca† tla on tlanahuatijli xquijtosquia: “Ma ca xquelehui on tlen teyaxca.” ⁸ Itechcopa in tlanahuatijli on tlajtlacojli onechyolchicau para niquelehuis miyec tlajtlamach‡ yejhuan teyaxca. Tla xonyasquia on tlanahuatijli, xqueman nicmatisquia on tlajtlacojli. ⁹ Ijcuac niconetl catca, xonicmat tlinon oquijtoj on tlanahuatijli. Ninemiya xican on tlanahuatijli. Pero ijcuac cuajli onicajsicamat on tlanahuatijli, onicmat ica on tlen onicchiu tlajtlacojli, niman ica yonimic ixpan Dios. ¹⁰ Ijcon, tej, on tlanahuatijli yejhuan quitocarohuaya nechmacas nemilistli, yej onechtajtlacolmacac para nimquis. ¹¹ On tlajtlacojli oquitequitiltij on tlanahuatijli para ica onechcajcayau niman ica onechmictij.

¹² Tiquitaj, tej, ica noch i on tlanahuatiltin chipajquej niman cada se tlanahuatijli chipahuac, niman yejhua melajqui niman cuajli. ¹³ ¿Yehua in quijtosnequi ica on tlen cuajli yejhua yonechmictij? ¡Melauc, tej, ica ca! Itechcopa on tlanahuatijli yejhuan cuajli, on tlajtlacojli onechmacac miquilistli para quipanextia ica melahuac yejhua tlajtlacojli. Yejhua ica itechcopa on tlanahuatijli oquiteititij ica on tlajtlacojli sanoyej§ xcuajli.

On tlacamej quipiaj ome elehuilistli

¹⁴ Ticmatztoquej ica on tlanahuatijli cuajli niman quisa itech on Espíritu Santo. Pero nejhua ican notlalnacayo xnicuajli niman ninemi tlanamatli itech on tlajtlacojli. ¹⁵ Nejhua xnicajsicamatli tlinon nicchihua. Tej, xnihue li nicchihua on tlen cuajli nicnequi, yej nicchihua on tlen xnicuelita. ¹⁶ Niman ijcuac nicchihua on tlen xnicnequi, notlamachilis nechmachiltia ica on tlanahuatijli melahuac cuajli. ¹⁷ Tla ijcon, tej, xoc nejhua nicchihua on tlen xnicnequi, yej yejhua on tlajtlacojli yejhuan nicpia yejhua nechchihual-tia. ¹⁸ Nejhua, tej, nicmati ica ipan notlalnacayo xitlaj* oncaj tlen cuajli, pampa masqui sanoyej nicnequi nicchihuas on tlen cuajli, xhueli nicchihua. ¹⁹ Xnicchihua on tlen cuajli yejhuan nicnequi, yej oc† niconchijtiu on tlen xcuajli yejhuan xnicnequi. ²⁰ Ijcon, tej, tla nicchihua on tlen xnicnequi

* ^{7:4} resucitó; oyol † ^{7:7} le pertenece; teaxca, tehuaxca, tetlatqui ‡ ^{7:8} cosas § ^{7:13} muy
* ^{7:18} nada; coxtla † ^{7:19} todavía; sanquen

nicchihuas, xoc nejhua ijcon nicchihua, yej on tlajtlacojli yejhuan nicpia nechchihualtia. ²¹ Ijquin, tej, nopal nochihua. Ijcuac nicnequi nicchihuas on tlen cuajli, xnihueli pampa on tlajtlacojli oncaj ipan notlalnacayo. ²² Ipan noyojlo nicuelita itlanahuatil Dios. ²³ Pero ipan notlalnacayo nicmati ica oncaj yejhua in ocse tlanahuatijli yejhuan no quinequi nechnahuatis. Yejhua in tlanahuatijli de tlajtlacojli quitlahuelixnamiqui on itlanahuatil Dios yejhuan noyojlo cuelita. Yejhua in tlanahuatijli de tlajtlacojli yejhuan oncaj ipan notlalnacayo, nechpia quen nitzacuticaj. ²⁴⁻²⁵ Yejhua ica, tej, ican noyojlo nicnequi nictlacamat on itlanahuatil Dios, pero ican notlalnacayo nictlacamat on tlanahuatijli de tlajtlacojli.

¡Lástima de nejhua! ¿Aquinon, tej, nechmaquixtis itech notlalnacayo yejhuan nechhuica ipan miquilistli? Nicmaca tlaxtlahujli Dios ica san itechcopia toTeco Jesucristo hueli nechmaquixtia.

8

On nemilistli oncaj ipan iEspíritu Dios

¹ Aman, tej, Dios xoc quintlajtlacolmaca on yejhuan nemij san secan ihuan Cristo Jesús, yejhuan nohuicaj quen on Espíritu Santo quinequi niman xquen intlalnacayo quinequi. ² Itechcopia Jesucristo on tlanahuatijli yejhuan quisa itech on Espíritu Santo yonechmanahuij itech on tlanahuatijli de tlajtlacojli. On tlanahuatijli de tlajtlacojli nechhuicaya ipan miquilistli, pero aman on Espíritu Santo nechhuica ipan nemilistli. ³ Itlanahuatil Moisés oquipoloj itequihuajyo pampa totlalnacayo xohuel oquitlacamat. Yejhua ica on tlen on tlanahuatijli xohuel oquichiu, Dios oquichiu ijcuac ocuajtitlan iConetzin yejhuan onochiu Tlacatl ican intlalnacayo quen totlalnacayo, tejhuamej yejhuan titlajtlacolejquej. Dios ocuajtitlan quen itlaj huentli para quipopolos tlajtlacojli. Ijcon, tej, oquioxotonij ipoder on tlajtlacojli ⁴ para tejhuamej yejhuan titohuicaj quen on Espíritu Santo techyacana, niman xquen totlalnacayo quinequi, tihuelij ticchihuaj on tlajtlamach* yejhuan tlanahuatia on tlanahuatijli.

⁵ On yejhuan nohuicaj quen intlalnacayo quinequi sa ontlamatztoquej ipan on tlajtlamach yejhuan intlalnacayo quinequi, pero on yejhuan nohuicaj quen on Espíritu Santo quinequi sa ontlamatztoquej ipan on tlajtlamach yejhuan on Espíritu Santo quinequi. ⁶ Tla ticomatzticaj on tlajtlamach yejhuan motlalnacayo quinequi, sa no yejhua mitzmictis, pero tla ticomatzticaj on tlajtlamach yejhuan on Espíritu Santo quinequi, sa no yejhua mitzmacas nemilistli niman yolsehuilistli. ⁷ On yejhuan ontlamatztoquej ipan on tlajtlamach yejhuan intlalnacayo quinequi, tlahuelicniutin nemij ihuan Dios pampa nion xquinequij quitlacamatisquej itlanahuatil, nion xhuelij quitlacamatij. ⁸ Yejhua ica, tej, on yejhuan nohuicaj quen intlalnacayo quinequi xhueli quipactiaj Dios.

⁹ Pero tla nenquipiaj on iEspíritu Dios ipan nemoyojlo, tla ijcon xnemohuicaj quen nemotlalnacayo quinequi, yej nemohuicaj quen on Espíritu quinequi. Niman tla yacaj xquipia iEspíritu Cristo, yejhua xteyaxca† itech Cristo. ¹⁰ Pero tla Cristo yonenquiselijquej, nemoalma quipia nemilistli pampa Dios mechselia quen on yejhuan yolmelajquej, masqui nemotlalnacayo yomic ipampa on tlajtlacojli. ¹¹ Niman tla nenquipiaj iEspíritu Dios on yejhuan oquiyolitij Jesús niman oquiquetzteu ipan itlalcon, no quimacas

* ^{8:4} cosas † ^{8:9} no le pertenece; xteaxca, xtehuaxca, xtetlatqui

yejhua yencuic nemilistli nemomicatlalnacayo itechcopa iEspíritu yejhuan nenquipiaj.

¹² Ijcon, tej, nocnihuan, nonequi titohuicasquej quen on Espíritu Santo quinequi, niman xquen totlalnacayo quinequi ¹³ pampa tla nemejhuamej nemohuicaj quen nemotlalnacayo quinequi, nemoalma miquis. Pero nemoalma quipias nemilistli tla itechcopa on Espíritu Santo nenquipopolohuaj on tlajtlacojli yejhuan nenquichihuaj. ¹⁴ Nochimej yejhuan quinyecana on Espíritu Santo, tecone huan itech Dios. ¹⁵ On Espíritu Santo yejhuan onenquiselijquej xmechhuica para nentlanamactin yesquej ocsejpa itech nemojtilistli, yej quichihua para nentecone huan itech Dios. Yejhua ica tiquijtohuaj: “ToTajzin.” ¹⁶ On Espíritu Santo niman toyolotchijlia ica tiicone huan Dios. ¹⁷ Niman tla titecone huan itech Dios, ticselisquej on herencia yejhuan otechmelajcailij. In herencia ticselisquej ihuan Cristo tla ihuan titlajyohuiyaj para más saquin[‡] ticselisquej on hueyilistli yejhua ihuan.

¹⁸ Aman cuajli, nejhua niquta ica on tlen aman tiquijyohuiyaj xitlaj[§] quijtosnequi tla tiquixtlalosquej ihuan on hueyilistli yejhuan saquin ticselisquej.

¹⁹ Nochi on tlen oncaj, on tlen Dios oquichijchiu, quichixtoquej niman sanoyej* quinequisquiaj ma yecotetzi on tonajli ijcuac Dios quimpanextis on yejhuan iconehuan. ²⁰ Nochi tlen Dios oquichijchiu oijtlacau. Pero ijcon onochiu xpampa on tlajtlamach ijqui oquinequej, yej pampa Dios ijqui yotlatlajtlalijca. Pero masqui ijqui onochiu, oc[†] oncatca yejhua on tlamachalistli[‡] ²¹ ica onyas se tonajli ijcuac nochi tlen oncaj ipan in tlapticactli xoc ijtlacahuis. Nochi tlajtlamach nomanahuis ijcon quen iconehuan Dios no nomanahuisquej. ²² Ticmatztoquej ica hasta aman nochi tlen Dios oquichijchiu nococohua niman chocha quen se sihuatl ijcuac quitlacatilia se conetzintli. ²³ Niman xsan yejhua on tlen Dios oquichijchiu tlajyohuiya, yej tejhuamej no yejhuan ye ticpiaj on Espíritu Santo quen achtoj parte de nochi on tlen Dios techtlayocolis. Tejhuamej no sanoyej titlajyohuiyaj chica ticchixtoquej ma yejcotetzi on tonajli ijcuac Dios techselis para tiicone huan ijcuac ipan totlalnacayo xoc itlaj techpajsolos. ²⁴ Yotimaquisquej pampa ticpiaj yejhua on tlamachalistli. Pero tla on tlen ticmachayaj yonochiu, tla ijcon xoc itlaj ticmacha quej pampa on tlen ticmachayaj yonochiu. ²⁵ Pero tla on tlen ticmachaj oc xnochihua, tla ijcon ticchaj ican ijyohuilistli.

²⁶ No ijqui, tej, on iEspíritu Dios techpalehuiya ica on tlen xtihuelij, pampa tejhuamej xhueli ticchihuaj oración quen nonequi. Pero sa no yejhua on Espíritu Santo quitlajtlanilia Dios topampa ican chochocalistli yejhuan xacaj hueli quijtohua ican tlajtojli tlinon quijtosnequi. ²⁷ Niman Dios, yejhuan techyolixmati, quimati tlinon quijtosnequi on Espíritu, pampa on Espíritu quitlajtlanilia quen Dios quinequi impampa on yejhuan iyaxcahuau.

Itechcopa Cristo titetlanquej

²⁸ Ticmatztoquej ica Dios quitequitiltia para cuajli, nochi on tlajtlamach yejhuan impan nochihua on yejhuan quitlajsojtaj[§], on yejhuan oquintlapejpenij para quichihuaj on tlen quinequi. ²⁹ Dios quimatiya aquinomej quineltocasquej Cristo. Yejhuatej oquintlalij para nemisquej quen Cristo on iConetzin para yejhua yacatzias intzajlan miyequej icnihuan. ³⁰ Ijcon, tej, Dios oquinnotz on yejhuan oquintlalij para nemij quen iConeu. Xsan oquinnotz, yej quinmaca cuenta ica intlajtlacolhuan yoquitlaxtlau, niman

[‡] 8:17 después [§] 8:18 nada; coxtla * 8:19 mucho † 8:20 todavía; sanquen [‡] 8:20 esperanza [§] 8:28 le ama

on yejhuan oquinmacac cuenta ica intlajtlacolhuan yoquitlaxtlau no oquinmacac hueylistli.

³¹ Yejhua ica, tej, ¿tlinon huelis tiquijtosquej? Tla Dios quipia iyojlo para techpalehuis, ¿aquinon huelis techyacatzacuilis? ³² Dios, hasta iConetzin xoquinene* para topampa oquitemacac, yej topampa oquitlalij iConetzin quen huentli para omic. Niman tla yejhua ijcon oquichiu, ¿hasta quen ijqui, tej, no ihuan iConeu xtechmacas nochi on ocsequi tlatiochihualistin? ³³ Xacaj huelis quinteixpanhuis on yejhuan Dios yoquintlapejpenij pampa Dios yoquijtoj ica intlajtlacolhuan yoquitlaxtlau. ³⁴ ¿Aquinon, tej, huelis quintlajtlacolmacas? Xacaj hueli pampa Cristo yejhuan omic niman ocsejpa oyoliu† nemí ne iyecmacopa Dios campa topampa tlajtojticaj. ³⁵ Xitlaj huelis techxelos itech itetlajsojtlalis Cristo. ¿Tlen huelis quichihuas on tlen teajman, noso on tlen teyolcocoj, noso on tlahuejli niman tlajyohuilstli, noso apistli, noso tla polihui on tlaquentli, noso peligro, noso miquilistli? ¡Ca! Xitlaj huelis techxelos itech itetlajsojtlalis Cristo. ³⁶ Ijquin, tej, quijtohua in Yectlajcuilojli: Oh Dios, san mopampa nochipa on tlacamej techmictisnequij. Techmatij quen itlaj borreguitos yejhuan quinmictiaj.

³⁷ Pero ipan nochí yejhua in, ticmatztoquej ica titetlanij nochipa itechcopa Cristo yejhuan otechtajsojtlac.

³⁸ Cuajli nicmatzticaj ica xoncaj on tlen huelis techxelos itech itetlajsojtlalis Dios. On miquilistli, noso on nemilistli xhuelisquej. Niman yejhua on ilhuicactequitquej‡ noso on ajacamej yejhuan tequihuajquej, niman nochí on ocsequimej ajacamej no xhuelisquej. No xhuelisquej, tej, techxelosquej itech itetlajsojtlalis Dios on tlen aman nochihua noso on tlen ocse tonajli nochihuas.

³⁹ No xhuelis, tej, quichihuas on tlen oncaj ne ilhuicac noso ipan tlalticpactli. No, nion se de nochí on tlajtlamach yejhuan Dios oquinchijchiu xhuelis techxelos itech on itetlajsojtlalis Dios yejhuan otechmacac itechcopa toTecotzin Cristo Jesú.

9

Dios oquintlapejpenij on yejhuan hebreos

¹ Niquijtojticaj on tlen melahuac quen tlaneltocaquetl itech Cristo. Xnislacati. Notlamachilis quiyecana on Espíritu Santo niman ijcon notlamachilis nechmachiltia ica niquijtohua on tlen melahuac. ² Nicpia sanoyej* hueyi ajmantli niman nochipa ninoyolcocojticaj. ³ Niman sa no nejhua nicnequisquia nicpolosia notemaquixtilis tla yejhua ica huelisquia quinmacasquia temaquixtilistli on yejhuan hebreos quen nejhua. ⁴ Yejhuatej hualejtoquej itech Israel, niman Dios oquinselij quen iconehuan. Intzajlan onen Dios ican ihueyilis, niman oquinmacac on pactos niman itlanahuatilhuan. Yejhuatej quipiaj on tlanahuatijli yejhuan quintitia quen ijqui nonequi quimahuistilisquej Dios niman no oquiselijquej on tlen Dios oquinmelajcailij. ⁵ Yejhuatej hualejtoquej intech on toachtojtajhuan. Niman Cristo ican itlalnacayo no hualejticaj intech on toachtojtajhuan. Yejhua, tej, Dios yejhuan nochí quinahuatia. Ma yejhua quiseli yectenehualistli para nochipa. Ma ijqui nochihua.

⁶ Dios oquijtoj ica quinmaquixtis iconehuan. Niman tla on hebreos xnochimej quipiaj temaquixtilistli, xquijtosnequi ica Dios xotenquis on tlen oquijtoj. Yej cuajli xmatican ica xnochimej yejhuan hualejtoquej itech Israel

* 8:32 no negó † 8:34 resucitó; oyol ‡ 8:38 ángeles: Angeles tequitij ne ilhuicac niman nican ipan in tlalticpactli. * 9:2 muy

Dios quimpohua quen ihuejcacone huan. ⁷ No ijqui, tej, xnochimej yejhuan hualejtoquej itech Abraham nopo hua j quen ihuejcajcone huan, pampa Dios ijquin oquijlijca Abraham: “Nopo hua j mohuejcajcone huan san itech Isaac.” ⁸ Ijcon, tej, tiquitaj ica xnochimej ihuejcajcone huan Abraham tecone huan itech Dios, pero san on cocone j yejhuan tlacatij ipampa on tlen Dios otemelajcailij nopo hua j quen melahuac hualejtoquej itech Abraham. ⁹ On tlen Dios oquimelajcailij Abraham sa no yejhua in: “Ijcuac yejcos on cuajli tonajli, nihuajlas, niman Sara quitlacatilis se conetzintli.”

¹⁰ Niman yejhua in xica noch i. On cohauatzitzintint iconehuan Rebeca san se tajtli qui piaya j yejhuan toachtojtajta itoca Isaac. ¹¹⁻¹³ Ijcuac on icniutin xe tlacatiyaj niman masqui xe quichihuayaj tlen cuajli noso tlen xcuajli, Dios ijquin oquijlij Rebeca: “On yejhuan achtoj nemis, tequichijquetl yes itech on yejhuan saquin[†] nemis.” Yejhua on tlajtojli cuajli ihuan nohuica on Yectlajcuilojli yejhuan quijtohua: “Jacob on ictlajsojtlac[§], pero Esaú on ictlahuelitac.” Ijcon, tej, Dios oquipanextij ica quinamiqui quitlapejpenis on yejhuan yejhua quinequis. Yejhua ica tiquitaj ica Dios xoquichihuili j cuenta tlen yejhamej oquichijquej, yej oquinotz on yejhuan oquinec quinotzas.

¹⁴ ¿Tlinon, tej, tiquijtosquej? ¿Tiquijtosquej ica Dios xyolmelajqui? ¡Melahuac, tej, ica ca! ¹⁵ Dios oquijlij Moisés: “Ni quicnelis on yejhuan nicnequis ni quicnelis, niman nictlajsojtlas on yejhuan nicnequis nictlajsojtlas.” ¹⁶ Yejhua ica, tej, itetlajsojtlalis Dios xnoselia pampa se ijqui quinequi noso pampa se itlaj quichihua, yej noselia ipampa iteicnelilis* Dios. ¹⁷ Ipan in Yectlajcuilojli Dios ijquin oquijlij on rey de Egipto: “Nejhua on imitztlalij tirrey, san para nihuelis nicpantlantis nopo der itechcopa on milagros yejhuan mopan nicchihuas. Niman ijquin nochimej quimatisquej aquin nejhua imanyan noch i in tlalticpactli.” ¹⁸ Tla ijcon, tej, Dios quicnelia on yejhuan quinequi quicnelis niman, quiyoltechicahua on yejhuan quinequi quiyoltechicahua.

¹⁹ Pero yacaj huelis ijquin nechijlis: “Tla ijcon, ¿tlica[†] quitlajtlacoltia Dios on tlacatl? Xacaj huelis quixnamiquis on tlen Dios quinequi quichihuas. ²⁰ Pero tejhamej yejhuan san tlacamej, ¿aquin tejhamej para ihuan Dios timocamatlanisquej? ¿Huelis on contli yejhuan tlachijchiutli ican soquitl quijlis on yejhuan oquichijchiu, “¿Tlica ijquin otinechchijchiu?” ²¹ On tlacatl yejhuan quichijchiu on contli yejhua quitocarohua quijtos tlinon quichijchiu on soquitl. Sa no ica on soquitl yejhua quitlapejnenia para quichijchiu se contli yejhuan ipan camanaj xochitl niman ocse para ipan tlasioltemalo.

²² Para Dios quiteititis itlahuel niman ipoder, yejhua oquimijyohuili jca on yejhuan quintocarohuaya quiselisquej icastigo. ²³ Ijquin oquichiu para oquiteititi j quen sanoyej hueyi on ihueyilis yejhuan otechmacac tejhamej yejhuan otechicnelij. Ijcon otechmacac tejhamej yejhuan otechachtojtlalij para ticselisquej on hueyilistli. ²⁴ Yejhua ica Dios otechnotz. Sequimej tejhamej tiquistoquej intzajlan on hebreos niman sequimej intzajlan on yejhuan xhebreos. ²⁵ Ijquin quijtohua ipan on tlajcuilolamatl itoca Oseas: On tlacamej yejhuan xnoyaxcahuan[‡] catcaj niquinnoyaxcatis. Niman on yejhuan xniquntlajsojtlaya niquntlajsojtlas.

²⁶ Niman sa no ompa campa oquimijlijcaj: “Nemejhamej xnennoyaxcahuan”, ompa quimijlisquej ica yejhamej tecone huan itech Dios yejhuan nochipa nemi.

† 9:10 gemelos ‡ 9:11-13 después § 9:11-13 le amé * 9:16 su misericordia † 9:19 ¿por qué?; ¿tline? ‡ 9:25 no me pertenecen; toaxcahuan, tohuaxcahuan, totlatquihuán

²⁷ Pero inca on hebreos ijquin oquijtoj Isaías:

“Masqui on yejhuan hualejtoquej itech on tajtli Israel sanoyej miyequej quen
itlaj xajli yejhuan oncaj ijtic mar, san quesquimej maquisasquej,

²⁸ pampa toTeco san isijcapan quincastigaros.”

²⁹ No ijqui, tej, ye huejcahui oquijtoj Isaías:

Tla toTeco yejhuan quinyecana on isoldados ne ilhuicac xquincahuilisquia
on toachtojtahuan quipiasquiaj inhuejcajcone huan, titocahuasquiaj
quen on chanejquej ne huejhueyican Sodoma niman Gomorrra.

On hebreos xquiseliaj on cuajli tlajtojli de temaquixtilistli

³⁰ ¿Quen ijqui, tej, tiquijtosquej? Tiquijtosquej ica aman Dios quinselia
on yejhuan xhebreos itechcopia on intlaneltoc quen on yejhuan yolmela-
jquej, masqui nion siquiera quitejtemohuayaj quen ijqui Dios quinselis
quen on yejhuan yolmelajquej. ³¹ On hebreos quitejtemohuayaj itechcopia
on tlanahuatijli quen ijqui Dios quinselis quen on yejhuan yolmelajquej,
pero yejhamej xoquitlacamatquej nochí on tlen on tlanahuatijli tlanahu-
atia. ³² ¿Tlica xoquinextijquej? Xoquinextijquej pampa xoquitejtemojquej
itechcopia on tlaneltoctli, yej oquitejtemojquej itechcopia on tetlacamatilistli
yejhuan oquipialijquej on tlanahutijli. Yejhua ica onant quisquej pampa
Cristo quen itlaj tetl yejhuan tetlajtlacali. ³³ Ijquin tlajcuilo nesticaj ipan in
Yectlajcuilo jli:

Xquita, ne campa itoca Sión nictalia se tlacatl quen itlaj tetl yejhuan ica
nant quisalo niman quen itlaj tepetlatl yejhuan tetlajcali. Pero on
yejhuan quineltocas xqueman quipinahuismatis.

10

¹ Nocnihuan, ican nochí noyojlo nicnequi niman nicchihua oración ica
on hebreos ma quipiacan temaquixtilistli. ² Nejhua impan nitlajtohua ica
yejhamej sanoyej* notlajcalij itech Dios pero yejhamej xe ixtlajtlapo-
huij. Yejhamej xcajisicamatij quen ijqui cuajli nohuicasquej itech Dios.
³ Yejhamej xquimatiq quen ijqui Dios quinselia on tlacamej quen on yejhuan
yolmelajquej, yej quichihuaj tlen yejhamej quinemiliaj quimpalehuis para
Dios ma quinseli. Yejhua ica xoquiselijquej on ojtlí yejhuan Dios oquitlalij
para quinolmelahuasquia. ⁴ Cristo yejhua oquichiu nochí on tlen itlanahu-
atil Moisés tlanahuatia niman ijcon oquichiu para nochimej on yejhuan
quineltocaj ma quinseli Dios quen on yejhuan yolmelajquej.

⁵ Moisés oquijcuiloj ica on tlacamej yejhuan quinequij Dios ma quinseli
quen yolmelajquej pampa quitlacamatij on tlanahuatijli. Ijquin oquijcuiloj:
“On yejhuan itechcopia on tlanahuatijli quinequis quipias nemilistli ica oncaj
quichihuas nochí on tlen tlanahuatia.” ⁶ Pero nijtohua quen ijqui Dios huelis
quinselis on tlacamej quen yolmelajquej itechcopia on intlaneltoc yejhuan
quipiaj itech Cristo. Ijquin nijtohua: “Ma ca mojicopa xquijto: ¿aquinon
tlejcos ne ilhuicac?” In quijtosnequi ica tlejcos para cuajtemoltis Cristo.

⁷ Niman no ma ca xquijto: ¿Aquinon ontemos ijtic in tlajli campa nemij on
mimiquej? In quijtosnequi ontemos para quixtis Cristo intzajlan on mim-
iquej. ⁸ ¿Tlinon, tej, más nijtohua? “Itlajtol Dios nisu motech oncaj. Ticpia
ipan mocamac niman ipan moyojo.” Niman in tlajtojli sa no yejhua on
tlajtojli yejhuan tiquimijliaj on tlacamej ica ijquin nonequi quineltocasquej.

⁹ Ticteijliaj: “Tla ican mocamac tiquijtos ica Jesús yejhua moTeco, niman
tla ipan moyojo ticneltocas ica Dios oquiyolihuitij† niman oquetzteu ipan
itlalcon, timaquisas.” ¹⁰ Ijcon nochihuas pampa ijcuac se tlacatl ican iyojo

* **10:2** mucho † **10:9** lo resucitó; oquiyoltij

tlaneltoca, Dios quijtohua ica itlajtlacolhuan yoquitlaxtlau. Niman ijcuac ica icamac teixpan quijtohua ica quineltoca Cristo, yejhua maquisas.

¹¹ In Yectlajcuilojli ijquin quijtohua: “Nochi on yejhuan quineltoca, xqueman quipinahuismatis ipampa itlaneltoc.” ¹² Ixpan Dios, on yejhuan xhebreos xsejsetlamatiquej[‡] inhuan on hebreos. San se inTeco quipiaj niman yejhua san nochijquej quinmaca miyec tlatichihualistli intech on yejhuan quitlajtlaniliaj temaquixtilistli. ¹³ Ijquin quijtohua on Yectlajcuilojli: “Nochimej yejhuan quitlajtlaniliaj toTeco para ma quintlapojpolhui maquisasquej.” ¹⁴ Pero ¿quen ijqui, tej, huelis quitlajtlanilisquej ma quintlapojpolhui tla xe quineltocaj? ¿Niman quen ijqui, tej, huelis quineltocasquej tla xqueman caquij itech ica yejhua? ¿Niman quen ijqui, tej, huelis caquisquej itech ica yejhua tla xnemij yejhuan quiteijlisquej? ¹⁵ ¿Niman quen ijqui quiteijlisquej itech ica yejhua tla xnemi yejhuan commintitlanis? In Yectlajcuilojli ijquin quijtohua: “Sanoyej cualtzin ijcuac yejcoj on yejhuan cuajquij on temachtijli de yolsehuilistli niman quiteijliaj on cuajli tlajtojli itech ica temaquixtilistli.”

¹⁶ Pero xnochimej oquiselijquej on tlajtojli yejhuan quitemaca temaquixtilistli. Quen oquijtoj Isaías: “NoTeco, ¿aquinon yoquineltocac on temachtlistli yejhuan ticteijliaj?” ¹⁷ Yejhua ica, tej, se hueli tlaneltoca ijcuac caqui on temachtlistli niman huajlau on temachtlistli ijcuac yacaj techmachtia ica Cristo. ¹⁸ Pero aman nejhua nictlajtlani: ¿Tlen on hebreos xocaquej yejhua in temachtlistli? ¡Melauc yejhuatej ocacquej! In Yectlajcuilojli ijquin quijtohua:

On tlajtojli yocaquistic imanyan nochi in tlapticactli. On tlajtojli yoajsic hasta ne campa sa ica nochi ixoxomolco in tlapticactli.

¹⁹ Pero ocsejpa nictlajtlani: ¿tlen manin on hebreos yej xoquinomacaquej cuenta? Moisés yejhua achtoj quinanquilia: Nicchihuas para ma mechnexicolitacan on tlacamej yejhuan chantij ipan ocse país yejhuan nenquijtohuaj ica xnejli país. Niman nicchihuas para xcualanican intechcopa on tlacamej yejhuan xquinequij itlaj cajsicamatisquej.

²⁰ Quemaj Isaías oquijtoj ican iyolchicahualis on tlen Dios oquimachiltij: On yejhuan xnechtejtemohuayaj, onechnextijquej; niman oniquinnnotitij on yejhuan xnoca tlajtlaniyaj.

²¹ Niman ica on país de Israel, Isaías oquijtoj: “Nejhua nochi tonajli niquinnotzticaj on tlacamej yejhuan xtetlacamatquej niman teijixnamiquej.”

11

Oncaj temaquixtilistli para on hebreos

¹ Aman, tej, nictlajtlani: ¿manin Dios yej yoquitlalcahuij on yejhuan iconehuan? ¡Melauc, tej, ica ca! pampa sa no nejhua nihebreo. Nihualejticaj itech Abraham niman no niquisticaj ipan ichanchanejcau* toachtojtaj Benjamín. ² Ijcuac xe quitlaliayaj in tlapticactli, Dios oquimat aquinomej iyaxcahuan† yesquej. Dios, tej, xoquintlalcahuij on yejhuan iyaxcahuan. ¿Tlen xnenquimati tlinon quijtohua on Yectlajcuilojli campa Elías ican ioración oquinteixpanhuij on hebreos? Ijquin, tej, oquijtoj Elías: ³ “NoTeco, motiotlajtocahuan yoquinmictijquej, niman motlaixpanhuan† yoquinxoxotonijquej.

[‡] **10:12** no hay diferencia; xsejsecnecamej * **11:1** su familia † **11:2** le pertenecen; iaxcahuan, ihuaxcahuan, itlatquihsan [‡] **11:3** tus altares

Aman noselti yoninocau, niman no quinequij nechmictisquej.” ⁴ Pero Dios ijquin oquinanquilij: “Yonicnocabulij chicome mil tlacatl yejhuan xonotlacuenquetzquej ixpan on yejhuan xnejli dios Baal.” ⁵ Aman, tej, sa no ijqui. Hasta aman nocahuaj quesquimej yejhuan Dios ican iteicnelilis§ oquintlapejpenij. ⁶ Niman tla Dios ican iteicnelilis oquintlapejpenij, tla ijcon xoquintlapejpenij pampa itlaj cuajli oquichijquej. Tla Dios quintlapejpenisquia pampa itlaj cuajli quichihuasquiaj, tla ijcon xnejli ican iteicnelilis quintlapejpenisquia.

⁷ ¿Niman aman, tej, tlinon? Miyequej on hebreos xoquinextijquej on temaquixtilistli yejhuan sanoyej* quitejtemohuayaj, pero on yejhuan Dios oquintlapejpenij quemaj oquinextijquej. On ocsequimej oyoltechicajquej ⁸ quen in Yectlajcuilojli quijtohua: “Dios oquintlamachilistzacu. Oquinmacac imixtololojhuhan yejhuan tlachaj, niman nacastin yejhuan xtla-caquij, niman hasta aman ijqui nemij.” ⁹ David no quijtohua: Inilhuihuan ma ica nopopolocan niman Dios ma quintlajtlacolmaca niman ma quintlajyohuilty ipampa on ilhuimej yejhuan quichihuaj.

¹⁰ Ma ca ma tlachacan, yej ma ixpajpayatican. Niman ma nochipa quintepotzopia on intlamamal.

¹¹ Aman nejhua niclajtlani: ¿tlica† ijcuac on hebreos ohuetzquej, Dios para yeica xoc quinchihuilia cuenta? ¡Melahuac, tej, ica ca! Pero pampa xotetlacamatquej, aman on yejhuan xhebreos yejhuatej huelij maquisaj. Ijcon nochihua para on yejhuan teconehuan itech Israel no ma quinequican on temaquixtilistli yejhuan quipiaj on yejhuan xhebreos. ¹² Ijcon, tej, on tlalticpactlacamej oquiselijquej hueyi tlatiochihualistli pampa on hebreos xotetlacamatquej, niman on yejhuan xhebreos oquiselijquej temaquixtilistli pampa ixpolijtoquej on hebreos. Tla ijcon onochiu, más sanoyej cuajli yes ijcuac nochimej on hebreos yejhuan Dios quinmaquixtis nochimej tlanelto-casquej.

Oncaj temaquixtilistli para on xhebreos

¹³ Aman, tej, nicpia tlen nemechijlis nemejhuamej yejhuan xnenhebreos. Dios onechmacac in tequitl para nemechpalehuis niman para nejhua hueyi quijtosnequi in notequiu. ¹⁴ Nicnequi para on yejhuan hebreos quen nejhua ma noxicocan ipampa on temaquixtilistli yejhuan on xhebreos quipiaj. Tla on hebreos noxicosquej, cas huelis sequimej maquisasquej. ¹⁵ Ijcuac Dios oquintlalcahuij on hebreos, yejhua otlahuelseu inhuan on yejhuan xhebreos niman oquinselij. Tla ijcon oquichiu, ¿tlinon, tej, nochihuas ijcuac ocsejpa quinselis on hebreos? San no ijqui quen yolisaj on mimiquej. ¹⁶ Tla yacaj quiyaxcatia‡ Dios on achtoj tlaxcajli yejhuan quisa itech on tixtli, tla ijcon, tej, noch on tixtli no iyaxca Dios. Niman ijcuac inelhuayo se cojti§ caxcatia Dios, noch on imahuan no yejhua iyaxca. No ijqui, tej, pampa Abraham achtoj iyaxca Dios, no ijqui on ihuejcajcone huan iyaxcahuan Dios. ¹⁷ Aman nocnihuan yejhuan xhebreos, yejhua in nemechijlia: on hebreos quipiaj on ojti de temaquixtilistli. Pero Dios oquincuilij sequimej hebreos niman omechyaxcatilij nemejhuamej yejhuan xnenhebreos. Aman, tej, nenquipiaj sa no yejhua on temaquixtilistli. ¹⁸ Pero ma ca xmohueyimatican niman xnemilican más nencuajcualtin xquen on hebreos. Tla ijqui nenquinemiliaj, san xmatican ica xnemejhuamej nenquimacaj Dios on temaquixtilistli yej

§ 11:5 su misericordia * 11:7 mucho † 11:11 ¿por qué?; ¿tline? ‡ 11:16 le consagra; quiyaxcatia, quihuaxcatia, quitlatquitia § 11:16 árbol

yejhua mechmaca. ¹⁹ Yejhua ica on, nemejhuamej huelis ijquin nenquijtosquej: “Quemaj, pero on hebreos oquincuilijquej inojhui de temaquixtilistli para tejhuamej ma ticpiacan on ojtlí de temaquixtilistli.” ²⁰ On melahuac, pero yejhuan oquincuilijquej pampa xotlaneltocaquej, niman nemejhuamej nenquipiaj on ojtlí de temaquixtilistli pampa nentlaneltocaj. Yejhua ica, tej, ma ca xmohueyimatican, yej xmotacan sa no nemejhuamej ²¹ pampa tla Dios oquincuilij on hebreos inojhui de temaquixtilistli yejhuan achtoj quipiayaj, nemejhuamej yejhuan sa ica ocpa mechyaxcatilia no huelis mechcuilis. ²² Xquita, tej, quen sanoyej teicneliani* Dios. Pero no xquita quen tlahuelej. Yejhua tlahuelej intech on yejhuan oquichichihuiliijquej on itemaquixtilis, pero teicneliani nemotech. Niman yejhua mechicnelis tla nennejnemisquej ipan itetlajsojtlalis†. Pero tla xnennejnemisquej ipan itetlajsojtlalis, mechcuilis nemoojhui de temaquixtilistli quen oquinchihuiliij on hebreos. ²³ Niman tla on hebreos ocsejpa pehuaj tlaneltocaj, Dios quinmacas on ojtlí de temaquixtilistli, pampa yejhua quipia poder para ocsejpa quinmacas. ²⁴ San xnemilican, tej, ica tla nemejhuamej yejhuan sa ica ocpa mechyaxcatiliaj on temaquixtilistli Dios ohuel mechmacac, más sanoyej, tej, pantlantiticaj ica ocsejpa más huelis quinyaxcatis on yejhuan intech hualejticaj.

Dios quimpialis teicnelilistli on xhebreos niman on hebreos

²⁵ Nocnihuan, nicnequi para xmatican yejhua in tlen melahuac yejhuan iyanticatca para ma ca xmomatican tlamatquej. On tlen melahuac sa no yejhua in: on hebreos yonoyoltechicajcaj para xquiselisquej on cuajli tlajtojli yejhuan quitemaca temaquixtilistli. Pero yejhuan oyoltechicajtiasquej san chica nochimej tlaneltocasquej on xhebreos yejhuan Dios quinmaquixtis. ²⁶ Ijcuac ijcon nochihuas, nochimej on hebreos maquisasquej quen quijtohua ipan in Yectlajcuilojli. Quijtohua:

Ne campa itoca Sión hualehuas se temaquixtijquetl, niman quixtis on tlajtla-cojli intech on hebreos.

²⁷ Ijcuac niquintlapojoahuilis intlajtlacolhuan, nochihuas quen oniquijtoj ipan on pacto yejhuan niquimpialia.

²⁸ On hebreos onochijquej itlahuelicnihuan Dios pampa xoquiselijquej on cuajli tlajtojli yejhuan quitemaca temaquixtilistli. Yejhua ica Dios yej nemejhuamej omechselij yejhuan xnenhebreos. Pero Dios oquintlapenij on hebreos. Yejhua ica oc‡ quintlajsojtl‡ impampa inachtojtajhuan.

²⁹ Tlen Dios quinmaca on yejhuan oquintlapejpenij, xqueman quincuilia.

³⁰ Nemejhuamej yejhuan xnenhebreos achtoj xonenquitlacamatquej Dios, pero aman yejhua mechicnelia pampa on hebreos xoc oquitlacamatquej.

³¹ Nochi, tej, sa no ijqui. On hebreos xoc quitlacamatij Dios. Pero on nochihua san para Dios ma quimpiali teicnelilistli* ijqui quen quimpia nemohuan.

³² Dios oquicahuilij nochí tlacatl onohuicajquej ipan on xipanteitalistli para huelis quimpialis teicnelilistli intech nochimej.

³³ ¡Sanoyej xhuelis tiquixitasquej on irriquezas Dios, on itlamatquilis† niman icajsicamatilis! Xacaj hueli quiteijlia tlica Dios quichihua itlaj, nion xacaj cajsicamati quen ijqui quichihua on itequiu. ³⁴ On Yectlajcuilojli ijquin quijtohua: “¿Aquinon quimati on tlen toTeco Dios quinemilia? Noso, ¿canon nemi on yejhuan hueli quitlacanonotza toTeco Dios ica on tlen sa no yejhua quichihua?” ³⁵ ¿Aquinon hueli achtopa itlaj quimaca toTeco Dios,

* **11:22** misericordioso † **11:22** su amor ‡ **11:28** todavía; sanquen § **11:28** los ama * **11:31** misericordia † **11:33** su sabiduría

para quemaj quej yejhua no itlaj ica cuajcuepilia? ³⁶ Xacaj hueli, pampa nochí tlajtlamach[‡] itech Dios hualejticaj, niman nochí in tlajtlamach oncaj san yejhua ipampa niman para ihueyilis yejhua. ¡Ma Dios quiseli hueyilistli para nochipa! Ma ijqui nochihua.

12

Pablo quijtohua quen ijqui se hueli notemactilia itech Dios

¹ Yejhua ica, tej, notlajsojcaicnihuan, pampa Dios sanoyej* otechtiochiu ican iteicnelilis[†], nejhua sanoyej nemechtlajtlanilia xmotemactilican itech Dios quen itlaj huentli yejhuan yolticaj niman yejyejticaj ijcon quen yejhua cuelita. Tla ijcon nenquichihuasquej, nenquimahuistilisquej Dios quen nonequi. ² Ma ca sa xmohuicakan quen on tlalticpactlacamej nohuicaj, yej xcahuilican Dios ma yejhua quiyencuili nemotlamachilis. Ijquin, tej, nenquimatisquej tlinon Dios quinequi: on tlen cuajli, on tlen quipactia niman nochí on tlen chipahuac.

³ Dios ican iteicnelilis onechtlalij niapóstol. Yejhua ica nemechijlia nochimej nemejhuamej, ma ca sa no nemejhuamej xnemilican ica más nenhuejhueyixtoquej hasta campa xoc quitocarohua. Yej ican nemotlamachilis xnemilican melajqui quen nonequi nennemisquej. Ijcon, tej, san xquixtlalocan on tlen huelis nenquichihuasquej ica on tlaneltoctli yejhuan Dios omechmacac. ⁴ Tocuerpo miyec partes ica tlachijchiutli, niman cada parte quipia oc se tlamantic tequitl. ⁵ Aman no ijqui, masqui tejhuatej timiyequej, san se cuerpo tihuajtochihuaj ihuan Cristo. Ijcon, tej, ipan se cuerpo tisesentenemij niman se ihuan ocse titopalehuiyaj.

⁶ Cada tisesentemej oticselijquej itech Dios sesetlamantic tetlayocoliltin yejhuan techhueliltia on tlen aman hueli ticchihuaj. Dios otechinmacac ican iteicnelilis quen oquinec. Yejhua ica ma tiquintequitiltican on tetlayocoliltin yejhuan otechmacac. Tla Dios otechmacac on tetlayocolijli yejhuan techhueliltia para tictejilisquej on tiotlajtojli yejhuan ticseliaj itech Dios, tla ijcon nonequi tictejilisquej quen totlaneltoc techyecanas. ⁷ Tla Dios otechmacac on tetlayocolijli yejhuan techhueliltia para tiquimpalehuisquej ocsequimej, nonequi, tej, ma titepalehuican. Niman tla Dios techhueliltia para titemachtisquej, no nonequi para ma titemachtican. ⁸ Tla ijcon, tej, tla totetlayocolil techhueliltia titeyolehuaj, nonequi yejhua ticchihuasquej. Niman tla techhueliltia para itlaj tictetlayocoliaj, nonequi ticchihuasquej hasta campa tihuelisquej. Noso tla techhueliltia titeyecanaj, ma tiquitacan cuajli quen titeyecanasquej. Niman tla yej techhueliltia tiquimpalehuiyaj on yejhuan itlaj quimpolojticaj, tla ijcon nonequi ticchihuasquej ican pactli.

On yejhuan quineltocaj Cristo nonequi cuajli nohuicasquej

⁹ Se ihuan ocse xmopialican on tetlajsojtlalistli[‡] yejhuan chipahuac. Xtlahuelitacan on tlen xcuajli niman xchihuacan on tlen cuajli.

¹⁰ Xmotlajsojtlacan se ihuan ocse quen icniutin, niman sanoyej xmotlacaitacan sequimej ihuan ocsequimej.

¹¹ Xchihuacan canica niman ma ca xtlatzihuican. Niman ican nochí nemoyojlo xtequipanocan toTeco.

¹² Xpacanemican ipampa nemotlamachalis\$. Ijcuac nentlajyohuisquej, xpiacan ijyohuilistli. Ma ca queman xcajcahuacan ica nenquichihuaj oración.

* ^{11:36} cosas * ^{12:1} mucho † ^{12:1} su misericordia ‡ ^{12:9} amor § ^{12:12} esperanza

¹³ Xquimpalehuican on yejhuan teyaxcahuan* itech Dios tla itlaj quimpolohua, niman cuajli xquinselican on yejhuan mechtlaipalohuaj.

¹⁴ Xtlajtlanilican Dios ma quintiochihua on yejhuan mechtlahuelitaj niman mechtlaipohuajtiaj. Ma ca xtlajtlanilican ma quintlajyohuulti, yej ma quintiochihua.

¹⁵ Xpaquican inhuan on yejhuan paquij, niman xchocacan inhuan on yejhuan chocaj.

¹⁶ Ma ca xpiacan tlahuejli inhuan ocsequimej. Ma ca xmohuejhueyimatican, yej xmohuicacan inhuan on yejhuan mayanquej. Ma ca xmomatican nentlamatquej.

¹⁷ Tla yacaj mechchihuilia itlaj xcuajli, ma ca no ijqui xcuepilican. Xchihuacan canica para nenquichihuasquej noch tlen cuajli imixpan noch tlacatl. ¹⁸ Xchihuacan canica hasta campa nenhuelisquej quen ijqui nemoyolica nennemisquej ihuan noch tlapatl. ¹⁹ Notlajsojcaicnihuan, ma ca sa no nemejhuamej itlaj xtecuepiltican, yej xcahuilican Dios ma yejhua tetlayohuulti, pampa in Yectlajcuilojli ijquin quijtohua: “Nejhua nictecuepiltis; nitetlaxtlahuilis quen nonequi.” Ijquin quijtohua toTeco. ²⁰ Niman in Yectlajcuilojli no ijquin quijtohua: “Tla motlahuelicniu apismiqui, xtlacualti, niman tla amiqui, xcatliti. Ijcuac ijcon ticchihuas yejhua quipinahuismatis on tlen omitzchihuilij.” ²¹ Ma ca xmocahuilican ma mechtlan on tlen xcuajli. Yej ica on tlen cuajli xtlanican on tlen xcuajli.

13

¹ Nochi tlacatl ma tetlacamati intech on tequihuajquej, pampa xnemij tequihuajquej yejhuan Dios xoquincalactij, yej noch quech tequihuajquej nemij Dios oquincalactij. ² Yejhua ica, tej, on yejhuan quixnamiqui on tequihuajquetl, quixnamiqui on tlen Dios oquitlalij. Niman on yejhuan ijcon quichihuaj quiselisquej tlajtlacolmacalistli ipampa on tlen quichihuaj. ³ On yejhuan quichihuaj tlen cuajli xnomojtiaj intech on tequihuajquej, yej san on yejhuan quichihuaj on tlen xcuajli. ¿Ticnequi, tej, tinemis xican nemojtijli intech on tequihuajquej? Tla ijcon ticnequi tinemis, cuajli xmohuica, niman on tequihuajquej mitztlacaitasquej. ⁴ Dios oquincalactij tequihuajquej para mitzpalehuisquej. Pero tla xcuajli timohuica, xquinmacajsi pampa on tequihuajquej melahuac tecastigarohuaj. Yejhuatej itequitcahuan Dios yejhuan castigarosquej quen nonequi on yejhuan quichihuaj on tlen xcuajli. ⁵ Yejhua ica nonequi para xquintlacamati on tequihuajquej, xsan para ma ca ticselis on castigo, yej pampa ticmatzticaj ica nonequi para ijqui ticchihuas. ⁶ Yejhua ica, tej, no nenquitlaxtlahuaj on impuestos, pampa on tequihuajquej quichihuaj intequiu pampa quitequichihuiliaj Dios.

⁷ Nochimej xquintlaxtlahuilican on tlen nenquinhuiquiaj. Xquintlaxtlahuilican on yejhuan nenquinhuiquiaj inrentas, niman on yejhuan nenquinhuiquiaj impuestos. Xtlacaitacan on yejhuan quimelahuja* quiselis tetlacaitalistli, niman xselican quen hueyixticaj on yejhuan hueyixticaj. ⁸ Ma ca yacaj itlaj xcuiquilican, yej san yejhua on tetlajsojtlalistli† yejhuan se ihuan ocse nonequi quinopialisquej. Ijcuac se tlacatl tetlajsojtlal, on tlen tlanahuatia itlanahuatil Moisés noch yoquitlacamat. ⁹ On tlanahuatiltin yejhuan ijquin quijtohuaj: “Ma ca tiahuilnemis, ma ca titemictis, ma ca titlachtequis, ma ca tiquelehuis on tlen teyaxca”, niman nochimej on ocsequimej tlanahuatiltin tenquisaj noch tla nenquitlacamati in tlanahuajtiji yejhuan ijquin quitohua: “Xtlajsojtlal motlalticpacchanejcau no ijqui quen

* 12:13 le pertenecen; teaxcahuan, tehuaxcahuan, tetlatquihuan * 13:7 merece † 13:8 amor

tejhua timotlajsojtla.” ¹⁰ Yejhuán tetlajsojtla xquitechihuilia on tlen xcuajli. Yejhuá in quijtosnequi ica tla se tlacatl tetlajsojtla, yejhuá quichihua nochí tlen tlanahuatíjli.

¹¹ Nonequi para ijcon nenquichihuasquej, pampa ye nenquimatztoquej tlen tonajli tinemij. Yejhuá ica, tej, xtlamachilistlachacan niman xmatican tlinon nochijtcaj aman, pampa más ye nisu huajlau Cristo para techquixtis ipan in tlalticpactli xquen ijcuac achtoj onentlaneltocaquej. ¹² Ye tlamic in tonaltin ijcuac tinemij ipan in tlalticpactli, niman ye nisu pehuas on tonaltin ijcuac tinemisquej ihuan Dios. Yejhuá ica xcajcahuacan on tlen xcuajli yejhuán tlacamej quichihuaj ipan in tlalticpactli. Xtlanicán on xcuajli niman xchihuacan on tlen cuajli. ¹³ Ma titohuicacan cuajli quen on yejhuán nemij ihuan Dios ipan chipahualistli. Ma ca ma titlahuantinemican, niman ma ca ma tiacan ne ilhuipan campa sa tzajtzihuaj. Ma ca ma tiahuijnemican niman ma ca ticahuilican ma quinequi totlalnacayo on tlen xcuajli. No ma ca ma titohuijsoquican inhuan ocsequimej. Niman no ma ca ma titenexicolitacan. ¹⁴ Yej ocse tlamantic. Xmohuicacan quen toTeco Jesucristo nohuica, niman ma ca ma xnemilican quen nenquipactisquej nemotlalnacayo ica on tlen yejhuá quinequi.

14

Xcuajli para tiquimistlacosquej on tocnihuan

¹ Xselican on tlacatl yejhuán xmás cuajli cajsicamati on temachtijli yejhuán ticneltocaj. Pero ma ca nemotlajtolhuisoquisquej ica on tlen yejhuá xcajsicamati. ² In se ejemplo. Se tlacatl quinemilia huelis quicuas nochí quech sesetlamantic tlacuajli oncaj, pero ocse tlacatl xcajsicamati niman quinemilia san huelis quicuas quijli. ³ Aman, tej, on yejhuán nochí tlajtlamach tlacuajli quicua, ma ca ma quinemili ica xitlaj* quimati on yejhuán xijqui tlacua. No ijqui on yejhuán san ican quijli nopanoltia, ma ca ma quistlaco on yejhuán quicua nochí quech tlajtlamach tlacuajli oncaj, pampa Dios no yoquiselij on tlacatl. ⁴ ¿Aquin tejhua in para tquistlacos itequichihuiliçau ocse tlacatl? Tej, san on aquin iteco huelis quijtos tla cuajli noso xcuajli on tlen quichihua. Niman yejhuá melajcanemis pampa toTeco quipia poder para quipalehuis ma melajcanemi.

⁵ Nictialis ocse ejemplo. Nemotzajlan se tlacatl quinemilia ica se tonajli más hueyixticaj xquen ocse. Pero nemi ocse tlacatl yejhuán quijtohua ica nochí tonaltin sa no ijqui. Cada se, tej, ma nomelajcatlali ipan itlamachilis. ⁶ On tlacatl yejhuán quejehua se tonajli, quejehua para quitlacaitas toTeco. Niman on yejhuán xquejehua, no xquejehua para quitlacaitas toTeco. Yejhuán quicua nochí tlajcuajli, quichihua para quitlacaita toTeco pampa quimaca tlaxtlahuijli Dios. Niman yejhuán quinemilia ica Dios xcahuilia para quicuas nochí tlajcuajli, xquicua para quitlacaita toTeco, niman yejhuá no quimaca tlaxtlahuijli Dios.

⁷ Nion se de tejhuatej nemi san para sa no yejhuá, nion miqui san para sa no yejhuá. ⁸ Yej tla tinemij, tinemij para toTeco, niman tla timiquij, timiquij para toTeco. Tla tinemij noso tla timiquij, titeyaxcahan† itech toTeco. ⁹ Yejhuá ica, tej, Cristo omic niman ocsejpa oyoliu para yejhuá onochiu inTeco intech on yejhuán yoltoquej niman on yejhuán micatzitzintin. ¹⁰ Pero ¿tlica‡ yacaj quistlacohua icniu? Niman ocse, ¿tlica yacaj quinemilia quen xitlaj quimajmati icniu? Tinochimej, tej, tiasquej ixpan Cristo para yejhuá

* **14:3** nada; coxtla † **14:8** le pertenecemos; titeyaxcahan, titehuaxcahan, titetlatquihuan

‡ **14:10** ¿por qué?; ¿tline?

techyolcuitis niman techtlaxtlahuilis quen nonequi. ¹¹ In Yectlajcuilojli ijquin quijtohua:

“Ijcon quen melahuac niyolticaj, quijtohua toTeco, no melahuac ica nochitlacatl nixpan notlacuenquetzas niman nochimej teixpan quijtosquej ica melahuac nejhua niDios.”

¹² Ijqui tej, cada se ica oncaj tiquijlisquej Dios nochitlen cuajli niman on tlen xcuajli ticchihuac.

Xcuajli para ticchihualtis mocniu ma huetzi ipan tlajtlacojli

¹³ Yejhua ica, tej, xoc quitocarohua titistlacojtiásquej ihuan ocsequimej. Yej xchihuacan ocse tlamantic. Xchihuacan canica para ma ca itlaj nenzquichihuasquej yejhuan ica najantiquisa nemocniu ipan itlaneltoc, noso contlajcalis ipan tlajtlacojli. ¹⁴ Pampa nicneltoca Cristo Jesúz, nejhua cuajli nicyolmatzticaj ica nochitlen oncaj chipahuac. Pero tla yacaj quinemilia ica itlaj xchipahuac, on xchipahuac para yejhua. ¹⁵ Tla ticipajsolohua mocniu ican on tlen ticua, xoc timohuica ican tetlajsojtlalistli§. Ma ca xchihua para yacaj ma polihui yejhuan Cristo ipampa omic, san ipampa on tlen ticua. ¹⁶ Masqui ticmati ica on tlen ticchihua cuajli, ma ca sa xchihua tla quijtohuaj ica on tlen ticchihua tlajtlacojli, ¹⁷ pampa ne campa Dios tlamandarohua on tlen ticusas noso ticonis xtlaj* quijtosnequi. Pero on yolmelajcalistli niman yolsehuilistli, niman on pactli yejhuan ticpiaj itechcopia on Espíritu Santo, yejhua hueyi quijtosnequi. ¹⁸ Yejhuan ijquin quitequichihuilia Cristo, quipactia Dios niman quitlacaitaj on tlacamej. ¹⁹ Yejhua ica, tej, ma tiquejecocan ticchihuasquej on tlajtlamach† yejhuan cuajquij yolsehuilistli, niman quimiscaltiaj ocsequimej impan intlaneltoc. ²⁰ Ma ca xpopolo itequiu Dios san yejhua ica on tlen tiquicua. On melahuac ica nochitlacuajli chipahuac para nocuas, pero yej xcuajli para ticusas on tlen quinchihualtia ocsequimej comintlajcali ipan tlajtlacojli. ²¹ Cuajli ticchihuas tla xticuas nacatl, nion ticonis vino, nion ticchihuas itlaj yejhuan ica najantiquisas mocniu, noso yejhuan contlajcali ipan tlajtlacojli, noso yejhuan quiyemanilis itlaneltoc. ²² Ma ca inhuan ocsequimej xmocamatlanij ica on tlen tejhua tcnemilia, yej san tejhua xconmati ihuan Dios. On tlacatl paqui yejhuan xometlamati itech on tlen quichihua. ²³ Pero Dios quitlajtlacolmacas on yejhuan itlaj quicua ican ometlamatilistli, pampa xquineltoca ica Dios quinequi para ma quicua. Nochitlen se quichihua ican ometlamatilistli, yejhua tlajtlacojli.

15

Nonequi tiquimpactisquej ocsequimej niman ma ca sa no tejhuatej ma titopactican

¹ Tejhuatej yejhuan ticojtiquej ipan totlaneltoc nonequi tiquimpalehuisquej ipan impasolol on yejhuan xcojtiquej impan intlaneltoc. Ma ca, tej, sa no tejhuatej ma titopactican. ² Cada se de tejhuatej ma tiquimpactican ocsequimej ica on tlen cuajli para yejhuatej. Ijcon nonequi ticchihuasquej para yejhuatej noscaltisquej ipan intlaneltoc. ³ Ijcon ma ticchihuacan pampa nion Cristo sa no yejhua onopactij. In Yectlajcuilojli quijtohua on tlen Cristo oquijlij Dios: “Nopan ohuetz intlahuel on yejhuan mitztlahuelitayaj.”

⁴ Nochitlen ye huejcahui onijcuiloj ipan on Yectlajcuilojli, onijcuiloj para techmachtia. Onijcuiloj para ma ticpiacan totlamachalis* itechcopia on ijyohuclistli niman teyoltlalilistli yejhuan techmaca on Yectlajcuilojli. ⁵ Ma Dios,

§ **14:15** amor * **14:17** nada; coxtla † **14:19** cosas * **15:4** nuestra esperanza

yejhuan quitemaca ijyohuilistli niman teyoltlalilistli, mechpalehui para san se nemoyojo nenquipiasquej inhuan ocsequimej, ijcon quen iejemplo Jesucristo mechititia,⁶ para ica san se inyojo niman ica san se tlajtojli ma quiyectenehuacan Dios, iTajtzin toTeco Jesucristo.

On cuajli tlajtojli yejhuan quitemaca temaquixtilistli yoasic intech on yejhuan xhebreos

⁷ Aman, tej, xmoselican ihuan ocsequimej quen Cristo otechselij, para Dios quiselis ihueyilis. ⁸ Nejhua nemechijlia ica Cristo onochiu tequichijquetl intech on hebreos. Ijcon, tej, caxitia on promesas yejhuan Dios oquintlalilij on toachtojtahuan, niman ijquin oquiteititij ica Dios nochipa quichihua tlen quijtohua. ⁹ Cristo no ohuajlaj intech on xhebreos quen tequichijquetl para yejhuamej ma quihueyilican Dios ipampa iteicnelilis†, ijcon quen Cristo oquijlij Dios ipan in Yectlajcuilojli:

Yejhua ica intzajlan on xhebreos nimitzyectenehuas, niman nitlacuicas ican motocatzin on tlacuicaltin.

¹⁰ Niman ocsecan ipan on Yectlajcuilojli no quijtohua:

Nemejhuamej yejhuan xnenhebreos xpaquican inhuan on yejhuan hebreos.

¹¹ Niman ocsejpa quijtohua in Yectlajcuilojli:

Nochimej nemejhuamej yejhuan xnenhebreos xyectenehuacan Dios. Niman nemejhuamej tlacamej nemochimej‡ xhueyitenehuacan.

¹² Niman Isaías no quijtohua ipan itlajcuilol:

Se huejca teixhuiu§ itech Isaí huajlas. Yejhua quinmandaros on yejhuan xhebreos. Niman yejhuamej itech quitlalisquej intlamachalis.

¹³ Ma Dios, yejhuan quitemaca tlamachalistli*, ma mechmaca nochí pactli niman yolsehuilistli pampa nenquineltocaj para nenquipiasquej miyec tlamachalistli itechcopia ipoder on Espíritu Santo.

¹⁴ Nocnihuan, cuajli nicmatzticaj ica nemejhuamej nententoquej ican cuajlistli niman ican nochí tlamatquilistli†, niman huelis nemotlacanonotzasquej. ¹⁵ Pero ipan in tlajcuilolamatl yonemechijcuilojli xican nemojtiji para ocsejpa nemechelnamictia ica on tlajtlamach‡. Ijquin yonemechijcuilojli pampa Dios ican iteicnelilis onechtlalij para niapóstol, ¹⁶ para nictequichihuilis Jesucristo intzajlan on yejhuan xhebreos. Yejhuan niquimijlia on cuajli tlajtojli yejhuan quitemaca temaquixtilistli yejhuan itech Dios quisticaj. Niman niquimijlia quen yacaj tiopixqui quimijlisia. Niquimijlia on temachtijli para nochihuasquej quen se huentli yejhuan Dios huelis quiselis, niman yejhuan on Espíritu Santo yoquichipau. ¹⁷ Aman, tej, ica ninemi san secan ihuan Cristo Jesús, nipaqui ica on tequitl yejhuan nicchihua para Dios. ¹⁸ Xnitlajtlajtos itlaj ica ocse tequitl. San nitlajtlajtos ica on tlen Cristo oquichiu notechcopia intzajlan on xhebreos. Aman, tej, yejhuan niquimijlia quen yacaj tiopixqui quimijlisia. Niquimijlia on temachtijli para nochihuasquej quen se huentli yejhuan Dios huelis quiselis, niman yejhuan on Espíritu Santo yoquichipau. ¹⁹ Ijquin onicchii ¹⁹ itechcopia ipoder on tlamajhuisoltin niman on milagros, niman itechcopia ipoder on Espíritu Santo. Ijcon, tej, nohuiyan desde Jerusalén hasta ne iregión Ilírico cuajli yonictemitij ica on cuajli tlajtojli yejhuan quitemaca temaquixtilistli itechcopia Cristo. ²⁰ Nochipa onicnec nicteijlis on cuajli tlajtojli ne campa xe quixmatij ica Cristo. Ijquin onicnec nicchihuasquej pampa xonicnec nitemachtis ne campa ocse tlacatl otequit. ²¹ Yej nicchihua quen in Yectlajcuilojli quijtohua:

† **15:9** su misericordia ‡ **15:11** todos ustedes; nannochti, yemochimej, anochimej, innochimej, emmochimej § **15:12** descendiente * **15:13** esperanza † **15:14** sabiduría ‡ **15:15** cosas

Yejhuamej quitasquej on yejhuan xqueman intech omachiyato. Niman cajsicamatisquej on tlen xqueman ocacquej ica yejhua.

Pablo quinemilia yas ne Roma

²² Masqui miyecpa onicnec nias nemechontas xohuel oniaj pampa ica oncatca nicteijilis on cuajli tlajtojli yejhuan quitemaca temaquixtilistli intazajlan on yejhuan xe queman caquiyaj. ²³ Pero aman ica yonitequitlan ipan in inyehualican, niman ica miyec xipan yonicnectinen nemechontas, ²⁴ nicpia tlamachalistli§ ica aman quemaj huelis nemechontas ijcuac nias ne España. Niman quemaj ijcuac yonicpix pactli ica yonemechitac ipan quesqui tonaltin, nicnequi nennechpalehuisquej ica on tlen nechpolos para najsis ne España. ²⁵ Pero aman niau Jerusalén niman niquitqui se ofrenda para iteyaxcahuan* Dios yejhuan ompa nemij, ²⁶ pampa on tocnihuan yejhuan chanejquej ne ipan on inregión Macedonia niman Acaya ican pactli oquine-milijquej para oquisentlalijquej se ofrenda, niman quintitlaniliaj on tocni-huan mayanquej yejhuan nemij ne Jerusalén. ²⁷ Yejhamej oquinemilijquej ica cuajli para ijcon quichihuasquej. Niman melahuac nonequi quincuepil-isquej on hebreos pampa on tlaneltocaquej hebreos oquixelojoquej on cuajli tlajtojli yejhuan quitemaca temaquixtilistli inhuan on xhebreos. Yejhua ica on yejhuan xhebreos nonequi quixelosquej on tlen tlajtlamach quipiaj inhuan on hebreos. ²⁸ Quemaj ijcuac nejhua yonitlan notequivi niman yoniquinmacac in ofrenda, niquisas para nias España, niman nemechnotzas ijcuac nipanos. ²⁹ Cuajli nicmatzticaj ica ijcuac nemotech najsis, Cristo sanoyej† techtiochihuas.

³⁰ Nocnihuan, sanoyej nemechtlajtlanilia ipampa toTeco Jesucristo niman ipampa on tetlajsojtlalistli‡ yejhuan on Espíritu Santo mechmaca, san se-can nohuan xchihucan oración ican nochí nemoyojo itech Dios nopampa. ³¹ Xtlajtlanilican Dios ma nechmanahui intech on tlacamej tlaneltocaquej yejhuan nemij ne Judea. Niman no xtlajtlanilican para on tocnihuan nemij ne JerusaLén ma quiselican ican pactli on tlen niquimitquila ³² para tla Dios quinequi, ma naksi nemotech ican hueyi pactli niman ijqui tiyolpachi-huisquej. ³³ Ma Dios yejhuan quitemaca yolsehuilistli ma nemi nemohuan. Ma ijqui nochihua.

16

Pablo tlanahuatia ma quintlajpalohuilican sesentemej on yejhuan itech-copa Cristo icnihuan

¹ Nicnequi xmatican ica in tocniu itoca Febe, cuajli sihuatl. Yejhua quimpalehuiya ica itequiu Dios on yejhuan tlaneltocaj ne ipan on pueblo itoca Cencrea. ² Xselican cuajli ican itocatzin toTeco ijcon quen nonequi on yejhuan teyaxcahuan* itech Dios. Niman xpalehuican ica on tlen quipolohua, pampa yejhua miyequij yoquimpalehuij niman hasta nejhua no yonechpalehuij.

³ Xquintlajpalocan on tocnihuan Priscila niman Aquila yejhuan onech-palehuijquej ipan itequiu Cristo Jesús. ⁴ Yejhamej san para oquimanahui-jquej nonemilis, ica yonocajcaj nemiyaj para miquisquiaj nopampa. Niman aman xsan nejhua niquinmaca tlaxtlahuijli, yej no quinmacaj tlaxtlahuijli nochimej on tlaneltocaquej yejhuan xhebreos. ⁵ No xquintlajpalocan

§ **15:24** esperanza * **15:25** le pertenecen; itejaxcahuan, itehuaxcahuan, itetlatquihuan † **15:29**
mucho ‡ **15:30** amor * **16:2** le pertenecen; teaxcahuan, tehuaxcahuan, tetlatquihuan

on tocnihuan yejhan nosentlaliaj ichan Priscila niman Aquila. No xtlaajpalocan on notetlajsojcau[†] Epeneto yejhan ne Acaya achtopa yejhua oquineltocac Cristo. ⁶ No xtlaajpalocan María yejhan sanoyej[‡] yotequit nemotech. ⁷ On nohebreoicnihuan Andrónico niman Junias no xquintlaajpalocan. Yejhuamej nohuan tzacuticatcaj niman on apóstoles quipiaj tetlacaatalistli intech yejhuamej. Yejhuamej achtoj oquineltocaquej Cristo xquen nejhua.

⁸ Xtlajpalocan Amplias, notetlajsojcau itechcopa toTeco. ⁹ Xtlajpalocan Urbano yejhan otequit tohuan ipan on tequitl yejhan ticchihuaj ipampa Cristo Jesús, niman on notetlajsojcau Estaquis. ¹⁰ Xtlajpalocan Apeles yejhan Dios oquitlatlatac niman yoquitac ica melahuac quineltoca Cristo. Niman no xtlaajpalocan ichanchanejcahuan[§] Aristóbulo. ¹¹ Xtlajpalocan on nohebreoicniu Herodión, niman on icniutin ipan ichanecau Narciso yejhan quineltocaj Cristo. ¹² Xtlajpalocan Trifena niman Trifosa yejhan tequitij ipan itequiu toTeco, niman on totlajsojcaicniu Pérsida yejhan sanoyej tequiti ipan itequiu toTeco. ¹³ Xtlajpalocan Rufo yejhan sanoyej cuajli tlaneltoquaquetl, niman inan yejhan nechpia quen iconue. ¹⁴ Xquintlaajpalocan Asínrito, Flegonte, Hermas, Patrobas, Hermes niman on tocnihuan yejhan ompa inhuan nemij. ¹⁵ No xquintlaajpalocan Filólogo niman Julia. Niman no xquintlaajpalocan Nero niman on icniu sihuatl. Xtlajpalocan Olimpas niman nochimej on iyaxcahuan Dios yejhan ompa inhuan nemij.

¹⁶ Cualtzin xmotlajpalocan inhuan ocsequimej ican tetlajsojtlalistli*. Nochimej on tlaneltoquaquej itech Cristo mechtlaajpalohuaj.

¹⁷ Nocnihuan, sanoyej nemechtlajtlanilia para xmotacan sa no nemejhuamej intech on yejhan texexelohuaj niman tetlamachilispolohuaj ican intlaneltoc niman quixnamiquij on temachtilti yejhan yonenquiselijquej. On quenomej xquintlalcahuican ¹⁸ pampa yejhuamej xquitequichihuilaj toTeco Jesucristo, yej san quichihuaj quen inxcuajli elehuilis[†] quinequi. Yejhuamej quintlamachilispopolohuaj ican incualtzin tlajtol niman inyemancatljtol on tlacamej yejhan xtlamatquej. ¹⁹ Nochi tlacatl quimati quen nenquintlacamatij on temachtilti yejhan yonenquiselijquej, niman yejhu ica on sanoyej nipaqui. Pero nicnequi sanoyej xyolchicajquej para nenquichihuasquej on tlen cuajli, niman ma ca para nenquichihuasquej on tlen xcuajli. ²⁰ Niman Dios yejhan quitemaca yolsehuilistli saniman quitlajcalis nemocxitlan on Satanás. Ma toTeco Jesucristo mechtiochihua hueyi.

²¹ Timoteo yejhan tequiti nohuan ipan in tequitl mechtlaajpalohua. Niman Lucio, Jasón, niman Sosípater yejhan nohebreoicnihuan no mechtlaajpalohuaj.

²² Nejhua Tercio, yejhan niquijcuijoticaj in tlajcuiolamatl yejhan Pablo nechijlijtiu, no nemechtlaajpalohua ican itocatzin toTeco. ²³ Mechtlaajpalohua tocniu Gayo yejhan ichan ninocajtinemi, niman no ompa ichan nosentlaliaj in yejhan tlaneltocaj. Erasto on yejhan tesorero ipan on hueyican niman tocniu Cuarto no mechtlaajpalohuaj.

²⁴ Ma toTeco Jesucristo nemochimej[‡] ma mechtiochihua hueyi. Ma ijqui nochihua.

[†] **16:5** mi amigo [‡] **16:6** mucho [§] **16:10** su familia * **16:16** amor: Ipan griego quitohua: “beso santo”. [†] **16:18** deseos [‡] **16:24** todos ustedes; nannochti, yemochimej, anochimej, innochimej, emmochimej

Pablo quiyectenehua Dios

²⁵ Niman aman ma ticyectenehuacan Dios yejhuan huelis mechmelajcatlalis ipan nemotlaneltoc. Yejhua mechmelajcatlalis itechcopa on cuajli tlajtojli yejhuan quitemaca temaquixtilistli yejhuan nicteijlia niman itechcopa on temachtijli ica Jesucristo. Yejhua in temachtijli cuajli quisa ijcon quen Dios yoquipanextij on iyanalistli§ yejhuan achtoj iyanticatca desde ijcuac xe oncatca in tlalticpactli. ²⁶ Pero nochí yejhua on aman nopalantia niman yomachiyac itechcopa on Yectlajcuilojli yejhuan oquijcuilojquej on tiotlajtojquej ijcon quen Dios yejhuan nochipa nemi otlanahuatij ma nochihua. Ijquin otlanahuatij Dios para nochihuiyan niman nochimej on tlacamej ma quineltocacan niman ma quitlacamatican.

²⁷ ¡Ma Dios yejhuan san iselti nochí tlamatqui, para nochipa ma quiseli hueyilistli itechcopa Jesucristo! Ma ijqui nochihua.

1 CORINTIOS

IACHTOJ TLAJCUILOL ON APÓSTOL SAN PABLO

PARA ON CORINTIOS

Pablo quintlajcuilhuia on tlaneltoquej ne Corinto

¹ Nejhua, niPablo, yejhuan Dios onechcalactij para niiapóstol Jesucristo quen yejhua oquinec. Nejhua ihuan tocniu Sóstenes ² temechtlajcuilhuiaj nemejhuamej tocniuhan yejhuan nennemij ipan itiopian Dios ompa ipan on hueyican itoca Corinto, yejhuan nenteyaxcahuan* itech Dios pampa san secan nennemij ihuan Cristo Jesús. Dios omechnotz para nennemij yolchipajquej inhuan on yejhuan nochihuiyan quiyectenehuaj toTeco Jesucristo yejhuan no inTeco quen tejhamej. ³ Ma Dios toTajtzin niman toTeco Jesucristo mechmacacan intlatiochihualis niman inyolsehuilis.

On corintios oquiselijquej tlatiochihualistli

⁴ Nochipa nicmaca tlaxtlahuijli Dios ipampa on hueyi tlatiochihualistli yejhuan omechmacac itechcopa Cristo Jesús. ⁵ Tej, pampa san secan nenne-mij ihuan Cristo, Dios yomechmacac nochí ocse tlamantic riquezas yejhuan itech quisa. Mechmaca ipan on tlen nenquijtohuaj niman ipan on tlen nenquimati. ⁶ On tlen onemechijlij ica Cristo yonopantlantij ica melahuac ijqui yonochiu nemopan. ⁷ Yehua ica chica nenquimachixtoquej on tonajli ijcuac toTeco Jesucristo huajlas, nenquipiaj nochí on tetlayocolijli yejhuan Dios quitemaca. ⁸ Sa no Dios mechmelajcapias hasta ijcuac nochí tlamis, para ma ca mechtla tlacolmacas ijcuac huajlas toTeco Jesucristo. ⁹ Dios yomechnotz para aman nennentoquej san secan ihuan Jesucristo toTeco yejhuan iConetzin Dios. Niman sa no yejhua in Dios nochipa quichihua on tlen quijtohua.

On tlaneltoquej ne Corinto xquipia san se inyojo

¹⁰ Nocnihuan, sanoyej† nemechtlajtlanilia ican itocatzin toTeco Jesucristo, cuajli xmohuicakan ihuan ocse niman ma ca xxexelijtiacan. Yej san se tlanemilistli niman nemoyojo xpiacan. ¹¹ Yehua in nemechijlia, pampa sequimej ichanchanejcahuan‡ Cloé onechijlijquej ica nemocamahuijsouij. ¹² Niquijtosnequi ica nemochimej§ sesetlamantic nenquijtohuaj. Sequimej quijtohuaj: “Nejhua ninopohua itech Pablo”, ocsequimej quijtohuaj: “Nejhua ninopohua itech Apolos”, niman sequimej quijtohuaj: “Nejhua ninopohua itech Pedro”, niman ocsequimej quijtohuaj: “Nejhua ninopohua itech Cristo.” ¹³ ¿Tlen Cristo xexelijticaj ipan miyc partes? Noso ¿tlin yej nejhua Pablo nemopampa onimic ne ipan cojnepanojli*? ¿Noso yej onemocuatequijquej ican notocatzin? ¹⁴ Nicmaca tlaxtlahuijli Dios ica xacaj más onicuatequij yej san Crispo niman tocniu Gayo. ¹⁵ Yehua ica, tej, xacaj huelis quijtos ica ican notocatzin onocuatequij. ¹⁶ Aman niquelnamiqui ica no onicuatequij ichanchanejcahuan Estéfanás, pero xniquelnamiqui tla yacaj más onicuatequij. ¹⁷ Cristo xonechajtitlan para nitlacuatequis, yej onechajtitlan para nicteijlis on cuajli tlajtojli yejhuan quitemaca temaquixtilistli. Niman onechajtitlan xpara nicteijlis on temachtijli ican huejhuey

* **1:2** le pertenecen; nenteaxcahuan, nentehuaxcahuan, nentetlatiquihuan † **1:10** mucho

‡ **1:11** su familia § **1:12** todos ustedes; nannochti, yemochimej, anochimej, innochimej, emmochimej * **1:13** cruz

tlajtojli yejhuan quisa itech notlamatquilis[†] para ma ca nicpopolos ipoder on imiquilis Cristo ne ipan on cojnepanojli.

Cristo yejhua ipoder niman itlamatquilis Dios

¹⁸ Para on yejhuan yahuij ipan on ojli de ixpolihuistli, xitlaj[‡] quijsitosnequi on cuajli temachtijli yejhuan techijlia quen ijqui Cristo topampa omic ne ipan on cojnepanojli[§]. Pero para tejhuamej yejhuan tiahuij ipan on ojli de temaquixtilistli, on temachtilistli quipia ipoder Dios. ¹⁹ Yejhua ica quijtohua in Yectlajcuilojli:

Nicteitis ica on tlamatquej xitlaj quijsitosnequi on intlamatquilis*. Ocsecan nicomapehuas incajsicamatilis on yejhuan notenehuaj ica noch cajsicamatij.

²⁰ Aman, tej, ¿tlinon ica quipalehuiya on tlamatqui, noso on temachti-jquetl, noso on yejhuan más tetlani ican itlamatquilis[†] ijcuac inhuan on tlalticpactlacamej nocamahuisoqui? Xitlaj, tej, ica quipalehuiya, pampa Dios quijtohua ica on tlamatquilistli yejhuan quisticaj ipan in tlalticpactli xitlaj quijsitosnequi. ²¹ Dios ican itlamatquilis xoquincahuilij on tlacamej ma quixmatican sa no yejhua itechcopia on tlamatquilistli yejhuan quistica ipan in tlalticpactli. Yej Dios oquitlalij iyojlo para quinmaquixtis on yejhuan tlaneltocaj itechcopia on temachtijli yejhuan ticteijliaj, masqui yejhua in temachtijli nesi quen xitlaj quijsitosnequi para on tlalticpactlacamej.

²² On hebreos quinequij quitasquej milagros, niman on griegos quitejtemohuaj tlamatquilistli. ²³ Pero tejhuamej ticteijliaj ica Cristo omic ne ipan cojnepanojli para quipopolos tlajtlacojli. On yejhuan hebreos xquinequij quiselisquej in temachtilistli, niman on yejhuan xhebreos quijtohuaj ica xitlaj quijsitosnequi. ²⁴ Pero para on yejhuan Dios oquinnotz, tla hebreos noso xhebreos, Cristo yejhua ipoder niman itlamatquilis Dios. ²⁵ Masqui para on tlalticpactlacamej nesi ica imiquilis Cristo xitlaj quijsitosnequi, imiquilis más hueyi quijsitosnequi xquen yejhua on tlajtlamach[‡] yejhuan on tlalticpactlacamej quinemiliaj hueyi quijsitosnequi. Niman masqui no nesi ica para on tlalticpactlacamej Dios xcojtic, icojtilis más cojtic xquen incojtilis on tlalticpactlacamej.

²⁶ Nocnihuan, xquelnamiquican quen ijqui nennemiyaj ijcuac Dios omechnotz para nenquineltocaj Jesucristo. Xnenmiyequej onenquipixquej miyec tlamatquilistli yejhuan quistica ipan in tlalticpactli, nion onenquipixquej tequihuajyotl, niman no xonenquipixquej on hueyilistli. ²⁷ Ijcon, tej, Dios oquintlapejpenij on tlacamej yejhuan imixpan on tlalticpactlacamej nesij xtlamatquej, niman on yejhuan nesij xitlaj quijsitosnequi para quimpinajtiaj on yejhuan notenehuaj tlamatquej niman on yejhuan notenehuaj hueyi quijsitosnequij. ²⁸ Dios oquintlapejpenij on tlacamej yejhuan ipan in tlalticpactli xitlaj ica huejhueyixtoquej, niman no on yejhuan on tlalticpactlacamej quinchichihuaj niman quijtohuaj ica xitlaj quijsitosnequij para quinxoxotonilis on tlen on tlalticpactlacamej quinemiliaj huejhueyi quijsitosnequij. ²⁹ Dios ijcon oquichiu para xacaj huelis nohueyimatis ixpan. ³⁰ Pero sa no yejhua Dios yomechsentlalij ihuan Cristo Jesús. Niman itechcopia Cristo ticpiaj tlamatquilistli, yolmelahualistli niman yolchipahualistli. Niman no itechcopia oquitlaxtlau totlajtlacol ican iyesyo. ³¹ Yejhua ica ijquin quijtohua in Yectlajcuilojli: “Ma ca ma nohueyitenehuacan, yej ma quiyectenehuacan toTeco.”

[†] 1:17 mi sabiduría [‡] 1:18 nada; coxtla § 1:18 cruz * 1:19 sabiduría de ellos † 1:20 su sabiduría [‡] 1:25 cosas

2

Pablo quiteijlia ica Cristo omic ne ipan cojnepanojli

¹ Nocnihuan, ijcuac nemotech oniaj para nemechijlis itemachtil Dios, onicchiu xican huejhueyi tlajtojli, nion onitlajtoj quen se yejhuan sanoyej* tlamatqui. ² Ijcuac nemotzajlan ninemiya onictlalij noyojlo para xitlaj† ocse ica más nemechmachtis, yej san de Jesucristo niman quen omic ipan cojnepanojli‡. ³ Ijcuac oniaj nemotech, nicmatiya xnicojtic, ninomojtiaya niman nimojcacuecuetlacaya. ⁴ Ijcuac onemechnojnotz niman onemechmachtij xonictequitiltij cualtzin tlajtojli, nion tlajtojli yejhuan se tlamatquel quitequitiltia. Yej, onemechnojnotz ican ipoder on Espíritu Santo. ⁵ Ijcon onicchiu para nemotlaneltoc ma quistia itech ipoder Dios niman ma ca itech intlamatquilis§ on tlamatquej.

Dios noteititia itechcopia iEspíritu Santo

⁶ Pero quemaj tictequitiltiaj tlamatquilitli* ijcuac titlajtlajtohuaj inhuan on yejhuan más yonoscaltijquej ipan intlaneltoc. Pero on tlamatquilitli xipan in tlalticpactli quisticaj nion xinyaxca† on tequihuajquej ipan in tlalticpactli yejhuan popolhuisquej. ⁷ Yej nitlajtlajtohua ica on itlamatquilib Diose yejhuan xacaj oquimat ipan ocse tonaltin. In tlamatquilitli quijtosnequi on temaquixtilistli yejhuan ijcuac in tlalticpactli xe oncatca, Diose oquitlalij ipan iyojlo para techmacas. ⁸ Nion se yejhuan tequihuajquetl ipan in tlalticpactli cajsicamati itlamatquilib Diose. Tla cajsicamatisquiaj xquipilosquiaj on tohueyiTeco ipan cojnepanojli‡. ⁹ Niman ijquin quijtohua ipan in Yectlajcuilojli:

Dios yoquinyectlalilij para on yejhuan quintlajsojtlaj§ on tlajtlamach* yejhuan xacaj oquitac nion ocac nion oquinemilij.

¹⁰ Pero in tlajtlamach Diose yotechcahuilij ma tiquixmatican itechcopia iEspíritu Santo. On Espíritu Santo quimati noch. Yejhua hueli cajsicamati hasta on tlajtlamach yejhuan más hueyi quijtosnequiij itech Diose.

¹¹ Xacaj huelis quimatis quen ijqui quinemilia se tlacatl, yej sa no yejhua on tlacatl quimati ipan itlamachilis. Sa no ijqui, tej, xacaj quimati quen ijqui quinemilia Diose, yej san on iEspíritu quimati.

¹² Niman tejhuamej xoticselijquej on huejhueyi tlamatquilitli yejhuan on tlalticpactlacamej quipiaj, yej oticselijquej on Espíritu yejhuan hualehua itech Diose para yejhua ica hueli ticajsicamatij on tlatiochihualistin yejhuan Diose yotechmacac.

¹³ Ijcuac tejhuamej titemachtiaj ica on tlajtlamach, ticchihuaj quen iEspíritu Diose techijlia, niman xquen quisa ipan totlamatquilib. Ijcon, tej, melajqui tiquimpantlantiaj intech on yejhuan quipiaj iEspíritu Diose on tlajtlamach yejhuan quisaj itech Diose.

¹⁴ On yejhuan xquipia iEspíritu Diose, xquiselia on tlajtlamach yejhuan on Espíritu temachtia pampa para yejhua on xitlaj† quijtosnequi. Niman xhueli cajsicamati on tlajtlamach pampa on san yejhuan quipia iEspíritu Diose hueli cajsicamati.

¹⁵ On yejhuan quipia iEspíritu Diose ican noch tlajtlamach hueli quimati tla melahuac noso xmelahuac. Pero yejhua xacaj tlacatl yejhuan xquipia iEspíritu Diose huelis quixcomacas‡.

* **2:1** mucho † **2:2** nada; coxtla ‡ **2:2** cruz § **2:5** sabiduría de ellos * **2:6** sabiduría
 † **2:6** no les pertenece; xinaxca, xinhuaxca, xintlatqui ‡ **2:8** cruz § **2:9** les aman * **2:9**
 cosas † **2:14** nada; coxtla ‡ **2:15** juzgar

16 In Yectlajcuilojli quijtohua: “¿Aquinon quimati on tlen toTeco quinemilia? ¿Aquinon huelis quimachtis Dios?” Pero tejhuamej ticpiaj on Espíritu Santo yejhuan techititia tlilon Cristo quinemilia.

3

Tiitetequipanojcaxihuan Dios

1 Nocnihuan, xohuel onemechnotz quen niquinnotza on yejhuan yochicajquej ipan intlaneltoc, yej onemechnotz quen on yejhuan quichihuaj on tlen inxcuajli elehuilis* quinequi, niman quen nenselicacoconej itech Cristo.

2 Onemechmachtij on temachtijli yejhuan xtepopoloj, pampa nemejhuamej quen nenselicacoconej yejhuan xe huelij tlacua, yej san oc† chichij‡. Niman hasta aman nenquiteititiaj ica xhueli nencajsicamatij on temachtijli yejhuan más ohuijticaj§ **3** pampa oc nenquichihuaj on tlen xcuajli nemotlalnacayo quinequi quen on tlalticpactlacamej quichihuaj. Tla nemonexicolitztoquej niman nemocualanijoquej niman nemoxexelojoquej, tla ijcon, tej, nenquichihuaj on tlen nemotlalnacayo quinequi niman nemohuicaj quen on occsequimej tlalticpactlacamej nohuicaj. **4** Ijcuac nemotzajlan semej quijtohua: “Nejhua ninopohua itech Pablo”, niman ocse quijtohua: “Nejhua ninopohua itech Apolos”, nemohuicaj quen on xcuajli tlalticpactlacamej nohuicaj.

5 ¿Tlinon, tej, itequiu Pablo noso Apolos? Tejhuamej, san tiitequitcahan Dios yejhuan totechcopa onenquineltocaquej toTeco Cristo. Cada se de tejhuamej san oticchijquej on tequitl yejhuan toTeco otechmacac. **6** Nejhua onictocac on xinachtli ipan nemoyojo, niman Apolos ocatequij, pero Dios yejhua oquiscaltij. **7** Tla ijcon, tej, nion on yejhuan quitoca on xinachtli, nion on yejhuan catequiya, itlaj quijtosnequi, yej san Dios hueyi quijtosnequi, pampa yejhua quiscaltia on tlatoctli. **8** On yejhuan quitoca on xinachtli niman on yejhuan catequia san nochijquej. Pero cada se Dios quitlaxtlahuilis quen nonequi itequiu. **9** Apolos niman nejhua tiitetequipanojcaxihuan ipan itequiu Dios, niman nemejhuamej sa no ijqui quen on tlajli yejhuan Dios quitequiti.

Noso nemejhuamej sa no ijqui quen on cajli yejhuan Dios quichijchijtac. **10** Dios ica iteicnelilis* onechcalaquej quen nitlayecanquetl tepanchijchiquetl. Onictlalij on cimiento campa notlalis se cajli, niman ocse tlacatl oquetzteu on tepantli ipan on cimiento. Pero cada se ma nota sa no yejhua quen ijqui cuajli quetztehuas on tepantli. **11** On cimiento ye oncaj yejhuan sa no yejhua Jesucristo, niman xacaj huelis ocse quitlalis. **12** Ipan on cimiento se calchijquetl huelis quiscaltis on tepantli ican oro, plata noso ican caultzitzintin temej. Noso yejhua huelis quichijchihuas ican cojtlit, sacatl noso milohuatl. **13** Pero ipan on tonajli ijcuac tlatlalpolihuis niman Dios quitlaxtlahuilis nochij tlacatl, itequiu cada se napanextis tla oquichiu cuajli noso xcuajli. Ipan on tonajli huajlas tlilt yejhuan quitlajtlatas itequiu. Nochi yejhuan xcuajli tequitl tlatlas niman nochi yejhuan cuajli tequitl quixicos on tlilt. **14** Tla itequiu se tlacatl quixicos on tlilt, Dios quimacas cuajli itlaxtlahuil. **15** Pero tla itequiu se tlacatl xquixicos on tlilt, yejhua quipolos itequiu, masqui sa yejhua nomaquixtis. Pero yejhua nomaquixtis quen se tlacatl yejhuan huajquistiquisa tlajcotian on tlilt ne ichan. Ichán tlatlas pero yejhua nomaquixtis.

16 ¿Tlen xnenquimati ica nemejhuamej nenitiopan Dios, niman ica iEspíritu Dios chanti ipan nemoyojo? **17** Tla yacaj quioxoxotonis on itiopan

* **3:1** deseos † **3:2** todavía; sanquen ‡ **3:2** maman § **3:2** difícil * **3:10** su misericordia

† **3:12** madera

Dios, sa no yejhua Dios quixoxotonis on tlacatl, pampa itiopan Dios yejyejti-caj, niman on tiopan sa no nemejhuamej.

¹⁸ Ma ca yacaj ma nocajcayahua. Tla yacaj quinemilia tlamatqui pampa quipia tlamatquilitli, yejhuan quisa ipan in tlalticpactli, ma nocuepa quen on yejhuan xtlamatqui itech in tlalticpactli, para ijcon melahuac quipias on tlamatquilitli yejhuan quisa itech Dios. ¹⁹ Ma ijcon nocuepa, pampa para Dios on tlamatquilitli yejhuan quisa ipan in tlalticpactli xitlaj‡ quijsnequi. Niman in Yectlajcuilojli quijsnequi: “Dios quintlajcali on sanoyej§ tlamatquej sa no yejhua ica on intlacajcayahualis.” ²⁰ Niman in Yectlajcuilojli no quijsnequi: “On toTeco quimatzticaj ica on tlen quinemiliaj on tlamatquej xitlaj quijsnequi.” ²¹ Yejhua ica xacaj quitocarohua nohueyimatis pampa quitoca se temachtijquetl yejhuan quinemilia ica más hueyi quijsnequi. Dios omechmacac nochimej on temachtijquej niman nochi on tlajtlamach* para mechpalehuis. ²² Nejhua Pablo, Apolos, Pedro, on tlalticpactli, on nemilistli, on miquilistli, yejhua in tonaltin niman on tonaltin huajlau, Dios oquintlalij para mechpalehuisquej. ²³ Niman nemejhuamej no nenteyaxcahan† itech Cristo niman Cristo teyaxca itech Dios.

4

On tlaneltoquej nonequi nohuicasquej ipan iejemplo Pablo

¹ Nemejhuamej nonequi nentechpiasquej quen itequitcahuau Cristo, yejhuan ticpiaj on tequitl para tictemachtiaj on tlen Dios quichtacapiaya. ² Aman, tej, on tlen más nonequi para itech se tequitquetl sa no yejhua in, ma cuajli quitlacamati nochi itlanahuatilhuan on iteco. ³ Xmás nicnequi nicmatis quen ijqui nemejhuamej niman on huejhueyixtoquej ipan in tlalticpactli nechixtlalosquej ica on tlen nicchihua niman nitemachtia. Nion nejhua xnoca ninixtlalojticaj. ⁴ Ijcuac nicnemilia quen ninohuica, notlamachilis xnechtlajtlacolmaca. Pero yejhua in xquijsnequi ica xnicpia tlajtlacojli. ToTeco yejhua nechtlajtlacolmacas tla nicpia tlajtlacojli. ⁵ Yejhua ica, tej, ma ca yacaj xtlajtlacolmacan itlaj ica ijcuac xe yejco on tonajli ijcuac huajlas toTeco. Ipan on tonajli yejhua quipanextis nochi on yejhuan iyanticaj, niman quiteititis quen cada se quinemilia ipan iyojlo. Niman ijcuacon Dios quiyectenehuas cada se quen nonequi.

⁶ Nocnihuan, in tlen nemechijlia, nemechijlia para mechpalehuis. Ninotlalia ihuan Apolos quen ejemplo para itechcopia toejemplo nenquimatisquej quen nonequi nemohuicasquej ijcon quen on Yectlajcuilojli temachtia. Niman tla nemohuicasquej quen on Yectlajcuilojli temachtia, xnemohueyimatisquej, niman ijcon xnenquinchicoitasquej se ihuan ocse temachtijquetl. ⁷ Ma ca xnemili tla Dios omitztlalij más tihueyixtacaj xquen on ocsequimej. ¿Itlaj ticpia yejhuan xDios omitzmacac? ¡Ca, xitlaj!*! Yej nochi tlen ticpia Dios omitzmacac. Tla ijcon, tej, ¿tlica† timohueyimati quen on tlen ticpia sa no tejhua motechquisticaj?

⁸ Nenquinemiliaj ica xmechpolohua itlaj tlatiochihualistli niman ica nenquimopialiaj miyec ixpan Dios. Niman masqui xqueman otitohuicaquej quen reyes, nemejhuamej nemohuicaj quen reyes yesquiaj. Nicnequisquia melahuac nenreyes yesquiaj, pampa tla ijcon nentequihuajquej yesquiaj niman tejhuamej no titequihuajquej yesquiaj nemohuan. ⁹ Nejhua nicnemilia ica tejhuamej apóstoles Dios otechcau hasta tlacuitlapán, quen on

‡ 3:19 nada; coxtla § 3:19 mucho * 3:21 cosas † 3:23 le pertenecen; nenteyaxcahan, nentehuaxcahan, nentetlatquihuan * 4:7 nada; coxtla † 4:7 ¿por qué?; ¿tline?

tlacamej yejhuan yoquintlahuelcajquej ipan miquilistli, niman ica tlacatij quen on yejhuan tetlamahuisoltiaj imixpan on tlacamej niman on ilhuicacte-quitquej[‡]. ¹⁰ On tlalticpactlacamej quinemiliaj ica semi xtitlamatquej pampa tictlacamatij Cristo, niman nemejhuamej nenquinemiliaj ica sanoyej[§] nentlamatquej. On tlalticpactlacamej quinemiliaj ica xtitlajtlajtohuaj ican tequi-huajyotl niman nemejhuamej nenquinemiliaj ica nentlajtlajtohuaj ican hueyi tequi-huajyotl. On tlalticpactlacamej xtechtancaquij, yej nemejhuamej mechtlacaitaj. ¹¹ Hasta aman titlajyohuiyaj ican apistli niman amictli, niman techpolohua totlaquen. On tlacamej sanoyej techtlajyohuilitaj niman xticpiaj tochan ipan in tlalticpactli. ¹² Tisiahuij sanoyej ica titequitij ican tomahuan. Ijcuac techhuijhuicaltiaj, tictlajtlaniliaj Dios ma quintiochihua on yejhuan techhuijhuicaltiaj. Niman ijcuac techtlahuelitaj niman techtlajyohuilitaj, tejhuamej tiquimijyohuiyaj. ¹³ Ijcuac techtenehuiliaj on tlen xcuajli, tiquinnanquiliaj ica tlajtojli yejhuan yemanqui. Hasta ipan in tonajli techpiaj quen tlajsojli niman quen itlaj tentlacahuijli.

¹⁴ Nejhua nemechtlajcuilhuiya in tlajtlamach* xpara nemechpinajtia, yej para nemechtlacanonotza, pampa nennotlajsojcacone-huan. ¹⁵ Masqui nenquipiasquiaj canaj majtlactli mil temachtijquej yejhuan mechmachtisquiaj ican itemachtil Cristo, xnenquipiasquiaj miyec tajtli. Nejhua oninochiu quen nemotaj, pampa ijcuac onemechijlij on temachtilistli yejhuan quitemaca temaquixtilistli, onenquiselijquej. ¹⁶ Yejhua ica, tej, nemechtlachicahuilia xmohuicacan quen ninohuica. ¹⁷ Niman nemechtitlanilia Timoteo para mechpalehuis nenquelnamiquisquej quen ninohuica. Yejhua quen notlajsojcacone uitech toTeco niman nochipa quichihua quen quitocarohua para toTeco. Yejhua mechelnamictis quen ijqui niceycana nonemilis ihuan Cristo, no ijqui quen nitemachtia nochihuiyan campa niau ipan nochimej on tiopantin.

¹⁸ Semej nemejhuamej nohueyimatij, pampa quinemiliaj xqueman nias nemechonotzas. ¹⁹ Pero saniman nias nemechontas tla toTeco quinequi. Ijcuacon niquitas tla on nohueyimatquej melahuac quipiaj poder noso san tlajtlajtohuaj. ²⁰ Campa Dios tlamandarohua oncaj xsan tlajtoltin, yej no oncaj poder. ²¹ ¿Tlinon, tej, nenquinequij? Ijcuac nias nemotech, ¿nenquinequij para nemechnotzas ican notlahuel, noso nemechnotzas ican tetlajsojtlalistli† niman yolyemanilistli?

5

Pablo quitlajtlacolmaca se tlacatl yejhuan quipia itlacpanan quen imosaj

¹ Machiya, tej, ica nemotzajlan nemi se tlacatl yejhuan quipia itlacpanan quen imosaj. On quen on tlajtlacojli sanoyej* xcuajli hasta on yejhuan xquixmatij Dios xijcon quichihuaj. ² Aman, tej, xnicmati quen ijqui oc† hueli nemohueyimatij. Nonequi para nemejhuamej nemajmanasquiaj. Niman nonequi para xquixtican nemotzalan on tlacatl yejhuan quichihua on quen on tlajtlacojli. ³ Masqui nejhua xompa nemohuan ninemi, quen ompa nemohuan ninemisquia. Tla ijcon, tej, on tlacatl yejhuan quichihua on quen on tlajtlacojli ye cuajli yonictlajtlacolmacac quen nictlajtlacolmacasquia tla ompa ninemisquia. ⁴⁻⁵ Ijcuac nemosentlalijsquej ican itocatzin toTeco Jesucristo, nejhua quen ompa nemohuan ninemisquia. Ipan on tonajli xmactilican Satanás on tlacatl ican ipoder Jesucristo yejhuan nemohuan

[‡] 4:9 ángeles: Angeles tequitij ne ilhuicac niman nican ipan in tlalticpactli. § 4:10 mucho * 4:14 cosas † 4:21 amor * 5:1 muy † 5:2 todavía; sanquen

onyas para ma tlajyohui itlalnacayo. Ijcon ialma nomaquixtis ijcuac toTeco Jesucristo huajlas.

⁶ Xquitocarohua nemohueyimatisquej. ¿Tlen xnenquimatiij on tlajtojli yejhuan quijtohua: “San achijtzin tlaxocolilistli‡ cajcocui nochí on tixtli de harina”? ⁷ Yejhua on tlacatl yejhuan quichihua in tlajtlacojli quen on tlaxocolilistli yejhuan cajcocui nochí on tixtli. Yejhua ica xquixtican on tlacatl para ma ca ma quimijtlacojtia on ocsequimej ican itlajtlacol. Ijcuacon nennemisquej quen yejhua on tixtli yejhuan xquipia tlaxocolilistli. Nicmati ica melahuac nenchipajcanemij, pampa sa no Cristo san topampa oqui-huentlalijquej quen on borreguito yejhuan quiuentlaliayaj ipan on ilhuitl itoca pascua. ⁸ Aman, tej, ijcon quen on hebreos xquicuaj pan yejhua quipia tlaxocolilistli ipan on ilhuitl pascua, no ijqui tejhuamej ma tiquixtican nochí xcuajlilistli niman tlajtlacojli totzajlan. Niman ijcon ma tinemican ixpan Dios ican cuajli toyol niman ican melajcanemilistli.

⁹ Ipan ocse notlajcuilolamu onemechijlij para ma ca inhuan xmonelocan on yejhuan ahuilnemij. ¹⁰ Pero nejhua xonemechijlis nec xquintlalc-ahuican on yejhuan xquixmatij Dios. On, tej, melahuac ica yejhuatej ahuilnemij, sanoyej tlamach quinejnequij quipiasquej, tlachtequij niman quinyectenehuaj on tlamachijchiutin intajtzitzinhuan. Pero para huelisquia nenquintlalcahuisquiaj nonequisquia nenquisasquiaj ipan in tlalticpactli. ¹¹ Nejhua, tej, yej nemechijlisnequiya ma ca ihuan xmonelocan on yejhuan notenehua quineltoca Cristo, pero nemi ipan ahuilnemilistli, noso sanoyej tlajtlamach§ quinoyaxcatisnequi, noso quinyectenehuaj on tlamachijchiutin itajtzitzihuan, noso tetejtenehua, noso tlahuani, noso tlachtequi. Nion siquiera ihuan xtlacuacan on yejhuan ijcon quichihua. ¹²⁻¹³ Xnotequiu para niquintlajtlacolmacas on xtlaneltocaquej. On quenomej Dios quint-lajtlacolmacas. Nemejhuamej, tej, nonequi nenquintlajtlacolmacasquej on tlaneltoquej. Yejhua ica, tej, xquixtican nemotzajlan on tlajtlacolejquetl.

6

On tlaneltoquej xquintocarohua noteixpanhuisquej intech on tequihuajquej yejhuan xtlaneltocaj

¹ Ijcuac semej nemejhuamej nenquipiaj tlinon ica nenquiteixpanhuaj yacaj ocse tocniu, ¿hasta tlica* conteixpanhuiya intech on tequihuajquej yejhuan xtlaneltocaj niman xquiteixpanhuiya intech on iyaxcahuan† Dios? ² ¿Tlen xnenquimatiij ica nemejhuamej yejhuan nenteyaxcahuan itech Dios nenquintlajtlacolmacasquej on tlalticpactlacamej? Niman tla ijcon nen-quichihuasquej, ¿tlen nion on xnenhuelij nenquixtlalohuaj on tlajtlamach‡ yejhuan xitlaj más hueyi quijtosnequi? ³ ¿Noso ca yej xnenquimatiij ica hasta on ilhucactequitquej§ tiquintlajtlacolmacasquej? Tla tejhuamej tiquintlajtlacolmacasquej on ilhuicactequitquej, tla ijcon, más huelis tiquintlajtlacolmacasquej on tlacamej yejhuan quichihuaj tlajtlamach ipan in nemilistli. ⁴ Tla ipan nemonemilis nenquipiaj tlinon ica nenquiteixpanhuisquej yacaj ocse tocniu, ¿tlica nenconteixpanhuiyaj intech on jueces yejhuan xtlaneltocaj? ⁵ Yejhua in quemaj niquijtohua para achi ma mechpinajti. ¿Tlen nemotzajlan xnemi nion se tlamatqui yejhuan quimatis quen ijqui quixtlalos

‡ 5:6 levadura § 5:11 cosas * 6:1 ¿por qué?; ¿tline? † 6:1 le pertenecen; iaxcahuan, ihuaxcahuan, itlatquihsan ‡ 6:2 cosas § 6:3 ángeles: Angeles tequitij ne ilhuicac niman nican ipan in tlalticpactli.

niman quinyectlalis nemocnihuan? ⁶ ¿Ijqui nonequi para se tocniu quiteixpanhuis yacaj ocse intech on jueces yejhuan xtlaneltocaj? ¡Nemechijlia, tej, ica ca!

⁷ San pampa ijcon nemoteixpanhuijtoquej, nenquiteititijtoquej ica sannenca nentlaneltocaj. Más cuajli nenquijyohuisquej on ijcuac xcuajli mechchihuiliaj. Más cuajli nenquimocahuilisquej ma mechculican itlaj. ⁸ Pero nemejhuamej yej xijqui nenquichihuaj. Xcuajli nenquitechihuiliaj niman nentetlachtequiliaj. Niman nenquinchihuiliaj yejhua on nemocnihuan itech Cristo. ⁹ ¿Tlen xnenuquimatiij ica on xcuajcualtin tlacamej xhuelis calaquisquej ne campa Dios tlamandarohua? Ma ca xmocajcayahuacan, yej cuajli xmatican ica on yejhuan ahuinemij, noso on yejhuan quiyectenehuaj on tlamachijchiutin intajtzitzihuan, xcalaqueisquej ne campa Dios tlamandarohua. No xcalaqueisquej on yejhuan sihuapajpatlaj, noso tlacapajpatlaj, noso on sihuamej yejhuan quelehuaj sihuamej, noso on tlacamej yejhuan quelehuaj tlacamej. ¹⁰ Niman no xcalaqueisquej ne campa Dios tlamandarohua on yejhuan tlachtequij, yejhuan sanoyej* tlajtlamach quinoyaxcatisnequi, yejhuan tlahuancanemij, yejhuan tetejtenehuaj, niman on yejhuan tlaixpachojquej. ¹¹ Sequimej nemejhuamej nenquichihuayaj on quen on tlajtlacojli. Pero itechcopa toTeco Jesucristo, niman itechcopa on iEspíritu toDios, yomechyochipajquej niman nemejetoquej itech Dios, niman sa no Dios oquijtoj ica motlajtlacolhuan yonotlaxtlau.

Icuerpo se tlacatlyejhua itiopan on Espíritu Santo

¹² Ijquin nijtohua: “Nochi tlen nicnequi, huelis nicchihuas.” On melahuac, pero xnochi tlen huelis nicchihuas huelis nechpalehuis ica on tlen cuajli. Masqui huelis niquijtos: “Nochi tlen nicnequis huelis nicchihuas”, pero nejhua xitlaj† nicnocahuilis ma nechchihualti para nicchihuas on tlen xcuajli.

¹³ Niman no nijtohua ijquin: “On tlacuajli oncaj para calaqui ipan on teiji niman on ijtitl‡ oncaj para quiselia on tlacuajli.” On melahuac, pero se tonajli yes xoc onyasquej tlacuajli nion ijtitl pampa Dios ijqui quichihuas. Pero on tocuerpo xoncaj para ahuinemilistli. Yej ticpiaj tocuerpo para ticchihuasquej on tlen toTeco quinequi, niman toTeco nemi para quejehuas tocuerpo. ¹⁴ Niman ijcon quen Dios ican ipoder oquiyolitij niman oquetzteu Cristo ne ipan itlalcon, no quichihuas ijquin tohuan.

¹⁵ ¿Tlen xnenuquimatiij ica nemocuerpo yejhua se parte ipan icuerpo Cristo? Tla ijcon, ¿nictlalis in nocuerpo yejhuan se parte icuerpo Cristo san secan ihuan icuerpo se sihuatl yejhuan ahuinemi? ¡Ca, xqueman! ¹⁶ ¿Tlen xnenuquimatiij nemejhuamej ica ijcuac se tlacatl nosentlalia ihuan se sihuajahuilnenquetl, yejhuatej san se cuerpo huajnochihuaj? In Yectlajcuilojli ijquin quijtohua: “On omemej san se cuerpo huajnochihuua.” ¹⁷ Pero ijcuac se tlacatl nosentlalia san secan ihuan on toTeco, san se espíritu huajnochihuaj.

¹⁸ Xtlalcahuican, tej, on ahuinemilistli. Xoncaj ocse tlajtlacojli yejhuan quijtlacohua icuerpo se tlacatl xquen yejhua on quen on tlajtlacojli. ¹⁹ ¿Tlen xnenuquimatiij ica nemocuerpo yejhua itiopan on Espíritu Santo? Yejhua in Espíritu, Dios omechmacac, niman yejhua chanti nemopan. Ijcon, tej, nemocuerpo xnemoyaxca. ²⁰ Dios sanoyej patioj omechcou. Yejhua ica xtlacaitacan Dios ican nemocuerpo, niman ican nemoalmas, pampa in ometipan yejhua iyaxca Dios.

* **6:10** muchas † **6:12** nada; coxtla ‡ **6:13** estómago

7

Pablo tetlacanonotza quen ijqui nonequi nemisquej yejhuan nonamictiaj

¹ Aman nemechnanquilia yejhua ica on tlen tlajtlamach* onennechtlij-toltijquej ipan nemotlajcuilolamau. Melahuac cuajli yesquia para se tlacatl xnonamictisquia. ² Pero pampa miyequej ahuilnemij, más cuajli para cada tlacatl quipias isihuau, niman cada sihuatl quipias ihuehuentzin. ³ On tehuehuentzin nonequi quimactilis isihuau nochi tlen nonequi quiselis. Niman on tesihuau no ijqui nonequi quimactilis ihuehuentzin nochi tlen nonequi quiselis. ⁴ Ijcuac on sihuatl nonamictia, xoc yejhua iyaxca† on itlalnacayo, yej quimactilia ihuehuentzin. Sa no ijqui, tej, on tlacatl ijcuac nonamictia, xoc yejhua iyaxca on itlalnacayo, yej quimactilia on isihuau. ⁵ Ma ca xmonenequican‡ nennemisquej quen nemij on yehuan yononamictijquej. Pero tla saman nenquitlapejpeniaj nemoxelosquej se tiempo para san ica nemocahuasquej nenquichihuasquej oración, huelis para nemonenequisquej tla achtoj san se nemoyojo nenquipiaj. Pero tla yotlan nenquichihuaj oración, más cuajli para ocsejpa nemohuicasquej quen quitocarohua nemij on yejhuan yononamictijquej. Ijcon xchihuacan para ma ca itlaj ica mecht-lajcalis Satanás ipan tlajtlacojli.

⁶ On tlen yonemechtajcuihuij xquijtosnequi ica nemechnahuatia para xmonamictican, yej nemechcahuilia. ⁷ Sa no nejhua nicnequisquia para ma ca xmonamictican quen nejhua xninonamictia, pero nochi tisesentlaman-tiquej. Sequimej Dios oquintlayocolij insihuau noso inhuehuentzin, niman ocsequimej oquintlayocolij impaquilis masqui xnonamictiaj.

⁸ Aman nemechnotza nemejhuamej yejhuan xnemonamictiaj niman ne-mejhuamej yejhuan nencahualtzitzintin. Nemechijlia ica más cuajli yesquia tla no ijqui nocahuasquiaj quen nejhua. ⁹ Pero tla xhueli nemoteltlaliaj, xmonamictican, pampa más cuajli nemonamictisquej xquen nenquipi-asquej elehuilistli§ hasta campa xoc hueli.

¹⁰ Aman nicpia se tlanahuatijli para on yejhuan yononamictijquej. In xejhua notlanahuatil, yej itlanahuatil toTeco. On tlanahuatijli sa no yejhua in. On sihuatl ma ca ma nocacahua noso noxotoni ihuan ihuehuentzin. ¹¹ Pero tla se sihuatl nocacahua noso noxotonia ihuan ihuehuentzin, ma ca ma nonamicti ihuan ocse tlacatl, noso tla hueli ma noyoltlali ihuan ihuehuentzin. Niman no ijqui on tlacatl ma ca ma nocacahua noso noxotoni ihuan isihuau.

¹² Niman para on ocsequimej niquinnahuatia, xican itlajtol toTeco, yej ican notlajtol, ica tla se tocniu quipia isihuau yejhuan xquineltoca Cristo, niman on sihuatl masqui ijcon paqui para ihuan chanti, ma ca ma nocacahua noso noxotoni ihuan. ¹³ Niman tla yej, yejhua on tocniu sihuatl quipia ihuehuentzin yejhuan xtlaneltoca, niman on tlacatl masqui ijcon paqui para ihuan chanti, ma ca ma nocacahua noso noxotoni ihuan. ¹⁴ Ijcon ma quichihua pampa se tlacatl yejhuan xquineltoca Cristo quiselia se tlatiochi-hualistli itech Dios pampa isihuau quineltoca Cristo. Niman no ijqui se si-huatl yejhuan xtlaneltoca quiselia se tlatiochihualistli pampa ihuehuentzin tlaneltoca. Tla xijcon yesquia, inconehuan xhuelisquiaj quiselisquiaj itla-tiochihualis Dios, pero aman quiseliaj. ¹⁵ Pero tla on tehuehuentzin noso on tesihuau yejhuan xtlaneltoca yejhua quinequi tecahuas noso noxotonis, ma quichihua. Ijcon, tej, on tocniu tlacatl noso on tocniu sihuatl nocahuas tlamacajtli, pampa Dios otechnotz para tinemisquej ican yolsehuilistli.

* **7:1** cosas † **7:4** le pertenece; iaxca, ihuaxca, itlatqui ‡ **7:5** no se nieguen § **7:9** deseos

16 Sihuatl, tejhua xticmati, pero cas mohuehuentzin quiselis temaquixtilistli san mopampa. Noso tejhua tlacatl, tejhua xticmati, pero cas mosihuau quiselis temaquixtilistli san mopampa.

Nonequi tinemisquej quen Dios otechnotz

17 Cada se ma nohuica quen toTeco oquitlalij ipan itequiu, niman ma nemi quen nemiya ijcuac opeu quineltoca Cristo. Yehua in nitlanahuatia ipan noch on tiopantin. **18** In se ejemplo. Tla yacaj ye quipiaya on nescayotl ipan inacayo itoca circuncisión ijcuac opeu quineltoca Cristo, ma ijqui nocahua. Niman tla yacaj xquipiaya on nescayotl ijcuac opeu quineltoca Cristo, ma ijqui nocahua **19** pampa xtlaj* quijtosnequi tla ticpias circuncisión noso ca. Yej hueyi quijtosnequi tla tictlacamatis itlanahuatilhuan Dios. **20** Cada se, tej, nonequi nemis quen nemiya ijcuac opeu quineltoca Cristo. **21** Tla yacaj tlanamactli catca ijcuac oquineltocac Cristo, ma ca ma nopajsolo yejhua ica on. Pero tla yejhua quita ica huelis quimacahuasquej, ma quichihua canica para xoc tlanamactli yes. **22** Ijcon cuajli para quichihuas, pampa ijcuac se tlanamactli quineltoca Cristo, nocahua tlamacactli itech ipoder Satanás. Sa no ijqui, on tlacatl yejhuan xtlanamactli catca itech se tlacatl yejhuan iteco, nocuepa itlanamacau Cristo ijcuac pehua quineltoca. **23** Sanoyej patioj omechcou Cristo. Yejhua ica ma ca xmocahuilican mechpiacan tlanamactin on tlacamej. **24** Ijcon, tej, nocnihuan, cada se de nemejhuamej xnemican quen nemiya ijcuac onenpejquej nenquineltocaj Cristo, niman xmohuicacan ihuan Dios.

Pablo quintlacanonotza on yejhuan xtehuan nemi niman on cacahualtin

25 Aman nemechnotza on yejhuan xe nonamictaj. ToTeco xoquijtoj on tlen cuajli para ticchihuasquej, yej nemechijlia tlen nejhua nicnemilia. Niman nicnemilia ica nechmelahua† nenquitlalisquej nemoyojo notech ipampa on hueyi teicnelilistli‡ yejhuan toTeco yonechmacac. **26** Nejhua nicnemilia ica se tlacatl noso se sihuatl más cuajli nocahuas quen aman nemi. Ijquin nicnemilia ipampa on xcuajli tonaltin yejhuan ticpanohuaj. **27** Tla yotimonamictij, ma ca tehuan timocacahuas. Niman tla xe timonamictia, ma ca xnejnequi timonamictis. **28** Pero tla se tlacatl nonamictia, xtlajtlacohua. Niman tla se ichpochtli nonamictia, no xtlajtlacohua. Pero on yehuan nonamictiaj tlajtlamach quimpajsolohua ipan in nemilistli, niman nejhua nicnequisquia ma ca ma quipiacan.

29 Nocnihuan, tlinon nejhua niquijtosnequi sa no yejhua in: xoc ticpiaj miyec tonaltin. Yejhua ica ipan in quesqui tonaltin, on yejhuan yononamictijquej ma nemican quen xnonamictisquiaj para ma quichihuacan itequiu toTeco. **30** On yejhuan najmanaj, ma nemican quen xnajmanasquiaj, niman on yejhuan paquij, ma nemican quen xpaquisquiaj, niman on yejhuan tlacohuaj, ma nemican quen xinyaxca yesquia on tlen quicoahuaj. **31** On tlacamej yejhuan quinyoltilana niman quinpactia on tlajtlamach yejhuan quisa ipan in tlalticpactli, xquitocarohua ica nopactisquej on tlajtlamach, pampa on noch on san panos niman tlamis.

32 Nicnequisquia para ma ca xconmatztacan on tlajtlamach yejhuan oncaj ipan in tlalticpactli. On yejhuan xsihuahuaj notequimaca ica on tlajtlamach yejhuan oncaj ipan itequiu toTeco pampa yejhuatej quinequij quipactisquej. **33** Pero on yejhuan sihuahuaj, notequimaca ica on tlajtlamach yejhuan oncaj ipan in tlalticpactli pampa yejhua quinequi quipactis isihuau. **34** No ijqui, tej, ocse tlamantic notequimaca on sihuatl yejhuan tehuan nemi

* 7:19 nada; coxtla

† 7:25 merezco

‡ 7:25 misericordia

niman on yejhuan ichpochtli. On yejhuan ichpochtli notequimaca ica on tlajtlamach yejhuan oncaj ipan itequiu toTeco para ijqui yejyejticaj itech Dios sanquen ican itlalnacayo niman ialma. Pero on sihuatl yejhuan tehuan nemi, notequimaca ica on tlajtlamach yejhuan oncaj ipan in tlalticpactli para quipactia ihuehuentzin.

³⁵ Yejhua in tlen niquijtohua, niquijtohua para nemechpalehuis, xpara yej nemechteltalis ica nemonamictisquej. Nicnequisquia xnemican cuajli, niman xmotemacakan ican nochi nemoyojlo ipan itequiu toTeco.

³⁶ Pero tla yacaj tajtli quinemilia ica más cuajli para se ichpoch ma nonamicti pampa ye ichpochlamajtzintitiu niman quita ica más cuajli para nonamictis, ma quichihua on tajtli quen yejhua quinequis. Huelis nonamictis, yejhua on xtlajtlacojli. ³⁷ Pero tla ocse tajtli ican nochi iyojlo niman xpampa polihui, yej iselti quinemilia ica cuajli niman quisetlalia ipan iyojlo para quejehuas ichpoch nochipa iselti, cuajli quichihua. ³⁸ Ijcon, tej, on yejhuan quinamictia ichpoch cuajli quichihua, pero on yejhuan xquinamictia ichpoch más cuajli quichihua.

³⁹ On sihuatl yejhuan tehuan nemi, nemi quen salijticaj ica on tlanahuatijli ihuan ihuehuentzin chica on ihuehuentzin nemi. Pero tla on ihuehuentzin yomic, yejhua huelis ocsejpa nonamictis san aquinon ihuan quinequis. Pero tla nonamictis, ma quichihua ihuan se yejhuan quineltoca toTeco. ⁴⁰ Pero nicnemilia ica más nemisquia ican pactli, tla xoc nonamictisquia. Niman no nicnemilia ica iEspíritu Dios onechmacac tetlacanonotzajli yejhuan yonechmacac.

8

Pablo tetlacanonotza ica on tlacuajli yejhuan yoquihuentlalijcay intech on tlamachijchihuaultin intajtzitzihuan

¹ Aman nemechnanquila on tetlajtoltlistli yejhuan onennechtlalilijquej yejhua ica on tla huelis nocuas on tlacuajli yejhuan yoquihuentlalijcay intech on tlamachijchihuaultin intajtzitzihuan. Melahuac tejhuamej ticmatij ica yoticajscamatquej ica on tlacuajli. Ijcuac se tlacatl quinemilia ica cuajli cajsicamati, on cajsicamatilistli quichihua para ica nohueyimati, pero on tetlajsojtlalistli* techmelajcatlalia ipan totlaneltoc. ² Tla yacaj quinemilia cajsicamati tlajtlamach†, quijtosnequi ica oc‡ xcajsicamati quen nonequi.

³ Pero tla yacaj quitlajsojtlal Dios, Dios cuajli quixmatzticaj.

⁴ Yejhua ica, tej, ica on tlacuajli yejhuan yoquihuentlalijcay intech on tlamachijchihuaultin intajtzitzihuan, ticmatztoquej ica nion se xoncaj noso xnemi yejhuan melahuac Dios de yejhuan on tlamachijchihuaultin intajtzitzihuan. Niman no ticmatztoquej ica san se Dios nemi. ⁵ Masqui onyasquiaj ne ipan cielo§ noso ipan in tlalticpactli on tlajtlamach yejhuan notenehuasquia diores, niman masqui onyasquiaj miyequej yejhua in diores niman tecomej, ⁶ para tejhuamej san se Dios ticpiaj. Yejhua toTajtzin yejhuan oquitlalij nochi tlajtlamach niman tejhuamej tinemij para yejhua. Niman no san se toTeco ticpia, niman on toTeco yejhua Jesucristo. Yejhua itechcopia onotlalij nochi tlajtlamach niman itechcopia tinemij.

⁷ Pero xnochimej tocnihuan quimatiij yejhua in. Sequimej yejhuan ijqui nohuicayaj quinhueyiliayaj on tlamachijchihuaultin intajtzitzihuan, hasta aman quinemiliaj ica quinhueyiliayaj ijcuac quicuaj on tlacuajli. Yejhua ica ijcuac quicuaj on tlacuajli, quinemiliaj quijtlacohuaj intlamachilis pampa

* ^{8:1} amor † ^{8:2} cosas ‡ ^{8:2} todavía; sanquen § ^{8:5} On cielo oncaj ne campa oncaj ajacatl, moxtli, metzli, tonajli, niman sitlalimej.

xe cojiquej impan intlaneltoc. ⁸ On tlen ticuaj xejhua techpatla ihuan Dios. Xitlaj ica techpalehuis tla ticuasquej, nion xitlaj^{*} ticpolosquej tla xticcuasquej. ⁹ Masqui hueli nencuaj nochí tlajtlamach, xmotacan sa no nemejhuamej para ma ca nenquitlajcalisquej ipan tlajtlacojli yacaj yejhuan xcojtic ipan itlaneltoc. ¹⁰ In se ejemplo. Tejhua timotenehua ica nochí ticmati ica on tlacuajli. ¿Tlinon nochihuas, tej, tla yacaj tocniu yejhuan xcojtic ipan itlaneltoc mitzitas titlacuas ne ijtic on tiopan campa oncaj on yejhuan tlamachijchihualtin intajtzitzihuan, niman no noyolehuas quicuas on tlacuajli yejhuan yoquihuentlalijquej? ¹¹ Tla ijcon, tej, mocniu yejhuan xcojtic ipan itlaneltoc polihuis san ipampa on tlen timotenehua ticmati. Xquelnamiqui ica Cristo no ipampa omic. ¹² Ijcuac ijcon titlajtlacohua itech se tocniu, niman tictlamachilispolohua, tejhua no titlajtlacohua itech Cristo. ¹³ Yehua ica, tej, tla nictlajcalis ipan tlajtlacojli se nocniu ipampa on tlen nicua, xqueman ocsejpa nicuas nacatl para ma ca nictlajcalis ipan tlajtlacojli.

9

Pablo oquijtoj on tlen quimelahuia quichihuasquej on apóstoles

¹ Nejhua, tej, nimacaticaj niman no niapóstol. Nejhua oniquitac toTeco Jesús. Niman sa no nemejhuamej onentlaneltocaquej ipampa on tequitl yejhuan nemotzajlan onicchiu para toTeco. ² Tla para ocsequimej xniapóstol, para nemejhuamej quemaj niapóstol, pampa nemejhuamej onenquinelto-quej on toTeco ijcuac onemechmachtij. On yejhua ica nesi ica melahuac niapóstol.

³ Aman nemechijlis quen ijqui ninomanahuis intech on yejhuan nechix-comacaj^{*} tlajtlamach. ⁴ Nechmelahuat[†] nicselis on tlen nechmacaj para nicuas niman niconis pampa on tequitl nicchihua. ⁵ Niman tla nicpi-asquia nosihuau, no nechmelahuasquia nicuicatinemisquia campa niau ijcon quen quichihuaj on ocsequimej apóstoles, niman icnihuan on toTeco, niman Pedro. ⁶ ¿Nenquinemiliaj ica san Bernabé niman nejhua ica oncaj titequitisquej ican tomahuan para sa no tejhuatej titotequipanosquej chica titemachtiaj? ⁷ Xacaj sa no yejhua notlaxtlahuilia tla tequitl quen soldado. Niman on yejhuan quitoca uvas hueli quicua on tlacyotl yejhuan quisa ipan icojtlaquilyo. Niman on yejhuan quimpixtinemi on borreguitos hueli xconi on leche ijcuac yoquimpatzcac. ⁸ Niman ma ca xquijtocan ica san nicnejnemilia on tlen nemechijlia pampa on itlanahuatil Moisés on ijqui quijtohua. ⁹ Ijquin tlajcuilnesticaj ipan on itlanahuatil Moisés: “Ma ca xtentematlayoti on huacax ijcuac quiteinia on trigo chica cacahuayo quixtia.” Dios ijcon oquijtoj xsan pampa oquinmelnamic on huacaxtín, ¹⁰ yej pampa tejhuatej techajmatzticatca. Yejhua in tlanahuatil tlajto-hua ica tejhuatej yejhuan tiitlaquehualhuan toTeco. Yejhua ica, tej, san-quen on tlacatl yejhuan tlaxoponia[‡] niman on yejhuan pixca quitocarohua tequitisquej ican tlamachalistli[§] para cada se quiselis on tlacyotl yejhuan quitocarohua. ¹¹ Tla tejhuatej otictocaquej^{*} ipan nemoyojo on tlen yectli tlajtojli, tla ijcon ¿xno techtocarohua ticpixcasquej nemotzalan on tlen ica titopanoltisquej? ¹² Tla ocsequimej quinmelahuia nemotech quiselisquej on tlen ica notequipanosquej, tejhuatej más sanoyej[†] techmelahuia. Pero tejhuatej xticuij on tlen techmelahuia. Yej ocse tlamantic ticchihuaj. Nochi ticaluijyohuijtihuij para ma ca noteltlalis itlaj ica on cuajli tlajtojli de Cristo.

* ^{8:8} nada; coxtla * ^{9:3} me reprochan † ^{9:4} merezco ‡ ^{9:10} ara § ^{9:10} esperanza
* ^{9:11} sembramos † ^{9:12} mucho

¹³ Nemejhuamej cuajli nenquimatztoquej ica on yejhuan quichihuaj itequiu Dios ipan ihueyi tiopan on hebreos quiseliaj intlacual ne itech on tiopan. Niman on yejhuan quinhuentlaliaj on yolquej ne tlaixpan[‡] no quiseliaj on huentli quen cada se caxilia. ¹⁴ No ijqui, tej, otlanahuatij toTeco, para on yejhuan quiteijliaj on cuajli tlajtojli yejhuan quitemaca temaquixtilistli quinmelahua quiselisquej tlen quicuasquej itech on intequiu. ¹⁵ Pero nejhua xnicchihua itlaj on tlen nechmelahua. Nion aman xnemechijcuilohuilia yejhua in para itlaj xnechmacakan. ¡Nicnequisquia, tej, yej achtoj ma nimiqui para ma ca nemechtlatlanis xnechpalehuican!

¹⁶ Nejhua, tej, xquitocarohua ninohueyimatis ica nicteijlia on cuajli tlajtojli yejhuan quitemaca temaquixtilistli, pampa on yejhua nechtocarohua nicchihuas. ¡Lástima de nejhua, tla xnicteijlis on temachijli yejhuan quitemaca temaquixtilistli! ¹⁷ Yejhua ica, tej, tla nicchihuas pampa ijcon onictlapejpenij, toTeco nechtlaxtlahuilisquia. Pero xnicchihua pampa nejhua onictlapejpenij nicchihuas. San nicchihua pampa Dios onechnahuatij. ¹⁸ ¿Catlejhua, tej, notlaxtlahuil yejhua ica on? Notlaxtlahuil sa no yejhua on paquillistli yejhuan nicselia ijcuac nicteijlia on cuajli tlajtojli yejhuan quitemaca temaquixtilistli masqui xnictlani tomin. Ijcon xnicui on tlen nechmelahua nicselis pampa nitequiti quen temachtijquetl.

¹⁹ Masqui xnitlanamactli itech yacaj tlacatl, nochí tlacatl itech ninochihua tlanamactli para más miyequej niquinhuicas itech Cristo. ²⁰ Ijcuac ninemi intzajlan on hebreos, ninochihua quen yejhuan para niquinhuicas itech Cristo. In quijtosnequi ica ijcuac ninemi intzajlan on yejhuan quitlacamatij itlanahuatil Moisés, nictlacamati on tlanahuatijli masqui xnonequi para nictlacamatis on tlanahuatijli. Ijquin nicchihua para niquinhuicas itech Cristo on yejhuan quitlacamatij on tlanahuatijli. ²¹ Ijcuac ninemi intzajlan on yejhuan xquipiaj itlanahuatil Moisés, ninochuica quen yejhuan para niquinhuicas itech Cristo on yejhuan xquipiaj on tlanahuatijli. Yejhua in xquijtosnequi tla xnitlacamati itlanahuatil Dios, pampa nejhua melahuac nictlacamati itlanahuatil Cristo. ²² Ijcuac ninemi intzajlan on yejhuan xcojtiquej ipan intlaneltoc, nejhua ninochihua quen yejhuan para niquimpalehuis más ipan intlaneltoc. Yejhua ica nenquitaj ica ninochuica quen cada se nohuica para ijcon masqui sa quen ijqui hueli semej nomaquixtisquej. ²³ Niman nochí on nicchihua para on temachtijli yejhuan techmaca temaquixtilistli ma tequiti ipan inyojlo, niman para ijcon nicselis on tlati-ochihualistli yejhuan nechtocarohua.

²⁴ Nemejhuamej cuajli nenquimatztoquej ica ipan se tlacsalistli[§] miyequej tehuan notlatlanij, pero san se tetlani niman quiselia on tetlayocolijli. Nemejhuamej no ijqui xmotlatlanican ipan se tlacsalistli ixpan Dios, niman xmotlalocan para nenquitlanisquej on tetlayocolijli yejhuan Dios quinequi mechmacas. ²⁵ Nochimej yejhuan tehuan notlatlanij ipan se tlacsalistli, quejehuaj intlalnacayo para tlaxicosquej. Yejhuan para ijcon quichihuaj para tetlanij niman quiseliaj quen intetlayocolil se cuaxochitl tlachijchiutli ican xoxtli. Yejhuan quiseliaj on cuaxochitl yejhuan xhuejcahui oncaj, pero tejhuamej titotlatlanij para ticselisquej se tetlayocolijli yejhuan nochipa onyas. ²⁶ Yejhua ica, tej, ipan notlacsalis ixpan Dios, xsecan niconmelahua, niman xsa quen ijqui nicchihua itequiu Cristo quen quichihuaj on tlahuisoquetl yejhuan san ipan ajacatl panohua imatepayol. ²⁷ Notlalnacayo niquixtlamachtia quen nonequi para nechtlacamatis. Ijcon nicchihua para

[‡] 9:13 altar § 9:24 carrera

xnechquixtisquej ipan on tlacsalistli niman ijcon xnicpolos notetlayocolil ijcuac yotlan nicteijlia on itlajtoltzin Dios.

10

Pablo tetlacanonotza ica xquitocarohua quinhueyilisquej on tlamachijchi-jhaultin intajtzitzihuan

¹ Nicnequi, nocnihuan, para xmatican tlinon impan onochiu on toachtojtahuan yejhuan oyajquej ihuan Moisés. Nochimej yejhuamej onenquej itzintlan on moxtli, niman nochimej yejhuamej itlajcotian opanoquej on Mar Rojo. ² Ijcon, tej, ijcuac nochimej onocuatequijquej ica on moxtli niman ica on mar, onochijquej inomachtijcahuan Moisés. ³ Niman nochimej ocuajquej san se tlacuajli espiritual yejhuan Dios oquinmacac de ne ilhuicac. ⁴ Niman nochimej san se atl espiritual oconiquej yejhuan Dios oquinmacac itech on tetl. Niman on tetl quijtosnequi Cristo yejhuan ompa inhuan yaya. ⁵ Masqui ijcon oquiselijquej, más miyequej xoquipactijquej Dios, niman yejhua ica más miyequej omijmiquej imanyan on tlapatlaco.

⁶ Nochi on tlen tlajtlamach* onochiu para techititiaj ica ma ca tic-nejnequisquej on tlen xcuajli tlajtlamach quen yejhuamej oquichijquej. ⁷ Ma ca tiquinhueyilican on tlamachijchiutin intajtzitzihuan quen sequimej yejhuamej oquichijquej, pampa in Yectlajcuilojli ijquin quijtohua: “On tla-camej onotlalijquej para otlacuajquej niman otlahuanquej, niman quemaj opeu nijtotiaj.” ⁸ Nion ma ca tiahuilnemican quen sequimej yejhuamej oquichijquej, niman san ipan se tonajli omiquej sempoajli† huan yeyi mil tlacamej. ⁹ Nion ma ca tictlatlatacan iijyohuilis toTeco Dios quen sequimej yejhuamej oquichijquej, niman yejhua ica omiquej ijcuac oquincajcuajquej on cohuamej. ¹⁰ Nion ma ca itlaj xquijtohuilican Dios quen sequimej yejhuamej oquichijquej, niman yejhua ica oquinmictij on ilhuicactequi-quetl‡ yejhuan quipia poder para temictia.

¹¹ Nochi yejhua on yejhuan impan onochiu on toachtojtahuan onotlajcuioltlalij ipan on Yectlajcuilojli quen se ejemplo para ma ca no ijqui ticchihuasquej, yejhuan tinemij ipan in sa ica nochitontal. ¹² Yejhua ica on yejhuan quinemiliaj melajcanemij, ma notakan sa no yejhuamej para ma ca huetzisquej. ¹³ Xmatican ica on tetlatlatalistin yejhuan nenquimpiaj sa no ijqui on tetlatlatalistin yejhuan ocsequimej tlalticpactlacamej quimpiaj. Pero Dios yolmelajqui niman mechpalehuis para on tetlatlatalistin ma ca nemopan huajlacan yejhuan sanoyej temojtij yejhuan nemejhuamej xhuelis nenquixicosquej. Yej ijcuac mechtlatlatasquej, Dios mechmacas se ojli campaca huelis nenquitlalcahuisquej on tetlatlatalistli, niman ijqui huelis nenquixicosquej.

¹⁴ Yejhua ica notlajsojcaicnihuan, xquintlalcahuijtiacan on tlamachijchi-haultin intajtzitzihuan. Ma ca sa xquinmahuistilican. ¹⁵ Nejhua nemech-notza quen tlacamej yejhuan cajsicamatij. Sa no nemejhuamej xquixt-lalocan tla melahuac noso xmelahuac on tlen nemechijlia. ¹⁶ Ijcuac xe ticiuaj on santa cena, tictlajtlaniliaj toTeco ma quitiochihua on vino. Niman ijcuac ticonij on vino, titopanextiaj ica san secan tinemij intechcopia iyesyo Cristo. No ijqui ijcuac ticiuaj on pan yejhuan tictlatlapanaj, titopanextiaj ica san secan tinemij itechcopia icuerpo Cristo. ¹⁷ Pampa san se pan oncaj, timiyequej san se cuerpo titochihuaj. Ijquin nochihua pampa tinochimej ticiuaj san se pan.

* **10:6** cosas † **10:8** veinte ‡ **10:10** ángel: Angeles tequitij ne ilhuicac niman nican ipan in tlalticpactli.

¹⁸ Xquitacan quen nohuicaj on hebreos. Yejhuamej ijcuac quicuaj on huentli yejhuan quihuentlaliaj itlaixpan[§] Dios, san se inyojlo quipiaj. ¹⁹ Xniquijtosnequi, tej, ica on tlamachijchihuaultin totajtzitimej quipiaj itlaj hueyilistli, nion xniquijtosnequi ica on nacatl yejhuan quihuentlaliaj ne tlaixpan más hueyi quijtosnequi xquen itlaj ocse nacatl. ²⁰ Yej xniquijtosnequi ica ijcuac on yejhuan xquixmatij Dios itlaj quihuentlaliaj ipan intlaixpan, xDios quihuentlaliliaj, yej quihuentlaliliaj on yejhuan xcuajcualtin espíritus. Niman nejhua xnicnequi xmohuicacan inhuan on xcuajcualtin espíritus. ²¹ Xhuelis nenenconisquej ipan icopa toTeco, niman no nenconisquej ipan in-copa on xcuajcualtin espíritus. Niman no xhuelis nentlacuasquej ipan imesa on toTeco, niman nentlacuasquej ipan inmesa on xcuajcualtin espíritus. ²² Noso ca, ¿yej ticnequij tictlahuelcuitisquej toTeco? ¿Tlen ticpiaj más poder xquen yejhua?

²³ On melahuac tlinon nijtohua, ica se tlamacajtli para quichihuas san tlen yejhua quinequis, pero xnochi cuajli on tlajtlamach. Se tlamacajtli para quichihuas san tlen yejhua quinequis, pero xnochi on tlajtlamach hueli teiscaltia ipan tlaneltoctli. ²⁴ Ma ca quitejtemo on tlen cuajli san para yejhua, yej ma quitejtemo on tlen cuajli para ocsequimej. ²⁵⁻²⁶ Nochi on quech tlajtlamach nacatl quinamacaj ne tianquisco* huelis nencuasquej pampa in Yectlajcuilojli ijquin quijtohua: “In tlalticpactli niman nochi tlen ipan oncaj iyaxca† on toTeco.” Pero ma ca xtetlajtoltican tla on nacatl oquihuentlalijcay intech on tlamachijchihuaultin intajtzitzihuan para ijcon xmechpajsolos on nemotlamachilis.

²⁷ Tla se yejhuan xquineltoca Cristo mechnotza para ichan nemont-lacuasquej niman nenquinequij nenyasquej, xcuacan nochi tlen mechtlalil-isquej ipan nemoplato. Pero ma ca xtetlajtoltican tla on nacatl oquihuentlalijcay ixpan on tlamachijchihuaultin intajtzitzihuan para ma ca mechpajsolos on nemotlamachilis. ²⁸ Pero tla yacaj mechijlis: “In tlacuajli yoquihuentlalil-ijcay intech on tlamachijchihuaultin intajtzitzihuan”, tla ijcon ma ca xcuacan ipampa on yejhuan ijcon omechmachiltij, niman para ma ca nenquijtlaco-huilisquej itlamachilis. ²⁹ Nemechijlia yejhua in xipampa nemotlamachilis, yej ipampa itlamachilis on yejhuan mechmachiltia.

Pero yacaj huelis quijtos: “¿Tlica‡ xhuelis nicchihuas on tlen nicnequi san ipampa itlamachilis ocse tlacatl? ³⁰ Tla nejhua nicmaca tlaxtlahuijli Dios ipampa on tlen nicua, tla ijcon, ¿tlica, tej, yacaj quijtos ica nicchihua xcuajli ijcuac nicua on tlacuajli yejhuan yonicmacac tlaxtlahuijli Dios?” ³¹ Tla nemejhuamej nentlacuaj, noso nenatlij, noso itlaj ocse nenquichihuaj, nochi xchihuacan para Dios ma quiseli hueyilistli. ³² Ma ca xchihuacan itlaj yejhuan ica nopolosquej itech Dios on hebreos, on xhebreos noso on yejhuan tlaneltocaj. ³³ Yej xchihuacan quen nejhua nicchihua. Nicchihua canica para nochia on tlen nicchihua ica niquimpactia nochimej. Xnictejtemohua on tlen cuajli san para nejhua, yej nictejtemohua on tlen cuajli para ocsequimej, para ijcon yejhamej nomaquixtisquej.

11

¹ Nemejhuamej xtocacan noejemplo ijcon quen nejhua nictoca iejemplo Cristo.

On sihuamej nocuatlapachohuaj ijcuac calaquij ne tiopan para quiteititiaj on tetlacaitalistli

§ **10:18** su altar * **10:25-26** mercado † **10:25-26** le pertenece; iaxca, ihuaxca, itlatqui ‡ **10:29** ¿por qué?; ¿tline?

² Nocnihuan, nemechyectenehua pampa nochipa nennechelnamiquij niman nenquitlacamatij on temachtilistli yejhuan onemechmacac. ³ Pero nicnequi xcajsicamatican ica on tlacatl yejhua tlayecanqui* itechica isihuau, niman Cristo yejhua tlayecanqui ipan cada tlacatl niman Dios tlayecanqui itech Cristo. ⁴ Tla se tlacatl ne campa nosentlaliaj on yejhuan tlaneltoaj nocuatlapachohua ijcuac quichihua oración noso ijcuac quiteijlia on tiotlajtojli yejhuan oquiselij itech Dios, yejhua xquitlacaita Cristo. ⁵ Pero tla se sihuatl xnocuatlapachohua ijcuac quichihua oración noso ijcuac quiteijlia on tiotlajtojli yejhuan quiselia itech Dios, yejhua xquitlacaita ihuehuentzin†, niman sa no ijqui quen noximasquia. ⁶ Tla se sihuatl xnocuatlapachohua, ma quitequi nochi itzon. Pero tla pinahua para nochi quinotequilis itzon noso nocuaxicaltlalis, tla ijcon nonequi nocuatlapachos. ⁷ On tlacatl xquitocarohua nocuatlapachos, pampa on tlacatl sa no yejhua itlachalis Dios niman yejhua quiteititia ihueyilis Dios. Pero on sihuatl quiteititia ihueyilis on tlacatl ⁸ pampa ijcuac Dios oquitlalij on tlacatl xoquixtij itech on sihuatl, yej on sihuatl oquixtijkej itech on tlacatl. ⁹ Dios xoquitlalij on tlacatl para yejhua on sihuatl, yej oquitlalij on sihuatl para yejhua on tlacatl. ¹⁰ No ijqui san impampa on ilhuicactequitquej‡, on sihuatl nonequi nocuatlapachos para quiteititis ica quinocahuilia ma quiyecana ihuehuentzin. ¹¹ Pero ixpan toTeco on tlacatl xhueli nemí tla xejhua on sihuatl, nion yejhua on sihuatl xhueli nemí tla xejhua on tlacatl. ¹² Niman yejhua in melahuac, pampa ijcon quen on sihuatl oquixtijkej itech on tlacatl, no ijqui on tlacatl tlacati itech on sihuatl, niman yejhuamej nochimej quistoquej itech Dios.

¹³ Sa no nemejhuamej xquixtlalocan tla cuajli para on sihuatl xnocuatlapachos ijcuac quichihuas oración itech Dios. ¹⁴ Sa no nemotlamachilis mechmachiltia ica on tlacatl tepinajti tzonhuehueyac yes ¹⁵ niman on sihuatl quiselia tetlacaítalistli ica tzonhuehueyac, pampa Dios oquimacac huehueyac itzon para ica nocuatlapachos. ¹⁶ Pero tla yacaj quixnamiquisnequi on tlen niquijtohua, ma quimati ica nion tejhuamej yejhuan tiapóstoles, nion on tlaneltoaquej xticpiaj ocse costumbre.

*On tlaneltoaquej ne Corinto xoquitlacaitaquej isanta Cena toTeco
(Mt. 26.26-29; Mr. 14.22-25; Lc. 22.14-20)*

¹⁷ Pero xnemechyectenehua ica in tlen aman nemechtajcuilohuilis pampa nesi ijcuac nemosentlaliaj que xitlaj§ ica mechpalehuiya. ¹⁸ Yejhua in achtoj xcaquican. Onechijlijquej ica ijcuac nemosentlaliaj ipan nemotiapan, xsan se nemotlamachilis nenquipiaj, niman yejhua on achi nicneltoca. ¹⁹ Ijcon nenquichihuaj pampa cas nenquinemiliaj nonequi nenquiteititisquej ica on yejhuan inhuan nencalactoquej más cuajli quineltoca Cristo xquen on ocsequimej. ²⁰ Ijcon, tej, ijcuac nemejhuamej nemosentlaliaj para nencuaj isanta cena on toTeco, xoc yejhua melahuac isanta cena toTeco nenquicuaj, ²¹ pampa ijcuac pehua nentlacuaj, cada se nachtojhuiya para quinotilanilia tlilon quicuas. Niman chica sequimej nocahuaj ican apistli, ocsequimej hasta tlajtlahuani. ²² ¿Tlen xnенquipiaj nemochan campa huelis nentlacuasquej niman nenatlisquej? Ijcon quen nenquichihuaj, nenquiteititiaj ica xnенquinnequij on tlaneltoaquej niman nenquimpinajtiaj on yejhuan xitlaj quipiaj. ¿Tlinon nenquinemiliaj quitocarohua nemechijlis yejhua ica on? ¿Nemechyectenehuas? ¡Ca, xnemechyectenehuas!

* **11:3** Ipan griego quijtohua: “tzontecomatl”. † **11:5** su esposo ‡ **11:10** ángeles: Angeles tequitij ne ilhuicac niman nican ipan in tlalticpactli. § **11:17** nada; coxtla

²³ Yonemechmacac on temachtilistli yejhuan onicselij itech toTeco. On temachtilistli sa no yejhua in. Sa no ipan on tlayohua, ijcuac toTeco Jesús oquitemactilijkej, ocontilan on pan, ²⁴niman ijcuac yoquimacac tlaxtlahuijli Dios, oquitlatapan, niman oquijtoj: “Xcuacan in. Yejhua quixnescayotia* notlalnacayo yejhuan nemopampa notemaca. Niman ijcuac nencuasquej xnechelnamiquican.” ²⁵ Niman ijcuac yotlan quicuaj on tiotlac tlacuajli, no ijqui ocontilan on copa, niman oquijtoj: “In vino quixnescayotia on yencuic pacto yejhuan notzimpehualtis ica noyesyo. Niman nochipa ijcuac nenconisquej, ica xnechelnamiquican.” ²⁶ Nochipa ijcuac nencuasquej in pan niman nenconisquej in vino, nenquipantlantijtiasquej hasta queman toTeco ocsejpa huajlas ica yejhua nemopampa omic.

²⁷ San aquinon yejhuan xquitlacaitas on pan ijcuac quicuas, niman icopa toTeco ijcuac conis, quipias tlajtlacojli pampa xquitlacaita itlalnacayo niman iyesyo toTeco. ²⁸ Yejhua ica, tej, cada se achtopa ma cuajli noyolita tla quipia tlajtlacojli ijcuac xe quicua on pan niman xe coni on vino. ²⁹ Ijcon xchihiacan, pampa tla se quicua on pan niman coni ivino toTeco, niman xquinemilia tlinon quijtosnequi ica itlalnacayo toTeco omic, quiselis itlahuel Dios, pampa quicua on pan niman coni on vino xijqui quen quitocarohua. ³⁰ Yejhua ica, tej, ne nemotzajlan miyequej nemij yejhuan cocoxquej, yejhuan xcojтиquej, niman sequimej yomiquej. ³¹ Pero tla sa no tejhuamej achtopa cuajli titoyolitasquej tla ticpiaj tlajtlacojli, xticselisquej itlahuel Dios. ³² Pero ijcuac toTeco techyolcuitia, yejhua techcastigarohua para ma ca techtlajtlacolmacas inhuan on tlalticpactlacamej.

³³ Yejhua ica nocnihuan, ijcuac nemosentlalisquej para nenquicuasquej on isanta cena toTeco, xquincharan ocsequimej para ijcon san secan pehuas nentlacuasquej. ³⁴ Tla yacaj sanoyej† apismiqui, ma tlacua ichan para ma ca quiselis itlahuel Dios ijcuac tehuan nosentlalia. On ocsequi tlajtlamach‡ niconyectlalis ijcuac nejhua nemechontas.

12

Pablo temachtia ica on tetlayocoliltin yejhuan on Espíritu Santo quintemaca

¹ Aman nocnihuan, nicnequi para xcajsicamatican ica on tetlayocoliltin yejhuan on Espíritu Santo mechmaca yejhuan mechhueliltia nenquichihuaj on tlen aman hueli nenquichihuaj.

² Nemejhuamej nenquimatztoquej ica ijcuac xe nenquineltocayaj Cristo, mechcajcyahuayaj para nenquihueyilisquej on tlamachijchihualtin intajtzitzihuan yejhuan xhuelij quijtohuaj nion se tlajtojli. ³ Yejhua ica nicnequi para cuajli xmatican ica yejhuan tlajtohuwa ican ipoder on Espíritu Santo xhuelis quijtos: “¡Jesús yejhua xcuajli tlacatl!” Niman no on yejhuan xtlajtohuwa ican ipoder on Espíritu Santo, xhuelis quijtos: “¡Jesús yejhua toTeco!”

⁴ Oncaj sesetlamantic tetlayocoliltin yejhuan se tlacatl huelis quiselis, pero san se Espíritu Santo quintemaca. ⁵ Oncaj miyec sesetlamantic tlinon ica quitequipanohuaj toTeco, pero san se toTeco tinochimej tictequipanohuaj.

⁶ Niman oncaj miyec sesetlamantic tequitl yejhuan Dios quichihuia ipan tonemilis, pero san se Dios quichihuia on tequitl. ⁷ Ipan cada se on Espíritu Santo quipantlantia ipoder para quimpalehuiya nochimej. ⁸ In se ejemplo. On Espíritu Santo sequimej quinmaca on tetlayocolijli yejhuan quinhueliltia para tlajtosquej ican tlamatquilistli*, niman ocsequimej sa no yejhua on Espíritu quinmaca on tetlayocolijli yejhuan quinhueliltia para tlajtosquej

* **11:24** simboliza † **11:34** mucha ‡ **11:34** cosas * **12:8** sabiduría

ican tlaixmatquilitli. ⁹ Itech sa no yejhua on Espíritu sequimej quiseliaj cojtic tlaneltoctli, niman ocsequimej quiseliaj poder para huelij quimpajtiaj on co-coxquej. ¹⁰ Sequimej itech sa no yejhua on Espíritu quiseliaj on tetlayocolijli yejhuan quinhueliltia quichihuaj milagros, niman ocsequimej quiseliaj on tetlayocolijli yejhuan quinhueliltia quiteijliaj on tiotlajtojli yejhuan quiseliaj itech Dios. On Espíritu sequimej quinmaca on tetlayocolijli yejhuan quinhueliltia para quitaj catlejhua tetlayocolijli quisa itech on Espíritu Santo niman catlejhua quisa itech on xcuajcualtin espíritus. Sequimej quiseliaj on tetlayocolijli yejhuan quinhueliltia tlajtlajtohuaj ocsequi yencuic tlajtoltint†. Niman sequimej quiseliaj on tetlayocolijli yejhuan quinhueliltia para huelij cajsicamati niman quiteijlia on tlen nijtohua ican on yencuic tlajtoltin. ¹¹ Nochi yejhua in tlajtlamach‡ san se Espíritu quichihua. Niman sa no quen yejhua quinequi, ijqui quinmaca itlayocolilhuan cada se tlacatl.

Tinochimej titochihuaj san se tlalnacayotl

¹² Itlalnacayo se tlacatl miyec partes quipia. Pero masqui miyec on tlajtlamach, san se tlalnacayotl nochihuaj. No ijqui, tej, tejhuamej titochihuaj itlalnacayo Cristo. Masqui timiyequej yejhuan ticneltocaj Cristo, tinemij san secan quen itlalnacayo. ¹³ Tinochimej oticselijquej san se Espíritu Santo. Ijcuac oticselijquej, san se tlalnacayotl otitochijquej masqui tihebreos noso xtihebreos, masqui titlanamactin noso titlamacahualtin. Tinochimej, tej, oticselijquej san se Espíritu.

¹⁴ Sen tlalnacayotl xnochijchihua san ica se parte, yej ican miyec partes. ¹⁵ Tla on icxitl quijtosquia: “Nejhua xnimatl niman yejhua ica xnitlapohuajli ipan on tlalnacayotl”, xsan yejhua ica on xoc tlapohuajli yes ipan on tlalnacayotl. ¹⁶ Noso tla on nacastli quijtosquia: “Nejhua xnixtololojtl niman yejhua ica xnitlapohuajli ipan on tlalnacayotl”, xsan yejhua ica on xoc tlapohuajli yes ipan on tlalnacayotl. ¹⁷ Tla on tlalnacayotl noch ixtololojtl yesquia, ¿quen ijqui, tej, huelisquia tlacaquisquia? Noso tla on tlalnacayotl noch nacastli yesquia, ¿quen ijqui, tej, huelisquia tlajnecuisquia? ¹⁸ Pero Dios oquitlalij cada parte ipan totlalnacayo quen yejhua oquinec. ¹⁹ Tla se tlacatl tlachijchiutli yesquia san ica se parte, ¿canon onyasquia tlalnacayo? ²⁰ Niman masqui aman oncaj miyec partes ipan totlalnacayo, noch on partes san se tlalnacayotl nochihuaj.

²¹ Yejhua ica, tixtololoj xhueli quijlia on toma: “Xtinechpolohua.” Nion totzontecon hueli quimijlia tocxiuhan: “Xnennechpolohuaj.” ²² Ca, yej ocse tlamantic. Ipartes totlalnacayo yejhuan nesi quen xmás huejhueyixtoquej, más nonequij sanoyej§. ²³ Niman ipartes totlalnacayo yejhuan nesi quen xipan cuenta tictlaliaj, nonequij cuajli tictlapachosquej. No ijqui ipartes totlalnacayo yejhuan xmás ticpanextiaj, más cuajli tictlapachosquej. ²⁴ Ipartes totlalnacayo yejhuan más ticpanextiaj xmás polihui notlapachos cuajli. Dios, tej, oquichijchiu on totlalnacayo para ma quiselij más tetlacaitalistli on parte yejhuan xmás caultzin. ²⁵ Ijcon oquichijchiu para ma ca xexelijtiasquej on partes ipan totlalnacayo, yej cada parte ma quinnequi on ocsequimej partes. ²⁶ Ijcon, tej, tla se iparte totlalnacayo tlajyohuiya, nochimej on ocsequimej no tlajyohuiyaj; niman ijcuac se parte quiselia tetlacaitalistli, nochimej on ocsequimej no paquij.

²⁷ Nemochimej* nemochihuaj tlalnacayo Cristo, niman cada se de nemehuamej se parte ipan on tlalnacayo. ²⁸ Ijcon, tej, intzajlan on yejhuan

† **12:10** lenguas ‡ **12:11** cosas § **12:22** muy * **12:27** todos ustedes; nannochti, yemochimej, anochimej, innochimej, emmochimej

tlaneltocaquej, Dios oquincalactij miyequej ipan intequiu. Achtoj ocalactij apóstoles, ica ome tiotlajtojquej, ica yeysi temachtijquej, ica nahui on yejhuan quichihua milagros, quemaj on yejhuan huelij tepajtiaj, quemaj on yejhuan tepalehuiyaj, quemaj on yejhuan teyecanaj, niman quemaj on yejhuan tlajtlajtohuaj ican ocsequi yencuic tlajtoltint. ²⁹ Tiquitaj, tej, ica xnochimej apóstoles, nion nochimej tiotlajtojquej. Xnochimej temachtijquej nion nochimej quichihuaj milagros. ³⁰ Xnochimej quipiaj poder para tepatjiaj. No xnochimej, tej, tlajtlajtohuaj ican ocsequi yencuic tlajtoltin noso hueli cajsicamati niman quiteijlia on tlen nijtohua ica on ocsequi yencuic tlajtoltin. ³¹ Pero nemejhuamej más xtejtemocan nenquiselisquej itech Dios on tetlayocoliltin yejhuan más quimpalehuis on yejhuan tlaneltocaquej.

Niman aman nejhua nemechititis se ojli yejhuan más sanoyej cuajli.

13

On tetlajsojtlalistli más hueyi quijtosnequi xquen on tlaneltocalistli niman tlamachalistli

¹ Tla nejhua nitlajtlajtosquia ican intlajtol* ocsequimej tlacamej niman intlajtol ilhuicactequitquej†, pero xnitetlajsojtl‡, notlajtol xitlaj§ ica tlapalehuiya, yej san caquisti quen se tambor yejhuan cuini noso se campana yejhuan tzilini. ² Niman tla nicteijlisquia on tiotlajtojli yejhuan nicselisquia itech Dios, niman nicmatisquia nochi tlajtlamach* tlen yejhua quichtacapia, niman sanoyej† nitlajmatqui yesquia, niman nicpiasquia nochi on tlaneltoctli para huelisquia niquimejcuansquia on tepemej ica notlanetoc, pero xnitetlajsojtl‡, xitlaj niquijtosnequi. ³ Tla nochi tlen nicpia niquinxexelohuilisquia on mayanquej, niman tla san tepampa nictemacasquia notlalnacayo para ma quitlatican, pero xnitetlajsojtlasquia, nochi yejhua on xitlaj ica nechpalehuisquia.

⁴ On yejhuan tetlajsojtl‡ quimijyohuia ocsequimej niman yolyemanqui. On yejhuan tetlajsojtl‡ xnexicolej, niman xnohueyitenehua nion nohueyimati.

⁵ On yejhuan tetlajsojtl‡ xqueman xompayejyehua niman xquitejtemohua on tlen cuajli san para yejhua. On yejhuan tetlajsojtl‡ xsan cuajcualani, niman xsa conelnamicticaj on tlen ocsequimej xcuajli quichihuiliaj. ⁶ On yejhuan tetlajsojtl‡ xpaqui ica on tlen xcuajli quichihuaj ocsequimej, yej paqui ijcuac quita tetlani on tlen cuajli. ⁷ On yejhuan tetlajsojtl‡ quipia iyojlo para quixicohua nochi tlajtlamach tlen xcuajli, para quineltoca on tlen cuajli intech ocsequimej, para quinnequia nochi cuajli ma huajla impan ocsequimej, niman para quimijyohuis ocsequimej.

⁸ On yejhuan tetlajsojtl‡ xqueman tlamic itetlajsojtlalis. Pero yejcos on tonaltin ijcuac xoc nonequis para noteijlis on tiotlajtojli yejhuan quiseliaj itech Dios, nion xoc tlajtolos ican sesetlamantic yencuic tlajtoltin, niman xoc onyas on tlaixmatilistli. ⁹ Aman totlaixmatilis xajsiticaj, niman on tiotlajtojli yejhuan Dios techmaca no xajsiticaj. ¹⁰ Pero ijcuac huajlas on tlen ajsiticaj, nochi on tlen xajsiticaj ajsitias.

¹¹ Ijcuac nejhua niconetl catca, nitlajtlajtohuaya niman nitlanemiliaya quen se conetl. Pero ijcuac onitlacatiac, xoc oninohuicac quen se conetl.

¹² Aman quen ayautitlan tiquitaj on tlajtlamach itech ica Dios. Tejhuamej san tiquitaj quen tiquitasquiaj ipan se espejo yejhuan xcuajli tlacha. Pero ijcuac

† **12:28** lenguas * **13:1** lenguas de otros † **13:1** ángeles: Angeles tequitij ne ilhuicac niman nican ipan in tlalticpactli. ‡ **13:1** no amo § **13:1** nada; coxtla * **13:2** cosas † **13:2** muy

yejcos on tlen ajsiticaj, nochi on tlajtlamach itech ica Dios cuajli tiquitasquej. Aman xnochi cuajli niquixmati on tlajtlamach ica Dios. Pero ijcuac yejcos on tlen ajsiticaj, nochi cuajli niquixmatis quen Dios nechixmati. ¹³ Aman, tej, yeji tlamantli[†] yejhuan xqueman tlamic: tlaneltocalistli, tlamachalistli[§] niman tetlajsojtlalistli. Pero on tetlajsojtlalistli yejhua más hueyi quijtosnequi.

14

Pablo quintlacanonotza on yejhuan tlajtlajtohuaj ican yencuiquej tlajtoltin

¹ Yejhua ica xchihuacan canica para nentetlajsojtlasquej*, niman no xnequican on tetlayocoliltin yejhuan on Espíritu Santo quitemaca. Niman más cuajli xnequican on tetlayocolijli yejhuan mechhueltis nenquiteijlisquej on tiotlajtojli yejhuan Dios quitemaca. ² On yejhuan tlajtlajtohua ican sesetlamantic yencuiquej tlajtoltin†, xquinnojnotza on tlacamej, yej san quinojnotza Dios, pampa on tlacamej xcajsicamatij tlinon yejhua quijtohua. On tlen quijtohua, on Espíritu Santo quichihualtia para ma quijito on tlen iyanticaj. ³ Pero on yejhuan quiteijlia on yectlajtojli yejhuan quiselia itech Dios, quinnojnotza tlacamej para ijqui quimiscaltia ipan intlaneltoc, para quinyolehua niman para quinyoltlalia. ⁴ On yejhuan tlajtlajtohua ican sesetlamantic yencuiquej tlajtoltin sa no yejhua noscaltia ipan intlaneltoc. Pero on yejhuan quiteijlia on tiotlajtojli yejhuan quiselia itech Dios quimiscaltia ipan intlaneltoc nochi on tlaneltocaequej.

⁵ Nicnequisquia ica nochimej nemejhuamej nenquipiasquiaj tetlayocolijli yejhuan mechhueltis nentlajtlajtosquej ican sesetlamantic yencuiquej tlajtoltin. Pero más sanoyej‡ cuajli yesquia tla nenquipiasquiaj on tetlayocolijli yejhuan mechhueltisquia nenquiteijlisquiaj on tiotlajtojli yejhuan nenquiseliaj itech Dios. On yejhuan quiteijlia on tiotlajtojli más hueyi quijtosnequi xquen on yejhuan hueli tlajtlajtohua ican sesetlamantic yencuiquej tlajtoltin. Pero tla se hueli cajsicamati niman quiteijlia on tlen nijtohua ican on yencuiquej tlajtoltin para on yejhuan tlaneltocaequej noscaltiaj ipan intlaneltoc, no ijqui hueyi quijtosnequi. ⁶ Yejhua ica, tej, nocnihuan, tla nejhua nias nemotech niman nemechnojnotzas ican sesetlamantic tlajtoltin, ¿tlinon ica mechpalehuis on tlen niquijitos? Xitlaj ica mechpalehuis. Pero tla nias nemotech niman nemechmelajcailis on tlen Dios onechijlij, noso nemechmacas itlaj tlamatquilistli§ yejhuan quisa itech on tlen melahuac, noso nemechijlis itlaj tiotlajtojli yejhuan onicselij itech Dios, noso itlaj nemechmachtis, tla ijcon melahuac nihueli nemechpalehuiya.

⁷ Ma tictlalican se ejemplo ica on acatlapitzajli niman on arpa yejhuan xquipiaj nemilistli. Tla on yejhuan tlatzotzona xtatzotzona quen quitocarohua, xacaj hueli quimati tlinon quitzotzona. ⁸ Niman tla on soldado yejhuan quipia tequitl para quipitzas on trompeta xquipitza quen quitocarohua, xacaj quichihuas cuenta para yas ipan guerra. ⁹ Sa no ijqui, tej, nochihua nemohuan. Tla ipan nemotlajtol xnenquijtohuaj tlajtojli yejhuan huelis najsicamatis, ¿quen ijqui, tej, yacaj huelis cajsicamatis on tlen nenquijtohuaj? Tla ijcon nentlajtlajtohuaj, on tlen nenquijtohuaj san yau ipan ajacatl, niman xtepalehuiya. ¹⁰ Ye ticmatztoquej ica oncaj miyec sesetlamantic tlajtoltin ipan in tlalticpactli, niman cada se quipia quen ijqui najsicamati. ¹¹ Pero tla nejhua xnicajsicamati on tlajtojli yejhuan se ica nechnotza, tla ijcon itech ninochihua quen on yejhuan xchanej, niman yejhua notech

‡ **13:13** cosa § **13:13** esperanza * **14:1** amarán a otros † **14:2** lenguas ‡ **14:5** muy
§ **14:6** sabiduría

nochihua no quen se yejhuan xchanej. ¹² Yejhua ica, tej, pampa nemejhuamej nenquinequij nenquiselisquej on tetlayocoliltin yejhuan on Espíritu Santo quitemaca, xchihuacan canica para nenquipiasquej on yejhuan quimpalehuis para quimiscaltis ipan intlaneltoc on tlaneltoquej.

¹³ Tla ijcon, tej, tla yacaj tlajtlajtohua ican sesetlamantic yencuic tlajtjli, ma quichihua oración para Dios ma quimaca on tetlayocolijli yejhuan quihueliltis para huelis cajsicamatis niman quiteijlis on tlen quijtohua ica on sesetlamantic yencuiquej tlajtoltin. ¹⁴ ¿Tlica*? Pampa tla nicchihua oración ican ocse yencuic tlajtojli, on quen san ica noalma nicchihua oración, pero notlamachilis xcajsicamatilis on tlen noalma quijtohua. ¹⁵ Tla ijcon, ¿tlinon nonequi nicchihuas? Nicchihuas sanquen. Pero masqui ipan noalma nicchihuas oración ica ocsequi yencuiquej tlajtoltin, no nicchihuas ipan se tlajtojli ican nocajsicamatilis. Noalma tlacuicatis ican ocse yencuic tlajtojli, pero no nitlacuicatis ipan on tlajtojli ican nocajsicamatilis. ¹⁶ Ma ticonijtocan ica ne campa nemosentlaliaj ticueyilia Dios ipan moalma ican ocse yencuic tlajtojli, nemi se tlacatl yejhuan xmitztlajtolcaqui. Ijcuac ticmacas tlaxtlahuijli Dios, on tlacatl yejhua xhuelis quijtos: “Ma ijqui nochihua”, pampa yejhua xquimatis tlinon tiquijtohua. ¹⁷ Masqui sanoyej cualtzin ticmacas tlaxtlahuijli Dios, mooración xhuelis quisaltis on ocse tlacatl ipan itlaneltoc. ¹⁸ Nicmaca tlaxtlahuijli Dios ica nejhua más nitlajtlajtohua ican ocse tlaman-
tic yencuiquej tlajtoltin xquen nemochimej†. ¹⁹ Pero ijcuac ninosentlalia inhuan on tlaneltoquej, más nicuelita niquijtos san canaj macuijli tlajtojli yejhuan cuajli cajsicamatij para on ocsequimej cuajli niquinmachtia, xquen tla niquijtosquia majtlactli mil tlajtojli ican ocse tlaman-
tic yencuiquej tlajtoltin yejhuan xhuelis cajsicamatisquej.

²⁰ Nocnihuan, ma ca xtlanemilican quen coconej. Nemejhuamej xchijchipajtiacan quen on coconej yejhuan xnomatij quichihuaj on tlen xcuajli. Pero ijcuac nentlanemilisquej, xchihuacan quen on tlacamej yejhuan yochichicajquej. ²¹ Ipan on itlanahuatil Dios ijquin tlajcuilnesticaj: “Yejhua in país nicnotzas ican ocse tlaman-
tic tlajtoltin niman ica incamac on yejhuan xchanejquej. Pero masqui ijcon nicchihuas, xnechtencaquisquej. Yejhua in oquijtoj toTeco.” ²² Ijcon tiquitaj, tej, ica on tetlayocolijli yejhuan se quihueliltia tlajtlajtos ican ocse tlaman-
tic yencuiquej tlajtoltin on yejhua quiteititia para on yejhuan xe tlanelto-
caj, niman xpara on yejhuan yotlanel-
toquej. Pero on tetlayocolijli yejhuan se quihueliltia quiteijlis on tiotlajtojli yejhuan quiselia itech Dios, yejhua quiteititia para on yejhuan tlanel-
toquej niman xpara on yejhuan xe tlanelto-
caj. ²³ Aman, tej, ¿tlinon nochihuas tla nemejhuamej tlaneltoquej nemosentlaliaj niman nemochimej pehua nentlajtohuaj ican ocse tlaman-
tic yencuiquej tlajtoltin, niman nemotza-
jlan calaquij on yejhuan xquimati on cuajli tlajtojli yejhuan quitemaca temaquixtilistli, noso on yejhuan xquineltocaj Cristo? ¿Tlen xquijtosquej ica nemejhuamej yonenlojlocojtiaquej? ²⁴ Pero tla nemochimej nenquiteijliaj on tiotlajtojli yejhuan nenquiseliaj itech Dios, niman calaqui se yejhuan xquimati on cuajli tlajtojli yejhuan quitemaca temaquixtilistli, noso yejhuan xquineltoca Cristo, yejhua notlajtlacolmatis niman noyolpejpenas ijcuac caquis on tlen nochimej quijtojtoquej. ²⁵ Niman on tlen xcuajli tlajtla-
mach‡ iyanticatca ipan iyojlo napanextis. Niman notlacuenquetzas para quiyectenehuas Dios niman quijtos ica Dios melahuac nemotzajlan nemi.

Nochi ma nochihua ican cuidado niman quen quitojtocarohua

* ^{14:14} ¿por qué?; ¿tline? † ^{14:18} todos ustedes; nannochti, yemochimej, anochimej, innochimej, emmochimej ‡ ^{14:25} cosas

²⁶ Tla ijcon, tej, nocnihuan, on tlen nonequi nenquichihuasquej sa no yejhua in. Ijcuac nemosentlalisquej, cada se ma quipia on tlen quitlacuicatis, noso itlaj quitemachtis, noso quiteijlis on tiotlajtojli yejhuan oquiselij itech Dios, noso tlajtlajtos ican ocse tlamantic yencuic tlajtojli§, noso quiteijlia on tlen nijtohua ica on ocse tlamantic yencuic tlajtojli. Nochi tlajtlamach ma nochihua para ma quimpalehui ica ma noscaltican ipan intlaneltoc on tlaneltocaquej. ²⁷ Tla nemij yejhuan tlajtlajtohuaj ican sesetlamantic yencuiquej tlajtoltin, ma tlajtocan san ome noso yejimej, niman ma ca san setipan ma tlajtocan. Niman se ma quiteijli on tlen nijtohua ica on ocse tlamantic yencuiquej tlajtoltin. ²⁸ Pero tla xnemi yejhuan hueli quiteijlia on tlen nijtohua ica on ocse tlamantic yencuiquej tlajtoltin, tla ijcon, ma ca yacaj ma tlajtlajto ica on yencuiquej tlajtoltin ne campa nosentlaliaj, yej cada se ma tlajto san ipan iyojlo niman ma conmati san ihuan Dios. ²⁹ Sa no ijqui, tej, omemej noso yejimej ma quitemachtican on tiotlajtojli yejhuan oquiselijquej itech Dios, niman chica temachtia nemochimej* xquixtlalocan tla melahuac oquiselijquej itech Dios on tlen quitemachtiaj. ³⁰ Pero tla Dios quimacas se yencuic temachtilistli yacaj ocse yejhuan yehuaticaj, tla ijcon, on yejhuan temachtia ma nocajcahua niman ma cahuili tlajto on yejhuan quemach oquiselij yencuic temachtilistli. ³¹ Tla ijcon, tej, nemochimej huelis cada se nenquijtosquej on tiotlajtojli yejhuan nenquiseliaj itech Dios para nochi on tlaneltocaquej cuajli cajsicamatztiasquej niman noyolejhuanasquej. ³² On yejhuan quipiaj tetlayocolijli yejhuan quinhueliltia para quiteijliaj on tiotlajtojli yejhuan oquiselijquej itech Dios yolyemanquej yesquej para quincahuilijtiasquej ocsequimej tlajtosquej, ³³⁻³⁴ pampa Dios xcuelita para sa quen ijqui itlaj ma nochihua, yej cuelita on tlen nochihua cuajlotica.

On sihuamej xquintocarohua tlajtosquej ijcuac nomachthua ipan itiopan Dios quen nochihua ipan nochi on tiopan campa on yejhuan teyaxcahuant itech Dios nosentlaliaj. Yejhuatej xquincahuiliaj ma tlajtlajtocan, yej yejhuatej nonequi tetlacamatquej yesquej quen yejhua on itlanahuatil Dios tlanahuatia. ³⁵ Tla yejhuatej quinequij itlaj quimatisquej, ma quintlajtoltican inhuehuentzitzihuan ne inchan, pampa xcuajli nesi se sihuatl tlajtlajtos ne teixpan ipan tiopan.

³⁶ Xquelnamiquican ica Dios xnemotech opeu quitemaca itlajtol, niman ica no xsan nemejhuamej onenquiselijquej. ³⁷ Tla yacaj quinemilia quipia on tetlayocolijli yejhuan quihueliltia para quiteijlia on tiotlajtojli yejhuan quiselia itech Dios, noso quinemilia ica quipia ocse tetlayocolijli, nonequi cuajli quimatis ica in tlen nemechtlajcuilhuiticaj yejhua itlanahuatil toTeco. ³⁸ Tla yejhua xquiselis quen itlanahuatil toTeco, ma ca xselican on tlen yejhua quijtos. ³⁹ Ijcon, tej, nocnihuan, xchihuacan canica para nennequiteijlisquej on tiotlajtojli yejhuan nenquiseliaj itech Dios. Niman ma ca xtecajcahuaultican on ica tlajtolo ican ocse tlamantic yencuiquej tlajtoltin. ⁴⁰ Pero yej, nochi xchihuacan quen quitocarohua, niman ma ca sa quen ijqui xchihuacan.

15

Cristo oyol niman onoquetzeu ipan itlalcon

¹ Aman, nocnihuan, nicnequi nemechelnamictis on cuajli tlajtojli yejhuan quitemaca temaquixtilistli yejhuan ica onemechnojnotz. In temachtilistli,

§ **14:26** lengua * **14:29** todos ustedes; nannochti, yemochimej, anochimej, innochimej, emmochimej † **14:33-34** le pertenecen; teaxcahuau, tehuaxcahuau, tetlatquihuan

yejhua onenquiselijquej, niman aman ipan nemelajcanemij. ² Niman yejhua itechcopia nenquipiaj temaquixtilistli tla nenquejehuaj in tlen ica onemechmachtij. Pero tla xnenquejehuaj, tla ijcon sanencaj onentlanelto-caquej.

³ Onemechmachiltij on temachtilistli yejhuan onicselij. Yejhua más huey-ixticaj xquen ocse itlaj temachtilistli. On temachtilistli sa no yejhua in. Cristo omic san ipampa totlajtlacolhuan, quen on Yectlajcuilojli quijtohua.

⁴ Quemaj oquitlaltocaquej, niman ipan yeyi tonajli oyoliu* niman onoquet-zteu ipan itlalcon, ijcon quen on Yectlajcuilojli quijtohua. ⁵ Ijcuac yoy-oliu, oquinotitij Pedro, niman quemaj on majtlactli huan omemej apóstoles.

⁶ Quemaj san secan oquinnotitij más de macuijli ciento tocnihuan. Más miyequej yejhamej oc† nemij, masqui sequimej yomiquej. ⁷ Más saquin‡ oquinotitij Jacobo niman quemaj nochimej on apóstoles.

⁸ Quemaj sa ica noch ionechnotitij, nejhua yejhuan sa quen on conetzintli yejhuan san huetzi. ⁹ Nejhua, tej, xnihueyixticaj quen on ocsequimej apóstoles, niman nion achijtzin xnechmelahua§ nechtocayotisquej apóstol pampa oniquintlahuelitac niman oniquintlajyohuiltij on tlaneltocaquej.

¹⁰ Pero aman nejhua niapóstol pampa Dios onechtlalij ijqui ican iteicnelilis*. Niman iteicnelilis yejhuan onechmacac xsan ijqui onícuajcau. Yej nejhua más sanoyej† yonitequit xquen on ocsequimej apóstoles, masqui xsa no nejhua nitequit, yej iteicnelilis Dios tequiti notechcopia. ¹¹ Pero xhueyi qui-jtosnequi tla on ocsequimej apóstoles más otequitquej, noso yej nejhua más onitequit. Yej on tlen más hueyi qui-jtosnequi sa no yejhua on ica tinochimej ticteijliaj sa no yejhua temachtijli, niman in temachtijli nenquineltocaj.

Tejhamej no tiyolihuisquej niman titoquetztehuasquej ipan totlalcon quen Cristo

¹² Aman, tej, tla titemachtiaj ica Cristo oyoliu‡ niman onoquetzteu ne ipan itlalcon, ¿tlica§, tej, semej nemejhuamej quijtohuaj ica xhuelis yolihuisquej niman noquetztehuasquej on mimiquej? ¹³ Tla on mimiquej xhuelis yoli-huisquej niman noquetztehuasquej, tla ijcon nion Cristo xoyoliu niman xonoquetzteu ne ipan itlalcon. ¹⁴ Niman tla Cristo xoyoliu niman xonoquet-zteu, on temachtijli yejhuan ticteijliaj xitlaj* qui-jtosnequi, niman on tlanel-toctli nenquipiaj no xitlaj qui-jtosnequi. ¹⁵ Niman tla ijcon yesquia, tejhamej yejhuan ticteixpantiliaj ica Dios oquiyolihuitij niman oquetzteu Cristo ipan itlalcon, san tictlajtolquetztehuilisquiaj Dios. Tla xhuelis yolihuisquej on mimiquej, tla ijcon, yejhua xnejli oquiyolihuitij Cristo. ¹⁶ Tla melahuac yesquia xyolihuisquiaj niman xnoquetztehuasquiaj on mimiquej, tla ijcon, nion Cristo xoyoliu niman xonoquetzteu. ¹⁷ Niman tla Cristo xoyol niman xonoquetzteu, tla ijcon, nemotlaneltoc xitlaj ica mechpalehuiya niman oc† mechtajtlacolmacaticaj Dios. ¹⁸ Niman tla ijcon, on mimiquej yejhuan oquineltocaquej Cristo no ixpolijtoquej. ¹⁹ Niman tla totlamachalis itech Cristo techpalehuis san para ipan in nemilistli, tla ijcon, semi tixpolijtoquej ipan se hueyi ajmantli xquen nochimej on ocsequimej yejhuan nemij ipan in tlalticpactli.

²⁰ Pero Cristo melahuac oyoliu niman onoquetzteu ipan itlalcon. Niman yejhua yacatzticaj intech on mimiquej yejhuan yolihuisquej niman noquet-ztehuasquej ipan intlalcon. ²¹ Ijcon quen ipampa se tlacatl otzimpeu on

* **15:4** resucitó; oyol † **15:6** todavía; sanquen ‡ **15:7** después § **15:9** no merezco * **15:10** su misericordia † **15:10** mucho ‡ **15:12** resucitó; oyol § **15:12** ¿por qué?; ¿tline? * **15:14** nada; coxtla † **15:17** todavía; sanquen

miquilistli ipan in tlalticpactli, no ijqui ipampa se tlacatl otzimpeu iny-olihiulis on mimiquej. ²² Ijcon quen nochimej miquij pampa itech Adán tecone huan, no ijqui nochimej yejhuan itech Cristo teyaxcahuant ocsejpa yoli huiisquej. ²³ Pero cada se ipan nochihuas ijcuac contocaros. Achtój Cristo oyoliu niman onoquetzteu quen on huelic yejhuan achtój tlaqui ipan cojtli^s. Quemaj ijcuac yejhua huajlas, quej yejhuamej on yejhuan iyaxcahuau yoli huiisquej niman noquetztehuasquej. ²⁴ Quemaj yejcos on sa ica nochí tonajli ijcuac Cristo quinroxotonis on yejhuan teyecanaj, niman on yejhuan quipiaj tequihuajyotl niman on yejhuan quipiaj poder. Ijcuacon yejhua quintemacas itech Dios on iTajtzin nochimej on yejhuan quinmandarohuaya. ²⁵ Cristo ica oncaj tlamandaros hasta ijcuac Dios quintlajcalis icxitlan nochimej on itlahuelicnhuan niman quitlacamatisquej. ²⁶ Niman on sa ica nochí itlahuelicniu yejhuan quitlanis, on yejhua on miquilistli. ²⁷ On Yectlajcuilojli quijtohua: “Dios nochí tlajtlamach* oquimactilij Cristo para quimandaros.” Pero ijcuac quijtohua ica nochí tlajtlamach oquimactilij, xquijtosnequi ica Dios tehuan onotemactilij. ²⁸ Ijcuac nochí on tlajtlamach quitlacamatis Cristo, sa no yejhua iConeu Dios notemactilis itech Dios yejhuan oquimactilij nochí on tlajtlamach yejhuan quimandarohua. Ijcuacon Dios cuajli quimandaros nochí san se hueyi.

²⁹ Tla on mimiquej xyoli huiisquej niman xnoquetztehuasquej, ¿tlica, tej, sequimej impampa nocuatequiyaj? ¿Tlinon para, tej, ijcon quichihuaj tla xquineltocaj ica ipan ocse tonajli on mimiquej yoli huiisquej?

³⁰ Niman tla on mimiquej xyoli huiisquej, ¿tlica tejhuamej yejhuan tiapóstoles nochipa san ipampa on techmictisnequij? ³¹ Nemechmelajcaillia, nocnihuan, ica ijcon quen melahuac nennechpactiaj pampa nentlaneltocaj itech Cristo, no melahuac ica mojmostla nechmictisnequij. ³² Nanica ipan in hueyican itoca Efeso oninoxixicoj inhuan on tlacamej quen ninoxixicosquia inhuan temojtijquej yolkuej. ¿Tlinon nictlanisquia yejhua ica on, tej, tla melahuac yesquia ica on mimiquej xyoli huiisquej? Más cuajli yesquia tla nicchihuasquia quen on tlajtojli quijtohua, yejhuan quijtohua: “Ma titlacuacan niman ma tatlican, pampa mostla timquisquej.”

³³ Ma ca xmocahuilican mechcaj cayahuacan. Oncaj tlajtojli yejhuan ijquin quijtohua: “On xcuajcualtin tehuicaltin quijtlacohuaj on tlen cuajli sequimej quichihuaj.” ³⁴ Xmelajcatlalican nemotlamachilis niman ma ca sa xchihuacan tlajtlacojli. Sequimej nemejhuamej xquixmatij Dios. Niman yejhua in niquijtohua para xpinahuacan.

Ijquin yoli huiisquej niman noquetztehuasquej on mimiquej ipan intlalcon

³⁵ Pero cas yacaj tetlajtoltis: “¿Quen ijqui, tej, yoli huiisquej† niman noquetztehuasquej on mimiquej? ¿Catlejhuau on tlalnacayotl quipiasquej?”

³⁶ Yejhuan ijcon quijtohua nesi quen semi tonto, pampa ijcuac itlaj xinachtli quitocaj‡, xcaman ixhua niman noscaltia tla xachtopa palani inacayo on xinachtli ne ijtic tlajli. ³⁷ Niman ijcuac itlaj tictoca, xtictoca xojtli para yejhua ma ixhua, yej tictoca on xinachtli trigo noso itlaj ocse. ³⁸ Dios quimaca on xinachtli se tlacayotl quen yejhua quinequi. Niman cada ocse tlamantic xinachtli Dios quimaca itlacayo quen cuajli para quipias. ³⁹ Niman intlalnacayo on tlen nemij ipan in tlalticpactli xnochi sa no ijqui. On tlacamej, on huejhueyi yolkuej, on totomej niman on michimej nochí ocse tlamantic nacayo jquej. ⁴⁰ No ijqui, tej, oncaj ilhuicacnacayotl

‡ ^{15:22} le pertenecen; teaxcahuau, tehuaxcahuau, tetlatquihuau § ^{15:23} árbol * ^{15:27} cosas

† ^{15:35} resucitarán; yolisquej ‡ ^{15:36} es sembrada

yejhuan onoquej ne ilhuicac niman tlalnacayotl yejhuan onoquej nican ipan in tlalticpactli. Pero on ilhuicacnacayomej onoquej ne ilhuicac no ocse tlamantic cualtetzitzintin xquen on tlalnacayomej yejhuan onoquej nican ipan in tlalticpactli. ⁴¹ Niman no on tonatzintli, on metztli niman on sitlalimej no ocse tlamantic cualtetzitzintin ica impetlanalis. Niman no sa no yejhuamej on sitlalimej cada se ocse tlamantic cualtzin petlani. ⁴² Ijquin nochihuas ijcuac on mimiquej yolihuisquej niman noquetztehuasquej. On tlalnacayotl palani ijcuac quitlaltocaj, pero ijcuac on tlalnacayotl yolihuis niman noquetztehuas, xcaman palanis ocsejpa. ⁴³ On tlalnacayotl xcojtic niman xquipia tetlacaitalistli ijcuac quitlaltocaj, pero ijcuac on tlalnacayotl yolihuis niman noquetztehuas, quiselis tetlacaitalistli niman cojtic yes. ⁴⁴ Ijcuac quitlaltocaj on tlalnacayotl, yejhua tlalticpacnacayotl, pero ijcuac on tlalnacayotl yolihuis niman noquetztehuas, ilhuicacnacayotl yes. Tla oncaj on tlalticpacnacayotl, tla ijcon no oncaj on ilhuicacnacayotl. ⁴⁵ On Yectlajcuilojli ijquin quijtohua: “On achtoj tlacatl, yejhua Adán. Ijcuac Dios oquitlalij, oquimacac nemilistli.” Pero on sa ica nochí Adán, yejhua Cristo. Niman Cristo ican iEspíritu quitemaca on yencuic nemilistli para nochipa. ⁴⁶ Xachtoj ticseliaj toilhuicacnemilis, yej achtoj ticseliaj totlalticpacnemilis niman quemaj ticseliaj toilhuicacnemilis. ⁴⁷ On achtoj Adán quisa ipan in tlalticpactli niman tlachijchiutli ican tlajli. Yejhua oquis itech in tlalticpactli, niman on sa ica nochí Adán quisa ne ilhuicac. ⁴⁸ Nochimej tlacamej yejhuan nemij ipan in tlalticpactli quipiaj intlalnacayo quen on achtoj tlacatl Adán oquipix yejhuan Dios oquichijchiu ican tlajli. Pero on tlacamej yejhuan nemisquej ne ilhuicac quipiasquej inilhuicacnacayo quen Cristo yejhuan oquis ne ilhuicac. ⁴⁹ Niman ijcon quen aman ticpiaj on tlalnacayotl quen Adán oquipix yejhuan tlachijchiutli ican tlajli, se tonajli ticpiasquej toilhuicacnacayo quen iilhuicacnacayo Cristo yejhuan quisticaj ne ilhuicac.

⁵⁰ Nejhua yejhua in nemechijlia, nocnihuan, ica totlalnacayo yejhuan tlachijchiutli ican nacatl, ican yestli niman ican omitl xhuelis calaquis ne campa tlamandarohua Dios yejhuan ilhuicac chanej. In nemechijlia pampa on totlalnacayo yejhuan hueli palani xhuelis calaquis ne ilhuicac campa oncaj on yejhuan xcaman palani nion ijtlacahui. ⁵¹ Xcaquican, aman nemechijlia on tlen ichtaca§ oncaj. Xtinochimej timquisquej, pero tinochimej techtlalnacayopatlasquej. ⁵² Ijcuac quipitzasquej on sa ica nochí trompeta, tinochimej titotlalnacayopatlasquej nimantzin quen ijcuac se san hualijcopi. Ijquin nochihuas pampa ijcuac on trompeta quipitzasquej, on mimiquej yolihuisquej niman noquetztehuasquej ipan intlalcon para xocaman ocsejpa miquisquej. Ijcuacon, tej, tinochimej titotlalnacayopatlasquej. ⁵³ In tlalnacayotl yejhuan xhueli huejcahui oncaj, ica oncaj nopatlas ica on ilhuicacnacayotl yejhuan para nochipa onyas. Niman yejhua in totlalnacayo yejhuan hueli miqui ica oncaj nopatlas ica on ilhuicacnacayotl yejhuan xcaman miquisquej. ⁵⁴ Ijcuac in tlalnacayotl yejhuan xhueli huejcahui oncaj yonopatlac ica on ilhuicacnacayotl yejhuan para nochipa onyas, niman ijcuac in tlalnacayotl yejhuan hueli miqui yonopatlac ica on ilhuicacnacayotl yejhuan xcaman miquis, ijcuacon ye huelis nijtos on tlen ipan in Yectlajcuilojli tlajcuilojnesticaj: “On miquilistli yoxoxoton, aman on tetlanilistli yetotlan. ⁵⁵ ¡Oh miquilistli! ¿canon oncaj mopoder para titechmictis? ¡Oh tlalcontli! ¿canon oncaj mopoder para titechtlanis?” ⁵⁶ On tlacamej miquij ipampa on tlajtlacojli, niman on tlajtlacojli quipia poder para techmictia ipampa on itlanahuatil Moisés. ⁵⁷ Pero ma ticmacacan tlaxtlahuil Dios,

pampa on miquilistli yotictlanquej itechcopa toTeco Jesucristo.

⁵⁸ Ijcon, tej, notlajsojcaicnihuan, xmelajcanemican ipan nemotlaneltoc. Ma ca xcahuilican itlaj ma mechejcuani itech nemotlaneltoc. Nochipa xchihuacan itequiu toTeco ican nochi nemoyojlo, pampa ye nenquimatztoquej ica on tequitl xsanencaj nenquichihuasquej ijcuac nenquichihuaj san secan ihuan toTeco.

16

On tlaneltocaquej ne Corinto quisentlaliaj ofrenda para on mayanquej ne Jerusalén

¹ Aman nemechnojnotzas ica on ofrendas yejhuan nenquisentlaliaj para ica nenquimpalehuisquej on yejhuan teyaxcahuan* itech Dios. Xsentlalican ijcon quen nejhua nitlanahuatijtiu ipan on tiopantin yejhuan onoquej ne Galacia. ² Ipan cada domingo cada se ma quixeloijtiu sequi de on yejhuan oquitlan. Tla se oquitlan achitzin ma quixelo achitzin, niman tla oquitlan hueyi ma quixelo hueyi. Niman on ofrenda xquejtiacan para ma ca nenquisentlalijtinemisquej ofrendas ijcuac najsis nemotech. ³ Niman ijcuac nejhua nemotech najsis, niqunititlanis ne Jerusalén on tlacamej yejhuan nenquitlapejpenisquej. Niquinmacas tlajcuilolamamej campa quijtos ica tiquintitlanij, niman yejhamej quitquisquej nemoofrendas para quinhuquilisquej on tocnihuan yejhuan ompa chanejquej. ⁴ Niman tla niquita ica nonequi no nias, yejhamej nohuan yasquej.

Pablo quiteijlia tlinon quinequi quichihuas

⁵ Nias ne ica Macedonia niman tla yonipanoc ompaca, nias ne campa nemochan. ⁶ Niman cas huelis quesqui tonaltin nemotech ninocahuas, noso cas nemotech nicpanos nochi invierno chica sehua. Quemaj huelisquej nennechpalehuisquej ican on tlen nonequi para nejhua nicajsis nojhui. ⁷ Xnicnequi ipan in tonaltin nemechnotztiquisa san achijtzin ipan nojhui, yej nicnequi ninocahuas quesqui tonaltin nemohuan, tla toTeco quinequi. ⁸ Pero ninocahuas nican Efeso hasta yejcos on ilhuitl Pentecostés, ⁹ pampa niquita ica nican sanoyej† huelis nitequitis niman noscaltis itequiu toTeco. Pero no ijqui niquita ica miyequej nemij yejhuan nechixnamiquij.

¹⁰ Tla nemotech ajsi Timoteo, xchihuacan canica para nemohuan ma paqui niman ma ca itlaj contematztias, pampa yejhua quitequichihulia toTeco ijcon quen nejhua. ¹¹ No ijqui, tej, ma ca yacaj ma quita quen xitlaj‡ quijtosnequi. Yej cuajli ihuan xnajnahuatican§ ican yolsehuilistli para ma caksi iojhui niman ma huajla notech, pampa yejhua nicchixticaj inhuan on ocsequimej tocnihuan.

¹² Aman nemechijlis ica on tocniu Apolos. Sanoyej onicyoleu para ihuan on ocsequimej tocnihuan ma mechnotzati, niman xoquinec oyaj ipan in tonaltin. Pero yas ijcuac huelis ocsejpa.

Sa ica nochi itlajtol Pablo

¹³ Xtlachixtiakan, tej, niman xmelajcanemican ipan nemotlaneltoc. Xmoyolchicahuacan niman xpiacan chicahualistli ipan nemotlaneltoc. ¹⁴ Nochi tlen nenquichihuasquej, xchihuacan ican tetlajsojtlalistli*.

¹⁵ Nocnihuan, nemejhuamej nenquimatztoquej ica Estéfanias ihuan ichan-chanejcahuan† achtopa yejhamej opejquej quineltocaj Cristo ne Acaya.

* **16:1** le pertenecen; teaxcahuan, tehuaxcahuan, tetlatquihuan † **16:9** mucho ‡ **16:11** nada;
coxtla § **16:11** despídanle; xpachihuitican * **16:14** amor † **16:15** su familia

Niman no nenquimatztoquej ica aman quimpalehuiyaj on yejhuan iteyax-cahuan Dios ican noch iinyojo. ¹⁶ Nicnequi, tej, para nemejhuamej xquint-lacematican on quenomej tocnihuan niman nochimej on yejhuan tepale-huiyaj niman tequitij ipan iteqiu Dios. ¹⁷ Nipaqui ica yohualajquej Estéfanas, Fortunato niman Acaico. Yejhuamej yoquichijquej on tlen nemejhuamej xhueliya nenquichihuaj pampa huejca nennemij. ¹⁸ Yejhuamej onechyol-pachihuitijquej quen nemejhuamej omechyolpachihuitijquej. On tlacamej quen yejhuamej quitocarohua quiselisquej totlacaitalis.

¹⁹ On yejhuan tlaneltocaj ne Asia mechtlajpalohuaj. Aquila niman Priscila, niman on tlaneltocaquej yejhuan nosentlaliaj ne ichan, sanoyej mechtlaj-palohuaj ican itocatzin toTeco. ²⁰ Nochimej tocnihuan yejhuan nican nemi mechtlajpalohuaj. Xmotlajpalocan ihuan ocsequimej ican miyec tetlajsojt-lalistli‡.

²¹ Nejhua, Pablo, niquijcuilohua yejhua in ican noma: “Nemechtajpalohuaj.”

²² Tla yacaj xquitlajsojtl a toTeco, ma itlahuel Dios ipan ma huajla. ;ToTeco ye huajlau!

²³ Ma toTeco Jesucristo mechtiocihua ica ihueyi teicnelilis§. ²⁴ Nochimej nemejhuamej nemechtitlanilia notetlajsojtlalis ican itocatzin Cristo Jesús. Ma ijqui nochihua.

‡ **16:20** Ipan griego quijtohua: “ican yectli tlatencuajli.” Tlatencuajli quitosnequi beso. § **16:23** misericordia

2 CORINTIOS

ICA OME ITLAJCUILOL ON APÓSTOL SAN PABLO PARA ON CORINTIOS

Pablo oquintlajcuilhuij on tlaneltoquej

¹ Nejhua, Pablo, niiapóstol Jesucristo pampa Dios ijqui oquinec onechtlalij. Nejhua ihuan tocniu Timoteo temechtlajcuilhuij nemejhuamej tocniuhan yejhuan nennemij ipan itiopan Dios ompa ipan on hueyican itoca Corinto, niman para nochimej teyaxcahuan* itech Dios yejhuan chantij imanyan on iregión Acaya. ² Ma Dios toTajzin niman toTeco Jesucristo mechtiocihuacan niman ma mechmacacan yolsehuilistli.

Pablo oquimacac tlaxtlahuijli Dios

³ Ma ticyectenehuacan toTajzin Dios yejhuan iDios niman iTajzin toTeco Jesucristo, pampa yejhua techicnelijtaj niman nochipa techyoltlalijtaj.

⁴ Dios techyoltlalia ipan nochipatlin techpajsolohua, para tejhuamej no huelis tiquinyoltlalisquej on yejhuan quipiaj tepajsolohualistli. Niman tiquinyoltlalisquej ican on sa no yejhua teyoltlalijli yejhuan Dios ica techyoltlalia. ⁵ On miyec tlajyohuilstli yejhuan huajlau ipan Cristo, no topan huajlau. No ijqui itechcopa Cristo ticseliaj se hueyi teyoltlalijli. ⁶ Niman tla tejhuamej titlajyohuaj, titlajyohuaj san para nemejhuamej xselican on teyoltlalistli niman on temaquixtilistli. Niman tla Dios techyoltlalia, techyoltlalia san para nenquipiasquej teyoltlalistli niman temaquixtilistli. Ijcon, tej, huelis nenquixicosquej ican ijyohuilstli sa no yejhua on tlajyohuilstli yejhuan tejhuamej tiquijyohuiyaj. ⁷ Niman hasta aman ticpiaj se melajqui tlamachalistli, pampa ticmatij ica ijcon quen nentlajyohuiyaj quen tejhuamej, no ijqui nenquiselisquej sa no yejhua on teyoltlalistli quen tejhuamej.

⁸ Aman, tej, nocnihuan, ticnequij ica xmatican on tlen temojtij tlajyohuilstli oticpixquej ne ica Asia. Topan oyejcoc se tlahuejli sanoyej[†] hueyi hasta xoc hueliya ticxicohuayaj. Ticnemiliyaj xoc tiquisasquej ican nemilistli. ⁹ Titomatiyaj quen on yejhuan yoquintlajtlacolmacaquej para ma miquican. Pero in onochiu para ma ca sa no tejhuamej ma titoneltocacan, yej para ma tictlalian toyollo san itech Dios yejhuan quinyolitia on mimiquej.

¹⁰ Dios otechmaquixtij itech on hueyi temojtij miquilistli, niman ijqui techmaquixtijtias. Yejhua, tej, itech ticpiaj totlamachalis ica techmaquixtijtias,

¹¹ tla nemejhuamej nentechpalehuiyaj ican nemooraciones. Niman tla miyequej topampa quichihuaj inoraciones, miyequej no quimacasquej tlaxtlahuijli Dios ipampa on tlatiochihualistli yejhuan techmaca ijcuac yoquinanquilij nemooración.

Pablo oquimijlij tlica xoquinnotzato

¹² Sanoyej techpactia temechijliaj ica totlamachilis techmachiltia ica nochipa titohuicaj ican yolchipahualistli niman yolcuajlilistli yejhuan quisa itech Dios. Ijcon, tej, titohuicaj ihuan nochipatlin, niman no melahuac

* **1:1** le pertenecen; teaxcahuan, tehuaxcahuan, tetlatquiuhuan † **1:8** muy

nemohuan titohuicaj. Ijcon yotitohuicaquej xpampa techyecana totlamatquilis[‡], yej pampa techyecana itetlajsojtlalis[§] Dios. ¹³ Ipan totlajcuilolamahuan xitlaj* ocse temechijcuilohuiliaj, yej san on yejhuan hueli nенquimomachtiaj niman nencajsicamatij. Niman temechnequiliaj para no huelis nencajsicamatisquej tlica[†] ijquin titohuicaj. ¹⁴ Aman xmás nencajsicamtij tlica ijquin titohuicaj. Pero ticnequij para cuajli nencajsicamatisquej para on tonajli ijcuac huajlas toTeco Jesús, huelis nenpaquisquej topampa sa no ijqui quen tejhuamej tipaquisquej nemopampa.

¹⁵⁻¹⁶ Nicyolmatzticatca ica cuajli nennechselisquej. Yejhua ica onicnemilijca nemechnotztiquisasia ijcua niasquia ne Macedonia, niman no ijcua nihuajnocuepasquia ocsejpa nemechajnotztiquisasia. Ijcon, tej, huelisquia nemechpactisquia ocpa. No ijqui, ijcua nihuajnocuepasquia, huelisquia nennechpalehuisquiaj ica on tlen nechpolosquia ijcua niasquia ne Judea. ¹⁷ Ijcua onemechtlaajcuilhuij ica onicnemilij nemechontas, sequimej nemejhuamej onenquinemilijquej ica xican cuajli noyojlo onemechijlij, pampa xonemechitato quen onemechtlaajcuilhuij ica nicchihuas. ¿Nemejhuamej nenquinemiliaj ica ijcua nicnemilia itlaj nicchihuas, nicnemilia quen yacaj tlacatl yejhuan más saquin[‡] notlajtolpatla? ¹⁸ Ijcon quen Dios nochipa quichihua tlen quijtohua, nejhua no ijqui xqueman nemechijlia “quemaj nemechonotzas” niman nojticopa huej nicnemilijtaj ica xnias. ¹⁹ Ijcon nicchihua pampa Jesucristo iConetzin Dios, yejhuan Silvano, Timoteo niman nejhua ica titemachtiaj, xqueman oquijtoj itlaj quichihuas, niman quemaj ijticopa quinemilijtaj itlaj ocse quichihuas. Itlajtol Cristo nochii cuajli melahuac nochihua. ²⁰ Cristo, tej, oquintenquixtij nochii ipromesas Dios. Yejhua ica ipampa Cristo tiquijtohuaj: “Ma ijqui nochihua.” Niman ijcon Dios quiselia hueyilistli. ²¹ Niman sa no yejhua Dios yoquimelajcatlalij toyojlo niman nemoyjlo itech Cristo niman itech tiyejyejtoquej. ²² Yejhua yotechtalilij isello yejhuan quiteititia ica itech titeyaxcahan, niman ipan toyojlo yocuajtitlan iEspíritu Santo yejhuan techititjicaj ica melahuac tic-selisquej nochii on tlatiochihualistli yejhuan otechmacac ipromesa.

²³ Aman, tej, nictestigotlalia Dios. Xoniaj ne Corinto quen onicnemilijca pampa xonicnec nemechajmanas. ²⁴ Tejhuatej xticnequij temechnahuatisquej quen nentlaneltocasquej, pampa nemotlaneltoc ye melajqui oncaj itech Cristo. Yej titequitij para xpiacan paquillistli.

2

¹ Yejhua ica onictlalij ipan noyojlo ica xnemechonotzas ocsejpa niman nemechajmanas, ² pampa tla nejhua nemechajmanasquia, tla ijcon, ¿aquinomej huelisquiaj nechpactisquiaj yej san no nemejhuamej yejhuan onemechajman? ³ Yejhua ica onemechijcuilohuiliipan on ocse tlajcuilolamatl quen onicchii pampa xonicnec nias niman nicselis ajmantli nemotech, pampa más quitocarohuaya nennechpactisquej. Nicyolmatzticaj ica tla nipaquis, no nenpaquisquej nemochimej*. ⁴ Ijcua onemechijcuilohuiliyejhua on tlajcuilolamatl, sanoyej nipajsolihuiya niman ninajmanaya ipan noyojlo, niman hasta nichocaya. Nejhua xonemechtlaajcuilhuij para nemechajmanas, yej onemechtlaajcuilhuij para xmatican quen sanoyej hueyi tetlajsojtlalistli nemechpialia.

Nonequi ma notlapojpolhui on yejhuan yoquichiu on tlen xcuaqli

[‡] **1:12** nuestra sabiduría [§] **1:12** su amor ^{*} **1:13** nada; coxtla [†] **1:13** por qué; tline [‡] **1:17** después ^{*} **2:3** todos ustedes; nannochti, yemochimej, anochimej, innochimej, emmochimej

⁵ Onemechtlajcuilhuij ica on yejhuan sanoyej xcuaqli oquichiu. Xsan nejhua onechajman yej nemejhuamej no achi omechajman. Nejhua niquijtohua “achi” san para xnicpanoltis on tlen niquijtohua. ⁶ On castigo yejhuan yoquiselij ijcuac nenmiyequej onencastigarojquej ye cuajloncaj. ⁷ Aman, tej, ye nonequi nenquitlapojojhuisquej niman nenquiyotlalischej para ma ca yej san ipampa on iajman xoc quinequis quitucas Cristo. ⁸ Yejhua ica sanoyej nemechtlajtlanilia, xquititican ica oc† nenquitlajsojtlaj‡. ⁹ Ipan ocse tlajcuilolamatl onemechtitlanilij onicchiu para nemechtlatlatas tla nemejhuamej noch ica nennechtlacamatij. ¹⁰ Aman, tej, on yejhuan nemejhuamej itlaj nenquitlapojojhuisquej, nejhua no nictlapojojhuisquej. Tla oncatca tlinon nictlapojojhuisquej, onicchiu san nemopampa ixpan Cristo. ¹¹ Ijquin yonictlapojojhuisquej para ma ca techtlanis Satanás, pampa cuajli tiquixmatztoquej tlinon yejhua quinequi quichihuas.

Pablo ontlamatzticatca ne ipan on hueyican itoca Troas

¹² Ijcuac onajsic ne ipan on hueyican itoca Troas para nitemachtis on temachtiijli ica quen ijqui Cristo hueli temaquixtia, oniquitac ica oncaj miyec tequitl yejhuan huelisquia nicchihuasquia para toTeco. ¹³ Pero xnoyolica catca pampa xonicnextijtajsic ompa tocniu Tito. Yejhua ica inhuan oninohuatij on tocnihuan ica ye niau ne Macedonia niman quemaj oniaj.

Nochipa titetlanquej ijcuac tinemij san secan ihuan Cristo

¹⁴ Pero ticmacaj tlaxtlahuijli Dios yejhuan quichihua para nochipa titetlanquej pampa tinemij san secan ihuan Cristo. Ijcon quen itlaj ajhuiyalistli panohua, no ijqui totechcopia panohua on temachtiijli ica Cristo. ¹⁵ Dios techita, niman para yejhua tinemij quen iajhuiyalis Cristo pampa totechcopia panohua nochihuiyan on temachtiijli ica Cristo para on yejhuan nomaquixtiaj niman para on yejhuan xnamaquixtiaj. ¹⁶ Para on yejhuan xnamaquixtiaj, on temachtiijli quen itlaj ascayotls yejhuan temictia, pero para on yejhuan nomaquixtiaj, on temachtiijli quinmaca nemilistli. ¿Aquinon, tej, huelis cuajli temachtis ica ipoder? ¡Xacaj hueli temachtis! ¹⁷ Xtitemachtiaj ilajtol Dios quen miyequej quichihuaj yejhuan temachtiaj para quitlanisquej tomin. Yejhua ica titemachtiaj ican nochitojlo ixpan Dios san secan ihuan Cristo.

3

Pablo otemachtij ica on yencuic pacto

¹ Ijcuac ijquin tiquijtohuaj, ¿nemejhuamej nenquinemiliaj titotenehuasnequij ticiuajcualtin tlacamej para xtechselican? ¿Nenquinemiliaj ica techpolohua itlaj amatlaixmatijli* yejhuan temechtititisquej campa quijtohuaj ica ticiuajcualtin tlacamej, noso nenquinemiliaj ica nemechtlajtlanisquej para xtechmacacan amatlaixmatijli de nemejhuamej quen ocsequimej quichihuaj? ² ¡Ca! Tejhuatej xtechpolohua in amatlaixmatijli de se tlacatl, pampa sa no nemejhuamej nennemij quen tlajcuilolamamej yejhuan ipan toyojlo tlajcuilolnesticaj. Niman yejhua in tlajcuilolamatl noch tlacatl huelis quixmatis niman quinomachtis. ³ Cuajli nesticaj ica nemejhuamej quen se tlajcuilolamatl yejhuan Cristo oquititlan totechcopia. Yejhua in tlajcuilolamatl xonijcuiloj ican tlajpajli, yej ican iEspíritu on Dios yejhuan nochipa nemij. Yejhua in tlajcuilolamatl xipan itlaj tetl onijcuiloj, yej ipan nemoyojoj.

† 2:8 todavía; sanquen ‡ 2:8 le aman § 2:16 veneno * 3:1 carta de recomendación

⁴ Ijcon oniquijtoj, pampa ticneltocaj ica Dios quichihua para totequiu cuajli quisa itechcopa Cristo. ⁵ Xhueli tiquijtohuaj ica itlaj hueli ticchihuaj toseltimej. Yej noch i tlen hueli ticchihuaj Dios techhueiltia, ⁶ pampa yejhua techhueiltia cuajli tictetlajtlajtohuilaj on yencuic pacto. On yencuic pacto xejhua on tlanahuatijli yejhuan tlajcuilnesticaj, yej yejhua on tlen quisa itech on Espíritu Santo. On tlanahuatijli yejhuan tlajcuilnesticaj quitemaca miquilistli, pero on Espíritu Santo quitemaca nemilistli.

⁷ Iley Moisés ipan temej onijcuiloj niman ijcuac onotemacac, onotemacac ican se petlanqui hueyilistli. Niman ijcuac Moisés oquinselij on temej, ixayac sanoyej† opetlan hasta on hebreos xohuel oquitaquej ixayac. Pero masqui on tlanahuatijli ijcon onotemacac, on petlanilistli opopolijtiaj. Tla on tlanahuatijli yejhuan quitemaca miquilistli oquipanextij se petlanqui hueyilistli, ⁸ tla ijcon itequiu on Espíritu Santo quipanextia más sanoyej hueyilistli. ⁹ Niman tla on tlanahuatijli yejhuan tetlajtlacolmaca ican miquilistli quipiyaya hueyilistli, más sanoyej quipia hueyilistli on yencuic pacto yejhuan techmachiltia quen Dios quijtohuia ica totlajtlacolhuan yoquitlaxtlau. ¹⁰ Ijcuac on tlanahuatijli yejhuan achtoj quipiyaya hueyilistli, ihuan quita on yencuic pacto, nejsi ica xoc quipia hueyilistli, pampa on yencuic pacto más sanoyej quipia hueyilistli. ¹¹ Tla on tlanahuatijli yejhuan san achijtzin tonaltin tlanahuatia oquipix hueyilistli, on yencuic pacto, yejhuan para nochipa oncaj, más quipia hueyilistli.

¹² Aman titemachtiaj ican noch i yolchicahualistli pampa ticpiaj in tlamachalistli ica on yencuic pacto. ¹³ Tejhuamej xticchihuaj quen Moisés, yejhuan nixtlapachohuaya ican se tlaquentli‡ para on hebreos xquitayaj quen ijqui popolijtiaj on petlanqui hueyilistli yejhuan xhueliya huejcahui ipan oncaj. ¹⁴ Yehuamej, tej, xcajsicamatijay on achtoj pacto. Niman aman, ijcuac quinomachtiaj on achtoj pacto, oc§ xcajsicamatij. Nesi quen on tlaquentli* yejhuan quixtlapachohuaya Moisés oc quintlapachohuilia incajsicamatilis†. Pero se san cajsicamati ijcuac quineltoca Cristo. ¹⁵ Niman yejhuatej hasta aman xhueli itlaj cajsicamatij ijcuac quinomachtiaj on tlen oquijcuiloj Moisés. Quen itlaj tlaquentli quinmixtlapachojticiaj. ¹⁶ Pero ijcuac se tlacatl quineltoca toTeco, on tlaquentli yejhuan quixtlapachohua popolihi. ¹⁷ ToTeco Jesucristo yejhua Espíritu, niman campa nemi iEspíritu, ompa nemij tlamanahuiltin para on tlaneltocaquej. ¹⁸ Tla ijcon, tej, tejhuamej xoc tixtlapachijtoquej quen Moisés. Yej ica hueli tiquitaj ihueyilis toTeco quen tiquitasquiaj ipan itlaj espejo, niman ijcon sa no tejhuamej titochijtihuij quen toTeco ipan ihueyilis. Nochi yejhua in quichihua toTeco yejhuan Espíritu.

4

¹ Dios ican iteicnelilis* yotechmacac in tequitl para ma tictetlajtlajtohuilcan on yencuic pacto. Yejhua ica xqueman ticpolohuaj totlamachalis. ² Tejhuamej yoticajquej on tlen xcuajli san noctacachihua niman on tlen tepinajtij. Xtitlacajcaya jinemij nion ticpatlaj itemachtil Dios. Yej ixpan Dios ticpantlantiaj on tlen melahuac, niman ijcon itlamachilis cada tlacatl yejhuan techixmatztoquej quimati ica cuajli titohuicaj. ³ Pero tla sequimej xcajsicamatij on temachijli ica temaquixtilistli yejhuan ticteijliaj, xcajsicamatij pampa yejhuatej yahuij ipan on ojli para popolihuisquej. ⁴ Satanás, yejhuan quimpiaj on tlalticpactlacamej quen indios, yoquintlamachilispolo

† 3:7 muy ‡ 3:13 tela § 3:14 todavía; sanquen * 3:14 velo † 3:14 entendimiento de ellos * 4:1 su misericordia

para ma ca cajsicamatisquej on cuajli temachtijli yejhuan quipantlantia ihueyilis Cristo. Niman Cristo quipanextia Dios. ⁵ Ijcuac titemachtiaj, xtoca tejhuamej titemachtiaj, yej ticteijliaj ica Jesucristo yejhua toTeco niman ica tejhuamej titochihua nemotequichihuiliyahuan ipampa Jesús. ⁶ Dios, yejhuan otlanahuatij ma petlani on tlahuijli ne campa tlayohuatoc, no yotechhueliltij para yotiquixmatquej ihueyilis ipan toyojlo yejhuan Jesucristo oquipantlantij.

Nochi tlajtlamach ica Dios tiquixmatij ipampa totlaneltoc niman xipampa on tlen tiquitaj

⁷ Masqui ticpiaj in cajsicamatelistli ica ihuelilis Dios, sa no tejhuamej xhueli tictemachtiaj quen nonequi pampa tinemij quen itlaj contli tlachijchiutli ican soquitl. Ijcon, tej, pantlantiticaj ica on hueyi poder yejhuan topan oncaj xtotech quisticaj, yej hualejticaj itech Dios. ⁸ Masqui nohuiyan topan huajlau on tlen tepajsolo, xqueman san titocahuaj. Ijcuac sanoyej† tlajtlamach‡ xcuajli topan huajlau niman ijcon xticmatij tlinon ticchihuasquej, xqueman ticpolosquej totlamachalis. ⁹ Masqui techtlajyohuiltiaj, Dios xqueman techtlalcahuiya. Niman masqui techxiniaj ipan tlajli, xqueman techpopolohuaj. ¹⁰ Nochihuiyan campa tiahuij, nochipa tinemij listos para tiquijyohuisquej on miquilistli quen Jesús nemiya listo para oquijyohuij on miquilistli. Ijcon, tej, nochihua para nochimej ma quitacan ica inemilis Cristo ye tohuan oncaj. ¹¹ Chica tejhuamej ticpiaj nemilistli ipan in tlalticpactli, mojmostla techmictisnequij ipampa Jesús. Pero on nochihua para nopenextia inemilis Jesús ipan in tomicatlalnacayo. ¹² Ijcon, tej, chica tictequichihuiliyahuan Cristo nemotzajlan, on miquilistli no techtlamijtu ica yolic, pero yejhua ica on nemejhuamej nenquiseliaj nemilistli yejhuan para nochipa.

¹³ Ijquin tlajcuilnesticaj ipan on Yectlajcuilojli: “Onitlaneltocac, yejhua ica onitlajtlajtoj.” Tejhuamej no ticpiaj sa no yejhua on tlaneloctli, niman yejhua ica titlajtlajtohuaj. ¹⁴ Titlajtlajtohuaj pampa ticmatztoquej ica Dios yejhuan oquiyolihuitij§ niman oquetzteu toTeco Jesús ne ipan itlalcon no techyolihuitis niman techquetztehuas ipan totlalcon, pampa tinemij san secan ihuan Jesús. Niman san secan nemohuan techhuicas ne ixpan. ¹⁵ Nochi tlen tiquijyohuiyaj, tiquijyohuiyaj para temechpalehuiyaj. Niman para ijcon quen más miyequej quiseliaj itlatiochihualis Dios, no más miyequej ma quimacacan tlaxtlahuijli para yejhua quiselis más hueyilistli.

¹⁶ Yejhua ica xqueman ticpolosquej totlamachalis*. Masqui totlalnacayo tlantiu, toalma mojmostla yencuixtiu. ¹⁷ Masqui titlajyohuiyaj achijtzin nican ipan in tlalticpactli, on tlen tiquijyohuiyaj san panohua. Niman pampa tiquijyohuiyaj, Dios techmacas hueyilistli yejhuan para nochipa ticpiasquej. Niman on hueyilistli más sanoyej hueyi quijtosnequi xquen on tlen aman tiquijyohuiyaj. ¹⁸ Yejhua ica, tej, xitech tontlachixtoquej on tlajtlamach tlen tiquitaj, yej tejhuamej itech tontlachixtoquej on tlajtlamach tlen xtiquitaj, pampa on tlajtlamach tlen tiquitaj san panohuaj, pero on tlen xtiquitaj oncaj para nochipa.

5

¹ Ijcuac totlalticpacnacayo yejhuan quen itlaj soyacajli xoxotonis, ticmatztoquej ica Dios techmacas ne ilhuicac se ilhuicacnacayotl yejhuan nochipa onyas. Yejhua on ilhuicacnacayotl xtlacatis itech se sihuatl. ² Aman

† **4:8** muchas ‡ **4:8** cosas § **4:14** lo resucitó; oquiyolitij * **4:16** nuestra esperanza

sanoyej* tictoicnotlajtlaniliaj pampa sanoyej ticnequij ticpatlasquej totlalticpacnacayo ica on ilhuicacnacayotl ³ pampa xticnequij tinemisquej san ican toalmas yejhuan xquipiaj intlalnacayo. ⁴ Chica tinemij ican totlalticpacnacayo, tictoicnotlajtlaniliaj. In xquijtosnequi ica ticnequij ticpopolosquej totlalnacayo, yej ticnequij ma ticpatlacan totlalticpacnacayo ica on ilhuicacnacayomej para on tlalnacayososojli yejhuan hueli miqui ma popolihui ipan on yencuic nemilistli. ⁵ Dios yotechcuectlalij para ticselisquej yejhua on yencuic tlalnacayotl, niman otechmacac on Espíritu Santo para techmelajcaititia ica ticselisquej.

⁶ Yejhua ica nochipa ticpiaj tlaneltoctli. Niman ticmatztoquej ica chica tinemij ican totlalticpacnacayo xe tinemij ne ilhuicac ihuan toTeco. ⁷ Yejhua in ticmatij pampa itechcopia totlanelto niman xitechcopia on tlen tiquitaj. ⁸ Ticpiaj tlaneltoctli, niman más ticnequisquiaj ma tictlalcahuican totlalticpacnacayo niman ma tichantitij ihuan toTeco. ⁹ Yejhua ica ticchihuaj canica para nochipa ticpactisquej toTeco tla tinemij nican ican totlalticpacnacayo noso ne ilhuicac xican totlalticpacnacayo. ¹⁰ Ijcon, tej, ticpactisquej pampa ica oncaj tinochimej tonixnesisquej ixpan Cristo, campa yejhua techyolcuitis niman techtlaxtlahuilis on quen nonequi on tlen cuajli noso xcuajli oticchijquej ijcuac tinemiyaj ican totlalticpacnacayo.

On temachtilistli quitemaca yolsehuilistli

¹¹ Yejhua ica pampa ticmacajsij toTeco, ticchihuaj canica para ocsequimej tlacamej ma quineltocakan niman ma quitlacamatican Dios. Pero Dios ye quimatzticaj ica ticchihuaj yejhua on ican yolchipahualistli, niman titlamachaj† ica nemotlamachilis no ye quimatzticaj. ¹² Xtitohueyitenehuaj ocsejpa nemotech, yej ticnequij para nemejhuamej xyolpachijtiacan ipampa totequiu, niman ijcon huelis nenquinnanquilisquej on tlacamej yejhuan nohueyiliaj ica on tlen nesi niman xejhua ica on tlen oncaj ipan inyojlo. ¹³ ¿Yacaj otechlocojteneu? Tla tinemij locos, on para ticpalehuisquej Dios. Niman tla xtinemij locos, on para nemejhuamej temechpalehuisquej. ¹⁴ Itetlajsojtlalis‡ Cristo techchihualtia ma ticteijlican on cuajli tlajtojli yejhuan quitemaca temaquixtilistli, pampa ticmatztoquej ica yejhua oquiselij incastigo nochitlacatl ijcuac omic. Yejhua ica aman Dios quita nochitlacatl quen yoquiselijcaj incastigo de on miquilistli. ¹⁵ Cristo omic ipampa nochitlacatl para on yejhuan nemisquej ma ca quinoyaxcatican§ innemilis, yej ma quimactilican on yejhuan impampa omic niman onoquetzteu ipan itlalcon. ¹⁶ Yejhua ica, xoc tejhuamej tiquimpohuaj ocsequimej quen cuajcualtin tlacamej noso xcuajcualtin tlacamej san pampa ijcon nesi intequiu ipan in tlalticpactli. Masqui ijcuac xe tictlacamatiyaj, ijcon oticchijquej ihuan Cristo, pero aman xoc ticchihuaj. ¹⁷ Ijcon, tej, aquin nemi san secan ihuan Cristo, yejhua yencuic tlacatl nochihua. On tlajtlamach* isoltic opopoliu, niman yej nochon tlen yencuic ohuajlaj.

¹⁸ Niman nochitlhueu tohuan niman otechselij ican yolsehuilistli. Niman Dios no yejhua otechtequiutij para itech ma tiquinhuicakan nochimej ocsequimej, para yejhua tlahuelhuis inhuan, niman quinselis ican yolsehuilistli. ¹⁹ In, tej, quijtosnequi ica ne ipan on cojnepanojli† Dios nemiya ihuan Cristo, niman ompa tlahuelhuis inhuan on tlalticpactlacamej, niman oquinselij, niman itech quintlalijitcatca ican yolsehuilistli. Yejhua xquichihuiliijtacatca

* 5:2 mucho † 5:11 esperamos ‡ 5:14 su amor § 5:15 no lo posesionen; quinoyaxcatican, quinohuaxcatican, quinotlatquitican * 5:17 cosas † 5:19 cruz

cuenta on intlajtlacol. Niman tejhuamej otechtalij para tictemachiltisquej on temachtijli yejhuan quijtohua quen ijqui Dios tlahuelsehui inhuan on tlalticpactlacamej niman quinselia itech ican yolsehuilistli. ²⁰ Ijcon, tej, Cristo otechtalij para tiitenojnotzcahuan. Niman aman sa no Dios mechnojnotza totechcopa. Aman, tej, sanoyej temechtlajtlaniliaj quen technahuatia Cristo: xcahuilican Dios ma tlahuelsehui nemohuan, niman mechselis ican yolsehuilistli. ²¹ Masqui Cristo xoquichiu nion se tlajtlacojli, Dios san topampa oquimacac castigo quen tlajtlacolej yesquia. In onochiu para Dios ma techseli quen tiyolmelajquej ijcuac san secan tinemij ihuan Cristo.

6

¹ Ijcon, tej, pampa titehuicaltin ipan itequiu Dios, sanoyej* temechtlajtlaniliaj ma ca san xcahuilmatican itetlajsojtlalis ² pampa yejhua oquijtoj: Onimitzcac se cuajli tonajli ijcuac oniteicnelij†. Ipan on tonajli ijcuac onictemamac temaquixtilistli, onimitzpalehuij. Xcaquican, tej, aman sa no yejhua on cuajli tonajli. Aman in yejhua on tonajli ijcuac Dios quipia ipan iyojo para mechmaquixtia.

³ Xitlaj ticchihuaj itlaj yejhuan xquiseliaj on tlacamej, para ma ca yacaj quijtohuilis tlen xcuajli on totequiu. ⁴ Yej noch quech ticchihuaj yejhua ica, ticteititiaj ica tiitequitcahuan Dios. In se ejemplo. Tejhuamej, tej, ican miyec ijyohuilistli ticcicohuaj on tlajyohuilistli, tlajtlamach‡ techpolohua niman miyec tepajsolohualistli yehuan oticpixquej. ⁵ Tejhuamej techhuihuitequinij, techtzajtzacuanij, niman miyec tlacatl techixnamiquini. Niman ticpijanij sanoyej chicahuac tequitl, niman quemanyan xticochij nion titlacuaj.

⁶ No ticteititiaj ica tiitequitcahuan Dios ipampa toyolchipahualis, ipampa on totlaixmatilis§ yejhuan ticseliaj ipan on tlen melahuac, niman ipampa on toijyohuilis. No ticchihuaj on tlen cuajli para ocsequimej, niman topan oncaj on Espíritu Santo, niman totetlajsojtlalis chipahuac. ⁷ Otictemachtijquej on tlen melahuac niman oticpanextijquej ipoder Dios ipan noch tlen oticchijquej. Tictequitiltiaj on yolmelajcanemilistli quen toarmas para titeixnamiquij niman para titomanahuiyaj ijcuac techixnamiquij. ⁸ Quemanyan techtlacaitaj, niman quemanyan xtechtlacaitaj. Quemanyan quijtohuaj ica ticiuajcualtin tlacamej, niman quemanyan quijtohuaj ica xticuajcualtin tlacamej. Quemanyan techpiaj quen tlacajcayajquej masqui tiquijtohuaj on tlen melahuac. ⁹ Quemanyan techitaj quen xtechixmatisquiaj masqui cuajli techixmatij. Quemanyan quijtohuaj ica ye timictihuij, pero oc* ticpiaj nemilistli. Tejhuamej techcastigarohuaj pero xtechmictiaj. ¹⁰ Masqui titajmanaj, xqueman ticpolohuaj topaquilis. Masqui timayanquej, miyequej tiquinrricojtiliaj itech Dios. Niman masqui xitlaj† ticpijpiaj, noch tlahtlamach toyaxca.

¹¹ Nocnihuan corintios, yotemechnojnotzquej melajqui niman temechtlajsojtlaj ican noch toyol. ¹² Tejhuamej xtemechteltiliaj totetlajsojtlalis, yej nemejhuamej nentechteltiliaj nemotetlajsojtlalis. ¹³ Aman, tej, nemechnotza quen se tajtli quinnotza iconehuan. Xnechtajsojtlacan on quen nejhua nemechtlajsojtlacan.

Pablo oquijtoj ica se yejhuan tlaneltoca xquitocarohua ihuan nosentlalis on yejhuan xtlaneltoca

* **6:1** mucho † **6:2** tuve misericordia ‡ **6:4** cosas § **6:6** conocimiento * **6:9** todavía;
sanquen † **6:10** nada; coxtla

¹⁴ Ma ca xmosentlali ihuan yacaj yejhuan xtlaneltoca itech Cristo. ¿Quen ijqui yacaj yejhuan yolmelajqui huelis nohuicas san secan ihuan yacaj yejhuan xyolmelajqui? On sa no ijqui quen tlatalyotl xnohuica ihuan on tlayohualyotl. No ijqui on yejhuan yolchipahuac ocse tlamantic ihuan on yejhuan xyolchipahuac. ¹⁵ Noso ¿quen ijqui huelis san se iyojlo quipias Cristo ihuan on Satanás? Noso ¿quen ijqui huelis san se tlamachilistli quipias on tlaneltoquaquetl ihuan on yejhuan xtlaneltoca? ¹⁶ Noso ¿on itiopan Dios huelis nemis san secan inhuan on tlamachijchihualtin intajtzitzihuan? Nemejhuamej, tej, nemochihuaj itiopan on Dios yejhuan nochipa nemi, ijcon quen sa no Dios oquijtoj:

Intzajlan nichantis niman niquistinemis. Nejhua niinDios yes niman yejhuamej noyaxcahuan[‡] yesquej.

¹⁷ Yejhua ica ijquin quijtohua toTeco:

Xquisacan ne intzajlan on yejhuan xtlaneltocaj, niman intech xmoxelocan. Ma ca xmatocacan on tlen xchipahuac, niman nejhua nemechselis.

¹⁸ Nejhua ninochiwas nemoTaj, niman nemejhuamej nennoconehuan yesquej. Ijquin quijtohua on toTeco nochи hueli quichihua.

7

¹ Aman, tej, notlajsojcaicnihuan, pampa Dios otechmacac nochи in prome-sas, ma ticxelocan itech totlalnacayo niman toalma nochи on tlen techijtlacohua. Niman ma cuajli titoyolchipahuacan pampa ticmacajsij toTeco.

² Xtechtalican ipan nemoyojo ican tetlajsojtlalistli*. Tejhuamej xacaj nion aquin oticchihuili quej itlaj tlen xcuajli. Xacaj oticpojpolo quej, nion xacaj otiquixpachohuili quej itlaj. ³ In xniquijtohua para nemechtlajtlacoltis. Nemejhuamej, tej, ye nenquimatztoquej ica yonemechijlij nennemij ipan noyojlo. Tla tinemisquej noso tla timquisquej, nochipa nemechpias ipan noyojlo. ⁴ Sanoyej nemechpialia ica noyojlo, niman no sanoyej[†] nemotech-copa nipacticaj. Masqui nochи on tlen niquijyohuitcaj, sanoyej nechyole-huaj, niman sanoyej nipaqui.

⁵ Desde ijcuac otejcoquej nican Macedonia, xqueman otitosehuijquej, yej nochihuiyan ticonamiquij pajsolohuilistli. Ne quiahua on yejhuan xtlaneltocaj techijixnamiquij, niman ipan toyollo oticmatquej nemojtijli impampa on yejhuan tlaneltocej. ⁶ Pero Dios, yejhuan quinyolehua on yejhuan nosiaucahuasnequij, otechyoleu itechcopa Tito ijcuac oyejcoc. ⁷ Yejhua otechyoleu xsan pampa oyejcoc, yej pampa otechijlij quen ijqui onenquiy-olejquej. Niman yejhua otechtajtlajtohuili ica sanoyej nentechitasnequij, niman quen onemajmanquej, niman quen sa nentechajmatztoquej. Yejhua ica on, nejhua más sanoyej onipac.

⁸ Masqui on tlajcuilolamatl yejhuan achtoj onemechtitlanilij omechmacac ajmantli, nipaqui ica onemechtitlanilij. Achtoj oninajman, pampa onicmat ica on tlajcuilolamatl omechmacac ajmantli, pero on san ipan achijtzin tonaltin. ⁹ Pero aman nipaqui. Pero nipaqui xpampa onemajmanquej, yej pampa on ajmantli omechpalehuij para onemoyolpatlaquej. Nemejhuamej onemajmanquej quen Dios oquinec, niman yejhua ica totlajcuilolamau xomechchihuili itlaj tlen xcuajli. ¹⁰ Tla se quijyohuia on ajmantli quen Dios quiyolpactia, ompa tzimpehua on yolpatlistli. Niman ijcuac se noyolpatla, huelis quiselis on temaquixtilistli, niman ijqui xqueman quijtos ica xcuajli oquichiu. Pero tla xquijyohuia on ajmantli ijcon quen Dios quiyolpactia,

[‡] 6:16 me pertenecen; noyaxcahuan, nohuaxcahuan, notlatquicahuan * 7:2 amor † 7:4 muy

ixpolihuis. ¹¹ Nemejhuamej onemajmanquej quen Dios oquipactij, niman aman xquitacan tlinon onenquitlanquej yejhua ica on. Aman nemejhuamej nennemij listos para nenquiteititisquej ica nemohuicaj quen quitocarohua. On tlajtlacojli yejhuan onemechtlaajcuilohuilij ipan on ocse tlajcuilolamatl, omechcualanij niman no omechmojtij. Nimantzin onenquinequej nennechitasquej, niman onenquipixquej nemoyojo nencastigarosquej on yejhuan oquichiu on tlajtlacojli. Yejhua ica on, tej, onenquiteititijquej ica xnenquipiaj tlajtlacojli yejhua ica on tlen onochiu. ¹² Masqui ijcon onemechijcuilohuilij on ocse tlajcuilolamatl, nejhua xonicchiu ipampa on tlacatl yejhuan oquichiu on tlen xcuajli, nion xipampa on yejhuan oquijohuij on tlajtlacojli. Yej onicchiu para ixpan Dios xmatican quen melahuac nennechtlacamati. ¹³ Yejhua ica onentechyoltlalijquej. Pero no sanoyej otipaquej pampa Tito otiquitaquej sanoyej paquiya. Ijcon nemiya pampa nemejhuamej onenquipalehuijquej para ma nomati ican nesehuijli. ¹⁴ Ijcuac Tito xe yaya nemotech, oniquijlij quen sanoyej nipaquiya nemopampa. Aman, tej, yejhua yoyejcoc notech niman xonipinai ica on tlen oniquijlij. Ijcon, tej, quen melahuac nochi on tlen temechijliaj, no ijqui cuajli oquisato on tlen otiquijlijcaj Tito. ¹⁵ Niman aman ijcuac quelnamiqui quen nemochimej[‡] onenquitijquej nemotetlacamatilis itech, niman quen onenquiselijquej ican yolyemanilistli niman nemojtijli, itetlajsojtlalis yejhuan mechpialia más noscaltijtiu. ¹⁶ Nipaqui pampa nihuelli nictalia nochi noyojo nemotech.

8

On tlaneltoaquej nonequi tepalehuisquej ican nochi inyojo

¹ Aman, nocnihuan, ticnequij temechtlajtlajtohuilisquej quen ijqui yonoteititij itetlajsojtlalis* Dios impan on yejhuan tlaneltoaj ne Macedonia. ² Masqui sanoyej[†] quintlatlatayaj ican tlajyohulistli, impaquilis sanoyej hueyi. Yejhua ica ican nochi inyojo oquitemacaquej hasta quech ohuelquej, masqui yejhamej sanoyej mayanquej. ³ Nejhua nixpanti ica xsan oquitemacaquej nochi quech hueliyaj, yej hasta quech ohuelquej niman más. Niman ijcon oquichijquej, pampa ijqui oquitlalijquej ipan inyojo, niman xpampa yacaj oquimijlij ica ijcon nonequi quitemacasquej. ⁴ Yejhamej sanoyej otechtlatjlanilijquej para ma tiquitquican inofrendas para quimpalehuisquej on tlaneltoaquej ne Jerusalén. ⁵ Niman yejhamej oquichijquej más xquen tejhamej titlamachayaj. Achtoj sa no yejhamej onotemacaquej itech toTeco, niman quemaj totech, sa no ijqui quen Dios oquinec. ⁶ Ijcuac otiquitaquej quen on tocnihuan ne Macedonia oquichijquej, otictlatjlanilijquej Tito para nemotzajlan ma tlami quichihua on tequitl ica quisentlalis on ofrenda ijcon quen achtoj opeu quichihua. ⁷ Nemejhuamej nentetlantihuij ipan nochi ijcon quen cuajli nemohuicaj ican nemotlaneltoc, ica on quen hueli nentemachtiaj, ican nemotlaixmachilis, ican nochi nemoyojo para nentepalehuiyaj, niman ica nemotetlajsojtlalis yejhuan nentechpialiaj. No ijqui xmohuicacan cuajli ica on quen nenquitemacaj on tlanechicojli.

⁸ In tlen nemechijlia xejhua tlanahtuati. Pero san niquitaya tla ichquich nemotetlajsojtlalis ihuan intetlajsojtlalis on ocsequimej para niquitas tla nemotetlajsojtlalis yejhua melahuac. ⁹ Nemejhuamej, tej, ye nenquixmatztoquej quen teicneliaj[‡] toTeco Jesucristo. Masqui yejhua quinopiyaliaya

[‡] **7:15** todos ustedes; **nannohti**, yemochimej, anochimej, innochimej, emmochimej * **8:1** su amor

[†] **8:2** mucho [‡] **8:9** misericordioso

nochi, onochiu manyanqui topampa, para itechcopa imanyanalis tejhamej otictopiyalijquej miyec ipan totlaneltoc.

¹⁰ Aman nemechijlis tlinon nicnemilia yejhua ica on ofrenda. Más cuajli para tlamic nenquisentlalisquej on ofrenda yejhuan onenquipehualtijquej on ocse xipan catca. Nemejhuamej xsan nenachtojmej para opeu nenquichihuaj on tequitl, yej no para onenquinequej nenquichihuaj on tequitl.

¹¹ Aman, tej, ica sa no yejhua nemoyojlo yejhuan achtoj onenquipixquej, ocsejpa pehua xsentlalicán on ofrenda hasta nentlamisquej. Xtemacacan, tej, quech nenhuelisquej, ¹² pampa tla se tlacatl ican nochí iyojlo quitemaca quech yejhua hueli quitemaca, Dios quiselilia on ofrenda. Yejhua, tej, xhueli quitlajtlanilia tlen se xquipia. ¹³ In, tej, xquijtosnequi tla pampa nenquimpalehuisquej on ocsequimej, niman nemejhuamej itlaj ma mechpolojeti.

¹⁴ In yej, quijtosnequi nochí san se ijqui ma onya. Aman nemejhuamej nenquipiaj tlinon ica huelis nenquimpalehuisquej ipan on tlen quimpolohua ocsequimej. Niman sa no ijqui, ipan ocse tonajli yes yejhamej quipiasquej tlinon ica mechpalehuisquej ipan on tlen mechpolos. Ijquin, tej, nochí san se ijqui onyas, ¹⁵ quen quijtohua ipan in Yectlajcuilojli: “On yejhuan miyec oquisentlalij xitlaj[§] ica onocau, niman on yejhuan xmiyec oquisentlalij xoquipoloto.”

Tito niman itehuicalhuan cominotzasquej on tlaneltocaquej chantij ne Corinto

¹⁶ Nicmaca tlaxtlahuijli Dios ica yejhua oquitlalilij Tito ipan iyojlo sa no yejhua on yolehualistli para mechpalehuis quen nejhua nicpia. ¹⁷ Yejhua mechontas xsan pampa onictlajtlanij ma huiya nemotech, yej pampa sanoyej mechonmatzticaj.

¹⁸ Ihuan Tito tictitlanij se tocniu yejhuan nochihuiyan ipan on tiopantin on tlaneltocaquej quitlacaítaj, pampa yejhua cuajli quiteijlijtiu on cuajli tlajtojli yejhuan quitemaca temaquixtilistli. ¹⁹ Niman xsan quitlacaítaj, yej no oquitlapenijquej para tohuan quistinemis, niman techpalehuis ticteitisquej on totetlajsojtlalis* itechcopa on ofrenda yejhuan tictemacaj. Ijquin ticchihuaj para toTeco quiselis hueyilistli niman para ticteitisquej ica melahuac ticnequij titepalehuisquej. ²⁰ Ticnequij ticchihuasquej canica para ma ca yacaj techtejtenehuas ijcon quen ticnechicohuaj on miyec ofrenda. ²¹ Niman ticchihuaj canica para ticchihuasquej quen quitocarohua xsan ixpan toTeco, yej no imixpan on tlacamej.

²² Inhuán in tocnihuan tictitlanij ocse tocniu yejhuan miyecpa otictlatlataquej, niman yejhua miyec ocse tlamantic otechititij ica quinequi ican nochí iyojlo para tepalehuis. Niman pampa quipia iyojlo nemotech, aman más sanoyej quinequi ican nochí iyojlo tepalehuis. ²³ Tla yacaj itlaj mechtlajtoltia ica Tito noso on ocse omemej tocnihuan, xteijlican ica Tito tequitinohuan nemotzajlan, niman on omemej tocnihuan quintitlanij on tocnihuan yejhuan tlaneltocaj, niman ica impampa, Cristo quiselia hueyilistli. ²⁴ Yejhua ica ijcuac yejcosquej nemotech, xquintitican ica melahuac nenquintlajsojtlaj. Niman no xquintitican in yeji tlacamej ica melahuac nochí on tlen oniquimijlij ica nemejhuamej. Ijquin xchihuacan para nochí on tlaneltocaquej ipan on tiopantin huelisquej quitasquej.

§ ^{8:15} nada; coxtla * ^{8:19} nuestro amor

9

Ipan se tlajcuilojli Pablo cominijilia on corintios ma quisentlalican on ofrenda para on tocnihuán chanejquej ne ipan on hueyican Jerusalén

¹ Niman ica on ofrenda yejhuan nosentlalis para ica nenquimpalehuisquej on yejhuan iyaxcahuān* Dios, xnonequi para nemechtlaçuilhuis, ² pampa ye nicmatzticaj ica melahuac nenquinequij nenquimpalehuisquej. On yejhuan chantij ne Macedonia, ican paquillistli niqumijlijtiu ica desde se xi-utli catca nemejhuatej yejhuan nenchantij ne Acaya ye nenquipiaj nemoy-ojlo para nentlapalehuisquej. Niman pampa ocacquej quen onenquimpalehuijquej, saquin nochimej yejhuan chantij ne Macedonia onoyolejquej para no ijqui tlapalehuisquej. ³ Pero niquintitlani in tocnihuán para ma ca yej xijqui onquisas on tlen cuajli yonicteijlij ica nemejhuatej. Ijcon, tej, nennemisquej ican nemoofrenda sa no ijqui quen oniquimijlij on tocnihuán chantij ne Macedonia. ⁴ Tla sequimej yejhuatej nohuan yasquej niman mechnextijtasisquej xe nenquisentlaliaj on ofrenda, tla ijcon, tejhuamej tip-inahuasquej, niman nemejhuatej más nempinahuasquej pampa oniquimijlij ica melahuac nennemisquej listos. ⁵ Para ma ca, tej, ijcon nemopan nochihuas, nicnemilia cuajli yes niquntlajtlanilis in tocnihuán para ma mechnotzatij chica xe najsí, niman ma mechpalehuican nencajxitisquej on ofrenda yejhuan yonenquijtojquej ica nenquitemacasquej. Ijcon ijcuac najsí, on ofrenda ye onyas niman nenquiteititisquej ica nenquitemacaj pampa nenquinequij niman xpampa temechchihualtiaj.

⁶ Ma ca xquelcahuacan yejhua in. Yejhuan achijtzin quitoca, no achijtzin quipixca, niman yejhuan miyec quitoca, no miyec quipixca. ⁷ Cada se ma quitemaca iofrenda quen quixtia ipan iyojlo. Ma ca quitemacas ican tlahuejli, nion quinemilis san yacaj quichihualtia, pampa Dios quitlajsojtla† on yejhuan quitemaca iofrenda ican pactli. ⁸ Dios huelis mechmacas nochí tlajtlamach‡ tlaticohihualistli para ijcon huelis nochipa nenquipiasquej on tlen mechpolohua, niman no nenquipiasquej quech huelis ica nentlapalehuisquej ipan nochí cuajli tequitl. ⁹ Ipan in Yectlajcuilojli ijquin tlajcuolneticaj:

Dios ican nochí iyojlo miyec ica quimpalehuiya on yejhuan mayanquej, niman on tlen cuajli tequitl oquichiu onyas para nochipa.

¹⁰ Niman Dios yejhuan quimaca xinachtli on tocaquetl para ma toca niman tlacuajli para quicua, no mechmacas nochí tlen mechpolohua para huelis nenquimpalehuisquej on yejhuan itlaj quimpolohua. Niman on tlen ica nenquimpalehuisquej Dios quisaltis, niman ijcon nen-huelisquej nenquichihuasquej miyec tlajtlamach tlen cuajli.

¹¹ Dios mechmacas nochí tlajtlamach riquezas para ican nemoyojo nochipa huelis nenquitemacasquej más miyec nemotlapalehuilis. Niman ijquin miyequej quimacasquej tlaxtlahuijli Dios ipampa nemoofrenda yejhuan totechcopa nenquitemacaj para tiquinmactiliaj on tocni-huan.

¹² Ijcuac nenquitemacaj nemotlapalehuilis, xsan quiseliaj nemotetlayocolil on yejhuan iaxcahuān Dios, yej ticchihuaj para Dios no quimacaj miyec tlaxtlahuijli.

¹³ Nemotlapalehuilis quinchihualtis quiyectenehuasquej Dios, pampa yejhuatej quitasquej on quen nenquitlacamatij on cuajli temachijli ica Cristo yejhuan nenquitenehuaj nenquineltocaj. Yejhuatej

* **9:1** le pertenecen; iaxcahuān, ihuaxcahuān, itlatquihuan † **9:7** le ama ‡ **9:8** cosas

no quiyectenehuasquej Dios ipampa on cuajli ofrenda yejhuan nenquitemacasquej para yejhuamej niman para nochimej ocsequimej.

14 Sa no yejhuamej, tej, nemopampa quichihuasquej oración niman mechpi-alisquej miyec tetlajsojtlalistli ipampa on hueyi teicnelilistli§ yejhuan Dios oquintitij nemotechcopia.

15 Ma ticmacacan tlaxtlahuijli Dios ipampa iConetzin yejhuan otechmacac quen se hueyi tetlayocolijli yejhuan xacaj hueli quipantlantia ican tlajtojli.

10

Pablo quimanahuiya itlanahuatil yejhuan quipia quen apóstol

1 Nejhua, Pablo, nemechnotza quen Cristo quichihuasquia ican iyolyemanilis niman itetlajsojtlalis*. Sequimej quijtohuaj ica niyolyemanqui ijcuac ompa nemohuan ninemi, pero ijcuac xompa nemohuan ninemi chicahuac nemechnotza ipan notlajcuilolamau. **2** Yehua ica sanoyej† nemechtlajtlanilia ijcuac nemechonnotzas, ma ca nennechchihualtisquej chicahuac nemechnotzas quen niquinnotzas semej yejhuan techijtohuiliaj ticchihuaj on tlajtlamach‡ quen yacaj tlacatl quichihuasquia, niman xquen tlanahuatia Dios. Melahuac ninemi listo para chicahuac niquinnotzas on tlacamej yejhuan ijcon nechijijtohuaj. **3** Masqui tejhuamej titlapticactlacamej, tejhuamej xtitohtuisoquij quen on ocsequimej tlacamej ipan in tlapticactli quichihuaj. **4** On armastin yejhuan tiquintequitiltiaj ijcuac tehuan titohuisoquij xquenomej inarmas on ocsequimej tlapticactlacamej. On armastin yejhuan tiquintequitiltiaj quipiaj ipoder Dios niman hueli quixoxotoniaj ipoder on diablo. **5** Ijcon, tej, ticxoxotoniaj nochí on xcuajli tlateixpanhuijli yejhuan ica techixnamiquij. Ticxoxotoniaj on nohueyimatilistli yejhuan quichihua para se xhueli quiselia cajsicamatilistli itech ica Dios. Nochi tlamachilistli ticchihualtiaj ma quitlacamatí Cristo. **6** Niman ijcuac nesi ica nemejhuatej cuajli ye nenquitlacamatij Cristo, ticpiasquej toyojlo para ticastigarosquej on yejhuan oc§ xquitlacamatij.

7 Nemejhuatej san nenuquimijitaj on quen se tlajtlacha noso tlajtlajtohua. Tla yacaj cuajli quiyolmatzticaj ica ihuan Cristo tlapohuajli, tla ijcon nonequi quelnamquis ica tejhuamej no ijqui ihuan Cristo titlapohualli. **8** Masqui nejhua achi ninohueyitenehua ica on totlanahuatil, xitlaj* ica nipinahua pampa toTeco otechmacac yejhua in tlanahuatiijli para temechiscaltisquej ipan nemotlaneltoc, niman xpara temechxoxotonisquej. **9** Xnicnequi nesis ica nemechmomojtisnequi ican notlajcuilolamahuan. **10** Sequimej quijtohuaj ica ipan notlajcuilolamahuan sanoyej nitlahuelej niman nitlajtolcojtic, pero ijcuac nemohuan ninemi, xnejli nitlajtolcojtic niman xcuelcaquij notlajtol. **11** Pero on yejhuan ijcon quijtohuaj, ma quimatzia ica ijcon quen titlajtolcojtiejej ijcuac huejca temechtlajcuilhuiyaj, no ijqui ticchihuasquej ijcuac nemohuan tinemisquej.

12 Xqueman tincnemiliaj titotlanisquej nion titotlatlatasquej inhuan on yejhuan notenehuaj sanoyej cuajcualtin tlacamej. Ijcuac se tehuan notlatlani niman tehuan notlatlata quiteititia ica yejhua semi xtlamatqui. **13** Tejhuamej xtitohtueyitenehuasquej ica on tlen xtechtocarohua. Tejhuamej xtitohtueyitenehuasquej ica on tlanahuatiijli yejhuan xnejli ticpiaj, yej

§ **9:14** misericordia * **10:1** su amor † **10:2** mucho ‡ **10:2** cosas § **10:6** todavía; sanquen
* **10:8** nada; coxtla

san tictequitiltisquej on tlanahuatijli yejhuan Dios otechmacac. Ni-
man yejhua otechmacac on tlanahuatijli para titequitisquej nemotzajlan.
¹⁴ Tejhuamej xtithueyitenehuaj ica on tlen xtechtocarohua. Tla xachtopa
tejhuamej nemotech tajsisquiaj, titohueyitenehuasquiaj ica on tlen xtech-
tocarosquia. Pero achtoj tejhuamej otomechmachiltitoj on cuajli tlajtojli
yejhuan quitemaca temaquixtilistli. ¹⁵ Niman xqueman tictoyaxcatiaj† on
tequitl yejhuan ocsequimej yoquichijquej. Yej titlamachaj más ma noscalti
nemotlaneltoc niman ijcon más hueyi yes toteQUIU nemohuan, pero nochipa
titequitisquej campa techtocarohua. ¹⁶ Ijcuac noscaltis nemotlaneltoc, que-
maj huelis tictejllisquej on cuajli tlajtojli yejhuan quitemaca temaquixtilistli
ne campa más huejhuejca de nemejhuamej. Pero xqueman titohueyitene-
huasquej ica oticchijquej on tequitl yejhuan ocsequimej yoquipehualtijquej.

¹⁷ Ma ca ma yacaj nohueyitenehua ica itequiu, yej ma nohueyitenehua
ica on tequitl yejhuan toTeco quichihua itechcopia. ¹⁸ Ijcon xchihuacan,
pampa Dios xquiselia on tlacatl yejhuan nohueyitenehua ica itequiu, yej Dios
quiselia on tlacatl yejhuan toTeco quijtohua ica cuajli yoquichiu itequiu.

11

Pablo quimanahuia itequiu intech on yejhuan xmelahuac apóstoles

¹ Nicnequi xnechijyohuican achijtzin nemejhuamej ica on tlen nemechijlis
masqui caquisti quen niloco. Por favor xnechijyohuican. ² Nejhua ne-
mechtlaſojtla* ica on tetlajsojtlistli yejhuan Dios mechpialia. Ijcon quen
se tlacatl quimaca ichpoch se telpochtli para nonamictia, nejhua no ijqui
onemechtemacac para xmonamictican san ihuan Cristo. Ijcon oninocalactij
para huelis nemechtemactilis itech Cristo quen se chipahuac ichpochtli.
³ Pero ninomojtia ica nemotlamachilis mechcajcahuas quen on cohuatl
ocajcayau Eva ican iistlacayohuan, niman xoc nenquitlajsojtlasquej Cristo
ican nochi nemoyojo. ⁴ Nejhua, tej, ninomojtia pampa nemejhuamej semi
cuajli nenquinseliaj on yejhuan quipatlaj on temachtijli itech ica Jesús,
niman ijqui ocse tlamantic mechmachtiaj xquen tejhuamej. Niman nen-
quiseliaj se espíritu ocse tlamantic xquen on Espíritu Santo yejhuan achtoj
onenquiselijquej, niman no nenquiseliaj se temachtijli yejhuan quijtohua
ica quitemaca temaquixtilistli masqui yejhua on temachtijli sesetlamantic
xquen on yejhuan achtoj onenquiselijquej. ⁵ Pero nejhua xnicnemilia ica
on yejhuan nenquinseliaj quen sanoyej† huejhueyixtoquej apóstoles más
hueyi quimatij xquen nejhua. ⁶ Masqui xmás hueli nitenojnotza, nicpia
tlaixmachilistli ica Dios. Niman in nochipa yonemechititij ican nochi on
tlajtlamach‡ yejhuan yonicchii.

⁷ Ijcuac onemechmachtij on cuajli tlajtojli yejhuan quitemaca temaquix-
tilistli, xtlaj§ onennechtlaxtlahuilijquej. Nejhua oninotequipanoj para
ohuel onemechpalehuij. Ijcuac ijcon onicchii ¿onitlajtlacoj? ⁸ Se huelisquia
quijtosquia ica oniquincuilij on ocsequimej tiopantin para onemechpale-
huij, pampa yejhuan onechmacaquej tomin para ohuel onemechpalehuij.
⁹ Chica nemotech oninen, niman nechpolohuaya on tlinon ica ninopanoltis,
nion nensemēj xtlaj onemechtlajtlanij, pampa on tocnihuan yejhuan
ohualejquej ne Macedonia onechmacaquej on tlen nechpolojticatca. Xone-
mechtlaſjlanij on tlen nechpolohuaya, niman xqueman nemechtlaſjlanijs.
¹⁰ Ijcon cuajli nicyolmatztica ica melahuac niquixmati on tlen melahuac

† **10:15** lo poseemos; tictoaxcatiaj, tictohuaxcatiaj, tictotlatquitiaj * **11:2** les amo † **11:5** muy
‡ **11:6** cosas § **11:7** nada; coxtla

itech ica Cristo. No cuajli nicyolmatzticaj ica ne Acaya, xqueman nicselis tomin. **11** ¿Tlica*, tej, ijquin niquijtohua? ¿Tlen manin yej xnemechtla jsojtla? Dios quimatzticaj quen sanoyej nemechtla jsojtla.

12 Ijcon quen aman nicchihua, ijqui nochipa nicchihuas, para ma ca niquincahuilis on ocsequimej yejhuan no notenehuaj apóstoles no hueyitenehuasquej ica quichihuaj itequiu Dios quen tejhuamej ticchihuaj. **13** Yejhuamej, tej, quijtohuaj ica apóstoles pero xmelahuac apóstoles. Yejhuan tequitij para tlacajcayahuaj. Yejhuan nixpatlaj quen apóstoles para mechtlaneltoquiltisquej ica yejhuan no melahuac apóstoles. **14** Niman in xejhua itlaj yencuic quemach onesico, pampa Satanás sa no yejhua nixpatla quen se chipahuac ilhuicactequitquetl†. **15** Yejhua ica xnechtlatlachaltia tla itequitcahuau no nixpatlaj quen cuajcualtin tlacamej. Pero yejhuan quiselisquej intlaxtlahuil quen nonequi ica on tlen quichihuaj.

Pablo nohueyitenehua ica on quen yotlajyohuijtinen

16 Ocsejpa, tej, nemechijlia: ma ca yacaj ma quinemili ninemi loco. Pero tla nenquinemiliaj ninemi loco, xnechcahuilican ma nemechnotza quen yacaj loco para no huelis achijtzin ninohueyitenehuas. **17** In tlen nemechijlijticaj xnemechijlia ican itlanahuatil toTeco, yej nemechijlia quen se loco, pampa ninohueyitenehuas. **18** Niman pampa nemij miyequej yejhuan nohueyitenehuaj quen on tlalticpactlacamej yejhuan xquixmatij Dios quichihuaj, nejhua no ninohueyitenehuas. **19** Nemejhuan nentlamatquej, yejhua ica nenuimpialaj ijyohuclistli on yejhuan locos. **20** Nemejhuan yej nenuimijyohuiliaj on yejhuan mechchihualtiaj xquintequivichihuilican quen nentlanamactin yesquiaj. Yejhuan mechtomincualijtoquej, mechnoyaxcatiaj‡, mechitaj ican techichihualistli, niman mechyacahuijhuitequij. **21** Hasta nipinahua niquijtos ica tejhuamej xotitoyolchicajquej para ijcon temechchihuilisquej.

Nochi tlajtlamach§ yejhuan ocsequimej hueli ica nohueyitenehuaj, nejhua no hueli ica ninohueyitenehuas, masqui in tlen niquijtohua niquijtohua quen yacaj loco. **22** ¿Nohueyitenehuaj ica hebreos? Nejhua no nihebreo. ¿Nohueyitenehuaj ica hualejtoquej itech ichanchanejcahuán* Israel? Nejhua no nihualejticaj itech ichanchanejcahuán Israel. ¿Nohueyitenehuaj ica hualejtoquej itech Abraham? Nejhua no nihualejticaj itech Abraham. **23** ¿Nohueyitenehuaj ica quitequivichihuiliaj Cristo? Nejhua nictequivichihuilia Cristo más xquen yejhuan. Nicmati ica ijcon quen niquijtohua, caquisti quen niloco. Nejhua, tej, más sanoyej yonitequit xquen yejhuan, más yonechmajmatinenquej xquen yejhuan, más miyecpa yonechtzajtzacutinenquej, niman miyecpa nisu catca para nimquis. **24** Macuilpa onechmajmailijca on hebreos niman cada sepa onechhuitequej sempoajli† huan majtlactli ipan chicnahui. **25** Yexpa onechhuihuitequej ican cojtlit‡, niman sejpa onechtemojmotlaquej. Yexpa opolac on barco yejhuan ipan niaya. Niman sejpa se yehuajli niman se tonajli oninen ne ijtic mar campa huejcatlan. **26** Miyecpa huejca oninejnen, niman miyecpa nimquisquia ipan on atoyamej, niman de on ichtequej. Niman miyecpa nechmictisquiaj on

* **11:11** ¿por qué?; ¿tline? † **11:14** ángel: Angeles tequitij ne ilhuicac niman nican ipan in tlalticpactli. ‡ **11:20** se posesionan de ustedes; mechnoyaxcatiaj, mechnohuaxcatiaj, mechnotlatquitiaj

§ **11:21** cosas * **11:22** su familia † **11:24** Sempoajli quitosnequi veinte, niman sempoajli huan majtlactli ipan chicnahui quitosnequi treinta y nueve. ‡ **11:25** palos

nochantlacaſ § hebreos, niman no on yejhuan xhebreos. Huelisquia nimiquisquia ipan huehueyican, ipan on tlapatlaco, ipan mar, niman intech on yejhuan quitenehuayaj ica tocnihuan pero xmelahuac tocnihuan. ²⁷ Sanoyej nicpiani tequitl, niman on tlen tepajsoloj. Miyecpa hasta xnechmaca tiempo nicochis. Nejhua niquijyohuiyani apostli niman amictli. Miyecpa onajapis-mic. Sanoyej niquijyohuiyani on secutli, niman xonicpix tlaquentli.

²⁸ Nochi yejhua in nopan yoyetyiac. Pero no mojmostla nopan yetiya nochi on tlen nicomatzticaj intech nochimej on yejhuan tlaneltocaj nohuiyan.

²⁹ Tla yacaj cualo, quen nejhua no nicualosquia. Niman tla yacaj quitlajcali se tocniu ipan tlajtlacojli, nechyolcocolhua niman nechcualania. ³⁰ Tla nonequi para ninohueyitenehuas, ninohueyitenehuas ica on tlajtlamach yejhuan quiteititiaj ica xnicojtic. ³¹ Dios yejhuan iTajtzin toTeco Jesuscristo, yejhuan para nochipa nonequi quiselis yectenehualistli, quimatzticaj ica niquijtohua on tlen melahuac. ³² Ijcuac oninen ne Damasco, on gobernador, yejhuan quipalehuiya on rey itoca Aretas, oquintlalij soldados ne ipan itlatzacuilol-huan* on hueyican para nechajsisquej ijcuac ompa niquisasquia. ³³ Pero onechtemoltijquej ican se hueyi chiquiutli ipan se ventana yejhuan oncaj ipan itepanchinan on hueyican. Niman ijqui onicholoj intech on soldados.

12

ToTeco oquitlatlachaltij Pablo ica on tlatlachalistin yejhuan quen itemic-pan, niman miyec ocsequi oquimachiltij

¹ Nicpia tlinon ica ninohueyitenehuas, masqui xitlaj* nictlanis tla ninohueyitenehuas. Ninohueyitenehuas ica on tlatlachalistin yejhuan quen notemicpan oniquintac, niman on tlajtlamach† tlen sa no yejhua toTeco onechmachiltij. ² Ye quipia majtlactli huan nahui xipan ica onechhuicacaj ne ilhuicac campa chanti Dios. Xnicmati tla onechhuicacaj ican notlal-nacayo noso xican notlalnacayo, yej Dios quimati. ³ Ocsejpa nemechijlia ica xnicmati tla onechhuicacaj ican notlalnacayo noso ca, san Dios quimati. ⁴ Pero nicmatzticaj ica onechhuicacaj ne ilhuicac campa onicac on tlen xacaj quipia tlajtojli para quiteijlis, nion xnotecahulia para ya-caj ma quiteijli. ⁵ Huelisquia ninohueyitenehuasquia pampa yoniajca ne ilhuicac, pero xninohueyitenehuas yejhua ica on. Yej ninohueyitenehuas yejhua ica on tlen quiteititia ica xnicojtic. ⁶ Niman tla nejhua nicnequisquia cuajli ninohueyitenehuasquia, on xtontojyotl yesquia pampa niquijtosquia nochi on tlen melahuac. Pero xnicchihua para ma ca yacaj ma quinemili ica nejhua más nihueyixticaj xquen on tlen notech quitaj niman caquij.

⁷ ToTeco onechtlatlachaltij quesquipa quen ipan notemic. Niman para ma ca ninohueyimatis ica on tlen sanoyej‡ caultzin tlajtlamach yejhuan toTeco onechititij, onechcahuilij se tlajyohuclistli yejhuan quen itlaj huitztl yejhuan Satanás oquitlalij ipan notlalnacayo. Ijcon, tej, nechpajsolohua para xnino-hueyimati. ⁸ Niman yexpa yonictlajtlanlij toTeco para ma nechquixtili on tlajyohuclistli. ⁹ Pero toTeco nechijlia: “Ticpia notetlajsojtlalis§. Xmitzpolo-hua más. Nopoder más cuajli noteititia ijcuac se tlacatl xcojtic.” Yejhua ica nipaqui ninohueyimati ica xnicojtic, pampa ijqui nicpantlantia ipoder Cristo. ¹⁰ Aman, tej, nipaqui masqui xnicojtic, niman nechhuijhuicaltiaj, niman nechpolohua tlajtlamach, niman nechtocatinemij, niman niquij-yohuiyaj miyec tlajtlamach yejhuan onechpasoloj ipampa Cristo. Ijquin, tej, nipaqui pampa ijcuac más xnicojtic, Cristo nechmaca icojtilis.

§ 11:26 mis paisanos * 11:32 sus puertas * 12:1 nada; coxtla † 12:1 cosas ‡ 12:7 muy
§ 12:9 mi amor

Pablo cominmatzicaj on yejhuan tlaneltocaj ne Corinto

¹¹ Yoninochiu quen se loco pampa sa no nejhua ninocuajli tenehua, pero on nemejhuamej onennehchihualtijquej ijqui ma nicchihua. Más cuajli yesquia yej nemejhuamej cuajli noca nentlajtosquiaj, pampa masqui nejhua xhueyi niquijtosnequi, más hueyi niquijtosnequi xquen on apóstoles yejhuan nenquinseliaj quen huejhueyixtoquej. ¹² Onemechititij ica melahuac niapóstol intechcopia on tlamajhuisoltin, tetlatlachaltij niman milagros masqui onicxicoj sequimej tepajsolohuilistli ican miyec ijyohuilistli ijcuac nemotech oninen. ¹³ ¿Tlinon onicchiu para on tlaneltocaquej ocsecan yejhuan nemotech xonicchiu? San se tlamatli. Yejhuamej oniquinyetilij, pampa onicnec ma nechpalehuican ica on tlen nechpolohuaya, niman nejhuamej xitlaj* onemechtalajtlanij. ¿On yejhua ica nencualanij? ¡Xnechtlapojpolhuican tla nemechtahuelcuitia ica xonemechyetilij!

¹⁴ Aman ye nicpia noyojlo para ica yexpa nemechonnotzas, niman ocsejpa xitlaj nemechtalajtlanis. Nejhua, tej, xnictejtemohua on tlen nenquipiaj, yej sa no nemejhuamej nemechtejtemohua. Cuajli nesi, tej, ica on tatajtin yejhuamej nonequi quintequipanosquej inconehuan, niman xejhuamej on inconehuan quitequipanosquej intahuan. ¹⁵ Niman nejhua ican cuajli noyojlo nictemacas nochi on tlen nicpia, niman xsan yejhua on, yej nejhua no nictemacas nonemilis ipampa nemoalma. Nicpia noyojlo para ijcon nicchihuas, masqui nesi ica más nemechtalajsojlatiu† nemejhuamej, yej más xnennechtalajsojtlaj. ¹⁶ Masqui nenquimatztoquej ica xqueman itlaj onemechtalajtlanij, sequimej quijtohuaj onemechtlaixpachohuilij ican tlacajcayahualistli. ¹⁷ ¿Quen ohuel onicchiu yejhua on? ¿Tlen yej, onemechtlaixpachohuilij intechcopia on tocniuhan yejhuan oniquintitlan nemotech? ¹⁸ Onictlajtlanilij Tito para ma mechnotzati, niman ihuan onictitlan ocse tocniu. Ijcuac Tito omechitato ¿omechixpachohuilij itlaj? ¿Tlen yej, xnejli ticpiaj san se toyojlo para itlaj ticchihuaj? ¿Tlen tej, xnejli nohuica quen nejhua ninohuica?

¹⁹ ¿Nemejhuamej nenquinemiliaj ica titomanahuisnequij nemixpan? ¡On xnejli! Yej tejhuamej titlajtohuaj ixpan Dios niman quen toTeco Jesucristo quinequi. Niman nochi tlen ticchihuaj, notlajsojcaicnihuan, ticchihuaj para xmoscaltican ipan nemotlaneltoc. ²⁰ Ninomojtia ica ijcuac nemechontas, xnemechnextijtajsis quen nejhua nicnequisquia, niman nemejhuamej no xnennechitasquej quen nenquinequisquiaj. Ninomojtia niquitas ica nemoamatlanij, niman nemonexicolitaj, niman nemotlahuelitaj, niman nentlahuelnemij, niman nentzotzocamej, niman nemijitohuaj, niman nemoistlacohuaj, niman nemohueyimatij, niman xcuajli nemohuicaj. ²¹ No ninomojtia nemixpan nechpijinajtis Dios niman nemixpan nichucas nemopampa yejhuan achtoj onentlajtlacojquej, niman hasta aman xnemoyolcuepaj itech on tlajtlamach tlen xchipahuac quen on ahuinemilistli noso quichihuayaj nochi tlen xcuajli yejhuan huajlaya ipan intlamachilis.

13

Pablo quintlacanonotza on yejhuan tlaneltocaj ne Corinto

¹ Aman ye ica yexpa nias nemechontas. Tla nensem ej nenquipiaj itlaj yejhuan ica nenquiteixpanhuisquej yacaj, nejhua niquixtlalos. Nochi tlateixpanhuilistli yejhuan nenquintalilisquej ocsequimej, ica oncaj quimelajcaijtosquej omemej noso yeyimej teixpantijquej. ² Ijcuac ica ocpa oniquinnotzatoya, oniquinchicajcanahuatijca yejhuamej on yejhuan quichihuayaj

* **12:13** nada; coxtla † **12:15** les voy amando

tlajtlacojli, niman nochimej on ocsequimej. Aman ica huejca ninemi, ocsejpa niquinchicajcanahuatia ica ijcuac ocsejpa nias nemechonnotzas, nochimej yejhuan oc* tlajtlacohuaj niquincastigaros. ³ Ijcuacon nenquipi-asquej on tetlatlatalistli yejhuan nenquinequij nenquitasquej tla melahuac Cristo notechcopa tlajtohua noso ca. Cristo xquipolohua poder para mech-melajcatlalis, yej quiteititis ipoder. ⁴ Masqui Cristo oquimajmasohualtiquej† ipan cojnepanojli‡ quen xquipiasquia poder, aman yejhua nemi ican ipoder Dios. Tejhuamej no xticpiaj poder quen Cristo xoquipix, pero ihuan Cristo tinemisquej ican ipoder Dios para temechmelajcatlalisquej.

⁵ Sa no nemejhuamej cuajli xmixtlalocan para nenquitasquej tla nemelajcanemij ipan nemotlaneltoc. ¡Xmotlatlatacan! Ye nenquimatztoquej ica Cristo nemopan nemi. Tla xnenguimatij ica Cristo nemopan nemi, tla ijcon nemejhuamej xmelahuac nentlaneltocaj. ⁶ Niccha para xmatican ica tejhuamej melahuac titlaneltocaj. ⁷ Tejhuamej ticchihuaj oración itech Dios para ma ca xchihuacan on tlen xcualji. Ticchihuaj oración xpara ticteititiaj ica cuajli ticchihuaj totequiu, yej ticnequij xchihuacan on tlen cuajli, masqui ocsequimej ma quinemilican ica totequiu xitlaj§ quiyosnequi. ⁸ Xitlaj oncaj yejhuan ica tiquixnamiquij on tlen melahuac, yej nochicchihuaj para ticpalehuiyaj on tlen melahuac. ⁹ Tejhuamej, tej, tipaquisquej tla xnonequis chicahuac temechcastigarosquej, pampa on quiyosnequi ica cuajli nemohuicaj. Niman ticchihuaj oración para más xmoiectlalijtiacan. ¹⁰ Nemechtajcuilhuia in tlajcuilolamatl ijcuac xe nemechonta, para ijcuac nemotech nasis, ma ca nemopan yetiyas notlanahuatil yejhuan toTeco onechmacac. Yejhua onechmacac in tlanahuatiqli para nemechiscaltis ipan nemotlaneltoc niman xpara nemechxoxotonis.

¹¹ Aman, nocniuhan, ican in tlajtojli tlami niquijcuilohua in tlajcuilolamatl. Xpiacan pactli. Xtejtemocan quen nenquichihuasquej nochicuajli. Xselican on tlen yonemechijlij ipan in tlajcuilolamatl. San se tlamachilistli xpiacan. Xpiacan yolsehuilistli, niman toDios yejhuan quitemaca yolsehuilistli niman tetlajsojtlalistli* nemohuan nemis. ¹² Cuajli xmotlapalocan cada se ihuan ocsequimej ican tetlajsojtlalistli†. ¹³ Nochimej on yejhuan iyaxcahuan‡ Dios mechtajpalohuaj.

¹⁴ Xselican itlatiochihualis toTeco Jesucristo niman itetlajsojtlalis Dios. Niman on Espíritu Santo nemohuan ma nemi. Ma ijcon nochihua.

* **13:2** todavía; sanquen † **13:4** lo crucificaron ‡ **13:4** cruz § **13:7** nada; coxtla * **13:11**

amor † **13:12** Ipan griego quiytohua: “ican yectli tlatencuajli.” Tlatencuajli quitosnequi beso.

‡ **13:13** le pertenecen; iaxcahuan, ihuaxcahuan, itlatquiuhuan

GÁLATAS ITLAJCUIOL ON APÓSTOL SAN PABLO PARA ON GÁLATAS

Pablo quintlajcuilhuiya on tlaneltocaquej yejhuan nemij imanyan Galacia

¹ Nejhua, Pablo, niapóstol. Niapóstol xpampa san yacajmej tlacamej onechcalactijkej, nion xpampa Dios oquinchihualtij on tlacamej para ma nechcalactican. Yej niapóstol pampa onechcalactij Jesucristo ihuan iTajtzin Dios yejhuan oquiyoliutij niman oquetzteu ne ipan itlalcon. ² Nejhua, niman nochimej in tocnihuhan nican nohuan nemij, temechtlajpalohuaj nemejhuamej yejhuan nentlaneltocaj ne Galacia. ³ Ma Dios niman toTeco Jesucristo mechtochihuacan, niman ma mechmacacan yolsehuilistli. ⁴ On Jesucristo onotemacac san ipampa totlajtlacolhuan, para on diablo xoc huelis techchihualtis ma titlajtlacocan. Jesucristo ijcon oquichiu quen oquinec on toTajtzin Dios. ⁵ ¡Yejhua ica ma ticueyilican Dios para nochipa! Ma ijqui nochihua.

Xoncaj ocse tlajtojli yejhuan hueli techmaquixtia

⁶ Dios omechnotz para nenquiselisquej temaquixtilistli itechcopia ite-icnelilis* Cristo. Yejhua ica nitlamojcaita pampa niquila nimantzin ye nenquitlalcahuijtoquej Dios niman yopeu nenquitocaj on ocse temachtijli yejhuan sequimej quijtohuaj ica on más cuajli temachtijli para quitemaca temaquixtilistli. ⁷ Pero yejhua in melahuac ica xoncaj ocse más cuajli temachtijli yejhuan quitemaca temaquixtilistli de yejhua on yejhuan ica onemechmachtij. Yej tlinon quemaj sequimej mechmachtiaj para xojomet-lamatican, niman quipatlaj on cuajli tlajtojli yejhuan quitemaca temaquixtilistli yejhuan ticpiaj itechcopia Cristo. ⁸ Nejhua onemechmachtij quen ijqui Jesucristo hueli techmaquixtia. Yejhua ica tla hasta semej de tejhuamej, noso se ilhuicaktequitquetl† yejhuan hualehuas ne ilhuicac, cuajteijlijtias itlaj temachtijli ocse tlamantic, ma Dios quimaca ihueyi castigo. ⁹ Ijcon quen achtoj yotiquijtojcaj, aman ocsejpa niquipuilo: tla yacaj quiteijlia se temachtijli yejhuan quitenehua quitemaca temaquixtilistli, pero xijqui quen onenquiselijcaj achtopa, ma Dios quimaca ihueyi castigo on tlacatl. ¹⁰ Sequimej mechijliaj ica nejhua nitemachtia san para niquimpactia on tlacamej. Ijcuac nejhua nitlajtohu ica ihueyi castigo Dios, ¿nemejhuamej nenquinemiliaj ica nicnequi niquimpactis on tlacamej? ¡Ca! Nejhua ijcon niquipuilo pampa nicnequi ma nicpacti Dios. Tla nicnequisquia niquimpactisquia on tlacamej, tla ijcon xoc niitequitcau yesquia Cristo.

Quen ijqui Pablo onochiu apóstol

¹¹ Pero xmatican, nocnihuhan, ica xonicelij san itech yacaj tlacatl on cuajli tlajtojli yejhuan quitemaca temaquixtilistli yejhuan onemechijlij. ¹² In temachtijli xsan yacaj onicaquilij nion san yacaj onechmachtij, yej onicselij pampa Cristo onechmachiltij. Yejhua onechpantlantilij.

¹³ Nemejhuamej ye nenquimatzoquej quen ijqui ninohuicaya ipan ocse tonaltin ipan notlaneltoc hebreo. Nenquimatzoquej quen ijqui sanoyej‡ oniquintlahuelitac niman oniquintlajyohuitij on tlaneltocaquej yejhuan

* **1:6** su misericordia † **1:8** ángel: Angeles tequitij ne ilhuicac niman nican ipan in tlalticpactli.
‡ **1:13** mucho

quineltocaj Cristo, niman quen nicnequiya niquinxoxotonis. ¹⁴ Ipan notlaneltoc hebreo, miyequej yejhuan inhuan oninoscaltij niquintlaniya, pampa ican nochí noyojlo más sanoyej cuajli nochí niquejehuaya on tlen nohuejcatajhuan oquichijquej niman onechmachtijquej. ¹⁵ Pero Dios achtoj onechtapejpenij para nictequipanos ijcuac xe nitlacati. Quemaj ijcuac oyejcoc on cuajli tonajli, yejhua onechnotz ican iteicneliss. ¹⁶ Ijcuac Dios oquinec, onechpantlantilij iConetzin para niquinmijlis on xhebreos ica on cuajli tlajtojli yejhuan quitemaca temaquixtilistli. Ijcuac in onochiu, xacaj itech oniaj para nicmatis tlinon nitemachtis. ¹⁷ Nion oniaj ne Jerusalén para oniquintejtemoto on yejhuan más achtojmej apóstoles xquen nejhua para nechijlisquej tlinon nictemachtis. Yej nimantzin oniaj ne iregión Arabia campa noselti oninen. Niman quemaj más saquin* ompa oninocuep para oniaj ne ipan on hueyican itoca Damasco.

¹⁸ Niman ijcuac opanoc yeji xipan, oniaj ne Jerusalén para oniquixmatito Pedro. Niman caxtojli† tonaltin ihuan ompa oninocau. ¹⁹ Niman no oniquitac Jacobo on yejhuan icniu toTeco Jesucristo, pero xoniquintac on ocsequimej apóstoles. ²⁰ Nejhua nemechmelajcajilia ixpan Dios ica in yejhuan nemechijcuilohuilia melahuac ijqui onicchii. Xnemechcajgayahua. ²¹ Quemaj ijcuac onquis Jerusalén, oniaj neca ipan inregión Siria niman Cilicia. ²² On tlaneltocaquej impan itiopanhuan Cristo ne Judea xnechixmatiyaj. ²³ San caquiyaj on tlen sequimej quijtohuayaj: “On yejhuan achtoj techtlahuelitaya niman techtlajyohuiliya, aman yejhua temachtijtinemi ica on tlaneltocalistli yejhuan achtoj quinequiya quipopolos.” ²⁴ Niman cueyiliayaj Dios nopampa.

2

On apóstoles oquiselijquej Pablo

¹ Quemaj, hasta ipan majtlactli huan nahui xipan, ocsejpa oniaj ne Jerusalén. Ipan in tonaltin oniaj ihuan Bernabé, niman no onicuicac Tito. ² Oniaj pampa Dios onechpantlantilijca ica nonequi nias. Ijcuac ompa onajsic, oniquintecuitlan san yejhuamej on yejhuan más tlaleyecanquej, niman oniquintlajtlajtohuilij on cuajli tlajtojli yejhuan quitemaca temaquixtilistli yejhuan nictejilia intzajlan on yejhuan xhebreos. Ijcon oniquinsentlalij niman oniquinnotz, pampa nicnequiya ma ca quijtosquej xcuajli niman sanenca on tlinon nicchihua. Ijcon, tej, sanenca yesquia pampa yejhuamej huelisquiaj xquitecahuilisquiaj para ocsequimej ma quiselican on cuajli tlajtojli yejhuan quitemaca temaquixtilistli yejhuan nictejilia. ³ On tlaleyecanquej ocuelcaquej on tlen onicteijlij ne intzajlan on yejhuan xhebreos. Yejhua ica xoquichihualtijquej tocniu Tito yejhuan ompa nohuan nemiya, para quiselis on nescayotl ipan inacayo itoca circuncisión. Xoquichihualtijquej masqui yejhua xhebreo. ⁴ Pero sequimej yejhuan xmelahuac tocnihuan ocalaquej ne totzajlan. Ocalaquej quen teistlacoquej para quinequiya quimatisquej tla melahuac xtictlacamatij on tlanahuatijli, pampa tinemij san secan ihuan Cristo. Niman no quinequiya techchihualtisquej para ma tictlacamatican on tlanahuatijli. ⁵ Pero xqueman otitocahuilijquej otechtlamachilispatlaquej, pampa oticnequej tiquejehuasquej on cuajli tlajtojli yejhuan quitemaca temaquixtilistli para ma ajstia nemotech quen nonequi nenquipiasquej.

§ 1:15 su misericordia * 1:17 después † 1:18 quince

⁶ On yejhuan notenehuaj huejhueyi tlayecanquej, xonechijlijquej ma nicpatla on cuajli tlajtojli yejhuan quitemaca temaquixtilistli yejhuan nicteijlia. (Pero xnotequivu* tla yejhuatej huejhueyi tlayecanquej noso ca, pampa Dios xqueman techchicoita tla sequimej huejhueyixtoquej noso ca.) ⁷ Yej nochí ocse tlamantic. Yejhuatej on tlayecanquej oquimatquej ica Dios onechmacac in tequitl para nicteijlis on cuajli tlajtojli yejhuan quitemaca temaquixtilistli intzajlan on yejhuan xquipiaj on nescayotl de circuncisión ipan innacayo, sa no ijqui quen oquimacac Pedro on tequitl para quiteijlis intzajlan on yejhuan quipiaj on nescayotl ipan innacayo. ⁸ Ijquin oquimatquej pampa Dios yejhuan oquitequitiltij Pedro quen apóstol intech on hebreos, no onechtequitiltij quen apóstol intech on xhebreos. ⁹ Yejhua ica Jacobo, Pedro niman Juan, on yejhuan más huejhueyixtoquej intech on tlaneltocaquej, oquimatquej ica melahuac Dios yejhua onechmacac in cuajli tequitl. Niman quemaj otechmaquitzquijquej nejhua niman Bernabé. Ijcon otechselijquej quen intehuicalhuan ipan itequiu Dios, niman ocuelataquej para tejhuamej ma ticteijlitij on itlajtol Dios ne intech on yejhuan xhebreos niman yejhuatej intech on hebreos. ¹⁰ San otechtlajtlanilijquej ma tiquimelnamiquican on hebreos cristianos yejhuan mayanquej niman ma tiquimpalehuican ican tomin. Niman nejhua ican pactli niman ican noyojlo onicnec nicchihuas.

Pablo quichicajcanotza Pedro ne Antioquia

¹¹ Más saquin† Pedro oyaj ne ipan on hueyican itoca Antioquia. Niman ijcuac nejhua ompa oniquitac, onictlacanonotz, pampa yejhua quichiticatca on tlen xcuajli. Yejhua onoxeloj intech on yejhuan xhebreos. ¹² Ijquin onochiu. Ijcuac yejhua ompa onen, tlacuaya inhuan on tocni-huan yejhuan xhebreos. Niman ipan on tonaltin ohualajquej sequimej hebreos de Jerusalén yejhuan oquinhuajtitlan Jacobo. Yejhuatej in hebreos quinequiyaj para nochimej on tocni-huan ma quiselican on nescayotl itoca circuncisión ipan innacayo. Niman ijcuac Pedro ijcon oquitac, opeu notzinquixtia, niman ijqui oquintlalcahuij on yejhuan xhebreos, pampa quinmacajsya on hebreos ica itlaj quijlisquej. Pedro oquipix ome ixayac, pampa yejhua quimatzticatca ica nonequi para inhuan nonelos on yejhuan xhebreos, pero yejhua xoc ijqui oquichiu. ¹³ No ijqui on hebreos de ne Antioquia yejhuan tlaneltocaj oquipixquej ome inxayac, pampa no oquichijquej quen Pedro oquichiu. Hasta Bernabé no ompa tehuan ijqui oquichiu. ¹⁴ Ijcuac oniquitac ica sanoyej‡ xoc ijqui quichihuaj quen on cuajli tlajtojli yejhuan quitemaca temaquixtilistli techmachtia para ticchihuasquej, imixpan nochimej ijquin oniquijlij Pedro: “Tejhua aquin tihebreo, ticchihuaya niman timohuicaya quen on yejhuan xhebreo. ¿Tla ijcon tej, tlica§ aman ticnequi tiquincuepas on yejhuan xhebreos para ma nohuicacan quen hebreos?”

On hebreos no ijqui quen on xhebreos nomaquixtiaj ican tlaneltoctli

¹⁵ Tejhuatej tihebreos pampa ijqui otitlacatquej. Tejhuatej ticpiaj niman tictlacamatij on tlanahuatiijli. Yejhua ica tejhuamej tiquintocayotiaj on yejhuan xhebreos tlajtlacolejquej. ¹⁶ Pero ticmatztoquej ica Dios xquijtohua ica itlajtlacolhuan se tlacatl yoquintlaxtlau pampa quitlacamati on itlanahuatil Moisés, yej pampa quineltoca ica Jesucristo ipampa omic ne ipan cojnepanojli*. Yejhua ica, no tejhuamej ticneltocaj ica Jesucristo topampa

* 2:6 no me interesa; xnechimportarohua, xnechajmana † 2:11 después ‡ 2:14 muy § 2:14

¿por qué?; ¿tline? * 2:16 cruz

omic para ijcon Dios quijtohua ica totlajtlacolhuan yoquintlaxtlau. In nochihua itechcopa on totlaneltoc itech Cristo niman xpampa tictlacamatij itlanahuatil Moisés. Sa no ijqui quen onijciloj ipan on Yectlajcuilojli: Dios xquijtos ica itlajtlacolhuan yacaj tlacatl yoquintlaxtlau pampa quitlacamati itlanahuatil Moisés.

¹⁷ Ijcuac ticneltocaj Cristo para Dios quijtohua ica totlajtlacolhuan yoquintlaxtlau, ticpantlantiaj ica titlajtlacolejquej no ijqui quen on yejhuan xhebreos. ¿In quijtosnequi ica Cristo quichihua para tejhuamej ma titlajtlacolejquej? ¡Ca! In xejhua ica. ¹⁸ Pero yej ocse tlamantic. Tla yacaj ocsejpa quitlacamatis on tlanahuatijli yejhuan xoc quitlacamatiya, tla ijcon nochihua tlajtlacolej. ¹⁹ Ijcuac onicmat tlinon nechijlia on tlanahuatijli, onicmat ica semi nixpolijtacaj ixpan Dios. Aman, tej, xoc nicahuilia on tlanahuatijli ma nechmandaro para ijcon Dios hueli nechmandarohua. ²⁰ Ijcuac Cristo omic ipan cojnepanojli, nejhua no ihuan onimic. Xoc ninemi, yej Cristo nemí ipan noyojlo. On nemilistli yejhuan aman nicpia ipan notlalnacayo, nicpia ican notlaneltoc itech iConetzin Dios, aquin sanoyej onechtlajsojtlac† niman nopampa onotemamac para omic. ²¹ Nejhua, tej, xnicnequi ma ixpolihui iteicnelilis‡ Dios. Tla Dios huelisquia quijtosquia ica itlajtlacolhuan yacaj tlacatl yoquintlaxtlau san ica quitlacamati on tlanahuatijli, tla ijcon xitlaj§ ica techpalehuisquia imiquilis Cristo.

3

On tlanahuatijli noso on tlaneltoctli

¹ ¡Oh, nemejhuamej yejhuan nenchantij ne Galacia! ¿Hasta canon nemajsij ica xhueli nentlanemiliaj? ¿Aquinon omechoncajgayau para ma ca nenquitlacamatisquej in temachtijli yejhuan melahuac? Cuajli onencaj sicamatquej quen ijqui Cristo omic ipan cojnepanojli* nemopampa. ² Dios omechmacac iEspíritu. Aman xnechijlican, ¿onenquiselijquej on Espíritu Santo pampa onenquitlacamatquej on itlanahuatil Moisés, noso pampa onenquineltocaquej on temachtijli itech ica Cristo yejhuan onencacquej? ³ ¿Tlica† yej xnenquipiaj nemotlamachilis? Achtoj cuajli onempejquej nemohuicaj ica on Espíritu Santo. ¿Aman nemocuepasquej para nenquitlacamatisquej on tlanahuatijli ican nemonacayo? ⁴ ¿Miyec tlajtlamach‡ sanencaj onenquijyohujquej? Tla nemocuepasquej itech on tlanahuatijli, on melahuac sanencaj yes. Pero xnicnemilia ica nemocuepasquej itech on tlanahuatijli. ⁵ ¿Dios mechmaca iEspíritu Santo niman quichihua milagros nemotzajlan pampa nenquitlacamatij on tlanahuatijli? ¡Ca! Yejhua quichihua pampa melahuac nenquineltocaj on temachtijli ica Cristo, yejhuan onencacquej.

⁶ Abraham yejhua ejemplo ica Dios quintiochihua on yejhuan quineltocaj. On Yectlajcuilojli quijtohua: “Abraham cuajli oquineltocac on tlen Dios oquijlij, niman yejhua ica Dios oquiselij quen yolmelajqui.” ⁷ Yejhua ica, tej, cuajli xmatican ica on yejhuan melahuac tlaneltoctaj, yejhuamej quen teconeihuán itech Abraham. ⁸ On Yectlajcuilojli quipanextia ica Dios quijtos ica intlajtlacolhuan on xhebreos yoquintlaxtlau impampa intlaneltoc. Dios oquipanextilij Abraham in cuajli tlajtojli yejhuan quitemaca temaquixtilistli ijcuac on temaquixtilistli xe nochihuaya. Ijquin oquijlij: “On tlacamej ipan nochí países niquintiochihuas motechcopa.” ⁹ Yejhua ica, aman nochimej yejhuan tlaneltoctaj no quiseliaj on tlatiochihualistli quen oquiselij Abraham. ¹⁰ Pero nochimej on yejhuan quinequij quitlacamatisquej on

† 2:20 me amó ‡ 2:21 su misericordia § 2:21 nada; coxtla * 3:1 cruz † 3:3 ¿por qué?
¿tline? ‡ 3:4 cosas

itlanahuatil Moisés, Dios quintlajtlacolmacas, pampa ijqui quijtohua on Yectlajcuilojli: “Dios quitlajtlacolmacas on yejhuan xnochipa quichihuas nochí on quen tlanahuatia on tlanahuatijli.” ¹¹ Pantlantiticaj, tej, ica Dios xquijtos ica itlajtlacolhuan on yejhuan quitlacamati yejhua on tlanahuatijli yoquintlaxtlau, pampa on Yectlajcuilojli quijtohua: “San aquin on yejhuan itechcopa itlaneltoc yolmelajqui, nemis para nochipa.” ¹² On itlanahuatil Moisés niman on tlaneltoctli xsan se yejhua. On Yectlajcuilojli quijtohua: “On yejhuan quitlacamati itlanahuatil Moisés ica oncaj quichihuas nochí tlajtlamach yejhuan tlanahuatia on tlanahuatijli para ijcon huelis quipias nemilistli para nochipa.” ¹³ Cristo otechmanahuico ipan on tlajyohuilistli yejhuan on tlanahuatijli tlanahuatia para tiquijyohuisquej ijcuac oquiselij totlajyohuilis yejhuan Dios oquimacac. On Yectlajcuilojli ijquin quijtohua: “On yejhuan quipilohuaj ipan se cojtli§ quiselia tlajyohuilistli.” ¹⁴ Yejhua otechmaquixtij para on tlatichihualistli de temaquixtilistli, yejhuan Dios oquimacac Abraham, ma notemaca itechcopa Cristo Jesús intech on yejhuan xhebreos. Ijcon, tej, itechcopa totlaneltoc tinochimej ticseliah on Espíritu Santo yejhuan Dios oquitlalij ipan ipromesa.

On tlanahuatijli niman ipromesa Dios

¹⁵ Nocnihuan, nemechtalilia se ejemplo yejhuan niquixtia ipan innemilis on tlacamej. Ajsi on tonaltin ijcuac se tlacatl tlayecanqui ipan ichanchanejcahuan* quinmaca iconehuan se herencia. Ijcuac quintlaxelohuilia, cada se quimaca se itlalamau†. Niman ijcuac on iconehuan yoquinseliquej intlalamau cuajli firmado, yejhuamej xoc huelij quixoxotoniaj para ocse tlamantic quichijchihuaj, nion quipatlaj, masqui on san tlacatl oquichijchiu. ¹⁶ Aman, tej, Dios oquitlalij ipromesa itech Abraham niman itech iconeu sa no ijqui quen ijcuac on tlayecanqui quinmaca intlalamau on iconehuan. Pero xquitacan, on Yectlajcuilojli xquijtohua: “niman iconehuan”, quen quintenehuasquia miyequej tlacamej, yej quijtohua: “niman iconeu”. Niman yejhua in quijtosnequi san se tlacatl, niman yejhua on tlacatl yejhua Cristo. ¹⁷ Tlen nejhua niquijtohua sa no yejhua in. Dios oquitlalij se promesa ihuan Abraham. Ijcuac Dios oquitlalij se promesa ihuan Abraham, sa no ijqui oquitlalij quen on tlayecanquetl quifirmarohua on tlalamamej para iconehuan. Yejhua ica on itlanahuatil Moisés, yejhuan ohuajlaj ipan nahui cientos treinta xipan saquin‡, xhuelis quixoxotonis niman cahuas quen xocuitlaj quijtosnequi on ipromesa Dios. ¹⁸ Yejhua ica, tla Dios techmacasquia temaquixtilistli itechcopa on tlanahuatijli, tla ijcon xticselisquiaj itechcopa on promesa. Pero Dios oquimacac Abraham pampa ijqui oquitlalij ipan ipromesa. ¹⁹ Tla ijcon, tej, ¿tlica ticipiaj on tlanahuatijli? On tlanahuatijli onotlaquechilij para on tlacatl quittitia itlajtlacol. Niman on tlanahuatijli cuajli catca hasta ijcuac ohuajlaj ihuejcaconeu Abraham on yejhuan oquipix on promesa. On tlanahuatijli oquitemachiltijquej on ilhuicactequitquej§, niman Moisés onotequimacac ixpan Dios ica on tlanahuatijli para oquinmacac on tlacamej. ²⁰ Pero ijcuac Dios oquimacac Abraham on promesa, xopoliu aquinon notequimacas, pampa san yejhua oquimacac.

On tlen ica nonequi on tlanahuatijli

²¹ Tla ijcon, ¿yejhua in quijtosnequi ica itlanahuatil Moisés xnohuica ihuan ipromesas Dios? Ca, pampa tla on tlanahuatijli yejhuan onotemacac

§ **3:13** palo * **3:15** su familia † **3:15** testamento, escritura ‡ **3:17** después § **3:19** ángeles:
Angeles tequitij ne ilhuicac niman nican ipan in tlalticpactli.

huelisquia techmacasquia nemilistli, tla ijcon, ticselisquiaj yolmelajcalistli intechcopa on tlanahuatijli. ²² Pero on Yectlajcuilojli quijtohua ica nochí tlacatl tlajtlacolej. Ijcon quitohua para on yejhuan quineltocaj Jesucristo huelis quiselisquej on temaquixtilistli yejhuan Dios oquitlalij ipan ipromesa. ²³ Ijcuac xe huajlaja Jesucristo, on tlanahuatijli techmandarohuaya. Niman on tlanahuatijli tictlacamatzticatcaj hasta ijcuac ohuajlaj Jesucristo. ²⁴ Ijcon, tej, on tlanahuatijli nemiya quen pilanquetl yejhuan otechtlaajpix hasta ijcuac ohuajlaj Cristo. Niman ijcuac ohuajlaj Cristo niman oticneltocaquej Dios oquijtoj ica totlajtlacolhuan yoquintlaxtlau. ²⁵ Aman, pampa ticneltocaj Cristo, on tlanahuatijli xoc techtlapia.

²⁶ Aman nemejhuamej nenteconehuan itech Dios pampa nenquipiaj tlaneltocli itech Cristo Jesús. ²⁷ Nochimej nemejhuamej yejhuan onemocu-atequiquej para nenuiteititiaj ica nenuquineltoej Cristo, nennemij quen Cristo onen. ²⁸ Aman xijtla quijtosnequi tla nenenhebreos noso xnenhebreos, nentlanamactin noso xnenlanamactin, nentlacamej noso nensihuamej. Xit- laj quijtosnequi, pampa tla nennemij san secan ihuan Cristo Jesús, nochimej nemejhuamej san secan nennemij se ihuan ocse. ²⁹ Niman tla nenteyax-cahuan* itech Cristo, tla ijcon, nenteconehuan itech Abraham, niman ihuan Abraham nenuquiselisquej on herencia yejhuan Dios oquitlalij ipan ipromesa.

4

¹ In se ejemplo. Chica se teconeu yejhuan quiselis iherencia yejhua conetl, nemi quen se tlanamactli, masqui ica tlen melahuac ye iyaxca nochí on herencia. ² Yejhua quen se tlanamactli, pampa ica oncaj quintlacamatli on tlacamej yejhuan quiscaltiaj. Niman quejehuiliayaj iherencia chica yejhua noscaltia para quimacasquej hasta ipan on tonajli ijcuac itataj oquijtoj cuajli para quiselis. ³ Tejhuamej no ijqui. Ijcuac xe huajlaja toTeco Jesús, ticoconej catcaj. Pampa tihebreos ica oncatca tictlacamatlyaj on itlanahuatil Moisés, niman nemejhuamej yejhuan xnenhebreos no ica oncatca nenuquitlacamatlyaj on intlanahuatilhuan on yejhuan más tlajtlajmatquej ipan nemot-laneltoc. ⁴ Pero ijcuac oyejcoc on tonajli yejhuan Dios oquitlapejpenij, ocua-jtitlan iConetzin yejhuan otlacat itech se sihuatl. Niman pampa hebreo catca, on tlanahuatijli yejhua oquimandaroj. ⁵ Ijcon ohuajlaj para techmaquixtico itech on tlanahuatijli yejhuan otictlacamatquej quen tlanamactin ijcon Dios ohuel otechselij para iconehuan.

⁶ Niman para mechititia ica nemejhuamej nenteconehuan itech, Dios ocua-jtitlan ipan toyollo iEspíritu on iConetzin. Niman on Espíritu techchi-haultia para tiquijliaj Dios: “NoTajtzin!” ⁷ Ijcon, tej, cada se de nemejhuamej nenteconehuan itech Dios, niman xoc nentlanamactin. Niman pampa nemejhuamej neniconehuan, yejhua mechmaca nemoherencia pampa nenu-quineltoej Cristo.

Pablo nopajsolhua impampa on tlaneltocaquej

⁸ Ijcuac nemejhuamej xnenquixmatiyaj Dios, nentlanamactin catcaj in-tech dioses yejhuan xmelahuac dioses. ⁹ Aman nenuquixmatij Dios. Más cuajli niquijtos, mechixmati. Yejhua ica, ¿quen ijqui, tej, nenuquinequi nemocuepasquej niman nenuquitlacamatisquej on tlanahuatijli, niman oc-sejpa nennemisquej quen tlanamactin? ¹⁰ Nemejhuamej ocsejpa yopeu

* ^{3:29} le pertenecen; nenteaxcahuan, nentehuaxcahuan, nentetlatquihiuan

nenquichihuaj ilhuitl ijcuac yejco on hueyi tonaltin, ijcuac yencuiya on metztli, ijcuac yejco on hueyixticaj xipan niman no ijqui ipan ocsequi tonaltin. **11** Sanoyej ninomojtia nicmatis tla on tequitl yejhuan onicchii nemotzajlan sanencaj onicchii.

12 Nocnihuan, sanoyej* nemechtlatlania xmoxelocan itech on tlanahuatijli quen nejhua onicchii. Ipan se tonajli catca, oninoxeloj itech on tlanahuatijli para ninemis quen nemejhuamej yejhuan xnenhebreos yejhuan xonempajsolijquej ica on tlanahuatijli. Ijcuac ninemiya nemo-huan, nemejhuamej nochli cuajli onennehchihuilijquej. **13** Ye nenquimatz-toquej ica ijcuac quemach ye ica nemohuan oninen, oninen ipampa on cualolistli yejhuan niquijyohuiyaya. Yejhua ica chica ninemiya nemo-huan, onemechijlij on cuajli tlajtojli yejhuan quitemaca temaquixtilistli. **14** Masqui on cualolistli yejhuan onicpix onochiu quen se tepajsolohuilstli nemotech, nemejhuamej xonennehctlajyelmatquej nion onenquijtojquej tla xnennechselsiquej. Yej onennehcselijquej quen yacaj iilhuicactequit-cau† Dios. Onennehcselijquej quen sa no nejhua niJesucristo yesquia. **15** Aman, ¿tlinon nemopan nochihua? ¿Canon oncaj on paquelistli yejhuan onenquipixquej notech? Nejhua hueli nicteixpantilia ica nemejhuamej tla san huelisquia, hasta nemoquixtilisquiaj nemixtololojhuan para nennech-inmacasquiaj. **16** ¿Aman yoninocuep nemotlahuelicniu san ica nemechijlia on tlen melahuac?

17 On tlacamej yejhuan quinequij para nenquitlacamatisquej on tlanahuatijli, quichihuaj miyec tlajtlamach‡ yejhuan cuajli san para xquinhueltican. Pero ijcuac ijcon quichihuaj, quichihuaj ican xcuajli inyojlo. On tlen yejhuamej quinequij, mechxelosquej notech para yejhuamej nenquintlaj-sojtlasquej§. **18** Aman, tej, tla on tlacamej quichihuasquej on tlen cuajli ican cuajli inyojlo, cuajli para ijqui ma quichihuacan nemotech. Niman nochipa ijqui ma quichihuacan hasta ijcuac nejhua xnemohuan ninemis. **19** Notlajsojcacone huan, aman ocsejpa niquijyohuijtacaj on tlen tecocoj nemopampa, quen se nantli yejhuan nococohua ijcuac quinemitia iconetzin. Niman nitlajyohuijtias hasta ijcuac nemonemilis nocahuas quen inemilis Cristo. **20** Nicnequisquia ninemis nemohuan nimantzin aman para más cuajli nihuelis nemechnojnotzas. Xnicmati, tej, tlinon nicnemilis nemotechica.

On ejemplo Agar niman Sara

21 Nemejhuamej yejhuan nenquinequij para on itlanahuatil Moisés mech-nahuatis, ¿nencajsicamatij tlinon quijtohua on tlanahutijli? **22** Tej, on Yect-lajcuilojli quijtohua ica Abraham oquipix ome iconeu. Se iconeu oquipix ihuan se tlanamactli itoca Agar, niman ocse oquipix ihuan on yejhuan cuajli isihuau yejhuan tlamacahuajli. On isihuau itoca Sara. **23** On yejhuan iconeu on sihuatlanamactli otlacat sa no ijqui quen tlacatij nochimej coconej, pero iconeu on yejhuan tlamacahuajli otlacat itechcopa se milagro pampa Dios ijqui oquitlalij ipan ipromesa. **24** In omemej sihuamej quiteititiaj on ejemplos de yejhua on ome pactos yejhuan Dios oquipix inhuan on tlacamej. Agar quiteititia on pacto yejhuan de tlanahuatijli, yejhuan Dios oquinmacac on hebreos ne ipan on tepetl itoca Sinaí. On yejhuan quitlacamatij in pacto, yejhuamej tlanamactin itech on tlanahuatijli sa no ijqui quen Agar, niman iconehuan nemiyaj tlanamactin, niman ijcon oquitlacamatquej Abraham. **25** Ijcon, tej, Agar ejemplo on tepetl itoca Sinaí yejhuan oncaj ne ipan on ilado Arabia. Agar no ejemplo on hueyican itoca Jerusalén yejhuan oncaj ipan

* **4:12** mucho † **4:14** su ángel: Angeles tequitij ne ilhucac niman nican ipan in tlalticpactli. ‡ **4:17** cosas § **4:17** les amen

in tlalticpactli campa nemij on hebreos. Jerusalén niman nochimej on hebreos nemij tlanamactin itech on tlanahuatijli quen Agar, niman iconehuan nemiyaj tlanamactin itech Abraham. ²⁶ Pero Sara tlamacahuajli. Yejhua ejemplo de Jerusalén yejhuan oncaj ne ilhuicac. On Jerusalén tlamacahuajli, niman yejhua tochan. ²⁷ Niman on Yectlajcuilojli quijtohua:

Xmopacti, Sara, tejhua yejhuan titetzacatl, yejhuan xoticpix mocone huan.

Xtzajtzi ican pactli tejhua yejhuan xqueman oticpix on tlen tecocoj yejhuan quipia se sihuatl ijcuac quinemita iconetzin. Pampa tejhua, Sara, yejhuan omitzcajquej, ticpias más mocone huan xquen Agar yejhuan aman ihuan nemí mohuehuentzin.

²⁸ Aman, nocni huan, ijcon quen Isaac teconeu itech Sara, pampa Dios yejhua ipromesa, tehuamej no titecone huan itech Dios. ²⁹ Ismael yejhuan otlacat sa no ijqui quen tlacatij nochimej on coconej, oquitlahuelitac niman quitlajyohuiliya Isaac yejhuan otlacat itech copa on Espíritu. Ijcon quen ipan on tonaltin onochiu, aman sa no ijqui nochihua. ³⁰ Pero ¿tlinon quijtohua on Yectlajcuilojli? Quijtohua: “Xconquixti on sihuatlanamactli ihuan iconeu, pampa iconeu on sihuatlanamactli xhuelis quiselis on herencia yejhuan quiselis iconeu on yejhuan tlamacahuajli.” ³¹ Ijcon, tej, nocni huan, tehuamej quen xtitecone huan itech on yejhuan sihuatlanamactli, yej quen titecone huan itech on yejhuan tlamacahuajli.

5

Xmelajcanemican pampa nentlamacahualti

¹ Cristo otechmanahuij itech on tlanahuatijli para tinemij tlamacahualtin. Yejhua ica xmelajcanemican ipan on tlamacahualistli, niman ma ca ocsejpa xmotemacacan ipan on tlanahuatijli quen tlanamactin.

² Xnechcaquican. Nejhua, Pablo, nemechijlia nemejhuamej yejhuan Cristo omechmanahuij itech on tlanahuatijli, ica Cristo xhuelis mechpalehuis tla nenquitlaliaj nemoyojo itech on circuncisión ica yejhua mechpalehuis para nenquitlanisquej temaquixtilistli. ³ Nicnequi niquitos ocsejpa para cuajli xmatican ica san aquinon yejhuan quiselis on circuncisión pampa quinemilia quipalehuis para quitlanis temaquixtilistli, ica oncaj no quitlacamatil nochí on itlanahuatil Moisés. ⁴ Nemejhuamej yejhuan nenquinequij para Dios quijtos ica nemotlajtlacolhuan yoquintlaxtlau pampa nenquitlacamatil on tlanahuatijli, nenquitlalcahuiyaj Cristo niman nenquitlalcahuiyaj iteic-nelilis* Dios.

⁵ Pero tehuamej xtitlamachixtoquej ipan on tlanahuatijli. Tehuamej itech copa on Espíritu niman pampa ticneltocaj Cristo titlamachixtoquej ica Dios techijlis ica totlajtlacolhuan yoquintlaxtlau. ⁶ Tla san secan tinemij ihuan Cristo Jesús, xitlaj† quijtosnequi tla ticpiaj circuncisión noso ca. Yej quemaj hueyi quijtosnequi ma ticpiacan tlaneltoctli, niman in tlaneltoctli ma quichihua para ma titetlajsojtlacan‡. ⁷ Nemejhuamej cuajli nemohuicaya. ¿Aquinon, tej, omechcaj cayau para ma ca sa xtlacamatican on tlen melahuac? ⁸ Dios xejhua oquichiu, pampa yejhua mechnotzticaj itech Cristo. ⁹ On yejhuan omechcaj cayau sa no ijqui quen tlaxocolilistli§. Ijquin nijtohua: “San achijtzin tlaxocolilistli cajcocui nochí tixtli de harina.” No sa no ijqui san se tlacatl yejhuan quitemaca on xcujli temachtilistli, nochí tlacatl najcomana ica on xcujli temachtilistli. ¹⁰ Nejhua nictlali noyojo itech

* 5:4 su misericordia † 5:6 nada; coxtla ‡ 5:6 amemos § 5:9 levadura

toTeco ica yejhua mechpalehuis para ma ca nencajcahuasquej on ica nenenquinetocaj Cristo. Pero quiselis icastigo on tlacatl masqui san aquinon yejhuan mechtlaneltocpolosnequi.

¹¹ Nocnihuan, ¿sequimej mechijliaj ica nejhua nicteijlijtinemi ica on tla-camej ica oncaj quipiasquej circuncisión para quiselisquej on temaquixtilistli? Tla oc* ijcon nicteijlisquia, on hebreos xnechtajyohuilitisquiaj, niman on temachtilistli itech ica icojnepanol† Cristo xquitlahuelmatisquiaj. Pero yejhuatej oc nechtajyohuilitaj. ¹² Pero para yejhuatej on yejhuan mechpasolojtinemij itechica on circuncisión, jnicnequisquia nimantzin noxelosquiaj totech yejhuan ticneltocaj ica Cristo techmaquixtia!

¹³ Nocnihuan, nemejhuamej Dios omechnotz para nennemisquej tlamacahualtin itech on tlanahuatiji. In xquijtosnequi ica cuajli para nenuquichihuasquej on tlen xcuajli yejhuan nemotlalnacayo quinequij, yej nochi ocse tlamantic xchihuacan. Xmopalehuican sequimej ihuan ocsequimej ican tetlajsojtlalistli. ¹⁴ Nochi on tlanahuatiltin yejhuan oncaj ipan on tlanahuatiji cuajli nenuquichihuasquej ijcuac nenquitlacamatiquej yejhua in se tlanahuatiji: "Xquintlajsojtlal ocsequimej sa no ijqui quen tejhua timotlajsojtlal."

¹⁵ Pero tla sa no nemejhuamej nemotlahuelitaj niman nemohuijsoquij inhuán ocsequimej, xmotacan sa no nemejhuamej pampa sa no nemejhuamej nemoxoxotonisquej.

On tlen quinequi on Espíritu ocse tlamantic xquen on tlen quinequi totlalnacayo

¹⁶ Nejhua yejhua in nemechijlia: Xcahuilican on Espíritu Santo ma mechycana. Niman tla nenquitlacamatiquej on Espíritu, xnenquichihuasquej on tlen xcuajli yejhuan nemotlalnacayo quinequi. ¹⁷ On tlen xcuajli yejhuan nemotlalnacayo quelehuiya quicualania on iEspíritu Dios, niman on tlen cuajli quinequi on Espíritu no quicualania on tlen xcuajli yejhuan nemotlalnacayo quelehuiyaj. Sa no yejhuatej tlahuelpemij. Yejhua ica xnenquichihuaj san tlen nenuquinequi. ¹⁸ Pero tla mechycana on Espíritu, tla ijcon, xnenquitlacamatij on tlanahuatiji. ¹⁹ On yejhuan quichihuaj on tlen xcuajli quelehuiya intlalnacayo, ixmachyojquej‡ yejhua ica on tlajtlamach§ tlen xcuajli quichihuaj. Yejhuatej ahuilnemij, niman quichihuaj on tlen xcuajli niman xchipahuac. ²⁰ Quinmahuitiliaj on tlamachijchihualtin intajtzitzihuan, niman quichihuaj nahualyotl. Tlahuelnemij, nocuajcualaniaj niman chahuatij. San itlaj icatzin nimantzin cualanij niman quichihuaj itlaj san para yejhuatej. Texexelohuaj niman tesentlaliaj ojoncuaj. ²¹ Nericolejquej, temictianimej, tlahuantinemij niman xsan cuajloticaj paxalohuaj, niman quichihuaj ocsequi tlajtlamach más yejhuan sa no ijqui. Nemechijlia ocsejpa ijcon quen yonemechijlijca, ica on yejhuan quichihuaj yejhua in tlajtlamach xhuelisquej calaquisquej ne campa Dios tlamandarohua.

²² Pero on yejhuan nohuicaj quen quinyecana on Espíritu, quipantlantiaj miyec tlajtlamach yejhuan cuajli itechcopa on Espíritu. Yejhuatej tetlajsojt-laj*, paquij, noyolsehuiaj, noijyohuiyaj, tenotzquej, ican cuajli inyojlo tepalehuiyaj, nochipa quichihuaj on tlen quijtohuaj, ²³ yolyemanquej, niman cuajli nonahuatiaj. Xitlaj oncaj tlanahuatiji yejhuan huelis quixnamiquis in quen in tlajtlamach yejhuan cuajli nochihua. ²⁴ Niman on yejhuan teyaxcahuan† itech Cristo Jesús, xoc quincahuilia on intlalnacayo ma quichihuacan on tlen xcuajli quen yejhuatej quelehuij niman quinequi quichihuaj.

* ^{5:11} todavía; sanquen † ^{5:11} su cruz ‡ ^{5:19} es fácil conocerlos § ^{5:19} cosas * ^{5:22} aman † ^{5:24} le pertenecen; teaxcahuán, tehuaxcahuán, tetlatquihuan

²⁵ Ticpiaj yencuic nemilistli itechcopa on Espíritu Santo. Yehua ica ma ticalhuilican on Espíritu Santo ma techyecana. ²⁶ Ma ca titohueyimatisquej. Ma ca tiquimpajsolosquej ocsequimej, nion ma ca tiquinnexicolitasquej ocsequimej.

6

Xmopalehuican cada sesentemej

¹ Nocnihuan, tla se de on tocnihuan quichihua itlaj tlajtlacojli, nemejhuatej yejhuan cuajli nenquitlacamatij on Espíritu Santo xpalehuican para ma nocuepa. Pero xchihuacan ican yolyemanilistli, niman nemochimej* xquitacan cuajli para on diablo ma ca no mechtlatlatas para xtlajtlacocan nemejhuatej. ² Xmopalehuican sa no nemejhuatej ijcuac se quipia san catlejhua pasolohuilistli. Tla ijcon nenquichihuasquej, nenquichihuasquej on tlen Cristo technahuatia. ³ Tla yacaj quinemilia hueyixticaj, niman xmelahuac hueyixticaj, tla ijcon, sa no yejhua nocajcayahua. ⁴ Cada se sa no yejhua ma nota tla cuajli nohuica. Aquin notas ica cuajli nohuica, yejhua notlacaitas. Yejhua, tej, ma paqui xpampa más cuajli nohuica ipan inemilis xquen ocse tlacatl, yej pampa cuajli nohuica quen Dios quinequi. ⁵ Ijcon, tej, cada se tlalticpactlacatl quinomamaltis on yejhuan quichihua nican ipan in tlalticpactli. ⁶ Nonequi ticpalehuisquej ican nochitlajtlamach† tlen ticpiaj on yejhuan techmachtia itlajtoltzin Dios. ⁷ Ma ca sa no nemejhuatej nemocajcayahuasquej. Ma ca xnemilican ica nenhuelisquej nentlajtlacosquej niman Dios xmechtlahtlahuilis, pampa Dios ica oncaj mechcastigaros. Tlen quitoca on tlacatl sa no yejhua quipixca. ⁸ Tla tictocasquej ica on tlen xcuajli quelehuuya totlalnacayo, ican totlalnacayo ticpixcasquej on xoxotonilistli niman miquilistli. Pero tla tictocasquej ica on tlen quinequi on Espíritu Santo, ica on Espíritu Santo ticpixcasquej nemilistli para nochipa. ⁹ Niman ma ca tisiahuican para ticchihuasquej on tlen cuajli, pampa ijcuac ajsis on tonajli para tipixcasquej, ticpixcasquej on cuajli xinachtli tla xtisiaucahuasquej. ¹⁰ Yejhua ica, tej, nochipa ijcuac tihuelisquej, nochimej ma tiquinchihuilican on tlen cuajli, niman más on yejhuan quineltoej Jesucristo.

Pablo oquinmacac tlachicahualistli niman sa ica nochitlajpalohuilistli

¹¹ Xquitacan ica tlen letras huejhueyi yejhuan nican nemechtlahtlahuilijitcaj ican nejhua noma.

¹² On temachtijquej yejhuan quitenehuaj ica cuajli para nenquitlacamatisquej on tlanahuatijli, quinequij para xselican on circuncisión para yejhuatej quimpactisquej on hebreos. Ijcon quichihuaj para on hebreos xquintlajyohuilitisquej ipampa icojnepanol‡ Cristo. ¹³ On temachtijquej yejhuan oquiselijquej on nescayotl de circuncisión sa no yejhuatej xquichihuaj tlen on tlanahuatijli quijtohua. Pero yejhuatej quinequij para neniselisquej on nescayotl de circuncisión para yejhuatej huelisquej nohueyilisquej pampa mechchihualtisquej xpiacan on nescayotl de circuncisión ipan nemonacayo. ¹⁴ Pero nejhua xitlaj§ ocse ica nicnequi ninohueyilis, yej san ican imiquilis toTeco Jesucristo ipan icojnepanol. Pampa itechcopa imiquilis Cristo ipan icojnepanol, yejhua in tlalticpactli para nejhua micticaj, niman nejhua nimicticaj para in tlalticpactli. ¹⁵ Tla tinemij ihuan Cristo Jesús, xitlaj quijtosnequi tla otic selijquej circuncisión noso ca. Yej tlinon hueyi quijtosnequi ma tinemican quen tiyencuiquej tlacamej ipan

* **6:1** todos ustedes; nannochti, yemochimej, anochimej, innochimej, emmochimej † **6:6** cosas

‡ **6:12** su cruz § **6:14** nada; coxtla

tonemilis. ¹⁶ Nemejhuamej yejhuan melahuac neniconehuan Dios, yejhuan nenquinemiliaj quen onemechmachtij itechica Cristo, nictlajtlanilia Dios ma mechmaca iyolsehuilis niman iteicnelilis*.

¹⁷ Desde aman para nochipa ma ca yacaj nechpajsolos, pampa noch quech tiliquichtic† nicpia ipan notlalnacayo quiteititiaj ica nejhua niitequitcau toTeco Jesús.

¹⁸ Nocnihuan, ma iteicnelilis toTeco Jesucristo onyaj ne itech nemoespíritu. Ma ijqui nochihua.

* **6:16** su misericordia † **6:17** cicatrices

EFESIOS ITLAJCUIOL ON APÓSTOL SAN PABLO PARA ON EFESIOS

Pablo oquintlajcuilhuij on tlaneltocaquej ne ipan on hueyican itoca Efeso

¹ Nejhua, Pablo, ican iyojlo Dios, niiapóstol Jesucristo. Niquijcuilohua yejhua in tlajcuillolamatl para nemejhuamej yejhuan nenteyaxcahuan* itech Dios, yejhuan nenchantij ne ipan on hueyican itoca Efeso, niman yejhuan nochipa nenquichihuaj on tlen Cristo Jesús quinequi. ² Ma Dios toTajtzin niman toTeco Jesucristo mechtiochihuacan, niman mechmacacan yolse-huilistli.

Ma ticyectenehuacan Dios ipampa nochí on tlen otechchihuili

³ Ma ticyectenehuacan Dios, iTajtzin toTeco Jesucristo, yejhuan otechti-ochiu ican nochí ocse tlamantic tlatiochihualistli para toalma ijcon quen yejhuan ne ilhuicac quipiaj. Yehua otechtiochiu pampa san secan itech tinemij ihuan Cristo. ⁴ Ijcuac in tlalticpactli xe oncatca, Dios otechtlape-jpenij para tinemisquej san secan ihuan Cristo. Otechtlapejpenij para ticipiasquej toyolol chipahuac, niman para xticpiasquej tlajtlacojli ne ixpan Dios. ⁵ Ican tetlajsojtlistli†, ijcuac xe tzimpehua in tlalticpactli, Dios oquitlalij iyojlo para techselis quen iconehuan itechcopa Jesucristo ijcon quen oquinec. ⁶ Ijcon oquichiu para nochí tlacatl ma quiyectenehua ipampa on ihueyi teicnelilis‡ yejhuan xsan oquitemachiu ica otechmacac itechcopa itlajsojcaConetzin. ⁷ ItlajsojcaConetzin oquitlaxtlau ican iyesyo totlajtlacol-huan, niman aman Dios yotechtlapojpolhuilij ican ihueyi teicnelilis. ⁸ Dios otechititij miyc iteicnelilis, niman otechmacac nochí tlamatquilitli§ niman cajsicamatelistli. ⁹ Yehua otechpanextilij quen oquinec on tlen xacaj quimatiya. Otechpanextilij on tlen quichihuas itechcopa Cristo. ¹⁰ Yehua in tlen otechpanextilij nochihuas ijcuac tlamic in tonaltin. Ipan on tonaltin, Dios quisentlalis nochí tlajtlamach* yejhuan oquitlalij ne ilhuicac niman nican ipan in tlalticpactli para Cristo quimandaros. ¹¹ Pampa tinemij san secan ihuan Cristo, Dios otechmacac toherencia. Ijcuac in tlalticpactli xe oncatca, Dios otechtlapejpenij para techmacas yejhua on herencia quen yejhua oquinec. Nochi tlajtlamach tlen yejhua quichihuas, quichihuas quen yejhua quinequi, pampa yejhua quichihuas nochí quen yejhua quita cuajli. ¹² Yehua ijcon oquichiu para tejhuamej, yejhuan tihebreos niman yejhuan achtopa oticneltocaquej Cristo, ma tinemican quen yejhua cuelita para huelis quiyectenehuilisquej ihueyilis. ¹³ Niman no ijqui nemejhuamej yejhuan xnenhebreos onenquineltocaquej Jesucristo, ijcuac onencacquej on temachtilistli yejhuan tlen melahuac, on cuajli tlajtojli yejhuan quitemaca temaquixtilistli. Niman ijcuac onenquineltocaquej, Dios omechsellaroj ica on Espíritu Santo yejhuan omechprometerohuilijsca. Niman ijcon nenteyax-cahuan yejhua itech. ¹⁴ Aman ica tohuan nemi on Espíritu Santo, yejhua techmelajcaititia ica melahuac Dios techmacas on herencia yejhuan otech-prometerohuilijs. Niman techmelajcaititjitas hasta ipan on tonajli ijcuac Dios techmacas toherencia. Yejhua ijcon quichihuas para tejhuamej ma ticyectenehuacan ihueyilis.

* **1:1** le pertenecen; nenteaxcahuan, nentehuaxcahuan, nentetlatquihuan † **1:5** amor ‡ **1:6** misericordia § **1:8** sabiduría * **1:10** cosas

Pablo quitlajtlanilia Dios ma quinmamacatlamatquilitli on iconehuan

¹⁵ Nejhua nicmati ica nemotlaneltoc nenquipiaj itech toTeco Jesús, niman nenquipiaj nemotetlajsojtalis† itech on yejhuan iyaxcahuan Dios. ¹⁶ Yejhua ica xnicajcahua ica nicmaca tlaxtlahuijli Dios nemopampa. Nemechel-namiqui ipan nooración, ¹⁷ niman nictlajtlanilia iDios toTeco Jesucristo, on tohueyiTajtzin, para ma mechmaca itechcopa on iEspíritu Santo tlamatquilitli niman cajsicamatilistli para más cuajli sa no yejhua nenquix-matisquej. ¹⁸ No nictlajtlanilia Dios ma mechpannextili ipan nemocajsicamatilis tlinon on tlamachalistli yejhuan ica omechnotz para nенquiselisquej, niman quen sanoyej‡ hueyi herencia yejhuan Dios quinmaca iteyaxcahuan. ¹⁹ No nictlajtlanilia ma mechpannextili quen sanoyej hueyi ipoder yejhuan topan tequiti yejhuan titlaneltocaj. Xacaj hueli quita quech ica hueyi on poder. Yejhua in poder sa no yejhua on yejhuan Dios oquiteititij ican sanoyej miyec icojtilis ²⁰ ijcuac oquiyolitij niman oquetzteu Cristo ipan itlalcon, niman oquitlalij iyecmacopa ne ilhuicac. ²¹ Aman Cristo quinnahuatia nochimej on yejhuan tlayecanquej, nochimej on yejhuan tequihuajquej, nochimej on yejhuan quipiaj poder, nochimej on yejhuan huejhueyixtoquej niman nochimej on yejhuan san tlinon ica huelisquej notenehuasquej ipan in tonaltin niman no ipan on tonaltin huajlas. ²² Dios nochí yoquimac-tilij Cristo para quinahuatis. Niman no oquitlalij Cristo quen intzon-tecon nochimej on tlaneltocaquej yejhuan sa no yejhamej nochihuaj quen itiopan. ²³ Niman itiopan sa no yejhua icuerpo Cristo. Yejhua quitemiltia on icuerpo ican iEspíritu sa no ijqui quen on iEspíritu nemi nochihuiyan.

2

Timaquisaj ican itetlajsojtalis Dios

¹ Achtój nemoalmas mictoyaj ixpan Dios ipampa on tlen xcuajli onen-quichijquej niman ipampa on nemotlajtlacolhuan. ² Nemohuicayaj quen on ocsequimej tlacamej yejhuan nemij ipan in tlalticpactli. Nenquitlacamatiyaj on xcuajli espíritu itoca diablo yejhuan quinnahuatia ican ipoder on xcuajcualtin espíritus ne tlacpac ipan ajacatl. Yejhua no aman tequiti ipan inyojlo on yejhuan xquitlacamatij Dios. ³ Ipan ocse tonaltin, tinochimej ijcon tinemiyaj. Tictlacamatiyaj on xcuajli toelehuijis*. Ticchihuayaj nochí tlajt-lamach† tlen xcuajli yejhuan quinequiya totlalnacayo niman totlamachilis. Yejhua ica, tej, pampa ijcon ticchihuayaj, tiabaj itech ihueyitlahuel Dios sa no ijqui quen ocsequimej yahuij. ⁴ Pero Dios ican ihueyi teicnelilis‡ niman miyec tetlajsojtalista ⁵ oquinyolitij toalmas san secan ihuan Cristo, masqui toalmas mictoyaj ixpan ipampa totlajtlacol. Dios omechmaquixtij ican iteicnelilis. ⁶ No ijqui Dios otechquetzteu ihuan Cristo Jesús, niman otechsehuij ne ilhuicac campa sa no Cristo yehuaticaj. ⁷ Oquichiu yejhua in para quiteititia para nochipa quen sanoyej§ hueyi iteicnelilis yejhuan xhueli tiquitaj quech ica hueyi niman on tetlajsojtalista yejhuan techmaca itechcopa Cristo. ⁸ Ijcon, tej, Dios ican ihueyi teicnelilis omechmaquixtij itechcopa nemotlaneltoc itech Cristo. In temaquixtilistli onenquiselijquej xpampa itlaj yejhuan cuajli onenquichijquej, yej pampa Dios omechtlayocolij. ⁹ In temaquixtilistli xticseliaj itechcopa on cuajli tequitl yejhuan ticchihuaj, para ijcon xacaj huelis ica nohueyimatis. ¹⁰ Dios otechchijchiu. Niman yejhua

† **1:15** su amor ‡ **1:18** muy * **2:3** nuestros deseos † **2:3** cosas ‡ **2:4** misericordia
§ **2:7** muy

otechchijchiu itechcopa Cristo Jesús para ma ticchihuacan tlen cuajli tequitl yejhuan Dios desde ye huejcahui oquitlalij para ma ticchihuacan.

Yolsehuilistli yejhuan ticpiaj itechcopa Cristo

¹¹ Nemejhuamej xonentlacatquej hebreos, niman on hebreos xomechtla-caitaquej, pampa xacaj omechtatlilij on nescayotl ipan nemonacayo itoca circuncisión quen yejhuamej. ¹² Yejhu ica, xquelnamiquican ica ipan on tonaltin catca, nemejhuamej nenxelijitcatcaj itech Cristo. No ijqui nenxelijitcatcaj intech on hebreos de Israel yejhuan iconehuan Dios, niman xihuan nemonelohuayaj on pactos yejhuan Dios quimpiaya inhuan on hebreos. Nennemiyaj ipan in tlalticpactli xican tlamachalistli niman xihuan Dios.

¹³ Pero aman nennemij san secan itech Cristo Jesús. Nemejhuamej yejhuan huejca nennemiyaj itech Dios, sa no yejhu umechnisiutlalij itechcopa iyesyo Cristo ijcuac omic. ¹⁴ Cristo otechyoltlalico ijcuac otechtatlalij san secan inhuan on hebreos niman on yejhuan xhebreos. Oquipopoloj on tlahuejli yejhuan techxelojitcatca quen itlaj tepantli. ¹⁵ Ijcuac in oquichiu, onotemamac sa no yejhu ne ipan on cojnepanojli* para oquipopoloj on ley yejhuan quipiaya tlanahuatiltin niman ocsequi iasica. Oquichiu para san secan quinsentlalia on hebreos niman yejhuan xhebreos, niman ijqui oquinmacac yolsehuilistli. ¹⁶ Itechcopa imiquilis Cristo ne ipan icojnepanol, no oquipopoloj on tlahuejli yejhuan oncatca intzajlan Dios niman on tlacamej yejhuan sanquen hebreos niman on xhebreos. Ijcon oquinventlalij on hebreos niman xhebreos san secan quen se cuerpo ican yolsehuilistli san secan ihuan Dios.

¹⁷ Cristo ohuajlaj niman oquiteijlij on cuajli tlamachtijli de yolsehuilistli nemotech yejhuan xnenhebreos, yejhuan huejca nennemiyaj itech Dios, niman intech on hebreos yejhuan nisu nemiyaj. ¹⁸ Aman itechcopa Cristo, tla tihebreos noso ca, tihuelisquej tiasquej itech toTajtzin san ican se Espíritu.

¹⁹ Aman, tej, nemejhuamej nenchanejquej. Xoc nennemij quen on tlacamej yejhuan san tepal chantij ne campa tetlalpan, pero Dios mechnahuatia sa no ijqui quen quinnahuatia on ocsequimej iyaxcahuan. ²⁰ Nemejhuamej no nennemij ipan on cimiento yejhuan Dios oquitlalij ica on iapóstoles niman on tiotlajtojquej. Ijcon quen yejhu on tlacatl, ijcuac quichijchihua se cimiento para ical, quitlalia se tetl yejhuan más hueyi, itoca “yacatztica”, niman itech noyecana para cuajli nochí quichijchihua on ical; Dios no oquitlalij ipan on icimiento se tetl yejhuan más hueyixticaj, niman on tetl sa no yejhu Cristo Jesús. ²¹ On cajli cuajli noquitzquia ihuan Cristo niman noscaltia para nochihua se tiapan yejyeticaj itech toTeco. ²² Ijcon nemejhuamej san secan ihuan Cristo, nemosentlaliaj ihuan nochimej on ocsequimej para nemochihuaj se cajli campa Dios nemi ican iEspíritu Santo.

3

Pablo tequiti intzajlan on yejhuan xhebreos

¹ Nejhua, Pablo, nitzacuticaj pampa nicteijlia on cuajli tlajtojli yejhuan quitemaca temaquixtilistli nemotzajlan nemejhuamej yejhuan xnenhebreos. ² Nicuitia ye nenquimatztoquej quen Dios onechmactilij in tequitl para nemechijlis nemejhuamej yejhuan xnenhebreos ica iteicnelilis*.

³ Dios onechmachiltij on tlen iyanticatca quen yonemechijcuilohuilij ican quesqui tlajtojli. ⁴ Ijcuac nenquimomachtisquej in tlajcuilolamatl, huelis nenquimatisquej tlinon niquixmati ica on yejhuan iyanticatca itech Cristo.

* 2:15 cruz * 3:2 su misericordia

⁵ On tlen iyanticatca itech Dios, xacaj oquipantlantilij ipan ocse tonaltin, pero aman ican iEspíritu Santo quimpantlantilia on yejyetoquej apóstoles niman tiotlajtojquej. ⁶ On ichtacayotl† sa no yejhua in ica itechcopa on cuajli tlajtojli yejhuan quitemaca temaquixtilistli, on yejhuan xhebreos sa no yejhua on herencia quiselaj yejhuan inherencia on hebreos, niman san secan nemij ipan se tlalnacayotl. No ijqui aman san secan quiselisquej on tlen Dios oquitlalij ipan ipromesa. ⁷ Pampa ihueyi teicnelilis yejhuan onechmacac, Dios onechtalij para nicteijlia in cuajli tlajtojli yejhuan quitemaca temaquixtilistli. Niman yejhua onechmacac iteicnelilis itechcopa ipoder yejhuan oquipatlac nonemilis. ⁸ Masqui más nipitentzin xquen on yejhuan pipitiquej iyaxcahuant‡ Dios, yejhua ican iteicnelilis onechmacac in tequitl para niquimijlis on yejhuan xhebreos ica irriquezas Cristo yejhuan xhuelis tictemachihuasquej. ⁹ Niman no onechmactilij para niquintitis nochimej ica Dios no temaquixtijquetl de on yejhuan xhebreos. Dios yejhuan oquitlalij nochí tlen oncaj niman tlen yolticaj, xoquipantlantij on tlen iichtaca oncatca ijcuac otzimpeu in tlalticpactli, yej hasta aman. ¹⁰ Ijcon onochiu para aman intechcopa on tlaneltoquej, nochimej on yejhuan huejhueyixtoquej niman on yejhuan quipiaj tequihuajyotl ne ilhuicac, ma quixmatican itlamatquilis§ Dios ipan nochí tlen oncaj. ¹¹ Niman ijcon quen oquitlalij iyojlo, ijcuac xe oncatca in tlalticpactli, ijqui Dios oquichiu itechcopa Cristo. ¹² Niman aman san secan ihuan Cristo xtitomojtiaj para ticnisihuiyaj Dios ican nochí toyoljo, pampa ticneltocaj Cristo. ¹³ Yejhua ica, nemechtlahtlanilia ma ca nencajcahuasquej ica nenquitequichihuasilquej Dios ipampa on tlen niquijyohuiya nemopampa. Yejhua in tlen niquijyohuiya yejhua cuajli para nemejhuamej niman mechmaca tlacaitalistli.

Itetlajsojtlalis Cristo

¹⁴ Yejhua ica in, tej, ninotlacuenquetza ixpan iTajtzin toTeco Jesucristo, ¹⁵ yejhuan nochí quech familias yejhuan nemij ne ilhuicac niman nican ipan in tlalticpactli itech quiselaj intoca. ¹⁶ Nictlajtlanilia toTajtzin ma cojtili nemoalma itechcopa iEspíritu ican ipoder yejhuan quisa itech riquezas, ¹⁷ para Cristo ma nemi ipan nemoyojo itechcopa nemotlaneltoc. Niman nictlajtlanilia Dios para nemejhuamej xmocojtilican ipan on tetlajsojtlalistli* yejhuan nenquipiaj quen se cojtlit‡ yejhuan huejcatlan noquitzquia ican inelhuayo, niman quen se cajli yejhuan huejcatlan tzimpehua. ¹⁸ Niman no nictlajtlanilia Dios para nemejhuamej cuajli xcajsicamatican inhuan nochimej on iyaxcahuau, quen tlaj sanoyej‡ patlahuac, niman hueyac, niman huejcatlan, niman tlacpac on itetlajsojtlalis Cristo. ¹⁹ Tej, nictlajtlanilia Dios para nemejhuamej xquixmatican on itetlajsojtlalis, masqui xqueman huelis nochí cuajli nencajsicamatisquej on itetlajsojtlalis, niman para nentemisquej ica sa no yejhua Dios.

²⁰ Niman aman, ma ticmacacan hueyilistli Dios yejhuan hueli quichihuas miyec más de on yejhuan tejhuamej hueli tictlajtlaniaj noso on yejhuan ticnemiliaj, pampa ipoder topan tequit. ²¹ Ma quipia hueyilistli Dios itechcopa on tlaneltoquej niman itechcopa Cristo Jesús para nochipa. Ma ijqui nochihua.

4

San secan tinemij itechcopa on Espíritu

† **3:6** secreto ‡ **3:8** le pertenecen; iaxcahuau, ihuaxcahuau, itlatquihuan § **3:10** su sabiduría

* **3:17** amor † **3:17** árbol ‡ **3:18** muy

¹ Yejhua ica nejhua, yejhuan nitzacuticaj pampa nitequiti para toTeco, sanoyej* nemechtlatlanilia ica xmohuicacan quen quitocarohua nenquichihuasquej para cuajli ihuan nemocahuasquej ijcon quen Dios omechnotz para nenquichihuasquej. ² Nemejhuatej ma ca xmohueyimatican, yej xmonotzacan ican yolyemanalistli†. Xquimijyohuican semej ihuan ocsequimej niman xquimpalehuican ica on tetlajsojtlalistli‡ yejhuan nenquipiaj. ³ Xchihuacan canica para xmejehuacan ijcon quen aman san secan nen-nemij itechcopia on Espíritu. Niman xcahuilican on Espíritu ma mechmaca yolsehuilistli yejhuan mechsentalia semej ihuan ocsequimej. ⁴ Nochimej nemejhuatej san secan nenteyaxcahuan§ ne itech Dios. Niman no san se Espíritu mechsentalia ijcon quen Dios san se tlamachalistli* omechmacac ijcuac omechnotz. ⁵ San se nemi teTeco para nochimej, san se tlaneltoctli para nochimej, san se tlacuatequilistli para nochimej, ⁶ niman nemi san se Dios niman Tajtli para nochimej. Yejhua teTeco impan nochimej, niman tequiti impan nochimej, niman no nemi impan nochimej.

⁷ Cristo cada se ocse tlamantic otechmacac tetlayocolilti yejhuan tech-hueliltia ticchihuaj on tlen aman hueli ticchihua. Yejhua otechmacac cada tisesentemej on tetlayocoliltin yejhuan oquiniec para tihuelisquej ticte-quipanosquej Dios. ⁸ Yejhua ica in Yectlajcuilojli quijtohua: Ijcuac otlejcoc ne ilhuicac, oquinmanahuijteu on yejhuan tzacuticatcaj ican tlajtlacojli, niman oquinmacateu on tetlayocoliltin on tlacamej.

⁹ ¿Niman tlinon quijtosnequi yejhua on ica otlejcoc? Quijtosnequi ica achtopa otemoc ne campa más tlatzintlan ipan in tlalticpactli. ¹⁰ On yejhuan otemoc sa no yejhua on yejhuan otlejcoc ne campa más tlacpac de nochicelos†, para sa no yejhua quitemiltia nochihuiyan ican iEspíritu. ¹¹ Niman on tlacamej oquinmacac tetlayocolijli de huelilistli. Sequimej oquinhuehueliltij para apóstoles, sequimej oquinhuehueliltij para tiotlajtojquej, sequimej oquinhuehueliltij tenojnotzasquej ica on cuajli tlajtojli yejhuan quitemaca temaquixtilistli, ocsequimej oquinhuehueliltij para pastores niman temachtijquej. ¹² Ijcon oquintlalij itequitcahuan para quinyectlalisquej nochimej on yejhuan iyaxcahuan Dios para ijcon yejhuatej huelisquej quitequipanosquej Dios, niman ijqui quiscaitisquej icuerpo Cristo. ¹³ Niman ijcon tinochimej tinemisquej san secan itech on tlaneltoctli niman ipan on tlaixmachilistli ica iConetzin Dios. Ijcon ticojtiasquej ipan tonemilis, niman tichicajtiasquej no ijqui quen Cristo. ¹⁴ Yejhua ica xoc titohuicasquej quen coconej yejhuan ijcuac quinmachtiaj yencuic temachtiltin nimantzin quipatlatetzij intlamachilis, niman onxinij ipan tlacajcayahualistli, pampa quincajcayahua on tlacamej yejhuan sanoyej quimatij quen tlacajcayahua quej. Yejhuatej quinhuicasnequej ipan on ojtli xcujli. ¹⁵ Yej ma tiquijtocan on tlen melahuac ican tetlajsojtlalistli, niman nochipa ma titoscaltican ican nochicahualtijtiu ican tetlajsojtlalistli.

Yencuic nemilistli itech Cristo

¹⁷ Yejhua in, tej, yejhua nemechijlia, niman nemechmactilia ican itlanahuatil toTeco ica ma ca sa xnemican quen yejhuatej on ocsequimej

* **4:1** mucho † **4:2** humildad ‡ **4:2** amor § **4:4** le pertenecen; nenteyaxcahuan, nentehuaxcahuan, nentetlatquihuan * **4:4** esperanza † **4:10** On cielo oncaj ne campa oncaj ajacatl, moxtli, metztl, tonajli niman sitlalimej. ‡ **4:15** Ipan griego quitohua: “tzontecomatl.”

xhebreos yejhan xquixmatij Dios. Yejhuamej quinemiliaj on tlajtlamach§ yejhan sanenca. ¹⁸ Quipiaj intlamachilis yejhan xhueli cuajli tlanemiliaj. Yejhuamej xquipiaj on nemilistli yejhan hualehua itech Dios, pampa xtlatquej niman yoltechicajquej. ¹⁹ Yejhuamej yoquipolojquej intlamachilis de pinahualistli, niman quichijtetzij nochi tlen xcuaqli yejhan hualeu ipan intlamachilis. Yehua ica sanoyej cuelitaj quichihuaj nochi tlajtlamach tlen xchipahuac.

²⁰ Pero nemejhuamej xomechmachtijquej itech Cristo para no ijqui nenquichihuasquej. ²¹ Melahuac onencacquej ica yejhua, niman omechmachtijquej on tlen melahuac yejhan oncaj itech Jesús. ²² Ijcon quen se quixtia itlaquen ijcuac yotlajlohuac, no ijqui xcajcahuacan on xcuaqli nemoelehuilis* yejhan itlajcauqui niman mechcajcyahuaya. ²³ Nemejhuamej xcahuilican Dios para cuajli ma quiyencuili nemoyojo niman nemocajsicamatilis. ²⁴ Niman ijcon quen se tlacatl notlaquentia ican itlaquen chipahuac, nemejhuamej no xmotlaquentican ica on yencuic nemilistli yejhan Dios quitemacac. Xmelajcanemican quen Dios yolmelajqui niman yolchipahuac. ²⁵ Yehua ica, ma ca sa xtecajcyahuacan, yej cada se de nemejhuamej xquijtocan on tlen melahuac inhuan tocnihuan, pampa tinochimej tinemij ipan san se cuerpo. ²⁶ Tla nencialnij, ma ca xtlajtlacocan. Niman on tlahuejli ma ca xpiacan nochi tonajli, yej saniman xmoyoltlalican. ²⁷ Niman ma ca xcahuilican on diablo ma mechchihualti nenquichihuasquej nion achijtzin on tlen xcuaqli.

²⁸ Yejhan tlachtequi, ma cajcahua ica tlachtequi, niman ma pehua tequiti. Niman ma quichhua on tequitl yejhan ica cuajli quitlacaitasquej. Ma tequiti para ma quipia tlinon quinmacas on yejhan mayanquej.

²⁹ Ma ca sa xquijtocan on xcuaqli tlajtojli, yej san xquijtocan tlen cuajli yejhan quimpalehuis ocsequimej noscaltis intlaneltoc, niman quinmacas tlatiochihualistli on yejhan caquisquej. ³⁰ Ma ca xcajmanakan iEspíritu Dios yejhan yolchipahuac, pampa ica on Espíritu nemejhuamej omechsellarojquej para nesi ica neniconehuan Dios hasta ipan on tonajli ijcuac Cristo totemaquixtijcau yejcos para caxijtis totemaquixtilis.

³¹ Xmoquixtilican nochi tecuatotonalistli, nochi xcuaqli elehuilistli, nochi tlahuejli, nochi tzajtzilistli, nochi tetejtenehualistli niman nochi xecyotl.

³² Yej ocse tlamantic xnemican. Nemejhuamej xtenotzacan, niman xmoyolyemanilican ihuan ocsequimej, niman xmotlapojpolhuican ihuan ocsequimej ijcon quen Dios omechlapojpolhuij itechcopa Cristo.

5

Iquin nonequi nemisquej iconehuan Dios

¹ Yehua ica xmohuicacan itech ica Dios para nennemisquej quen yejhua, pampa nemejhuamej nentetlajsojcacone huan yejhuamej itech. ² Niman xquintlajsojtlacan* ocsequimej sa no ijqui quen Cristo otechtlatjsojtlac. Yejhuamej onohuentlalij topampa quen se ofrenda niman se huentli yejhan sanoyej† ahuiyac itech Dios.

³ Aman pampa nemejhuamej ye neniyaxcahuan‡ Dios, ma ca nion achijtzin xtenehuacan on ahuilnemilistli, nion itlaj ocse yejhan xchipahuac, nion itlaj yejhan hueyi elehuilistli§. ⁴ Ma ca xtlajtlajtocan ica on tlen tepinajtij, nion yejhuamej on tlen xquipia tlamachilistli, noso on xcuaqli camanajli,

§ 4:17 cosas * 4:22 deseos de ustedes * 5:2 ámenlos † 5:2 muy ‡ 5:3 le pertenecen; neniamaxcahuan, nenihuaxcahuan, nenitlatquihuan § 5:3 deseo

pampa yejhua in tlajtlamach* xtechtocarohua para tiquijtosquej, yej ma ticmacacan tlaxtlahuijli Dios. ⁵ Tej, ye nenquimatztoquej ica ne campa Cristo niman Dios tlamandarohua, on yejhuan quistinemi ipan ahuilnemilistli, noso yejhuan yolchipahuac, noso yejhuan nochi quinoyaxcatisnequi xhuelis calaquis. On yejhuan nochi quinoyaxcatisnequi xhuelis calaquis, pampa on tlen sanoyej quinequi sa no ijqui quen quinyectenehuasquia on tlamachichihualtin intajtzitzihuan.

⁶ Ma ca xcahuilican yacaj mechcajgayahuas ica on tlajtoltin yejhuan xquipia tlamachilistli, pampa melahuac ipampa in tlajtlamach tlen xcuajli huajlau ihueyitlahuel Dios impan yejhamej on yejhuan xquitlacamatij. ⁷ Yejhua ica ma ca inhuan xmonecan. ⁸ Ipan ocse tonaltin onenquichijquej on tlen xcuajli. Pero aman nenquichihuaj on tlen cuajli, pampa nennemij san secan ihuan toTeco. Yejhua ica xnemican ipan itlahuil Dios niman xchihuacan tlen cuajli. ⁹ Nochimej on yejhuan nemij ipan on tlahuijli quijtohuaj on tlen melahuac, niman quichihuaj on tlen cuajli, niman yolme-lajquej. ¹⁰ Xtejtemocan quen huelis nenquipactisquej toTeco. ¹¹ Ma ca xchihuacan on xcuajli yejhuan on tlajtlacolejquej quichihuaj. On tlajtlamach xcuajli tepalehuis. Pero ijcuac nenquitasquej ica quichihuaj on tlen xcuajli, xquimpannextilican on intlajtlacol. ¹² Tepinajtij para tiquijtosquej on tlen yejhamej quichtacachihuaj. ¹³ Pero ijcuac se quimpannextilia on intlajtlacol ican itlahuil Dios, quintitia ica yejhamej sanoyej xcuajcualtin, pampa on tlahuijli hueli quipannextia nochi. ¹⁴ Yejhua ica nijtohua:

Xtlacha tejhua yejhuan ticochi. Xmoquetztehua niman xquisa ne intzajlan on mimiquej yejhuan quichihuaj on tlen xcuajli. Tla ijcon ticchihuas, Cristo mitztlahuilhuis. (In quijtosnequi Cristo mitzmaquixtis.)

¹⁵ Yejhua ica cuajli xmotacan sa no nemejhuamej quen nemohuicasquej. Ma ca xmohuicacan quen on yejhuan xtlajmatquej, yej xmohuicacan quen tlajmatquej. ¹⁶ Nochi on tonaltin xtequitiltican para on tlen cuajli, pampa on tonaltin sanoyej xcuajcualtin. ¹⁷ Yejhua ica ma ca xnemican quen on yejhuan xquimati tlinon toTeco quinequi, yej cuajli xcajsicamatican on tlen quinequi.

¹⁸ Ma ca sa xtlahuancanemican, pampa on tlahuanalistli se quiyecana para más ma quichihua on tlen xcuajli. Yej nemejhuamej xcahuilican on Espíritu Santo ma noch ica mechynecana. ¹⁹ Xtlajtlajtocan ihuan ocsequimej ica on salmos. Xtlacuicatican himnos de yectenehualistli niman tlacuicaltin itech Dios. Xtlacuicatican niman xcueyilican ican noch nemoyojo itech on toTeco. ²⁰ Ican itocatzin toTeco Jesucristo, nochipa xmacacan tlaxtlahuijli Dios toTajzin ipampa nochi tlajtlamach.

Tlacamej niman insihuahuan yejhuan tlaneltocaj

²¹ Xmotlacamatican inhuan ocsequimej ican itetlacaitalis Dios. ²² Sihuamej, se sihuatl ma quitlacamatí ihuehuentzin quen quitlacamatí on toTeco. ²³ Ijcon xchihua, pampa Dios oquitlalij on tlacatl quen yejhua tlayecanquetl† itech isihuau, ijcon quen Cristo yejhua tlayecanquetl intech on yejhuan quineltocaj. On yejhuan quineltocaj nochihuaj icuerpo niman sa no yejhua quinmaquixtia on tlaneltocaquej yejhuan nochihuaj icuerpo. ²⁴ Ijcon quen on yejhuan tlaneltocaj quitlacamatij Cristo, no ijqui on sihuamej ican nochi tlajtlamach ma quintlacamatican inhuehuentzitzihuan.

²⁵ Tlacamej, se tlacatl ma quitlajsojtla‡ isihuau ijcon quen Cristo oquint-lajsojtlac on yejhuan quineltocaj niman impampa onotemacac para omic.

* ^{5:4} cosas † ^{5:23} Ipan griego quijtohua: “tzontecomatl.” ‡ ^{5:25} que la ame

²⁶ Yehua in oquichiu para oquinnochipahuilij on yejhuan tlaneltocaj itech. Oquinnochipahuilij ican atl niman ican tlajtojli. ²⁷ No ijqui ijcon oquichiu para sa no yejhua ixpan quinhuajtelquetzas on yejhuan quineltocaj, petlanquej ipan inalma, xican ijtlacahualistli, nion pijpilichtiquej, nion quipiasquej tlinon ica quiyolpajsolosquej, yej yolchipajquej yesquej niman noch ica cuajcualtin yesquej. ²⁸ Ijcon, tej, quen on tlacatl quitlajsojtla itlalnacayo, ijqui nonequi quitlajsojtlas isihuau. Yejhuan quitlajsojtla isihuau sa no yejhua notlajsojtlas. ²⁹ Xacaj nemi yejhuan xquitlajsojtla itlalnacayo, yej quitlacualtia niman cuidarohua quen Cristo quichihua para on yejhuan quineltocaj, ³⁰ pampa otechtalij ipan icuerpo quen tiinacayo niman tiiomiyohuan. ³¹ Ijquin tlajcuilnesticaj ipan on Yectlajcuilojli: “Yehua ica on tlacatl cahuas itataj niman inanaj para nosentlalis ihuan isihuau. Ijcon, tej, on omemej nochihuasquej san se cuerpo.” ³² Xtihuelij ticajsicamatij quen ijqui se tlacatl niman isihuau huelij nemij quen se cuerpo masqui on melahuac. In quijtosnequi más hueyi de on se tlacatl niman on sihuatl yejhuan nonamictiaj. In, tej, quijtosnequi on namictijli de Cristo niman on yejhuan itech tlaneltocaj. ³³ Pero aman ocsejpa nemechijlia: On tlacatl nonequi quitlajsojtlas isihuau sa no quen yejhua notlajsojtlas, niman on sihuatl no nonequi quitlacaitas ihuehuentzin.

6

Coconej niman intajhuan

¹ Coconej, se conetl ma quintlacamati itajhuan ijcon quen on toTeco otechnahuatij, pampa yejhua in sanoyej* cuajli. ² On achtoj tlanahuatijli yejhuan quipia se promesa sa no yejhua in: “Xtlacaita motaj niman monan, ³ para ticpias miyec tlatichihualistli niman para ticpias hueyac nemilistli nican ipan in tlalticpactli.”

⁴ Tatajin, nemejhuamej ma ca xquincuajcualanican nemocone huan, yej cuajli xquimiscaltican ipan on melajcatlalilistli de innemilis niman ican machtilistli itech ica on toTeco.

Tlanamactin niman inteco

⁵ Tlanamactin, nemejhuamej xquintlacamatican on yejhuan nemoteco ipan in tlalticpactli. Xquintlacamatican ican nemojtijli, tlacaitalistli, niman ican noch i nemoyojlo quen Cristo nenquitlacamatisquiaj.

⁶ Xquintequichihuilican xsan ijcuac yejhuan cuajli mechitztiasquej, yej xquintequichihuilican quen nenitlanamachuan Cristo yejhuan nenquichihuaj on tlen Dios quinequi ican noch i nemoyojlo. ⁷ Xchihuacan on tequitl ican cuajli nemoyojlo quen nenquichihuasquiaj para toTeco niman xpara tlacamej. ⁸ Ye nenquimatztoquej ica cada se, tla tlanamactli noso ca, quiselis itech toTeco sa no ijqui quech tlen cuajli quichihua.

⁹ Niman nemejhuamej tecomej, sa no ijqui cuajli xmohuicakan ihuan on tlacamej niman sihuamej yejhuan nemotlacohualhuan. Ma ca itlaj ica nenquinmomojtisquej. Xquelnamiquican ica nemejhuamej niman nemotlacohualhuan ne ilhuicac nenquipiaj san se nemoTeco yejhuan itech nenteyaxcuhuan†, niman on nemoTeco xquichicoita‡ se tlacatl ihuan ocse.

Oncaj armas espirituales para on yejhuan tlaneltocaj

* **6:1** muy † **6:9** le pertenecen; nenteaxcahan, nentehuaxcahan, nentetlatquihuan ‡ **6:9** no hace acepción

¹⁰ Sa ica nochí, nocnihuan, xmocojtilican ihuan toTeco, niman ica on ihueyicojtilis. ¹¹ Xmotzacuilican ican nochí on armas yejhuan Dios mech-maca, para huelis nenmelajcanemisquej ijcuac yonenquitlanquej itlacaj-cayahualis on diablo. ¹² Ijcon xchihuacan, pampa xtithuisoquij inhuan on tlalticpactlacamej. Yej titohuisoquij inhuan on xcuajcualtin espíritus yejhuan quipiaj poder niman nemij ne tlacpac. Titoxixicohuaj inhuan on espíritus yejhuan quipiaj tlanahuatijli, niman tequihuajyotl, niman yejhuan quinnahuatiaj on xcuajcualtin tlacamej nican ipan in tlalticpactli. ¹³ Yejhua ica, xpiacan nochí armas yejhuan Dios mech-maca, para huelis nenmelaj-canemisquej ijcuac on nemotlahuelicniu mechixnamiquis. Ijcon, tej, ijcuac tlamis on huisoquilitli, nemejhuamej oc

¹⁴ Yejhua ica, xmelajcanemican. Ijcon quen se soldado notlajcosalohua ican iilpicau ijcuac yau campa nomictilo, no ijqui xmotlajcosalocan ica on tlen melahuac. Ijcon quen se soldado notzacuilia iyelpan ican iarmas, no ijqui xmotzacuilican ican on yolmelahualistli. ¹⁵ Ijcon quen se soldado notlatlajtlalilia ijcuac quitlalia izapatos ijcuac yau campa nomictilo, no ijqui xmotlatlajtlalilican para nenquitemachtisquej in cuajli tlajtojli de temaquix-tilistli yejhuan quitemacas yolsehuilistli. ¹⁶ On tlen más hueyi quijtosnequi sa no yejhua in. Ijcon quen se soldado quipia se escudo para notzacuilia ijcuac quimojomotlaj ican on flechas, no ijqui xpiacan nemotlaneltoc para nemotzacuileisquej itech on diablo yejhuan mechixnamiqui ica on quen flechas yejhuan tlicuiticaj. ¹⁷ Ijcon quen se soldado quiselia se casco para quitzacuilia itzontecon, no ijqui xselican temaquixtilistli. Niman ijcon quen se soldado quiselia se espada para quinhuisoqui on intlahuelicnihuan, no ijqui nemejhuamej xselican on iespada on Espíritu yejhuan tlajtoltzin Dios. ¹⁸ Nochipa xchihuacan oración. Xtlachicahuilican niman xlajtlanilican Dios quen on Espíritu Santo mechycanas. Xtlachixtiacan niman xchihuacan oración impampa nochimej on yejhuan teyaxcahuan itech Dios. ¹⁹ No ijqui xchihuacan oración nopampa, para Dios ma nechmaca tlajtojli ijcuac nitlajtos, niman para huelis nitlajtos ican yolchicahualistli para nictemachtis on tlen iyanticaj itech on cuajli tlajtojli yejhuan quitemaca temaquixtilistli. ²⁰ Dios onechajtitlan quen itenojnotzcau para nicteijlis in temachtilistli yejhuan aman ipampa nitzacuticaj. Xchihuacan oración para nejhua nicteijlis in temachtilistli ican yolchicahualistli quen nonequi nicchihuas. § nenmelajcanemisquej.

Sa ica nochí tlajpalohuilis Pablo

²¹ Tíquico, totlajsojcaicniu niman tlapalehuijquetl yejhuan ican cuajli iyojo nochipa quichihua on tlen melahuac ipan itequiu toTeco, mechtla tlajto-huilis nochí tlajtlamach* yejhuan nopan nochihua para nemejhuamej no xmatican. ²² Yejhua ica nemechtitlanilia para mechijlis quen ijqui tinemij niman ijqui mechyoahuas.

²³ Ma Dios toTajtzin niman toTeco Jesucristo ma quinmaca on tocnihuan yolsehuilistli niman tetlajsojtlalistli† ican tlaneltoctli. ²⁴ Niman ma Dios quintiochihua nochimej on yejhuan quitlajsojtlaj toTeco Jesucristo ican tetlajsojtlalistli yejhuan xqueman nopatla. Ma ijqui nochihua.

FILIPENSES

ITLAJCUIOL ON APÓSTOL SAN PABLO PARA ON FILIPENSES

Ijcuac tzacuticatca Pablo quintlajcuilhuiya on tlaneltocaquej yejhuan chan-tij ne Filpos

¹ Nejhua, Pablo, niman Timoteo, yejhuan itequipanojcahuan Jesucristo, temechtlajcuilhuiyaj nochimej nemejhuamej yejhuan neniyaxcahuan^{*} Dios yejhuan nennemij ne ipan on hueyican itoca Filpos. Temechtlajpalohuaj nemejhuamej yejhuan nentlayecanaj intech iconehuan Dios, niman no on yejhuan tlapalehuijquej, niman nochimej on yejhuan iconehuan Dios itechcopa Cristo Jesús. ² Ma Dios niman toTeco Jesucristo mechtiochihiuacan niman ma mechyolsehuican.

Oquichiu oración Pablo impampa on tlaneltocaquej

³ Nochipa ijcuac nemechelnamiqui, nicmaca tlaxtlahuijli noDios. ⁴ Ijcuac nicchihua oración para nemejhuamej, nochipa nicchihua ican pactli, ⁵ pampa desde onenquiselijquej on cuajli tlajtojli yejhuan quitemaca temaquixtilistli hasta aman, nohuan nentequitij para ticteijliaj on cuajli temachtijli. ⁶ Cuajli Nicyolmatzticaj ica Dios, yejhuan opeu quichihua cuajli itequiu ipan nemoyojlo, quichijtias hasta ipan on tonajli ijcuac Jesucristo huajlas. ⁷ Cuajli ijcon nicnemilis nemotech, pampa nemechpia ipan noyojlo, niman pampa nemejhuamej onenquiselijquej on iteicnelilis[†] Dios quen nejhua onicselij. Ijcon nochihua masqui nitzacuticaj, noso ninemi imixpan on tequihuajquej campa nicmanahuiya on cuajli tlajtojli yejhuan quitemaca temaquixtilistli, campa niqunititia ica on yejhua tlen melahuac. ⁸ Dios quimati ica sanoyej[‡] nemechtlajsojtla[§] nemochimej^{*} sa no ijqui quen Jesucristo mechtlaejtla.

⁹ Nicatlajtlaní ipan nooración para más ma miyequiya nemotetlajsojtلالis, nemotlaixmachilis niman nemocajsicamatilis, ¹⁰ para ijcon nochipa nenzimatisquej quen ijqui nenquitlapejpenisquej on tlen más cuajli. Ijcon huelis nenquipiasquej se nemilistli chipahuac, niman xonyas tlinon mecht-lajtlacolmacas ijcuac Cristo huajlas. ¹¹ Ijcon nenquichihuasquej nochí on tlen cuajli pampa Cristo mechpalehuis. Niman ijcon nencueyilisquej Dios, niman yejhua quiselis on yectenehualistli.

Para nejhua nemilistli sa no yejhua Cristo

¹² Nocnihuan, nicnequi xmatican ica aman más miyec tlacatl caqui niman quineltoca on cuajli tlajtojli yejhuan quitemaca temaquixtilistli ipampa nochí tlen nopan onochiu. ¹³ Aman, tej, nochimej on soldados yejhuan nemij ipan palacio, niman nochimej ocsequimej quimatztoquej ica nitzacuticaj pampa nicneltoca Cristo. ¹⁴ Niman más miyequej tocnihuan quipiaj ipan inyojlo para quitemachtiaj on itlajtol Dios ican más yolchicahualistli, niman xican nemojtiji, pampa nican nitzacuticaj.

* **1:1** le pertenecen; neniaxcahuan, nenihuaxcahuan, nenitlatquihuan † **1:7** su misericordia
 ‡ **1:8** mucho § **1:8** les amo * **1:8** todos ustedes; nannochti, yemochimej, anochimej,
 innochimej, emmochimej

15-17 On, tej, melahuac ica sequimej quiteijliaj on temachtilistli ica Cristo pampa nechnexicolitaj niman pampa nechyecapanahuisnequij ican on tetlacaitalistli yejhuan nemotech nicpia. Yejhuanmej quiteijliaj on temachtijli xican yolchipahualistli, niman quinequij nohueyilisquej. No ijqui quinemiliaj nechtlayohuiltisquej aman chica nitzacticaj. Pero ocsequimej quiteijliaj on temachtilistli ican cuajli inyojlo. Yejhuanmej quichihuaj ican tetlajsojtlistli†, pampa quimatztoquej ica Dios oquitecahuilij para onechzacuquej para nicmanahuis on cuajli tlajtojli yejhuan quitemaca temaquixtilistli. **18** Pero xhueyiquitosnequi tla on tlacamej quiteijliaj itech ica Cristo ican cuajli inyojlo noso ca. Yej on hueyiquitosnequi ica quiteijliaj itech Cristo.

19 Niman yejhua in nechpactia, pampa nicmatzticaj ica ican nemooraciones niman ican itlapalehuilis iEspíritu Jesucristo, nochi cuajli nopan nochihuas. **20** Tlinon nejhua sanoyej nicnequi niman niccha ma ca nicmatis pinahualistli ixpan Dios, yej nitlajtos ican nochi yolchicahualistli para Cristo quen nochipa onitlajtoj. Niman nejhua nicnequi ica nicueyilis Cristo ican notlalnacayo. Niman xnotequivi‡ quen ijqui tla ican nonemilis noso ican nomiquilis. **21** Tla ninemis huelis nictequipanos Cristo, niman tla nimquis nictlanis nochi on tlen Dios nechmacas. **22** Tla ninemis ipan in tlalticpactli, huelis más nitequitis para Cristo. Yejhua ica xhueli nicmati catlejhua más nicnequi, tla miquilistli noso nemilistli. **23** Sanoyej ohuijticaj§ para nicmati catlejhua más nicnequi. Nicnequi nimquis para nias itech Cristo, pampa on más cuajli yesquia para nejhua. **24** Pero más cuajli para nemejhuamej ninemis ipan in tlalticpactli, para huelis nemechpalehuis. **25** Yejhua ica cuajli nicyolmatzticaj ica nemohuan ninocahuas para nemechpalehuis más nemoscaltisquej, niman para más nenquipiasquej paquillistli ipan nemotlaneltoc. **26** Yejhua ica, ijcuac ocsejpa nemohuan ninemis, más nencueyilisquej Cristo Jesús, pampa ocsejpa nemohuan ninemis.

27 On tlinon más hueyi quijtosnequi para nemejhuamej, xnemican quen se yejhuan oquiselij on cuajli tlajtojli yejhuan quitemaca temaquixtilistli nonequi nemis. Ijcon tla nejhua nias nemechontas, noso huejca ninemis nemotech, nechijlisquej ica nemejhuamej nenmelajcanemij san secan. Nechijlisquej ica nentequitij ican se tlamachilistli niman se nemoyojlo para on tlaneltoctli yejhuan hualehua itech on temachtijli yejhuan quitemaca temaquixtilistli. **28** Ijcon, tej, xnemocahuiliaj ma mechmomojticancan on yejhuan nemotlahuelcnihuan. Tla xnemomojticaj, nenquintitiae ica yejhuanmej yahuij ipan ixpolohuilistli. Pero no ijqui nenquintitiae ica sa no yejhua Dios mechmaquixtis. **29** Ipampa Cristo, Dios omechmacac tonaltin xsan para nenquineltocasquej Cristo, yej para no nentlajyohuisquej ipampa. **30** Nemejhuamej niman nejhua sa no yejhua lucha ipan tinemij. Aman yonenquitaquej quen ijqui yonilucharoj niman ocsequimej no mechijliaj quen ijqui nilucharotiu.

2

Iyolyemanilis niman ihueyilis Cristo

1 Cristo nochi ica mechyolehua, pampa san secan ihuan nennemij, niman itetlajsojtatlali* mechyooltalia. Nennemij san secan ihuan iEspíritu Dios, niman nenquixmatij itetlajsojtatlali niman iteicnelilis†. **2** Yejhua ica, xnechajxiltilican on pactli. Xpiacan san se tlanelmilijli. Cada se xmomatican

† **1:15-17** amor ‡ **1:20** no importa; xnechimportarohua, xnechajmana § **1:23** difícil * **2:1** su amor † **2:1** su misericordia

san ican se tetlajsojtlalistli. San se moyojo niman san se tlamachilistli xpiacan. ³ Ma ca itlaj xchihuacan ican nexicojli nion pampa nenquinequij nemohueyimatisquej, yej ican yolyemanilistli xmomatican ica ocsequimej más huejhueyixtoquej xquen nemejhuamej. ⁴ Ma ca xchihuacan on tlen cuajli san para nemejhuamej, yej no xquinchihiuilican on ocsequimej on tlen no cuajli para yejhuamej.

⁵ Xtlanemilican no ijqui quen Cristo tlanemiliaya. ⁶ Masqui Cristo sa no yejhua Dios, yejhua oquinocahualtij on tlajtlamach yejhuan Dios quimelhua[‡] quipia. Yejhua ica tej, para achitzin tiempo xoc onenquen Dios nemi. ⁷ Ijcon xoquipix ihueyilis Dios niman onochiu quen se tetequichihuilijquetl. ⁸ Niman ijcuac onochiu tlacatl, yejhua onocnonelij, niman oquitlacamat Dios hasta queman omic, masqui on imiquilis sanoyej[§] tepinajtij catca ne ipan cojnepanojli*.

⁹ Yejhua ica Dios oquimacac más hueylistli yejhuan xacaj ocse quipia, niman tlanahuatijli on yejhuan más hueyi quijtosnequi xquen yacaj ocse quipia. ¹⁰ Dios oquimacac on hueylistli niman tequihuajyotl para nochimej on yejhuan nemij ne ilhuicac niman ipan in tlalticpactli, niman no on yejhuan yomiquej ma notlacuenquetzakan ixpan ijcuac caquisquej itocatzin. ¹¹ Ijcon oquichiu para nochimej ma quixmatican niman ma quijtocan ica yejhua inTeco, niman ijcon Dios toTajzin quiselis hueylistli.

On tlaneltocaquej quen tlahuiltin ipan in tlalticpactli

¹² Ijcon, tej, notlajsojcaicnhuan, ijcon quen nemejhuamej nochipa nennechtacamatiij ijcuac nemohuan ninemi, xnechtlacamatican más aman ica huejca ninemi. Aman ica xnemohuan ninemi, sa no nemejhuamej xmotequimacatiacan itech nemomaquixtilis ican yolyemanilistli niman nemojtijli. ¹³ Ijquin xchihuacan, pampa Dios tequiti ipan nemoyojo. Yejhua mechchihualtia sanquen nenquinequij niman nenhuelij nenquichihuasquej on cuajli yejhuan quipactia. ¹⁴ Xchihuacan nochí tlajtlamach[†] ma ca ican tlahueltlajtojli nion ma ca ican camahuijsoquilistli, ¹⁵ para xonyas tlinon ica mechtlajtlamacasquej niman para nenchipajtiasquej. Ijcon xchihuacan para intlajcotian on xcuajcualtin tlacamej yejhuan xcuajli tlanemiliaj, ma mechitacan ica nentecone huan xican ijtlacohualistli itech Dios. Nemejhuamej nempetlanij intlajcotian on xcuajcualtin tlacamej quen on sitlalimej petlanij ne ipan cielo chica nemejhuamej nenquitemachtijtoquej on temachtilistli yejhuan quitemaca yencuic nemilistli. ¹⁶ Ijcon xchihuacan para ijcuac huajlas Cristo, nipaquis, pampa nicmatis ica on tequitl yejhuan onicchii nemotzajlan xsanencaj onicchii. ¹⁷ Nemejhuamej nenquimacaj Dios se huentli. On nemotlanetoc yejhua huentli. Tla nimquis, nipaquis, niman on pactli nemohuan nicpanos, pampa ica on noyesyo yejhua ica naxitis nemohuen. ¹⁸ Yejhua ica, tej, xpaquican, niman nohuan xpiacan paquelistli.

Timoteo niman Epafrido

¹⁹ Tla toTeco Jesús quinequi, saniman nictitlanis Timoteo para mechontas. Nicmatzticaj ica ijcuac ocsejpa huajlas notech, nechpactis ica on tlen de nemejhuamej nechijlis. ²⁰ Xnicpia ocse yejhuan no ijqui quinemilia quen nejhua, yejhuan melahuac notequimacas de nochí tlen cuajli para nemejhuamej. ²¹ Ocsequimej quitejtemohuaj nochí tlen cuajli san para yejhuamej, niman xejhua on yejhuan para Cristo Jesús. ²² Pero nemejhuamej nenquimatztoquej quen ijqui Timoteo quiteititia icuajlilis. Nenquimatztoquej

‡ 2:6 merece § 2:8 muy * 2:8 cruz † 2:14 cosas

quen ijqui tequipanohua nohuan ipan on cuajli tlajtojli yejhua quitemaca temaquixtilistli quen se conetl yejhuan quipalehuiya itaj.²³ Yejhua ica, tej, nitlamacha saniman yejhua nemechtitlanilis ijcuac yoniquitac quen ijqui nopen nochihuas.²⁴ Niman cuajli nicmati ica tla toTeco quinequi, nejhua no saniman nemechitas.

²⁵ Nicnemilia nonequi nemechtitlanilis tocniu Epafrodito nemotlanahu-atijcau yejhuan onencuajtitlanquej para nechpalehuis ipan nochi tlen nechpolojticaj. Yejhua nocniu itech Cristo niman notequipanojcaxiu ipan in tequitl niman ipan in tlajyohuilistli.²⁶ Nicnemilia nonequi nemechtitlanilis pampa sanoyej quinequi mechitas nemochimej[‡]. Yejhua mechelnamiqui ican ajmantli pampa nemejhuamej onenquimatzquej ica yejhua cualohuaya.²⁷ Melahuac yejhua cualohuaya, niman ye miquiya. Pero Dios oquicnelij[§], niman xsan yejhua. Nejhua no onechicnelij para xonicpix más ajmantli de in yejhuan ye nicpia.²⁸ Yejhua ica más nicnequi para nictitlanis, para ijcuac ocsejpa nenquitasquej nempaquisquej. Niman no ijqui nejhua xmás ninajmantias ijcuac nicmatis ica nemejhuamej yonenquitaquej ica xoc cualo.²⁹ Xselican ican nochi yolkactli quen itequitcau toTeco, niman nochipa xpiacan tetlacaitalistli intech on yejhuan no ijqui quen yejhua.³⁰ Ijcon xselican pampa yejhua ye miquiya pampa quitequipanohua Cristo. Oquitlalij inemilis ne campa huelisquiaj miquisquia san para onechpalehuico ica on yejhuan nemejhuamej xohuel ica onennechpalehuiquej.

3

On tlen melahuac melajcatlalilistli

¹ Niman aman nocnihuan, xpaquican pampa nenteyaxcahuan* itech toTeco. Para nejhua xnechpajsolohua ocsejpa nemechijlis on tlen yone-mechtlajcuihuijca, niman cuajli para ocsejpa niquitos para nemelajcane-misquej ipan nemotlaneltoc.

² Xmotacan sa no nemejhuamej itech on yejhuan quichihuaj on tlen xcuajli niman quinequij quitlalilisquej ipan tenacayo on nescayotl itoca circuncisión.³ On nescayotl yejhuan tlen melahuac sa no tejhuamej ticteiti-tiaj pampa ticmahuistiliaj Dios itechcopa on Espíritu Santo, niman tipaquij pampa tinemij san secan ihuan Cristo Jesús. Niman no ticteiti-tiaj on nescay-otl pampa xtictlaliaj toyojlo para ticselisquej temaquixtilistli itech on tlen nochihua ipan tonacayo.

⁴ Xnictlalia noyojlo itech nonacayo, masqui nihuelisquia nictialisquia. Tla yacaj quipia quen ijqui confiaros on nacatl, nejhua más sanoyej[†],⁵ pampa ipan chicueyi tonajli ijcuac oninen onicselij ipan nonacayo on nescayotl itoca circuncisión. No ijqui nejhua nihebreo, niman nihualehua itech noach-tojtataj Benjamín. No nitlajtlajtohua ica on tlajtojli itoca hebreo yejhuan intlajtol notajhuan, niman cuajli oniquejeu on tlanahuatiiji pampa nifariseo catca.⁶ Sanoyej oniquintlahuelitac niman oniquintlajyohuilitij on yejhuan quineltocaj Cristo. Niyolmelaqui catcaj. Xacaj quipiaya tlinon quijtos notechcopa, pampa onicchiu nochí quen on tlanahuajtiji quijtohua.⁷ Pero in miyec tlajtlamach[‡] yejhuan achtoj sanoyej hueyi quijtosnequij para nejhua, aman niquita quen on yejhuan xijtla quijtosnequij ipampa Cristo.⁸ Xoc hueyi quijtosnequij on tlajtlamach pampa más hueyi quijtosnequi niquixmati Jesucristo quen noTeco. Ipampa Cristo nochí on tlajtlamach

[‡] 2:26 todos ustedes; nannochti, yemochimej, anochimej, innochimej, emmochimej [§] 2:27 tuvo

misericordia de él ^{*} 3:1 le pertenecen; nenteaxcahuan, nentehuaxcahuan, nentetlatquihuan

[†] 3:4 mucho [‡] 3:7 cosas

onicau niman nicpohua quen itlaj tlasojli para hueli nicnoyaxcatia Cristo, ⁹ niman para Dios nechita san secan ninemi ihuan Cristo. Yejhua nechita ica niyolmelajcatlacatl, xpampa onicchiu noch i tlen on tlanahuajtijli quijtohua, yej pampa nicneltoca noCristo. In yolmelajquilitli Dios techmaca itechcopa totlaneltoc. ¹⁰ Nicnequi niquixmatis Cristo, niman ipan in nemilistli yejhuan amantzin nicpia nicnequi nicpias on ipoder yejhuan oquiselij ijcuac oyoliu§ niman onoquetzteu ipan itlalcon. Niman no nicnequi niquijyohuis on tlen yejhua quijyohuiya, niman nim quis quen yejhua omic. ¹¹ Niman nitlamacha ica no nihuelis niyolhuis niman ninoquetztehuas intech on mimiquej.

Xmocojtilican para nennemisquej quen Dios quinequi

¹² Yejhua in xniquijtosnequi tla noch i ye nicpia, noso tla aman najsitacaj se tlacatl yejhuan noch cuajli. Pero quemaj ninocojtilijtiu niman nitlamacha ica ajsis on tonajli ijcuac ninemis quen Cristo quinequi, pampa yejhua ica Cristo onechnotz achtoj. ¹³ Nocnihuan, masqui xcuajli najsitacaj ninemi quen Cristo quinequi, niquelcahua noch i tlen nocahua tlacuitlapan niman nicchihua canica para nicajsis on tlen oncaj tlayecapan, para yejhua ica ninajxitijtias quen se tlacatl yejhuan noch cuajli. ¹⁴ Ijcon quen se telpochtl yejhuan tehuan notlatlalohua campa notlatlanij sanoyej noyolchicahua para tetlanis, nejhua no ijqui. Sanoyej ninoyolchicahua para nictlanis on tetlayocolijli yejhuan Dios quinequi nicselis ne ilhuicac pampa ninemi san secan ihuan Cristo Jesús.

¹⁵ Ijcon, tej, nochimej nemejhamej yejhuan cuajli yochicau nemonemilis ipan on tlaneltoctli, no ijqui nonequi xnemilican quen nejhua nicnemilia. Tla itlaj ocse tlamantli nenquinemiliaj ocse tlamantic, Dios no mechititis yejhua in. ¹⁶ Pero yej quemaj, ma tiquejehuacan noch i tlen cuajli yejhuan yotictajxilijquej.

¹⁷ Nocnihuan, san secan xtocacan noejemplo. Niman xquintacan on yejhuan quitocaj noejemplo, ¹⁸ pampa miyecpa yonemechijlij niman ocsejpa nemechijlia hasta ican nixayo, ica miyequej nemij quen tlahuelicniutin itech on tlen onochiu ipan icojnepanol* Cristo. ¹⁹ Yejcos on tonajli ijcuac sa no yejhamej noxoxotonisquej. Yejhamej sa quimahuistiliaj quen dioses yesquiaj on xcuajcualtin tlajtlamach yejhuan quelehuiaj. Yejhamej nohueyimatij ica on tlin quitocarohua pinahuasquiaj. Yejhamej sa comatztoquej on tlajtlamach yejhuan para in tlalticpactli. ²⁰ Pero tejhuamej yetichanejquej ne ilhuicac. Niman aman sa ticchixtoquej on toTemaquixtijcau toTeco Jesucristo ma hualehua de ne ilhuicac. ²¹ Cada se de tejhuamej yejhua techpatilis totlalticpacnacayo yejhuan xcojtic, para no ijqui nocahuas quen yejhua ilhuicaccuerpo yejhuan oquiselij ijcuac otlejcoc ne ilhuicac. Ijcon quichihuas ican ipoder yejhuan quipia para quimandarohua noch i tlajtlamach.

4

¹ Yejhua ica xmelajcanemican san secan ihuan toTeco, notlajojcaicnihuan. Nemechtajsojtl‡* niman sanoyej† nicnequi nemechitas. Nemejhamej nennopaqulis niman nennotetlayocolil.

Nochipa xpactican itech toTeco

² Sanoyej niqintlajtlanilia on sihuamej, Evodia niman Síntique, ma quipican san se inyojlo quen icniutin itech toTeco. ³ Niman tejhua, notequipanojcaxiu yejhuan xcaman timocahua nohuan ipan in tequitl, nimitztlajtlanilia xquimpalehui yejhuatej in tocnihuan, pampa yejhuatej cuajli nohuan oquixicojquej on chicajcatequitl yejhuan oticchijquej ica on cuajli tlajtojli yejhuan quitemaca temaquixtilistli. Yejhuatej no otequitquej san secan ihuan Clemente niman ocsequimej yejhuan nohuan otequitquej. Yejhuatej intoca ye tlajcuilolnestoquej ne ipan on tlajcuilolamatl campa oncaj intoca on yejhuan quipiaj nemilistli para nochipa.

⁴ Nochipa xpaquican itech toTeco. Ocsejpa niquijtohua: ¡xpaquican! ⁵ Nochi tlacatl ma quita ica nentenotzquej. Ye nisu para huajlas toTeco. ⁶ Ma ca itlaj xcomatztiacan, yej nochipa xchihuacan oración, niman xtlajtlanilican Dios ican tlaxtlahuijli nochli tlen mechpolohua. ⁷ Ijcon Dios mechmacas yolsehuilistli on yejhuan más hueyi de nochli quech se tlacatl huelis cajsicamatis. Niman in yolsehuilistli quejehuas nemoyojo niman nemotlamachilis pampa itechcopa Cristo Jesús nennemij san secan ihuan.

Xtlanemilican itech on tlen cuajli

⁸ Sa ica nochli, nocnihuan, xnemilican nochli tlen melahuac, nochli yejhuan quimelahuat[‡] tetlacaitalistli, nochli tlen melajqui, nochli tlen chipahuac, nochli tlen xtetlahueltia, niman nochli yejhuan quimelahu yectenehualistli. Xnemilican nochli tlen más cuajli niman yejhuan quitocarohua quiyectenehuasquej. ⁹ Xchihuacan on tlinon onemechmachtij, niman onenquiselijquej notech, niman on tlen notech onencacquej, niman onenquitaquej onicchii. Ijcon xchihuacan, niman Dios yejhuan mechmaca yolsehuilistli nemohuan nemis.

Intetlayocolil on filipenses para Pablo

¹⁰ Sanoyej nipaqui itech toTeco, pampa nemejhuamej ocsejpa opeu nennechpalehuiyaj ican tomin. In xquijtosnequi tla onennechelcajcaj ica nennechpalehuisquej, yej nemejhuamej xnenquipiayaj. ¹¹ Niman xniqijtohua pampa nechpolojticaj, pampa nejhua ye nicmati quen ninemi ican pactli san ica on tlen nicpia. ¹² Nicmatzticaj quen ijqui ninemi ipan mayantli, niman nicmatzticaj quen ijqui nicpia miyec tlaitlaj. Nicmatzticaj quen ijqui niteixnamiqui san quemanon, tla ijcuac nejhua nixhuiticaj noso ijcuac napismiqui, tla ijcuac nicpia miyec noso tla ijcuac nechpolojticaj. ¹³ Nochi nihueli nicxicohua tlen nopan huajlau pampa Cristo yejhua nechpalehuiya.

¹⁴ Pero yej quemaj, cuajli onenquichijquej para nohuan onenquijyohuijquej on mayantli. ¹⁵ Nemejhuamej, yejhuan nenchantij ipan on hueyican itoca Filipos, nenquimatztoquej ica ijcuac achtopa onquis ipan nemoregión de Macedonia ijcuac yonemechijlijca on cuajli tlajtojli yejhuan quitemaca temaquixtilistli, xacaj ocsequimej tlaneltocaquej onechpalehuijquej ican tetlayocolijli nion oquiselijquej tlatiochihualistli, yej san nemejhuamej.

¹⁶ Chica nejhua oc[§] ninemiya ne Tesalónica, nemejhuamej onennechtitlanilijquej ofrendas quesquipa. ¹⁷ Xquijtosnequi tla sa nipacticaj pampa itlaj nicselia. Yej tlinon nejhua nicnequi más xmiyequilican nemotetlayocolil ne ixpan Dios. ¹⁸ Niman nejhua yonicelij nochli, niman hasta más quech nonequi. Desde onennechajtitlanilijquej nemotetlayocolil itechcopa Epafroditó, xoc nechpolohua. In tomin quen itlaj on ajhuiyac popochtli* yejhuan on tlacamej quipopatzaj ijcuac quimacaj Dios se huentli, yejhuan

‡ **4:8** merece § **4:16** todavía; sanquen * **4:18** incienso; tlapopochilistli

Dios quiselia, niman quipactia. ¹⁹ NoDios mechmacas nochi tlen nemejhuamej mechpolohua itechcopia ihueyi riquezas yejhuan oncaj ihuan Cristo Jesús. ²⁰ Dios toTajtzin ma quipia hueyilistli para nochipa. Ma ijqui nochihua.

Sa ica nochi tetlajpalohuilistli

²¹ Xquintlajpalocan cada se on yejhuan iyaxcahuan† Dios itechcopia Jesucristo. On tocnihuan yejhuan nican nohuan nemij no mechtajpalohuaj. ²² No ijqui mechtajpalohuaj nochimej on teyaxcahuan itech Dios yejhuan nemij nican Roma, niman más yejhuamej on yejhuan quitequichihuliaj in César, on más hueyi tlayecanquetl, ipan in hueyi país itoca Roma.

²³ Ma toTeco Jesucristo mechtiochihua nochimej nemejhuamej. Ma ijqui nochihua.

† **4:21** le pertenecen; iaxcahuan,ihuaxcahuan,itlatquihuan

COLOSENSES

ITLAJCUIOL ON APÓSTOL SAN PABLO PARA ON COLOSENSES

Pablo o quintlajcuilhuij on tlaneltocaquej ne Colosas

¹ Nejhua, Pablo, niiapóstol Jesucristo pampa Dios quinequi. Nejhua niman tocniu Timoteo ² temechtlajcuilhuiyaj ne Colosas nemejhuamej yejhuan nenteyaxcahuan* itech Dios niman nenmelajcanemij ipan tlaneltoctli itech Cristo.

Ma Dios toTajzin mechtiocihua niman ma mechmaca iyolsehuilis.

Pablo oquichiu oración impampa on tlaneltocaquej

³ Nochipa ticmacaj tlaxtlahuijli Dios, iTataj toTeco Jesucristo, ijcuac ticchihuaj oración nemopampa. ⁴ Ticmacaj tlaxtlahuijli pampa oticaquej ica on nemotlaneltoc nenquipiaj itech Cristo Jesús, niman on nemotetlajsojtلالis† nenquimpialiaj nochimej on yejhuan iyaxcahuan Dios. ⁵ Nenquipiaj in tlaneltoctli niman tetlajsojtلالis† pampa nenquimachaj‡ on tlen yejyejticaj para nemejhuamej ne ipan ilhuicac. Opeu nenquipiaj in tlamachalistli§ ijcuac onencacquej on melahuac cuajli tlajtojli yejhuan quitemaca temaquixtilistli ⁶ yejhuan ohuajlaj nemotech. Nochihuiyan ipan in tlalticpactli in temachtijli quitlani más miyec tlacatl para Cristo niman quimpatilis innemilis para cuajli nemisquej. Nochihua quen onochiu nemotzajlan desde onencaquej niman onencajsicamatquej ica melahuac Dios mechmaca iteicnelilis. ⁷ Yejhua in omechmachtij on totlajsojcaEpafras yejhuan tequiti para Dios quen nejhua. Yejhua cuajli tlapalehuijquetl de Cristo, niman tequiti nemohuan topampa. ⁸ Yejhua otechijlij ica sanoyej* nemotlajsojtلالis ijcon quen on Espíritu Santo mechititia.

⁹ Yejhua ica desde on tonajli ijcuac oticaquej ica nemotlaneltoc niman nemotlajsojtلالis, xticajcahuaj para ticchihuaj oración nemopampa. Tictlajtlaniliaj Dios ma mechpalehui nenquimatisquej nochi on tlen quinequi para nenquichihuasquej itechcopa tlamatquilistli† niman cajsicamatilistli yejhuan quisaj itech Dios. ¹⁰ Ijcon tictlajtlaniliaj para nenhuelisquej nenquitlacaitasquej niman nenquipactisquej toTeco ican nemonemilis. Nenhuelisquej nenquichihuasquej nochi tlajtlamach‡ tlen cuajli, niman cada mojmostla más cuajli nenquixmatisquej Dios. ¹¹ Niman nenquipiasquej yolchicahualistli ican nochi poder yejhuan quisa itech ihueyi poder, para ijqui huelis nenquixicosquej nochi tlajtlamach ican miyec iyyohuclistli niman paquelistli. ¹² Nenquimacasquej tlaxtlahuijli toTajzin, pampa otechmelajcatlalij para ticselisquej inhuan nochi iyaxcahuan on herencia ne ipan ilhuicac campa tlayec oncaj. ¹³ Yejhua otechmaquixtij itech ipoder Satanás, niman otechtlatlalij ne campa tlamandarohua itlajsojcaConetzin. ¹⁴ Yejhua oquitlaxtlau para nochi totlajtlacol, niman otechtlapojpolhuij.

Itechcopa on imiquilis Cristo ticpijaj yolsehuilistli ihuan Dios

¹⁵ Cristo on iConetzin Dios, yejhua oquipantlantico quen ijqui yejhua nemi yejhuan xnesi inemilis quen ijqui oncaj. Niman Cristo yejhua nemi desde ijcuac nochi tlen oncaj xe oncatca. ¹⁶ Itechcopa Cristo, Dios oquichijchiu

* **1:2** le pertenecen; nenteaxcahuan, nentehuaxcahuan, nentetlatquihun † **1:4** su amor ‡ **1:5** esperan § **1:5** esperanza * **1:8** mucho † **1:9** sabiduría ‡ **1:10** cosas

nochi tlen oncaj ne ilhuicac niman nican ipan tlalticpactli, on yejhuan tiquitaj niman on yejhuan xtiquitaj. Yejhua itechcopia, Dios oquintlalij on yejhuan reyes, on yejhuan gobernadores, on yejhuan quipiaj hueyi tequihuajyotl, niman on yejhuan quipiaj tlanahuajtjili ne ilhuicac. Dios oquichijchii nochii tlajtlamach itechcopia Cristo, niman oquichijchii nochii tlajtlamach no para Cristo. ¹⁷ Cristo ye nemiya ijcuac xe oncatcaj nochii tlajtlamach, niman yejhua ipampa tla nochii tlajtlamach cuajli oncaj. ¹⁸ No ijqui Cristo yejhua tlayecanquetl[§] itech on icuerpo. Icuerpo quijtosnequi nochimej on tlaneltoquej. Yejhua quinmaca nemilistli on yejhuan nochihuaj icuerpo. Ijcuac xe yacaj noquetztehuaya ipan itlalcon, yejhua achtoj onoquetzteu ipan itlalcon para ijcon noyecatztlalij ipan nochii tlajtlamach tlen nemi niman tlen oncaj. ¹⁹ Dios opac ica nochii tlen yejhua inemilis oquitlalij ipan Cristo. ²⁰ Dios no opac pampa itechcopia Cristo nochii tlajtlamach tlen oncaj niman tlen nemi, tla nican ipan in tlalticpactli noso ne ilhuicac, intech onoyoltlalij para oquitlalij yolsehuilistli. Ijquin onochiu itechcopia imiquilis Cristo yejhuan oquitoyau iyesyo ne ipan cojnepanoqli*.

²¹ Ipan ocsequi tonaltin catcaj, xonenyajquej itech Dios niman nemoyojo lo tlahueloncatca ihuan Dios pampa nenquichihuayaj tlajtlamach tlen xcuajli. ²² Pero aman Dios omechtalij yejhua itech ican yolsehuilistli itechcopia imiquilis itlalnacayo Cristo. Ijcon oquichiu para mechpias ixpan chijchipajquej, xican ijtlacohualistli niman xican ijixcomacalistli. ²³ Ijcon quichihuas tla yej melahuac yonenquineltocaquej Cristo ican yolchicahualistli niman yolmelajcatlalilistli. Ijcon, tej, quichihuas tla xnemoyolcuesquej ipan on tlamachalistli[†] yejhuan onenquiselijquej itech on cuajli tlajtojli yejhuan quitemaca temaquixtilistli yejhuan onencaquej. Yejhua in cuajli tlajtojli noteijlia nochihuiyan imanyan yejhua in tlalticpactli, niman nejhua Pablo yejhua nicnotequimaca para nictejlia.

Notemactia Pablo para quitequichihuilis on tlaneltoquej

²⁴ Aman sanoyej nipaqui ica on tlen nemopampa niquijyohuiya. Ijcon nitlapalehuijtiu para najxiltis on tlajyohuilstli yejhuan Cristo quijyohuijtaj ipampa icuerpo. Icuerpo quijtosnequi nochimej on tlaneltoquej. ²⁵ Dios onechtlalij quen se tequipanojquetl para mechpalehuis nemejhuamej yejhuan xnenhebreos. Yejhua onechmactilij para nemechijlis nochii itemachtil ²⁶ yejhuan iyanticatca para nochii tlacatl. Pero aman Dios oquipantlantij intech on iyaxcahuan. ²⁷ Dios oquinec quipantlantis on tlen quichtacapiaya intech on iyaxcahuan, para yejhuan ma quimatican ica on sanoyej cuajli tlajtlamach yejhuan quipia para on xhebreos. Niman on tlen iyanticatca sa no ijqui in. Ipan cada se de nemejhuamej Cristo ompa nemi. In quijtosnequi ica nemejhuamej yejhuan xnenhebreos inhuan on hebreos nenquipiasquej nemilistli para nochipa.

²⁸ Tejhuanamej ticteijlia itech ica Cristo. Tiquintlacanonotzaj nochimej, niman tiquinmachtiaj cada se ican nochii totlamatquilis[‡] para tiquinhuanimasquej cada se ihuan Cristo, cuajli chijchicajtoquej ican intlaneltoc. ²⁹ Yejhua ica in sanoyej nitequiti. Nicchihua canica ica nochii chicahualistli yejhuan Cristo ican ipoder nechmaca.

2

¹ Nicnequi xmatican ica sanoyej* ninotequimaca chicahuac nemopampa, niman impampa on yejhuan nemij ne ipan on hueyican itoca Laodicea,

§ **1:18** Ipan griego quijtohua: “tzonteconmatl.” * **1:20** cruz † **1:23** esperanza ‡ **1:28** nuestra sabiduría * **2:1** mucho

niman impampa nochimej yejhuan xnechixmatij. ² Niquinnequia para yejhuamej ma noyolehuacan, niman ma cuajli san secan nemican ican tetla-jsojtlalistli†. Ijcon, tej, nenquipiasquej nochí irriquezas on cajsicamatilistli san para huelis nenquimatisquej on tlen iichtacatzin‡ Dios, yejhuan sa no yejhua Cristo. ³ Ipan yejhua iyanticaj tesoros de on tlamatquilistli§ niman de on cajsicamatilistli.

⁴ Yejhua in nemechijlia nemejhuamej para ma ca yacaj mechcajcyahuas ica on tlajtojli yejhuan caquisti melahuac niman cualtetzin, pero xmelahuac.

⁵ Masqui nejhua xnemotech ninemi ican notlalnacayo, nemechelnamiqui ipan noyojlo. Niman nipaqui ica nicmati cuajli nemohuicaj niman nenquipiaj melajqui nemotlaneltoc itech Cristo.

⁶ Ijcon quen nemejhuamej onenquiselijquej yejhua Cristo Jesús para nemoTeco, no xnemican san secan ihuan. ⁷ Yejhua ipan xpiacan nemonel-huayo quen on cojtli* nonelhuayotia ipan tlajli. Niman yejhua ipan xmo-quitzquican quen on tepantli noquitzquia ipan on cimiento. Niman más xmocojtilican ipan nemotlaneltoc ijcon quen omechmachtijquej. Niman xmacacan hueyi tlaxtlahuijli Dios.

Yencuic nemilistli itech Cristo

⁸ Xmotacan sa no nemejhuamej. Ma ca yacaj xcahuilican mechcajcyahua ica on xcuajli temachtilistli yejhuan tecajcayahua ica on tlen xmelahuac. On quen on tlajtlamach† temachtilistli, san intemachtilis niman incostumbres on tlalticpacatlacamej. On temachtilistli xquisa itech Cristo.

⁹ Itech Cristo cuajli nesi nochí inemilis Dios. ¹⁰ Niman nententoquej ican inemilis Dios pampa nemejhuamej nennemij san secan ihuan Cristo yejhuan quinyecana nochimej on tequihuajquej niman nochimej on yejhuan quipiaj poder.

¹¹ No ijqui pampa Cristo nemi ipan nemoyojo, onenquiselijquej on nescay-otl itoca circuncisión. Pero xejhua on nescayotl yejhuan notetlalilia ipan tenacayo quen quichihuaj on hebreos, yej yejhua ica on nescayotl yejhuan Cristo oquitlalij ipan teyojlo. On yejhuan quipiaj on nescayotl ipan inyojlo xoc quichihuaj on tlen inxcuajli elehuilis‡ quinequi. ¹² Ijcuac onemocu-atequijquej, onenquiteititijquej ica onemotlaltocaquej ihuan Cristo. (In quijtosnequi ica on achtoj nemolehuilis onotlaltocac ihuan Cristo.) Niman no ijqui ihuan onemoyolitijquej ican yencuic nemolehuilis. Nochi on onochiu pampa onenquineltocaquej ipoder Dios yejhuan ica oquiyolihuitij§ Cristo niman oquetzteu ne ipan itlalcon. ¹³ Ipan ocsequi tonaltin catcaj ne-mejhuamej nemimictoyaj ixpan Dios ipampa nemotlajtlacol niman ipampa ielehuijis nemotlalnacayo yejhuan nenquipiayaj. Pero aman Dios mech-maca nemilistli ihuan Cristo. Niman otechtlapojpolhuilij nochí totlajtlacol. ¹⁴ Dios oquipopoloj itlanahuatil niman nochí on tlen ipan on tlanahuatijli technahuatia. In tlanahuatijli techtlahuelitaya niman techtlajtlacolmacaya. Pero ijcuac Cristo omic ipan cojnepanojli*, Dios oquipopoloj on tlanahuatijli. ¹⁵ Ijcuac Cristo omic ne ipan cojnepanojli, Dios oquitlaquijquixtilij on diablo niman on yejhuan quipiaj poder ipan ajacatl, niman oquimpijinajtij ne teixpan. Itechcopa icojnepanol Cristo, Dios oquintlan.

Xtejtemocan on tlajtlamach yejhuan quisa ne ilhuicac

† **2:2** amor ‡ **2:2** su secreto § **2:3** sabiduría * **2:7** árbol † **2:8** cosas ‡ **2:11** deseos
 § **2:12** lo resucitó; oquiyolitij * **2:14** cruz

¹⁶ Yejhua ica, ma ca xmocahuilican yacaj mechistlaco ica on tlen nenuquicuaj niman nenconij, noso ica on tla xnenquichihuaj on ilhuimej, noso ijcuac yencuic metztli, noso ica on tla nion xnenquejehuaj on tonajli ijcuac on hebreos nosehuiaj. ¹⁷ Nochi yejhua in xitlaj† ica tepalehuiya. In quen itlaj tlasehuajlotl de on tlen huajlas, pero nochi on tlen melahuac sa no yejhua Cristo. ¹⁸ Ma ca xmocahuilican mechquixtilican on nemotetlayoco-lil yejhuamej on yejhuan nophuaj quen sanoyej‡ yolyemanquej niman quinyectenehuaj on ilhuicactequitquej§. Yejhuamej quiytohuaj ica quiseliaj intlamatquilis* intechcopa on tetlajtlachalistin yejhuan quen intemicpan, niman sanoyej nohueyimatiq ican intlamachilis yejhuan ica quinemiliaj nochi tlajtlamach de in tlalticpactli. ¹⁹ Yejhuamej xcuajli quitlacamatij Cristo, on yejhuan tlayecanquetl† campa tejhuamej titochihuaj icuerpo. Yejhua techtlacualtijtcaj niman techsentlalijtcaj san secan quen se tlalanacayotl yejhuan cuajli sajsalijtcaj nochihuiyan. Niman Dios no techiscal-tia.

²⁰ Pampa yonenmiquej ihuan Cristo, xoc polihui mechmandaros on temachtilistli niman incostumbres on tlalticpactlacamej. Yejhua ica, ¿tlica‡ oc§ nennemij quen on yejhuan xtlapohualtij itech imiquilis Cristo? ¿Tlica nenquitlacamatij on tlanahuatiltin ²¹ yejhuan quiytohuaj: “Ma ca xcua yejhua in, nion ma ca xmati, niman nion ma ca xtelo”? ²² Nochi quen on tlacuajli tlamic ijcuac nocuas. Nochi yejhua in tlanahuatiltin niman temachtijli hualejtcaj intech on tlacamej. ²³ Nochi in tlanahuatiltin nesi quen sanoyej hueyi quiyosnequi, pampa on yejhuan quitlacamatij sanoyej tequitij para cuajli quejehuasquej intlanelto, niman para yolyemanquej yesquej niman para quitlajyohuultisquej intlanacayo. Pero xitlaj ica tepale-huiya para quitlajcalisquej on xcuajli elehuilistli*.

3

¹ Aman, pampa Dios omechyolhuitij niman omechquetzteu ihuan Cristo, xnequican nochi tlajtlamach* riquezas yejhuan oncaj ne ilhuicac campa Cristo yehuaticaj iyecmacopa Dios ican hueyilistli. ² Xtanemilican itech on tlajtlamach yejhuan oncaj ne ilhuicac, niman ma ca yejhuan oncaj nican ipan in tlalticpactli, ³ pampa onenmiquej ihuan Cristo. Aman nenquipiaj nemonemilis iyanticaj ihuan yejhua yejhuan nemi san secan ihuan Dios. ⁴ Cristo sa no yejhua nemonemilis, niman ijcuac yejhua nophanextis, ijcuacon nemejhuamej no nemopanextisquej ihuan yejhua. Niman no ihuan nenquipiasquej ihueyilis.

On ijsoltic nemilistli niman on yencuic nemilistli

⁵ Yejhua ica, tej, xpopolocan nochi tlen xcuajli nemotech oncaj yejhuan quisa ipan in tlalticpactli. Ma ca yacaj ma ahuilnemi. Xquixtican nochi on tlen xchipahuac ipan nemonemilis. Ma ca xcahuilican nemoelehuilis† ma mechynecana, nion ma ca xnejnequican on yejhuan tlen xcuajli, nion ma ca xnequican nochi nenquimoyaxcatisquej. Tla nenquinequij nochi nenquimoyaxcatisquej, on sa no ijqui quen nenquimahuistilisquiaj on tlamachijchihuaultin intajtzitzihuan. ⁶ Yejhua ica ipampa in tlajtlamach, hua-jlau on itlahuel Dios intech on yejhuan xquitlacamatij. ⁷ Nochi yejhua

† ^{2:17} nada; coxtla ‡ ^{2:18} muy § ^{2:18} ángeles: Angeles tequitij ne ilhuicac niman nican ipan in tlalticpactli. * ^{2:18} su sabiduría † ^{2:19} Ipan griego quiytohua: “tzontecomatl”. ‡ ^{2:20} ¿por qué?; ¿tline? § ^{2:20} todavía; sanquen * ^{2:23} deseos * ^{3:1} cosas † ^{3:5} deseos

in nemejhuamej no nenquichihuayaj ipan nemonemilis yejhuan yopanoc. ⁸ Pero aman xcajcahuacan nochí yejhua in tlajtlamach: tlahuejli, temojtij cualanilistli, on yolehualistli para nenquinchihuilisquej ocsequimej on tlen xcuajli, tetejtenehualistli, niman nochí xcuajli camanajli yejhuan quisa ipan nemocamac. ⁹ Ma ca xmojlican on tlen xmelahuac ihuan ocsequimej, pampa nemonemilis yonenquipatlaquej. Xoc nennemij nion nemohuicaj quen achtopa catca. ¹⁰ Pero aman yonenquiselijquej nemolistli yejhuan yencuic niman ye cajsitihuij más ixmatilistli‡ itech Dios para más hueli nennemij ijcon quen yejhua on yejhuan omechchijchiu. ¹¹ Intzajlan on yejhuan yencuic innemilis xoc nesij aquinon xhebreos noso hebreos, nion aquinomej on yejhuan oquiselijquej on nescayotl ipan intlalnacayo itoca circuncisión noso ca, nion aquinomej xchanejquej, noso on yejhuan quen yolqui tecuani, nion tlanamactin, noso on yejhuan xtlanamactin. Yejhua in melahuac, pampa Cristo quinyecana nochimej on yejhuan yencuic innemilis, niman yejhua nemi impan nochimej yejhamej.

¹² Dios mechtlajsojta§ niman yomechtajpejpenij. Yejhua ica, tej, xmopantlantican ican teicnelilistli*, ican cuajlilistli, ican yolyemanilistli†, ican cuajli tenotzialistli itlaj ica, niman ican ijyohuclistli. ¹³ Xpiacan ijyohuclistli ihuan ocsequimej, niman xmotlapojpolhuican tla yacaj mechtlahuelcuitia, ijcon quen Cristo omechtlapojpolhuij. ¹⁴ On yejhuan más hueyi quijtosnequi, xmotlajsojtlacan ihuan ocsequimej, pampa on tetlajsojtlalistli cajxitia nochí in tlajtlamach. ¹⁵ Niman xcahuilican on yolsehuilistli yejhuan Cristo mechmaca ma mechyevana ipan nemoyojlo, pampa yejhua ica in Dios omechnoz para nennemisquej ipan san se cuerpo. Niman xpiacan tetlajsojcamachilistli. ¹⁶ Xselican nochí itemachtil Cristo ipan nemoyojlo. Xmomachtican niman xmoylehuacan ihuan ocsequimej ican nochí tlamatquelistli‡. xtlacuicatican itech Dios ican tlaxtlahuijli ipan nemoyojlo. Xtlacuicatican salmos, tlacuicalmej de yectenehualistli niman tlacuicalmej itech Dios. ¹⁷ San tlinon yejhuan nenquichihuasquej noso nenquijtosquej, xchihuacan nochí ican itocatzin toTeco Cristo, niman xmacacan tlaxtlahuijli Dios itechcopa Cristo.

On quen nonequi quiyecanasquej innemilis on tlaneltocaquej

¹⁸ Sihuamej, cada se de nemejhuamej xtlacamatican nemohuehuentzin. In yejhua nonequi nenquichihuasquej pampa nentlaneltocaj itech toTeco.

¹⁹ Tlacamej, cada se de nemejhuamej xtlajsojtlacan§ nemosihuau niman ma ca xtetlajtlahueltijquej inhuan.

²⁰ Coconej, nochí ica xquintlacamatican nemotajhuan, pampa in yejhua quipactia toTeco.

²¹ Tatajtin, ma ca xquincuajcualanicam nemocone huan, para ma ca najmanasquej hasta campa yolajsisquej.

²² Esclavos, nochí ica xquintlacamatican nemoteco nican ipan in tlalticpactli. Ma ca xquintlacamatican san ijcuac yejhamej mechitztiasquej para yejhamej mechijlisquej ica nencuajcualtin. Pero xquintlacamatican ican nochí nemoyojlo, pampa nenquitlaca itaj toTajtzin. ²³ San tlinon yejhuan nenquichihuasquej, xchihuacan ican cuajli nemoyojlo quen nenquitequipanojtiasquiaj toTeco niman xejhamej on tlacamej. ²⁴ Ijcon xchihuacan, pampa nenquimatztoquej ica toTeco mechtlaxtlahuilis ica on herencia. Nemejhuamej nenquitequipanohuaj Cristo yejhuan melahuac

‡ 3:10 conocimiento § 3:12 les ama * 3:12 misericordia † 3:12 humildad ‡ 3:16 sabiduría § 3:19 ámenlo

toTeco. ²⁵ Pero yejhuan quichihua tlen xcuajli quiselis itlaxtlahuil de on tlen xcuajli oquichiu, pampa Dios xquichicoita* se tlacatl ihuan ocse.

4

¹ Tecomej, xchihuacan tlen mechtocarohua itech on tlacamej niman si-huamej yejhuan nemotlacohualhuan. Xquelnamiquican ica nemejhuamej no nenquipiaj nemoTeco yejhuan nemi ne ilhuicac. ² Xchihuacan oración, niman ipan nemooración ma onya listo nemotlamachilis. Niman ma ca xquelcahuacan para nenquimacasquej tlaxtlahuijli Dios. ³ No xchihuacan oración topampa para Dios ma quinyolmatoca on tlacamej para huelis titenojnotzasquej ican temachtilistli de Cristo on yejhuan iyanticatca para on tlacamej. Aman nitzacuticaj pampa nitenojnotza ica on temachtilistli de Cristo. ⁴ Xchihuacan oración para sanoyej* cuajli ma nictemelajcaili on temachtilistli quen nonequi.

⁵ Xmohuicacan quen tlamatquej inhuan on yejhuan xtlaneltocaj, niman ma ca ma quixpolocan on tonaltin. ⁶ Nonequi nochipa nenquinyecnotzasquej niman nemotlajtol ma yemanqui para cuelcaquisquej. Niman no nonequi nenquimatisquej quen ijqui nenquinnanquilisquej cada se.

Sa ica nochit tetlajpalohuilistli

⁷ Tíquico yejhua totlajsojcaicniu itech toTeco. Yejhua tlapalehuijquetl yejhuan nochipa quichihua tlen Dios quinequi niman nohuan quite-quipanohua. Mechtlatlajtohuilis quen ijqui nopan nochihua. ⁸ Yejhua nictitlani para mechonijlis quen ijqui tinemij niman para mechonyolehuas. ⁹ Ihuan yejhua no yau totlajsojcaicniu Onésimo. Yejhua cajxitia nochit tlen Dios quinequi, niman yejhua se nemochanejcau. Yejhamej mechijlisquej nochit tlinon nochihua nican.

¹⁰ Aristarco, notehuical yejhuan ihuan nitzacuticaj, niman Marcos, iprimo Bernabé, mechtlatjpalohuaj. Nemejhuamej yonenquiselijquej tlanahuatiji para quen ijqui nenquiselisquej Marcos. Tla yau mechnonotza, xselican cuajli. ¹¹ No ijqui mechtlatjpalohua Jesús, on yejhuan no itoca Justo. Yejhamej in yeyimej san yejhamej hebreos yejhuan nohuan tequitij ipan itequiu Dios, niman yejhamej nechpactiaj.

¹² No ijqui mechtlatjpalohua Epafras yejhuan se nemochanejcau niman se itequipanojcau Cristo. Yejhua nochipa sanoyej quitlajtlanilia Dios para nemejhuamej xmelajcanemican niman xchijchicajtiacan ipan nemotlaneltoc, niman para cuajli nenquiyolmatztiasquej on tlen Dios quinequi para nenquichihuasquej. ¹³ Nemechixpantilia ica yejhua sanoyej notequimaca nemopampa, niman no impampa on yejhuan nemij ne ipan on huejhueyican Laodicea niman ne Hierápolis. ¹⁴ Lucas totlajsojcatepajtijcau niman Demas mechtlatjpalohuaj.

¹⁵ Xquintlajpalocan on tocnihuan yejhuan nemij ne ipan on hueyican Laodicea, niman on tocniu sihuatl Ninfas, niman on tocnihuan yejhuan nosentlaliaj ichan.

¹⁶ Ijcuac nemejhuamej yonenquimomachtijquej yejhua in tlajcuilojli, xchihuacan canica para on tocnihuan yejhuan nosentlaliaj ne ipan on tiopan de Laodicea no ma quinomachtican. No xmomachtican yejhua on tlajcuilojli nicontitlanis ne Laodicea.

¹⁷ Yejhua in xquijlican Arquipo: “Xquelnamiqui, cuajli xchihua nochit on itequiu toTeco yejhuan omitzmactilij.”

* 3:25 no tiene favoritos * 4:4 muy

18 Nejhua, Pablo, onicmatlajcuilolchijchiu in tetlajpalohuilistli ican nejhua noma. Xquelnamiquican ica nitzacuticaj. Ma Dios mechtiochihua. Ma ijqui nochihua.

1 TESALONICENSES

IACHTOJ TLAJCUILOL ON APÓSTOL SAN PABLO

PARA ON TESALONICENSES

Pablo niman itequipanoj caxihuan quintlajcuilhuiyaj on tlaneltocaquej ne Tesalónica

¹ Nejhua, Pablo, ihuan Silvano niman Timoteo, niquijcuilohua yejhua in tlajcuilolamatl para on tlaneltocaquej yejhuan nemij itech Dios toTajzin niman toTeco Jesucristo ne ipan on tiapan yejhuan oncaj ipan on hueyican Tesalónica. Ma Dios toTajzin niman toTeco Jesucristo mechmacacan tlati-ochihualistli niman yolsehuilistli.

On chanejquej Tesalónica quitemacaj se ejemplo ica intlaneltoc

² Nochipa ticmacaj tlaxtlahuijli Dios para nochimej nemejhuamej, niman nochipa temechelnamiquij ican tooración. ³ Temechelnamiquij ixpan Dios toTajzin quen ijqui ipampa nemotlaneltoc nenquichihuaj miyec tequitl, niman quen ijqui ipampa nemotetlajsojtalis* nenquitequipanohuaj, niman quen ijqui ipampa nemotlamachalis† itech toTeco Jesucristo nenmelajcane- mij. ⁴ Nocnihuan, Dios mechtlajsojtla nemejhuamej. Niman ticmatztoquej ica yejhua omechtlapejpenij, ⁵ pampa ijcuac tejhuamej otomezchijlijquej on cuajli tlajtojli yejhuan quitemaca temaquixtilistli xotomezchpanextilijquej san ican tlajtlajtohuilistli, yej no ican poder, niman ican Espíritu Santo. Ni- man no cuajli nenquiyolmatztoquej ica in tlamachtiji yejhua tlen melahuac. Cuajli nenquimatztoquej ica quen ijqui titohuicayaj nemohuan ipampa on tlen cuajli para nemejhuamej. ⁶ Nemejhuamej onenquitocaquej toejemplo niman iejemplo toTeco. Niman masqui onenquipixquej miyec tlajyohuilstli, onenquiselijquej on tlamachtiji ican paquilstli on yejhuan omechmacac on Espíritu Santo. ⁷ Ijcon, tej, onemochijquej ejemplo para nochimej on tlaneltocaquej ne impan Macedonia niman Acaya. ⁸ Ijcon nemejhuamej onenquiteitijquej itemachtil toTeco, niman xsan Macedonia niman Acaya, yej nochihuiyan quimatztoquej ica nemotlaneltoc yejhuan nemejhuamej nenquipiaj itech Dios. Yejhua ica aman xoquitlaj ticpiaj tlinon más tiquim- ijlisquej. ⁹ Aman sa no yejhuan tlajtlajtohuaj ica nemonemilis ijcuac otomeznojnotzcaj. Niman quitetlajtlajtohuiliaj quen ijqui cuajli onentech- selijquej, niman quen ijqui onenquintlalcahuijquej on tlamachijchijhualtin nemotojtajtitzihuan catcaj para onenquitlacamatquej Dios, niman opeu nenquitequipanohuaj on yejhuan melahuac Dios niman yejhuan nochipa nemi. ¹⁰ No ijqui quijtohuaj quen ijqui nemejhuamej nenquichixtoquej ma huajla ne ipan ilhuicac iConetzin Dios yejhuan oquiyolihuitij niman oquetzteu ne ipan itlalcon. Jesús, teConeu itech Dios, yejhua techmaquixtia ipan on temojtij tlajyohuilstli yejhuan huajlas.

2

Itequiu Pablo ne Tesalónica

¹ Niman sa no nemejhuamej nenquimatztoquej, nocnihuan, ica xsan- nencaj otomeznojnotzquej. ² Nemejhuamej ye nenquimatztoquej ica achtopa otechijixnamiquej ican tlhuejli, niman otechhuijhuicaltijquej ne ipan on hueyican Filipos. Masqui yejhuan ijcon otechchihuilijquej, Dios

* 1:3 su amor † 1:3 esperanza de ustedes

otechpalehuij para otomechmacaquej on cuajli tlajtojli yejhuan quitemaca temaquixtilistli ican noch i confianza ne Tesalónica. In oticchijquej masqui quejecohuayaj techteltisquej. ³ Otomechchicajcanojnotzquej xican on tlamachtijli yejhuan xmelahuac, nion xican on tlen xchipahuac, nion xitlaj* ica ocse yejhuan ica otomechc妖cayajquej. ⁴ Yej noch ocse tlamantic. Dios achtopa cuajli otechtlatlatac, niman quemaj oquitlalij iyojo totech para otechmactilij on cuajli tlajtojli yejhuan quitemaca temaquixtilistli. Titemachtiaj xpara on tlacamej ma paquican tohuan, yej para Dios ma paqui tohuan yejhuan techita cuajli ipan toyojlo. ⁵ Nemejhuamej nenquimatztoquej ica xqueman otomechyecnojnotzquej ican sanoyej† caultzin tlajtojli para xtechtlajsojtlacan‡, nion xotictequitiltijquej tlajtojli yejhuan ica huelis tictlanisquej tomin. Yejhua ica in, Dios yejhua ixpantiticaj. ⁶ Tejhuamej xqueman ticnequij para on tlacamej ma techyecetenahuacan, tla nemejhuamej noso ocsequimej, masqui pampa tiiapóstoles Cristo tiuelisquiaj temechtlajtlanilisquiaj. ⁷ Yej ocse tlamantic, tejhuamej temechpiaj quen itlaj yejhuan selic, quen yejhua on nantli yejhuan quimiscaltia iconetzitzihuan ican tetlajsojtlalistli. ⁸ Nemejhuamej temechpialaj miyec tetlajsojtlalistli yejhuan hasta ticnequisquiaj temechmacasquiaj, xsan yejhua on cuajli tlajtojli yejhuan quitemaca temaquixtilistli, yej no hasta tonemilis pampa tejhuamej otomechtlajsojtlaquej sanoyej§. ⁹ Nocnihuan, nemejhuamej nenquelnamiquij quen ijqui otitequitquej niman oticchijquej canica para oticlanquej tonemilis. Titequityaj ican tonajli niman yehuajli para nion aquin de nemejhuamej onemechtequimacaquej chica tejhuamej temechmachtiayaj on itemachtil Dios yejhuan quitemaca temaquixtilistli.

¹⁰ Nemejhuamej onenquitaquej, niman Dios no, ica otitohuicaquej chipahuac niman yolmelajquej nemotech yejhuan nentlaneltocaj. Xacaj huelis techtlajtlacolmacas. ¹¹ No ijqui nenquimatztoquej ica otomechijlijquej cada se de nemejhuamej quen quichihua se tajtli ihuan iconehuan. Otomechyolejquej niman otomechyolpactijquej. ¹² Niman no otomechtlacitijquej para xmohuicacan quen mechtocarohua nemohuicasquej, yejhuan neniconehuan Dios aquin omechnotz para nenquipiasquej nemilistli ne campa yejhua tlamandarohua niman oncaj hueyilistli.

¹³ Niman no ticmacatoquej tlaxtlahuijli Dios pampa ijcuac nemejhuamej onenquiselijquej itlajtol yejhuan tejhuamej otomechmachtijquej, onenquiselijquej quen itlajtol niman xquen itlajtol yacaj tlacatl. Niman melahuac yejhua itlajtol Dios. Niman on itlajtol tequiti nemohuan yejhuan nentlaneltocaj. ¹⁴ Nocnihuan, on tlen onochiu impan on tlaneltocaquej itech Dios ne Judea yejhuan teconehuan itech Cristo Jesús, no ijqui onochiu nemohuan. Omechtlahuelitaquej niman omechtajyohuiltijquej yejhuan on nemochanejcahuan sa no ijqui quen on iconehuan Dios ne Judea otajyohuijquej intech on inchanejcahuan hebreos. ¹⁵ Yejhuan on hebreos oquimictijquej toTeco Jesús niman on tiotlajtojquej. On hebreos otechtotocaquej, niman yejhuan xquipactiaj Dios. Nemij quen tlahuelicniutin intech nochimej tlacamej. ¹⁶ Techteltiaj tiquinnojnotzasquej on yejhuan xhebreos para yejhuan no ma nomaquixtican. Ijcon quen nochipa quichi-huaj, más quimiyequiliaj intlajtlacol hasta campa xoc hueli. Pero aman ye cuajli on itlahuel Dios impan yohuajlaj.

Pablo ocsejpa quinequi cominnojnotzas on chanequej Tesalónica

* 2:3 nada; coxtla † 2:5 muy ‡ 2:5 nos amen § 2:8 mucho

¹⁷ Nocnihuan, masqui tla xtemechitayaj ijcuac temechtlalcahuiyaj ipan achijtzin tonaltin, tejhuamej nochipa temechpiayaj ipan toyojlo, niman sanoyej ticnequiyaj tiasquej temechontasquej. ¹⁸ Ticnequiyaj tiasquej hasta nejhua, Pablo, más de sejpa oniquejecoj nias. Pero nochipa ijcuac tiasnequiyaj, on diablo xtechcahuiliaya. ¹⁹ Tla ijcon, tej, ¿aquinomej yes on yejhuan inca ticpiasquej totlamachalis, topaquilis niman tocoronas yejhuan techyolpactis, tla xsa no nemejhuamej? Melahuac nentopaquilis yesquej ijcuac toTeco huajnocuepas, niman ijcuac titoteitisquej ixpan. ²⁰ Quemaj on melahuac ica nemejhuamej nentohueyilis yesquej niman nentopaquilis yesquej.

3

¹ Quemaj pampa xoc ohuel oticxicojquej más, otictlalijquej toyojlo para toseltimej titocahuasquej nican Atenas, ² niman quemaj otictitlanquej nemotech Timoteo. Yejhua tocniu niman itequitcau Dios para temachtia on cuajli tlajtojli itech ica Cristo. Otictitlanquej nemotech para omechyoichicahuato niman omechyolehuato ipan nemotlaneltoc, ³ para ma ca yacaj notzinquixtis ipampa on tlajyohuilstli. Sa no nemejhuamej nenquimatztoquej ica oncaj tiquijyohuisquej yejhua in tlajtlamach*. ⁴ Ijcuac oc† nemohuan tinemiyaj, otemechijlijquej ica ticpiasquej on tlen tepajsolohuilstli tecocoj, niman ijqui onochiu quen nenquimatztoquej. ⁵ Yejhua ica, ijcuac nejhua xonihuel más onicxicoj, onitlatitlan para onicmat quen ijqui nennemij ipan nemotlaneltoc. Ninomojtiaya nicmatis ica on diablo yomechtlatlatac, niman totequiu sanencaj oticchijquej.

⁶ Pero aman Timoteo yohuajnocuepato ne nemotech, niman techajcilia cuajli tlajtojli ican nemotlaneltoc niman nemotlajsojtlalis‡ yejhuan nemejhuamej nenquipiaj. Otechijlij ica nochipa nentechelnamiquij ican pactli, niman ica sanoyej§ nenquinequij para nentechitasquej sa no ijqui quen tejhuamej. ⁷ Yejhua ica, nocnihuan, masqui oticpixquej tlajyohuilstli niman on pajsolohuilstli tecocoj, oticpixquej miyec teyoltlalijli ijcuac oticmatquej ica nemejhuamej cuajli nenyahuij ican nemotlaneltoc. ⁸ Aman quen onen-techyolitijquej ijcuac oticmatquej ica nemejhuamej cuajli nennemij itech toTeco. ⁹ Pampa onentechmacaquej miyec paquilstli ixpan Dios, ¿hasta quen ijqui, tej, tihuelisquej ticmacasquej miyec tlaxlahujli toDios nemopampa? ¹⁰ Ican tonajli niman yehuajli tictlajtlaniliaj Dios ma techcahuili titosentlalisquej para titotasquej ocsejpa, niman ticajxitisquej tlinon oc polihui ipan nemotlaneltoc. ¹¹ Ma sa no yejhua Dios toTajzin niman toTeco Jesucristo ma techpalehui para tihuelisquej tiasquej temechontasquej. ¹² Niman ma toTeco mechyoichicahua para más nenquimiyequilibusquej on tetlajsojtlalistli ihuan ocsequimej niman para nochimej tlacamej, ijcon quen tejhuamej temechtlajsojtlaj. ¹³ Ma toTeco Jesús ma mechyoilmelajcapia, niman ma mechchipahua para ma ca nenquipiasquej ijtlacohualistli ixpan Dios toTajzin ijcuac huajlas toTeco Jesús ihuan iyolchipajcahuan tlaneltocaquej.

4

Nemilistli yejhuan quipactia Dios

¹ Sa yejhua in, nocnihuan, sanoyej temechtlajtlaniliaj niman temechnojnotzaj yejhua ica in ican itocatzin toTeco Jesús, ica sa no ijqui quen tejhuamej otemechitijquej nemejhuamej para nenquipactisquej Dios,

* 3:3 cosas † 3:4 todavía; sanquen ‡ 3:6 su amor § 3:6 mucho

nochipa ijqui xchihuacan más. ² Nemejhuamej nenquimatztoquej on tlanahuatiltin yejhuan otomechmacaquej ican itlanahuatil toTeco Jesús. ³ Dios quinequi xmochipahuacan niman ma ca xahuilnemican. ⁴ Yej cada se ma quimati quen ijqui quipias isihuau ican chipahualistli niman ican tetlacaitalistli. ⁵ Niman ma ca quipias ican on elehuilistli* de telpocamej nion ican on xcuajli nequilibristli ijcon quen quichihuaj on tlacamej yejhuan xquixmatij Dios. ⁶ Ma ca yacaj ixcoejehuas niman quichihuas on tlen xcuajli itech icniu, pampa nochia ica on toTeco mechcastigaros chicahuac, ijcon quen tejhuamej yotemechijlijcaj. ⁷ Dios, tej, xotechnotz para ticchihuasquej on tlen xchipahuac, yej para ticchihuasquej on tlen chipahuac. ⁸ Ijcon, tej, yejhuan xquiselia in cuajli temachtilistli xquiselia yacaj ocse tlacatl, yej sa no Dios yejhuan techmaca Espíritu Santo.

⁹ Para temechtlajcuihuisquej más yejhua ica on quen ijqui nemotlajsojtlasquej† quen icniutin itech Cristo, xoc nonequi, pampa Dios cuajli yomechmachtij. ¹⁰ Niman melahuac nenquintlajsojtlaj nochimej on tocniuhan yejhuan chantij nochihuiyan ne Macedonia. Pero sanoyej‡ temechtlajtlanilaj, nocnihuan, ica nemotlajsojtlalis más ma miyequiya. ¹¹ Xchihuacan canica para nennemisquej ican yolsehuilistli. Ma ca nemocalactisquej campa nemejhuamej xmechtocarohua, niman ma ca xtlatzijquej, yej xtequitican ican nemomahuan ijcon quen tejhuamej otomechmachtijquej. ¹² Ijcon xchihuacan para mechtlacaitasquej on yejhuan xtlaneltocaj niman para ma ca yacaj nenquitlajtlanilisquej itlaj ica mechpalehuis.

Ocsejpa huajlas toTeco

¹³ Nocnihuan, ticnequij xmatican tlinon impan nochihua on mimiquej para ma ca xmajmanacan quen ocsequimej yejhuan xquipiaj tlamachalistli. ¹⁴ Ticneltocaj ica Jesús omic niman onoyolihuitij§ niman onoquetzteu. Yejhua ica, tej, ticneltocaj ica Dios quinhuicas ihuan Jesús on tlaneltoquej yejhuan yomiquej ijcuac huajlas ocsejpa. ¹⁵ Yejhua ica nemejhuamej temechijliaj ican itlajtol toTeco ica tejhuamej yejhuan titocahuasquej ican tonemilis hasta ijcuac huajlas toTeco, xachtoj techhuicas de on yejhuan yomiquej. ¹⁶ Sa no toTeco huajtemos ne ilhuicac ican tlajtojli de tequihuajquetl, ican itlajtol on ilhuicactequitquetl* yejhuan yecatzticaj, niman ican itrompeta Dios. Ijcuacon on tlaneltoquej yejhuan yomiquej, Cristo achtopa yejhuan quinyolihuitis niman quinquetztehuas. ¹⁷ Quemaj yejhuan titocahuasquej ican tonemilis techhuicas inhuan yejhuan ne ipan moxtli para ticonnamiquisquej toTeco ne ipan ajacatl. Ijcon tinemisquej ihuan toTeco para nochipa. ¹⁸ Yejhua ica, tej, xmoyoltlalican sequimej ihuan ocsequimej ica in tlajtojli.

5

¹ Nocnihuan, xnonequi temechijcuilohuilisquej ica on ijcuac huajlas toTeco, nion ica on tlen achtoj nochihuas ijcuac yejhua huajlas. ² Nemejhuamej cuajli nenquimatztoquej ica on tonajli ijcuac ilhui yes toTeco, yejcos ijcuac xacaj quimachixticaj, ijcon quen on tlachtequetl huajlau ijcuac tlayohua. ³ Ijcuac on tlacamej quiptoxtiasquej: “Oncaj yolsehuilistli niman xoncay on tlen techmictis”, nimantzin huajlas tlaxoxotonilistli impan yejhuan niman xhuelis yejtehuasquej. Nochihuas quen nochihua ijcuac on tlen tecoco nimantzin huajlau ipan on sihuatl

* 4:5 deseos † 4:9 amarse ‡ 4:10 mucho § 4:14 resucitó; onoyolitij * 4:16 ángel: Angeles tequitij ne ilhuicac niman nican ipan in tlalticpactli.

yejhuan quinemitia iconetzin. ⁴ Pero nemejhuamej, nocnihuan, xnennemij ipan tlayehuajlotl. Yejhua ica on tonajli ijcuac ilhuiu yes toTeco xhuelis mechmojcatlachaltis quen yacaj tlachtequetl, ⁵ pampa nochimej nemejhuamej nenteconehuan ipan tlahuajli niman tonajli. Nemejhuamej xnenteconehuan ipan tlayohua nion ipan tlayehuajlotl. ⁶ Yejhua ica, tej, ma ca ma ticochican quen ocsequimej, yej ma titlajtlachixtiacan ican cuajli totlamachilis. ⁷ Yejhuan cochi, cochi ijcuac tlayohua, niman yejhuan tlahuani, quen tlahuanticaj ijcuac tlayohua. ⁸ Pero tejhuamej yejhuan titeconehuan ipan tonajli, ica oncaj ma nochipa tinemican ican cuajli totlamachilis. Ma titotzacuicilan ican totlaneltoc niman totetlajsojtlalis* ijcon quen on soldado notzacuilia iyelpan ican se escudo. Niman no ma ticpiacan tlamachalistli† de temaquixtilistli sa no ijqui quen on casco yejhuan ica quitzacuilia itzontecon se soldado. ⁹ Ijquin ma ticchihuacan, pampa Dios xotechtlalij para ticselisquej itlahuel, yej para ticselisquej temaquixtilistli itechcopa toTeco Jesucristo. ¹⁰ Jesucristo topampa omic para san secan ihuan tinemisquej, san quen ijqui tla tiyolihuitiasquej noso tla timictiasquej ijcuac huajlas. ¹¹ Yejhua ica, xmoyolehuacan se ihuan ocse, niman xmoyolchicahuacan ican tlaneltoctli ihuan ocsequimej ijqui quen nenquichijtoquej.

Pablo quintlacanonotza on tocnihuan itech Cristo

¹² Nocnihuan, sanoyej temechtlajtlaniliaj xquimpialican tetlacaitalistli on yejhuan tequitij nemotzajlan, yejhuan mechycanaj niman mechmelajcatlaliaj, pampa yejhamej quipiaj tlanahuatijli itech toTeco. ¹³ Xquintlacamatican niman xquintlajsojtlacan‡ sanoyej ipampa on tequitl yejhuan quichihuaj. Xnemican ican yolsehuilistli sequimej ihuan ocsequimej.

¹⁴ No ijqui sanoyej temechtlajtlaniliaj, nocnihuan, ica xquinchicajcanotza-can on yejhuan xquinequij tequitisquej; xquinyolehuacan on yejhuan notzinquixtiaj; xquimpalehuican on yejhuan xcojtiquej ipan intlaneltoc, niman xpiacan iyoahuilistli inhuan nochimej. ¹⁵ Xmotacan sa no nemejhuamej. Ma ca yacaj quicuepilis ican tlen xcujli itech on tlen xcujli, yej nochipa xchihuacan on tlen cuajli para on tocnihuan niman para nochitlacatl.

¹⁶ Nochipa xnemican ican paquilstli. ¹⁷ Nochipa xchihuacan oración. ¹⁸ Ican nochitlen nochihuas, xmacacan tlaxtlahuijli Dios, pampa yejhua ijqui quinequi para xchihuacan nemejhuamej yejhuan nenquineltocaj Cristo Jesús.

¹⁹ Ma ca xsehuican on itliu on Espíritu Santo. ²⁰ Niman ma ca xquintlachichihuilican on yejhuan quiteijliaj on tiotlajtojli yejhuan quiseliaj itech Dios. ²¹ Pero xquixtlalocan nochit, niman xquejehuacan nochit tlen cuajli.

²² Niman xtlalcahuican nochit tlajtlamach§ tlen xcujli. ²³ Sa no Dios, on yejhuan mechmaca yolsehuilistli, ma mechylchipahua nemejhuamej nochit cuajli. Niman ma mechejehuili nemoespíritu, nemoalma niman nemotlancayo para xquipias ijtlacohualistli ijcuac huajlas toTeco Jesucristo. ²⁴ On yejhuan omechnotz quichihuas nochit yejhua in, pampa yejhua nochipa quichihua on tlen yejhua quimelajcrajtohua.

²⁵ Nocnihuan, xchihuacan oración topampa.

²⁶ Xquintlajpalocan nochimej tocnihuan ican hueyi tetlajsojtlalistli*.

* **5:8** nuestro amor † **5:8** esperanza ‡ **5:13** ámenlos § **5:22** cosas * **5:26** Ipan griego
quiijtohua: “ican yectli tlatencualistli.” Tlatencualistli quitosnequi beso.

²⁷ Nemechnahuatia ican itlanahuatil toTeco ma quinomachtican yejhua in tlajcuilolamatl ixpan nochimej tocnihuan.

²⁸ Ma itlatiochihualis toTeco Jesucristo onya nemotech. Ma ijqui nochihua.

2 TESALONICENSES

ICA OME ITLAJCUIOL ON APÓSTOL SAN PABLO PARA ON TESALONICENSES

Pablo niman itequipanoj caxihuan quintlajcuilhuiyaj on tlaneltocaquej ne Tesalónica

¹ Nejhua, Pablo, ihuan Silvano niman Timoteo, niquijcuilohua yejhua in tlajcuilolamatl para on tocniuhan ne ipan on tiopan yejhuan oncaj ipan on hueyican Tesalónica. Niquijcuilohua in tlajcuilolamatl para on yejhuan nemij itech Dios toTajzin niman toTeco Jesucristo. ² Ma Dios toTajzin niman toTeco Jesucristo ma mechmacacan hueyi tlatiochihualistli niman yolsehuilistli.

Dios quintlaxtlahuilis on tlajtlacolejquej ijcuac Cristo huajlas

³ Nocnihuan, nonequi nochipa ticmacasquej tlaxtlahuijli Dios nemopampa. Yejhua in cuajli para ticchihuasquej, pampa nemotlaneltoc más noscaltijtiu, niman on tetlajsojtlistli* yejhuan cada se nenquipiaj inhuan ocsequimej más hueyixtiu. ⁴ Yejhua ica, sa no tejhuamej titenojnotzaj de nemejhuamej ican paquillistli nochihuiyan ipan on itiopanhuan Dios. Ticteijliaj on ijyohuclistli niman tlaneltoctli yejhuan nemejhuamej nenquiteititiaj intzalan on tetlahuelitistli niman tlajtlamach tlajyohuclistli.

⁵ Yejhua in mechititia ica Dios nochipa quichihua tlen cuajli, pampa itechcopia on tlajyohuclistli nemochipahuaj para huelis nencalaquisquej ne campa Dios tlamandarohua. ⁶ Dios yolmelajqui niman quimati quen ijqui cuajli para quintlajyohuilitis on yejhuan mechtlajyohuilitiaj. ⁷ Niman Dios no quimati quen ijqui cuajli para mechmacas nesehuijli nemejhuamej yejhuan nentlajyohuijtoquej ijcon quen tejhuamej techmacas. Niman in nochihuas ijcuac ajsis on tonajli ica toTeco Jesús huajnonextis ne ilhuicac itlajcotian tliltihuan ipoderosos ilhuicactequitquej†. ⁸ Huajlas para quinhuajcastigaros on yejhuan xquixmatij Dios niman on yejhuan xquitlacamatij on temachtijli itech ica toTeco Jesucristo yejhuan quitemaca temaquixtilistli. ⁹ Yejhhuamej quinCASTIGAROSQUEJ ican xoxotonilistli para nochipa, niman huejca cominxiniskej de itech toTeco, niman ihueyilis niman ipoder. ¹⁰ Ijcon nochihuas ijcuac toTeco huajlas ipan on tonajli para quihueyilisquej on iyaxcahuan‡ Dios, niman no ijcuac on yejhuan oquineltocaquej Jesucristo paquillistlachasquej yejhua itech. No ijqui nemejhuamej nennemisquej inhuan pampa onenquineltocaquej toteixpantilis.

¹¹ Yejhua ica in nochipa ticchihuaj oración nemopampa. Tictlajtlaniliaj toDios ma mechchipahua ijcon quen omechnotz, niman ican ipoder ma quichihua nochitlen cuajli ijcon quen onenquitlalijquej nemoyojlo itech. No ijqui tictlajtlaniliaj para ican ipoder ma cuajli tlami nemotequiu yejhuan nenquichihua pampa nentlaneltocaj. ¹² Ijquin, tej, itocatzin toTeco Jesucristo quiselis hueyilistli nemopampa, niman yejhua no mechhueyilis ican iteicnelilis§ toDios niman toTeco Jesucristo.

2

Nopantlantis on tlajtlacoltlacatl

* **1:3** amor † **1:7** ángeles: Angeles tequitij ne ilhuicac niman nican ipan in tlalticpactli. ‡ **1:10**
le pertenecen; iaxcahuan, ihuaxcahuan, itlatquihuan § **1:12** su misericordia

¹ Aman, nocnihuan, temechijlisquej yejhua ica on ijcuac huajlas Jesucristo niman techsentlalis itech. Sanoyej* temechtlajtlaniliaj ² ma ca nimantzin nenometlamatisquej. Ma ca yacaj nemocahuilisquej mechtلامachilispolos yejhua ica on tlajtojli yejhuan quijtos ica on tonajli ijcuac ilhui toTeco yopanoc. Ma ca nentlamachilispolihuisquej tla saman yacaj omechijlij in ican se tiotlajtojli yejhuan quitenehua quiselia itech Dios, noso ican temachtilistli, noso tla saman yacaj mechijlis ica in tejhuamej otiquicuilojquej ipan se tlajcuilolamatl. ³ Ma ca yacaj xmocahuilican itlaj ica mechcajgayahuas, pampa achtopa ijcuac xe ajsi on tonajli ica oncaj achtopa miyequej sanoyej xtetlacamatquej yesquej itech Dios, niman ijcuac nonextis on tlajtlacoltlacatl yejhuan quitlajtlacolmacasquej para quiselis xoxotonilistli. ⁴ Yejhua quixnamquis niman noquetztehuas para ipan nochi yejhuan quipia itocatzin Dios noso on tlen on tlacamej quimahuistiliaj. Niman ijqui onotlalis ipan itiopian Dios quen melahuac yejhua yesquia Dios, niman sa no yejhua notenehuas Dios.

⁵ ¿Xnenquenamiquij ica ijcuac oc† ninemiya nemohuan nemechijliaya nochi yejhua in? ⁶ Niman aman nenquimatzoquej tlinon quiteltia on tlajtlacoltlacatl para ma ca huajlas más saniman ijcuac xe ajsi on tonajli cuajli para yejhua. ⁷ Amantzin on xtetlacamatlistli ye tequiti san ichtaca‡. Pero on yejhuan aman quiteltijticaj on xtetlacamatlistli san polihui quejcuaniisquej iyecapan. ⁸ Niman quemaj huajnonextis on tlajtlacoltlacatl, niman toTeco Jesús quimictis ican ijyo yejhuan quisa ipan icamac, niman quioxoxotonis ican ipepetlacalis ijcuac huajlas. ⁹ Yejcos on tlajtlacoltlacatl ihuan ipoder Satanás. Niman yejcos ican nochi poder, niman tlamajhuisoltin, niman milagros yejhuan tecajcayahuaj. ¹⁰ Quiteititis miyec tlajtlamach§ yejhuan xcuajli para yejhua ica quincajcayahuas on yejhuan yahuij ipan xoxotonilistli. Yejhuan xoxotonisquej pampa xoquiselijquej on tlen melahuac para nomaquixtisquej. ¹¹ Yejhua ica in, Dios quincahuilia ma nocajcayahuacan ica on tlacajcayahualistli para ma quineltocacan on tlen xmelahuac, ¹² niman para ijqui quintlajtlacolmacasquej nochimej on yejhuan xotlaneltocaquej ipan on tlen melahuac, yej ocuelitaquej más on tlen xcuajli.

Nemij tlatlapejpeniltin aquinomej nomaquixtisquej

¹³ Pero nonequi nochipa ticmacasquej tlaxtlahuijli Dios nemopampa, nocnihuan yejhuan toTeco mechtlaſojtla*, pampa Dios omechtlaſejpenij ijcuac nochi quemach otzimpeu. Omechtlaſejpenij para nemomaquixtisquej itechcopa on chipahualistli yejhuan on Espíritu Santo mechmaca, niman ican nemotlaneltoc ipan on tlen melahuac. ¹⁴ Dios omechnotz para nenquipiasquej yejhua in itechcopa on cuajli tlajtojli yejhuan quitemaca temaquixtilistli, yejhuan tejhuamej temechmachtiaj, para no tohuan nenquiselisquej on ihueyilis toTeco Jesucristo.

¹⁵ Yejhua ica, nocnihuan, xmoyolchicahuacan ipan nemotlaneltoc, niman xquejehuacan on temachijli yejhuan otemechijlijquej ijcuac tinemiya nemohuan niman yejhuan otemechtlaſoilmacaquej. ¹⁶ Ma sa no toTeco Jesucristo, niman Dios toTajzin, yejhuan techtlajſojtla niman ican iteicnelilis† otechmacac yolehualistli para nochipa niman se cuajli tlamachalistli‡, ¹⁷ ma mechylehua niman ma mechmelajcatlali para nenquijtosquej niman nenquichihuasquej nochi tlen cuajli.

* **2:1** mucho † **2:5** todavía; sanquen ‡ **2:7** secreto § **2:10** cosas * **2:13** les ama † **2:16** su misericordia ‡ **2:16** esperanza

3*Pablo quitlajtlani oración*

¹ Sa ica nochí, nocnihuan, xchihuacan oración topampa para on itemachtil toTeco nimantzin ma nochayahua, niman ma quiselican ican tetlacaítalistli, ijcon quen onochiu nemotzajlan. ² No xchihuacan oración para ma techmanahui intech on xcuajcualtin tlacamej niman on yejhuan cuejhuelitaj quichihuaj on tlen xcuajli, pampa xnochimej quipiaj tlaneltoctli.

³ Pero toTeco nochipa quichihua tlen quijtohua. Niman yejhua mechyolchicahuas niman mechmanahuis itech on diablo. ⁴ Niman pampa, nemejhuamej niman tejhuamej titlaneltocaj itech toTeco, tictlalaj toyojo nemotech ica nemejhuamej nenquichihuaj niman nenquichijtiasquej on tlen temechnahuatiaj. ⁵ Ma toTeco mechpalehui para más nenquimatisquej on itetlajsojtlalis* Dios niman para nenquipiasquej iiyohuilis Cristo.

Nonequi tequitisquej

⁶ Nocnihuan, temechnahuatiaj ican itocatzin toTeco Jesucristo, para xtalcahuican san aquinon tocniu yejhuan xquinequi tequitis niman yejhuan xnuhuiaca cuajli ihuan on temachtijli yejhuan tejhuamej otomechmacaquej.

⁷ Nemejhuamej nenquimatztoquej quen ijqui nonequi nennemisquej para nenquitucasquej toejemplo. Ijcuac tejhuamej otinenquej nemohuan, otitequitquej. ⁸ Niman xacaj oticualijquej tlaxcajli yejhuan xotictlaxtlahuilijquej. Yej otitequitquej ican tonajli niman yehuajli para nion aquin de nemejhuamej otictequimacaquej. ⁹ Masqui tejhuamej techtocarohuaya para temechtlajtlanilisquej xtechpalehuican, otitequitquej para otomechmacaquej on ejemplo para nenquitucasquej. ¹⁰ Pampa ijcuac nemohuan tinemiay, otomechmacaquej yejhua in tlanahuatiji: “Yejhuan xquinequis tequitis, ma ca ma tlacua.” ¹¹ Aman techijliaj ica sequimej de nemejhuamej xtequitij ipan on tequitl yejhuan para notequipanosquej, pero notequimacaj ica on yejhuan xnonequi para quichihuasquej. ¹² Quenimej tlacamej tiquinnahuatiaj niman tiquinchicajcailiaj ipan itlanahuatil toTeco Jesucristo, ma tequitican ica cuajloticaj para huelis quipiasquej on tlen ica notequipanosquej.

¹³ Nocnihuan, ma ca xsiahuican para nenquichihuasquej on tlen cuajli.

¹⁴ Tla yacaj xquitengaqui yejhua in tlínón tiquijtohuaj ipan in tlajcuilolamatl, xpiacan cuidado aquinon, niman ma ca sa xchihuilican cuenta para ijqui ma pinahua. ¹⁵ Pero ma ca xpiacan quen nemotlahuelicniu, yej xtlacanonotzacan quen yacaj nemocniu.

Sa ica nochí tlatichihualistli

¹⁶ Niman sa no toTeco, yejhuan itech tzimpehua on yolsehuilistli, ma mechmaca yolsehuilistli nochipa niman ican nochí tlen sesetlamantic nochihuas. Ma toTeco nochimej nemohuan ma nemi.

¹⁷ Yejhua in tlajpalohuilistli nejhua, Pablo, nemechtlajcuilhuiya ican noma. Ijquin nemechititia ica melahuac in notlajcuilolamahuan. Ijquin niquijcuilohua.

¹⁸ Ma toTeco Jesucristo mechtióchihua nemochimej† nemejhuamej. Ma ijqui nochihua.

* ^{3:5} su amor † ^{3:18} todos ustedes; nannochti, yemochimej, anochimej, innochimej, emmochimej

1 TIMOTEO

IACHTOJ TLAJCUILOL ON APÓSTOL SAN PABLO

PARA TIMOTEO

Pablo oquitlajcuilhuij Timoteo

¹ Nejhua, Pablo, niiapóstol Jesucristo ican itlanahuatil Dios toTemaquixtijcatzin niman toTeco Jesucristo yejhuan totlamachalis*. ² Nimitztlajcuilhuia in tlajcuilolamatl, Timoteo, notlajsojcaconetzin itech Jesucristo. Ma Dios toTajtzin niman Cristo Jesús toTeco ma mitzmacacan intlatiochihualis niman inteicnelilis† niman inyolsehuilis.

Pablo otlajtlatoj ica on xcuajcualtin temachtijke

³ Nicnequi xmocahua ne Efeso sa no ijqui quen onimitznhauati ijcuac nejhua oniaj ne Macedonia. Xmocahua niman xquinnahuati on tla-camej yejhuan temachtiaj on tlaixcajcayaqui temachtijli ma ca más ma quitemachtican. ⁴ Xquinnahuati ma ca más ma quicacquican on tlajtoltint‡ yejhuan quixnamiqui on tlen melahuac niman intech on tocayomej de yejhuamej on achtojtajtatin. Yejhua in xtechpalehuiya ticchihuaj itequiu Dios yejhuan ticchihuaj itechcopa totlaneltoc, yej san ica nocamahuijsquilo.

⁵ Ijquin xquinnahuati para yejhuamej ma notlajsojtlacan§ se ihuan osequimej ican se tetlajsojtlalistli yejhuan pehua itech on yolchipahualistli, niman se tlamaclistli yejhuan xtetlajtlacolmaca niman tlaneltocalistli yejhuan melahuac. ⁶ Sequimej onejcuaniqquej itech on tetlajsojtlalistli niman opeu tlajtlajtohuaj tlajtlamach* yejhuan xtepalehui. ⁷ Yejhuamej quinequij temachtijke yesquej ican itlanahuatil Moisés, masqui yejhuamej xcajsicamatij tlinon quijtohuaj, nion tlinon quitemachtiaj xican pinahualistli.

⁸ Ticmatztoquej ica on tlanahuatijli cuajli tla se quitequitiltia quen Dios quinequi para notequitiltis. ⁹ No ticmatztoquej ica nion se tlanahuatijli xonijcuiloj para yejhuan cuajli tlacatl. On tlanahuatijli oncaj para on xompayejyejhuamej niman yejhuan xtetlacamatij, niman on xcuajcualtin tlacamej, niman on tlajtlacolejquej, niman on yejhuan xyolchipajquej, niman on yejhuan xquitlacaitaj Dios nion itlanahuatil, niman on yejhuan quimictia itaj noso inan, niman nochimej on temictijquej. ¹⁰ No ijqui on tlanahuatijli oncaj para on yejhuan ahuinmij, niman on tlacamej yejhuan quinelehuaj tlacamej noso on sihuamej yejhuan quinelelehuaj sihuamej, niman on yejhuan quimichtequij tlacamej, niman on yejhuan xquijtohuaj on tlen melahuac, niman para on yejhuan xcuajli teixpantiliaj. Niman on tlanahuatijli no oncaj para nochí on yejhuan xquinequi nohuicas ipan on yectiticaj temachtijli. ¹¹ Yejhua in yectiticaj temachtijli cuajli nohuica ihuan on temachtijli ica temaquixtilistli yejhuan Dios tlatiochijquetl onechmactilij para nicteijlis.

Pablo quipia tlajsojcamachilistli ipampa iteicnelilis Dios

¹² Nicmaca tlaxtlahujli toTeco Jesucristo yejhuan onechmacac poder, pampa yejhua onechititij ica quitlalia iyojlo notech ijcuac onechtalajlij ipan

* **1:1** nuestra esperanza † **1:2** su misericordia ‡ **1:4** cuentos, leyendas § **1:5** que se amen

* **1:6** cosas

iteequiu. ¹³ Masqui nejhua achtopa nicuijhuicaltiaya Dios, niman nictlahueli-taya niman nictlajyohuiltyaya niman nicpijpinajtiaya, yejhua sanoyej† onechicnelij‡, pampa nejhua xe nitlaneltocaya niman xnicmactiya tlinon nicchihuaya. ¹⁴ Yejhua ica toTeco sanoyej onechicnelij niman onechmacac tlaneltoctli niman tetlajsojtlalistli§, yejhuan ticpiaj pampa tinemij san secan ihuan Cristo Jesús. ¹⁵ Yejhua in tlajtojli sanoyej melahuac niman cuajli para nochimej quineltocasquej, ica Cristo Jesús ohuajlaj ipan in tlalticpactli para oquinmaquixtico on tlajtlacolejquej. Nejhua, tej, más nihueyi tlajtlacolej xquen nochimej tlajtlacolejquej. ¹⁶ Yejhua ica Dios onechicnelij, nejhua yejhuan más nihueyi tlajtlacolej, para Jesucristo ohuel oquiteititij nochi iyohuilis. Ijcon, tej, nejhua niejemplo para yejhuan quinel-tocasquej Jesucristo niman quipiasquej nemilistli para nochipa. ¹⁷ Yejhua ica, ma ticmacacan nochi on tetlacaatalistli niman hueyilistli para nochipa on tohueyiRey yejhuan nemi nochipa, yejhuan xqueman miquis, yejhuan xhueli tiquitaj, yejhuan san yejhua Dios niman nochi quimati. Ma ijqui nochihuua.

¹⁸ Aman noconiu Timoteo, nimitztlactitia para xchihua canica para tict-lanis on tlen xcuajli ican motlaneltoc, niman ican se tlamachilistli yejhuan xmitztlajtlacolmacas. Yejhua in tlanahuatiji cuajli nohuica ihuan on tlen on tiotlajtojquej oquijtojquej ica tejhua ijcuac omitznojnotzquej ican ito-catzin Dios. ¹⁹ Xquejehua motlaneltoc niman no xquejehua motlamachilis para ma ca mitztlajtlacolmacas. Sequimej xoquichihuilijquej cuenta itech intlamachilis ijcuac oquintlajtlacolmacac niman yejhua ica oquipolojquej intlaneltoc. ²⁰ Ijcon ipan onochiu Himeneo niman Alejandro. Niman yejhuan oniquintemacac itech Satanás para ma ca más ma cuijhuicaltican Dios ica intlajtol.

2

Temachtilistli ica oración

¹ Achtopa sanoyej* nemechtlatlania xtlajtlanilican Dios on tlen polihui, xchihuacan oración, tepampa xchihuacan oraciones, niman xmacacan tlaxt-lahuijli Dios para nochi tlacatl. ² Xchihuacan oraciones impampa on yejhuan reyes niman nochimej on yejhuan tequihuajquej, para ma ca ticpiasquej tlapajsolohualistli, yej ma onya yolsehuilistli. Ijcon, tej, tihuelisquej titohuicasquej cuajli quen Dios nohuica niman para ijcon ocsequimej huelisquej techtlacaitasquej ica on tlen cuajli ticchihuaj. ³ In yejhua cuajli niman cuelita Dios toTemaquixtijcatzin, ⁴ yejhuan quinequi nochi tlacatl ma maquisa niman ma quimati on tlen melahuac. ⁵ San se nemi Dios, niman no san se nemi yejhuan impampa tlajtohua on tlacamej itech Dios. On tlacatl itoca Jesucristo. ⁶ Yejhua ica onotemacac ma quimictican para ijcon oquitlaxtlau on castigo de tlajtlacolli niman ijqui oquimaquixtij nochi tlacatl. Ijcuac cuajli oajsic on tonajli, Jesús omic para oquipanextij ica Dios quinequi nochi tlacatl ma maquisa. ⁷ Para yejhua in Cristo Jesús onechtequitiltij quen itenojnotzcau, niman iapóstol niman temachtijquetl ne intech on yejhuan xhebreos para niquinmachtis ica on tlaneltoctli niman on tlen melahuac. Nejhua niquijtohua tlen melahuac itech Cristo niman xnitecajgayahua.

⁸ Yejhua ica nicnequi nochihuiyan on tlacamej ma quetztehuacan in-mahuan ican chipahuac inyojlo niman ma quichihuacan oración. Ma ca ma

† **1:13** mucha ‡ **1:13** tuvo misericordia de mí § **1:14** amor * **2:1** muchas

quichihuacan oración ijcuac tlahuantoquej nion itlaj ocse yejhuan xcuajli ma quinotenehuilican.

⁹ No ijqui nicnequi on sihuamej ma notlaquentican cuajli quen nonequi. Ma ca ma texxicoltican. Ma ca sanoyej ma cuauxtican intzon. Ma ca notlajmachyotican† ican oro nion ican perlas, nion ma ca ma quitlalican tlaquentli yejhuan sanoyej patioj. ¹⁰ Yej ma quichihuacan cuajli tequitl quen on sihuamej yejhuan quitenehuaj quitlacaitaj Dios. ¹¹ On sihuamej ijcuac caquisquej on temachtijli, ma ca ma nahuatican, yej san ma tlacaquican ican yolyemanilistli. ¹² Niman xnicalhuilia on sihuatl ma quimachti nion ma quimandaro tlacatl, yej ma ca ma nahuati, ¹³ pampa Dios achtopa oquichijchiu Adán niman quemaj Eva. ¹⁴ Niman on diablo xocajcayau Adán, yej ocajcayau Eva, niman yejhua ohuetz ipan tlajtlacojli. ¹⁵ Pero on sihuatl nomaquixtis ijcuac quinemitis iconehuan, tla nochipa tlaneltocatias, niman tetlajsojtlas‡, niman tla quipias yolchipahualistli, niman quiteltis ielehuilis§.

3

On yejhuan quinequij tlayecanquej yesquej ixpan Dios

¹ Yehua in sanoyej* melahuac, tla se quinequi tequitis quen tlayecanquetl intech iconehuan Dios, sanoyej cuajli tequitl quinequi quichihuas. ² Pero yej quemaj on yejhuan quinequis tlayecanas intech iconehuan Dios ica oncaj cuajli nohuicas para ma ca itlaj ica quijixcomacasquej†, san se isihuau ma quipia, cuajli ma nohuica, ma quitelti ielehuilis‡, ma cuajli nohuica para quipialisquej tetlacaitalistli, cuajli ma teseli ichan niman ma cuajli temachti. ³ No ijqui ma ca ma tlahuani, nion quitejtemojtinemis tlahuejli, nion quixpachos tetomin. Pero yej quemaj yejhua ma tenotzqui niman ma yolyemanqui, niman ma ca sanoyej quelehuis tomin. ⁴ Ma cuajli quimati quen ijqui quiyecanas ichan, niman ma quichhua para iconehuan ma quitlacamatican niman ma quitlacaitacan. ⁵ Tla se xquimati quen ijqui quiyecanas ichanchanejcahuans§ ¿quen ijqui huelis quinyecanas iconehuan Dios? ⁶ Xcuajli para tlayecanquetl yes on yejhuan quemach tlaneltoca, pampa huelis nohueyimatis. Niman, tla ijcon quichihuas, Dios quitlajtla-colmacas niman quicastigaros quen oquichihuilij on diablo. ⁷ No ijqui ma notlacaite intech on yejhuan xtlaneltocaj para ma ca nopijpinajtis niman onhuetzis ipan imahuan on diablo.

Quen nonequi nemisquej on diáconos ipan itiopan Dios

⁸ No ijqui on diáconos ipan itiopan Dios, ma nemican quen on yejhuan huelis quintlacaitasquej, niman ma nochipa quijtocan on tlen melahuac. Ma ca tlahuaniisquej, nion quinequis tomin yejhuan san quitecuilisquej. ⁹ Ica oncaj quejehuasquej on tlen melahuac yejhuan Dios oquipanextij. Ma quejehuacan cuajli para ma ca quintlajtlacolmacas on intlamachilis. ¹⁰ Achtopa ma quintlatlatacan, niman tla xoquichijquej on tlen xcuajli, cuajli para yejhuan no diáconos yesquej itech Dios.

¹¹ On sihuamej diaconisas itech Dios no ma sihuamej yejhuan huelis quintlacaitasquej, niman ma ca ma chacuamej. Ma cuajli noyecanacan, niman ma nohuicacan cuajli ipan nochli para huelis quintlalisquej inyojo intech.

¹² Sen tlacatl diácono itech Dios, san itech se sihuatl tehuehuentzin yes, niman no cuajli quinyecanas iconehuan niman ichan. ¹³ On diáconos itech

† 2:9 que se adornen ‡ 2:15 amor § 2:15 deseos de ella * 3:1 muy † 3:2 le reprocharán

‡ 3:2 deseos de él § 3:5 su familia

Dios yejhuan cuajli quichihuaj intequiu, quitlanij tetlacaitalistli niman no más noyolchicajtihui para tenojnotzaj xican pinahualistli itech Cristo Jesús.

On tlen hueyi quipia totlaneltoc

¹⁴ Niccha para saniman nias nimitzontas, pero achtoj nimitztlajcuilohuia yejhua in ¹⁵ para, tla saman ninohuejcahuas, yejhua in tlajcuilojli mitzititia quen ijqui nonequi se nohuicas ipan ichan Dios. Yejhua on ichan Dios quijtosnequi on yejhuan tlaneltocaj itech Dios yejhuan melahuac yolticaj. Niman yejhuatej quejehuaj niman quimanahuiyaj on tlen melahuac.

¹⁶ Nochimej quimatiij ica on tlen oticnextijquej ican totlaneltoc sanoyej hueyi quijtosnequi:

Dios ohuajlaj quen se tlacatl; on iEspíritu Santo oquipantlantij ica yejhua chipahuac. On ilhuicactequitquej* oquitaquej. Onotemachiltij ipan tlalticpactli. On tlacamej oquineltocaquej nochihuiyan ipan in tlalticpactli. Niman quemaj ocuicaquej ne ilhuicac.

4

On yejhuan quitlalcahuisquej on tlaneltoctli

¹ Pero on Espíritu Santo quimelajcajtohua ica ijcuac sa itlajtlancan yes in tonaltin, sequimej noxelosquej itech on tlaneltoctli. No ijqui quintlacamatisquej on tlacajcayaquej espíritus niman on temachttiltin yejhuan hualehuaj intech on xcuajcualtin espíritus. ² On yejhuan noxelohuaj quincaquisquej on tlacamej yejhuan omexayacyequej niman tlacajcayaquej. On tlacajcayaquej xoc noyolijmatisquej ijcuac tlamach xcuajli quichihuasquej, pampa intlamachilis yotepetlatiac niman ijcon xoc hueli noyolcocohuaj. ³ On tlacajcayaquej temachtisquej ica xcuajli nonamictilos, niman ica xcuajli nocuas sequi tlacuajli, masqui Dios nochi oquichijchiu para on yejhuan tlaneltocaj niman yoquixmatquej on tlen melahuac quiselisquej ican tlaxtlahuijli. ⁴ Ijcon, tej, nochi tlen Dios oquichijchiu nochi cuajli. Niman xtechtocarohua xticselisquej, yej ticselisquej ican tlaxtlahuijli, ⁵ pampa ican itlajtol toTajzin niman ican oración nocahua chipahuac.

Sen cuajli tequipanojquetl itech Jesucristo

⁶ Tla tiquintitia on tocnihuan in tlajtlamach*, cuajli titequitqui yes itech Jesucristo, niman timoyolchicahuas ican on tlajtojli yejhua ica on tlaneltoctli niman ican on cuajli temachtilistli yejhuan tictlacamat. ⁷ Ma ca xquintencaqui on xchipahuac cuentos yejhuan xitlaj† quijtosnequi, yej xmomachti sanoyej‡ para cuajli timohuicas itechica Dios ican yolchipahualistli. ⁸ Tla tictlayejeylectia motlalnacayo, achitzin mitzpalehuiya. Pero tla ticchihua on tlen Dios quipactia, mitzpalehuiya nochi ica. Aman techmaca on tlen cuajli, niman no techmacas on tlen cuajli ipan ocse nemilistli. ⁹ Yejhua in tlajtojli sanoyej melahuac, niman cuajli para nochimej quineltocasquej. ¹⁰ In yejhua ica sanoyej titequitij niman tiquijohuiyaj tlahuejli, pampa san se toyojlo yotictlalijquej itech on Dios yejhuan yolticaj, yejhuan nochi tlacatl itemaquixtijcau, niman más para yejhuatej on yejhuan quineltocaj.

¹¹ Yejhua in tlajtlamach ica oncaj tejhua titlanahuatis niman tictemachtis.

¹² Motech ma quitacan on yejhuan tlaneltocaj quen ijqui titlajtlajtohua, quen ijqui timohuica, quen ijqui titetlajsojtla§, quen ijqui titlaneltoca, niman ica monemilis chipahuac para ijcon xhuelis yacaj mitzpijpinahuis pampa san

* **3:16** ángeles: Angeles tequitij ne ilhuicac niman nican ipan in tlalticpactli. * **4:6** cosas † **4:7** nada; coxtla ‡ **4:7** mucho § **4:12** como amas

titelpochtli. ¹³ Chica nejhua naksi, xmomachti itlajtoltzin Dios ne ixpan on tojlamej. Xquinyolehua niman xquinmachti. ¹⁴ Xtequitilti on tetlayocoliltin yejhan oticselij itech Dios ijcuac on tlajtlajmatquej tlayecanquej itech tocniuhan oquitlalijquej inmahuan mopan, niman omitzilijquej on tlen oquimijlij on Espíritu Santo. ¹⁵ Ma ca xmotelti, yej san ica xmocahua ipan in tlajtlamach para ma quitacan nochimej quen ijqui ican nochi tlen cuajli tihueyixtiu. ¹⁶ Cuajli xmixtlalo niman cuajli xquita on tlen tictemachtia. Tejhua no ijqui cuajli ipan xmohuica. Tla ijquin ticchihuas, timomaquixtis niman no tiquinmaquixtis on yejhan mitzcaquisquej.

5

Quen ijqui inhuan titohuicasquej on tlaneltocaquej

¹ Ma ca xcajhua yejhan huehuentzin, yej san xtlacanonotza quen yacaj motaj yesquia. Niman on telpocamej xquinnotza quen mocnihuan. ² On lamajtzitzintin no xquinnojnotza sa no ijqui quen ticchihuasquia ihuan monan niman on ichpocamej no quen mocnihuan yesquiaj ican nochi chipahualistli.

³ Xquintlacaita niman xquimpalehui on sihuacahualtzitzintin* yejhan melahuac quimpolojticaj. ⁴ Pero tla se sihuacahualtzintli quipia iconehuan noso ixhuihuau, ma yejhuamej in teconehtuan quichihuacan para quintequipanosquej intajhuan quen quitocarohua. Ijqui, tej, quitlaxtlahuasquej on tetlajsojtlalistli† yejhan achtopa yejhuamej oquipixquej itech intajhuan ijcuac pipitiquej catca. Yejhua in sanoyej‡ cuajli niman quixpacaita Dios.

⁵ On sihuatl yejhan melahuac cahualtzintli niman yonocau iselti, san quitlalia itlamachalis§ itech Dios. Yejhua quichihua oración niman san yejhua itech quinotlajtlanilijticaj ican tonajli niman yehuajli. ⁶ Pero on sihuacahuajli yejhan nemi para nopactis, yejhua yomic ixpan Dios masqui nemi. ⁷ Ijcon xquinnahuati on tlacamej para ma ca ma onyaj on tlilon ica quimahuasquej. ⁸ Tla yacaj xquintequipanohua on yejhan quen quinta, niman más yejhuamej on yejhan ichanchanejcahuan*, tla ijcon, tej, xquichihua tlen on cuajli tlaneltoctli technahuatia, niman más xcuaajli quichihua xquen yejhua on yejhan xtlaneltoca.

⁹ Sen sihuacahualtzintli tehuan ticpohuas ipan lista san yejhan yocajxitij yepoajli† xipan, niman tla oquipix san sentel ihuehuentzin, ¹⁰ niman tla nochimej cuajli quimatij ica oquichiu miyec cuajli tequitl. In quijtosnequi tla cuajli oquinyecan teconehtuan, tla ne ichan cuajli quinselia on yejhuan xchanejquej, tla quimpalehuiya on yejhuan teyaxcahuan‡ itech Dios ican yolyemanalistli, tla quimpalehuiya on yejhuan tlajyohuiyaj, niman tla quichihua nochi tlen cuajli tequitl. ¹¹ Pero ma ca tictlalis ipan lista on sihuacahualtin yejhan más coconej, pampa tla xquixicohuaj, quitlalcahuiyaj Cristo niman ocsejpa nonamictiaj. ¹² Niman onquisaj tlajtlacolejquej pampa xquichihuaj on tlen oquijtocaj quichihuasquej. ¹³ Yejhuatej pehuaj cajcalactinemij techajchan, niman nocuepaj tlatzijquej, niman chacuamej, niman nochi ica nocalactiaj niman pehuaj tlamach quijitohuaj yejhuan xquito-carohua quijitosquej. ¹⁴ Yejhua ica niquinnequia on sihuacahualtzitzintin yejhuan coconej ma nonamictican, ma tlascaltican, ma cuajli tlachacan in calijtic, niman ma ca ma cahuilican on totlahuelicniu para ma techistlaco.

¹⁵ Sequimej sihuacahualtzitzintin yonoxelojquej, niman quichihuaj tlen

* **5:3** viudas; icnosihuamej † **5:4** amor ‡ **5:4** muy § **5:5** su esperanza * **5:8** su familia
† **5:9** sesenta ‡ **5:10** le pertenecen; teaxcahuan, tehuaxcahuan, tetlatquihuan

xcuajli niman ijqui quitlacamatij on Satanás. ¹⁶ Pero tla saman yacaj yejhuan tlaneltoca tlacatl noso yejhuan sihuatl quipia sihuacahuajli ipan ichan, ma yejhua quitequipano. Ma ca ma impan yetiya nochimej on tlaneltocaquej, para ijcon yejhamej ocsequimej huelisquej quimpalehuisquej yejhuan melahuac xacaj ipan tlacha.

¹⁷ On tlajtlajmatquej yejhuan cuajli tlayecanaj itech on tlaneltocaquej, yejhamej ma quintlacaitacan. Pero ma más quintlacaitacan yejhamej on yejhuan san ica nocahuaj quiteijliaj niman temachtiaj. ¹⁸ Yehua on Yectlajcuilojli quijtohua: “Ma ca xtensalo on huacax ijcuac quiteinia on tlayojli noso on trigo.” No ijqui: “On tequitqui quitocarohua quitlaxtlahuilisquej.”

¹⁹ Ijcuac quiteixpanhuisquej on tlajtlajmatquetl tlayecanqui itech tocni-huan, ma ca xneltoca tlen quijtohuaj tla xnemi ome noso yeyi teixpantili-quetl yejhuan quijtosquej tla melahuac oquichiu on tlen xcuajli. ²⁰ Pero on yejhuan xtlacaquij, yej oc§ tlajtlacohuaj, xquimajhua imixpan nochimej para ijcon on ocsequimej iconehuan Dios ma nomojtican.

²¹ Nimitztlactitia ixpan Dios niman toTeco Jesucristo, niman imixpan on yectitoquej ilhuicactequitquej* tlatlapejpeniltin, xquintlacamati yejhua in tlanahuatiltin. Ma ca san sequimej tiquimpalehuis, nion ma ca yacaj ticchicoitas. ²² Ma ca xcalactijtetzi san aquinon para tlajtlajmatqui yes para ma ca yej no tehuan tictlaxtlahuas on tlajtlacojli de ocse, yej xmejehua chipahuac.

²³ Ijcon quen achi ticualo ipan mojti, ma ca san atl xconi, yej no xconi achijtzin vino.

²⁴ Intlajtlacol sequimej tlacamej nimantzin pa nesi ijcuac xe ajsi on tonajli ijcuac Dios quitlaxtlahuilis ican tlajyohuilistli. Pero intlajtlacol ocsequimej xpa nesi, yej hasta ajsis on tonajli ijcuac Dios quintlaxtlahuilis. ²⁵ No sa no ijqui on tlen cuajli tequitl quichihuaj, quemantica nimantzin pa nesi, niman tla xnimantzin pa nesi, xnochipa iyantias.

6

¹ Yejhamej on yejhuan nemij quen tlanamactin, ma quipiacan miyec tetlacaitalistli itech on inteco para ma ca xcuajli tlajtolos ica Dios, niman itechcopa on totemachtilis. ² Niman tla yejhamej on tlanamactin quipiaj inteco yejhuan tlaneltocaj, ma ca quincahuacan ica quintlacaitacan pampa aman quen icniutin ica on intlanelton. Yej no más cuajli ma quintequichihuilican, pampa on yejhuan quinseliliaj on cuajli intequiu yejhamej tlaneltocaj niman quen tlajsojcaicniutin. Xtemachti niman xtechicajcaili yejhua in.

Xcuajcualtin temachtiltin niman cuajli riquezas

³ Tla yacaj quitemachtia itlaj temachilistli yejhuan xmelahuac, niman xihuan yau on tlen melahuac itemachtil toTeco Jesucristo niman no xihuan yau on tlen chipahuac, ⁴ on yejhua nohueyimatquetl yejhuan xitlaj* quimati. Yej quipia quen xcuajli cualolistli para tehuan quinijixcomaca† tlajtlamach niman notentlani ican tlajtoltin. Niman ipan on itlajtol pehua nexicojli, tlahuejli, tzajtzilistli niman pehua sa mojmojcanemij, ⁵ niman nochipa notlahuelitztinemi intzajlan on tlacamej yejhuan ijtacauqui intlamachilis niman xquimatiq on tlen melahuac. Yejhamej quinemiliaj yejhua in tlaneltocli ica notomintisquej. Xquintlalcahui on quenomej.

§ ^{5:20} todavía; sanquen * ^{5:21} ángeles: Angeles tequitij ne ilhuicac nimn nican ipan in tlalticpactli.
* ^{6:4} nada; coxtla † ^{6:4} reprocha

⁶ Melahuac on tlaneloctli yejhua hueyi riqueza, tla se paqui san ica on quechquitzin quinopialia. ⁷ Tej, xitlaj oticuajquijquej ipan in tlalticpactli, niman ijcuac timiquisquej xitlaj tiquitquisquej. ⁸ Yejhua ica, tej, tla ticpiaj tlen ticuaj niman no ticpiaj totlaquen, ma tipaquican san yejhua ica on. ⁹ Pero yejhuamej on yejhuan quinequij notomintisquej xquixicohuaj on tetlatatalistli yejhuan quintlajcalisnequi ipan tlajtlacojli. Yejhuamej quipiaj miyec xcuajli inelehuis yejhuan quinhuica campa teyolcocoj niman campa xoxotonij. ¹⁰ Pampa ijcuac se quitlalia iyojlo itech on tomin, ompa pehua nochí tlajtlamach[‡] tlen xcuajli. Niman sequimej yejhuan oquelehuijquej tomin, oquelcajquej intlaneltoc, niman aman quipiaj miyec ajmantli ipan innemilis.

On cuajli yolchicahualistli de tlaneloctli

¹¹ Pero tejhua, yejhuan ticuajli tlacatl itech Dios, xtlalcahui nochí on. Yej xpia yolmelahualistli, yolchipahualistli, tlaneltocalistli, tetlajsojtlalistli§, ijyohuillistli niman yolyemanalistli. ¹² Xchihua canica para ticchihuas on tlen technahuatia totlaneltoc. Xmoyaxcati* on nemilistli yejhuan para nochipa, pampa yejhua ica Dios omitznotz, niman cuajli otimotlajtolpanextij ica motlaneltoc imixpan miyequej tlaneltoquej. ¹³ Aman, ixpan Dios yejhuan quimaca nemilistli nochí tlen yolticaj, niman no ixpan Jesucristo, yejhuan sanoyej† cuajli onotlajtolpanextij ica iteixpantilis ixpan Poncio Pilato, ¹⁴ nimitztlatquitia: xtlacamati itlanahuatil Cristo. Ma ca ticpatlas, niman ma ca yacaj ticahuilis ma quitenehuili on tlen xcuajli on itlanahuatil, hasta queman huajlas toTeco Jesucristo. ¹⁵ Ijcuac yejcos on cuajli tonajli, Dios cuajtitlanis Jesucristo. Dios san yejhua iselti hueyi tlanahtijquetl yejhuan tlatiochiquetl, san yejhua Dios yejhuan nochí hueli quichihua, niman yejhua Rey impan nochimej reyes niman inTeco impan nochimej on tetecohuan. ¹⁶ San yejhua xqueman miquis. Yejhua nemi tlahuilpan campa xe yacaj hueli ajsi. Yejhua xe queman yacaj quita niman xqueman hueli quitaj. Yejhua ica, tej, yejhua ma quiseli tetlacaitalistli niman hueyilistli para nochipa. Ma ijqui nochihua.

¹⁷ On yejhuan quipiaj miyec tlajtlamach nican tlalticpac, xquinnahuati ma ca ma nohueyimatican, nion ma quitlalican inyojlo itech on miyec tlen quipiaj, pampa on san panos. Más cuajli tla yej itech Dios quitlalisquej inyojlo. Yejhua yolticaj niman techmacaticaj nochí tlen ica tompanotoquej para cuajli tinemij. ¹⁸ Xtlanahuati ma quichihuacan tlen cuajli, ma nochihuacan ricos ican nochí cuajli tequitl niman ma quipiacan inyojlo para quitemacasquej niman quitexelohuilisquej on tlen quipiaj. ¹⁹ Ijquin, tej, quisentlalijtiasquej miyec tlajtlamach ne ilhuicac campa yejetias cuajli. Niman on melahuac yes. Ijcon, tej, yejhuamej huelisquej quipiasquej nemilistli on yejhuan melahuac nemilistli para nochipa.

Sa ica nochí tlactitijli para Timoteo

²⁰ Timoteo, xquejehua tlen omitztlactitiquej. Ma ca xcaqui tlen xchipahuac niman xitlaj‡ quiitosnequi yejhuan quijijtohuaj on tlalticpactlacamej. Nion ma ca xcaqui on xcuajli temachtiltin yejhuan sequimej quitejtenehuaj tlaixmachilistli pero xnejli tlaixmachilistli. ²¹ Sequimej oquineltocaquej on tlen xnejli niman oquipolojquej intlaneltoc. Ma Dios mitzmaca itlatiochihualis. Ma ijqui nochihua.

‡ **6:10** cosas § **6:11** amor * **6:12** toma posesión de él; xmoaxcati, xmohuaxcati, xmotlatquit
† **6:13** muy ‡ **6:20** nada; coxtla

2 TIMOTEO

ICA OME ITLAJCUILOL ON APÓSTOL SAN PABLO PARA TIMOTEO

Pablo oquitlajcuilhuij Timoteo

¹ Nejhua, Pablo, niiapóstol Jesucristo. Dios onechajtitlan quen oquinec para nicteijlis ica on yencuic nemilistli yejhuan Dios otechprometerohuilij yejhuan ticpiaj ijcuac tinemij san secan ihuan Cristo Jesús. ² Notlajsojcaconeu Timoteo, niquijcuilohua in tlajcuilojli para tejhua. Nimitznequia ma Dios toTajzin niman toTeco Jesucristo mitzmacakan, intlatiochihualis inteicnelilis*, niman inyolsehuilis.

Tlaxtlahuclistli niman yolchicahualistli

³ Nochipa nimitzelnamiqui ipan nooración ican tonajli niman ican yehuali. Nicmaca tlaxtlahujli noDios aquin nictequipanohua ican notlamachilis yejhuan xnechtlahtlacolmaca, quen yejhuamej on nohuejcatajhuan oquichijquej. ⁴ No ijqui niquelnamiqui quen tichocaya, niman aman nicnequisquia ma nimitzitztetzi para sanoyej† nipaquis. ⁵ Niquelnamiqui quen cuajli titlaneltoca ica se moyojlo ijcon quen moabuelita Loida niman monanaj Eunice oquipixquej achtopa. Aman cuajli nicyolmatzticaj ica no ijqui ticpia. ⁶ Aman, tej, nimitzelnamictia ica xtequitilti on tetlayocolijli yejhuan oticselij itech Dios ijcuac mopan oniquintlalij nomahuan. ⁷ Ijcon xchihua, pampa Dios xotechmacac on tlinon ica titlanemilisquej para titopinajtisquej, yej para techcojtilis, niman para titelajsojtlasquej‡ niman para cuajli titonahuatisquej. ⁸ Yejhua ica ma ca xpinahua para tictexpantilis ica toTeco Jesucristo, nion notechcopa yejhuan nitzacuticaj san ipampa. Yej no xseli in tlajyohuclistli yejhuan huajlau san ipampa on temachtijli yejhuan quitemaca temaquixtilistli. Niman xmatztia ica Dios techyolchicahuas ijcuac ticselisquej on tlajyohuclistli. ⁹ Dios otechmaquixtico niman otechnotz para ticpiasquej se nemilistli chipahuac yejhua itech. Ijquin oquichiu xpampa tla tejhuamej itlaj cuajli oticchijquej, yej pampa ijqui oquinec niman otechmacac teicnelilistli§. Yejhua otechmacac in tetlajsojtlalistli itech Cristo Jesús achtoj ijcuac xe tzimpehua in tlalticpactli. ¹⁰ Pero yejhua in teicnelilistli oquipantlantij ijcuac ohuajlaj toTemaquixtijcatzin Jesucristo. Yejhua oquioxoxotonij on ihueyilis on miquilistli, niman oquipantlantij nemilistli yejhuan xoc queman huelis tlamis ican on temachtijli yejhuan quitemaca temaquixtilistli.

¹¹ Dios onechtlapejpenij para nicteijlis in temachtijli, niman onechtitlan quen apóstol para niquinmachtis on yejhuan xhebreos. ¹² Yejhua ica aman tlamach niquijyohuiya. Pero nejhua xnipinahua, pampa nicmatzticaj aquin yonicneltocac. Niman cuajli nicyolmatzticaj ica yejhua huelis quejehuas on tlen onechtlactitij hasta ipan on tonajli ijcuac ocsejpa huajlas. ¹³ No ijqui xchihua quen on ejemplo yejhuan onimitzmachtij itech on cuajli temachtilistli, niman xmocahua ipan on tlaneltoctli niman tetlajsojtlalistli yejhuan ticpiaj pampa tinemij ihuan Cristo Jesús. ¹⁴ Xquejehua on tlen Dios omitzmaclilij ica ipoder on Espíritu Santo yejhuan tohuan chanti.

* 1:2 su misericordia † 1:4 muy ‡ 1:7 amor § 1:9 misericordia

¹⁵ Tejhua ye ticmatzticaj ica nochimej on chanejquej imanyan Asia onechtlalcahuijquej, no ijqui yejhuamej in Figelo niman Hermógenes. ¹⁶ ToTeco ma quimicneli ichanchanejcahuau* on tocniu Onesíforo, pampa yejhua miyecpa onechyoltlalico, niman yejhua xopinau ica nitzacuticaj. ¹⁷ Yej yejhua ijcuac oyejcoc nican Roma onechtejtemoj sanoyej hasta campa onechnextij. ¹⁸ Ma toTeco ma quicneli ipan on tonajli ijcuac huajnocuepas. Tejhua ye ticmatzticaj cuajli quen miyecpa otechpalehuij ne Efeso.

2

Sen cuajli soldado de Jesucristo

¹ Niman tejhua, noconeu Timoteo, xmoyolchicahua ica on tetlajsojtlalistli* yejhuan toyaxca† pampa aman san secan tinemij ihuan Cristo Jesús. ² On tlen yotinechcaquili imixpan on miyequej teixpantiliquej, yejhua xquinmactili on yolmelajquej tocnihuan yejhuan huelisquej cuajli quinmachtisquej on ocsequimej.

³ Tejhua, tej, xquijyohui tlajtlamach‡ tlajyohuclistli quen se cuajli soldado itech Jesucristo. ⁴ Yejhuan quistinemí niman tequiti ipan on tequitl de soldado xcuajli para tlamach ica nocalactis, pampa ica oncaj quimpactis on huejhueyixtoquej yejhua ica oquitlapejpenij on tequitl de soldado para quichihuas. ⁵ No sa no ijqui, on yejhuan tehuan notlatlani xhuelis quiselis itlaxtlahuil tla yejhua xquitlacamati ireglamentos on ahuclistli. ⁶ No ijqui on yejhuan tequiti ican miltequitl, yejhua quitocarohua achtoj quiselis on tlen yotlac. ⁷ Cuajli xnemili tlinon nimitzijlia, niman toTeco mitzpalehuis para ticajsicamatis nochí.

⁸ Xquelnamiqui nochipa Jesucristo, ica yejhua huejca teixhuiu§ itech rey David niman ica yejhua onoyolihuitij niman onoquetzteu ocsejpa ijcuac yomica. Ijcon nicuajteijlijtiu ipan on temachtijli yejhuan quitemaca temaquixtilistli. ⁹ Pampa nicuajteijlijtiu on temachtijli niquipiyohuiya tlajtlamach yejhuan tlajyohuclistli, hasta ica nechtajtzacuaj quen yacaj on tlacatl xompayejyehua. Pero on itlajtoltzin Dios xhueli quitzacuaj. ¹⁰ Ijcon, tej, ipampa on yejhuan Dios oquintlapejpenij, niquipiyohuiya nochí tlajtlamach para yejhuanma quiselican temaquixtilistli. In temaquixtilistli petlani para nochipa, niman ticseliaj ijcuac tinemij san secan ihuan Cristo Jesús.

¹¹ In tlajtojli sanoyej* melahuac:
Tla ihuan yotimiquej, sa no ijqui ihuan tinemisquej.
¹² Tla titlajyohuisquej, no tihuelisquej titlamandarosquej ihuan Cristo. Tla tincnenequisquej† Cristo, yejhua no technenequis.
¹³ Tla tiquijnehuaj ipan totlaneltoc, Dios oc‡ ican cuajli iyojlo quichihuas on tlen yoquijtoj, pampa Dios xqueman huelis sa no yejhua notlajtolcuepas.

Cuajli tixnesis ixpan Dios quen se cuajli tequitqui

¹⁴ Xquinmelnamicti in tlajtlamach niman xquinnahuati ixpan toTeco, ma ca ica on tlen xcuajli nocamahuijsoquican. In xitlaj§ ica quimpalehuiya, yej quintlamachilispojpolohua* on yejhuan tlacaquij. ¹⁵ Xchihua canica para cuajli tonixnesis ixpan Dios quen se cuajli tequitqui, yejhuan xitlaj ica pinahua ipan itequiu pampa cuajli melajqui quiteijlia in tlajtojli

* ^{1:16} su familia * ^{2:1} amor † ^{2:1} nos pertenece; toaxca, tohuaxca, totlatqui ‡ ^{2:3} cosas
§ ^{2:8} descendiente * ^{2:11} muy † ^{2:12} negaremos ‡ ^{2:13} todavía; sanquen § ^{2:14}
nada; coxtla * ^{2:14} confunden sus mentes

tlen melahuac. ¹⁶ Ma ca xtequitiltican on tlajtojli yejhuan quijijtohuaj nican tlalticpac niman yejhuan xitlaj quijtosnequi, pampa yejhuan ijcon quichihuaj saniman más onxinij ipan on tlen xcuajli. ¹⁷ Niman on tlen quitemachtiaj hueyicatias quen se temojtij cualolistli itoca cáncer yejhuan noscaltia ipan tonacayo hasta techmictia. Ijcon onochiu impan Himeneo niman Fileto ¹⁸ yejhuan yonoxelojquej itech on tlen melahuac. Yejhuamej quijtohuaj ica Dios yoquinyoliticaj niman yoquinquetztejcaj on mimiquej, niman ica in quintlamachilispojpolohuaj ipan intlaneltoc sequimej tlanelto-calej. ¹⁹ Pero Dios yoquitlalij on tlen melahuac yejhuan cojtiticaj, niman xqueman polihuis quen itlaj cimiento ipan tepantli. Niman ipan on cimiento quipia in cuajli tlajtojli: “ToTeco quimixmatzticaj yejhuan melahuac iyax-cahuan”, niman “Ma cajcahuacan nochí tlen xcuajli nochimej on yejhuan quitenehuaj ica quineltocaj Cristo.”

²⁰ Ipan se cajli hueyi campa tlayejehualo ican on tlajtlamach, quinxelohuaj on yejhuan pepetlacaj noso más cuajcualtin quen on yejhuan tlachijchiutin ican oro niman ican plata. Niman no oncaj quintlaliaj on yejhuan xpetlanij quen on yejhuan tlachijchiutin ican cojtlif niman ican soquitl. Yejhuamej on tlachijchiutin ican oro niman ican plata inteco quintequitiltia ipan se tequitl de itlaj ilhuitl, niman on tlachijchiutin ican soquitl niman ican cojtl quintequitiltia san tlamach ica. ²¹ No ijqui, tla se tlacatl nochipahuas, yejhua petlanis quen on tlajtlamach tlachijchiutli ican oro yejhuan iteco quixelohua niman quitequitiltia ipan se tequitl yejhuan hueyixticaj, pampa yejhua huelis tequitis ipan nochí tlen cuajli.

²² Xtlalcahui inelehuilis[†] on telpocamej. Tejhua xtoca on tlen melajqui. Xpia tlaneltoctli, tetlajsojtlalistli[§] niman yolsenhuijistli. Ijcon xchihua inhuan nochimej on yolchipajquej yejhuan quinotzaj toTeco Jesucristo. ²³ Ma ca xquintencaqui on camahuijsquilistin yejhuan xitlaj quijtosnequij. Ye ticmatzticaj ica ompa pehua nocuajcualanihua. ²⁴ Sen itequitcau toTeco xquito-carohua tehuan nocualanijinemis, yej quemaj, cuajli tenotzqui yes ihuan nochí tlacatl. Yejhua nonequi huelis temachtis, niman no ijqui ma cuajli quijyohui tlajtlamach yejhuan ipan nochihua. ²⁵ Ican yolyemanilistli* ma quinmelajcatlali on yejhuan quixnamiquij. Ijcon xchihua ican tlamachalistli† ica Dios quincahuilis quinyolcuepas niman quixmatisquej tlen melahuac. ²⁶ Tla ijcon nochihuasquej, tlamachilistlachasquej niman nomanahuisquej itech on diablo yejhuan quinnoyaxcatia niman quinchihuaultia ma quichihuacan on tlen yejhua quinequi.

3

Quen ijqui yesquej on tlacamej ijcuac sa itlajtlancan in tonaltin

¹ No nonequi ticmatis ica sa itlajtlancan on tonajli sanoyej* xcuajli tonaltin yes. ² On tlacamej tzotzocamej yesquej, sanoyej quejele-huisquej tomin, sanoyej notenehuasquej huejhueyixtoquej, nohuejhueymatisquej, tlahuijhuicaltisquej, xquintlacamatatisquej intajhuan, xitlaj† quitaljsojcamatisquej, niman xyolchipajquej yesquej. ³ Xquintlajsojtlasquej‡ ocsequimej nion xtetlapojpolhuisquej. Chacuamej yesquej, xquiteltisquej inelehuilis§, xteicnelianimej yesquej niman quitlahuelitasquej nochí tlen cuajli. ⁴ Teichtacahuiquej yesquej, xnixmojtisquej itlaj quichijtetzisquej,

† **2:20** madera ‡ **2:22** deseos de ellos § **2:22** amor * **2:25** humildad † **2:25** esperanza
 * **3:1** muy † **3:2** nada; coxtla ‡ **3:3** no les amarán § **3:3** deseos de ellos

nohueyimatisquej, sa quinejnectiasquej on impaqilis ipan in tlalticpactli xej quitetemosquej tlinon ica quipactisquej Dios. ⁵ Nesis quen no tlaneltocaj, pero quinenequisquej* on poder yejhuan quipia on tlaneltoctli. Ma ca inhuan timonelos on quenomej.

⁶ Sequimej de yejhamej calaquij techajchan niman ican intemachtil quincajcahuaj on sihuamej yejhuan xcojtingej niman tlajtlacohuaj, niman quitocaj on tlen xcuajli pampa quinyecana inelehuis. ⁷ In quenimej sihuamej nochipa nomachtiaj, pero xqueman huelij cajsicamatij on tlen melahuac. ⁸ No ijqui quen on nanahualtin Janes niman Jambres oquixnamiquej Moisés, yejhamej in tlacamej no ijqui quixnamiquij on tlajtojli tlen melahuac. Intlamachilis noijtlacohua, xitlaj quimati jitech ica on tlaneltoctli. ⁹ Pero xsanoyej más huelis quiteilitiasquej intemachtil, pampa nochitlacatl quimatis ica yejhamej xcuajli tlanemiliaj, ijcon quen impan onochiu on omemej yejhuan oquixnamiquej Moisés.

Sa ica nochitlanahuatijli de Pablo para Timoteo

¹⁰⁻¹¹ Pero tejhua cuajli ticmatzticaj notemachtil quen ijqui ninoyecana, on tlinon nicnequi nicchihuas, notlaneltoc, noijyohuilis, notetlahsjotlalis, tlinon nejhua nicxicohua, notetlahuetotocalistli† niman notlajyohuilis. Ticmatzticaj nochitlen nopen onochiu ne ipan on huejhueyican Antioquia, Iconio niman Listra, niman nochitlen tetlajyohuilstli oniquijyohuij. Pero toTeco onechmaquixtij jitech nochit yejhua on. ¹² Niman melahuac on xcuajcualtin tlacamej ipan in tlalticpactli quintlajyohuilstiquej nochimej yejhuan quinequisquej nemisquej yolchipajquej jitech Cristo Jesús. ¹³ Niman on yejhuan xcuajcualtin tlacamej niman tlacajcayajquej tlacamej, inyojo más ijtlacautias. Tlacajcayahuasquej niman sa no yejhamej yoquincajcaquej.

¹⁴ Pero tejhua xtlacamati melajqui tlinon omitzmachtijquej niman yejhuan ticneltoca, pampa tejhua ticmatzticaj aquinamej omitzmachtijquej. ¹⁵ Niman desde ticonetl catca tiquixmati on iYectlajcuilojli Dios yejhuan huelis mitztlamachilis niman mitzhuicas jitech on temaquixtilistli jitechcopia motlaneltoc jitech Cristo Jesús. ¹⁶ Nochi Yectlajcuilojli jitech Dios huajliticaj, niman yejhua otechmacac para aman techpalehuiya. On Yectlajcuilojli techmachtia on tlen melahuac, techchicajcanotza, quiyectlalia on tlen xcuajli, niman temachtia quen ijqui onyas se nemilitli melajqui. ¹⁷ On Yectlajcuilojli oncaj para on teconeu jitech Dios ma hueltiu niman ma noyectlalijtiu para quichihuas nochitlen cuajli.

4

¹ Ixpan Dios niman toTeco Jesucristo, yejhuan quinyolcuitis niman quintlajtlacolmacas on yejhuan nemij niman on yejhuan mimiquej, ijcuac huajlas niman tlamandaros quen se rey, nimitznahuatia ² xteijli on cuajli tlajtojli. Xchihua ijcuac on tlacamej quinequisquej caquisquej niman ijcuac xquinequisquej. Xquinylectlali, xquinmajhua niman xteyolehua ican nochitijyohuilstli niman tlamachijli, ³ pampa yejcos on tonaltin ijcuac on tlacamej xoc cuelcaquisquej on cuajli tlamachijli. Ijcuac on, nochimej ican inelehuilis* nosentlalisquej intech miyequej ocsequimej tlamachijquej para ma quinmachtican ican nochitlen yejhamej quinequisquej caquisquej. ⁴ Xcaquisquej on tlen melahuac, yej caquisquej on tlacajcayajquej tlajtoltint†.

* 3:5 negarán † 3:10-11 persecuciones * 4:3 deseos de ellos † 4:4 cuentos

⁵ Pero tejhua nochipa xpia on cuajli tlamachilistli, xmoyolchicahua ipan tlayohuilistli, xpia moyojlo para ticteijlis on tlamachalistli yejhuan quitemaca temaquixtilistli, niman nochi cuajli xtlami on tlen motequivi.

⁶ Aman yoajsic tiempo para nechtemacasquej itech Dios quen on huentli. Aman nisu para nimquis. ⁷ Ye cuajli yonicchiu canica ipan itequiu Dios quen se tlacatl ijcuac tehuan notlatlani ipan se tlacsalistli. Aman notlatlalo-huilis yonitlan, niman xonicpolo notlaneltoc. ⁸ Aman nechcha notlaxtlahuil yejhuan nicselis pampa cuajli niyolmelajcanemiya. On toTeco yejhuan yolmelajqui teyolcuitijquetl nechmacas on tlaxtlahuil ipan on tonajli ijcuac huajlas. Niman xsan nejhua nechmacas, yej no quinmacas nochimej on yejhuan ican pactli quimachaj on tonajli ijcuac huajlas Cristo.

Sa ica nochitlajtojli para Timoteo

⁹ Xchihua canica para saniman xnechitaqui ¹⁰ pampa Demas yonechtlalc-ahuij niman yoyaj ne Tesalónica. Yejhua quinequiya tlajtlamach‡ ipan in tlalticpactli. Crescente oyaj ne Galacia niman Tito ne Dalmacia. ¹¹ Lucas san yejhua nohuan nemi. Ijcuac tihuajlas, xcuajhuica Marcos, pampa yejhua huelis nechpalehuis ipan notequivi. ¹² Tíquico onictitlan ne hueyican Efeso. ¹³ Ijcuac tihuajlas, xcuajqui nogaban yejhuan onicau ne Troas ichan Carpo, niman nolibros, niman xcuajqui namahuan yejhuan más nechpolojticaj.

¹⁴ Alejandro, on yejhuan quitequiti tepostli, onechchihuili miyec xcuajli. ToTeco quitlaxtlahuilis nochitlinon yejhua oquichiu. ¹⁵ Tejhua xmota ica yejhua, pampa yejhua sanoyej§ yoquitlahuelitac totemachtil.

¹⁶ Ijcuac achtapa oninomanahuij intech on yejhuan huejhueyixtoquej tlacamej, xacaj onechpalehuij, yej nochimej onechtlalcahuijquej. Nicnequuisquia ma ca Dios quincastigaros pampa ijcon onechchihuili quej. ¹⁷ Pero toTeco xonechtlalcahuij. Yejhua onechmacac chicahualistli para ohuel onicteijlij nochitlamachtijli yejhuan quitemaca temaquixtilistli, niman onicchiu para ma caqui nochitlacatl yejhuan xhebreo. Ijcon toTeco onechmaquixtij icamac on león. ¹⁸ Niman yejhua nechmaquixtis itech nochitlen xcuajli, niman nechejehuas para ninemis ne ilhuicac campa Cristo tlamandarohua. ¡Ma quipia hueyilistli para nochipa! Ma ijqui nochihua.

Tlajpalohuilistli niman tlatiochihualistli

¹⁹ Xtlajpalo Prisca niman Aquila, niman ichanchanejcahuan* Onesíforo. ²⁰ Erasto onocau ne Corinto, niman Trófimo onicau cualo ne Mileto.

²¹ Xchihua canica para xhuajla chica xe ajsi invierno ijcuac sehua.

Mitztlajpalohuaj Eubulo, Pudente, Lino, Claudia niman nochimej tocnihuan.

²² Ma toTeco Jesucristo mohuan nemi, niman ma Dios mechtiochihua nemochimej†. Ma ijqui nochihua.

‡ **4:10** cosas § **4:15** mucho * **4:19** su familia † **4:22** todos ustedes; nannochti, yemochimej, anochimej, innochimej, emmochimej

TITO ITLAJCUILOL ON APÓSTOL SAN PABLO PARA TITO

Pablo oquitlajcuilhuij Tito

¹ Nejhua, Pablo, niitequipanojcau Dios niman niapóstol itech Jesucristo. Jesucristo onechajtitlan para oniquinhuajcuilij, niman para ma hueyiya intlaneltoc on yejhuan Dios oquintlapejpenij, niman para quixmatisquej on tlen melahuac ica totlaneltoc, ² niman para quipiasquej tlamachalistli* ipan in yencuic nemilistli para nochipa. Dios, yejhuan xhueli tecajcayahua, oquitlalij ipan ipromesa on yencuic nemilistli ijcuac in tlalticpactli xe oncatca.

³ Niman aman ican cuajli tiempo otechititij itemachtil. Dios toTemaquixtijcau onechnahuatij para nictejilis.

⁴ Nimitzjicuiloahuilia yejhua in tlajcuilolamatl, Tito, nomelahuacconeuj ican tlaneltoctli yejhuan tiomemej ticpiaj. Nimitznequia ma Dios toTajzin niman Jesucristo toTemaquixticatzin mitzmaca itlatiochihualis, iteicnelilis† niman iyolsehuilis.

On itequiu Tito ne Creta

⁵ Onimitzcau ne ipan on tlalhuactli itoca Creta para xchihua tlinon nejhua xonitlan, niman para tiquincalactis on tlajtlajmatquej tlayecanquej itech tocnihuan ipan itequiu Dios campa tlaneltocaj ipan cada pueblo, sa no ijqui quen nejhua onimitznahuatij. ⁶ Sen tlajtlajmatquetl tlayecanquetl itech tocnihuan ica oncaj cuajli nemis para ma ca yacaj huelis quitlajtlacolmacas. Ica oncaj quipias san se isihuau. Niman iconehuan ica oncaj tlaneltoquej yesquej, niman tetlacamatisquej niman ma ca quinteixpanhuisquej itlaj ica tlen xcuajli quichihuaj. ⁷ Pampa se tlayecanquetl ipan on tiopan quipias nochí tlen tlajtlamach‡ imactilis Dios, yejhua nonequi cuajli nohuicas para ma ca yacaj itlaj ica quijixcomacas§. No xquitocarohua nohueyimatis, niman yejhuan xsan ica achijtzin nimantzin cualanis, nion xtlahuantinemis, nion xquitejtemotinemis tlahuejli, nion xcuejhueltas quiteixpachohuilis tomin. ⁸ Yej nochí cuajli quichihuas. Ica oncaj nochipa cuajli quinselis itenotzcahuan ne ichan, cuelitas nochí tlen cuajli, cuajli noyecanas, yolmelajqui, yolchipahuac niman ica oncaj quiyecanas cuajli inemilis. ⁹ Ica oncaj quejehuas on melajqui temachtilistli yejhuan yoquiselijquej itech temachtijquej, para ijqui no huelis quinyolehuas ocsequimej ica on melajqui temachtijli niman quinyolyemanilis on yejhuan tlaixnamiquij.

¹⁰ Ica oncaj ijqui quichihuas, pampa miyequej nemij on yejhuan xtetlacamatquej, niman más ne intzajlan on hebreos. Yejhuatej quijijtohuaj on tlen xitlaj* quijtosnequi, niman quincajcayahua on tlacamej. ¹¹ Quenomej xquincamatzacua, pampa quintlamachilispopolohuaj nochí sesentetipan familias ica temachtiaj on tlen xquitocarohua. Niman ijquin quichihuaj para quitlanij tomin ican tlacajcayahualistli. ¹² Se de intiotlajtojcahuan de Creta oquijtoj: “Nochantlacaj† sanoyej‡ chacuamej, no quen yolquej yejhuan xcuajcualtin, sanoyej tlacuanij niman tlatzijkej.” ¹³ Niman yejhua oquijtoj tlen melahuac. Yejhua ica xquimajhua chicahuac para ma quipiacan cuajli intlaneltoc. ¹⁴ Xquinmajhua para ma ca quitencaquican on quen on cuentos

* **1:2** esperanza † **1:4** su misericordia ‡ **1:7** cosas § **1:7** le reprochará * **1:10** nada;
coxtla † **1:12** mis paisanos ‡ **1:12** muy

yejhuan on hebreos quinejnemiliaj, nion ma ca ma caquican intlanahuatil on tlacamej yejhuan xquiseliaj on tlen melahuac.

¹⁵ Para on yejhuan quipiaj on intlamachilis tlen oncaj chipahuac, nochí tlajtlamach chipahuac para yejhuamej. Pero para yejhuamej on yejhuan xtlaneltoaj niman xquipiaj inyojo chipahuac, para yejhuamej xitlaj oncaj tlen chipahuac pampa hasta on tlen quinemiliaj niman on intlamachilis yejhuan quintlacolmaca xchipahuac. ¹⁶ Quijtohuaj ica quixmatij Dios, pero ica on tlen quichihuaj quiteititaj ica xnejli. Yejhuamej, tej, sanoyej tetlahuelitaj, niman xtetlacamatquej, niman nion se tequitl xhueli cuajli quichihuaj.

2

On cuajli temachtilistli

¹ Pero on tlen tiquijtos ica oncaj cuajli ihuan nohuicas on cuajli tlamachtijli. ² Xquimijli on huehuentzitzintin ma quiteltican inelehuis*, ma nohuicacan cuajli para quiselisquej tetlacaitalistli, ma nemican ican cuajli tlamachtilistli, ma cuajcualtin ican intlaneltoc niman on tetlajsojtlalistli† niman on tlen ica niyohuia. ³ No ijqui xquimijli on lamajtzitzintin ma yolchipaquej, ma ca ma tetejtenehuacan niman ma ca sa tlahuantinemisquej. Yejhuamej ma quitemachtican on tlen cuajli. ⁴ Ma quintitican on sihuamej yejhuan coconej quen ijqui quintlajsojtlasquej inhuehuentzitzihuan, niman inconehuan. ⁵ No ijqui ma quintitican ica ma noyecanacan cuajli, ma chipajquej, ma tlayecanacan cuajli ipan inchan, ma yolyemanquej, niman ma quintlacamatican inhuehuentzitzihuan ican tetlacaitalistli, para ma ca yacaj quijtohuilis on tlen xcuajli itech ica itlajtoltzin Dios.

⁶ No ijqui xquinyolehua on telpocamej para no ma cuajli noyecanacan. ⁷ Niman tejhua xquinmachti ican moejemplo nochí tlajtlamach‡ tlen cuajli. Ijcuac tquinmachtis, xquinmachti ican tlen melahuac niman ican nochí moyojo. ⁸ Xquinnojnotza cuajli para ma ca yacaj huelis mitztlajtlacolmacas para ijqui huelis pinahuas san aquinon yejhuan quinequis mitzistlacos, pampa xhuelis quijtos tlen xcuajli nemoca.

⁹ Xquinyolehua on tlanamactin para ma quintlacamatican inteco ican nochí tlen cuajli tequitl. Ma quinyolpacticán, niman ma ca ma tetlajtolixnamiquican. ¹⁰ Niman no xquinyolehua ma ca ma tlachtequican, yej quemaj nochí cuajli ma quichihuacan para on inteco quintlalisquej inyojo intech. Ijcon, tej, nochimej quimatisquej impampa on tlamachtilistli ica Dios toTemaquixtijcau yejhua sanoyej§ cuajli.

¹¹ Dios yoquipanextij iteicnelilis yejhuan nochí tlacatl cuajcilia temaquixtilistli. ¹² Yehua on iteicnelilis* Dios techmachtia ma ticajcahuacan nochí tlen xcuajli niman nochí elehuilistli yejhuan oncaj ipan in tlalticpactli. Niman no techmachtia ma titonahuatican cuajli, ma tiyolmelajcanemican niman ma tiyecnemican ipan in tlalticpactli. ¹³ Ijquin ma ticchihuacan chica ticchaj on hueyi tonajli yejhuan itech ticpiaj totlamachalista. Ipan on hueyi tonajli huajlas tohueyi Dios yejhuan toTemaquixtijcatzin Jesucristo. ¹⁴ Yehua san topampa onotemacac ipan miquilistli para techmaquixtia itech nochí quech tlajtlacojli oncaj, niman para techchipahua cuajli. Yejhua otechchipau para technoyaxcatia‡ itech, niman para ticpiasquej

* **2:2** deseos de ellos † **2:2** amor ‡ **2:7** cosas § **2:10** muy * **2:12** su misericordia
 † **2:13** nuestra esperanza ‡ **2:14** se poseciona de nosotros; technoxcatia, technohuaxcatia, technotlatquitia

miyec nequilitli para ticchihuasquej nochí tlen cuajli. ¹⁵ Yehua in yejhua xtemachti.

No ijqui xteyolehua niman xtechicajcanotza ican nochí motlanahuatil. Xmota tejhua ma ca yacaj mitzpipinahuis.

3

Ijquin noyecanasquej on tlaneltocaquej

¹ Xquinmelnamicti on tlaneltocaquej ica ma quitlacaitacan on gobierno niman on yejhuan quipiaj tequihuayotl. Ma quintlacamatican niman ma quipiacan inyojlo para quichihuasquej nochí tlajtlamach* tlen cuajli. ² Ma ca yacaj ma quitenehuilican on tlen xcuajli, yej ma nemican inhuan ocsequimej ican yolsehuilistli, niman ma tenetzquej, niman ma napanextican ican yolyemanilistli itech nochí tlacatl.

³ Achtapa tejhuamej no xcuajli titlanemiliayaj niman xtitetlacamatiyaj. No tixpolijtinemiyaj niman tinemiyaj ipan nochí sesetlamantic elehuilistli† niman paquilisyotl yejhuan xcuajli. Tinemiyaj ipan on tlen xcuajli niman ipan nexicolyotl. Ocsequimej techtlahuelitayah niman tiqintlahuelitayah.

⁴ Pero ijcuac oquipanextij itetlajsojtlalis‡ niman inequilibrio Dios toTemaquixticatzin, ⁵ otechmaquixtij. Pero otechmaquixtij xpampa tejhuamej oticchijquej on tlen cuajli, yej pampa yejhua otechicnelij. Otechmaquixtij ican iEspíritu Santo yejhuan otechpajpac para ticpiasquej yencuic nemilistli, niman yejhua otechyencuilij. ⁶ Dios otechtlayocolij sanoyej§ miyec iEspíritu itechcopia Jesucristo toTemaquixtijcatzin, ⁷ para ican itetlajsojtlalis Jesucristo yoquitlaxtlau totlajtlacolhuan niman ijqui ticselisquej nemilistli para nochipa yejhuan ticmachixtoquej.

⁸ Yejhua in tlajtojli sanoyej melahuac, niman nicnequi para xtlanahuati sanoyej ipan in tlajtlamach para on yejhuan quineltocaj Dios ma notacan sa no yejhuan para quichihuasquej on tlen cuajli. Yejhua in tlajtlamach sanoyej cuajli niman quimpalehuis nochimej. ⁹ Pero xtlalcahui on camahuijsoquilitin yejhuan xitlaj quijtosnequi, tlen quijcuilohuaj inca toachtojahuan, niman on tlahuejli yejhuan quinopialiaj niman camahuisoquilitli ica itlanahuatil Moisés. On nochí xhuelis quimpalehuis niman xitlaj quijtosnequi.

¹⁰ Tla yacaj quinxexelosnequi on yejhuan tlaneltocaj, xchicajcanotza sejpa noso ocpa para ma ca ma quichihua. Tla xmitztencaqui, xtlalcahui, ¹¹ pampa san yejhua ica on ticmatis ica on tlacatl quitlalcahuiya on tlen cuajli niman quichihua tlajtacoljli. Niman yejhua quimatzticaj ica xcuajli on tlen quichihua.

Pablo quimaca Tito sa ica nochí tlanahuatijli

¹² Ijcuac nejhua nictitlanis motech Artemas noso Tíquico, xchihua canica para xnechitaqui ne Nicópolis, pampa nejhua onictlalij noyojlo para ompa nicpanos on invierno. ¹³ Nochi tlen on ica tihuelis xpalehui Zenas, on tepantlajtojquetl, niman on Apolos. Xquinmaca nochí tlen huelis para ma quistinemican, niman ma ca itlaj ma quimpolo. ¹⁴ Niman on tocnihuan no ma quipiacan impan inyojlo para quichihuasquej on tlen cuajli niman ijcon huelis quimpalehuisquej ocsequimej ica on yejhuan quimpolohua itlaj. Ijcon innemilis itlaj ica ma tlapalehuican.

Tlajpalohualistli niman tlatiochihualistli

* **3:1** cosas † **3:3** deseo ‡ **3:4** su amor § **3:6** mucho

15 Nochimej yejhuan nohuan nemij mitztlajpalohuaj. Xquintlajpalo on totetlajsojcahuan* itech tlaneltoctli.
Ma Dios mechthiochihua nochimej nemejhuamej. Ma ijqui nochihua.

* **3:15** nuestros queridos amigos

FILEMÓN ITLAJCUIOL ON APÓSTOL SAN PABLO PARA FILEMÓN

Pablo oquitlajcuilhuij Filemón

¹ Nejhua, Pablo, yejhuan nitzacuticaj ipampa Cristo Jesús, niquijcuilohua in tlajcuilolamatl san secan ihuan tocniu Timoteo para tejhua, Filemón, totequipanojcaxiu ipan itequiu Cristo. ² Niman no niquijcuilohua para on tocniu sihuatl Apia, niman Arquipo yejhuan totequipanojcaxiu ipan in tequitl, niman para nochimej on tocniuhan yejhuan nosentlaliaj mochan. ³ Ma Dios toTajtzin niman toTeco Jesucristo mechmacakan tlatiochihualistli niman yolsehuilistli.

Itetlajsojcamachilis niman itlaneltoc Filemón

⁴ Nochipa nicmaca tlaxtlahuijli noDios ijcuac nimitzelnamiqui ipan nooración, ⁵ pampa nechtlajtlahtohuiliaj ica motetlajsojtlalis* niman motlaneltoc yejhuan ticpia para toTeco Jesú s niman motetlajsojtlalis para nochimej on teyaxcahuan† itech Dios. ⁶ Nictlajtlanilia Dios ica nochimej yejhuan quineltocaj Cristo mopampa ma cuajli ma cajsicamatican nochi on tlatiochihualistli yejhuan ticpiaj itechcopa Jesucristo. ⁷ Nocniu, motetlajsojtlalis nechmaca miyec yolpactli niman yolehualistli pampa ica otiquinyolpachihuitijquej iyaxcahuan Dios.

Pablo oquitlajtlan se favor para on tlanamactli Onésimo

⁸ Yejhua ica masqui niapóstol itech Cristo niman nicpia tlanahuatijli para nimitznahuatis tlinon cuajli para tejhua ticchihuas, ⁹ aman nicnequi nimitztlajtlanilis ican tetlajsojtlalistli‡. Nejhua, Pablo, yejhuan ye nihuehuentzin niman aman nitzacuticaj san ipampa Cristo Jesús, ¹⁰ nimitztlajtlanilia se favor para Onésimo, yejhuan aman yonochiu nocone u itech Cristo nican campa nitzacuticaj.

¹¹ Ipan ocsequi tonaltin, Onésimo para tejhua se tlanamactli catca yejhuan xtequitqui, pero aman tequitqui sanquen para tejhua niman para nejhua. ¹² Niman aman nimitzontitlanilia. Yehua sa no ijqui quen noyojlo yesquia. ¹³ Nejhua nicnequisquia nican nohuan ma nocahua para nechpalehuis chica nitzacuticaj san ipampa on cuajli tlajtojli yejhuan quitemaca temaquixtilistli. Yejhua nechpalehuisquia quen tla tejhua tinechpalehuisquia tla tinemisquia nican. ¹⁴ Pero xitlaj§ nicnequi nicchihuas tla tejhua xticnequi. Nejhua xnicnequi ticchihuas on favor ican xcuajli moyojlo, yej nicnequi ma quisa ipan cuajli moyojlo. ¹⁵ Manin cas Onésimo yejhua ica omitzlalcahuij para achijtzin tonaltin para aman ticselis para nochipa. ¹⁶ Aman xoc ticpias quen se tlanamactli, yej quen itlaj yejhuan más hueyi quijtosnequi xquen se tlanamactli. Quijtosnequi quen se motlajsojcaicniu. Nejhua sanoyej* nictlajsojtlalcahuij, pero tejhua nonequi tictlajsojtlas más sanoyej xsan pampa yejhua tlacatl, yej no pampa tocniu itech toTeco.

¹⁷ Ijcon, tej, tla tinechmati quen se motequipanojcaxiu, xseli quen nejhua tinechselisquia. ¹⁸ Tla omitzchihuilija tlen xcuajli, noso itlaj mitzhuiquilia, nejhua xnechtlajtlanili. ¹⁹ Nejhua, Pablo, niquijcuilohua yejhua in ican

* **1:5** tu amor † **1:5** le pertenecen; teaxcahuan, tehuaxcahuan, tetlatquihuan ‡ **1:9** amor

§ **1:14** nada; coxtla * **1:16** mucho

noma ica nejhua nictlaxtlahuas, masqui nihuelisquia nimitzelnamictis ica tejhua no tinechhuiquia hasta moalma. ²⁰Melahuac, nocniu, xnechchihuili on favor pampa titlaneltocajquetl itech toTeco. Xpacti noyojlo quen tinocniu itech Cristo.

²¹Chica nimitztlajcuilohuilia, cuajli niyolmati ica tejhua ticchihuas on tlen nimitztlajtlanilia. Niman nicmatzticaj ica tejhua más miyec ticchihuas tlinon nejhua nimitztlajtlanilia.

²²No ijqui xnechtejtemohuili canon ninosehuis, pampa niccha, ican itlananquilil Dios itech nemooraciones, Dios quinequis para nejhua nias nemechontas.

Tlajpalohualistli niman tlatiochihualistli

²³Mitztlajpalohuaj Epafras, notequipanojcaxiu yejhuan tzacutoquej san ipampa Cristo Jesús. ²⁴No mitztlajpalohuaj Marcos, Aristarco, Demas niman Lucas, yejhuan nechpalehuiyaj ipan notequiyó.

²⁵Ma tlatiochihualis toTeco Jesucristo ma nocahua nemotech. Ma ijqui nochihua.

HEBREOS TLAJCUILOJLI PARA ON HEBREOS

Dios otlajtajtoj itechcopia iConetzin

¹ Ipan on yopanoc tonaltin, itechcopia on tiotlajtojquej, Dios oquinnotz on toachtojtahuan miyecpa niman ican miyec tlamatli quen yejhua oquinec oquinnotz. ² Pero aman ipan in sa ica nochitonaltn, Dios yotechnotz itechcopia iConetzin. Dios oquichijchiu nochitlen oncaj itechcopia iConetzin, niman aman yoquimactilij nochit iConetzin. ³ Sa no yejhua Cristo quipantlantia ihueyilis Dios. Sa no yejhua quixnescayotia* nochit quen ijqui nemi Dios, niman no yejhua quejehua nochit on tlen oncaj ican itlajtol yejhuan quipia poder. Quemaj ijcuac yomic Cristo ne ipan cojnepanojli† para otechquixtilij totlajtlacol, onotlalij iyecmacopa inesehuilpan campa tlamandarohua Dios ne ilhuicac.

IConetzin Dios más hueyixtica xquen on ilhuicactequitquej

⁴ IConetzin Dios oquinyecapanahuij on ilhuicactequitquej‡, niman yejhua oquiselij se tequitl yejhuan más hueyi quijtosnequi xquen intequiu on ilhuicactequitquej. ⁵ IConetzin Dios más hueyixticaj pampa Dios nion se ilhuicactequitquetl xqueman oquijlij:

Tejhua tinoConeu, niman aman on tlacamej quimatisquej ica nimoTaj. Niman Dios no xacaj ilhuicactequitquetl oquijlij:

Nejhua nimoTaj yes, niman tejhua tinoConeu yes.

⁶ Pero ijcuac ocuajhuicac on yencuiyotl iConeu ipan in tlalticpactli, oquijtoj: Ma quimahuistilican nochimej on ilhuicactequitquej Dios.

⁷ Itechica on ilhuicactequitquej Dios oquijtoj:

Nicchihua para on ilhuicactequitquej nechtequichihuiliaj nimantzin quen on ajacatl panohua nimantzin. Niman nicchihua para notequitcahan tlaxoxotonijaq quen on tliltl tlaxoxotonia.

⁸ Pero itech ica iConetzin, toTajtzin Dios oquijtoj:

Oh Dios, motlanahuatiijli onyas para nochipa, niman tejhua titlamandarohua ican yolmelajcalistli.

⁹ Otictlajsojtlac§ yolchipahualistli, niman otictlahuelitac on xitolchipahualistli. Yejhua ica Dios, on yejhuan moDios, omitztlapecpenij niman omitzmacac pactli más xquen on motequipanojcaxihuian.

¹⁰ No ijqui itech ica iConetzin Dios oquijtoj:

Oh tejhua, noTeco, ijcuac xe itlaj oncatca, otictlalij in tlalticpactli niman ican momahuan no oticchijchiu nochit on tlen oncaj ne ipan cielos*.

¹¹ Niman nochit yejhua on popolihuis, pero tejhua tinemis para nochipa. Nochi on tlen oticchijchiu ijsolihuis quen ijsolihui itlaj tlaquentli.

¹² Tiquincuejcuelpachos quen cuejcuelpachohuaj se tlaquentli, niman tiquimpatlaz quen quipatlaj on tlaquentli. Pero tejhua nochipa sa no ijqui tinemi, niman monemilis xqueman tlamic.

¹³ No ijqui, tej, Dios xqueman oquijlij yacaj ilhuicactequitquetl:

Xmotlali noyecmacopa, hasta queman niquintlanis on motlahuelicnihuan para tiquinmandaros.

* **1:3** simboliza † **1:3** cruz ‡ **1:4** ángeles: Angeles tequitij ne ilhuicac niman nican ipan in tlalticpactli. § **1:9** le amaste * **1:10** On cielo oncaj ne campa oncaj ajacatl, moxtli, metztli, tonajli niman sitlalimej.

14 Tla ijcon, tej, ¿aquinomej on ilhuicactequitquej? Nochimej on ilhuicactequitquej yejhuamej espíritus cuajcualtin yejhuan tepalehuijtoquej. Niman Dios quintilani para comimpalehuiyaj on yejhuan quiseliaj temaquixtilistli.

2

Nonequi tiquejehuasquej on hueyi temaquixtilistli

1 Yejhu ica on, tej, nonequi xtictlatzijcamatisquej ica on tlen yoticaquej, yej más tiquejehuasquej para ma ca ticpolosquej on ojtli. **2** On temachtijli yejhuan on ilhuicactequitquej* oquiteijlijquej melahuac otlanahuatij, niman nochimej yejhuan xoquitlacamatquej nion xoquiselijquej oquiselijquej on castigo quen nonequi. **3** Yejhu ica, tej, ¿quen ijqui titomanahuisquej itech itlahuel Dios tla san ticajahuilmatij on temaquixtilistli yejhuan sanoyej† hueyi quijsnequi? ToTeco achtopa oquitemachtij yejhua in temachtijli ica temaquixtilistli, niman más saquin‡ on yejhuan oquicaquej otechijlijquej ica on temaquixtilistli yejhua melahuac. **4** Niman Dios no otechititij ica on temaquixtilistli yejhua melahuac ican on tlamajhuisoltin, niman tetlatlachaltij niman miyec milagros, niman no yejhua ica on tetlayocoliltin yejhuan on Espíritu Santo cada se otechmacac ocse tlamantic quen yejhua oquinec.

Ticpiaj temaquixtilistli itech Cristo niman xintech on ilhuicactequitquej

5 Dios xoquinmactilij on ilhuicactequitquej§ para quimandarosquej on tlalticpactli yejhuan saquin* onyas yejhuan aman tictenejtoquej. **6** Yej secan ipan on Yectlajcuilojli quijtohua:

Oh Dios, ¿tlen hueyilistli quipia on tlacatl, ica tiquelnamiqui? ¿Tlen hueyilistli quipia on tlalticpactlacatl ica ticiuajmatzticaj?

7 Ipan quesqui tonaltin otictlalij xmás hueyixticaj xquen on ilhuicactequitquej. Oticmacac hueyilistli niman tetlacaatalistli, niman no oticmacac tlanahtuati on quinahuatis noch on tlen oticmachijchiu.

8 Nochi tlajtlamach† yejhuan oticchijchiu, oticmacac on tlacatl para yejhua quimandarohua. Ijcon, tej, ijcuac Dios oquimacac noch on tlajtlamach para quimandaros, xitlaj‡ oquixcau para oquimacac ma quimandaro. Masqui Dios ijcon oquijtoj, hasta aman on tlacatl xtiquitaj tla hueli quimandarohua noch on tlajtlamach.

9 Yej tiquitaj Jesús yejhuan Dios oquitlalij xmás hueyixticaj xquen on ilhuicactequitquej ipan quesqui tonaltin. Ijcon oquichiu ica ihueyi teicnelilis§ para omic ipampa noch on tlacatl. Ijcon, tej, tiquitaj ica aman yejhua quipia hueyilistli niman tetlacaatalistli pampa otlajyohuij niman omic ne ipan on cojnepanojli*.

10 Yehua ica Dios, yejhuan noch on tlen tlajtlamach oncaj para yejhua, niman oncaj yejhua itechcopa, oquichiu quen quitocarohua ijcuac oquitemactilij Cristo itech itlajyohuilis ne ipan on cojnepanojli. Niman yejhua ica onaxitij para huelis quinmaquixtis iconehuan. Ijcon, tej, Cristo onochiu se tlayecanquetl yejhuan oquiyecan miyec tlacatl para quipiasquej temaquixtilistli.

* 2:2 ángeles: Angeles tequitij ne ilhuicac niman nican ipan in tlalticpactli. † 2:3 muy ‡ 2:3 después § 2:5 ángeles * 2:5 después † 2:8 cosas ‡ 2:8 nada; coxtla § 2:9 misericordia * 2:9 cruz

11 Sanquen Jesucristo yejhuan chipahuac niman on yejhuan quinchipahua san se Tajtli quipiaj. Yejhua ica yejhua xpinahua para quintocayotia icnihuan.

12 Ipan in Yectlajcuilojli Jesucristo quijlia Dios:

Niquimijlis on nocnihuan aquin tejhua. Niman nimitzyectenehuas ican tlacuicajli intzajlan on tlaneltocaquej campa nosentlaliaj.

13 Niman no quijtohua:

Nictlalis noyojlo itech Dios. Niman ocsejpa quijtohua:

Nican ninemi inhuan on noconehtuan yejhuan Dios onechinmacac.

14 On teconehtuan itech se familia quipiaj nacatl niman yestli ipan intlanacayo. Yejhua ica Jesús no onochiu tlacatl niman oquipix nacatl niman yestli ipan itlanacayo. Ijcon onochiu para ohuel omic, niman itechcopa imiquilis oquioxoxotonij on diablo yejhuan quipiaya poder para temictis.

15 Ijcon oquinmanahuij on yejhuan nemiyaj quen tlanamactin ipan noch innemilis pampa quimacajsiyaj on miquilstli. **16** Tej, ica tlen melahuac xohuajlaj para oquimpalehuico on ilhuicactequitquej, yej oquimpalehuico on yejhuan tlaneltocaj quen Abraham otlaneltocac. **17** Niman yejhua ica, tej, ica oncatca para nochihuas tlacatl no ijqui quen on itlaltecnicnihuan. Ijcon oquichiu para ohuel onochiu se hueyi tiopixqui yejhuan teicnelia niman quichihua noch quen quitocarohua ixpan Dios. Yejhua ijcon onochiu hueyi tiopixqui para onohuentlalij impampa intlajtlacolhuan on tlacamej.

18 Niman aman yejhua hueli quimpalehuiya on yejhuan on diablo quitlatlata para ma tlajtlacocan, pampa sa no yejhua Cristo tlamach oquiyohuij, niman on diablo no oquitlatlatac para ma tlajtlaco.

3

Jesús más hueyixticaj xquen Moisés

1 Aman, tej, nochipajcaicnihuan yejhuan Dios omechnotz para nenyasquej ne ilhuicac, ma ca nenquixcahuasquej Cristo Jesús yejhua apóstol niman más hueyi tiopixqui ipan totlanelto. **2** Yejhua noch cuajli oquichiu quen quitocarohua on tequitl yejhuan Dios oquimacac, ijcon quen Moisés cuajli oquichiu on tequitl yejhuan Dios oquimacac intech on hebreos. **3** Niman Jesús quimelahua* quiselis más tetlacaítalista xquen Moisés, no ijqui quen se tlacatl quiselia más tetlacaítalista xquen on cajli yejhuan yejhua quichijchihua. **4** Cada cajli quichijchihua yacaj tlacatl, pero Dios yejhua oquichijchihui noch tlajtlamach† tlen oncaj. **5** Moisés se cuajli tequichijquetl catca. Nochi oquichiu quen quitocarohua ipan on itequiu yejhuan Dios oquimacac intech on hebreos. Yejhua itequiu catca para quinmachiltiaya ica on tlajtlamach yejhuan Dios quimijlis más saquin‡. **6** Pero Cristo quen se yolchipahuac teconeu, cuajli oquichiu noch itequiu yejhuan Dios oquimacac intech iconehuan. Niman tiiconehuan tla tiquejehuaj totlanelto niman totlamachalis yejhuan ipan titohuicaj ixpan ocsequimej hasta ijcuac noch tlamis.

Iconehtuan Dios yasquej ne campa nosehuisquej ihuan Dios

7 Yejhua ica ipan on Yectlajcuilojli on Espíritu Santo quijtohua:
Tla ipan in tonajli nemejhuamej nенcaquij mechnotza Dios,

8 ma ca xmoyoltechicahuacan quen oquichijquej on yejhuan oquitlahuelixnamiquej ijcuac oquitlatlataquej ne campa tlapatlaco.

* 3:3 merece † 3:4 cosas ‡ 3:5 después

- ⁹ On nemoyehuejcatajhuan onechtlatlataquej nejhua nemoDios, masqui ipan ompoajli§ xipan oquitaquej on tlajtlamach yejhuan nejhua on-icchiu.
- ¹⁰ Yejhua ica onicualan inhuan on tlacamej, niman oniquijtoj: “Nochipa in-yojo quinequij on tlen xcuajli, niman yejhuamej xoquinequej quimatisquej quen onictlalij para nohuicasquej.”
- ¹¹ Yejhua ica onicualan inhuan, niman onicmelajcrajtoj ica xqueman calaquisquej ne campa nohuan nosehuisquej.
- ¹² Nocnihuan, xmotlapiacan para ma ca nensemex nenquipiasquej xcuajli nemoyojo yejhuan xoc quineltocas niman noxelos itech on Dios yejhuan nochipa nemi.
- ¹³ Yej cada mojmostla xmoyolchicahuacan se ihuan ocse chica nenquipiaj in cuajli tonaltin, para ma ca nensemex nemoyoltechicahuasquej niman mechcajcajahuas on tlajtlacojli.
- ¹⁴ Titlapohualti ihuan Cristo tla hasta ipan on sa ica nochitona jli timelajcanemisquej ipan on tlaneltoctli yejhuan oticselijquej ijcuac opeuticneltocaj Cristo.
- ¹⁵ Yejhua ica, tej, ijquin njtohua:
Tla ipan in cuajli tonajli nemejhuamej nenzaquij mechnotza Dios, ma ca xmoyoltechicahuacan quen oquichijquej on yejhuan oquitlahuelix-namiquej.
- ¹⁶ ¿Aquinomej, tej, on yejhuan oquicaquej Dios ijcuac oquinnotz, niman xo-quitlacamatquej? On sa no yejhuamej on yejhuan Moisés oquinquixtij ne ipan on país itoca Egipto.
- ¹⁷ Niman ¿aquinomej on yejhuan ompoajli xipan Dios inhuan ocualan? Ocualan inhuan on yejhuan otajtlacojquej, niman omiquej ne campa tlapatlaco.
- ¹⁸ Niman ¿aquinomej quintenehuaya Dios ijcuac oquimelajcrajtoj ica xcalaquej ne campa ihuan nosehuisquej? Dios quintenehuaya on yejhuan xoquitlacamatquej.
- ¹⁹ Ijcon, tej, ticmatij ica xohuel ocalaquej pampa xoquineltocaquej Dios.

4

¹ Yejhua ica, chica oc* ticpiaj on promesa para ticalaquej ne campa oncaj nesehuijli ihuan Dios, ma titotacan sa no tejhuamej sanoyej† para ma ca nensemex nemejhuamej xhuelis nencalaquej. ² Ijquin nemechnotza pampa nemejhuamej no yonancaquej on cuajli tlajtojli yejhuan quitemaca temaquixtilistli sa no ijqui quen yejhuamej. Pero masqui yejhuamej ocaquej, xitlaj‡ ica oquimpalehuij, pampa xoquineltocaquej. ³ Pero tejhuamej yejhuan oticneltocaquej oticalaquej ne ipan on nesehuijli ihuan Dios quen yejhua oquijtoj:

Yejhuamej onicualan intechcopa niman onicmelajcrajtoj ica xqueman calaquisquej ne campa nohuan nosehuisquej. Ijquin oquijtoj, masqui Dios otlan itequiu desde ijcuac oquitlalij in tlalticpactli.

⁴ Oncaj campa nesticaj ipan on Yectlajcuilojli campa quitenehua on chicome tonajli. Ijquin, tej, quijtohua:

Dios otlan itequiu, niman ipan on chicome tonajli onosehuij.

⁵ Niman ocsejpa njtohua ipan on Yectlajcuilojli:

Xqueman calaquisquej ne campa nohuan nosehuisquej.

§ 3:9 cuarenta * 4:1 todavía; sanquen † 4:1 mucho ‡ 4:2 nada; coxtla

- 6** On yejhuan achtopa ocacquej on cuajli tlajtojli yejhuan quitemaca temaquixtilistli xoquipixquej on nesehuijli ihuan Dios pampa xoquitlacamatquej. Ijcon, tej, ticmatij ica polihui para ocesequimej calaquisquej niman ihuan nosehuisquej.
- 7** Yejhua ica, Dios oquitlapejpenij ocse tonajli para on tlacamej calaquisquej niman ihuan nosehuisquej. Niman on tonajli sa no aman. Miyec xipan saquin§ ijcuac on achtojmej tlacamej xocalaquej ne itech Dios, yejhua oquitemachiltij itechcopia David ican in tlajtoltin tlen ye ticactoquej: Tla ipan in tonajli nemejhuamej nencacquij mechnotza Dios, ma ca xmoyoltechicahuacan.
- 8** Tla Josué quinyecanasquia on hebreos ne campa quipiasquiaj nesehuijli ihuan Dios, Dios xoc quijtosquia ica ocse tonaji más saquin nemisquej tlacamej yejhuan quipiasquej on nesehuijli.
- 9** Yejhua ica, tej, hasta aman oncaj se nesehuijli yejyejticaj campa on iconehuan Dios huelisquej nosehuisquej quen yejhua onosehuij ipan on chicome tonajli.
- 10** On, tej, yejhuan calaquiij ne campa ihuan Dios nosehuiaj, nosehuiaj ican intequiu ijcon quen Dios onosehuij ijcuac oquichijchiu yejhua in tlalticpactli.
- 11** Yejhua ica ma ticchihuacan canica para ticalaquisquej niman titosehuisquej ihuan Dios. Ma ca yej nensemjej nenquitocasquej inejemplo on yejhuan xoquitlacamatquej Dios niman no nenixpolijcanemisquej.
- 12** Ijcon, tej, itlajtol Dios quipia nemilistli niman quipia poder. Yejhua ica, tej, on itlajtol Dios más sanoyej tlatequi xquen itlaj machete yejhuan hasta ocan tlatequi. Ijcon, tej, itlajtol Dios hueli calaqui hasta ijtic on ialma niman iespiritu campa más quiyolmatoca on tlacatl. Yejhua techtlatlata tlinon ticnemiliaj niman tlinon quinequi toyojlo para maticchihuacan, tla cuajli noso xcuajli.
- 13** Xitlaj oncaj nion xacaj nemi yejhuan huelis niyanas ixpan Dios, yej nochitlen oncaj niman nemi panesticaj niman pantlantiticaj ixpan. Yejhua, tej, ica oncaj ixpan titoyolcuitisquej ican nochitlen ticchihuaj.

Jesús yejhua más hueyi tiopixqui

- 14** Jesúz, on iConetzin Dios, yejhua tohueytiopixcau yejhuan yoasic niman vocalac campa nemi Dios. Yejhua ica, tej, ma timelajcanemican ipan totlaneltoc. **15** Ticpiaj se hueyi tiopixqui yejhuan hueli techicnelia ijcuac xticojtieq, pampa sa no yejhua oquijyohuij miyec tetlatlatalistli para ma tlajtlaco quen tejhamej tiquijyohuiyaj miyec tetlatlatalistli para ma titlajtlacocan. Pero yejhua xotlajtlacoj. **16** Yejhua ica, tej, ican nochitoyojlo ma ticnisihuican to-Dios yejhuan techtlajsojtl‡. Ma ticnisihuican para ma ticselican iteicnelilis† niman ihueyi tetlajsojtlalis yejhuan techpalehuis ijcuac itlaj techpolos.

5

- 1** Cada hueyi tiopixqui quitlapejpeniaj intzajlan on tlacamej niman quintalaliaj para panos ixpan Dios impampa on tlacamej. Yejhua no quinteixpantilis inofrendas niman huentli ipampa intlajtlacolhuan on tlacamej. **2** Yejhua hueli quinmijyohuiya on yejhuan xquimati tlen cuajli niman on yejhuan quipolojtoquej on cuajli ojtli, pampa sa no yejhua xcojtic ipan itlaneltoc quen yejhamej. **3** Pampa on tiopixqui xcojtic ipan itlaneltoc, ica oncaj quiteix-pantilia huentin xsan ipampa intlajtlacolhuan on tlacamej, yej no ipampa itlajtlacolhuan yejhua. **4** Xacaj notlalia hueyi tiopixqui niman quiselia on

§ 4:7 después * 4:16 nos ama † 4:16 su misericordia

hueyilistli san pampa quinequi, yej Dios quitlalia sa no ijqui quen oquichiu ihuan Aarón. ⁵ Aman sa no ijqui, Cristo xejhua onotlalij hueyi tiopixqui, yej Dios oquitlalij tohueyitiopixcau niman oquimacac on hueyilistli ijcon quen Dios oquijlijca:

Tejhua tinocone u niman aman on tlacamej quimatisquej ica nimoTaj.

⁶ Niman ocsecan ipan on Yectlajcuilojli no oquijlij:

Tejhua titiopixqui para nochipa sa no ijqui quen Melquisedec.

⁷ Ijcuac Cristo nemiya ipan in tlalticpactli, oquichiu oraciones niman ono hueyicatzajtzilij itech Dios. Yejhua ican chicahuac itlajtol niman ican ixayo oquinotz Dios yejhuan huelisquia quimanahuisquia ipan on miquilistli. Niman Dios ocac on tlen Cristo oquijlij, pampa Cristo yolyemanqui* catca quitlacaitaya Dios.

⁸ Niman Cristo, masqui yejhua iConeu Dios, otlajyohuij. Niman itechcopa on itlajyohuilis ocajsicamat quen quitlacamti Dios.

⁹ Niman ijcuac yejhua yoquipantlantij ica nochí cuajli quitlacamatia Dios, oquinmacac temaquixtilistli nochimej on yejhuan quitlacamatij.

¹⁰ Niman Dios, tej, oquitlalij Cristo para on más hueyi tiopixqui sa no ijqui quen Melquisedec.

Xcuajli para ticajahuilmatisquej totlaneltoj

¹¹ Ticpiaj miyec tlen temechijlisquej itech ica yejhua in más hueyi tiopixqui, pero sanoyej† ohuijticaj‡ para temechijlisquej pampa sanoyej yolic nencajsicamatij. ¹² Nemejhuamej ye mechtocarosquia nentemachti-jquej yesquiaj pampa miyec tonaltin nemomachtiaj. Pero oc§ nonequi para ocsejpa ma mechmelajcajlican on tlen más xohuijticaj para nencajsicamatisquej itemachtilhuan Dios. On tlen xohuijticaj para nencajsicamatij itemachtilhuan Dios quen leche yejhuan conij on tzelicacoconej. Niman on yejhuan más ohuijticaj quen yejtic tlacuajli. Pero leche nenquinequij nenconisquej niman xnencuasquej on yejtic tlacuajli. ¹³ On yejhuan san quinequij nomachtiaj on tlen xohuijticaj para casijcamatisquej itemachtil Dios, quen tzelicacoconej. Yejhuatej, tej, xe cajsicamatij catlejhua on melajcanemilstli. ¹⁴ Pero on yejtic tlacuajli para on yejhuan yonoscaltiquej yejhuan yoquimachtijquej intlamachilis ica on tlayeheyecojli para quixmatij on tlen cuajli niman on tlen xcuajli.

6

¹ Yejhua ica, ma ticajcahuacan on tlen más xohuijticaj* itemachtilhuan Cristo, niman ma titochicahuacan. Aman, tej, ma ca ocsejpa ma titomachtican san ica on yolpatlalistli itech on tlajtlamach† tlen nenquichihuaj yejhuan mechhuicaj itech on miquilistli, nion san yejhua ica on tlaneltoctli itech Dios. ² No ijqui, tej, ma ca ma tictemachtican san on temachtilistli yejhuan quitene-huaj on tlacuatequolistli, niman on ica nenquitlalisquej nemomahuan impan on tlaneltocaquej, niman nion yejhua on ica yolihiisquej on mimiquej, niman on ica Dios para nochipa quincastigaros noso quintiochihuas on tlacamej. ³ Tla ijcon, tej, tictomachtisquej itemachtil Dios yejhuan más hueyi quijtosnequi, tla techmaca hueyac nemilstli.

⁴ Aman nemechtlajtoltis ica on yejhuan ipan se tonajli ocajsicamatquej on cuajli tlajtojli yejhuan quitemaca temaquixtilistli, niman oquiselijquej on tetlayocolijli yejhuan Dios oquinmacac, niman oquipixquej on Espíritu Santo ipan inyojlo, ⁵ niman oquimatquej ica cuajli on itlajtol Dios, niman

* **5:7** humilde † **5:11** muy ‡ **5:11** difícil § **5:12** todavía; sanquen * **6:1** no es difícil

† **6:1** cosas

no oquimatquej ipoder on tonaltin yejhuan huajlau. ⁶ Aman, tej, tla noxelosquej itech Dios, xoc huelis ocsejpa noyolcuesquej, pampa yejhuamej ocsejpa quimajmasohualtiaj[‡] ipan cojnepanojli[§] iConetzin Dios niman quipinajtisquej imixpan on tlacamej.

⁷ Sequimej tlacamej quen on tlajli yejhuan miyecpa ipan quiahui niman quichichina on atl, niman quisaltia on tlatootli yejhuan quimpalehuiya on tlacamej. Dios, tej, no ijcon quintiochihua on tlacamej. ⁸ Pero on tlacamej yejhuan noxelohuaj itech Dios quen on tlajli yejhuan quitlaquiltia huitzli niman ocsequi tlajtlamach tlen xcujli xojli yejhuan xitlaj* ica tepalehui. Nisiu para Dios castigaros on tlajli niman yejhua quitlatis. Ijcon nochihuas intech on tlacamej yejhuan noxelohuaj itech Dios.

Ipromesa Dios techyolehua para ma timelajcanemican ipan totlaneltoc

⁹ Niman para nemejhuamej, notlajsojcaicnihuán, masqui tejhuamej ijcon tiquijtohuaj, ticyolmelacamatztoquej ica melahuac nenquipiaj hueyi tlati-ochiutli yejhuan nenquiseliaj ihuan temaquixtilistli. ¹⁰ Dios yolmelajqui. Yejhua xquelcahuas nemotequiu nion on tetlajsojtlalistli[†] yejhuan onenquititijkej ijcuac onenquimpalehuijquej on tlaneltocaquej, niman hasta aman nenquimpalehuiyaj. ¹¹ Niman ticnequij ica cada se nemejhuamej ma quiteititiji hasta miquis sa no ijqui iyolehualis, para nochí on tlen quicha quiselis. ¹² Xticnequij para yej nemocuepasquej tlatzijquej, yej ticnequij xtocacan inejemplo on yejhuan itechcopia intlaneltoc niman inijyohuilis quiselijtoquej on herencia yejhuan Dios oquitlalij ipan ipromesa.

¹³ Ijcuac Dios oquimacac Abraham on promesa, iselti oquimelajcajtoj ican itlajtol ica quichihuas on tlen oquitlalij ipan ipromesa. Ijcon iselti oquimelajcajtoj ican itlajtol pampa xnemi ocse yejhuan más hueyixticaj para itech notlajtolpalehuis. ¹⁴ Dios ijquin oquijlij Abraham: “Ica tlen melahuac, tej, nimitztiochihuas niman niquinmiyequilibre on yejhuan mohuejcacone-huan yesquej.” ¹⁵ Yejhua ica Abraham iyolica oquichix hasta ijcuac oquiselij on tlen Dios oquitlalij ipan ipromesa. ¹⁶ Ijcuac se tlacatl oquimelajcajtoj itech on yejhuan más hueyixticaj xquen yejhua, xoc hueli más notencuicuij. ¹⁷ Dios, tej, yejhua ica oquimelajcajtoj ijcuac oquitemacac on promesa, pampa oquinec sanoyej[‡] cuajli quintitis on yejhuan quiselisquej on herencia yejhuan oquitlalij ipan ipromesa ica xqueman quipatlas on tlen oquijtoj. ¹⁸ Dios, tej, otechmacac on ipromesa niman oquimelajcajtoj ican itlajtol. In ome tlamantli[§] xhueli nopatlaj, pampa Dios xqueman quijtohua on tlen xmelahuac. Yejhua ica tinochimej yejhuan ticmatij ica yotechmaquixtij, ticpiaj toyolehualis para timelajcanemij ipan on tlamachalistli yejhuan otechprometerohuilij. ¹⁹ Yejhua on totlamachalis* quimelajcapia toalma ijcon quen on teposcadena quimelajcapia on barco ijcuac ica yoquisalojquej. Totlamachalis cojtic niman melajcaoncaj. Yejhua hasta onajsitoc itech Dios ne ilhuicac ²⁰ campa Jesús topampa oyacatziaj para otechtlapohuilij on ojli itech Dios. Ijcon Jesús onocau hueyi tiopixqui para nochipa sa no ijqui quen Melquisedec.

7

Jesús hueyi tiopixqui sa no ijqui quen Melquisedec

[‡] 6:6 lo crucifican § 6:6 cruz * 6:8 nada; coxtla † 6:10 amor ‡ 6:17 muy § 6:18 cosa * 6:19 nuestra esperanza

¹ Yejhua in Melquisedec rey catca ipan on hueyican itoca Salem niman no tiopixqui catca itech on más hueyixticaj Dios. Ijcuac Abraham ohuanjnocuepato ne ipan on guerra campa oquintlanito on reyes, Melquisedec oquinamiquito niman oquitiochiu. ² Abraham oquimacac majtlactli parte on tlen oquitlanito ipan on guerra.

On tocayotl Melquisedec quijtosnequi on “rey yolmelajqui”. On tocayotl no quijtosnequi “rey de yolsehuilistli” pampa Melquisedec rey catca ne ipan on hueyican itoca Salem yejhuan quijtosnequi “yolsehuilistli”. ³ Xqueman caquisti tla quitenehuaj ica yejhua oquipix itaj, noso inan, noso on itajhuehuentzitzihuan. No ijqui xqueman caquisti tla quitenehuaj on ijcuac otlacat nion on ijcuac yejhua omic. Ijcon, tej, yejhua para nochipa hueyi tiopixqui quen iConeu Dios. ⁴ Aman, tej, ixquitacan quen hueyixticatca Melquisedec! Abraham tohueyitajhuehuentzin hasta oquimacac majtlactli parte on tlen oquitlanito ipan on guerra. ⁵ Niman nochí on tiopixquej yejhuan ihuejcacone huan Leví quipiayaj tlanahuati jli ipan on tlanahuati jli para quiselisquej intech on tlacamej on majtlactli parte de on tlen quitlanij. Yejhua in quijtosnequi quiselisquej on majtlactli parte intech inicnihuan hebreos masqui on inicnihuan no ihuejcacone huan Abraham. ⁶ Pero Melquisedec, masqui xotlacat quen ihuejcacone huan Leví, oquiselij on majtlactli parte itech Abraham, niman oquitiochiu Abraham yejhuan oquinselij ipromesas Dios. ⁷ Niman xacaj hueli quinemilis ica on yejhuan quiselia on tlatiochihualistli más hueyixticaj xquen on yejhuan quitiochihua. ⁸ Nican totzajlan nemij on tiopixquej yejhuan quiseliaj se parte yejhuan iyaxca* Dios de nochí on majtlactli parte yejhuan quipia. On tiopixquej miquij. Pero on Yectlajcuilojli quijtohua ica xomic Melquisedec yejhuan oquiselica se parte de nochí on majtlactli parte. ⁹ Niman aman huelisquia tiquijtosquiaj ica Leví niman nochí on ihuejcacone huan, yejhuan aman quitlajtlanij on majtlactli parte, no oquimacaquej Melquisedec on majtlactli parte ijcuac Abraham oquimacac. ¹⁰ Cas ijquin huelisquia tiquijtosquiaj pampa ijcuac Melquisedec oquinamiquito Abraham, Leví nemiya ipan inacayo Abraham, masqui Leví xe tlacatiya.

¹¹ On tlacamej yejhuan chantij ipan on país itoca Israel oquiselij quej on tlanahuati jli intech copa on tiopixquej levitas, yejhuan hualejtoquej itech Aarón. Aman, tej, tla on tiopixquej melahuac huelisquiaj quinyolchipahuasquiaj on yejhuan quitlacamatiyaj on tlanahuati jli, tla ijcon xoc polihuisquia para nemisquia ocse tiopixqui yejhuan quen Melquisedec, yejhuan xhualehua itech Aarón. ¹² Tla Dios quipatla inequivi on tiopixquej, no ica oncaj nopatlas on tlanahuajijli. ¹³ Yejhua ica toTeco, yejhuan notenejtijcaj ipan in Yectlajcuilojli, quisticaj ipan ocse ifamilia Israel, yejhuan ompa xe yacaj quisa tiopixqui para tequitis ne campa tlaixpan†. ¹⁴ Cuajli machixticaj ica toTeco hualejticaj ne ipan ifamilia Judá. Niman Moisés xejhua on familia oquiteneu ijcuac otlajtlajtoj ica on tiopixquej.

¹⁵ Niman in más sanoyej‡ cuajli pantlantiticaj ica ohuajlaj se yencuic tiopixqui yejhuan sa no ijqui quen Melquisedec. ¹⁶ Yejhua xocalac tiopixqui itech copa on tlanahuati jli yejhuan quijtohua catlejhua familia ica oncaj ipan quisas se yejhuan calaquis tiopixqui. Yej ocalac tiopixqui itech copa on poder yejhuan quipia on inemilis yejhuan xqueman hueli xoxotoní, ¹⁷ pampa Dios ijquin quijtohua:

Tejhua titiopixqui para nochipa sa no ijqui quen Melquisedec.

* ^{7:8} le pertenecen; iaxca, ihuaxca, itlatqui † ^{7:13} altar ‡ ^{7:15} muy

¹⁸ Ijcon, tej, on isoltic tlanahuatijli yejhuan quijtohua ica noch i tiopixquej ica oncaj quisaj itech ifamilia Levi xoc tequitis, pampa xcojtic niman xtepalehuij.

¹⁹ Itlanahuatil Moisés xacaj oquiyolchipau. Pero aman ticpiaj se temachtijli yejhuan huelis techyolchipahuas. Niman yejhua in temachtijli tech-maca tlamachalistli niman techijlia quen huelisquej tcnishuisquej Dios.

²⁰ Niman Dios ocalactij Cristo para tiopixqui ican imelajcatlajtol. ²¹ Dios xo-quincalactij on ocsequimej para tiopixquej ican imelajcatlajtol, pero Cristo ocalactij tiopixqui ican imelajcatlajtol, quen on Yectlajcuilojli quijtohua: ToTeco ican imelajcatlajtol oquijtoj, niman xqueman quipatlas. Ijquin oquijtoj: “Tejhua titiopixqui para nochipa sa no ijqui quen Melquisedec.”

²² Aman, tej, ipampa imelajcatlajtol Dios, Cristo quichihua para melahuac oncaj on yencuic pacto niman más cuajli xquen on isoltic pacto yejhuan oncatca ipan on tlanahuatijli.

²³ On ocsequimej tiopixquej sanoyej omiyequiyajquej, pampa sa ompa mictiayaj niman ijcon xoc hueliyaj quichihuayaj intequiu. ²⁴ Pero Cristo xqueman miqui, niman ijquin itequiu xqueman panohua itech ocse tlacatl.

²⁵ Yejhua ica, yejhua hueli quinmaquixtia para nochipa on yejhuan yejhua itechcopa quinisihuiyaj Dios, pampa yejhua nochipa nemi para inca quitla-jtlanilijticaj Dios ma quimpalehui. ²⁶ Ijcon, tej, Jesús yejhua tohueyitiopixcau yejhuan techpolohuaya. Yejhua yolchipahuac, niman xoncaj itlaj tlinon ica huelis yacaj quijixcomacas[§]. Yejhua xquipia itlaj tlajtlacojli. Yejhua xnemi ne intzajlan on tlajtlacolejquej, niman más tlacpac nemi xquen on cielos*.

²⁷ Yejhua xquen on ocsequimej huejhueyi tiopixquej. Yejhuatej cada moj-mostla ica oncaj quinmictiaj on yolcamej para quixpantiliaj Dios on huentli, achtoj ipampa intlajtlacolhuan niman quemaj ipampa intlajtlacolhuan on tlacamej. Pero Jesús san sejpa niman para nochipa oquixpantilij Dios on huentli, niman yejhua in onochiu ijcuac sa no yejhua onohuentlalij. ²⁸ On itlanahuatil Moisés quincalactia huejhueyi tiopixquej on tlacamej yejhuan tlajtlacolejquej. Pero on imelajcatlajtol Dios, yejhuan saquin† oquitemacac xquen on tlanahuatijli, ocalactij hueyi tiopixqui on iConeu, yejhuan noch ica yolchipahuac para nochipa.

8

Jesús tepantlajtojquetl ipan on yencuic pacto

¹ Aman noch i on tlen yotiquijtojquej sa no yejhua in: ticpiaj se hueyi tiopixqui, niman aman ne ilhuicac yejhua nosehuijticaj iyecmacopa on nesehuilpan campa on tohueyi Dios tlamandarohua. ² Niman yejhua quichijticaj itequiu quen tiopixqui ne ipan on ilhuicac tiapan. Yejhua on tiapan melahuac tiapan yejhuan Dios oquichijchiu, niman xehuamej on tlacamej oquichijchijquej.

³ Nochi on más hueyi tiopixquej oquincalactijquej para quixpantilisquej Dios ofrendas niman huentin. Yejhua ica on tohueyitiopixcau Cristo no ononec quipias tlinon quihuentlalis. ⁴ Tla yejhua nemisquia ipan in tlaltic-pactli, xtiopixqui yesquia, pampa nican oc* nemij on tiopixquej yejhuan quiteixpantiliaj on huentli sa no ijqui quen tlanahuatia on itlanahuatil Moisés. ⁵ On tiopixquej tequitij ipan se tiapan yejhuan quixnescayotia† on

§ ^{7:26} ser reprochado * ^{7:26} On cielo oncaj ne campa oncaj ajacatl, moxtli, metztli, tonajli niman sitlalimej. † ^{7:28} después * ^{8:4} todavía; sanquen † ^{8:5} simboliza

tiopan yejhuan oncaj ne ilhuicac. On tiopan campa on tiopixquej tequitij quen itlasehuajlo on tiopan yejhuan oncaj ne ilhuicac. Ticmatij ica yejhua in melahuac, pampa ijcuac Moisés ye listo catca para quichijchihuas on tiopan tlachijchiutli ican tlaquentli[‡], Dios oquijlij: “Sanoyej§ xmota sa no tejhua para ticchijchihuas on tiopan tlachijchiutli ican tlaquentli sa no ijqui quen on ejemplo onimitzitij ne ipan tepet.” ⁶ IteQUIU Cristo quen tiopixqui más cuajli xquen intequiu on ocsequimej tiopixquej, sa no ijqui quen on pacto yejhuan Cristo oquitzimpehualtij san topampa itech Dios más cuajli xquen on achtoj pacto, niman quisticaj ipan on más cuajcualtin promesas. ⁷ Tla on achtoj pacto cuajli yesquia, xoc nonequisquia on yejhuan ica ome pacto. ⁸ Pero Dios oquitac ica on tlacamej xcuajli onohuicaquej ipan on achtoj pacto. Yejhua ica ipan in Yectlajcuilojli Dios ijquin oquijtoj intech ica on tlacamej: Oquijtoj on toTeco: Huajlas on tonajli ijcuac nictlalis se yencuic pacto inhuan on tlacamej chanejquej ne Israel niman ne Judea.

- ⁹ On pacto xijcon yes quen onictlalij ihuan inachtojtahuan ipan on tonajli ijcuac onicomintilan para oniquinquixtij ne ipan on país itoca Egipto. Yejhuatej xoquitlacamatquej on pacto yejhuan oniquintlalilij. Niman yejhua ica oniquintlalcahuij, oquijtoj on toTeco.
- ¹⁰ On yencuic pacto yejhuan niquintlalilis on tlacamej chanejquej ne Israel, ijcuac yopanoc on tonaltin ijquin yes, quijtohua on toTeco: Nictlalis notlanahuatilhuan ipan intlamachilis, niman niquintlajcuioltlalis ipan inyojlo. Ijcuacon nejhua niinDios yes, niman yejhuatej nocone-huan yesquej.

- ¹¹ Niman xoc nonequis yacaj quimachtis itehuical* noso yacaj icniu, niman ijquin quijlis: “Xquixmati toTeco”, pampa nochimej nechixmatisquej. Desde on más pitentzin hasta on yejhuan más hueyi nechixmatis.
- ¹² Niquintlapojpolhuilis on tlen xcuajli oquichijquej, niman xqueman ocse-jpa niquelnamiquis intlajtlacolhuan.
- ¹³ Ijcuac Dios quitenehua on yencuic pacto, quiteititia ica on achtoj pacto yoijsoliu. Niman on tlen ye ijsolijtiu saniman popolohuis.

9

Oncaj se tlalticpactiopan niman se ilhuicactiopan

¹ Aman on achtoj pacto oquipix tlanahuatiltin yejhuan otlanahuatij quen quimahuistilisquej Dios. Niman on tiopan campa oquimahuistilijquej oncaj nican ipan in tlalticpactli. ² Ijcuac on tlalticpactiopan yejhuan tlachijchiutli catca ican tlaquentli* onotlalij, ijquin onotlalij. Ne icalaquian oncatca on achtoj tlatzacuilitlaquentli. Icuitapan on tlatzacuilitlaquentli oncatca on achtoj parte itocaj tlayectenhuayoyan campa oncatca on candelero niman on mesa ihuan on pan yejhuan tlatiochiutli. ³ Icuitapan on ica ome tlatzacuilit-laquentli yejhuan quinxelojticaj on ome partes, oncatca on parte campa cuitiaj más tlayectenehuajloyan. ⁴ Ompa oncatca se tlaixpan† tlachijchiutli ican oro para ipan quipopotzayaj on xochicopajli, niman icaja on pacto yejhuan nochihuiyan tlaixamijli ican oro. Ijtic icaja on pacto oncatca se jarro tlachijchiutli ican oro campa oncatca on tlacuajli itoca maná. No ompa oncatca icojtopil‡ Aarón yejhuan oitzmolín, niman on temej campa oni-jcuilojquej itlanahuatilhuan on pacto. ⁵ Tlapani ipan icaja on pacto nemiyaj on ilhuicactequitquej§ intoca querubines yejhuan quiteititjicatc妖 ica Dios

‡ 8:5 tela; tojontli § 8:5 mucho * 8:11 compañero * 9:2 tela † 9:4 altar ‡ 9:4 su bastón § 9:5 ángeles: Angeles tequitij ne ilhuicac niman nican ipan in tlalticpactli.

ompa nemí ican hueyilistli. Yehuamej compixticatcaj imastlacapalhuan san tlacpac ne lado campa notlapojpolhuiyaj on tlajtlacoltin. Pero aman xhuelis más temechnojnotzasquej yejhua ica on.

⁶ Ijcon, tej, on tlajtlamach* oncatcaj ipan on hueyi tiopan, niman on tiopixquej mojmostla calaquiyyaj ipan on achtoj parte para conchihuaya intequi quen tlanahuatia on tlanahuatiltin. ⁷ Pero ne campa ica ome parte san yejhua on más hueyi tiopixqui calaqui, niman yejhua san sejpa calaqui ipan se xipan. Niman ijcuac oncalaque ica oncaj quitqui yestli para quiteix-pantilia sa no ipampa itlajtlacolhuan niman no ipampa on intlajtlacolhuan on tlacamej yejhuan oquichijquej ijcuac xoquimatzquej ica otlajtlacoquej. ⁸ Yejhua ica in on Espíritu Santo techititia ica chica quitequitiltiaya on achtoj tlayectenehuajloyan ne ipan on tiopan, on ojtlí oc† xtlapojticatca yejhuan ica ajsilos ne campa más tlayectenehuajloyan. ⁹ Nochi yejhua in quen ejemplo para tejhamej yejhuan tinemij ipan in tonaltin. Tiquitaj, tej, ica on ofrendas niman huentin tlen quixpantiliayaj Dios on tiopixquej, xohuel oquinchipahuilij intlamachilis yejhuan quintlajtlacolmaca on yejhuan ijcon quimahuistiliayaj. ¹⁰ On icsan costumbre san se oncatca ica on tlen quicuasquej, ica on tlen conisquej niman ica on quen nochipahuasquej ican atl. Yejhua in tlanahuatiltin tlapalehuitjicatcaj san chica xe yejcoya on tonajli ijcuac Dios quipatlas on tlajtlamach.

¹¹ Pero yohuajlaj Cristo, niman aman yejhua hueyi tiopixqui ipan on cuajli tlajtlamach yejhuan oncaj ipan on yencuic pacto. Yejhua ocalac ipan on tiopan ne ilhuicac yejhuan xacaj tlacatl oquichijchiu pampa xipan in tlalticpactli quisticaj. Yejhua on tiopan más cuajli niman más melajqui xquen on tiopan campa on tiopixquej tequitij. ¹² Yejhua ocalac ipan on más yectenehuajloyan san sejpa niman para nochipa. Ijcuac ocalac ipan on más yectenehuajloyan, xoquitquic inyesyo on chitomej niman on huacaxcoconej para quiteixpantilis, yej sa no yejhua iyesyo. Ijcon oquitlaxtlau para nochipa totlajtlacolhuan ican iyesyo. ¹³ Ijcuac yacaj itlaj ica njtlacohua ipan itlalnacayo, nalpichaj ican inyesyo on toros niman on chitomej, niman itliconexyo on sihuahuacax conetl yejhuan tlatla ne ipan on tlaixpan. Ijcuac ijcon nalpichaj, on yestli niman on tliconextli quipiaj poder para quiyectlalia niman quichipahua ipan itlalnacayo. ¹⁴ Pero ¡yesyo Cristo más quipia poder xquen inyesyo on toros niman on chitomej! Yejhua, tej, itechcopia on Espíritu Santo yejhuan nochipa nemi, onotemacac ixpan Dios quen se huentli yejhuan nochi chipahuac. Ijcon tej iyesyo quichipahua on tlen xcuajli ipan totlamachilis yejhuan techtlajtlacolmaca oncaj yejhuan techhuica ipan miquilistli, para yej ma tihuelican tictequipanocan Dios yejhuan nochipa nemi.

¹⁵ Yejhua ica, tej, Jesucristo quitlalia on yencuic pacto para nochimej on yejhuan Dios oquinnotz huelisquej quiselisquej on herencia yejhuan oquitlalij ipan ipromesa quipiasquej para nochipa. Yejhua on hueli nochihua pampa imiquilis Cristo oquitlaxtlau para intlajtlacolhuan yejhuan oquichijquej chica tequitija on achtoj pacto. ¹⁶ Ijcuac se tajtli achtoj quichijchihua on amatlajli para iconeu ijcuac yejhua xe miqui, yejhua on amatlajli xitlaj‡ quijtosnequi hasta miqui on tajtli, niman quemaj on amatlajli quitequitilitia. ¹⁷ Yejhua in melahuac pampa on amatlajli xitlaj quijtosnequi para on teconeu tla oc yolticaj on tajtli. On amatlajli san hueli quitequitilitia ijcuac on tajtli yomic. ¹⁸ Yejhua ica, tej, on achtoj pacto no onotzimpe-hualtica ica miquilistli ijcuac on yestli otoyau. ¹⁹ Xquelnamiquican quen

* **9:6** cosas † **9:8** todavía; sanquen ‡ **9:16** nada; coxtla

ijqui Moisés achtoj oquimijlij on tlacamej nochí quen tlanahuatiaya on tlanahuatiyli. Quemaj quisaloj itojmiyo on borreguito yejhuan chichiltic ipan se cojtzintli itoca hisopo. Niman quemaj ocajotij inyesyo on huacaxcoonej niman on chito conetl para ica oquipatzoj. Niman ica ocajhuichij on tlajcuiloamatl campa tlajcuiolnesticaj on tlanahuatiyli niman nochimej on tlacamej. ²⁰ Quemaj oquimijlij: "Yejhua in yestli yejhua quitzimpehaultia on pacto yejhuan Dios omechnahuatij nenquitlacamatisquej." ²¹ Moisés no ocajhuichij ican yestli on tiopan yejhuan tlachijchiutli catca ican tlaquentli[§] niman nochí on tlajtlamach yejhuan notequitiltiaya ijcuac quimahuitiliaya Dios ne ipan on tiopan. ²² On tlanahuatiyli tlanahuatia ipan casi nochí on tlajtlamach ma nochipahua ican yestli, niman tla xnotoyahua on yestli, xitlaj tlajtlacolli notlapojpolhuiya.

Cristo onotemacac quen huentli para quitequixtilis on tlajtlacolli

²³ Nochí on tlajtlamach yejhuan notequitiltiaya ipan on tiopan quen itlasehuajlo on tlen oncaj ne ilhuicac, niman nonequiya nochipahuasquej ican inyesyo on huacaxcoonej niman on chito coconej yejhuan onochijquej huentli. Pero on tlajtlamach tlen oncaj ne ilhuicac yejhuan xsan tlasehuayotl, yej quinequij on yejhuan más cuajli huentli xsan inyesyo on yolquej. ²⁴ Ticmatij ica Cristo xocalac ipan on tiopan tlamachijchiutli de tlacamej yejhuan san quixnescayotia* yejhuan melahuac tiopan oncaj ne ilhuicac. Yej Cristo ocalac sa no ne ilhuicac campa nemi ihuan Dios para topampa tlajtojticaj. ²⁵ Yejhua on hueyi tiopixqui hebreo cada xipan calaquiya ne ipan on más tlayectenehuajloyan para quiteixpantiliaya on yestli yejhuan xejhua inyesyo. Pero Cristo xmiyecpa onohuentlalij. ²⁶ Tla ijcon yesquia, miyecpa miquisquia desde ijcuac in tlalticpactli otzimpeu. Pero aman, ijcuac sa itlajtlancan in tonaltin, yejhua san sejpa niman para nochipa onotemacac quen se huentli para quitequixtilia on tlajtlacolli. ²⁷ Ijcon tej, ica oncaj nochimej san sejpa miquisquej, niman quemaj yasquej ixpan Dios para yejhua quinyolcuitis niman quemaj quintlaxtlahuilis. ²⁸ No ijqui Cristo san sejpa onotemacac quen huentli para miyequej quinquixtilis intlajtlacolhuhan. Quemaj ica ocpa huajnonextis, pero ijcuacon xpara quitequixtilis on tlajtlacolli, yej para quinmaquixtis on yejhuan quimachixtoquej.

10

Itlanahuatil Moisés xhueli quitequixtilia on tlajtlacolli

¹ Itlanahuatil Moisés san quixnescayotia* on tlen cuajli tlajtlamach† yejhuan onyas, pero xmelahuac sa no ijqui. Yejhua ica, tej, on tlanahuatiyli xqueman hueli quinyolchipahua on yejhuan quinequij quinisihuisquej Dios itechcopia on huentin, yejhuan cada xipan quihuentiaj sa no yejhua. ² Tla on tlanahuatiyli huelisquia quinyolchipahuasquia on yejhuan quinmahuistiliaj Dios, on quen on huentin, xoc queman quinteixpantilisquiaj, pampa on tlacamej noyolchipahuasquiaj san sejpa niman ijcon xoc nomatisquiaj tlajtlacolejquej. ³ Pero yejhua on quen on huentin san quinmelnamictiaj intlajtlacolhuhan cada xipan, ⁴ pampa inyesyo on toros niman on chitomej xqueman huelij quitequixtiliaj on tlajtlacolli.

⁵ Yejhua ica, ijcuac Cristo ohuajlaj ipan in tlalticpactli, oquijlij Dios: Xticnequi huentli nion ofrenda de on yolquej. Pero se tlalnacayotl otictlalij para nejhua ijcuac onitlacat.

⁶ Xmitzpactiaj on ofrendas de yolquej yejhuan quintlatiaj ne ipan tlaixpan‡

§ 9:21 tela * 9:24 simboliza * 10:1 simboliza † 10:1 cosas ‡ 10:6 altar

nion yejhua on huentli yejhuan notlaliaj para ma notlapojpolhui on tlajtlacojli.

⁷ Quemaj oniquijtoj: “Nican nihuajlau, noTajtzin, para nicchihuas tlinon tejhua ticnequi sa no ijqui quen noca tlajcuilnesticaj ipan on tla-jcuiolamatl.”

⁸ Achtapa oquijtoj ica Dios xquimequi nion xcuelita on huentli, nion ofrenda de on yolquej, nion on ofrendas yejhuan quitlatiaj ne ipan on tlaixpan yejhuan notlalia para ma notlapojpolhui on tlajtlacojli. Ijquin oquijtoj masqui on tlacamej tlahuentalaliayaj quen on tlanahuatijli tlanahuatia. ⁹ Niman quemaj oquijtoj: “Nican nihuajlau, noTajtzin, para nicchihuas tlinon tejhua ticnequi.” Yejhua in quijtosnequi ica yejhua oquimpopoloj on huentin ipan on achtoj pacto niman onohuentlalij ipan on ica ome pacto. ¹⁰ Yejhua ica aman tichipajtoquej niman xoc ticpiaj totlajtlacol, pampa Jesucristo oquichiu tlinon Dios oquinec ijcuac san sejpa niman para nochipa oquixpantilij on itlalnacayo quen itlaj huentli.

¹¹ Nochi tiopixqui hebreo mojmostla conchihua intequiu. Yejhuatej mojmostla sa no ijqui conteixpantiliaj on huentin, masqui on quen on huentin xqueman hueli quitequixtilia on tlajtlacojli. ¹² Pero Jesucristo impampa on tlajtlacoltin san sejpa oquiteixpantilij san se huentli niman para nochipa. Quemaj onotlalij iyecmacopa Dios. ¹³ Ompa tlamachixticaj hasta ijcuac Dios quinmactilis on itlahuelicnihuan para quinmandaros. ¹⁴ Yejhua ica, Cristo ican se huentli nochí cuajli niman para nochipa oquintlajtlacolquixtij on yejhuan yolchipajquej. ¹⁵ Niman on Espíritu Santo no techijlia sa no yejhua. Achtapa quijtohua:

¹⁶ Yejhua on yencuic pacto yejhuan niquinmacas ijcuac yopanoc itonaltin de on achtoj pacto sa no ijquin yes, quijtohua on toTeco: Nictlalis notlanahuatilhuan ipan inyojlo, niman niquintlajcuiloltlalis ipan intlamachilis.

¹⁷ Niman quemaj on Espíritu Santo quijtohua:

Xqueman ocsejpa niquelnam quis intlajtlacol niman on tlen xcuajli quichi-huaj.

¹⁸ Yejhua ica, ijcuac on tlajtlacoltin yoquitlapojpolhuijquej, xoc polihui para notemacas más ofrendas ipampa on tlajtlacojli.

Ma tcnisihuican Dios

¹⁹ Yejhua ica, nocnihuan, itechcopa iyesyo Jesucristo tictlaliaj toyojlo para ticalaquisquej ne ipan on más tlayectenehuajloyan. ²⁰ Ticalaquij ipan on yencuic ojtli yejhuan quipia nemilistli. Cristo otechtlapohuilij on tlatza-cuilliltlaquentli para tihuelisquej tajsisquej itech Dios. On tlatzacuilliltlaquentli quijtosnequi sa no yejhua itlalnacayo. ²¹ Aman ticpiaj tohueyitioxcau yejhuan tlamandarohua ipan ichan Dios. ²² Tla ijcon, tej, ma tcnisihuican Dios ican nochí toyojlo niman ican san se tlaneltoctli yejhuan ajsiticaj. Ma tcnisihuican ican toyojlo yejhuan Cristo yoquichipau para ma ca sa titotlajtlacolmatican niman ican totlalnacayo yejhuan yoquipajpac ica on atl chipahuac. ²³ Ma timelajcanemican ipan on tlamachalistli§ yejhuan ticteijliaj ica ticpiaj. Ma ca ticpatlasquej totlaneltoc, pampa Dios melahuac quichihuas on ipromesa yejhuan otechtlalilij. ²⁴ Ma tcnemilican quen ijqui huelis tiquinyolehuasquej ocsequimej para ma notlajsojtlacan* se ihuan ocse niman para ma quichihuacan on tlen cuajli. ²⁵ Niman ma ca no ijqui ma ticchihuacan quen sequimej yejhuan xoc nosentlaliaj tohuan campa

§ **10:23** esperanza * **10:24** que se amen

ticmahuistiliaj Dios. Yej ma titoyolehuacan se ihuan ocse, niman más ma toyolehuacan pampa ticmatij ica ye nisu huajlau toTeco.

²⁶ Tla yotiquixmatquej on tlen melahuac niman titlajtlacojtoquej ican toyoltechicahualis, tla ijcon, xoc onyas huentli para on totlajtlacol. ²⁷ Niman tla ijcon ticchihuasquej, on tlen topan nochihuas sanoyej† temojtij yes. Dios techtlajtlacolmacas niman techcastigaros ica on tecuinqui tlilt yejhuan ica quinxoxotonis on yejhuan quitlahuelitaj. ²⁸ Ijcuac yacaj xquitlacamat on itlanahuatil Moisés, niman nemij omemej noso yeyimej teixpantiliquej yejhuan quijtohuaj ica melahuac xoquitlacamat on tlanahuatijli, yejhua xquicneliaj, yej quitemactiliaj ma quimictican. ²⁹ Tla ijcon, ¿Tlinon nenquinemiliaj ipan nochihuas on yejhuan ipan cholohua iConetzin Dios? ¿Tlinon nochihuas intech on yejhuan xquixtlajsojtlaj on iyesotzin Cristo yejhuan oquitzimpehualtij on yencuic ipacto Dios yejhuan ica yoquinchipahuilij on intlajtlacolhuan? ¿Tlinon nochihuas intech on yejhuan cuijhuicaltia iEspíritu Dios yejhuan yoquinmacac on ihueyi teicnelilis‡? Yejhuatej, tej, quiselisquej sanoyej más hueyi castigo. ³⁰ Tiquixmatij on aquin oquijtoj: “Nitetlacuepiltis§, nitecastigaros.” Niman no oquijtoj: “On toTeco quiyolcuitis niman quitlaxtlahuilis nochiconehuan ica on tlen se quitocarohua.”

³¹ Sanoyej temojtij tonhuetzis ipan itlahuel Dios yejhuan nochipa nemi.

³² Xquelnamiquican on tonaltin onenpanoquej ijcuac onencajsicamatquej itlajtol Cristo. Ipan on tonaltin nemejhuamej miyec tlajyohuilstli onenquixicojquej ican ijyohuilstli. ³³ Quemantica nemejhuamej teixpan omechhuijhuicaltijquej niman omechcojcocojquej. Niman quemantica otiquinmicnelij on yejhuan no ijcon oquixicojquej miyec tlajyohuilstli. ³⁴ Nemejhuamej onenquimicnelijquej on yejhuan tzacuticatcaj. Niman hasta ican pactli onenquimocahuilijquej omechquixtilijquej on tlen nemoyaxca*, pampa nenquimatzoquej ica ne ilhuicac nenquipiaj on tlen más sanoyej cuajli niman ica nenquipiasquej para nochipa. ³⁵ Yejhua ica, tej, ma ca xtlalcahuican nemotlaneltoc, pampa yejhua on tlaneltocalistli mechajcuilis se hueyi tlaxtlahuijli. ³⁶ Nemejhuamej nonequi nenquipiasquej ijyohuilstli para huelis nenquichihuasquej on tlinon Dios quinequi, niman ijqui huelis nenquiselisquej on tlen yejhua omechprometerohuili. ³⁷ In Yectlajcuilojli ijquin quijtohuas:

Semi saniman huajlas on yejhuan ica oncaj huajlas, niman yejhua xnohuejcahuas.

³⁸ Pero on yejhuan yolmelajqui quipias nemolistli ican itlaneltoc, pero tla nechtalcahuiya, xnipaquis ihuan.

³⁹ Pero xtejhuamej on yejhuan quitlalcahuiyaj Dios niman ixpolihuij para nochipa. Yej tejhuamej on yejhuan ticpiaj tlaneltoctli niman ijqui tiquejehuaj toalma.

11

On toachtojtajhuan oquipixquej intlaneltoc

¹ On tlaneltoctli quijtosnequi ica ticyolmelajcamatztoquej* ica ticselisquej on tlen ticchaj, niman masqui xtiquitaj on tlen nochihuas ticmatij ican nochitojo ica nochihuas. ²⁻³ Cuajli ticmatij ica itechcopa totlaneltoc ticajsicamatij ica Dios oquichijchiu yejhua in tlalticpactli itechcopa itlajtol. Yejhua ica, tej, Dios oquichijchiu nochon tlen aman tiquitaj de on yejhuan

† **10:27** muy ‡ **10:29** misericordia § **10:30** haga la venganza * **10:34** les pertenece; nemoaxca, nemohuasca, nemotlatqui * **11:1** tenemos completa seguridad

xhueliya tiquitayaj. Dios oquinselij on toachtojtajhuan quen yolmelajquej tlacamej pampa yejhuamej oquipixquej intlaneltoc.

⁴ Ipampa on itlaneltoc, Abel oquixpantilij Dios se huentli yejhan más cuajli xquen on yejhan oquixpantilij Caín. Yejhua ica Dios oquiselij quen yolmelajqui Abel niman oquiselilij ihuen. Masqui Abel yomic, oc† quiteititia itlaneltoc yejhan oquipix.

⁵ Ipampa on itlaneltoc, Enoc ocuicaquej ipan ocse nemilistli ne ilhuicac niman ijcon xomic. Xoc oquinextijquej, pampa Dios ocuicac. On Yectlajcuilojli quijtohua ica ijcuac xe cuicayaj, yejhua oquipactij Dios. ⁶ Pero Dios xhuelis ticpactisquej tla xitech ticpiaj totlaneltoc, pampa para se huelis quinisihuis, ica oncaj quineltocas ica yejhua melahuac nemi, niman ica Dios quimacas tlaxtlahuijli on yejhuan melahuac quitejtemohuaj.

⁷ Ipampa on itlaneltoc, Noé oquitlacamat Dios, masqui xe nesiya on tlen temojtij yejhuan Dios oquijlij nochihuas. Yejhua oquichijchiu se hueyi acajli‡ yejhuan ipan omaquis ihuan ichanchanejcahuan§. Pampa ijquin oquineltocac Dios, Noé oquititij nochí tlacatl yejhuan nemiya ica tlajtlacojli, niman yejhua oquiselij yolmelajcalistli itech Dios itechcopa itlaneltoc.

⁸ Ipampa on itlaneltoc, Abraham oquitlacamat Dios ijcuac oquinotz para yas ne tetlalpan campa oquitlalij ipan ipromesa quimacas quen herencia. Yejhua oquis ne campa chantiya niman oyaj, masqui xquimatiya canon yaya. ⁹ Ipampa on itlaneltoc ochantic ne tetlalpan campa Dios oquitlalij ipan ipromesa, masqui para yejhua san tepal chanej catca. Ochajchantitaj ipan se cajli tlachijchiutli ican tlaquentli*. Isaac niman Jacob no ijcon ochantiquej yejhuan no oquiselijquej sa no yejhua promesa. ¹⁰ Abraham ijcon ochajchantitaj pampa ican itlaneltoc quichaya para Dios cuicas ne ilhuicac campa oncaj on hueyican yejhuan sa no Dios otlatlajtlalij niman otlachijchiu cuajli ican cojunquej cimientos.

¹¹ Ipampa on itlaneltoc, Sara oquiselij on chicahualistli para onochiu nantli, masqui sanoyej† ye lamajtzin catca para quimpaliasquia iconehuan. Yejhua, tej, oquipix se iconeu pampa oquineltocac ica Dios quichihuas quen oquitlalij ipan ipromesa. ¹² Ijcon tej, masqui Abraham sanoyej ye huehuentzin catca niman ye nisu catca para miquis, yejhua ohuel oquipix ihuejcacone huan. Niman otlacatquej sanoyej miyequej ihuejcacone huan ijcon quen miyequej onoquej on sitlalimej ne ipan cielo niman ijcon quen on xajli yejhuan oncaj ne itenco on mar yejhuan xhueli yacaj quipohua.

¹³ Ijcuac nochimej yejhuamej on tlacamej omiquej, oc oquineltocaquej ica Dios quichihuas on tlen oquitlalij ipan ipromesa. Yejhuamej xoquiselijquej, pero sanoyej paquiyaj pampa ipan intlaneltoc quiyolmatzticatcaj ica on promesa tenquisas masqui polihuis miyec tonaltin para tenquisas. Ijcon oquijteijlijquej ica xchanejquej ipan in tlalticpactli, yej ne ilhuicac. ¹⁴ Tej, on yejhuan ijcon tlajtlajtohuaj cuajli quiteititiaj ica oc quitejtemohuaj se chanyotl‡ campa chantisquej para nochipa. ¹⁵ Tla yejhuamej oc ontlamatztiasquiaj ipan on chanyotl campa ohuatlacajtejquej, huelisquiaj ocsejpa yasquiaj. ¹⁶ Pero yejhuamej quinequiyyaj se chanyotl más cuajli, se chanyotl yejhuan ilhuicac oncaj. Yejhua ica Dios xpinahua para Dios yes intech yejhuamej niman yoquinchijchihuilij se chanyotl.

¹⁷⁻¹⁸ Ipampa itlaneltoc, Abraham ocuicac Isaac on isentecone para qui-huentlalisquia ijcuac Dios oquitlatlatac. Masqui Dios ijquin oquiprometerohuilij Abraham: “Itechcopa Isaac ticpias mohuejcacone huan”, yejhua

† **11:4** todavía; sanquen ‡ **11:7** arca de Noé § **11:7** su familia * **11:9** tela † **11:11** muy
‡ **11:14** casa; cajli

nemiya listo para quihuentlalisquia on san ica nochí iconeu. ¹⁹ Abraham ijquin oquichiu pampa yejhua oquineltocac ica Dios quipia poder para quinyolihuitis§ on mimiquej. Niman masqui Isaac xomic, Abraham oquiselij quen on yejhuan ocsejpa oyoliu ne intzajlan on mimiquej.

²⁰ Ipampa itlaneltoc, Isaac oquiprometerohuilij Jacob ihuan Esaú miyec tlatiochihualistli yejhuan saquin* oquiselijquej.

²¹ Ipampa itlaneltoc Jacob, ijcuac ye nisu para miquis, oquitlalij ipan ipromesa miyec tlatiochihualistli cada se iconeu José, niman oquimahuistilij Dios chica onocojtilij ican itopil. ²² Ipampa itlaneltoc José, ijcuac ye nisu para miquis, oquijtoj ica más saquin on hebreos quisasquej ne ipan on país itoca Egipto, niman otlanahuatijteu tlinon quichihuasquej ica on iomiyohuan ijcuac quisasquej.

²³ Ipampa intlaneltoc, itajhuan Moisés xoquimacajsquej on tlanahuatijli yejhuan oquitemacac on rey para ma quinmictican nochí on oquichcoconej hebreos. Yej, ijcuac onen, oquiyankej Moisés yeyi metztli. Ijcon oquichijquej pampa oquitaquej ica yejhua se cualtzin oquichconetl catca.

²⁴ Ipampa itlaneltoc Moisés, ijcuac yotlacatiac, xonocalactij nemis quen teconeu itech ichpoch on yejhuan rey ne Egipto. ²⁵ Yej oquitlapejpenij tlajyohuis ne inhuan on iconehuan Dios, niman oquitlalcahuij on paquillistli ne tlajtlacolpan campa san panosquia on ipaquilis. ²⁶ Yejhua quimatzticatca ica más hueyi quijtosnequi para quijyohuis on tlahuejli ipampa Cristo xquen tla quipiasquia nochí on iriqueza Egipto. Ijquin oquinemilij pampa yejhua oquimat ica Dios quimacas tlaxtlahuijli.

²⁷ Niman ipampa itlaneltoc, Moisés oquis ne Egipto xican nemojtijli masqui on rey ocualan. Yejhua oquiyohuij on tlen tepajsoloj pampa yejhua quen quitzticatca Dios yejhuan xacaj hueli quita.

²⁸ Niman no ipampa itlaneltoc, Moisés oquipehaultij on ilhuitl itoca pascua, niman otlanahuatij ma quimajhuichican on tlatzaculyomej† ican inyesyo on borreguitos. Ijcon otlanahuatij para on ilhuicactequitquetl‡, yejhuan quipiaya poder para temictis, xhuelis quimictis on conetl yejhuan yencuiyotl ipan inchanchanecahuan§ on hebreos.

²⁹ Ipampa intlaneltoc, on hebreos oquipanahuijquej on Mar Rojo quen tlalhuactli yesquia. Pero ijcuac on Egipciros no ijqui quipanahuisnequiyaj, oamimiquej.

³⁰ Ipampa intlaneltoc, on hebreos ohuetz on tepantli ne iyehualican on hueyican itoca Jericó ijcuac yejhuamej chicome tonajli oquiyehualojquej.

³¹ Ipampa itlaneltoc, on tlacapajpatlaquetl itoca Rahab, xomic inhuan on ichanejcahuan yejhuan xotetlacamatquej, pampa yejhua cuajli oquinselij on hebreos yejhuan oquitatoj quen tlaojoncaj Jericó.

³² ¿Tlinon más niquijtos? Nechpolosquia tiempo para nitlajtlajtosquia itech ica Gedeón, Barac, Sansón, Jefté, David, Samuel niman on tiotlajtjquej. ³³ Ipampa intlaneltoc sequimej yejhuamej oquintlanquej on países, niman sequimej yejhuamej otequihuajtiquej ican yolmejmelajcalistli, niman oquiselijquej on tlajtlamach* yejhuan Dios oquitlalij ipan ipromesa. Impampa intlaneltoc, Dios oquinmanahuij intech on tecuani yolquej para xoquincuajquej. ³⁴ Opanoquej cuajli ipan on tlimej yejhuan sanoyej tecuinticatcaj, oquinmanahuijquej para xoquinmictijquej ican espadas. Yejhuatej

§ **11:19** los resucitará; quinyolitis * **11:20** después † **11:28** puertas ‡ **11:28** ángel: Angeles tequitij ne ilhuicac niman nican ipan in tlalticpactli. § **11:28** familias de ellos * **11:33** cosas

xcojtoquej catcaj pero oquiselijquej chicahualistli, yejhuamej ohuejhueyixti-ajquej ijcuac oquichijquej querra otetlanquej intech insoldados intlahuelic-nihuan. ³⁵ Nemiyaj sequimej sihuamej yejhan ocsejpa oquiselijquej inm-catzitzihuan yoltoquej.

Ocsequimej omiquej ican tlamach temojtij tlajyohuclistli. Ijcuac quinmac-ahuasnequiyaj, yejhuamej xoquinequej, yej quinequiyaj para Dios quinyoli-huitis† niman quinquetztehuas ipan intlalcon para quipiasquej se nemilistli yejhan más cuajli. ³⁶ Ocsequimej otlajyohuilej pampa oquinhuetzcaquej niman oquinhuilej, niman quemantica hasta oquinsalojquej niman oquintzacuquej. ³⁷ Sequimej oquinmictijquej ican temej. Sequimej oquint-lajcotequej ican sierra. Sequimej oquintlatlataquej, niman sequimej oquin-mictijquej ican espadas. Sequimej nejecuanijtineiyaj niman notlaque-ntiayaj ican incuetlaxyo‡ on borreguitos niman incuetlaxyo on chitomej. Yejhuamej mayanquej catcaj, oquintlahuelitaquej niman oquintlajyohuilej, niman inca onajahuilej. ³⁸ On xtlaneltocaquej xquinmelahuaya intzajlan nemisquej. On tocnihuan quistinemiyaj neca campa tlapatlaco, niman neca ipan tepemej. Oniyanquej ipan teostoyo, niman campa tlalcoy-oncan. ³⁹ Nochimej yejhuamej, masqui Dios oquinselij quen yolchipajquej pampa oquipixquej tlaneltoctli, xoquiselijquej on tlen Dios oquitlalij ipan ipromesa. ⁴⁰ Xoquiselijquej ipromesa Dios ipan on tonaltin pampa Dios yoquinemilijca on tlen más cuajli quichihuas. Yejhua yoquinemilijca ica más cuajli para yejhuamej quiselisquej on temaquixtilistli no ijcuac tejhuamej ticseliaj.

12

Tejhuamej nonequi tiquijyohuisquej on tlajyohuclistli quen Cristo oquij-yohuij

¹ Yejhua ica, tej, pampa sanoyej* miyec tlacatl oquipanextij itlaneltoc totech, ocse lado ma ticontlalican on tlen techteltia, niman on tlajtlacolij yejhan techicximamalina, niman ma titotlalocan ican ijyohuclistli ipan on ojli yejhan ticipaj toyecapan. ² Ma tiquixquechican Jesús yejhan itech hualehua totlaneltoc niman sa no yejhua quimelajcatlalia. Jesús xoquichi-huilij cuenta on tlen tepinajtij ijcuac omic ne ipan cojnepanojli†, pampa quimatzticatca ica tla yotlajyohuij, quipias pactli. Niman yejhua onotlalij iyecmacopa on nesehuilpan campa tlamandarohua Dios.

³ Xtlanemilican itech Jesús, yejhan sanoyej oquijyohuij noch on tlajtlamach‡ yejhuan oquichihuilijquej on tlajtlacolejquej. Ijcon xtlanemilican para ma ca nensiahuisquej nion nenquipolosquej nemoyolehualis.

⁴ Nemejhuamej hasta aman xe nemiquij ipampa on tlajtlacolij yejhan ihuan titoxicohuaj. ⁵ ¿Yonenquelcajquej on tlen Dios oquijtoj ijcuac omecht-lacanonotz nemejhuamej quen nencone huan? Ijquin oquijtoj:

Nocone, ijcuac toTeco mitzmaca icastigo para mitzmelajcatlalis, cuajli xcaqui. Niman no ijcuac mitzchicajcanotza ma ca ticpolos moyole-hualis,

⁶ pampa toTeco quincastigarohua on yejhan quintlajsojta§. Melahuac, tej, yejhua quincastigarohua nochimej on yejhan quinselia quen iconehuan.

⁷ Xquijyohuican nemejhuamej on castigo, pampa ijcon Dios mechpia quen iconehuan. ¿Tlen nemi yacaj teconeu yejhan xquicastigarohua itaj?

† **11:35** los resucite; quinyolitis ‡ **11:37** cueros de ellos * **12:1** muy † **12:2** cruz ‡ **12:3** cosas § **12:6** le ama

- 8** Tla Dios xmechcastigarohua ijcon quen quincastigarohua nochimej on iconehuan, quijtosnequi ica nemejhuamej xmelahuac neniconehuan, yej san nenteichtacateconehtuan.
- 9** Ijcuac ticoconej catcaj, on totlalticpactajhuan techcastigarohuayaj, niman tiquintlacaitayah. ¿Tlica*, tej, xmás cuajli tictlacamatísquej on toTajzin ilhuicac chanej para ijqui ticpiasquej nemilistli?
- 10** On totlalticpactajhuan ipan quesqui xipan otechcastigarojquej quen oquinemiliquej cuajli. Pero Dios techcastigarohua para ticpiasquej on tlen melahuac techpalehuis para techchipahuas quen yejhua chipahuac.
- 11** On melahuac ica noch castigo xticuelitaj ijcuac mero ticseliaj, yej techcocohua. Pero on yejhuan ican castigo noyectlaliaj, más saquin† quiseliaj yolmelajcalistli niman yolsehuilistli.

Temojtij tla xticselis itlajtol Dios yejhuan ica mitznotza

12 Ijcon, tej, xmoyolehuacan niman xmoyolchicahuacan. **13** Más xmohuicacan ipan on cuajli ojtli para on yejhuan mechajtacasquej, masqui xcojtiuej ipan intlaneltoc, ma ca nocuepasquej ipan xcuajli ojtli, yej más quitucasquej on cuajli ojtli. **14** Xchihuacan canica para inhuac nochimej xnemican ican yolsehuilistli, niman xpiacan yolchipahualistli pampa xacaj quitas on toTeco tla xyolchipajtacaj. **15** Xmotacan sa no nemejhuamej, ma ca yej semej nemejhuamej xnenquiselisquej iteicnelilis‡ Dios. Niman no xmotacan sa no nemejhuamej para ma ca nensemey yej nenmochihuasquej quen veneno niman ijcon nenquinmijtlacosquej miyequej. **16** Ma ca semej nemejhuamej nenahuilnemisquej nion ma ca semej nemejhuamej nenquichihuasquej on tlen xchipahuac quen Esaú yejhuan ijcuac apismiquiya, oquipatlac ican se tlacuajli on iherencia yejhuan oquipix pampa yencuiyotl catca. **17** Niman nemejhuamej nenquimatztoquej ica más saquin§, ijcuac Esáu quinequiya quiselis on herencia itech itaj, xoc ohuel. Niman masqui sanoyej ochocac, xoc ohuel onoyolpatlac niman ijcon xohuel oquipatlac on tlen oquichiu.

18 Nemejhuamej xonenquinisihuijquej on tepetl itoca Sinaí yejhuan yacaj hueli quimatoca campa on hebreos oquinisihuijquej ijcuac Moisés oquinmacac itlanahuatil Dios. Ipan on tepetl oncatca tlitl, niman tlasehualyotl, niman sanoyej tlayohuatoc catca, niman sanoyej temojtij ajacaya. **19** On hebreos, tej, ocacquej onopitz se trompeta niman itlajtol Dios. Ijcuac ocacquej on tlajtojli, sanoyej oquitlajtlanquej para ma ca sa ma quinnotza. **20** Ijcon oquichijquej pampa xhueliyaj quxicohuayaj on tlanahuatili yejhuan ijquin quijtohuaya: “Xmictican ican temej noso ican espada on yejhuan contlalisisxi ipan on tepetl, masqui se yolqui.” **21** Sanoyej temojtij on tlen nochijtitacca hasta Moisés ijquin oquijtoj: “Nicuecuetlaca ican nemojtijli.”

22 Nemejhuamej, tej, xonenquinisihuijquej yejhua on tepetl itoca Sinaí, yej yonenquinisihuijquej on tepetl itoca Sión campa oncaj on ihueyican Dios. Dios yejhua nochipa nemi. Yejhua in quijtosnequi on Jerusalén yejhuan ne ilhuicac oncaj. Yonenquinnisihuijquej on sanoyej miyequej ilhuicacte-quitquej*. **23** yejhuan yonosentlalijquej para quihueyilisquej Dios. Yonenquinnisihuijquej on iyencuiyoconehtuan Dios yejhuan tojtocayonestoquej ne ilhuicac. Yonenquinnisihuijquej Dios yejhuan nochimej quinyolcuitia niman quintlaxtlahuilia. No yonenquinnisihuijquej inespíritus on yolmelajquej tlacamej yejhuan Dios otlan oquinyolchipau. **24** Yonenquinnisihuijquej Jesús

* **12:9** ¿por qué?; † **12:11** después ‡ **12:15** su misericordia § **12:17** después * **12:22** ángeles: Angeles tequitij ne ilhuicac niman nican ipan in tlalticpactli.

on yejhuan oquitlalij on yencuic pacto niman itech iyesyo yejhuan yejhua ica otlajhuachij. In yestli quiteititia on tetlapojpolhuilistli niman xquitlajtlani on tetlacuepiltiji quen iyesyo Abel tlajtlaniya.

²⁵ Yejhua ica xmotacan sa no nemejhuamej. Xselican itlajtol on yejhuan mechnotza. Tla on hebreos xonomanahuijquej ipan on miquilistli ijcuac xquiselijquej itlajtol Moisés yejhuan nemiya ipan in tlalticpactli, sanoyej pantlantijticas ica tejhuamej más xhuelis titomanahuisquej, tla tictlalcahuisquej itlajtol Dios yejhuan nemi ne ilhuicac. ²⁶ Ipan on tonajli, on itlajtol Dios ocuihuijxoj yejhua in tlalticpactli. Pero aman quijtohua: “Ocsejpa, tej, nitlahuihuijxos, pero xsan in tlalticpactli nicuihuijxos, yej no nicuihuijxos yejhua on cielo[†].²⁷ Yejhua on tlajtojli “ocsejpa”, quijtosnequi ica Dios quejcuani noch on tlajtlamach yejhuan huelij nohuihuijxohuaj, niman quincahuas on yejhuan xqueman huelij nohuihuijxohuaj. ²⁸ Yejhua ica, tej, ma ticmacacan Dios tlaxtlahuajli pampa ticseliaj se yencuic lugar yejhuan xhuelis nejcuani. Ma ticmahuistilican Dios ican noch cuidado niman ican tetlacaitalistli quen quipactia, ²⁹ pampa toDios quen itlaj tlitl yejhuan hueli noch quitlatia.

13

Quen ijqui huelis ticipactis Dios

¹ Ma ca xcajcahuacan ica xmotlajsojtlatiacan* sequimej ihuan ocsequimej quen icniutin. ² Cuajli xquinselican nemochan on xchanejquej. Ijcuac sequimej nemoachtojtajhuan ijcon oquichijcaj, oquinselijca on ilhuicacte-quitquej[†] niman xquimatiyaj aquinamej.

³ Xquinmelnamiquican on yejhuan tzacutoquej quen inhuan nentzacutiasquiaj. Xquinmelnamiquican on yejhuan ocsequimej quintlajyohuiltia, pampa nemejhuamej no nenquipiaj nemotlalnacayo yejhuan huelis tlajyohuisej.

⁴ Nemochimej[‡] xtlacaitacan on namictilistli. Ma ca xsihuapajpatlacan nion tlacapajpatlacan, yej xnemican ipan chipahualistli pampa Dios quintlaxtlahuilis ican tlajyohuilstli on yejhuan ahuinemij niman on yejhuan sihupajpatla noso tlacapajpatla. ⁵ Ma ca xquelehuican on tomin. Xpaquican san ica on tlen nenquipiaj, pampa Dios oquijtoj: “Xqueman nimitzcahuas nion nimitztlalcahuis.” ⁶ Tla ijcon, tej, huelis tiquijtosquej ican noch confianza:

Yejhua on noTeco yejhua nechpalehuijticas. Yejhua ica xnicmacajsis on tlen huelis nechchihuilis yacaj tlacatl.

⁷ Xquinmelnamiquican nemotlayecancahuau yejhuan omechmachtijquej ica on itemachtil Dios. Xquelnamiquican noch tlen cuajli oquis ipan innemilis, niman xmohuicacan ican tlaneltoctli quen yejhuan nohuicaj. ⁸ Ijcon quen Jesucristo catca, aman oc§ ijqui, niman nochipa ijqui yes. ⁹ Yejhua ica, tej, ma ca nemocahuilisquej mechcajcyahuasquej on temachtiltin yejhuan yencuiquej niman ocse tlamantic. Más cuajli nemoyolchicahuasquej ican itetlajsojtalis Dios, niman xejhua ica on tlanahuatiltin ica on tlacuajli yejhuan xqueman oquimpalehuij on yejhuan oquintlacamatquej. ¹⁰ On tiopixquej yejhuan tequitij quen itlanahuatil Moisés tlanahuatia, xquincahuilia para quiselisquej temaquixtilistli itechcopa Cristo yejhuan huentli

[†] **12:26** On cielo oncaj ne campa oncaj ajacatl, moxtli, metztli, tonajli niman sitlalimej. * **13:1**

amarose [†] **13:2** ángeles: Angeles tequitij ne ilhuicac niman nican ipan in tlalticpactli. [‡] **13:4** todos ustedes; nannochti, yemochimej, anochimej, innochimej, emmochimej § **13:8** todavía; sanquen

para tejhuamej. ¹¹ Yehua on más hueyixticaj tiopixqui hebreo calactia inyesyo on yolquej ne ipan on más yectenehualoyan quen itlaj huentli para quintlapojpolhuiyaj on tlajtlacoltin. Pero intalnacayo on yolquej quintlatiaj ne itenco on hueyican.

¹² Yehua ica Jesús no ijqui ocuicaquej ne itenco on hueyican Jerusalén niman ompa otlajyohuij, niman omic para ican iyesyo quinchipahuilia intlajtlacolhuan on tlacamej. ¹³ Ma tiakan, tej, niman ihuan ma titosentlalitij ne itenco on hueyican, niman ma tiquijyohuican on tepijpinahualistli yejhuan yejhua oquijyohuij.

¹⁴ Ipan in tlalticpactli, tej, xticpiaj chanyotl* yejhuan para nochipa onyas, yej ticchaj ocse chanyotl yejhuan huajlas. ¹⁵ Yehua ica nochipa ma ticyectenehuacan Dios itechcopia Jesucristo yejhuan tohueyi tiopixcaū. Ijcon Dios quiselis totlayectenehualis quen itlaj huentli yejhuan tiquixpantilisquej ican totlajtol. ¹⁶ Niman ma ca xquelcahuacan para nenquichihuasquej on tlen cuajli niman tehuan nentepalehuisquej ica on tlen nenquipiaj, pampa on yejhua huentli yejhuan quipactia Dios.

¹⁷ Xquintlacamatican on yejhuan mechycanaj, niman xchihuacan intlanahuatil, pampa yejhuan tlajpiaj ican nemoalma. Yejhuan tlajpiaj ican nemocia quitemacasquej cuenta itech Dios. Yejhua ica, tej, xquintlacamatican para intequiu quichihuasquej ican pactli niman xican ajmantli, pampa tla xijqui nenquichihuaj yejhua on xitlaj† ica mechpalehuis.

¹⁸ Topampa xchihuacan oración. Tejhuan tlajpiaj ica totlamachilis xhuelis techtlajtlacolmacas, pampa ticnequij nochi tlajtlamach‡ ticchihuasquej cuajli. ¹⁹ Nemechtla sojcatlajtlanilia xchihuacan oración para Dios saniman ocsejpa ma nechcahuili nemechontas.

Itlajcuilocau in tlajcuilolamatl oquintiochiu niman oquintlajpaloj on hebreos

²⁰ Dios, yejhuan techmaca yolsehuilistli, oquiyolihuitij§ niman oquetzteu ipan italcon toTeco Jesucristo yejhuan hueyi Tlapixqui intech on borreguitos. Yejhua hueyi Tlapixqui pampa itechcopia iyesyotzin, oquitzimpehaultij on yencuic pacto yejhuan para nochipa onyas. ²¹ Ma yejhua in Dios mechmaca nochi on cuajli tlajtlamach yejhuan nenquitequitiltisquej para nenquichihuasquej on tlen yejhua quinequi. Niman itechcopia Jesucristo ma quichihua ipan tonemilis on tlen yejhua quipactia. On hueyilistli para nochipa ma quiseli Cristo. Ma ijqui nochihua.

²² Nocnihuan, sanoyej* nemechtla jtlanilia xnechijyohuilecan in quesqui tlajtojli yejhuan ica nemechtla canonotza ipan in noamatlajcuilol.

²³ Nicnequi para xmatican ica tocniu Timoteo xoc tzacuticaj. Tla saniman huajlau nican, nicuicas ijcuac nemechontas.

²⁴ Xquintlajpalocan nochimej on tocnihuan yejhuan mechycanaj, niman nochimej on teyaxcahuan† itech Dios. On tocnihuan yejhuan chantij Italia mechtla jpalohuaj.

²⁵ Ma Dios mechtiochihua nochimej nemejhuan. Ma ijqui nochihua.

* **13:14** casa; cajli † **13:17** nada; coxtla ‡ **13:18** cosas § **13:20** lo resucitó; oquiyolitij
* **13:22** mucho † **13:24** le pertenecen; teaxcahuan, tehuaxcahuan, tetlatquihuan

SANTIAGO ITLAJCUIOL ON APÓSTOL SANTIAGO

Santiago quintlajcuilhuiya on yejhuan huejhuejca chajchayajtoquej

¹ Nejhua, Santiago, niitequitcau itech Dios niman toTeco Jesucristo. Nemechtalajpalohua nemejhuamej majtlactli ihuan ome familias teconehuan itech Israel yejhuan nenchajchayajtoquej nochihuiyan ipan in tlalticpactli.

On tlaneltocaquej nonequi paquisquej ijcuac tlajyohuisquej

² Nocnihuan, xpaquican sanoyej* ijcuac nemejhuamej nenquijyohuiyaj tlajtlamach† pajsolohuilistli ³ pampa ye nenquimatztoquej ica ijcuac on pajsolohuilistli quitlatlatas nemotlaneltoc, sa no yejhua mechcojtilis para más huelisquej nenquixicosquej nochi tlajtlamach ican yolsehuilistli. ⁴ Pero xcahuilican on ikyotilistli ma tlami quipatla nemonemilis, para nenyolcojtiquej yesquej niman xitlaj‡ mechpolos.

On tlaneltocaquej nonequi quitlajtlanilisquej Dios tlamatquilistli

⁵ Tla semej nemejhuamej xnenquimati on tlen cuajli nenquichihuasquej, xtlajtlanilican Dios cuajli tlamatquilistli§, niman yejhua mechmacas. Yejhua, tej, melahuac nochimej quinmaca, niman xitlaj quiteixcomaca.

⁶ Niman ijcuac nenquitlajtlanilisquej tlamatquilistli, xneltocacan ica yejhua melahuac mechmacas. Ma ca xometlamatican tla mechmacas noso ca, pampa on yejhuan ometlamati sa no ijqui quen on atl yejhuan oncaj ne ipan mar, yejhuan on ajacatl coxonia niman cuajmapehua nanica niman ocsejpa neca quitilana. ⁷ On yejhuan ijcon tlanemilia, xquitocarohua quinemilis ica toTeco quipalehuis. ⁸ On yejhuan xsan se quinemilia quichihuas, yej san tlajtlamach quinequi quichihuas, xquimatis tla cuajli noso tla xcujli para quichihuas.

On tlaneltocaquej xquintocarohua quitlalisquej inyojo itech on riquezas

⁹ On tocniu yejhuan mayanqui, ma yoltentia ican pactli pampa Dios yejhua cueyilia. ¹⁰ Niman on tocniu yejhuan quinopialia miyec, ma yoltentia ican pactli pampa xoc quitlalia iyojo itech on tlin miyec yejhuan quipia. On yejhuan quinopialia miyec sa no ijqui quen se xochitl yejhuan oncaj ne ipan tepetl yejhuan xqueman hueli huejcahui oncaj, yej polihui. ¹¹ Ijcuac quis tonajli niman pehua chicahuac tona, on xochitl pilini niman ixochiyo huetzi, niman on icualtzinyo popolihui. On yejhuan quinopialia miyec popolihui sa no ijqui quen on xochitl. Ijcuac on yejhuan quinopialia miyec quitlantiu más riquezas, yejhua miqui.

On tlaneltocaquej nonequi quixicosquej tlajtlamach pajsolohuilistli niman tetlatlatalistli

¹² Tlatiochiutli yes on tlacatl yejhuan quixicos on pajsolohuilistli, pampa ijcuac cuajli yoquixicoj, quiselis se corona quen itetlayocojil. Quiselis yencuic nemilistli para nochipa yejhuan Dios oquitlalij ipan ipromesa para on yejhuan quitlajsojtlaj*.

¹³ Ijcuac yacaj quiselia tetlatlatalistli para ma tlajtlaco, xcujli para quijtos ica Dios quitlatlata. Yejhua in melahuac pampa Dios xqueman quiselia tetlatlatalistli para ma tlajtlaco, nion yejhua quitlatlata yacaj para ma tlajtlaco.

* **1:2** muy † **1:2** cosas ‡ **1:4** nada; coxtla § **1:5** sabiduría * **1:12** le aman

¹⁴ Sa no yejhua on xcuaqli ielehuis on tlacatl quitlatlata para ma tlajtlaco ijcuac ielehuis quiyecana hasta quijtlacohuilia itlamachilis. ¹⁵ On xcuaqli elehuilistli yejhua quitzmolinaltia on tlajtlacojli. Niman ijcuac on tlajtlacojli yoquichiu, on tlacatl miqui ixpan Dios.

¹⁶ Notlajsojcaicnihuan, ma ca xmixcajcahuacan. Ma ca nenquinemil-isquej ica Dios mechtlatlata para xtlahtlacocan. ¹⁷ Nochi cuajli tetlayocolijli ticseliaj yejhuan ajsiticaj†, hualehua ne tlacpac. Nochi on tetlayocolijli hualehua itech toTajtzin yejhuan oquichijchiu noch on tlahuiltin ne ipan cielo‡. ToTajtzin xquen on tlasehuajlomej yejhuan nochipa nopalajtiu, yej yejhua nochipa quichihua on tlen cuajli. ¹⁸ Dios otechselij tiiconehuan itechcopa on temachtijli yejhuan melahuac. Ijcon oquichiu para tejhuamej ma tinemican quen on achtoj iconehuan ipan ifamilia.

On tlaneltoquej nonequi caquisquej itemachtil Dios niman quitlacamatisquej

¹⁹ Notlajsojcaicnihuan, nicnequi para nenquimatisquej yejhua in. Cada se de nemejhuamej nonequi nemis listo para nentlacaquisquej. No xmatican ica xmechtocarohua nimantzin nentlajtosquej noso nimantzin nen-cualanisquej, ²⁰ pampa ijcuac se tlacatl cualani, yejhua xquichihua on tlen Dios cuelita. ²¹ Yejhua ica, tej, xcajcahuacan noch on tlen xchipahuac niman noch miyec tlajtlamach yejhuan xcuaqli oncaj. Xselican ican yolyemanalistli§ itemachtil Dios yejhuan oquitlalij ne ipan nemoyojlo. Yejhua on, tej, temachtijli quipia poder para quimaquixtis nemoalma.

²² Ma ca xmocajcahuacan san nenzaquisquej on temachtijli, yej no xchihuacan tlinon mechijlia on temachtijli. ²³ On yejhuan san caqui on temachtijli niman xquitlacamati, sa no ijqui quen se tlacatl yejhuan quita ixayac ipan se espejo. ²⁴ Yejhua quita ixayac quen ijqui oncaj, pero ijcuac yoquitlalcahuij on espejo, nimantzin quelcahua quen ijqui oncaj ixayac. ²⁵ Pero tla se tlacatl quinomachtia ican noch iyojlo on tlanahuatijli yejhuan ajsiticaj niman yejhuan techmanahuiya, tla ijcon, yejhua tlatiochiutli yes ipan noch on tlen quichihuas. Pero on tlacatl ica oncaj quinomachtijtias mojmostla, niman xquelcahuas on tlen quinomachtia, niman no quichihuas on tlen quijlia on temachtijli.

²⁶ Tla yacaj quinemilia ica cuajli quipia itlaneltoc ixpan Dios niman xnota sa no yejhua tlinon quijtohua inenepil, sa no yejhua nocajcahuua niman on tlinon quichihua ixpan Dios xitlaj* quijtosnequi. ²⁷ Dios toTajtzin quiselia itlaneltoc se tlacatl tla on tlaneltoctli xquipia ijtlacahualistli, yej quipia chipahualistli. Tlaneltocli yejhuan xquipia ijtlacahualistli, yej quipia chipahualistli quitosnequi ica on tlacatl quimpalehuis icnamej niman sihuacahualtzitzintin† ica on tlen quimpolohua. No on yejhuan cuajli tlaneltoca ixpan Dios, xquichihuas on tlen xcuaqli yejhuan on tlajtlacolejquej quichihuaj.

2

On tlaneltoquej xquintocarohua nochicoitasquej sequimej ihuan ocse-quimej

† **1:17** perfecto ‡ **1:17** On cielo onca ne campa oncaj ajacatl, moxtli, metzli, tonajli niman sitlalimej. § **1:21** humildad * **1:26** nada; coxtla † **1:27** viudas; icnosiuhamej

¹ Nocnihuan, nemejhuamej yejhuan nenquineltocaj tohueyiTeco Jesucristo, ma ca xchicoitacan* se tlacatl ihuan ocse. ² Ma ticonijtocan ica se tlacatl yejhuan rico oncalaqui ne campa nosentlaliaj on tlaneltoquej. Yejhua sa majpilpetlantiu ican anillos tlachijchiutin ican oro niman no quitlalijtiu itlaquen yejhuan patioj. Niman no ma ticonijtocan ica se mayanquitzin no oncalaqui, pero yejhua ican itlaquen sosoltzin. ³ Niman aman ma ticonijtocan ica nemejhuamej nenquitlacaitaj on yejhuan notlaquentia ican itlaquen patioj niman nenquijliaj: “Xmotlali nican ipan in cuajli sieta”, pero no nenquijliaj on mayanquitzin: “Tejhua xmotelquetza ne”, noso nenquijliaj: “Xmotlali ne ipan tlajli.” ⁴ Aman, tej, tla ijcon nenquichicoitaj se tlacatl itech ocse. Nenteixtlahuaj ican xcuajli nemoyojo.

⁵ Xcaquican in, notlajsojcaicnihuan. Dios oquintlapejpenij on yejhuan mayanquej ipan in tlalticpactli para ma ricojtican ican tlaneltoctli, niman para nemisquej ne campa Dios tlamandarohua ijcon quen oquitlalij ipan ipromesa para on yejhuan quitlajsojtaj†. ⁶ Yejhua ica, ¿tlica‡ nemejhuamej xnenquintlacaitaj on mayanquej? Xquelnamiquican ica on yejhuan ricos mechtequitiltiaj niman no mechtilanaj intech on tequihuajquej. ⁷ Niman no xquelnamiquican ica on ricos quitenehuiliaj on tlen xcuajli on itocatzin Cristo yejhuan nochimej nonequi quitlacaitasquej niman no san ipampa mechtocayotiaj cristianos.

⁸ On tlanahuatijli yejhuan más hueyi quijtosnequi ipan on Yectlajcuilojli sa no yejhua in: “Xquintlajsojtlal ocsequimej ijcon quen tejhua timotlajsojtlal.” Tla melahuac nenquichihuaj on tlen quijtohua in tlanahuatijli, cuajli nenquichihuaj. ⁹ Pero tla nenquichicoitaj se tlacatl ihuan ocse, nentlajtlacohuaj, niman Dios mechtlajtlacolmacas pampa xnenquitlacamatij itlanahuatil. ¹⁰ Xquelnamiquican yejhua in. Tla se tlacatl san se tlanahuatijli xquitlacamati, yejhua oc§ tlajtlacolej masqui quintlacamatisquia nochimej on ocsequimej tlanahuatiltin. ¹¹ Dios yejhuan oquijtoj: “Ma ca xsihuapajpatlakan nion xtlacapajpatlakan”, no oquijtoj: “Ma ca xtemictican.” Ijcon, tej, tla yacaj xosihuapajpatlac noso xotlacapajpatlac, pero otemicij, tla ijcon yejhua tlajtlacolej. ¹² Nemejhuamej tlajtjocan niman xmohuicacan cuajli sa xcomatztiacan ica mechyoalcuitisquej niman mechtlaxtlahuilisquej ica on tlanahuatijli yejhuan temanahuia. ¹³ Ijcon xchihuacan pampa on yejhuan xquitemaca on teicnelilistli*, Dios no xquimacas iteicnelilis. Pero on yejhuan quitemaca on teicnelilistli, quiselis cuajli tlaxtlahuijli.

Tlaneltoctli yejhuan melahuac quichihualtia se tlacatl ma quichihua on tlajtlamach yejhuan cuajli

¹⁴ Nocnihuan, ¿tlinon ica quipalehuis se tlacatl tla notenehua ica quineltoca Cristo, pero xquichihua on tlen cuajli? ¿Huelis quimaquixtis itlaneltoc in tlacatl tla ijquin tlaneltoca? ¡Ca! ¹⁵ Ma ticonijtocan ica se tocniu tlacatl noso tocniu yejhuan sihuatl quipolohua itlaquen noso on tlen quicuas. ¹⁶ Niman no ma ticonijtocan ica se de on yejhuan notenehua tlaneltoca quijlis: “Cuajli xnemi. Xmotlaquenti para ma ca tisecuis, niman xtlacua”, pero xquimaca on tlen quipolojticaj para itlalnacayo. ¿Tlinon ica quipalehuis on tlinon quijlia? ¹⁷ Yejhua ica tla se tlacatl notenehua quipia tlaneltoctli niman itlaneltoc xquichihualtia para quichihuas on tlajtlamach yejhuan cuajli, tla ijcon itlaneltoc xitlaj† quijtosnequi. Yejhua quen on yejhuan mictoc.

* **2:1** vean con distinción † **2:5** le aman ‡ **2:6** ¿por qué?; ¿tline? § **2:10** todavía; sanquen
* **2:13** misericordia † **2:17** nada; coxtla

¹⁸ Pero cas yacaj nechijlis: “Sequimej quipiaj tlaneloctli niman ocse-quimej quichihuaj tlajtlamach yejhuan cuajli.” Tla yacaj nechijlis ijquin, niquijlis: “Xnechititi motlaneltoc xihuan on tlen cuajli yejhuan tlajtlamach ticchihu, niman nejhua nimitzititis notlaneltoc itechcopa on cuajli tlajtlamach yejhuan nicchihu. ¹⁹ Tejhua ticneltoca ica nemi san se Dios. On tlen ticneltoca cuajli, pero xmatztia ica on xcuajcualtin espíritus no quineltocaj yejhua on, niman pampa tlaneltocaj cuecuetlacaj ican nemojtijli.”

²⁰ No niquijlis on tlacatl: “¿Hasta canon tajsi ica xhueli titlanemilia? ¿Ticnequi ticmatis ica on tlaneloctli yejhuan xnopanextia ica on tlen cuajli se quichihu, yejhua se tlaneloctli yejhuan sanencaj? ²¹ Tla ijcon, xquel-namiqui toachtojta Abraham. Dios oquijtoj ica itlajtlacolhuan yoquint-laxtlau ipampa on tlen oquichiu ijcuac ocuentij iconeu Isaac ne tlaix-pan†. ²² Aman, tej, ticmati ica tlaneltoc Abraham niman on tlen oquichiu tequitiyaj san secan. Niman no ticmati ica tlaneltoc onaxitij ica on tlen oquichiu. ²³ Ijcon cuajli onochiu on tlen quijtohua on Yectlajcuilojli yejhuan quijtohua: “Abraham oquineltocac Dios, niman ipampa tlaneltoc Dios oquiselij quen se yolmelajqui tlacatl.” Niman Abraham oquitocayotijquej itetlajsojcau§ Dios.

²⁴ Nemejhuamej nenquimati ica Dios quijtohua ica itlajtlacolhuan se tlacatl yoquintlaxtlau ipampa on tlen cuajli quichihu, niman xsan yejhua ica on tlaneltoc. ²⁵ No ijqui onochiu itech on sihuatl itoca Rahab, on yejhuan tlacapajpatlatinemiya. Yejhua cuajli oquinselij on yejhuan Josué oquintitlan para quitasquej quen ijqui tlajoncaj ne hueyican Jericó, niman no yejhua oquimpalehuij para ocholojquej ijcuac hualajticatcaj intlahuelic-nihuan. Yejhua ica Dios oquijtoj ica itlajtlacolhuan yoquintlaxtlau. ²⁶ Ijcon quen xoc itlaj quijtosnequi on tlalnacayotl ijcuac xquipia ialma, no ijqui xitlaj quijtosnequi tlaneltoc se tlacatl tla xquichihu tlajtlamach tlen cuajli.

3

On tlaneltoaquej nonequi cuajli quinemachtisquej innenepil

¹ Nocnihuan, ma ca san aquinon ma calaqui para temachtis, pampa nen-quimatztoquej ica Dios más techtlajtlacoltis tejhuamej yejhuan titemachtiaj tla xcuajli titemachtiaj. ² Tinohimej ticchihuaj miyec tlajtlamach* tlen xcuajli. Pero tla yacaj nochipa ican inenepil san quijtohua on tlen cuajli, melahuac yejhua cuajli tlacatl, niman hueli cuajli quimandarohua nochitlalnacayo. ³ Ijcuac tiquintlaliliaj teposcuallijli† ne ipan incamac on caballos para techtlacamati, tihuelij tiquinhuicaj campa ticnequi.

⁴ Xtlanemilican itechcopa on barcos. Masqui sequimej barcos sanoyej‡ huejhueyimej niman masqui sanoyej chicahuac ajaca, san ica se co-jtli§ pitentzin on tlacatl yejhuan quiyecanaj on barco hueli cuica campa quinequi. ⁵ Ijcon nochihua ican se nenepijli. Masqui yejhua sanoyej pitentzin ipan totlalnacayo, ijcuac yejhua tlajtlajtohua miyec tlamach nochihua.

Xtlanemilican itechcopa on tlilt. On tlilt pehua pitentzin, pero hueli noscaltia niman hasta hueli quitlatia se hueyi tepetl. ⁶ Niman tonenepil quen itlaj tlilt yejhuan ne mictlan hualejticaj itliyo. Yejhua oncaj ipan totlalnacayo, niman tlajtlajtohua ican nochitlajtlamach tlen xcuajli ipan in tlalticpactli. Quijtlacohua nochitlalnacayo niman yejhua techajmana ipan toyojlo ipampa on tlen ica tiquijtohuaj. ⁷ On tlacamej huelij quinmachtiaj

‡ 2:21 altar § 2:23 su amigo * 3:2 cosas † 3:3 freno ‡ 3:4 muy § 3:4 timón de barco

nochi tlajtlamach yolquej, totomej, cohuamej niman on yolquej yejhuan ipan mar nemij, niman ye quinmachtianij. ⁸ Pero xacaj hueli quimachtia inenepil. On nenepijli quen itlaj cohuatl. Yejhua notlajtlajcali niman tenticaj ican iascayo* yejhuan hueli temictia. ⁹ Ican tonenepil ticyectenehuaj Dios toTajtzin, niman no ican tonenepil tiquintenehuiliaj tlen xcujli on tlacamej yejhuan Dios oquinchijchiu quen yejhua nemi ican iEspíritu. ¹⁰ Ipan sa no yejhua on camactli quisa yectenehualistli niman tlahuijhuicaltilistli. Notlaj-sojcaicnihuan, xcujli para ijcon ticchihuasquej. ¹¹ ¿Hueli ameyaj atl yejhuan xpoyec niman atl yejhuan poyec ipan san se ameyajli? ¡Ca! ¹² Nocnihuan, ¿hueli se cojtlit itoca higuera quitlaquitis se tlaquilyotl itoca aceituna, noso on icuamecayo uvas quitlaquitis se tlaquilyotl itoca higos? ¡Ca! No sa no ijqui, tej, se ameyajli poyec xhueli cueponaltis atl yejhuan xpoyec.

Tlamachilistli yejhuan melahuac

¹³ Tla nemotzajlan nemi on yejhuan notenehua ica sanoyej tlamatquij‡ niman miyec cajsicamati, ma quiteititi ican cuajli inemilis ican yolyemanilistli§ yejhuan itlamatquilis* quimaca. ¹⁴ Pero tla nenquipiaj nexicolistli ipan nemoyojo noso nochipa nenquinemiliaj tlen cuajli san para nemejhuamej, tla ijcon ma ca xmohueyimatican yejhua ica on nemotlamatquilis. Ma ca xnemilican ica nenquipiaj tlamatquillistli, pampa xnejli nenquipiaj. ¹⁵ Tlamatquillistli quen on xhualehua itech Dios, yej quisticaj nican ipan in tlalticpactli. Yejhua in tlamatquillistli quisticaj intech yejhuamej in tlajtlacolejquej niman itech on diablo. ¹⁶ On tlacamej yejhuan tenexicolitaj niman san quinemiliaj on tlen cuajli para yejhuamej, sa no yejhuamej xcujli nohuicaj, niman intech oncaj nochip on tlajtlamach tlen xcujli. ¹⁷ Pero on yejhuan quipiaj itlamatquilis Dios nemij chipajquej. Niman no quinequij yolsehuilistli inhuan ocsequimej, niman nemij yolyemanquej, niman no-calactiaj quinojnotzasquej on yejhuan ocse tlamantic inemilis. No ijqui yejhuamej sanoyej† teicnelianij‡, niman quitechihuiliaj miyec tlajtlamach tlen cuajli, niman xqueman techicotaj, niman nochip on quichihuaj ican nochip inyojo. ¹⁸ Yejhuamej quichihuaj canica para onyas yolyemanalistli niman ijcon yolmelajcanemij.

4

On tlaneltoaquej nonequi cahuilisquej Dios ma quinmandaro

¹ ¿Canon hualehua ica nocualanhua niman nohuijsoquilo nemotzajlan? Hualehua itech on xcujli nemoelehuijis* yejhuan sanoyej† tequiti ipan nemoyojo. ² Nemejhuamej nenquinequij itlaj, niman san pampa xhueli nenquipiaj, nentemictisnequij. Tla se quipia itlaj caultzin, nennexicolmiquij, niman pampa xhueli nenquipiaj, nemocamahuijsojquij tehuan niman nente-huijsoquij. Xnenquipiaj tlen nenquinequij pampa xnenquitlajtlaniliaj Dios. ³ Niman ijcuac nentlajtlanij, xnenquiseliaj, pampa nentlajtlanij ican xcujli elehuilistli. Nenquinequij nenquitlajtlanisquej para nenquitequitiltisquej ipan on tlen xcujli nemoelehuijis quinequi. ⁴ ¡Oh nemejhuamej tlacamej yejhuan xoc nenquitocaj Dios! Nemejhuamej quen se sihuatl yejhuan ahuijnemi. ¿Xnenquimati ica on yejhuan quinequij ican xcujli elehuilistli on tlajtlamach‡ yejhuan oncaj ipan in tlalticpactli, yejhuamej nochihuaj itlahuelicnihuan Dios? San aquinon yejhuan ican xcujli elehuilistli quinequi

* 3:8 veneno † 3:12 árbol ‡ 3:13 sabio § 3:13 humildad * 3:13 su sabiduría † 3:17 mucho ‡ 3:17 tiene misericordia * 4:1 su deseo † 4:1 mucho ‡ 4:4 cosas

on tlajtlamach yejhuan oncaj ipan in tlalticpactli nochihua itlahuelicniu Dios. ⁵ Ma ca xnemilican ica on Yectlajcuilojli xitlaj[§] quijsosnequi ijcuac quijtohua:

On iEspíritu Dios yejhuan ocuajtitlan totech sanoyej cualani ijcuac iconehuan quitocaj on tlen xcuajli.

⁶ Pero Dios techpalehuiya ican icuajlilis para tictlanij on xcuajli toelehuis. Yejhua ica on Yectlajcuilojli quijtohua:

Dios xquinselia on yejhuan nohueyimati, yej yejhua quimpalehuiya ican iteicnelilis* on yolyemanquej.

⁷ Yejhua ica, tej, xcahuilican Dios ma mechmandaro niman ma ca xmocahuilican on diablo ma mechmandaro, niman ijcon yejhua mechtlalcahuis.

⁸ Xnisihuican Dios niman yejhua mechnisihuis. Nemejhuamej tlajtla-colejquej, xmoquixtilican nemotlajtlacolhuan quen se tlacatl quino-quixtilia on tlajli ijcuac nomajtequiya. Nemejhuamej yejhuan nenquinequij tlajtlamach ipan in tlalticpactli ican xcuajli nemoelehuilis niman no nenquinequij nenquitocasquej Dios, xchipahuacan nemoy-ojo.

⁹ Xmajmanacan; xmoyolcococan, niman xchocacan. Xmoteltican ma ca sa xhuetzcacan, yej ma quisa nemixayo. Xmoteltican ma ca sa xpaquican, yej pehua xmajmanacan.

¹⁰ Xmoyolyemanilican ixpan toTeco, niman yejhua mechhueyilis.

On tlaneltocaquej xquintocarohua notenehuilisquej on tlen xcuajli ihuan ocsequimej

¹¹ Nocnihuan, ma ca xmotenehuilican on tlen xcuajli ihuan ocsequimej. On yejhuan quitenehuilia se tocniu on tlen xcuajli noso quitlajtlacolmaca, xquitlacaita on tlanahuatijli yejhuan technahuatia para titolajsojtlasquej† ihuan ocsequimej. In sa no ijqui quen quinemilisquia ica on tlanahuatijli xcuajli. Ijcuac ticnemiliaj ica se tlanahuatijli xcuajli, xtictlacamatij, yej tiquintlapejpeniaj catlejhua más cuajli para tictlacamatisquej niman catlejhua xcuajli para tictlacamatisquej. ¹² Pero san Dios oquitemacac on tlanahuatijli niman san yejhua teyolcuitia niman tetlajtlacolmaca. Yejhua hueli techmaquixtis noso techtlajtlacolmacas. Pero tejhua, ¿tiaquinon para tiquijtos tla se tlacatl oquichiu on tlen cuajli noso xcuajli?

On tlaneltocaquej xquintocarohua nohueyimatisquej pampa xquimati tlinon nochihuas ipan ocse tonajli

¹³ Aman nemejhuamej yejhuan nenquijtohuaj: “Aman noso mostlatiasquej neca ipan on hueyican noso ipan ocse hueyican, niman tine-misquej ompa se xipan, niman titlanamacasquej, niman tictlanisquej tomin”, xcaquican yejhua in. ¹⁴ Nemejhuamej xnenquimati tlinon nochihuas mostla. Aman, tej, ¿tlinon quijtojticaj nemonemilis? Yejhua sa no ijqui quen on ayautli yejhuan huajnonextia pero nimantzin popolihui. ¹⁵ Yej ijquin nonequi nenquijtosquej: “Tla toTeco quinequi, tinemisquej niman ticchihuasquej yejhua in noso yejhua on.” ¹⁶ Pero nemejhuamej nenquijtohuaj noch ocse tlamantic. Nemohueyimati ica nenquiyacatztlaliaj on tlen nenquichihuasquej. On nemohueyimatis sanoyej xcuajli. ¹⁷ Se tlacatl tlajtlacohua ijcuac xquichihuas on tlen quimati cuajli para quichihuas.

5

Santiago quintlajtlacolmaca on yejhuan ricos

§ 4:5 nada; coxtla * 4:6 su misericordia † 4:11 amarnos

¹ ¡Xcaquican yejhua in nemejhuamej yejhuan nenricos! Xixayoquisacan niman xtzajtzican ican ajmantli ipampa on tlen tecocoj nenquijyohuisquej. ² Nemorriquezas yopalanquej, niman nemotlaquehuan cuajcualtin yoquicuaj on itlacuanyo. ³ Nemooro niman nemoplata yoteposquis. Ipan on tonajli ijcuac Dios mechtlaxtlahuilis, on teposquisalyotl quiteititis ica onenquitlajsojtlaquej* nemotomin niman xonenquimpalehuijquej on yejhuan mayanquej. Yejhua ica quen itlaj tliltl nенquiselisquej on tlajyohuclistli ipan nemotlalnacayo. Yonenquimiyequilijquej nemorriquezas ipan in sa ica nochí tonaltin. ⁴ ¡Xquitacan quen ijqui nemohuicaj inhuan nemotequitcahuan! Xonenquinmacaquej intlaxtlahuil on tlacamej yejhuan oquichijquej nemotequivi ne ipan nemotlatoc. ToTeco Dios yejhuan nochihuiyan tlamandarohua oquitac ica xonenquintlaxtlahuilijquej niman ye quincaquini quen quijitohuaj on xcuajli tlajtlamach† nemotechcopa. ⁵ Nican ipan in tlalticpactli nemejhuamej nenquipiaj miyec tlajtlamach yejhuan xmechpolohua, niman nenquichihuaj san tlinon nenquinequij para nempaquisquej. Nennemij quen se yolqui yejhuan ye tomahuac niman ye nemi listo para se tlacatl quimictis. ⁶ Nemejhuamej onenquintlajtlacolmacaquej niman onenquinmictijquej on yolkmelajquej yejhuan xhuelij nomanahuiyaj.

On tlaneltoquej nonequi quichasquej nochí tlajtlamach ican yolsehuilistli

⁷ Nocnihuan, xhacan ican yolsehuilistli on tlajtlamach yejhuan mechpajsolohua hasta queman toTeco Jesucristo huajlas. Xquitacan quen ijqui on tocaquetl quicha ican yolsehuilistli on tonaltin para quiselia on tlacyotl. Yejhua quicha ican yolsehuilistli on tonaltin ijcuac quiahui. ⁸ Nemejhuamej, tej, no xhacan nochí tlajyohuclistli ican yolsehuilistli niman xmelajcane-mican, pampa ye nisiu para huajlas toTeco. ⁹ Nocnihuan, ma ca xmi-jitocan se ihuan ocse. Tla nemijitosquej se ihuan ocse, Dios mechyl-cuitis niman mechtlajtlacolmacas. Niman yejhua ye nemi listo para huajlas. ¹⁰ Nocnihuan, on tiotlajtojquej yejhuan otlajtlajtojquej ipampa toTeco Dios, yejhamej quen ejemplos para tejhuamej. Ijcuac otlajyohuijquej, yejhamej oquipixquej yolsehuilistli. ¹¹ Ticmatztoquej ica quipiaj hueyi tla-tiochihualistli on yejhuan oquixicojquej ican yolsehuilistli on tlajyohuclistli. Nemejhuamej nenaquinij quen ijqui Job oquixicoj on tlajyohuclistli ican yolsehuilistli niman quen ijqui toTeco oquitiochiu ica on tlen cuajli ijcuac yotlajyohuij. ToTeco sanoyej‡ tenotzqui niman teicneliani§.

On tlaneltoquej xquintocarohua itlaj quitenehuasquej ijcuac quitlalij im-promesa

¹² Aman, nocnihuan, in sanoyej hueyi quijtosnequi. Ma ca xmelajcaijtocan ica on cielo*, nion ica on tlalticpactli, nion ica itlaj ocse tlajtlamach. Tla se tlacatl mechtlajtoltia itlaj yejhuan melahuac noso xmelahuac, san xqui-jitocan “quemaj” tla melahuac, noso xquijtocan “ca” tla xmelahuac. Ijcon xchihuacan para Dios xmechtlajtlacolmacas.

On tlaneltoquej nonequi quichihuasquej oración ican tlaneltoctli

¹³ Tla se de nemejhuamej itlaj quitlajyohuilstia, ma quichhua oración. Tla se paqui, ma quiyectenehua Dios ican tlacuicajli. ¹⁴ Tla se cualo, ma quinnotza tocniuhan yejhuan tlajtlajmatquej ipan on tiopan para yejhamej ipampa ma quichihuacan oración niman ma quitlalilican on aceite ican

* **5:3** le amaron † **5:4** cosas ‡ **5:11** muy § **5:11** misericordioso * **5:12** On cielo oncaj ne campa oncaj ajacatl, moxtli, metztlí, tonajli niman sitlalimej.

itocatzin toTeco. ¹⁵ On oración yejhuan quichihuasquej ican tlaneltoctli quipajtis on cocoxqui, niman toTeco quetztehuas. Tla yejhua yoquichijca tlajtlacojli, Dios quitlapojpolhuilis. ¹⁶ Yejhua ica, tej, xmojlican nemotlajtla-colhuan ihuan ocsequimej, niman xchihuacan oración impampa ocsequimej para ijcon nemejhuamej nempajtisquej. Ioración on yolmelajqui tlacatl yejhuan ican noch iyojlo quichihua, sanoyej quipia poder niman hueli quichihua miyec. ¹⁷ Xtlanemilican itechcopa on tiotlajtojquetl Elías. Yejhua sa no ijqui tlacatl catca quen tejhuatej. Yejhua oquichiu oración ican noch iyojlo para ma ca ma quiahui, niman xoquiau yeyi xipan huan tlajco. ¹⁸ Niman quemaj ocsejpa oquichiu oración para quiahuis, niman ocsejpa opeu quiahui, niman on tlatoctli otlac.

On tlaneltocaeje nonequi cuajcuepasquej on tlajtlacolej ipan on xcuajli ojtli campa yau

¹⁹ Nocnihuan, tla se tocniu quitlalcahuiya on ojtli yejhuan melahuac niman yacaj cuajcuepas ocsejpa, ²⁰ xmatican cuajli ica san aquinon yejhuan quicuepa on tlajtlacolej ipan on xcuajli ojtli campa yau quimaquixtis ialma on tlajtlacolej ipan on miquilistli, niman quichihuas para miyec tlajtlacojli ma notlapojpolhui.

1 SAN PEDRO ACHTOJ ITLAJCUILOL ON APÓSTOL SAN PEDRO

Pedro quintlajcuilhuiya on tlaneltoquej yejhuan chajchayajtinemij

¹ Nejhua, Pedro, niiapóstol Jesucristo. Nemechtalajcuilhuiya nemejhuamej yejhuan xn enchantij nemochan, yej nenchajchayajtinemij imanyan in yehualican Ponto, Galacia, Capadocia, Asia niman Bitinia. ² Dios to Tajtzin omechtlapetpenijca para iconehuan pampa oquimat ica ipan in tonaltin nenquineltocasquej Jesucristo. Itechcopa on Espíritu Santo, Dios omechchipahuilij nemotlajtlacol para nenquitlacamatisquej Jesucristo niman para Cristo ma mechchipahua ican iyesyotzin. Xpiacan, tej, miyec tlatiochihualistli niman yolsehuilistli.

Ma ticyectenehuacan Dios ipampa on tlamachalistli yejhuan melahuac

³ Ma ticyectenehuacan Dios iTajtzin toTeco Jesucristo pampa ican hueyi iteicnelilis* otechmacac yencuic nemelistli. Ijcon, tej, otitlacatquej ocsejpa. Yejhua ica ticpiaj tlamachalistli yejhuan melahuac, pampa Jesucristo onoyolihuitij† niman onoquetzteu ipan itlalcon. ⁴ Niman no ijqui ticpiaj se herencia yejhuan Dios techehuilijtacaj ne ilhuicac. On herencia xqueman huelis xoxotonis, nion xhuelis ijtacakahuis, nion xhuelis polihuis icualzinca. ⁵ Niman pampa nemejhuamej nenquineltocaj Dios, yejhua mechmanahuiya ican ipoder hasta ipan on sa ica noch tonajli ijcuac mechititis ica yocaxitij nemotemaquixtilis.

⁶ Yejhua ica, tej, nemejhuamej sanoyej‡ nempaquij masqui cas nenquijyohuisquej quesqui tonaltin miyec tlajtlamach§ tetlatlatalistli. ⁷ Nemejhuamej nenquijyohuiyaj on tlajtlamach pajsolohuilistli niman tetlatlatalistli san para quitlatlatasquej nemotlaneltoc para nopantlantis tla melahuac nentlaneltocaj. Nenquimatiq quen ijqui on tlacamej quitlatlataj on oro ican tlitl para quitasquej tla melahuac noch yejhua. Tej, nemotlanel toc más hueyi quijtosnequi xquen on oro yejhuan hueli popolihui. Tla cuajli quisas nemotlanel toc itech on tetlatlatalistli, nenquiselisquej yectenehualistli niman hueyilistli niman tetlacaitalistli ipan on tonajli ijcuac Jesucristo huajlas ocsejpa.

⁸ Nemejhuamej nenquitlajsojtla†* Jesucristo masqui xqueman onen quitaquej. Masqui aman xnenquitaj, nenquineltocaj niman nempaquij ican paquillistli yejhuan ajsiticaj. In paquillistli sanoyej hueyi niman xhueli noch nenquipanextiaj ican tlajtojli. ⁹ Pampa nenquineltocaj, nenquiselaj temaquixtilistli para nemoalma.

¹⁰ Ye huejcahui on tiotlajtojquej, yejhuan oquijtojquej ica nenquiselisquej in temaquixtilistli ican iteicnelilis Dios, oquitejtemojquej niman ican noch inyojlo otetlajtlajtoltijkej para quimatisquej quen ijqui onyas in temaquixtilistli. ¹¹ Ijcuac on Espíritu yejhuan Cristo oquinmacac oquintitij on tlen Cristo quijyohuis niman saquin† quipias hueyilistli, yejhuatej quinequiya quimatisquej aquinonon yejhua niman quemanon nochihuas. ¹² Dios oquin machiltij on tlajtlamach yejhuan oquijtojquej. Yejhua oquinmachiltij ica xnochihuas chica nemij, yej nochihuas ijcuac miyec xipan yoticpanoquej. Aman, tej, Cristo ocuajtitlan on Espíritu Santo ne ilhuicac para quimpalehuis

* **1:3** su misericordia † **1:3** resucitó; onoyolitij ‡ **1:6** muy § **1:6** cosas * **1:8** le aman
† **1:11** después

on yejhuan mechmachtiaj ica on temachtijli yejhuan quitemaca temaquixtilistli. Yejhuamej ye mechijlianij ica nochihuas on tlen on tiotlajtojquej oquijtojquej ye huejcahui. Hasta sa no on ilhuicactequitquej‡ cajsicamatisnequij on temaquixtilistli yejhuan Dios mechmaca.

On tlaneltocaquej nonequi chipajtiasquej quen Dios chipahuac

¹³ Yejhua ica xtlamachilistlachacan para cuajli xtlanemilican. Cuajli xmoyecanacan. Xmachacan ican nochí nemoyojo lo iteicnelilis§ Dios yejhuan nenquiselisquej ijcuac Jesucristo huajlas. ¹⁴ Pampa neniconehuan Dios yejhuan nenquitlacamatij, ma ca xcahuilican on xcuajli elehuilistli* mechyeccanas yejhuan nenquipiayaj ijcuac xnenquixmatiyaj Dios. ¹⁵ Yej xchijchipajtiacan ican nochí tlen nenquichihuasquej quen Dios chipahuac yejhuan omechnotz para nenquiselisquej temaquixtilistli. ¹⁶ Dios quijtohua ipan on Yectlajcuilojli: “Nemejhuamej xchijchipajtiacan pampa nejhua nichipahuac.”

¹⁷ Tla nenquitocayotiaj “toTajtzin” on yejhuan toDios, xquelnamiquican ica yejhua xtechicoita itech se tlacatl ihuan ocse ijcuac quintlaxtlahuilia, yej quintlaxtlahuilia quen se quichihua. Yejhua ica, tej, xtlacaitacan Dios ican nemojtijli ipan nochí tonaltin quech nennemisquej ipan in tlalticpactli. Niman xquelnamiquican ica tinemij ipan in tlalticpactli quen xtichanejquej. ¹⁸ Dios, tej, omechquixtij ipan on nemilistli yejhuan onenquiselijquej intech on ye huejcahui nemotajhuan. Yejhua on xcuajli nemilistli xomechpalehuij. Niman nemejhuamej cuajli nenquimatztoquej ica quech onotlaxtlau nemotemaquixtilis. On nemotemaquixtilis xonotlaxtlau ican tlajtlamach yejhuan tlamis quen yejhua on oro noso plata, ¹⁹ yej ican on tlen patioj iyesyo Cristo. Yejhua onohuentlalij quen se borreguito yejhuan nochí cuajli niman xquipia ijtlacahuilistli. ²⁰ Ijcuac in tlalticpactli xe oncatca, Dios oquitlapejpenij Cristo para quityahuas iyesyo niman ijcon mechmaquixtis. Pero Cristo san quemach onesico niman omic nemopampa. ²¹ Ipampa Cristo nemejhuamej nenquineltocaj Dios, yejhuan oquiyolihuitij niman oquetzteu ipan itlalcon niman oquimacac hueyilistli. Ijcon, tej, nemejhuamej nenquipiaj nemotlaneltoc niman nemotlamachalis itech Dios.

²² Aman pampa nenquitlacamatij itlajtol Dios, nemoalma chipajquej para nenhuelisquej nenquintlajsojtlasquej† on tocnihuan. Yejhua ica sanoyej xmotlajsojtlacan inhuan ocsequimej ican nochí nemoyojo. ²³ Nemejhuamej, tej, yonentlacatquej ocsejpa. Onenquiselijquej yencuic nemilistli yejhuan xqueman tlamis. Nemotajhuan niman nemonanhuan xomechmacac in yencuic nemilistli pampa on nemilistli yejhuan yejhuan omechmacaquej tlamis. Onenquiselijquej in yencuic nemilistli itechcopa itlajtol Dios, yejhuan oncaj niman onyas para nochipa. ²⁴ On Yectlajcuilojli quijtohua:

Nochi tlacatl sa no ijqui quen itlaj xojtli, niman ihueyilis on tlacatl sa no ijqui quen on xochitl ne ipan on tepetl. On xojtli pilini niman huetzi ixochiyo,

²⁵ pero itlajtol Dios onyas para nochipa. On itlajtol Dios, yejhua on temachtijli yejhuan quitemaca temaquixtilistli yejhuan yomechijlijquej.

2

¹ Pampa nenquipiaj yencuic nemilistli, ma ca queman xchihuacan tlen xcuajli. Ma ca xtecajcayahuacan, nion ma ca xomexayacnemican, nion

‡ ^{1:12} ángeles: Angeles tequitij ne ilhuicac niman nican ipan in tlalticpactli. § ^{1:13} su misericordia

* ^{1:14} deseos † ^{1:22} los amarán

ma ca xtenexicolitacan, nion ma ca xijistlacatican. ² Aman, tej, sanoyej* xnequican on tlen nochitlajtol Dios quen on coconej yejhuan selicacoconej sanoyej quinequij chichisquej. Sanoyej xnequican para ica nemoscaltisquej chica nenquiselaj temaquixtilistli, ³ pampa cuajli yonenquimatzquej ica toTeco melahuac cuajli.

Cristo quen se tetlyejhuan yolticaj

⁴ Xnisihuican Cristo yejhuan quen se tetlyejhuan yolticaj. Dios oquitlapejpenij para quitlalis quen yecatztica yejhuan más hueyixtias tetl ipan itiopan. Masqui Dios oquitlapejpenij Cristo niman para yejhua sanoyej hueyi quijtosnequi, on tlacamej xoquiselijquej. ⁵ Nemejhuamej no nenyoltoquej niman quen nentemej. Yejhua ica, tej, xmotemacacan para Dios ma mechtequitilti quen nentemej yesquiaj para quichijchihuas itiopan. No ijqui xmocahuilican para Dios ma mechtlali quen tiopixquej yejhuan chijchipajquej para nenquintlalischej huentin yejhuan Dios huelis quiselis, pampa nenquineltocaj Jesucristo. ⁶ Dios ipan in Yectlajcuilojli tlajtohua de Cristo:

Xcaquican, nictalia se tetlyejhuan para yecatztica ne ipan on chanyotl† itoca Sión. Onictlapejpenij yejhua in tetl, niman para nejhua in tetl sanoyej hueyi quijtosnequi. In tetl quijtosnequi noConeu. On yejhuan quineltocas yejhua, xqueman pinahuas.

⁷ Aman yejhua no sanoyej hueyi quijtosnequi para nemejhuamej yejhuan nentlaneltocaj. Pero para on yejhuan xtlaneltocaj, impan nochihua yejhua in tlen quijtohua in Yectlajcuilojli:

On tetlyejhuan on tepanchijchiquej xoquiselijquej, aman yejhua yonotlalij yecatztica.

⁸ Niman no impan nochihua on tlen quijtohua in Yectlajcuilojli:

Oncaj se tetlyejhuan ica nocxitechacuanihua, niman in tetl hueli tetlajcali. Yejhamej nocxitechacuaniaj sa no ijqui quen Dios oquintlalilij ica nochihuas ipan pampa xquitlacamatij on itemachtil.

Nemejhuamej omechtlapecjpenij Dios

⁹ Pero nemejhuamej Dios omechtlapecjpenij, niman nentiopixquej para nenquipalehuisquej toRey. Niman nemejhuamej no nentlaneltocaquej yejhuan chipajquej, niman nemejhuamej no nenteyaxcahuan‡ itech Dios. Niman nochitlajtol Dios quen on coconej yejhuan selicacoconej sanoyej quinequij chichisquej. Sanoyej xnequican para ica nemoscaltisquej chica nenquiselaj temaquixtilistli, ³ pampa cuajli yonenquimatzquej ica toTeco melahuac cuajli.

On tlaneltoaquej xquintocarohua quichihuasquej on tlen xcuajli

¹¹ Notlajsojcaicnihuan, nenquimatiij ica aman nemejhuamej nenchanejquej ne ilhuicac masqui nenchantij quesqui tonaltin más nican ipan in tlalticpactli. Yejhua ica sanoyej nemechtlaajtlanilia ma ca xcahuilican ma mechyevana on xcuajli nemoelehuijis* yejhuan noxixicohua ihuan nemoalma. ¹² Xmohuicacan cuajli imixpan on yejhuan xquixmatij Dios. Ijcon masqui cas quitenehuaj ica yonenquichijquej on tlen xcuajli, yejhamej quitasquej on tlen cuajli yejhuan nemejhuamej nenquichihuaj. Niman quemaj quiyectenehuasquej Dios ijcuac ajsis on tonajli para techtlaxtlahuilis.

* **2:2** mucho † **2:6** casa; cajli ‡ **2:9** le pertenecen; nenteaxcahuan, nentehuaxcahuan, nentetlatquihuan § **2:10** su misericordia * **2:11** deseos de ustedes

On tlaneltocaquej nonequi quintlacamatisquej on tequihuajquej niman on inteco

¹³ Xquintlacamatican nochí on tequihuajquej yejhuan on tlacamej quintlaliaj para ijcon nochimej quitlacaitasquej toTeco. Xtlacamatican on más hueyi tequihuaj emporador yejhuan quipia más hueyi tequihuajyotl.

¹⁴ Niman no xquintlacamatican on tequihuajquej gobernadores yejhuan quinmactilia on tlanahuatijli para quincastigarosquej on yejhuan quichihuaj on tlen xcuajli, noso para quintlacaitasquej on yejhuan quichihuaj on tlen cuajli. ¹⁵ Xquintlacamatican ijcon pampa Dios quinequi xchihuacan on tlen cuajli para on yejhuan tzonteconchicajquej xhuelis itlaj mechijtohuilisquej.

¹⁶ Xmohuicacan quen tlacamej yejhuan tlamacaltin. Pero ma ca xnemilican pampa nemomacahualis, nenhuelsquej nenquichihuasquej on tlen xcuajli. Yej más cuajli xmohuicacan quen itlacohualhuan Dios. ¹⁷ Cuajli xquintlacaitacan nochimej, xquintlajsojtlacan† nochimej tocnihuan, xtla- caitacan Dios, niman xtlacaitacan on más hueyixtacaj tequihuaj.

¹⁸ Nemejhuamej tlanamactin, xquintlacamatican nemoteco ican nochí tetlacaítalistli. Ma ca san xquintlacamatican yejhuamej on yejhuan cuajcualtin niman tenotzquej, yej no yejhuamej on yejhuan xcuajcualtin. ¹⁹ Tla nenquixicohuaj on tlajyohuilstli yejhuan xmechtocarohua nenquipiasquej san pampa nenquimatiq quen ijqui Dios quinequi para nemohuicasquej, tla ijcon, mechtlacaitasquej. ²⁰ Pero tla nemejhuamej nenquichihuaj itlaj tlen xcuajli, niman yejhua ica mechcastigarohuaj, xacaj mechtlacaitas. Pero tla nentlajyohuiyaj pampa onenquichijquej on tlen cuajli, niman cuajli nenquixicohuaj ican yolsehuilstli, quemaj Dios mechtlacaitas. ²¹ Dios omechnotz para nenquichihuasquej on tlen cuajli masqui nentlajyohuisquej. San yejhua Cristo otlajyohuij nemopampa, niman ijcon omechititij quen ijqui no nonequi nenquichihuasquej. ²² On Yectlajcuilojli quijtohua itech ica Cristo: Yejhua nion se tlajtlacojli xoquichiu, nion ocajgayu yacaj.

²³ Ijcuac on tlacamej ocuijhuicaltijquej Cristo, yejhua xotlananquilij ican tlahuijhuicaltilistli. Ijcuac oquitlajyohuiltijquej, xoquijtoj ica quincojcocos nion quinmictis, yej oquinmactilij Dios yejhuan nochipa tetlaxtlahuilia quen nonequi.

²⁴ Ne ipan cojnepanojli‡ sa no Cristo oquiselij castigo ipan itlalnacayo ipampa totlajtlacol, para tejhuamej ma ticajcahuacan on ica titlajtlacohuaj niman para ma tiyolmelajcanemican. Aman Dios yomechtlapojojpolhuij ipampa on tlen oquijyohuij Cristo.

²⁵ Nonequiya para Dios mechtlapojpolhuis pampa nenchayajcaquistinemiyaj itech iojhui quen borreguitos yejhuan polijtinemij. Pero aman yonenhualajquej itech Cristo yejhuan mechtlapia quen se tlajpixqui niman yejhuan quimejehua nemoalmas.

3

On yejhuan tehuan nemij nonequi chantisquej ican tetlacaítalistli

¹ Sihuamej, no ijqui xtlacaitacan nemohuehuentzin. Ijcon, tej, tla se de nemejhuamej quipia ihuehuentzin yejhuan xquineltoca itemachtil Dios, huelis noyolehuas ica on quen tejhua timohuicas, niman xafuerza ticnojnotzas, ² pampa quitas quen ican chipahualistli timohuica, niman quen ijqui tictlacaita Dios. ³ Nemocualtzinca xquitocarohua hualehuas itech on tlajmachyotl* yejhuan tlachijchiutli ican oro, noso itech on tlaquentin yejhuan

† 2:17 ámenlos ‡ 2:24 cruz * 3:3 adorno

cualtzitzintin, noso tla notzonmalinaj sanoyej† caultzin. ⁴ Yej nemocaultzinca† nonequi quisas ipan nemoyojo, ijcon quen se sihuatl quisa icualtzinca ipan iyojo ijcuaac yolyemanqui§ niman tenotzqui. In, tej, yejhua hueyi quijtosnequi ixpan Dios. ⁵ Ye huejcahui on sihuamej yejhuan chipajquej catcaj niman quineltocayaj Dios ijcon onocualtzintilijcaj. Cada se de yejhamej quitlacamatiya ihuehuentzin ⁶ ijcon quen Sara, yejhuan quitlacamatiya Abraham niman oquitlacaitac ijcuaac oquitocayotij “noteco.” Nennemisquej quen Sara tla nenquitocasquej iejemplo ica nenquichihuasquej on tlen cuajli niman xitlaj* nenquimacajsisquej.

⁷ Tlacamej, xmotencaquican cuajli inhuan nemosihuahuan. Niman xquintlacaitacan quen nonequi pampa yejhamej más malhultin xquen nemejhuamej, niman pampa yejhamej no nemohuan quiselisquej se nemilistli yejhuan Dios otechmacac ican iteicnelilis†. Ijcon cuajli xmohuicacan inhuan nemosihuahuan para ma ca itlaj quitzacuilis nemooraciones.

Yejhuan tlajyohuiyaj ipampa on tlen cuajli quichihuaj quiselisquej itlatiochihualis Dios

⁸ No sa ica nochí, nemochimej cuajli xnemican sequimej inhuan osequimej ican pactli. Xmajmanacan ijcuaac se itlaj cajmana. Xmotlajso-jtlacan† sequimej inhuan osequimej quen icniutin. Xteicnelican niman xyolyemanxtiacan. ⁹ Tla yacaj itlaj mechchihuilis tlen xcuajli, ma ca no ijqui nencuepilisquej, noso tla yacaj mechtenehuilia on tlen xcuajli, ma ca no nenquitenehuilisquej on tlen xcuajli. Yej xcuepilican ican tlatiochihualistli, pampa Dios omechnotz para ijqui nemohuicasquej, niman ijqui nenquiselisquej se tlatiochihualistli. ¹⁰ Nemechijlia ijquin pampa on Yectlajcuilojli quiptoqua:

On yejhuan quinequi paquis ipan inemilis niman quinequi quipanos ican cuajli tonaltin, ma quejehua inenepil para ma ca ma quipto on tlen xcuajli, niman iten para ma ca yacaj ma cajcayahua.

¹¹ Ma ca sa ma quichihua on tlen xcuajli, niman ma quichihua nochí tlen cuajli. Ma quitejtemo yolsehuilistli inhuan osequimej niman ican nochí iyojo ma quejeco quipias.

¹² Ma quichihua nochí in tlajtlamach§ pampa Dios quintlacaita on yejhuan yolmelajquej*, niman caqui inoración. Pero yejhua xquinchihuilia cuenta yejhuan quichihua tlen xcuajli.

¹³ Tla ican nemoyojo nochipa nenquichihuaj on tlen cuajli, ¿aquinon, tej, mechpajsolos? ¹⁴ Pero tla nentlajyohuiyaj pampa nenquichihuaj on tlen cuajli, nenquiselisquej itlatiochihualis Dios. Yejhua ica ma ca xmomojtican ica on tlen quiptoqua niman quichihua, nion ma ca xcomatztiacan. ¹⁵ Yej ipan nemoyojo xtlacaitacan Cristo ica yejhua nemoTeco. Nochipa xnemican listos para nenquinnanquilisquej nochimej on yejhuan mechtlajtoltisquej de nemotlamachalis. Pero ijcuaac nenquinnanquilisquej, xchihuacan ican yolyemanilistli niman tetlacaitalistli. ¹⁶ Ma ca xcahuilican nemotlamachilis ma mechtlajtlacolmacakan. Ijcon on yejhuan mechtenehuiliaj on tlen xcuajli, pampa cuajli nemohuicaj itech Cristo, pinahuasquej itechcopa intlajtol. ¹⁷ Más cuajli nentlajyohuisquej ipampa on tlen cuajli nenquichihuasquej, tla Dios quinequi, xquen tla nentlajyohuisquej ipampa on tlen xcuajli nenquichihuasquej. ¹⁸ Sa no yejhua Cristo otlajyohuij niman omic ipampa totlajtlacolhuan. Yejhua omic san sejpa para nochipa. Yejhua yejhuan

† 3:3 muy ‡ 3:4 su belleza § 3:4 humilde * 3:6 nada; coxtla † 3:7 su misericordia

‡ 3:8 ámense § 3:12 cosas * 3:12 humilde

yolmelajqui, omic topampa yejhuan xtiyolmelajquej para techhuicas itech Dios. Itlalnacayo omic pero iEspíritu oyoliu†. ¹⁹ Niman Cristo ican iEspíritu oyaj para oquinmachtito on almas yejhuan tzacuticatcaj. ²⁰ Yejhamej onencaj ye huejcahui sa no ipan on tonaltin ijcuac nemiya Noé. Niman nochí on tonaltin chica Noé quichijchihuaya on acajli‡, yejhuan Dios oquinahuatij para ma quichijchihua, Dios quinchaya xican tlahuejli para quitlacamatatisquiaj, pero yejhamej ononenecquej. Xquelnamiquican ica ipan on acajli Dios oquimaquixtij san quesquimej tlacamej, san chicueyimej tlacamej. Yejhua oquinmaquixtij ipan atl. ²¹ Niman yejhua on atl, aman yejhua quixnescayotijticas§ yejhua on tlacuatequelistli. Ijcuac otitocuatequijquej, onoteititij ica yotimaquisquej itechcopia iyoliuilis Cristo ijcuac Dios oquetzeteu ipan itlalcon. On tlacuatequelistli xoquichipau tonacayo, yej onoteititij ica tictlajtlaniliaj Dios para se toyojlo yejhuan xtechtlatjtlacolmacas. ²² Aman Cristo nemi ne ilhuicac iyecmacopa Dios campa oncaj tetlacaítalistli niman tlanahuatijli niman campa on ilhuicactequi* niman on tequihuajquej niman on yejhuan quipiaj poder quitlacamatztoquej.

4

Nonequi tinemisquej quen Dios quinequi

¹ Cristo otlajyohuij ipan itlalnacayo. Yejhua ica nemejhamej no xnemican listos quen yejhua para nenquiselisquej tlajyohuclistli. Niman xquelnamiquican ica on yejhuan tlajyohuuya ipan itlalnacayo cajcahua on tlajtlacojli. ² Ijcon, tej, chica yejhua nemis ipan in tlalticpactli, xoc quitocas on xcuajli elehuilistli* yejhuan itlalnacayo quinequi, yej quitocas on tlen Dios quinequi. ³ Ipan on tonaltin catcaj, nemejhamej onenquichijquej miyec xcuajli quen on yejhuan xquixmatij Dios. Nenquichijtetziyaj nochí xcuajli yejhuan ohuajlaj ipan nemotlamachilis, onenquelehuijquej on tlen xcuajli, niman onentlahuantinencaj. Onenquichijquej xcuajli ilhuimej, niman ipan ilhuimej sanoyej† nentlahuaniyaj, niman nenquinhueyiliyaj on tlamachijchihuaultin nemotajtzitzihuan yejhuan Dios xmechcahuilia. ⁴ Aman yejhamej on yejhuan xquixmatij Dios, xcajsicamatij tlica‡ xoc nemonelohuaj inhuan ipan on miyec xcuajli tlajtlamach§ yejhuan quichihuaj. Yejhua ica yejhamej mechtenehuiliaj tlen xcuajli. ⁵ Pero yejhamej ica oncaj quixpantilisquej Cristo nochí on tlen xcuajli quichihuaj. Niman Cristo nemi listo para quinyolcuitis niman quintlaxtlahuilis on yejhuan nemij niman no on yejhuan yomiquej. ⁶ Yejhua ica yejhua no oyaj niman oquimijlij on yejhuan yomiquej on cuajli tlajtojli yejhuan quitemaca temaquixtilistli. Dios ye quintlaxtlahuilia ipan intlalnacayo ican miquilistli ijcon quen quitlaxtlahuilis nochí tlacatl. Pero Cristo oquimijlij on cuajli tlajtojli de temaquixtilistli para inalmas huelisquej nemisquej quen Dios nemi.

Nochi on tlaneltoaquej nonequi nohuicasquej cuajli ipan in sa ica nochi tonaltin

⁷ Ye nisu para tlamic nochí tlajtlamach. Yejhua ica, cuajli xnemilican niman cuajli xmocahuacan para nenhuelisquej nenquichihuasquej oración.

⁸ Yejhua in hueyi quijtosnequi. Sanoyej xmotlajsojtlatihiyan ihuan ocsequimej pampa tla melahuac nenquintlajsojtlaj* ocsequimej, nenquintlapopolhuisquej masqui miyecpa tlajtlacosquej nemotech. ⁹ Cuajli xquinselican

† **3:18** resucitó ‡ **3:20** arca de Noé § **3:21** simbolizando * **3:22** ángeles: Angeles tequitij ne ilhuicac niman nican ipan in tlalticpactli. * **4:2** deseo † **4:3** mucho ‡ **4:4** por qué; tline

§ **4:4** cosas * **4:8** aman a ellos

ocsequimej nemochan niman ma ca xquichtacatlatohuilcan nenmojticopa. ¹⁰ Dios omechmacac nemejhuamej on tetlayocoliltin yejhuan mechhuelilia on tlen aman hueli nenquichihuaj. Niman cada se de nemejhuamej omechmacac tetlayocoliltin sesetlamantic. Yejhua ica, nochipa ijcuac nenhuelsquej, cuajli xtequitlitan on tlen Dios omechmacac para nenquimpalehuisquej ocsequimej. ¹¹ Ijcuac yacaj temachtis, ma temachtis ican itlajtol Dios. Ijcuac yacaj quintequipanohua ocsequimej, ma quichhua ican on chicahualistli yejhuan Dios quimaca. Ijcon Dios quiselis yectenehualistli itechcopia Jesucristo. Niman quipias hueyilistli niman poder para nochipa. Ma ijqui nochihuia.

Nentlajyohuiyaj pampa nenquineltocaj Cristo

¹² Notlajsojcaicnihuan, ma ca ma mechmojcatlachaltican on tecocoj tetlatalistli yejhuan nenquijyohuiaj. Ma ca xnemilican ica itlajyohuiaj on tlen xcuajli pampa nenquineltocaj Cristo, nenquiseliaj itlatiochihualis Dios, pampa on Espíritu Santo yejhuan quipia hueyilistli nemi nemopan. On tlacamej quijtohuaj on tlen xcuajli itech Cristo, pero nemejhuamej nenquitlacaítaj. ¹³ Tla on tlacamej mechtenehuiliaj on tlen xcuajli pampa nenquineltocaj Cristo, nenquiseliaj itlatiochihualis Dios, pampa on Espíritu Santo yejhuan quipia hueyilistli nemi nemopan. On tlacamej quijtohuaj on tlen xcuajli itech Cristo, pero nemejhuamej nenquitlacaítaj. ¹⁴ Tla on tlacamej mechtenehuiliaj on tlen xcuajli pampa yejhua otémictij, noso otlachtec, noso xnohuica ipan itlanahuatil on gobierno, noso nocalactia campa xquitocarohua. ¹⁵ Yej tla on tlacamej mechtenehuiliaj on tlen xcuajli pampa yejhua quineltoca Cristo, xquitocarohua pinahuas, yej ma cueyili Dios pampa yejhua tlaneltoquetal. ¹⁶ Yej tla on tonajli para Dios quinyolcuitis niman quintlaxtlahuilis yejhuan tiiconehuan. Tla yejhua toca pehuas ica techcastigaros tejhuamej yejhuan tiiconehuan, ¿quen ijqui quisasquej on yejhuan xquitlacamatij on temachtijli yejhuan quitemaca temaquixtilistli? ¹⁷ On Yectlajcuilojli quijtohuia:

Tla on yejhuan cuajcualtin sa axcan huelij nomaquixtiaj, ¿tlinon impan nochihuas on yejhuan xcuajcualtin niman on tlajtlacolejquej?

¹⁸ Ijcon, tej, nemejhuamej yejhuan nentlajyohuiyaj pampa Dios quinequi, cuajli xchijtiakan quen mechtocarohua. No ijqui, xmactilican nemoalma Dios yejhuan omechchijchiu niman nochipa quichhua quen quitocarohua.

5

Pedro quintlacanonotza on tlajtlajmatquej tlayecanquej itech tocnihuan niman on telpocamej

¹ Aman nicnequi niquntlacanonotzas on tlajtlajmatquej tlayecanquej yejhuan nemij ipan nemotopanhuan. Nejhua no nitlajtlajmatqui tlayecanquetl itech tocnihuan. Oniquitac Cristo ijcuac otlajyohuij niman no nicpias sequi ihueyilis yejhuan huajnonextis. ² Xquintlajpiacan iconehuan Dios yejhuan yejhua omechmactilij para nenquincuidarosquej. Xquimpiacan quen se tlajpixqui quimpia iborreguitos. Ma ca xchihuacan pampa tla yacaj mechchihualtia, yej ican cuajli nemoyojlo quen Dios quinequi. Ma ca xchihuacan pampa nenquinequij nenquitlanisquej tomin, yej san pampa nenquinequij nentequitisquej para Dios. ³ Ma ca xquimpiacan quen nemolactihuian on yejhuan Dios omechmactilij para nenquintlajpiasquej, yej xquinyecanacan ican cuajli ejemplo. ⁴ Ijcuac huajnonextis Cristo, yejhuan quinmandarohua on tlajpixquej, nenquiselisquej se tetlayocolijli sanoyej*

* 5:4 muy

cualtzin yejhuan xqueman popolihui xquen se tetlayocolijli yejhuan ticseliaj ipan in tlalticpactli.

⁵ Telpocamej, no ijqui xquintlacamatican on yejhuan más huehuentzitzintin. Xmohuicacan ihuan ocsequimej ican yolyemanilistli[†] pampa on Yectlajcuilojli quijtohua:

Dios xquinselia on yejhuan nohueyimatquej, pero yejhua quimpalehuiya ican iteicnelilis[‡] on yejhuan yolyemanquej.

⁶ Yejhua ica xmoyolyemanilican ixpan Dios yejhuan quipia nochí poder, niman mechmacas tetlacaítalistli ipan on tonajli yejhuan oquitlapetjpenij.

⁷ Xmactilican Dios nochí on tlajtlamach[§] yejhuan san nencomatztoquej pampa yejhua quinequi mechpalehuis.

⁸ Cuajli xnemilican niman xtlachixtiacan, pampa nemotlahuelicniu on diablo quinequi mechxoxotonis. Yejhua quistinemi quen itlaj león yejhuan nanalcatinemi niman quitejtemojtinemi aquinon quicuas. ⁹ Ma ca xtalamatican on diablo, yej xmelajcanemican ipan nemotlaneltoc. No ijqui xmatztiacan ica nochihuiyan imanyan in tlalticpactli on nemocnihuan no ijqui quen nemejhuamej tlajyohuiyaj. ¹⁰ Saquin ijcuac nemejhuamej yonentlajyohuijquej ipan quesqui tonaltin, sa no Dios mechcuelatlalis, mechmelajcapias, mechcojtilis, niman mechyectlalis ipan nemotlaneltoc. Sa no yejhua Dios techmaca nochí iteicnelilis, niman otechnotz para ticpiasquej ihueyilis itechcopa Cristo yejhuan para nochipa onyas. ¹¹ Ma yejhua quipia hueyilistli niman poder para nochipa. Ma ijqui nochihua.

Pedro tetlajpalohua

¹² Yonemechtlajcuilhuij ican quesqui tlajtojli ipan yejhua in tlajcuilolamatl yejhuan tocniu Silvano oquijcuiloj quen nejhua oniquijlij. Nejhua cuajli nicmati ica yejhua cuajli iyojlo. Onemechtlajcuilhuij para onemechtlacanonotz niman onemechpantlantilij ica iteicnelilis* Dios melahuac. Xmelajcanemican ipan on teicnelilistli.

¹³ Icone huan Dios yejhuan nemij nican ipan Babilonia, niman yejhuan no oquintapejpenij quen nemejhuamej, mechtlajpalohuaj. Nimán Marcos yejhuan quen nocone uyesquia, mechtlajpalohua. ¹⁴ Xmotlajpalocan nochimej ihuan ocsequimej ican tetlajsojtlalistli[†].

Xpiacan yolsehuilistli nemejhuamej yejhuan nennemij san secan ihuan Jesucristo. Ma ijqui nochihua.

[†] 5:5 humildad [‡] 5:5 su misericordia [§] 5:7 cosas * 5:12 su misericordia [†] 5:14 Ipan griego quijtohua: “ican yectli tlatencuajli.” Tlatencuajli quijtosnequi beso.

2 SAN PEDRO

ICA OME ITLAJCUILOL ON APÓSTOL SAN PEDRO

Pedro quintlajcuilhuiya on tlaneltocaquej

¹ Nejhua, Simón Pedro, niitequitcau Jesucristo niman niiapóstol. Nemechijcuilohuilia yejhua in tlajcuilolamatl nemejhuamej yejhuan sanoyej* hueyi quijtosnequi nemotlaneltoc no ijcon sanoyej hueyi quijtosnequi totlaneltoc. Óticselijquej yejhua in tlaneltoctli pampa toDios niman toTemaquixtijcau Jesucristo yolmelaqui. ² Xselican miyec tlatiochihualistli niman yolsehuilistli itechcopa nemoteixmachilis itech Dios niman Jesús on toTeco.

Dios yoquinnotz niman yoquintlapejpenij on tlaneltocaquej itech Cristo

³ Dios ican ipoder yotechmacac nochí tlen techpolohua para tonemilis niman para tinemisquej chipajquej quen yejhua. In nemilistli niman chipahualistli ticpiaj pampa tiquixmatij yejhua yejhuan otechnotz itechcopa ihueyilis niman icuajlilis. ⁴ Ijcon, tej, otechmacac on yejhuan sanoyej huejhueyi ipromesas, niman huejhueyi quijtosnequi para intechcopa on ipromesas nemejhuamej huelis nennemisquej niman nennemisquej quen Dios. Niman no huelis nenquisasquej ipan on tlen xcuajli yejhuan oncaj ipan in tlalticpactli ipampa xcuajli elehuilistli†. ⁵ Yejhua ica ma ca san xtlaneltocan, yej no xchihuacan canica para huelis nenquichihuasquej on tlen cuajli. Niman ma ca san xchihuacan on tlen cuajli, yej no xchihuacan canica para más nencajsicamatisquej más ica Dios. ⁶ Niman ma ca san xcajsicamatican yejhua on, yej no cuajli xmoteltlalican ican nemoelihiulis. Niman ma ca san cuajli xmoteltlalican ican nemoelehuilis, yej no cuajli xxicocan on tlajyohuilstli. Niman ma ca san cuajli xxicocan on tlajyohuilstli, yej no xmohuicacan ican yolchipahualistli quen Dios quichihua. ⁷ Niman ma ca san xmohuicacan ican yolchipahualistli quen Dios quichihua, yej no xmotlajsojcapalehuican quen nemicniutin. Niman ma ca san xmotlajsojcapalehuican, yej no xmotlajsojtlacan. ⁸ Tla ipan nemoyojo oncaj in tlajtlamach‡ niman in noscaltia ipan nemoyojo, nemonemilis xsanencaj onyas, yej nenquichihuasquej tlajtlamach para Dios pampa nemotlaixmachilis yejhuan nenquipiaj itech ica toTeco Jesucristo. ⁹ Pero on yejhuan xipan iyojo oncaj in tlajtlamach, xcajsicamati on tlajtlamach itech ica Dios. Yejhua oquelcau ica on itlajtlacolhuan yonotlapojpolhuij. ¹⁰ Yejhua ica, nocnihuan, xchihuacan canica para nenuimatisquej ican nochí nemoyojo ica melahuac Dios yomechnotz niman yomechtlapenij. Tla ijcon nenquichihuasquej xqueman nenhuetzisquej. ¹¹ Yej cuajli nencalaquisquej ne campa toTeco, yejhuan toTemaquixtijcau Jesucristo, tlamandarohua para nochipa.

¹² Yejhua ica nemechelnamictijtas yejhua in tlajtlamach, masqui ye nenuimatztoquej niman ye nemelajcanemij ipan on cuajli temachtijli yejhuan yonenquiselijquej. ¹³ Nicuitia cuajli, chica oc§ ninemi, para nemechelnamictis in tlajtlamach tlinon ica yonemechnojnotz. ¹⁴ Nicmati ica saniman nimquis quen toTeco Jesucristo yonechmachiltij. ¹⁵ Niman nicchihuas canica para ijcuac nejhua nimquis nemejhuamej nochipa nenuquenam quisquej in tlajtlamach.

Pedro niman ocsequimej oquitaquej ihueyilis Cristo

* **1:1** muy † **1:4** deseo ‡ **1:8** cosas § **1:13** todavía; sanquen

16 Ijcuac otemechnojnotzquej ica ipoder toTeco Jesucristo niman ica yejhua huajlas ocsejpa, xoticnejnemilijquej quen itlaj cuentos para ica otemechc妖cayajquej, yej ican tixtololojhuān otiquitaquej on toTeco ican ihueyilis. **17** Tejhuamej otiquitaquej ijcuac Dios toTajtzin oquimacac Cristo tlacaitalistli niman hueyilistli, niman itlajtol Dios oquijtoj ican hueyilistli: “In yejhua notlajsojcaConeu yejhuan nechpactijtac.” **18** Sa no tejhuamej oticaquej on tlajtojli yejhuan hualehuaya ne ilhuicac ijcuac tinemiyaj ihuan toTeco ipan on yejyeticaj tepetl.

19 Yejhua ica más ticyolmelajcaneltocaj ica melahuac on cuajli tlajtojli yejhuan on tiotlajtojquej oquijcuilojquej. Nemejhuamej cuajli nenquichihuasquej tla nenzitenciaquisquej on cuajli tlajtojli, pampa mechpalehuis nencajsicamatisquej on tlajtlamach ica Dios hasta ijcuac Jesucristo ocsejpa huajlas niman mechmachtis. **20** Pero achtoj xmatican yejhua in. Nion se tlajtojli yejhuan on tiotlajtojquej oquijcuilojquej ipan on Yectlajcuilojli yacaj tlacatl san iselti huelis quijtos tlinon quijtosnequi. **21** Xacaj huelis quijtos tlinon quijtosnequi, pampa intemachtil on tiotlajtojquej xotzimpeu intechcopa on tlacamej yejhuan san oquinejnemilijquej quen oquinequej, yej intechcopa on tlacamej on Espíritu Santo oquinycan.

2

Nemij on yejhuan quitemachtiaj on tlen xmelahuac (Judas 4-13)

1 Ijcon quen nemiyaj on yejhuan tlacajcayajquej tiotlajtojquej intza-jlan on hebreos, no ijqui nemisquej nemotzajlan on yejhuan tlacajcaya-jquej temachtijquej. Yejhuamej mechmachtisquej ican xcuajli temachtijli yejhuan huelis quixoxotonis nemotlaneltoc. Niman ijcuac mech-machtisquej, yejhuamej quichihuasquej canica para ma ca nenquimo-macasquej cuenta ica mechmachtiaj ica on temachtijli yejhuan xmelahuac cuajli. Yejhuamej quinenequisquej* toTeco yejhuan oquinmaquixtij, niman ijcon nimantzin impan huajlas tlaxoxotonilistli. **2** Niman miyequej quito-casquej on xcuajli tlajtlamach† yejhuan on tlacajcayajquej temachtijquej quitemachtisquej. Niman san ipampa on tlen quichihuaj, on yejhuan xtocnihuan quitenehuilisquej tlen xcuajli on yectlajtojli yejhuan melahuac. **3** Yejhuamej, pampa sanoyej‡ quelehuiyaj tomin, mechc妖cayahuasquej ica on cuentos yejhuan san yoquinejnemilijquej para mechijlisquej. Pero desde ye huejcahui Dios ye nemi listo para quintlajtlacolmacas niman quintlaxox-otonilis.

4 Dios xoquintlapojpolhuij on ilhuicactequitquej§ yejhuan otlajtlacojquej, yej ocominxinij ne mictlan campa tetlajyohuiltonyan niman tlayohuatoc. Ompa salijtoquej ican cadenas hasta ipan on tonajli ijcuac Dios quinyolcuitis niman quintlaxtlahuilis. **5** Dios xoquintlapojpolhuij on tlacamej yejhuan nemiyaj ye huejcahui, yej ocuajtitlan se temojtij quiautli para oapachi-jquej on xcuajcualtin tlacamej. Niman san oquimaquixtij Noé, on yejhuan oquiteijlij quen ijqui se huelis cuajli nohuicas quen nonequi, inhuan ocse chicomemej tlacamej más. **6** Dios no oquinxoxotonij on huejhueyican intoca Sodoma niman Gomorra. Yejhuoquintlatij hasta otliconextiajquej. Niman ijcon oquichiu para quintitia on yejhuan saquin* tlacatisquej xcuajcualtin tlacamej ica no ijcon impan nochihuas. **7** Pero ipan on temojtij tlaxox-otonilistli, Dios oquimaquixtij Lot. Lot yolmelaqui tlacatl catca niman

* **2:1** le van a negar † **2:2** cosas ‡ **2:3** mucho § **2:4** ángeles: Angeles tequitij ne ilhuicac niman nican ipan in tlaltecactli. * **2:6** después

yejhua noyolcocohuaya ijcuac quintaya quen xcuajli quipiaj innemilis on xcuajcualtin tlacamej. ⁸ In yolmelajqui tlacatl, yejhuan inhuan ochantic on xcuajcualtin tlacamej, mojmostla noyolajmanaya pampa quitaya niman caquia on tlen xcuajli tlajtlamach quichihuayaj. ⁹ Yejhua ica, tej, tiquitaj ica hasta aman Dios hueli quinmanahuiya on yolmelajquej tlacamej itech on tetlatlatalistli, niman no quinmacas on temojtij tlajyohuclistli para on xyolmelajquej tlacamej hasta queman ajsi on tonajli ijcuac noyolcuitihuas niman quintlaxtlahuilis ican tlajyohuclistli. ¹⁰ Dios, tej, melahuac xquelahuas quintlaxtlahuilis ican temojtij tlajyohuclistli nochimej on yejhuan quichihuaj on tlen xchipahuac quen inxcuajli elehuilis† quinequi niman on yejhuan xquitlacaitaj itequihuajyo Dios.

On yejhuan tlacajcayajquej temachtijquej xipan teitaj niman nohueyimati. Yejhuatej xnomojtiaj para quinhuijhuicaltiaj on tlayecanquej ilhuicactequitquej. ¹¹ Pero ne ixpan toTeco, on cuajcualtin ilhuicactequitquej, masqui quipiaj más poder niman tlanahuatijli, xquinhuijhuicaltiaj on xcuajcualtin ilhuicactequitquej yejhuan aman quitequipanohua on diablo. ¹² Pero in yejhuan tlacajcayajquej temachtijquej quihuijhuicaltiaj on tlen xcajsicamatij. Yejhuatej quen xcuajcualtin tepeyolquej yejhuan xtlanemiliaj, niman nohuicaj quen yolquej. Tlacatij para quimajsij niman quinmictiaj. Yejhuatej no ijqui miquisquej quen miquij on tepeyolquej. ¹³ Yejhuatej no ijqui tlajyohuisquej quen ocsequimej yejhuan yejhuatej quintlajyohuilstiaj. Nomatij ican paquillistli ijcuac quistinemij, niman quichihuaj nochi tlen inxcuajli elehuilis quinequi ne campa ocsequimej hueli quintaj. Yejhuatej nochihuaj tlen tepinajtij niman xylchipajquej ijcuac nemohuan nemij ipan on ilhuimej campa nemotitia tetlajsojtlalistli‡ se ihuan ocse. Ijcon nohuicaj chica ican paquillistli tecajcayahuaj. ¹⁴ Yejhuatej xhueli quitaj se sihuatl xican xcuajli elehuilistli. Xqueman siahuj ica tlajtlacohuaj. Yejhuatej quintlacalij ipan tlajtlacolij on yejhuan xcojtiquej ipan intlaneltoc. Inyojlo quelehuuya tomin. Dios quijtohua ica yejhuatej quiselisquej intlaxtlahuil. ¹⁵ Xoc nohuicaj quen quitocarohua ipan on melajcajtlili, niman nocuepaj para quitocaj iejemplo Balaam iconue Beor. Yejhua sanoyej quinequiya quitlanis tomin niman yejhua ica oquichiu tlen xcuajli. ¹⁶ Pero ocajhuaquej ipampa on itlajtlacol ijcuac ipolocotzin yejhuan xhueliya tlajtohua oquinotz quen yacaj tlacatl yesquia, niman oquiteltlalij on tequitl yejhuan quichihuasquia xican itlamachilis.

¹⁷ Yejhuatej miyec tlajtlamach quitlaliaj ipan impromesa niman xitlaj§ quitemacaj. Yejhua ica yejhuatej, tej, nesij quen on ameyaltin yejhuan xquipiaj atl, noso quen itlaj moxtli yejhuan xquipia atl niman cuica ajacatl. Dios yoquitlalij se lugar campa más capostic* on tlayohua niman para nochipa ompa nemisquej, ¹⁸ pampa quijtohua on tlen ica nohueyimati niman on tlen xitlaj quijtosnequi. Niman intechcopa on xcuajli ielehuilis intlalnacayo on tlacamej quinyolehuaj para quichihuaj on tlen xcuajli on yejhuan sa ican axcan notzinquixtiaj intech on yejhuan xcuajli nohuicaj. ¹⁹ Quitlaliaj ipan impromesa ica xnemisquej tlanamactin itech yacaj nion itlaj, pero sa no yejhuatej nemij tlanamactin ipan inxcuajli nohuicalis. Se tlacatl ye nemi tlanamactli itech on tlen yoquiyoltilan. ²⁰ On yejhuan yoquixmatquej toTeco Jesucristo aquin toTemaquixtijcau yonotzinquixtiquej itech on tlen xcuajli yejhuan on tlalticpactlacamej quichihuaj. Pero tla yejhuatej ocsejpa nocuepaj para quichihuasquej on quen on xcuajli

† 2:10 deseo ‡ 2:13 amor § 2:17 nada; coxtla * 2:17 negro; tliliqui

tlajtlamach yejhuan quinyoltlani, más xcuajli nocahuas innemilis xquen achtoj quipiayaj. ²¹ Niman más cuajli xquixmatisquiaj quen ijqui se nohuicas ican yolmelajquilitli xquen aman quixmatij niman quitlalcahuiyaj on yectlanahuatiyaj yejhuan oquiselijquej. ²² Pero impan cuajli otenquis on quen quijtohua on tlajtojli: “On chichi† ocsejpa quicua isotlal, niman on pitzotl yejhuan quemach oconaltijquej ocsejpa onosoquipopolactij.”

3

ToTeco Cristo ocsejpa huajlas

¹ Notlajsojcaicnihuan, in yejhuan ica ome tlajcuilolamatl nemechtitlanilia. Niman ipan in omemej notlajcuilolamahuan onicnec nemechtlanemililtia ipan on tlen chipahuac itechcopa cuajli tenojnotzalistli. ² Nicnequi xquelnamiquican on tlen Dios oquijtoj ye huejcahui intechcopa on yolchipajquej itiotlajtojcahuan. Niman no nicnequi xquelnamiquican on tlanahuatiyaj yejhuan toTeco Jesucristo aquin toTemaquixtijcau omechmacac intechcopa on apóstoles yejhuan omechmachtijquej.

³ Achtoj xcajsicamatican yejhua in. Ipan on sa ica nochit tonaltin nemisquej tlacamej yejhuan quipijpinahuisquej on tlen nenquineltocaj. Yejhuatej quichihuasquej on tlen inxcuajli elehuilis* quinequi. ⁴ Yejhuatej tetlajtoltisquej: “¿Tlica† hasta aman xhuajlau Cristo ijcon quen oquijtoj? Desde omiquej on toachtojtajhuan, oc‡ sa no ijqui tiquitaj tlaojoncaj quen ijcuac nochit otzimpeu.” ⁵ Yejhuatej ijquin quijtosquej pampa xquinequisquej quitlalisquej ipan intlamachilis ica ipan on achtoj tiempo Dios oquitlalij on cielos§ niman in tlalticpactli ican tlajtol. Niman no xquinequisquej quitlalisquej ipan intlamachilis ica in tlalticpactli oquis ipan on atl niman itechcopa on atl. ⁶ Niman itechcopa on atl ye huejcahui Dios no ocapachoij in tlalticpactli niman oquioxotonij. ⁷ Niman in cielos niman in tlalticpactli yejhuan amantzin oncaj itechcopa sa no yejhua itlanahuatil Dios yejyejtoquej para quinxoxotonis ican tlitl. Dios quimejeticaj para ipan on tonajli ijcuac quintlajtlacolmacas niman quinxoxotonis nochimej on xyolchipajquej tlacamej.

⁸ Pero nemejhuatej, notlajsojcaicnihuan, ma ca xquelcahuacan ica para toTeco se tonajli sa no ijqui quen se mil xipan, niman se mil xipan sa no ijqui quen se tonajli. ⁹ ToTeco xcocotona itequiu quen sequimej quinemiliaj, yej nochit quichijtiu ijcuac contocarojtiu. Ipan in tonaltin techpialia ikyohuclistli, pampa nion se tlacatl xquinequi ma polihui, yej quinequi para nochimej ma noyolpatlacan.

¹⁰ Pero ijcon quen on tlachtequetl, xqueman quimatij tlen hora canaj ont-lachtequi, no ijqui yejcos on tonajli ijcuac toTeco ocsejpa huajlas. Ijcuacon on cielo popolihuis ican se temojtij niman chicahuac tlacaquistilistli. Niman nochit tlen oncaj xoxotonis ican tlitl. In tlalticpactli niman nochit tlen ipan oncaj tlatlas.

¹¹ Aman, tej, pampa ticmatij ica nochit ijcon xoxotonis, ¿tlinon nonequi ticchihuasquej? Nonequi titohuicasquej ican yolchipahualistli niman yolkualistikli. ¹² Ijcon nonequi ticchihuasquej chica ticchaj ma yejco on tonajli ijcuac Dios nochit quinahuatis. Niman nonequi ticchihuasquej canica para saniman ma yejcotetzi. Ipan on tonajli on cielo tlatlas niman popolihuis. Niman nochit tlen oncaj patis ica on tlitl. ¹³ Pero tejhuatej tictmachixtoquej

† ^{2:22} perro * ^{3:3} deseo † ^{3:4} ¿por qué?; ¿tline? ‡ ^{3:4} todavía; sanquen § ^{3:5} On cielo oncaj ne campa oncaj ajacatl, moxtli, metztli, tonajli niman sitlalimej.

on yencuic cielo ihuan on yencuic tlalticpactli yejhuan Dios otechprometero-huilij. Ompa, tej, nochimej nohuicasquej yolmelajquej.

¹⁴ Yejhua ica, tej, notlajsojcaicnihuan, chica nemejhuamej nenquimachix-toquej on tonajli, xchihuacan canica para Dios mechnextijtejcos nenquipi-aliaj yolsehuilistli, niman ma ca mechnextijtejcos ican itlaj tlen xchipahuac nion ican itlaj yejhuan mechtlaajtlamacas. ¹⁵ Xcajsicamatican ica on ijy-ohuilstli yejhuan toTeco techpialia, techpialia pampa quinequi techmacas tonaltin para ma ticselican itemaquixtilis. Ijquin, tej, yomechtlaajcuilhuij on totlajsojcaicniu Pablo ican itlamatquilis* yejhuan Dios yoquimacac. ¹⁶ Pablo oquiteneu in tlajtlamach† ijcuaç quiycuilohua ipan nochilamahuan, masqui sequi itemachtil sanoyej‡ ohuijticaj§ para se cajsicamatis. Niman on yejhuan xitlaj* quimajmatij niman xcojtiqeipan intlaneltoc ocse tlamantic quicuepaj, ijcon quen no quichihuaj ipan ocsequi temachtiltin yejhuan oncaj ne ipan on Yectlajcuilojli. Ijcon, tej, sa no yejhamej noxox-toniaj.

¹⁷ Yejhua ica, tej, notlajsojcaicnihuan, xmotlapialican, pampa nemejhuamej ye nenquimatiñ nochilamahuan, masqui sequi itemachtil sanoyej‡ ohuijticaj§ para se cajsicamatis. Niman on yejhuan xitlaj* quimajmatij niman xcojtiqeipan intlaneltoc ocse tlamantic quicuepaj, ijcon quen no quichihuaj ipan ocsequi temachtiltin yejhuan oncaj ne ipan on Yectlajcuilojli. Ijcon, tej, sa no yejhamej noxox-toniaj.

* **3:15** su sabiduría † **3:16** cosas ‡ **3:16** muy § **3:16** difícil * **3:16** nada; coxtla † **3:18** su amor

1 SAN JUAN

ACHTOJ ITLAJCUIOL ON APÓSTOL SAN JUAN

In Tlajtojli yejhua techmaca nemilistli

¹ Temechtlaajcuilhuiyaj ica iTlajtoltzin Dios yejhuan techmaca yencuic nemilistli yejhuan para nochipa. In iTlajtoltzin Dios sa no yejhua Jesucristo, niman yejhua ye nemiya ijcuac nochi otzimpeu. Yejhua oticaquej tlajtlajtohua niman otiquitaquej ican tixtololojhuan. Yejhua otiquitaquej niman oticmatocaquej ican tomahuan. ² Yejhua in nemilistli, yejhua Jesucristo. Yejhua onopantlantij niman tejhuamej otiquitaquej. Aman, tej, temechxpantiliaj ica melahuac otiquitaquej. Yejhua ica, tej, temechijliaj ica in nemilistli yejhuan para nochipa. Yejhua in nemilistli oncatca itech toTajtzin, niman aman sa no yejhua otechpantlantilij. ³ Temechijliaj, tej, on tlen otiquitaquej niman oticaquej, para nemejhuamej san secan tohuan xnemican, ijcon quen tejhuamej tinemij san secan ihuan Dios toTajtzin niman ihuan iConetzin Jesucristo. ⁴ No ijqui temechtlajcuilhuijaj yejhua in tlajtlamach* para topaquilis ma ajsitia.

Dios yejhua tlahuijli

⁵ Sa no yejhua in temachtijli temechchiliaj yejhuan Jesucristo otechmachtij. Otechmachtij ica Dios sa no yejhua tlahuijli pampa yejhua yolchipahuac niman xoncaj itlaj tlayehuajlotl ipan inemilis. ⁶ Tla tiquijtohuaj ica tinemij san secan ihuan Dios niman oc† titlajtlacohuaj, tla ijcon, xtiquijtohuaj on tlen melahuac niman xticchihuaj quen nonequi. ⁷ Pero tla xtitlajtlacohuaj, yej tinemij yolchipajquej quen Dios nemi, tla ijcon, tej, san secan tinemij inhuau ocsequimej niman iyesotzin Jesucristo, yejhuan iConetzin Dios, techchipahuilia nochi totlajtlacolhuan.

⁸ Tla tiquijtohuaj ica xtitlajtlacolejquej, sa no tejhuamej titocajcayahuaj, niman xtiquijtohuaj on tlen melahuac. ⁹ Pero tla titoyolcuitiaj itech Dios, yejhua quichihuas on tlen oquijtoj. Yejhua quiyecchihuas niman techtlapolhuilis totlajtlacolhuan, niman techchipahuas itech nochi tlen xcuajli. ¹⁰ Dios quijtohuaj ica nochi tlacatl tlajtlacolej. Yejhua ica, tla titotenehuaj xtitlajtlacolejquej, on tlen tiquijtohuaj sa no ijqui quen tiquijtosquiaj ica Dios tlacajcayaquetl. Tla ijcon, xnejli ticneltocaj itlajtol.

2

Cristo yejhua topampa tlajtohua

¹ Noconetzitzihuan, nemechtlaajcuilhuiya yejhua in tlajtlamach* para ma ca nentlajtlacosquej. Pero tla yacaj tlajtlacohua, ticpiaj tote pantlajtojcau yejhuan techpalehuis para ticselisquej tetlapojpolhuilistli itech toTajtzin Dios. In tepantlajtojquetl yejhua Jesucristo yejhuan yolkmelajqui. ² Yejhua omic para ican iyesyo otechchipahuilij nochi totlajtlacolhuan, niman xsan totlajtlacolhuan, yej no intlajtlacolhuan nochi on tlalticpactlacamej.

³ Tla tiquintlacamatij itlanahuatilhuan Dios, tla ijcon, ticmatztoquej ica yejhua tiquixmatij. ⁴ Pero tla yacaj quijtohuaj ica quixmati Dios niman xquintlacamatij itlanahuatilhuan, yejhua nochihua se tlacajcayaquetl, niman xquijtohuaj on tlen melahuac. ⁵ Pero tla yacaj quichihua on tlen Dios

* **1:4** cosas † **1:6** todavía; sanquen * **2:1** cosas

quijtohua, tla ijcon, melahuac ican nochí iyojlo quitlajsojtla†. ⁶ On yejhuan quijtohua ica nocahua san secan ihuan Dios, nonequi nemis quen Jesucristo nemiya.

Ye tlahuilohua on tlahuigli pampa sequimej yopeu notlajsojtaj inhuan ocsequimej

⁷ Nocnihuan, xnemechtlajcuilhuijtaj se yencuic tlanahuatijli para nenziquichihuasquej. Yejhua in tlanahuatijli ye nenquipiayaj desde ijcuac onenquineltocaquej Cristo. Yejhua in tlanahuatijli yonencacaj. ⁸ Pero yejhua in yejhuan nemechtlajcuilhuia nesi quen se yencuic tlanahuatijli pampa Cristo quitlacamatiya in tlanahuatijli niman aman nemejhuamej no yopeu nenzquitlacamatztihuij. Ticmatij ica yejhua in melahuac pampa on tlayehualyotl ye polijtiu niman ye tlahuilohua on yejhuan melahuac tlahuigli.

⁹ Tla yacaj notenehua nemi ipan tlahuigli, pero quitlahuelita icniu, oc‡ nemi ipan tlayehualyotl. ¹⁰ On yejhuan quitlajsojtla§ icniu nemi ipan tlahuigli, niman xitlaj* huelis quitlajcalis ipan tlajtlacojli. ¹¹ Pero on yejhuan quitlahuelita icniu nemi niman quistinemi ipan tlayehualyotl. Yejhua xquimati canon yau, pampa on tlayehualyotl quixpajpachohua.

¹² Nemechtlajcuilhuia nemejhuamej noconetzitzihuan pampa Dios yoquintlapojpolhuij nemotlajtlacolhuan ipampa Jesucristo.

¹³ Nemechtlajcuilhuia nemejhuamej tatajin pampa aman yonenquixmatquej yejhuan ye nemiya ijcuac nochí otzimpeu. Nemechtlajcuilhuia nemejhuamej telpocamej pampa yonenquitlanquej on diablo.

Yonemechtlajcuilhuij nemejhuamej noconetzitzihuan pampa yonenquixmatquej toTajtzin. ¹⁴ Yonemechtlajcuilhuij nemejhuamej tatajin pampa aman yonenquixmatquej yejhuan ye nemiya ijcuac nochí otzimpeu. Yonemechtlajcuilhuij nemejhuamej telpocamej pampa nenchichicajtoquej, niman itlajtol Dios oncaj ipan nemoyollo, niman pampa yonenquitlanquej on diablo.

¹⁵ Ma ca xnejnequican nemohuicasquej quen on tlajtlacolejquej nohuicaj, nion ma ca xtlajsojtlan on tlen oncaj ipan in tlalticpactli. Tla yacaj quinequi nohuicas quen on tlajtlacolejquej nohuicaj, yejhua xquitlajsojtla Dios toTajtzin, ¹⁶ pampa nochí tlen techmaca in tlalticpactli xhualehua itech toTajtzin, yej nican quisa ipan in tlalticpactli. On xcujli elehuilistli† yejhuan tonacayo quipia, niman on tlen xcujli yejhuan tiquixpacaitaj, niman nochí on tlajtlamach tlen ticpiaj yejhuan quichihua para yejhua ica ma titohueyimatican, xquisa itech toTajtzin, yej quisa ipan in tlalticpactli. ¹⁷ Niman in tlalticpactli ye tlantiu ihuan nochí on tlen xcujli ipan oncaj yejhuan on tlacamej quelehuiyaj. Pero on yejhuan quichihuas tlen Dios quinequi nemis para nochipa.

Ye huajlahuij on yejhuan quinequij quixoxotonisquej itequiu Cristo

¹⁸ Noconetzitzihuan, yoyejcoc on sa ica nochí tonaltin. Nemejhuamej ye nenzaquinij ica ipan on sa ica nochí tonaltin huajlas se tlacatl yejhuan quinequi quixoxotonilis itequiu Cristo. Aman, tej, miyequej nemij yejhuan quinequij quixoxotonisquej itequiu Cristo. Yejhua ica ticmatztoquej ica in sa ica nochí tonaltin. ¹⁹ Yejhamej totzajlan oquisquej, pero ica tlen melahuac xnejli tocnihuan. Tla tocnihuan yesquiaj, nocahuasquiaj totech. Pero yejhamej totzajlan oquisquej para onopantlantij ica yejhamej xtocnihuan.

† 2:5 le ama ‡ 2:9 todavía; sanquen § 2:10 le ama * 2:10 nada; coxtla † 2:16 deseo

²⁰ Pero Cristo yejhuan yolchipahuac omechmacac iEspíritu Santo. Yejhua ica nemochimej nenquimati on tlen melahuac. ²¹ Nemechtlaajcuilhuia xpampa tla xnenquimati on tlen melahuac, yej nemechtlaajcuilhuia pampa nenquimati. Niman nenquimatztoquej ica itech on tlen melahuac xhueli no ompa quisa on tlen xmelahuac. ²² ¿Aquinon tlacajcayaquetl? Cuajli ticmatztoquej ica tlacajcayaquetl san yejhua on yejhuan quijtohua ica Jesús xejhua Cristo on yejhuan Dios oquitlapejpenij para techmandaros. Yej on tlacatl quinequi quixoxotonilis itequiu Cristo, pampa quijtohua ica Dios xejhua toTajtzin niman ica Jesús xejhua iConetzin. ²³ On yejhuan quijtohua ica Jesús xejhua Cristo yejhuan iConetzin toTajtzin Dios, xnohuica ihuan toTajtzin. Pero on yejhuan quijtohua ica Jesús melahuac Cristo yejhuan iConetzin toTajtzin Dios, yejhua nohuica ihuan toTajtzin. ²⁴ Yejhua ica, xquejehuacan ipan nemoyojo on temachtiji yejhuan omechmachtijquej desde onenquineltocaquej Cristo. Tla on temachtiji nocahua ipan nemoyojo, nemejhuamej nemocahuasquej ihuan Cristo on iConetzin Dios niman ihuan toTajtzin Dios. ²⁵ Niman Jesucristo oquitlalij ipan ipromesa techmacas yencuic nemilistli para nochipa.

²⁶ Yonemechtlaajcuilhuij ica on yejhuan quinequij mechcajcyahuasquej. ²⁷ Pero on Espíritu Santo, yejhuan Jesucristo omechmacac, nocahua ipan nemoyojo. Yejhua ica xpolihui para yacaj mechmachtis, pampa iEspíritu Dios mechmachtia nochi tlajtlamach. Itemachtijli melahuac, niman xque-man mechmachtis on tlen xmelahuac. Yejhua ica, tej, nochipa san secan ihuan Cristo xnemican, ijcon quen mechmachtia on Espíritu Santo.

²⁸ Aman, tej, noconetzitzihuan, nochipa xnemican san secan ihuan Cristo, para xnempinahuasquej niman xnenmojmotisquej ijcuac yejhua huajlas. ²⁹ Nemejhuamej ye nenquimatztoquej ica Dios yejhua yolkmelajqui. Yejhua ica nenquimati ica nochimej on yejhuan quichihuaj on tlen cuajli yejhuan tecone huan itech Dios.

3

Tiiconehuan Dios

¹ ¡Xmatican quen ijqui sanoyej* techtlajsojtla† Dios toTajtzin! Yejhua techtlajsojtla hasta techtocayotia iconehuan, niman melahuac tiiconehuan. On yejhuan xiconehuan xtechixmatij, pampa xquixmatij Dios. ² Notlajsojcaicnhuan, aman ye titecone huan itech Dios. Hasta aman xte-chititia quen ijqui tinemisquej. Pero ticmatztoquej ica ijcuac Cristo huajlas, tinemisquej quen yejhua, pampa tiquitasquej quen mero nemi. ³ Niman nochimej yejhuan quinequij nemisquej quen Cristo, nochipajtihuij ijcon quen yejhua nemi chipahuac.

⁴ Nochimej yejhuan tlajtlacohuaj xquitlacamatij itlanahuatilhuan Dios. On tlajtlacojli quijtosnequi xnotlacamat on itlanahuatilhuan Dios.

⁵ Nemejhuamej ye nenquimatztoquej ica Jesucristo ohuajlaj ipan in tlalticpactli para otechquixtilico on totlajtlacolhuan, niman ica yejhua xquipia tlajtlacojli. ⁶ Ijcon, tej, on yejhuan nocahua ihuan Cristo, xoc más quistinemipan tlajtlacojli. On yejhuan quistinemipan tlajtlacojli, xquimati quen nemi Cristo, nion xquixmati.

⁷ Noconetzitzihuan, ma ca xmocahuilcan yacaj mechcajcyahua. On yejhuan quichihuaj tlen cuajli, yejhua cuajli tlacatl ijcon quen Cristo cuajli.

⁸ Pero yejhuan quistinemipan tlajtlacojli, yejhua tecone uitech on diablo, pampa on diablo yejhua tlajtlacolej desde ijcuac nochi otzimpeu. Niman

* ^{3:1} mucho † ^{3:1} nos ama

on iConetzin Dios ohuajlaj para quixoxotonico on tlen yejhua on diablo quichihua. ⁹ Xacaj yejhuan iconeu Dios quistinemi ipan tlajtlacojli, pampa inemilis Dios nocahua ipan. Niman yejhua xhuelis más quistinemis ipan tlajtlacojli, pampa yejhua yotlacat itech Dios. ¹⁰ Ijquin huelis nenquimatisquej aquinomej teconeheuan itech Dios niman aquinomej teconeheuan itech on diablo. Tla yacaj xquichihua tlen cuajli noso xquitlajsojtlalici, yejhua xteconeue itech Dios.

Nonequi titotlajsojtlasquej inhuan ocsequimej

¹¹ Desde ijcuac onenquineltocaquej Cristo, onencacquej ica nonequi titotlajsojtlasquej inhuan ocsequimej. ¹² Ma ca ma ticchihuacan quen Caín oquichiu, yejhuan teconeu catca itech on diablo, niman oquimictij icniu. ¿Niman tlica[‡] oquimictij? Oquimictij pampa Caín quichihuaya on tlen xcuajli, niman on icniu quichihuaya tlen cuajli.

¹³ Nocnihuan, ma ca xmojcatlachacan tla mechtlahuelitaj on tlajtlacolejquej. ¹⁴ Otimicaj pampa otitoxelojcaj itech Dios, pero aman ticpiaj nemilistli pampa tinemij san secan ihuan Dios. Yejhua in ticmatztoquej pampa tiquintlajsojtlaj on tocniuhan. On yejhuan xquintlajsojtlalici ocsequimej ocs mictoquej. ¹⁵ San aquinon yejhuan quitlahuelita icniu, yejhua se temictijquetl ipan iyojlo. Niman nemejhuamej nenquimatztoquej ica xacaj yejhuan temictijquetl quipia yencuic nemilistli yejhuan para nochipa. ¹⁶ Ijcuac Cristo omic topampa, otechititij tlinon quijtosnequi tiquimpalehuisquej on tocniuhan ican tetlajsojtlalistli niman tla saman nonequi hasta tepampa timquisquej. ¹⁷ On yejhuan quipia tlinon ica panoticaj niman quita se icniu quipolojticaj, niman yejhua xquicnelia, ¿quen ijqui huelis quijtos ica quipia tetlajsojtlalistli itech Dios? ¹⁸ Noconetzitzihuan, ma ca san xteijlican ica nenquipiaj tetlajsojtlalistli, nion ma ca san xquijtocan ica nenquintlajsojtlaj on tocniuhan, yej melahuac xquintlajsojtlacan ican nochi nemoyojo niman xquintitican ica nenquintlajsojtlaj ica nochi on tlen nenquichihuaj.

Ticatlajay toyoloxpan Dios

¹⁹⁻²⁰ Tla ijcon tiquintlajsojtlaj on tocniuhan, ticmatij ica melahuac tiiconehuan Dios niman xsan titotenehuaj. Tej, masqui toyoloxpan techtlajtlacolmacas, ticpiaj confianza ixpan Dios, pampa Dios más nochi quimati xquen toyoloxpan, niman yejhua nochi quimati. ²¹ Ijcon, tej, notlajsojcaicnhuan, tla toyoloxpan xtechtlajtlacolmaca, ticpiaj confianza ixpan Dios. ²² Niman nochi tlen tictlajtlanisquej yejhua techmacas, pampa tictlacamatij itlanahuatilhuan niman ticchihuaj tlinon quipactia. ²³ Niman in yejhua itlanahuatil Dios, ica ma tincneltocacan iConetzin Jesucristo, niman ma titotlajsojtlacan* inhuan ocsequimej quen yejhua yotechnahuatij. ²⁴ On yejhuan quitlacamatij itlanahuatilhuan Dios san secan ihuan Cristo nocahuaj, niman Cristo inhuan nemi. Niman itechcopia iEspíritu yejhuan otechmacac ticmatztoquej ica yejhua tohuan nemi.

4

Quen ijqui tihuelisquej tiquintlatlatasquej on yejhuan notenehuaj ica Dios oquinhaujtitlan

[‡] 3:12 ¿por qué?; ¿tline?

§ 3:14 todavía; sanquen

* 3:23 que nos amemos

¹ Notlajsojcaicnihuan, ma ca xquinneltocacan nochimej on yejhuan quijtohuaj ica Dios oquinhuajtitlan para temachtiaj. Yej achtopa xquinmixtlalocan para nenquitasquej tla melahuac Dios oquinhuajtitlan noso ca, pampa miyequej tlacajcayaquej tiotlajtojquej yoquisquej imanyan in tlalticpactli. ² Nemejhuamej ijquin huelis nenquinmixtlalosquej tla Dios oquinhuajtitlan: nochimej temachtijquej yejhuan quitenehuasquej ica Jesucristo nemiya ipan in tlalticpactli ican itlalnacayo melahuac oquinhuajtitlan Dios. ³ Pero nochimej temachtijquej yejhuan xquitenehuasquej ica Jesucristo nemiya ipan in tlalticpactli ican itlalnacayo, Dios xoquinhuajtitlan. Yej yejhuamej hualehuaj itech on yejhuan quinequi quixoxotonilis itequiu Cristo. Yonencacquej ica huajlas niman aman nemechijlia ica ye nemij ipan in tlalticpactli tlacamej yejhuan quinequijquixoxotonis itequiu Cristo. ⁴ Noconetzitzihuan, nenteconeihuam itech Dios, niman on yejhuan quinequij quixoxotonilisquej itequiu Cristo xomechc妖cayaquej ican on xcuajli temachtijli, pampa on Espíritu Santo yejhuan nemotech nemi más cojtic xquen on diablo yejhuan nemi ipan in tlalticpactli.

⁵ No huelis ijquin nenquintlatlatasquej tla Dios oquinhuajtitlan: on yejhuan teconehuan itech in tlalticpactli tlajtlajtohuaj ican tlajtlamach* ica in tlalticpactli, niman on tlacamej yejhuan teconehuan itech in tlalticpactli cuelcaquij on tlamachtijli yejhuan yejhuamej temachtiaj. ⁶ Pero tejhuamej titeconeihuam itech Dios, niman on yejhuan quixmatij Dios, cuelcaquij on tlamachtijli yejhuan tejhuamej titemachtiaj. Pero on yejhuan xteconeihuam itech Dios xtechcaquij. Yejhua ica, ijcon tihuelisquej ticmatisquej tla se cuajli temachtijquetl noso tlacajcayaqui temachtijquetl.

Dios yejhua tetlajsojtlalistli

⁷ Notlajsojcaicnihuan, ma titotlajsojtlacant inhuan ocsequimej, pampa on tetlajsojtlalistli hualehua itech Dios. Yejhua ica on yejhuan tetlajsojtlalij yejhua teconeu itech Dios niman quixmatij Dios. ⁸ On yejhuan xtetlajsojtlalij xquixmatij Dios, pampa Dios yejhua tetlajsojtlalistli. ⁹ Dios oquipantlantij quen techtlajsojtlalij ijcuaoc ocuajtitlan isenteConetzin ipan tlalticpactli para itechcopa iConetzin ma ticpiacan nemilistli para nochipa. ¹⁰ Xmatican tlinon quijtosnequi in tetlajsojtlalistli. In tetlajsojtlalistli xquijtosnequi ica otictlajsojtlaquej Dios, yej yejhua otechtlajsojtlac hasta ocuajtitlan iConetzin para omic ipan cojnepanojli† para techtlapojpolhuilia totlajtlacolhuan.

¹¹ Notlajsojcaicnihuan, tla Dios sanoyej§ ijcon otechtlajsojtlac, no ijqui nonequi titotlajsojtlasquej inhuan ocsequimej. ¹² Xqueman yacaj quita Dios, pero tla titotlajsojtlaj inhuan ocsequimej, Dios nemi ipan toyojlo, niman titetlajsojtlasquej quen Dios quinequi.

¹³ Pampa Dios otechmacac iEspíritu, ticmatij ica tinemij san secan ihuan yejhua niman yejhua san secan tohuan nemi. ¹⁴ Niman sa no tejhuamej otiquitaquej iConetzin Dios niman ticteixpantiliaj ica toTajtzin ocuajtitlan para oquinmaquixtico in tlalticpactlacamej. ¹⁵ San aquinon yejhuan quitenehuas ica Jesús yejhua iConetzin Dios, Dios nemi san secan ihuan on tlacatl, niman on tlacatl san secan nemi ihuan Dios.

¹⁶ Ticmatij niman ticneltocaj ica Dios techtlajsojtlalij. Dios sa no yejhua tetlajsojtlalistli. On yejhuan tetlajsojtlalij san secan nemi ihuan Dios, niman Dios san secan nemi ihuan. ¹⁷ Ijcon, tej, tla tictlajsojtlalij Dios niman on tocnihuan ican nochitoyojlo quen yejhua quinequi, xtitomojtisquej ixpan Dios ijcuaoc techyolcuitis niman techtlaxtlahuilis. Xtitomojtisquej ipan on

* **4:5** cosas † **4:7** que nos amemos ‡ **4:10** cruz § **4:11** mucho

tonajli pampa titetlajsojtlaj nican ipan in tlalticpactli quen Cristo tetlajsojtlaj. ¹⁸ Ijcuac se tetlajsojtlaj quen nonequi, xquipia nemojtijli, pampa campa oncaj on tetlajsojtlalistli yejhuan chipahuac xoncaj nemojtijli. Tla se nomojtia, yejhua nomojtia pampa quinemilia ica quiselis icastigo. Yejhua ica tla se nomojtia, quijtosnequi ica yejhua xtetlajsojtlaj quen Dios quinequi.

¹⁹ Tejhamej tictlajsojtlaj Dios pampa yejhua achtopa otechtlajsojtlac. ²⁰ Tla yacaj quijtohua: “Nejhua nictlajsojtlaj Dios”, pero quitlahuelita icniu, yejhua quijtohua on tlen xmelahuac pampa tla se xquitlajsojtlaj icniu yejhuan quita, no xquitlajsojtlaj Dios yejhuan xquita. ²¹ Dios otechmacac yejhua in tlanahuatijli: “On yejhuan quitlajsojtlaj Dios no ma quitlajsojtlaj icniu.”

5

Dios techpalehuiya para tictlanisquej in tlalticpactli ijcuac techtlatlata

¹ Nochimej yejhuan quineltocasquej ica Jesús yejhua Cristo yejhuan Dios oquijtlajli para tlamandarohua, yejhamej iconehuan Dios. Nochimej yejhuan quitlajsojtlaj* se tajtli no ijqui quintlajsojtlaj iconehuan on tajtli. ² Ijcon, tej, ijcuac tictlajsojtlaj Dios niman tictlacamatij itlanahuatilhuan, ticmatij ica no tiquintlajsojtlaj iconehuan. ³ Ijcuac tictlacamatij itlanahuatilhuan Dios, sa no yejhua tictlajsojtlaj. Niman itlanahuatilhuan xyejetiquej, ⁴ pampa nochimej yejhuan teconehuan itech Dios quitlanij in tlalticpactli. Ican totaneltoc tictlanij in tlalticpactli. ⁵ ¿Aquinon huelis quitlanis yejhua in tlalticpactli? San yejhua on yejhuan quineltocas ica Jesús yejhua iConetzin Dios.

On apóstol Juan quitemachiltia itech ica Jesucristo

⁶ On yejhuan ohuajlaj, yejhua Jesucristo. Yejhua oquipanextij ica yejhua iConeu Dios ijcuac onocuatequij ipan atl niman no ijcuac oquitoyau iyesyo ne ipan on cojnepanojli†. Xsan ica onocuatequij, pero yej ica no oquitoyau iyesyo. On Espíritu Santo sa no yejhua quiteixpantilia nochí yejhua in, niman on Espíritu nochipa quijtohua on tlen melahuac. ⁷ Niman nemij yeyimej ne ilhuicac yejhuan quiteixpantiliaj ica Jesucristo melahuac iConeu Dios: toTajzin, iTlajtoltzin, niman iEspíritu Santo. Niman in yeyimej san se tlajtojli quiteixpantiliaj. ⁸ Niman nican ipan in tlalticpactli no yeyimej quiteixpantiliaj yejhua on: on Espíritu Santo, on itlacuatequilis Jesucristo ican atl, niman on ica oquitoyau iyesyo ne ipan cojnepanojli. Niman in yeyimej san se tlajtojli quiteixpantiliaj ica Jesucristo melahuac iConeu Dios. ⁹ Ticneltocaj inteixpantilis on tlacamej, pero iteixpantilis Dios más sanoyej‡ hueyi quijtosnequi pampa iteixpantilis Dios yejhuan otechijlij ica iConeu. ¹⁰ On yejhuan quineltoca iConetzin Dios, iyojlo quimachiltia ica Jesús melahuac iConetzin Dios. On yejhuan xquineltoca sa no ijqui quen quinemilisquia ica Dios se tlacajcayajquetl, pampa xquineltoca on tlen Dios otechixpantilij itech iConetzin. ¹¹ Niman in yejhua iteixpantilis Dios yejhuan oquijtoj itech iConeu. Oquixpantilij ica otechmacac yencuic nemilistli para nochipa niman ica in nemilistli otechmacac itechcopa iConeu. ¹² On yejhuan quipia iConetzin Dios ipan iyojlo, no quipia yejhua in nemilistli. Pero on yejhuan xquipia iConetzin Dios ipan iyojlo, xquipia yejhua in nemilistli.

¹³ Nemejhuamej yejhuan nenquineltocaj iConetzin Dios nemechtlajcuihua yejhua in tlajtlamach§ para xmatican ica nenquipiaj nemilistli para nochipa.

* 5:1 le aman † 5:6 cruz ‡ 5:9 muy § 5:13 cosas

¹⁴ Tictlaliaj toyoljo itech Dios ica san tlinon tejhamej tictlajtlanilisquej ijcon quen yejhua quinequi, yejhua techcaquis. ¹⁵ Niman tla ticmatztoquej ica Dios techcaqui ijcuac tictlajtlaniliaj, no ticmatztoquej ica ye ticpiaj on tlen tictlajtlaniliaj.

¹⁶ Tla yacaj quitas ica icniu quichihua tlajtlacojli yejhuan xcuica ipan miquilistli para nochipa, nonequi quichihuas oración ipampa on icniu, niman Dios quimacas ialma icniu nemilistli para ma ca ixpolihuis. Nejhua niquipijtohua ica on yejhuan quichihua tlajtlacojli yejhuan xcuica ipan miquilistli para nochipa. Pero yacaj hueli quichihua on tlajtlacojli yejhuan cuica ipan miquilistli para nochipa. Yejhua on quen on xnemechijlia para ipampa xchihuacan oración. ¹⁷ Nochi tlen xcuajli, on yejhua tlajtlacojli. Pero oncaj tlajtlacojli yejhuan tehuica ipan miquilistli para nochipa.

¹⁸ Ticmatztoquej ica on yejhuan iconehuan Dios xoc quistinemij ipan tlajtlacojli, pampa Cristo yejhuan iConetzin Dios quinmejehuas, niman on diablo xquinmatocas.

¹⁹ Ticmatztoquej ica titecone huan itech Dios, niman no ticmatztoquej ica on diablo quinnahuatia nochimej on ocsequimej tlacamej ipan in tlalticpactli.

²⁰ No ticmatztoquej ica iConetzin Dios yohuajlaj, niman yotechmacac cajsicamatilistli para tiquixmatisquej yejhuan melahuac Dios. Aman tinemij san secan ihuan on yejhuan melahuac Dios. Yejhua in quijtosnequi tinemij san secan ihuan iConetzin. Jesucristo yejhua melahuac Dios, niman yejhua techmaca yencuic nemilistli para nochipa.

²¹ Noconetzitzihuan, ma ca xquinneltocacan on tlaixcaj caya jquej tlamachijchihualtin tetajtzitzihuan. Ma ijqui nochihua.

2 SAN JUAN

ICA OME ITLAJCUIOL ON APÓSTOL SAN JUAN

Juan quitlajpalohua se sihuatl

¹ Nejhua, yejhuan nitlajtlajmatquetl tlayecanqui itech tocniuhan, nimitztlajcuilhuia tejhua tocniu sihuatl yejhuan Dios omitztlapejpenij, niman mocone huan. Melahuac nemechtlajsojtla* niman xsan nejhua, yej nochimej on yejhuan quixmatij on temachtijli yejhuan melahuac. ² Nemechtlajsojtla ipampa on temachtijli yejhuan melahuac yejhuan ticpiaj ipan toyojlo, niman ticpiasquej para nochipa. ³ Dios toTajtzin niman toTeco Jesucristo iConetzin techtiochihuas niman techmacas teicnelilistli† niman yolsehuilistli pampa tiquixmatij on tlen melahuac niman titotlajsojtlaj inhuan ocsequimej.

Nonequi nochipa titetlajsojtlasquej

⁴ Onechpactij sanoyej‡ ijcuac oniquinnextij sequimej mocone huan yejhuan quitlacamatij on temachtijli yejhuan melahuac ijcon quen toTajtzin otechnahuatij. ⁵ Niman aman, nocniu sihuatl, sanoyej nimitztlajtlanilia ma titetlajsojtlacan§. Yehua in tlen nimitztlajcuilhuia xehua yencuic tlanahuatijli, yej sa no yejhua on yejhuan oticpixquej desde ijcuac otipejquej ticneltocaj Cristo. ⁶ Totetlajsojtlalis quijtosnequi ica tictlacamatij itlanahuatilhuan Dios. Niman on tlanahuatijli, yejhuan nemejhuamej onencaquej desde ijcuac onempejquej nenquineltocaj Cristo, san yejhua in: xtetlajsojtlacan nochipa.

Yohualajquej miyequej tlacajcayajquej

⁷ Nimitzijlia in pampa miyequej tlacajcayajquej quistinemij imanyan in tlalticpactli. Yejhuan quipto huaj ica Jesucristo xohuajlaj ican itlalnacayo. On yejhuan quipto huaj ijcon, yejhua tlacajcayajquetl, niman yejhua quinequi quioxoxotonilis itequiu Cristo. ⁸ Xmotacan sa no nemejhuamej para ma ca nenquipolosquej on tlinon nemejhuamej yonencajsiquej, yej xselican nochim emotlaxtlahuil.

⁹ San aquinon yejhuan quitlalcahuia on itemachtil Cristo niman quitoca ocse temachtilistli, xnemi san secan ihuan Dios. Pero on yejhuan nocahua itech itemachtil Cristo, san secan ihuan toTajtzin nemí, niman no nemí san secan ihuan Jesucristo on iConetzin. ¹⁰ Tla yacaj temachtijquetl mechon-notza niman xquiteijlia itemachtil Cristo, ma ca xselican nemochan, nion ma ca xtlajpalocan, ¹¹ pampa yejhuan quitlajpalos no nochihuas quen itehuical ica on tlen xcua jli quichihua.

Sa ica nochitlajtojli

¹² Masqui nicpia miyec más tlen nicnequi para nenquimatisquej, xnicnequi nemechijcuilohuilis ipan in tlajcuilolamatl. Yej niccha nias nemechontas niman nemechnojnotzas para ijcon tinochimej ajsis topaquilis.

¹³ Mitztlajpalohua on iconehuan mocniu sihuatl yejhuan no Dios oquitlapejpenij. Ma ijqui nochihua.

* **1:1** les amo

† **1:3** misericordia

‡ **1:4** mucho

§ **1:5** amémonos

3 SAN JUAN

ICA YEYI ITLAJCUILOL ON APÓSTOL SAN JUAN

Juan quitlajpalohua se tlacatl itoca Gayo

¹ Nejhua, yejhuan nitlajtlajmatquetl tlayecanqui itech tocnihuan, nimitztlajcuilhuia yejhua in tlajcuilolamatl, notlajsojcaicniu Gayo, yejhuan melahuac nimitztlajsojtla*.

² Notlajsojcaicniu, nicchihua oración para ica nochí cuajli xquisa niman para xpia cuajli mochicahualis, ijcon quen cuajli nochihua ipan moalma.

³ Sanoyej† onipac ijcuac ohualajquej sequimej tocnihuan niman onechtlatlajtohuilijquej ica nochipa tictlacamati on tlen melahuac. Melahuac, tej, tinemi quen itemachtil Cristo tlajtlajtohua. ⁴ Xitlaj oncaj yejhuan más nechpactia xquen ijcuac nicaqui ica nocone huan quitlacamatij on tlen melahuac.

Cuajli iyojlo on tlacatl Gayo

⁵ Notlajsojcaicniu, timohuicaticaj cuajli ican nochí on tlen tiquinchihuilia on tocnihuan, niman más intech on yejhuan xchanejquej yejhuan xtiquimixmati. ⁶ Nican ixpan on tlaneltoquej ipan in tiopan, yejhuatej yoquiteix-pantilijquej on tetlajsojtlalistli‡ yejhuan tiquimpialia. Nimitzontlatlantilia, ijcuac ocsejpa yasquej, xquimpalehui, tla itlaj quimpolohua ipan inojhui ijcon quen Dios quipactia. ⁷ Yejhuatej oquisquej para quitequipan osquej Jesucristo, niman xitlaj§ tlapalehuilistli quiseliaj intech on yejhuan xtanel-tocaj. ⁸ Yejhua ica tejhuatej nonequi tiquimpalehuisquej on yejhuan ijcon nemij tla itlaj quimpolohua, para huelisquej quiteijlisquej on tlen melahuac.

Diótrefes xquiselia itlanahuatil Juan

⁹ Nemejhuamej tlaneltoquej onemechijcuilohuilij se tlajcuilolamatl, pero on tlacatl Diótrefes xquiselia notlanahuatil, pampa yejhua nohueyimati niman yejhua ica quinequi noyacatztlalia nemotzajlan. ¹⁰ Yejhua ica, tej, tla nejhua nias nemotech, nemechijlis on tlen yejhua quichihua niman on tlen tlajtlamach* notechcopia quijtohua. Yejhua noca ixtlacati niman nechijtohuilia on tlen xmelahuac. Niman xsan yejhua ica in, yejhua no xquinselia tocnihuan. No ijqui, on yejhuan quinselisnequij on tocnihuan, yejhua no xquincahuilia niman quinhuajquixtia ipan on tiopan.

Demetrio se cuajli tlacatl

¹¹ Notlajsojcaicniu, ma ca xmohuica quen on yejhuan xcuajli quichihua, yej xmohuica quen on yejhuan cuajli quichihua. On yejhuan quichihua on tlen cuajli yejhua iconue Dios, pero on yejhuan quichihua on tlen xcuajli yejhua xquixmati Dios. ¹² Nochimej tlajtlajtohuaj ica Demetrio cuajli tlacatl. Niman nochí tlen quichihua cuajli nohuica ihuan on temachtijli yejhuan melahuac. Niman nejhua no nictexpantilia de yejhua in ica melahuac, niman nemejhuamej nenquimatztoquej ica niquijtohua tlen melahuac.

Sa ica nochí tlajtojli para Gayo

¹³ Nicpia más miyec tlen nicnequi para ticmatis, pero xnicnequi nimitzilajcuilohuilis ipan in tlajcuilolamatl. ¹⁴ Niccha para nimitzitas saniman, niman ijcuacon cuajli tejhuatej titonojnotzasquej.

* **1:1** te amo † **1:3** mucho ‡ **1:6** amor § **1:7** nada; coxtla * **1:10** cosas

15 Xpia yolsehuilistli. Motetlajsojcahuan[†] yejhuan nican chantij mitztlaj-palohuaj. Nimitztlajtlanilia, xquintlajpalo sesentemej totetlajsojcahuan.

† 1:15 tus amigos

SAN JUDAS

ITLAJCUIOL ON APÓSTOL SAN JUDAS

Judas quintlajpalohua iconehuan Dios

¹ Nejhua, Judas, niitequitcau Jesucristo, niman niicniu Jacobo. Nemechtla-jcuilhuiya nemejhuamej yejhuan Dios toTajtzin omechnotz para iconehuan niman omechxeloj intech on tlajtlacolejquej niman mechejehua pampa nen-nemij san secan ihuan Jesucristo. ² Ma Dios mechmaca miyec iteicnelilis*, iyolsehuilis niman itetlajsojtlalist†.

On tlaneltocaquej nonequi quimanahuisquej on tlamachtijili yejhuan quinel-tocaj

(2 Pedro 2.1-17)

³ Notlajsojcaicnihuan, sanoyej‡ nicnequiya para nemechtla-jcuilhuis ica on temaquixtilistli yejhuan ticpiaj san secan. Pero aman nicuitia ica nonequi achtoj nemechtla-jcuilhuis para nemechtlacanonotzas. Xmanahuican on tlamachtijili yejhuan ticneltocaj yejhuan Dios san sejpa niman para nochipa oquitemacac intech on yejhuan iyaxcahuan§. ⁴ Nonequi para nemejhuamej xmanahuican pampa sequimej xcuajcualtin tlacamej yocalaquej nemotza-jlan ican tlacajcayahualistli. On Yectlajcuilojli yejhuan onijcuiloj ye huejc-ahui quijtohua ica itlahuel Dios yejhuan yejhuamej quiselisquej. Yejhuamej xcuajcualtin tlacamej yejhuan mechmachtiaj ica huelis nenquichihuasquej on tlen xcuajli san tlen nenquinequisquej nenquichihuasquej pampa Dios ican itetlajsojtlalist* mechtlapojojpolhuilia nochi nemotlajtlacolhuan. No ijqui yejhuamej xquiseliaj Dios yejhuan otechnoyaxcatij niman tosenteTeco Jesu-cristo.

⁵ Nemejhuamej ye nenquimatztoquej nochi tlen onochiu yehuejcahui inhuan on hebreos. Pero san nicnequi nemechelnamictis ica masqui toTeco Dios oquinquixtij nochimej on hebreos ne Egipto, más saquin† on yejhuan xoquineltocaquej on tlen oquijtoj oquincastigaroj ican miquilistli. ⁶ Niman no xquimelnamiquican on ilhuicactequitquej yejhuan oquipolojquej inter-qui niman yejhuan oquitlalcahuijquej inchan ne ilhuicac. Dios oquinsaloj ican teposcadenas yejhuan quipiasquej para nochipa, niman oquintzacu ipan tlayehualyotl campa quimpias hasta queman ajsis on hueyi tonajli ijcuac quinyolcuitis niman quintlaxtlahuilis. ⁷ No ijqui, xquimelnamiquican on chanejquej ne impan on huejhueyican Sodoma niman Gomorra niman on ocsequimej yejhuan oncatcaj nijnisiu. On tlacamej ahuilnemiyaj niman yejhuamej nonejnequiyaj ihuan ocsequimej tlacamej quen se tesihuau yesquiaj. No ijqui, on sihuamej nonejnequiyaj ihuan ocsequimej sihuamej quen se tehuentzin yesquiaj. Dios oquincastigaroj on huejhueyican ican tlilt para quiteititia ica ijqui niman para nochipa quincastigaros on tlajtlacole-jquej.

⁸ Ijcon tej, on tlacamej yejhuan ocalaquej nemotzajlan no quichihuaj on tlen xcuajli. Intemic quinyecana para quichihuasquej tlajtlamach‡ yejhuan quimijtlacohuilia intlalnacayo. Yejhuamej xquitlacaitaj itequihuajyo Dios, niman quinhuijhuicaltiaj on huejhueyixtoquej ilhuicactequitquej. ⁹ Sa no

* **1:2** su misericordia † **1:2** su amor ‡ **1:3** mucho § **1:3** le pertenecen; iaxcahuan, ihuaxcahuan, itlatquihuan * **1:4** su amor † **1:5** después ‡ **1:8** cosas

yejhua on ilhuicactequitquetl yejhuan yacatzticaj itoca Miguel, ijcuac omic Moisés quinocuijcuiliaya itlalnacayo ihuan on diablo. Ijcuac on xoquinemilij tla quitocarohua para cajhuas, yej san oquijlij: “Ma toTeco mitzajhua ipampa on tlen xcuajli ticchihua.” ¹⁰ Pero yejhuamej in tlacamej quijtohuiliaj on tlen xcuajli ica on tlajtlamach yejhuan xcajsicamatij. In tlacamej nemij quen yolquej pampa xhuelij tlanemiliaj, yej san quichihuaj on tlen intlalnacayo quinequi. Niman on tlajtlamach yejhuan quichihuaj quimpopolohua.

¹¹ ¡Lástima de yejhuamej! pampa xquitlacamatij Dios sa no ijqui quen Caín oquichiu. ¡Lástima de yejhuamej! pampa notlajcalij quiteititiaj ma tlajtlacocan ocsequimej pampa quinequij quitlanisquej tomin quen Balaam oquichiu. Niman no ¡lástima de yejhuamej! pampa miquij ica xquitlacamatij on tlanahuatiji no ijqui quen Coré omic. ¹² Yejhuamej quichihuaj tlajtlamach yejhuan tepinajtij ne ipan nemoilhuihuan campa nentlacuaj ican tetlajsojtlalistli. Yejhuamej tlacuaj niman tlaonij[§] ican paqulistli san secan, nion quintaj tla ocsequimej quimpopolohua. San nelnamiquij yejhuamej. Masqui ijcon nohuicaj xpinahuaj. Yejhuamej quen itlaj moxtli yejhuan xquipia atl niman cuica ajacatl, pampa notenehuaj ica quimatiq miyec tlajtlamach itech ica Dios, pero innemilis quiteititiaj ica xnejli. No ijcomej quen on cojtlaquijlomej yejhuan xijsijcan tlaquij ijcuac yoyejcoc on tonaltin para tlaquisquej. On cojin* ocpa ixpolijtoquej. Ixpolijtoquej pampa huaquij, niman pampa xnelhuayojquej. Ijcon, tej, on tlacamej no ocpa ixpolijtoquej. Ixpolijtoquej pampa xquipiaj yencuic nemilistli, niman no ipampa itlahuel Dios. ¹³ Nochi on tlen tepinajtij tlajtlamach quichihuaj nesi quen iposonajlo on mar ijcuac sanoyej cualani. Yejhuamej xhuelij teyecanaj quen itlaj sitlalimej yejhuan quisaj intech inojhui xoc huelij teyecanaj. Dios oquitlalij campa sanoyej tlayohuatoc campa on tlacamej nemisquej para nochipa.

¹⁴ Enoc yejhua ica chicome tlacatl onemicoya más saquin de Adán. Yejhua Enoc oquiteijlij on tiotlajtojli yejhuan oquiselij itech Dios. Yejhua oquijtoj quen ijqui impan nochihuas on yejhuan xcuajli nohuicaj. Ijquin oquijtoj: “Xcaquican, toTeco huajlas niman sanoyej miyec ilhuicactequitquej quinhuajhuicas, ¹⁵ para quinyolcuitis niman quintlaxtlahuilis nochimej on tlacamej. Niman yejhua quintlajtlamacas nochimej on xcuajcualtin tlacamej ipampa nochi on tlen xcuajli oquichijquej, niman ipampa nochi on tlen xcuajli intlajtol yejhuan oquijtohuilijquej Dios.” ¹⁶ On xcuajcualtin tlacamej yejhuan ocalaquej nemotzajlan xqueman cuajli tlajtlatohuaj, niman teijijtohuaj. Quichihuaj nochi on tlen xcuajli inelehuis† quinequi. Nohueyitenehuaj niman tepacanojnotzaj san para quinmacaj itlaj tlen quinequij.

Judas quintlacanonotza on tlaneltocaquej

¹⁷ Pero nemejhuamej, notlajsojcaicnihuan, xquelnamiquican on tlen iapóstoles toTeco Jesucristo oquijtojquej ica nochihuas. ¹⁸ Ijquin omechijlijquej: “Ipan on tonaltin ijcuac ye nisiu para Cristo huajlas ocsejpa, nemisquej tlacamej yejhuan quipijpinahuisquej on tlajtlamach tlen chipahuac niman quitocasquej on inelehuis yejhuan xchipahuac.” ¹⁹ In tlacamej texejxelohuaj. Yejhuamej quichihuaj san tlinon intlalnacayo quinequi. Niman no xquipiaj iEspíritu Dios.

²⁰ Pero nemejhuamej, notlajsojcaicnihuan, xmopalehuican ihuan ocsequimej para nemoscaltisquej ipan nemochipajcatlaneltoc. Xchihuacan

oración ican ipoder Espíritu Santo. ²¹ Xnemilican nochipa quen ijqui nen-huelisquej nenquiselisquej itetlajsojtlalis[‡] Dios. Niman xchacan on yencuic nemilistli para nochipa yejhuan toTeco Jesucristo techmacas ican iteic-nelilis[§].

²² Xquintlalican melajquej ipan intlamachilis on yejhuan ometlamatij. ²³ Ocsequimej yejhuan quemach tlaneltocaj itech on xcuajli temachtijli, xquinmaquixtican ijcon quen tlatlasquiaj ipan tlitl. Niman on ocsequimej yejhuan sanoyej quineltocaj on xcuajli temachtijli, xquimicnelican pero ican miyec cuidado para ma ca nenquichihuasquej quen yejhuatej quichihuaj. Niman yej no xtlajyelitacan intlajtlacolhuan quen nenquintlajyelitasquiaj* on tlaquentin yejhuan temajlojquej.

Judas quiyectenehua Dios

²⁴ Dios toTemaquixtijcau huelis mechejehuas para ma ca nenhuetzisquej ipan tlajtlacojli. Niman yejhua huelis mechhuicas nenchipajquej xican tlajtlacojli niman sanoyej nempaquisquej itech campa yejhua nemi ican ihueyilis. ²⁵ Dios nochí quimati niman san yejhua toDios, niman yejhua toTemaquixtijcau. Itechcopa Jesucristo nomati ica yejhua quipia nochí tetlacaítalistli, hueylistli, niman poder para tlamandarohua, niman tequi-huajyotl. Nochi yejhua in oquimpix ijcuac xe oncatca in tlalticpactli, aman quimpia niman quimpias para nochipa. Ma ijqui nochihua.

[‡] 1:21 su amor

[§] 1:21 su misericordia

* 1:23 les horrorizaría

EL APOCALIPSIS ON TLIN JESUCRISTO OQUITITIJ ON APÓSTOL JUAN IPAN ON TLATLACHALISTLI QUEN ITEMICPAN

Jesucristo oquimachiltij Juan in tlajtlamach

¹ Ipan in tlajcuilolamatl niquijcuilohua on tlajtlamach* yejhuan Dios oquinec para Jesucristo ma quinmachilti on itequitcahuau on tlen saniman nochihuas. Cristo oquimachiltij Juan in tlajtlamach itechcopia se ilhuicacte-quitquetl†. ² Niman Juan oquitexpantilij nochi tlen ocac ica itlajtol Dios niman on tlen melahuac yejhuan oquititij Jesucristo. ³ Sanoyej‡ tlatiochiutli on yejhuan quitecaquistilia in tiotlajtojli yejhuan Dios ocuajtitlan. Niman no sanoyej tlatiochiutin on yejhuan caquij in tiotlajtojli niman quitlacamatij pampa ye nisu on tonaltin ijcuac nochi in tlen nican tlajcuilnesticaj nochihuas.

Juan oquintlajcuilhuij on tlaneltocaquej ipan on chicomemej tiopantin

⁴ Nejhua Juan nemechtlajcuilhuia nemejhuamej tlaneltocaquej ne ipan on chicomemej tiopantin yejhuan oncaj ne Asia. Ma Dios mechtiochihua niman ma mechmaca yolsehuilistli. Yejhua aman yolticaj, niman nochipa nemiya, niman nochipa nemis. Niman on chicomemej espíritus no ijqui ma mechtiochihuacan niman ma mechmacacan yolsehuilistli. Yejhuatej nemij ixpan Dios ne campa tlanahuatia. ⁵ No ijqui ma mechtiochihua Jesucristo yejhuan nochipa quiteixpantilia quen nonequi niman ma mechmaca yolsehuilistli. Sa no yejhua on yejhuan achtoj oyoliu§ niman onoquetzteu ipan itlalcon para xoc queman miquis, niman yejhuan quinmandarohua on reyes. Sa no Cristo techtlajsojta* niman otechchipahuilij toalma ican iyesyo. ⁶ Yejhua otechtlalij quen reyes niman tiopixquej para tictequichihuilisquej on Dios iTajzin. ¡Ma quiseli Cristo hueyilistli niman poder para nochipa! Ma ijqui nochihua.

⁷ Xquitacan, Cristo huajlau ipan moxtli. Niman nochi tlacatl quitas hasta on yejhuan oquicocoquej. Niman nochimej on tlalticpactlacamej chocasquej yejhua ipampa. Quemaj melahuac ijqui nochihuas. Ma ijqui nochihua.

⁸ “Nejhua niachtoj niman nisa ica noch de noch on tlajtlamach ijqui quen on abecedario pehua ican on letra A niman ontlami ican on letra Z”, quijtohua on toTeco Dios yejhuan noch hueli. Yejhua aman yoltica, niman nochipa nemiya, niman nochipa nemis.

Cristo oquinotitij Juan

⁹ Nejhua, Juan, ninemocniu. Pampa ninemi san secan ihuan Jesús quen nemejhuamej, san secan nemohuan nicpia tlajyohuclistli niman temaquixtilistli niman tlaxicohualistli. Ninemiya ne ipan on tlalhuactli itoca Patmos yejhuan oncaj atlajcotian. Ompa onechontotocaquej pampa nictejiliaya on itemachtil Dios niman on tlen nicmati ica Jesucristo. ¹⁰ Ipan se tonajli ijcuac domingo, on Espíritu Santo oquiyecan notlamachilis ican ipoder, niman ne nocuitlapan ica onicac se chicahuac tlajtojli yejhuan ocaquistic quen caquisti on trompeta ijcuac se quipitza. ¹¹ Yejhua on tlajtojli onechijlij:

* **1:1** cosas † **1:1** ángel: Angeles tequitij ne ilhuicac niman nican ipan in tlalticpactli. ‡ **1:3** muy § **1:5** resucitó; oyol * **1:5** nos ama

—Nejhua niachtoj niman nisa ica nochí de nochí on tlajtlamach, no ijqui quen on abecedario pehua ican on letra A niman ontlami ican on letra Z. Ipan se tlajcuilolamatl xquijcuilo on tlen tiquita. Niman quemaj on tlajcuilolamatl xquintitlanili on chicomemej tiopantin yejhuan onoquej ne iregión Asia. Xtitlani ne ipan on huejhueyican Efeso, Esmirna, Pérgamo, Tiatira, Sardis, Filadelfia niman Laodicea.

¹² Oninocuep para onicontac aquinon nechnotzaya niman oniquitac chicome candeleros tlachijchiutin ican oro. ¹³ Niman intlajcotian on chicome candeleros oniquitac se yejhuan nesia quen tlacatl. Yejhua tlaque-mej catca ican se tlaquentli yejhuan hasta icxitlan quitlamiliaya, niman iyelpan malinticatca ican se ilpicatl tlachijchiutli ican oro. ¹⁴ Niman oniq-uitac itzon istac quen itlaj lana† yejhuan sanoyej istac noso quen on nieve. Niman ixtololojhuan quen itlaj tlimilinajli. ¹⁵ Icxihuan pepetlacayaj quen on tepostli costic itoca bronce ijcuac quipatlaj ipan horno. Ijcon quen chicahuac comoni on hueyi atl ijcuac huejcatlan ontoyajticaj, no ijqui caquistiya itlajtol on yejhuan oniquitac. ¹⁶ Ipan iyecma quipiaya chicome sitlalimej, niman ipan icamac huajquisticatca se espada yejhuan semi sanoyej tlatequi ocan. Ijcon quen petlani on tonatzintli ijcuac sanoyej chicahuac tona, ijqui opetlan ixayac.

¹⁷ Ijcuac oniquitac onihuetztiaj icxitlan quen micatzintli. Pero yejhua napan oquitlalij iyecma niman onechijlij:

—Ma ca xmomojti. Nejhua niachtoj niman nisa ica nochí de nochí on tlajtlamach. ¹⁸ Nejhua nicpia nemilistli. Nejhua, tej, onimica, pero xquita, aman nicpia nemilistli para nochipa. Nejhua nicpia poder para nicnahuatia on miquilistli niman miquilispan. ¹⁹ Yejhua ica, tej, xquijcuilo on tlinon tiquita, on tlen aman nochihua niman on tlen nochihuas. ²⁰ On chicomemej sitlalimej yejhuan otiquintac ipan noyecma niman on chicomemej can-deleros tlachijchiutin ican oro quipiaj inichtacayo†. Niman on inichtacayo sa no yejhua in quijtosnequi: on chicomemej sitlalimej sa no inpastores on chicomemej tiopantin, niman on chicomemej candeleros sa no yejhua on chicomemej tiopantin.

2

On tiopan ne ipan on hueyican itoca Efeso quitlajcuilhuiyaj

¹ 'Xtlajcuilhui ipastor on tiopan de Efeso niman ijquin xquijli: In yejhua itlajtol on yejhuan quipia on chicome sitlalimej ipan iyecma niman yejhuan nemi intlajcotian on chicomemej candeleros tlachijchiutin ican oro.

² Yejhua ijquin mitzijlia: Nejhua nicmati nochí tlen ticchihua. Nicmati ica sanoyej* chicahuac titequiti nopampa niman no niquixmati moiyy-ohuilis. Nicmatzticaj ica xhueli tiquinxicohua on xcuajcualtin tla-camej. Nejhua nicmatzticaj ica yotiquintlatlatac on yejhuan notene-huaj apóstoles pero xnejli apóstoles niman yotiquitac ica san tlacajcaya-jquej.

³ Nopampa ticxicohua on, tlajyohuilstli niman no sanoyej titequiti nopampa. Niman nochí yejhua in xtsiahui ica ticchihua.

⁴ Pero masqui ijcon ticchihua, nicpia tlinon ica nimitzchicajcanotzas. Xoc tinechtlaſojtla† quen achtoj otinechtlaſojtla.

† **1:14** iichcayo on borrego ‡ **1:20** sus secretos * **2:2** muy † **2:4** me amas

- 5 Yehua ica xquelnamiqui quech tetlajsojtlalistli otinechpialij achtoj. Aman, tej, xmoyolpatla niman xnechtajsojtl quen achtoj oticchiu. Tla xtimoyolpatlas, nias niman nimitzquixtilis on mocandelero.
- 6 Pero no ticpia on tlinon ica nimitzhueyitenehuas. Tictlahuelita on tlen quichihuaj on xcuajcualtin tlacamej yejhuan quitlacamatij itemachtil Nicolás. Nejhua no nictlahuelita itemachtil.
- 7 Xpiacan cuidado on tlen on Espíritu Santo quimijlia on tlaneltocaquej. On yejhuan tetlanquej yesquej niquincahuilis ma quicuacan itlaquilyo on cojtlaquijlotl yejhuan oncaj ipan icojtlaquilyo Dios ne ilhuicac. On tlaquilyotl quitemaca nemilistli para nochipa.

On tiopan ne ipan on hueyican itoca Esmirna quitlajcuilhuiyaj

- 8 'Xtlajcuilhui ipastor on tiopan ne Esmirna niman ijquin xquijli:
In yejhua itlajtol on yejhuan omic niman ocsejpa oyoliu‡, yejhuan achtoj niman sa ica noch de noch tlajtlamach§.
- 9 Yehua ijquin mitzijlia: Nejhua niquixmati quen titlajyohuia niman ica xitlaj* ticpia, masqui ica tlen melahuac tejhua tirrico ixpan Dios. No nicmatzticaj ica on yejhuan notenehuaj hebreos mitzijtohuiliaj on tlen xcuajli. Pero yejhuatej xmelahuac nopohuaj quen hebreos, yej nopohuaj ihuan Satanás.
- 10 Ma ca xmacajsi on tlen saniman tiquijyohuis. Nenquesquimej mechassis on diablo para mechtlatlatas, niman nentlajyohuisquej majtlactli tonajli. Xquejehua motlaneltoc masqui tla timquis niman quen motlayocolil nimitzmacas on yencuic nemilistli yejhuan ticpias para nochipa.
- 11 Xpiacan cuidado on tlen on Espíritu Santo quimijlia on tlaneltocaquej. On yejhuan tetlanquej yesquej xqueman ocpa miquisquej niman xyasquej ne mictlan campa tetlajyohuiltyoyan.

On tiopan ne ipan on hueyican itoca Pérgamo quitlajcuilhuiyaj

- 12 'Xtlajcuilhui ipastor on tiopan ne Pérgamo niman ijquin xquijli:
In yejhua itlajtol on yejhuan quipia on espada yejhuan sanoyej tlatequi ocan.
- 13 Yehua ijquin mitzijlia: Nejhua nicmatzticaj noch tlen ticchihua niman no nicmatzticaj canon tichanti. Tichanti campa on Satanás quipia itrono. Pero masqui nepa tichanti, notech ticuajpixtiu motlaneltoc. Masqui oquimictijquej on yejhuan melahuac notenojnotzacau Antipas ompa campa chanti Satanás, tejhua xotinechcau.
- 14 Pero masqui ijcon ticchihua no nicpia quesqui tlajtlamach yejhuan ica nimitzchicajcanotzas. Ompa mohuan nemij sequimej yejhuan quito-caj itemachtil Balaam yejhuan ye huejcahui otemachtica. Yejhua oquimachtij Balac quen ijqui quichihuas para on hebreos ma tlajtlacocan. Oquimijlij ma quicuacan on tlajtlamach yejhuan nohuentlaliaj intech on tlamachijchihualtin intajtzitzihuan niman ma ahuilnemican.
- 15 Niman no mohuan nemij sequimej yejhuan quitocaj on temachtijli yejhuan Nicolás otemachtij niman intemachtil nictlahuelita.
- 16 Yehua ica, tej, xmoyolpatla pampa tla xtimoyolpatlas, saniman nias motech niman niquinhuijsoquis ica on espada yejhuan nocamac quisa.
- 17 Xpiacan cuidado on tlen on Espíritu Santo quimijlia on tlaneltocaquej. On yejhuan tetlanquej yesquej niquinmacas ma cuacan on maná

‡ 2:8 resucitó; oyol § 2:8 cosas * 2:9 nada; coxtla

yejhuan iyanticaj. Niman no niquinmacas se tetzintli istac campa tlajcuilnestias se yencuic tocayotl yejhuan xacaj quixmatis, yej san on yejhuan quiselia quixmatis.

On tiopan ne ipan on hueyican itoca Tiatira quitlajcuilhuiyaj

- ¹⁸ 'Xtlajcuilhui ipastor on tiopan ne Tiatira niman ijquin xquijli:
In yejhua itlajtol on yejhuan iConeu Dios, yejhuan quipia ixtololojhuān quen itlaj tlimilinajli niman icxihuan petlantoquej quen on tepostli itoca bronce.
- ¹⁹ Yejhua ijquin mitzijlia: Nejhua niquixmati motequiu, motetlajsojtlalis†, motlaneltoc, niman moiyyohuilis. Niman nicmatzticaj ica aman más titequiti xquen achtopa.
- ²⁰ Pero masqui ijcon ticchihua, no nicipia tlinon ica nimitzhicajcanotzas. On sihuatl Jezabel yejhuan notenehua tiotlajtojquetl, ticahulia quinmachtia on notequitcahuān. Niman yejhua quinmachtia para ma ahuijnemican niman para ma quicuacan on tlajtlamach yejhuan nohuentlalaj intech on tlamachijchihualtin intajtzitzihuān.
- ²¹ On sihuatl onicmacac tonaltin para ma noyolpatla, pero xquinequi cajcahuas on ica ahuijnemi.
- ²² Xcaqui, on sihuatl nictlajcalis ipan tlapechtli para sanoyej cuałos, niman no on yejhuan ihuan ahuijnemij niquinxinis ipan on sanoyej temojtij tlajyohuclistli tla xnoyolpatlaj niman xcajcahuaj on ica ihuan cojcochtinemij.
- ²³ Niman iconehuan on sihuatl niquinmictis. Ijcuac ijcon nicchihuas, on tlaneltoaquej quimatisquej ica nejhua nochí cuajli nicmati tlinon oncaj ipan itlamachilis niman ipan iyojlo cada se, niman cada se nictlaxflahuilis quen nonequi on tlen quichihua.
- ²⁴ Pero nemejhuamej yejhuan no nennemij ompa ne Tiatira, yejhuan xnenquitlacamatij on quenon temachtijli niman xnenquixmatij on tlen yejhuatej quitenehuaj huejhueyi ichtacayo Satanás, nemechijlia ica xoc itlaj ica nemechtlajtlacoltis.
- ²⁵ Pero on tlen nenquineltocaj xquejehuacan hasta ijcuac nejhua ocsejpa nihuajlas.
- ²⁶ On yejhuan tetlanquej yesquej niman ican nochí innemilis nechtlacamatisquej, niquinmacas on tequihuajyotl para quinmandarosquej nochí países
- ²⁷ ijcon quen noTajzin onechmacac on tequihuajyotl. Yejhuatej, tej, quinmandarosquej países ica on cojtic tequihuajyotl yejhuan sanoyej hueli quinxixinia on países quen se tlacatl hueli cuejcuechtilia se contli.
- ²⁸ Niman no niquinmacas ihueyi cualtzinyo on cualcan sitlalin.
- ²⁹ Xpiacan cuidado on tlen on Espíritu Santo quimijlia on tlaneltoaquej.

3

On tiopan ne ipan on hueyican itoca Sardis quitlajcuilhuiyaj

- ¹ 'Xtlajcuilhui ipastor on tiopan ne Sardis niman ijquin xquijli:
In yejhua itlajtol on yejhuan quipia on chicome iespíritus Dios niman on chicome sitlalimej. Yejhua ijquin mitzijlia: Nejhua nicmatzticaj nochí tlen ticchihua. Nicmatzticaj ica timictoc masqui tejhua timotenehuilia ticpia nemilistli ne ixpan Dios.

† **2:19** tu amor

- ² Xmotlachalti, niman xyolchicahua on tlen oc^{*} ticpia yejhuan ye nisu catca para miquisquia. Niquila ica xoticajxitij ticchihua noch on tlen Dios quinequi.
- ³ Yejhua ica, xquelnamiqui on tlen omitzmachtijquej niman on tlen oticac. Xtlacamati, niman xmoyolpatla. Tla xtimotlachaltis, nias motech quen yacaj tlachtequetl niman xticmatis tlen hora nimitzontas.
- ⁴ Pero ompa ne Sardis tiquimpia quesquimej tlacamej yejhuan xnijtlacohuaj. Yejhamej nohuan quistinemisquej ican intlaquen istac pampa ijqui quimelahuat†.
- ⁵ Yejhuan tetlanquej yesquej, tlaquemejquej yesquej ican istac tlaquentli. Xniquintocayopopolos ne ipan on tlajcuilolamatl yejhuan quijtohua aquinomej quipiaj on yencuic nemilistli para nochipa, yej niquintocayotenehuas ne ixpan noTajtzin niman imixpan on ilhuicacte-quitquej‡.
- ⁶ Xpiacan cuidado on tlen on Espíritu Santo quimijlia on tlaneltocaquej.

On tiopan ne ipan on hueyican itoca Filadelfia quitlajcuilhuiyaj

- ⁷ 'Xtlajcuilhui ipastor on tiopan de Filadelfia niman ijquin xquijli: In yejhua itlajtol on yejhuan melahuac niman yolchipahuac, niman yejhuan quipia illave David. On tlen yejhua quitlapohua, xacaj hueli quitzacua; niman on tlen yejhua quitzacua, xacaj hueli quitlapohua.
- ⁸ Yejhua ijquin mitzijlia: Nejhua nicmatzticaj noch tlen ticchihua. Aman xcaqui, nejhua yonimitztlapohuilij se tlatzacuilyotl§ yejhuan xacaj huelis quitzacuas. Masqui tejhua xmás ticojtic, tictlacamati notemachtil, niman xtinechnenequi*.
- ⁹ Xquita, tej, on xcuajcualtin tlacamej yejhuan nemij ipan itiopan Satanás. Yejhamej notenehuaj hebreos, pero xnejli hebreos. Yejhamej tlaca-jcayajquej. Nicchihuas para mocxitlan ma notlacuenquetzacan, para ijcon quimatisquej ica nimitztlajsojtlat†.
- ¹⁰ Pampa yotictlacamat notlanahuatil niman ticxicohua ican tlajyohuilstli, nejhua no nimitzmanahuis ipan on hora ijcuac yejcos on tlajyohuilstli yejhuan noch tlajtlacolej ipan huajlas. Yejhua on tlajyohuilstli onyas, para noch tlalticpactlacatl notlatlatas.
- ¹¹ Nejhua, tej, saniman nihuajlas. On tlen ticpia xquejehua, para ma ca yacaj mitzcuilis motetlayocolil yejhuan Dios quinequi mitzmacas.
- ¹² Yejhuan tetlanquej yesquej, niquintlalis para hueyixtiasquej quen pilares ne ipan itiopan noDios. Yejhua, tej, xqueman nejcuani ompa. Niman ipan niquijcuilos itocayo noDios niman itocayo on hueyican yejhuan iyaxca‡ noDios. On hueyican sa no yejhua on yencuic Jerusalén yejhuan hualejticaj ne ilhuicac niman itech Dios. Ipan on yejhuan tetlanquej yesquej, no niquijcuilos noyencuic tocayo.
- ¹³ Xpiacan cuidado on tlen on Espíritu Santo quimijlia on tlaneltocaquej.

On tiopan ne ipan on hueyican itoca Laodicea quitlajcuilhuiyaj

- ¹⁴ 'Xtlajcuilhui ipastor on tiopan ne Laodicea niman ijquin xquijli: In yejhua itlajtol on yejhuan melahuac. Yejhua itestigo Dios yejhuan nochipa cuajli quichihua itequiu. Yejhua quijtohua on tlen melahuac niman yejhua oquitlalij noch tlen oncaj itechcopa Dios.

* 3:2 todavía; sanquen † 3:4 merece ‡ 3:5 ángeles: Angeles tequitij ne ilhuicac niman nican ipan in tlalticpactli. § 3:8 puerta * 3:8 no me niegas † 3:9 te amo ‡ 3:12 le pertenece; iaxca, ihuaxca, itlatqui

- ¹⁵ Ijquin mitzijlia: Nejhua nicmatzticaj nochi tlen ticchihua. Nicmatzticaj ica tejhua xticpia san se moyojo para cuajli tinechtlacamati, nion xticpia san se moyojo para tinechtlalcahuiya. Nicnequi para xnechtlacamati noso xnechtlalcahui.
- ¹⁶ Pampa xmelahuac cuajli tinechtlacamati nion xmelahuac tinechtlalcahuiya, nicpia ipan noyojo para nimitztlalcahuis.
- ¹⁷ Tejhua, tej, timorricojtenehua, niman tiquijtohua ica xitlaj[§] mitzpolohua, pero xticmati ica ixpan Dios tejhua hasta ixco tlajli tinemi, xticselia teicnelilistli xitlaj ticpijquia, tixpajpayatic niman titetzotzoltic.
- ¹⁸ Yehua ica, tej, nimitztlacanonotza ica notech xcohua on chipahuac oro yejhuan yoquichipajquej ica on tlilt para ijcon melahuac tirricoj yes. Niman no ijqui notech xcohua on istac tlaquentli para ica timotlaquentis niman ijcon on mopinajcatlalnacayo xoc teixpan onyas. Niman para huelis titlachas, no notech xcohua on pajtli para tiquintlalilis mixtololojhuan.
- ¹⁹ On yejhuan niquintlajsojtla*, niquinchicajcanotza, niman niquincastigarohua ijcuac quichihuaj on tlen xcuajli. Yehua ica, xnechtlacamati ican nochi moyojo niman xmoyolpatla.
- ²⁰ Xmatztia ica nejhua nijcac tequiahuatempa niman nictetelohua on tlatzacuilyotl†. Tla yacaj caquis ica niconotzticaj niman quitlapos itlatzacuilyou, nicalaquis niman ihuan nitlacuas, niman yejhua nohuan tlacuas.
- ²¹ On yejhuan tetlanquej yesquej niquincahuilis nohuan ma notlalicane campa nitlanahuatia, ijcon quen nejhua yonitetlan niman ihuan no-Tajzin yoninotlalij ne campa yejhua tlanahuatia.
- ²² Xpiacan cuidado on tlen on Espíritu Santo quimijlia on tlaneltocaquej.

4

Ne ilhuicac Dios quiselia hueyilistli

¹ Quemaj onajcotlachix niman oniquitac huajtlapojticaj se tlatzacuilyotl ne ilhuicac. Niman on tlajtojli yejhuan achtoj onechnotzca quen itlaj trompeta, onechijlij:

—Nican xhuajtlejco, niman nimitzititis on tlen tlajtlamach* sanquin de yejhua in nochihuas.

² Quemaj nimantzin on Espíritu Santo oquiyecan notlamachilis ican poder. Quemaj oniquitac se hueyixticaj trono ne ilhuicac, niman ipan on hueyixticaj trono aquinonon yehuaticatca. ³ Niman on yejhuan ipan on trono yehuaticatca, petlanticatca quen itlaj tetl yejhuan cualtetzin itoca jaspe niman cornalina. Niman on trono quiyehualojticatca se cosemalotl, niman on cosemalotl petlanticatca xoxojqui quen on tetl itoca esmeralda. ⁴ Niman oniquitac sempoajli† huan nahui tronos yejhuan quiyehualojticatcaj on yejhuan achtoj trono oniquitac. Niman ipan on sempoajli huan nahui tronos, yehuaticatcaj sempoajli huan nahui tlajtlajmatquej. Yejhuatej tlaquemejquej catcaj ican tlaquentli istac niman ipan intzoncon quipayaj coronas yejhuan tlachijchiutin ican oro. ⁵ Ne itech on hueyixticaj trono quisayaj tlapetlanaltin, tlacaquistiya niman tlacomoniya. Niman ixpan on hueyixticaj trono, tlicuiticatcaj chicome tlahuiltil. On chicome tlahuiltil sa no yejhua on chicome iespíritus Dios. ⁶ Niman ne ixpan on hueyixticaj

§ **3:17** nada; coxtla * **3:19** les amo † **3:20** puerta * **4:1** cosas † **4:4** Sempoajli quitosnequi veinte niman sempoajli huan nahui quitosnequi veinticuatro.

trono oncatca on tlen nesiya quen se mar tlachijchiutli ican tescatl. Yehuan sanoyej[†] chipahuac quen tescatl yejhuan pepetlaca.

Tlajcotian niman iyehualican on hueyixticaj trono nemiyaj nahuimej on quen yolquej yejhuan imixpan niman incuitlapan tentoya ican imixtololohuan. ⁷ On achtoj tlajtlachaya quen itlaj león, on yejhuan ica ome tlajtlachaya quen itlaj huacax, niman on yejhuan ica yeyi oquipix ixayac quen tlacatl, niman on yejhuan ica nahui tlajtlachaya quen itlaj tojtli itoca águila ijcuac patlantiu. ⁸ Niman cada sesentemej quipiayaj chicuasen inmajtlapal. Niman itzintlan niman icuitlapan inmajtlapal tenticatca ican ixtololojtin no ijqui quen tenticatca ipan nochi itlalnacayo. Cada tonajli niman cada yejhua jli xcajcahuayaj ica ijquin quijtohuayaj:

¡Yectli, yectli, yectli, toTeco Dios nochi hueli; nochipa nemiya, niman aman yolticaj, niman nochipa nemis!

⁹ Niman chica on quen itlaj yolquej quimacaj hueyilistli, tetlacaitalistli niman tlaxtlahuijli on yejhuan yehuaticatca ipan on hueyixticaj trono, yejhuan nemi para nochipa, ¹⁰ on sempoajli huan nahui tlajtlajmatquej no notlacuenquetzayaj ixpan niman quimahuistiliayaj on yejhuan nemi para nochipa. Yejhuatej no quitlaliayaj incoronas ixpan on hueyixticaj trono, niman ijquin quijtohuayaj:

¹¹ ToTeco Dios, tejhua mitzmelhua[§] para ticselis hueyilistli, tetlacaitalistli, niman poder, pampa tejhua nochi tlajtlamach otictlalij niman quen tejhua oticnec otiquintalij niman onoquej.

5

Juan oquitac on tlajcuilolamatl niman on Borreguito

¹ Quemaj iyecmacopa on yejhuan yehuaticatca ipan on hueyixticaj trono oniquitac se tlajcuilolamatl mimilijtca*. On tlajcuilolamatl tlajcuilojlo sanquen ijtic niman icuitlapan, niman campa ontlantoc ica mimilijtcaj quipia chicome sellos. ² Niman oniquitac se ilhuicactequitquetl†, yejhuan quipia poder. Niman in ilhuicactequitquetl ican chicahuac tlajtojli quijtohuaya:

—¿Aquinon quimelahuat‡ quitlapos isellos on tlajcuilolamatl mimilijtcaj niman ijqui huelis tlaphuis?

³ Pero xnemiya nion ne ilhuicac, nion ipan tlalticpactli, nion itzintlan in tlalticpactli campa nemij on mimiquej yejhuan ohuel oquitlapoj on tlajcuilolamatl, nion para quitas tlinon tlajcuilolnesticaj. ⁴ Niman nejhua sanoyej[§] nichocaya pampa xquinextiayaj aquinon quimelahu para quitlapos on tlajcuilolamatl, nion para quitas ijtic, nion nomachtis. ⁵ Quemaj semej on tlajtlajmatquej onechijlij:

—Ma ca sa xchoca. Xquita on León. Yejhua in se tlacatl yejhuan hualejticaj itech Judá niman hualejticaj itech rey David. Yejhua yetetlan niman yejhua ica huelis quitlapos on chicome sellos niman quitlapos on tlajcuilolamatl mimilijtcaj.

⁶ Quemaj itlajcotian on hueyixticaj trono niman imixpan on quen yolquej niman on tlajtlajmatquej oniquitac ijcatcatca se Borreguito. Ipan on Borreguito nesticatca ica yoquimictijcaj. Yejhua quipiaya chicome icuacuahuan niman chicome ixtololohuan yejhua quijtosnequij on chicome iespíritus Dios yejhuan imanyan nochi in tlalticpactli oquinhuajtitlanquej. ⁷ Yejhua ohuajlaj itech on hueyixticaj trono, niman ocontilan on tlajcuilolamatl

‡ 4:6 muy § 4:11 mereces * 5:1 enrollado; mimiltic, tequimiltic † 5:2 ángel: Angeles tequitij ne ilhicac niman nican ipan in tlalticpactli. ‡ 5:2 merece § 5:4 mucho

mimilijticaj yejhuan quipiaya ipan iyecma on yejhuan ipan on hueyixticaj trono yehuaticatca. ⁸ Ijcuac on Borreguito ocontilan on tlajcuilolamatl mimilijticaj, ixpan onotlacuenquetzquej on nahuimej yejhuan quen yolquej niman on sempoajli* huan nahui tlajtlajmatquej. Cada se quipiayaj se arpa, niman quitquiyaj copas tlachijchiutin ican oro. On copas tetentiayaj ican copajli, niman on copajli quijtosnequi inoraciones on teyaxcahuant† itech Dios. ⁹ Yejhuamej quitlacuicatiayaj se yencuic tlacuicajli:

Tejhua mitzmelhua tiquitzquis on tlajcuilolamatl mimilijticaj niman tict-lapos isellos, pampa omitzmictijcaj, niman ican moyesyo otitechcou para otitechteyaxcatij itech Dios. Tlacamej de nochimej razas, noch quech sesetlamantiquej tlajtoltint‡, noch pueblos niman noch países otiquincou para Dios.

¹⁰ Niman otitechtlalij quen reyes niman tiopixquej para tictequichihuil-isquej Dios niman tejhuamej titlanahuatisquej ipan tlalticpactli.

¹¹ Quemaj nimantzin oniquintac, niman onicac intlajtol§ miyequej il-huicactequitquej. Yejhuamej quiyehualojticatcaj on hueyixticaj trono in-huan on nahuimej yejhuan quen itlaj yolquej tlajtlachayaj, niman on tlajtlajmatquej. Ompa nemiyaj millones niman millones de yejhuan. ¹² Niman ican chicahuac tlajtojli ijquin quijtohuayaj:

—¡On Borreguito yejhuan oquimictijcaj quimelhua quiselis on poder, on riqueza, on tlamatquilistli, on chicahualistli, on tetlacaitalistli, on hueyilistli niman on yectenehualistli!

¹³ Niman noch on tlajtlamach* niman noch on tlen yolticaj yejhuan Dios oquitlalij, yejhuan nemij ne ilhuicac, yejhuan nemij ipan in tlalticpactli niman itzintlan in tlalticpactli campa nemij on mimiquej niman ijtic mar, niman noch on tlajtlamach yejhuan impan oncaj, ijquin onicac quijtohuaj: On yejhuan yehuaticaj ipan on hueyixticaj trono niman on Borreguito para nochipa ma quinmacatiacan on yectenehualistli, on tetlacaitalistli, on hueyilistli niman on poder.

¹⁴ Niman on nahuimej yejhuan quen itlaj yolquej tlajtlachayaj quijtohuayaj:

—¡Ma ijqui nochihua!

Niman on sempoajli huan nahui tlajtlajmatquej onotlacuenquetzquej niman oquimahustilijquej on yejhuan para nochipa quipia nemilistli.

6

Juan oquitac on Borreguito quen oquintlapoj on chicome sellos

¹ Quemaj oniquitac on Borreguito oquitlapoj on achtoj sello. Ijcuac oquitlapoj, onicac itlajtol se de on nahuimej yejhuan quen itlaj yolquej tlajtlachayaj. Itlajtol caquistiya quen itlaj tlacomonajli, niman onechijlij:

—¡Xhuajla niman xquita!

² Onontlachix, niman oniquitac se caballo istac. On yejhuan ipan yetiaya quitquiya se arco niman iflecha. Oquimacaquej se corona, niman oquisteu quen se tetlanquetl para ontetlanis.

³ Ijcuac on Borreguito oquitlapoj on ica ome sello, on yejhuan ica ome quen itlaj yolqui tlajtlachaya onicac ica onechijlij:

—¡Xhuajla niman xquita!

* ^{5:8} Sempoajli quitosnequi veinte niman sempoajli huan nahui quitosnequi veinticuatro. † ^{5:8}

le pertenecen; teyaxcahuant, tehuaxcahuant, tetlatquiuhuan ‡ ^{5:9} lenguas § ^{5:11} voces de ellos

* ^{5:13} cosas

⁴ Onontlachix, niman oniquitac oquis se caballo chichiltic. On yejhan ipan yetiaya oquiselij se espada niman tequihiuayotl para quichihua guerras ipan in tlalticpactli, niman quichihuas para on tlacamej ma nomictican.

⁵ Ijcuac on Borreguito oquitlapoj on ica yeyi sello, on yejhan ica yeyi quen itlaj yolqui tlajtlachaya, onicac ica onechijlij:

—¡Xhuajla niman xquita!

Onontlachix, niman oniquitac se caballo capotztic. On yejhan ipan yetiaya quitquia se tlatemachihuajli para ica tlatemachihuas. ⁶ Niman intlajcotian on nahui yejhan quen itlaj yolquej tlajtlachayaj, onicac se tlajtojli yejhan quijtohuaya:

—Yejcos on tonaltin ijcuac se quitlanis san se litro trigo, noso san yeyi litro iteyo cebada ipan se tonajli, pero ma ca xquijtlaco on aceite nion on vino.

⁷ Ijcuac on Borreguito oquitlapoj on ica nahui sello, on ica nahui quen itlaj yolqui tlajtlachaya onicac onechijlij:

—¡Xhuajla niman xquita!

⁸ Onontlachix, niman oniquitac se caballo costic. On yejhan ipan yetiaya cuitiayaj Miquilistli, niman on yejhan nisu cuajtocaya cuitiayaj Mictlan. Oquinmacaquej poder ipan se nahui partetipan in tlalticpactli para quinmictisquej on tlacamej ican guerras, ican apistli, ican cualolistli niman ican on tecuanimej yolquej yejhan quisasquej ipan in tlalticpactli.

⁹ Ijcuac on Borreguito oquitlapoj on ica macuijli sello, ne itzintlan on tlaixpan* oniquintac inalma on yejhan oquinmictijquej pampa quineltocayaj itlajtol Dios, niman pampa quiteijliayaj itlajtol. ¹⁰ Yejhuamej ican chicahuac tlajtojli ijquin quijtohuayaj:

—ToTeco yejhan nochí tihueli, tejhua tichipahuac niman nochipa ticchihua on tlen tiquijtohua, ¿hasta quemanon más timohuejcahuas para tiquinyolcuitis niman tiquintlaaxtlahuilis on yejhan chantij ipan on tlalticpactli yejhan otechmictijquej?

¹¹ Quemaj cada se oquimacaquej istac intlaquen, niman oquimijlijquej ma nosehuican sa achijtzin más chica ma ajsij on quech inicnihuan ipampa itequiu Cristo ica oncaj no miquisquej quen yejhuamej.

¹² Ijcuac niquitzticatca on Borreguito quitlapojticatca on yejhan ica chicuasen sello, sanoyej† chicahuac otلالolin. On tonatzintli ocapotzeu quen itlaj micatlaquentli, niman on metztlí onocau quen itlaj yestli. ¹³ Niman ijcon quen on cojtaquilyotl itoca higuera xini itlaquiliyo masqui xe chicahui ijcuac cuihuixohua on sanoyej chicahuac ajacatl, no ijqui oniquitac oxinquej ipan tlajli on sitlalimej. ¹⁴ On cielo‡ opopoliu quen itlaj amatl quimimilojtiu§, niman nochí on tepemej niman on tlalhuactzitzintin yejhan onoquej atlajcotian onejcuanijquej campa oncatcaj. ¹⁵ Quemaj on inreyes in tlalticpactlacamej inhuan on huejhueyixtoquej, inhuan on tlayecanquej militares, inhuan on yejhan ricos, inhuan on yejhan quipiaj tequihiuajyotl, inhuan nochí tlacatl yejhan tlanamactin, inhuan nochí tlacatl yejhan tlamacahualtin oniyanatoj ijtic on teostomej niman intzajlan on temej yejhan onoquej ipan on tepemej. ¹⁶ Niman yejhuamej quintzajtziliayaj on tepemej niman on temej:

—Topan xmalahuacan niman xtechiyancan para ma ca techitas on yejhan yehuaticaj ne ipan on hueyixticaj trono, niman para ma ca ticpiasquej on temojtij tlahuejli, yejhan quitemacas on Borreguito, ¹⁷ pampa

* ^{6:9} altar † ^{6:12} muy ‡ ^{6:14} On cielo oncaj ne campa oncaj ajacatl, moxtli, metztlí, tonajli niman sitlalimej. § ^{6:14} va enrollando

yoyejcoc on hueyi tonajli para techmacasquej intlahuel. Xacaj huelis quixicos on tlahuejli.

7

144,000 hebreos oquinmixmachyotijquej

¹ Quemaj oniquitac ijccayaj nahuimej ilhuicactequitquej* naucan iyehualcan in tlalticpactli. Niman yejhuamej quiteltijtictacaj on nahui ajacatl yejhuan oncaj ipan in tlalticpactli, para ma ca ma ajaca ipan tlajli, nion ipan mar, niman nion siquiera ipan se cojlit†. ² Niman quemaj, ne ica iquisayan tonajli, oniquitac ompaca huajtylecotiaya ocse ilhuicactequitquetl cuajquiya isello Dios on yejhuan nochipa nemi. On ilhuicactequitquetl chicahuac oquintzajtzilij on nahuimej ilhuicactequitquej yejhuan quipiaj poder para tlaitlacojsquej ipan in tlalticpactli niman ipan mar. ³ Oquimijlij:

—Ma ca xquitlacojcan on tlalticpactli, nion on mar, niman nion siquiera on cojin hasta achtopa ma tiquimixmachyotican itequitcahuan toDios ican se sello ipan imixcuatipan.

⁴ Niman quemaj onicac oquintenejquej 144,000 tlacatl yejhuan oquinmixmachyotijquej‡. Yejhuamej in tlacamej oquisquej intech majtlactli huan ome familias niman in majtlactli huan ome familias hualehuaj itech on tlacatl itoca Israel. ⁵ Ijquin oquintenejquej on yejhuan oquinixmachyotijquej:

On yejhuan hualejtoquej itech ifamilia Judá
12,000 tlacatl,
on yejhuan hualejtoquej itech ifamilia Rubén
12,000,
on yejhuan hualejtoquej itech ifamilia Gad
12,000,
⁶ on yejhuan hualejtoquej itech ifamilia Aser
12,000,
on yejhuan hualejtoquej itech ifamilia Neftalí
12,000,
on yejhuan hualejtoquej itech ifamilia Manasés
12,000,
⁷ on yejhuan hualejtoquej itech ifamilia Simeón
12,000,
on yejhuan hualejtoquej itech ifamilia Leví
12,000,
on yejhuan hualejtoquej itech ifamilia Isacar
12,000,
⁸ on yejhuan hualejtoquej itech ifamilia Zabulón
12,000,
on yejhuan hualejtoquej itech ifamilia José
12,000 niman
on yejhuan hualejtoquej itech ifamilia Benjamín
12,000.

Miyec tlacatl quiyectenehua on Borreguito

⁹ Quemaj ixpan on hueyixticaj trono niman ixpan on Borreguito, oniquitac sanoyej§ miyec tlacatl ijccac, niman xacaj hueliya quimpohuaya pampa sanoyej miyequej. Yejhuamej ohualejquej ipan nochihuiyan países, noch

* ^{7:1} ángeles: Angeles tequitij ne ilhuicac niman nican ipan in tlalticpactli. † ^{7:1} árbol ‡ ^{7:4} fueron señalados § ^{7:9} mucha

raza, nochí pueblo niman nochí sesetlamantic tlajtoltin*. Yejhuamej tlaque-mequejcatcaj ican istac tlaquentli yejhuan hueyac, niman quimapixticatcaj isoyayo on dátíl. ¹⁰ Ican chicahuac tlajtojli nochimej tzajtziyaj, niman ijquin quijtohuayaj:

Totemaquixtilis ticseliaj itech toDios yejhuan yehuaticaj ipan ihueyixticaj trono niman itech on Borreguito.

¹¹ Nochimej on ilhuicactequitquej† quiyehualojticatcaj on hueyixticaj trono, on tlajtlajmatquej, niman on nahuimej yejhuan quen itlaj yolquej tlajtlachayaj. Yejhuamej, tej, ixpan on hueyixticaj trono onotlacuen-quetzquej ican inxayac ipan tlajli niman oquimahuistilijquej Dios.

¹² Yejhuamej quitoahuayaj:

¡Ma ijqui nochihua! Ma toDios quiseli aman niman para nochipa on yectene-hualistli, on hueyilistli, on tlamatquilistli, on tetlajsojcamachilistli, on tetlacaitalistli, on poder niman on chicahualistli. Ma ijqui nochihua.

¹³ Quemaj semej on tlajtlajmatquej onechtlajtoltij:

—¿Aquinomej in yejhuan ican istac tlaquentli tlaquemejquej? niman ¿Canon hualehuaj?

¹⁴ Nejhua oniquijlij:

—Señor, tejhuá ticmati aquinomej niman canon hualehuaj.

Niman yejhua onechijlij:

—In yejhuamej on yejhuan yohuajquisquej ipan on temojtij tlajyohuolistli. Niman yejhuamej oquimpacquej intlaquen niman oquimistalijquej ican iyesyo on Borreguito. ¹⁵ Yehua ica, tej, nemij ixpan on hueyixticaj trono niman quimahuistiliaj Dios ican tonajli niman yehuajli ne ipan ihueyitiapan. Niman on yejhuan yehuaticaj ipan on hueyixticaj trono quinmanahuis pampa chantis inhuan. ¹⁶ Yejhuamej, tej, xoc tlajyohuisquej ican apistli, nion amictli. Yejhuamej xoc quintlatis on tonatzintli, nion quimpajsolos on tonalistli, ¹⁷ pampa on Borreguito yejhuan nemi ne ixpan on hueyixticaj trono quintlapixcapias quen se tlapiquipi. Yehua, tej, quimprias quen borreguitos, niman quinhuicas campa meya atl yejhuan quitemaca nemilistli. Niman Dios quimpopolohuilis nochí choquistli.

8

On ica chicome sello oquitlapojquej niman on tlicontli tlachijchiutli ican oro ocontlajcalquej ipan on tlalticpactli

¹ Ijcuac on Borreguito oquitlapoj on ica chicome sello, ne ilhuicac canaj tlajco hora otlacactiaj. ² Quemaj ne ixpan Dios, chicome ilhuicactequitquej* oniquitac ompa majmaniyaj, niman cada se oquiselij se trompeta. ³ Quemaj ohuajlaj ocse ilhuicactequitquetl niman onotelquetz ixpan on tlaixpan† ican se tlicontli tlachijchiutli ican oro. Ompa oquimacaquej miyec copajli para quitlalis san secan ihuan inoraciones on yejhuan teyaxcahuan‡ itech Dios. Niman oquihuentlalij on copajli ipan on tlaixpan tlachijchiutli ican oro yejhuan oncaj ixpan on hueyixticaj trono. ⁴ Niman ipocylo on copajli, yejhuan onejticatca ipan ima on ilhuicactequitquetl ihuan inoraciones on yejhuan teyaxcahuan itech Dios, oajsic hasta ixpan sa no Dios. ⁵ Quemaj on ilhuicactequitquetl ocontilan on tlicontli, niman oquitemiltij ican itlixochyo on tlitl yejhuan oncatca ipan on tlaixpan, niman quemaj ocontlajcal ipan

* ^{7:9} lenguas † ^{7:11} ángeles * ^{8:2} ángeles: Angeles tequitij ne ilhuicac niman nican ipan in tlalticpactli. † ^{8:3} altar ‡ ^{8:3} le pertenecen; teaxcahuan, tehuaxcahuan, tetlatquihuau

on tlalticpactli. Nimantzin opeu tlacomoni, tlacocomoca, tlapetlani niman tlalolini.

On ilhuicactequitquej quipitzaj intrompetas

⁶ Quemaj on chicome ilhuicactequitquej[§] yejhuan quipiayaj on chicome trompetas ohuajnomanquej para tlapitzasquej.

⁷ Quemaj on achtoj ilhuicactequitquetl oquipitz itrompeta. Ijcuac oquipitz itrompeta, ipan on tlalticpactli otejsiu niman ohuetz tlilt yejhuan nelijticaj ican yestli. Niman de nochi on yexcantipan cotontoc in tlalticpactli, se parte otlatlac. Niman de nochi on yexcantipan cotontoc on quech cojyoj oncatca, se parte otlatlac. No ijqui se parte otlatlac on xouyoj niman on sacayoj.

⁸ Quemaj on ica ome ilhuicactequitquetl oquipitz itrompeta niman ne ipan mar ocontlajcalquej on quen se hueyi tepetl tlicuitiu. Niman de nochi on yexcantipan on quech oncatca mar, se parte onochiu yestli. ⁹ De nochi on yexcantipan on quech yolquej nemiyaj ijtic mar, se parte omiquej. Niman de nochi on yexcantipan quech barcos oncatcaj ipan mar, se parte oxoxotonquej.

¹⁰ Quemaj on ica yeyi ilhuicactequitquetl oquipitz itrompeta niman se hueyi sitlalin ohualeu ipan cielo yejhua huajtlicuitiaya quen se ocojli*. De nochi on yexcantipan quech atoyamej niman ameyaltin oncatcaj ipan in tlalticpactli, se parte ohuetz impan. ¹¹ On sitlalin itoca catca chichiyalistli. Yejhua ica, tej, de nochi on yexcantipan quech oncatca atl ipan in tlalticpactli, se parte ochichiyac niman miyec tlacatl omic.

¹² Quemaj on ica nahui ilhuicactequitquetl oquipitz itrompeta niman oquimotlaquej no ijqui se parte de on tonatzintli, de on metztli niman de on sitlalimej. Yejhua ica, tej, nochi on yexcantipan quech tlahuijli quipiayaj oquipolojquej. Ijcon, tej, xoc otlahuilpantic ipan se parte de on tlajocaj niman de on yehuajli.

¹³ Quemaj oniquitac se tojtli yejhuan patlantinemiya ne ixco on cielo. Niman ican chicahuac tlajtojli onicac oquijtoj:

—¡Lástima, lástima, lástima para on yejhuan chantij ipan on tlalticpactli, ipampa on tlen nochihuas ijcuac on ocse yeyimej ilhuicactequitquej quipitzasquej intrompeta!

9

¹ Quemaj on ica majcuijli ilhuicactequitquetl oquipitz itrompeta niman oniquitac se sitlalin yejhuan ohualeu ipan cielo*, niman ohuetzico ipan tlalticpactli. On sitlalin yejhua oquimacaquej on llave para quitlapos on pozo yejhuan xnejsi quech ica huejcatlan. ² Yejhua, tej, oquitlapoj on pozo, niman ijtic on pozo oquis sanoyej† miyec poctli quen ijcuac popoca se hueyi horno. Niman ica on poctli on tonatzintli niman on cielo ocapotzeu. ³ Ipan on poctli quisayaj on quen chapolimej yejhuan xiniyaj ipan on tlalticpactli. On quen chapolimej oquiselijquej poder para tecuasquej quen tecuaj on colomej. ⁴ Oquinnaahuatijquej para nion xoutli ma ca ma quicuajcan, nion itlaj yejhuan xoxoqui, nion se cojli‡, yej san ma quincococan on tlacamej yejhuan xquipiaj isello Dios ipan inixcuateu. ⁵ Yejhuatej, tej, xoquincahuili-jquej quinmictisquej on tlacamej, yej oquimilijquej san ma quintlajyohuilit-can macuijli metztli. Niman on tlen tecocoj yejhuan quitemacayaj sa no ijqui quen on colotl quimaca se tlacatl ijcuac quicua. ⁶ Ipan on tonaltin

§ **8:6** ángeles * **8:10** antorcha; ocotl * **9:1** On cielo oncaj ne campa oncaj ajacatl, moxtli, metztli, tonajli niman sitlalimej. † **9:2** mucho ‡ **9:4** árbol

nochi tlacatl quinequis nomictis, pero xoc huelisquej miquisquej. Sanoyej quinequisquej miquisquej, pero ijcuacon on miquilistli xoc onyas.

⁷ On yolquej yejhuan quen chapolimej nesiyaj quen caballos yejhuan nemij listo para yasquej ipan guerra. Yejhuanamej quipiaya itlaj ipan intzontecon quen se corona tlachijchiutli ican oro. Niman quipiaya inxayac quen yacaj tlacatl ixayac. ⁸ Quipiaya intzon quen itzon yacaj sihuatl, niman intlahuan quen itlahuan se león. ⁹ Intlahuan tlapachijtacatca ican itlaj yejhuan nesi quen tepestli yejhuan ica normanahuiyayaj. Ijcon quen on carretas caquistij ijcuac on caballos quintlalochtiaj para ipan guerra, no ijqui caquistiyaj inmajtlapal. ¹⁰ Quipiaya incuitlapil niman tecuayaj quen on colotl tecua. Ipan incuitlapil quipiaya poder para majcujli metztli quintlayohuilitisquej on tlacamej. ¹¹ Yejhuanamej quipiaya se ilhuicactequitquetl yejhuan aman quitequipanohua on diablo. Yejhua quen intlayecancau yejhuan chanti ipan on pozo yejhuan xnesi quech ica huejcatlan. Yejhua itoca Abadón ican hebreo tlajtojli niman Apolión ican griego tlajtojli. Apolión quijtosnequi tlaxoxotonquetl.

¹² On achtoj tlaxoxotonilistli yopanoc, pero ocse ome ye huajlau.

¹³ Quemaj on ica chicuasen ilhuicactequitquetl oquipitz itrompeta niman onicac se tlajtojli caquistiya ne intzajlan on nahui cuacuautin yejhuan oncatcaj ne tlaixpan[§] tlachijchiutin ican oro yejhuan oncatca ne ixpan Dios. ¹⁴ On tlajtojli oquinahuatiij on ica chicuasen ilhuicactequitquetl yejhuan quipiaya itrompeta:

—Xquintoma on nahuiyej ilhuicactequitquej yejhuan salijtoquej itech on atentli itoca Eufrates.

¹⁵ On nahui ilhuicactequitquej oquintojtonquej. Yejhuanamej, tej, yoquim-prepararojcaj para ipan in mismo hora, tonajli, metztli, niman xiutli quimictisquej se parte de nochon quech yexcantipan tlacamej nemij ipan tlalticpactli. ¹⁶ Niman onicac oquintenejquej 200 millones soldados yejhuan quipiayaj incaballos.

¹⁷ Oniquintac on caballos niman on yejhuan impan yetiayaj. On yejhuan impan yetiayaj yelpantlapachijtiayaj ican on quen itlaj tepestli yejhuan ica normanahuiyayaj. Niman on tepestli, yeji color quipiaya: chichiltic quen tlitl, azul quen on tetl itoca zafiro niman costic quen azufre. Niman ijcon quen tzonteconyejquej leones, on caballos no ijqui quipiaya intzontecon. Niman incamac quisaya tlitl, poctli niman azufre yejhuan quisaya incamac on caballos, omiquej se parte de nochon quech yexcantipan tlacamej nemij ipan tlalticpactli. ¹⁸ Ica on yeji plagas de tlitl, poctli niman azufre yejhuan quisaya incamac on caballos, omiquej se parte de nochon quech yexcantipan tlacamej nemij ipan tlalticpactli. ¹⁹ Niman on caballos quipiaya poder sanquen ipan incamac niman ipan incuitlapil, pampa incuitlapil quipiaya intzontecon quen cohuamej niman ica sanoyej tejcuaucuayaj.

²⁰ On tlacamej yejhuan xomiquej ican on plagas xocajcajquej quichi-huaj on tlen xcuajli. Yej oc* quinmahuistiliayaj on xcuajcualtin espíritus, niman on tlamachijchijhaultin intajtzitzihuan yejhuan tlachijchiutin ican oro, plata, bronce, tetl niman cojtli†, masqui yejhuanamej on intajtzitzihuan xhuelij tlachaj, nion tlacaquij, nion nejnemij. ²¹ Niman no xocajcajquej ica temictiayaj, tenahualhuiyaj, on ica ahuilnemiyaj, nion yejhua on ica tlachtequiyaj.

10

Yejhua on ilhuicactequitquetl quimapixticaj se tlajcuilolamatzintli mimiliticaj

¹ Quemaj oniquitac huajtemohua ipan cielo* ocse ilhuicactequitquetl† yejhuan quipia poder. Yejhua huajtlapachijtiaya ican se moxtli, niman icuapan cuajquiya se cojsemalotl. Ixayac petlaniya quen on tonaltzintli, niman icxihuan quen pilares yejhuan tlicuiticatca. ² Yejhua quipixticatca ipan ima se tlapoxticaj tlajcuilolamatzintli. Niman ica iyecmaicxi ocholoj ipan on mar, niman ica iopochicxi ocholoj ipan tlalticpactli. ³ Quemaj otzajtzic ican chicahuac tlajtojli quen ijcuac nanalca se león. Niman ijcuac otzajtzic, chicomepa ocaquistic quen tlacomonajli oquinanquilij. ⁴ Ijcuac on chicome tlacomonajli ohuajtlajtojquej, nejhua niquijcuilosnequiya on tlen oquijtojquej. Pero quemaj ne ilhuicac onicac ocse tlajtojli yejhuan onechijlij:

—Ma ca xquijcuilo on tlen oquijtojquej on chicomemej tlacomonaltin, yej xquichtacapia.

⁵ Quemaj on ilhuicactequitquetl yejhuan oniquitac cholojticatca ne ipan mar niman ipan tlalticpactli, ocajcocu iyecma para ne ilhuicac, ⁶ niman oquimelajcrajtoj itech on yejhuan nemi para nochipa, yejhuan oquitlalij on cielo, on tlalticpactli, on mar niman nochí on tlen impan oncaj niman nemi. Niman ijquin oquijtoj:

—Nochi amantzin nochihuas. ⁷ Yej ijcuac on ica chicome ilhuicactequitquetl quipitzas itrompeta, nochihuas on tlen iyanticaj oquinec Dios para nochihuas, ijcon quen oquimijlij on itequitcahuan tiotlajtojquej.

⁸ Quemaj on tlajtojli yejhuan onechajnotzca ne ilhuicac ocsejpa onechajnotz niman onechijlij:

—Xhuiya, niman xquitzqui on tlajcuilolamatzintli yejhuan tlapoxticaj ipan ima on ilhuicactequitquetl yejhuan cholojticaj ipan mar niman ipan tlalticpactli.

⁹ Quemaj nejhua oniaj itech on ilhuicactequitquetl niman oniquijlij ma nechmaca on tlajcuilolamatzintli, niman yejhua onechijlij:

—Nicancaj. Xcua. Mocamac ticmatis tzopelic quen itlaj necutli, pero ijcuac tictolos, ne mojtic ticmatis ica chichic.

¹⁰ Quemaj oniconcuic on tlajcuilolamatzintli ipan ima on ilhuicactequitquetl niman onicuaj. Nocamac onicmat tzopelic quen itlaj necutli, pero ijcuac onictolos, ne ipan nojti onicmat chichic. ¹¹ Quemaj onechijlijquej:

—Ica oncaj ticteijlis on tlen Dios mitzijlis ica on miyec pueblos, países, sesetlamantic tlajtoltin, niman reyes.

11

Huajlasquej omemej teixpantiliquej

¹ Quemaj onechmacaquej se milohuatl yejhuan nesiya quen on yejhuan ica tlatemachihualo, niman onechijlijquej:

—Xmotelquetza niman xtejtemachihua on ihueyi tiopan Dios niman on itlaixpan*. Niman no xquimpohua quesquimej on yejhuan ompa quimahuistiliaj Dios. ² Pero on iquiahuac on templo ma ca xtemachihua pampa on yoquinmactilijquej on yejhuan xhebreos. Yejhuatej yeyi xipan huan tlajco quichochochosquej on yejeticaj hueyican Jerusalén. ³ Niman nejhua nictilannis omemej noteixpantilijcahuan yejhuan quiteijlisquej on tlen niquimijlis

* **10:1** On cielo oncaj ne campa oncaj ajacatl, moxtli, metztlí, tonajli niman sitlalimej. † **10:1** ángel: Angeles tequitij ne ilhuicac niman nican ipan in tlalticpactli. * **11:1** su altar

ipan 1260 tonaltin. Niman yejhuamej tlaquemejquej yesquej ican on tlaquentli tlachijchiutli ican costales para quiteititisquej ica najmanaj.

⁴ On omemej cojint† intoca olivos niman on omemej candeleros yejhuan onoquej ixpan iTeco in tlalticpactli quijtosnequi in omemej teixpantiliquej.

⁵ Tla yacaj quinmejecohuilis para quintlajyohuiltis, yejhuamej incamac quixtiaj tlitl niman quimictiaj intlahuelicniu. Ijcon tej, miquis yejhuan quinmejecohuilis quintlajyohuiltis. ⁶ Yejhuamej in teixpantiliquej quipiaj poder para quichihuasquej ma ca quiahui ipan on tonaltin chica yejhuamej quiteijliaj on tiotlajtojli yejhuan quiselia itech Dios. No ijqui quipiaj poder para yejhua on atl cuepasquej yestli. Niman san queman quinequisquej, huelis quichihuasquej ipan in tlalticpactli nochis quech sesetlamantic plagas oncaj.

⁷ Ijcuac yejhuamej yotlanquej quiteijliaj on tiotlajtojli yejhuan quiselisquej itech Dios, on xcuajli yolqui yejhuan quijsa ipan on pozo yejhuan xnejsi quech ica huejcatlan quinhuijsoquis, niman quintlanis, niman quinmictis.

⁸ Niman inmicatlalnacayo quintlajcalisquej ipan icalles on hueyican, campa toTeco oquimajmasohuaultiquej‡ ipan cojnepanojli§. On chanejquej ipan on hueyi ciudad nohuicaj xcuajli quen on tlacamej chanejquej ne Sodoma niman Egipto. Yejhua ica quitocayotiaj on hueyican Sodoma niman Egipto.

⁹ Yeyi tonajli huan tlajco on tlacamej chanejquej ipan nochis pueblo, niman nochis raza, niman nochis quech sesetlamantic tlajtoltin, niman nochis pais quitasquej inmicatlalnacayo on teixpantiliquej, niman yejhuamej xquitec-ahuilisquej para on omemej micatzitzintin ma quintlaltocacan. ¹⁰ On yejhuan chantij ipan in tlalticpactli sanoyej* paquisquej ipampa inmiquilis. Yejhuamej quichihuasquej ilhuitl hasta quinotlayocolisquej itlaj pampa on omemej tiotlajtojquej sanoyej quimpajsolohuayaj.

¹¹ Pero ijcuac yopanoc on yeyi tonajli huan tlajco, Dios ican ijyo yejhuan oquitemacac nemilistli, oquinyolihuitij†, niman yejhuamej ocsejpa onoquetztejquej. Niman nochimej on yejhuan oquitaquej sanoyej onomojtijquej.

¹² Quemaj on omemej teixpantiliquej ocacquej se chicahuac tlajtojli yejhuan oquinhuajnotz ne ilhuicac, niman oquimijlij:

—Xhuajtlejcocan nican tlacpac. Niman yejhuamej ipan se moxtli otlejcoquej chica intlahuelicnihuan conitzticatcaj quen tlejcohuayaj.

¹³ Quemaj nimantzin sanoyej temojtij otlalolin niman de nochis on maj-lactli partes de on quech caltin oncatcaj ipan on hueyican, se parte oxoxotonquej, niman chicome mil tlacamej omiquej yejhua ica on tlaxoxotonilistli. Niman on tlacamej yejhuan xomiquej, ican innemojtil ocueyilijquej Dios ilhuicac chanej.

¹⁴ Yopanoc ica ome tlaxoxotonilistli, pero saniman huajlau on yejhuan ica yeyi tlaxoxotonilistli.

On ica chicome ilhuicactequitquetl quipitz itrompeta

¹⁵ Quemaj on ica chicome ilhuicactequitquetl‡ oquipitz itrompeta, niman nimantzin chicahuac ocaquistijquej tlajtoltin ne ilhuicac. On tlajtoltin ijquin quijtohuayaj:

Nochi tequihuajyotl oncaj ipan in tlalticpactli yoquinoyaxcatij§ toTeco Dios niman iCristo; niman para nochipa toTeco Dios tlamandaros.

† **11:4** árboles ‡ **11:8** fue crucificado § **11:8** cruz * **11:10** muy † **11:11** los resucitó; oquinolij ‡ **11:15** ángel: Angeles tequitij ne ilhuicac niman nican ipan in tlalticpactli. § **11:15** lo ha hecho suyo; yoquinoaxcatij, yoquinohuaxcatij, yoquinotlatquij

¹⁶ Quemaj on sempoajli* huan nahui tlajtlajmatquej tlayecanquej, yejhuan yejyehuaticatcaj ipan intronos, onotlacuenquetzquej niman hasta ipan tlajli oquitquijquej inxayac ne ixpan Dios, niman oquimahuistil-ijquej.

¹⁷ Oquijlijquej:

Timitzmacaj tlaxtlahuijli toTeco Dios yejhuan noch iihueli. Nochipa tine-miya niman aman tiyolticaj niman nochipa tinemis. Timitzmacaj tlaxtlahuijli pampa aman cuajli yoticteititij mohueyi poder niman yopeu titlamandarohua.

¹⁸ On países ocualanquej. Pero aman ye cuajli yoyejcoc on tonajli para tiquinyolcuitis niman tiquintlaxtlahuilis on mimiquej. Niman no yoyejcoc on tonajli para tiquintlaxtlahuilis motequichihuiliyahuan, on tiotlajtojquej, niman on yejhuan otiquintlapejpenij para moyax-cahuan niman on yejhuan mitztlacaitaj. Tejhua tiquintlaxtlahuilis sanquen on yejhuan huejhueyixtoquej niman on yejhuan xhuejhuey-ixtoquej. Niman no yoyejcoc on tonajli para tiquinxoxotonis on yejhuan quixoxotoniaj on tlalticpactli.

¹⁹ Quemaj on itiopan Dios yejhuan oncaj ne ilhuicac otlapou, niman calijtic nesticatca on caja campa yejticatca on majtlactli tlanahuatijli. Niman sanoyej otlapetlan, otlacaquistic, otlacomon, otlalolin niman chicahuac otejsiu.

12

Juan oquitac on sihuatl niman se sanoyej hueyi yolqui itoca dragón

¹ Quemaj se hueyi tlamajhuisojli ones ne ilhuicac. Niman ijquin catca on tlamajhuisojli: se sihuatl huajpetlanticatca quen petlani on tonatzintli, niman on metzli icxitlan oncatca, niman quimanticatca se corona yejhuan quipiaya majtlactli huan ome sitlalin. ² In sihuatl quipiaya iconetzin, niman tzajtziya ica nococohuaya pampa ye quitlacatiliasquia iconetzin.

³ Quemaj ocse tlamajhuisojli ones ne ilhuicac: ones se sanoyej* hueyi niman temojtij yolqui itoca dragón. In yolqui chichiltic tlajtlachaya, niman quipiaya chicome itzontecon, majtlactli icuacuahuan, niman cada itzontecon quipiaya se corona. ⁴ On yolqui ican icuitlapil, de noch i on yexcantipan quech oncatcaj sitlalimej ne ipan cielo, oquintejchihuilan se parte. Niman on se parte oquinhuajxinij ipan tlalticpactli. On sihuatl nemiya lista para tlanemitis. Niman on dragón onotelquetz ixpan on sihuatl para sanquen huajnemis iconetzin yejhua nimantzin quicualisquia on conetzintli. ⁵ Niman on sihuatl oquitlacatilij se oquichconetl yejhuan tlamandaros ican cojtic poder ipan nochimej on tlacamej chantij ipan nochihuiyan países. Pero on iconeu ocanilitquisquej niman ocuicaquej itech Dios, niman ixpan on ihueyixticaj trono. ⁶ Niman on sihuatl oyejteu. Oyaj neca tlapatlaco campa Dios yoquiprepararohuilijca campa xitlaj† quipolos para 1260 tonaltin.

⁷ Niman ne ilhuicac onochiu se guerra. On yacatzticaj ilhuicactequi-quetl‡ itoca Miguel niman iilhuicactequi-quitcahuan onohuijsoquej ihuan on dragón niman on ilhuicactequi-quitquej yejhuan aman quitequipanohuaj on diablo. ⁸ Pero on dragón niman on ilhuicactequi-quitquej yejhuan aman quitequipanohuaj on diablo xohuelquej otetlanquej. Yejhua ica, tej, xoc ohuel onenquej ne ilhuicac. ⁹ Ijcon tej, on hueyi dragón ocuajquixtijquej ne

* **11:16** Sempoajli quitosnequi veinte, niman sempoajli huan quitosnequi veinticuatro.

* **12:3** muy † **12:6** nada; coxtla ‡ **12:7** ángel: Angeles tequitij ne ilhuicac niman nican ipan in tlaticpactli.

ilhuicac. On dragón sa no yejhua on yehuejcahui cohuatl yejhuan ocajgayau nochí tlacatl chanej ipan in tlalticpactli. Yejhua itoca diablo noso Satanás. Yejhua, tej, niman ilhuicactequitcahuan yejhuan aman quitequipanohuaj oquinhuajxinijquej ipan in tlalticpactli.

¹⁰ Quemaj ne ilhuicac onicac se chicahuac tlajtojli yejhuan oquijtoj:

—Yoyejcoc on itemaquixtilis niman ipoder toDios. Yejhua yopeu tlamandarohua niman Cristo no yoquiselij tequihuajyotl. Nochi in ticmatij ica melahuac, pampa aman on yejhuan nochipa ican tonajli niman ican yehuajli quinteixpanhuiaya on tocnihuan ixpan toDios yocuajtlajcalquej de ne ilhuicac. ¹¹ Niman itechcopa iyesyo on Borreguito niman on temachtijli itech ica Cristo yejhuan oquiteixpantiliquej, on tocnihuan sa no yejhuatej otetlanquej. Yejhuatej, tej, xonomojtijquej quipolosquej innemilis, yej onoyolchicajquej para miquisquej. ¹² Ma onya paquilstli ne ilhuicac. Nemehuamej yejhuan ompa nenchantij xpaquican. Pero jlástima para nemehuamej yejhuan nenchanejquej ipan tlalticpactli niman ipan mar! pampa on diablo nemotech yoyejcoc. Yejhua yotemoc ican temojtij itlahuel pampa quimatzticaj ica xoc huejcajticaj quiselis icastigo.

¹³ Niman ijcuac on dragón oquitac ica yocuajtlajcalquej ipan in tlalticpactli, opeu cajsisnequi on sihuatl yejhuan oquitlacatilij iconeu. ¹⁴ Pero on sihuatl oquimacaquej ome imajtlapalhuan de se hueyi cuactli itoca águila para ohuel oyejteu ixpan on cohuatl campa xoc huelis quipajsolos. Niman yejhua oyaj huejca ne ipan on tlapatlaco campa quitequipanotiasquej yeyi xipan huan tlajco. ¹⁵ Quemaj on cohuatl ocuajquixtij icamac miyec atl quen itlaj atepeyatl para catoctis on sihuatl. ¹⁶ Pero on tlajli oquipalehuij on sihuatl. On tlajli otlapou niman oconic on atepeyatl yejhuan on dragón icamac oquixtij. ¹⁷ Quemaj on dragón sanoyej ocualan itechcopa on sihuatl niman intech onotlahuelquixtito on ocsequimej yejhuan no hualejtoquej itech on sihuatl para quinhuijsoquis. In yejhuatej on yejhuan quitlacamatij itlanahuatil Dios, niman ican yolchicahualistli quijtohuaj ica quineltocaj Jesucristo.

13

¹ Niman on dragón onotelquetz ne itempan on mar.

Juan oquintac omemej xcuajcualtin yolquej

Niman ne ipan on mar oniquitac ohuajquis se xcuajli yolqui yejhuan quipiaya chicome itzontecon niman majtlactli icuacuauhuan. On yolqui ipan cada icuacuau quipiaya se corona, niman cada itzontecon quipiaya se tlajtojli yejhuan cuijhuicaltiaya Dios. ² On xcuajli yolqui yejhuan oniquitac tlajtlachaya quen itlaj tigre, pero icxihuan quipiaya quen icxihuan se oso niman icamac quipiaya quen icamac se león. Niman on dragón oquimacac ipoder, niman itrono niman hueyi tlanahuatijli, on xcuajli yolqui yejhuan ohuajquis ijtic on mar. ³ Ipan se itzontecon on xcuajli yolqui nesiya quen tlacocojli catca para miquis. Pero on itlacocol yejhuan nesiya ica miquis, opajtic. Ijcuac nochí tlacatl chanejquej ipan in tlalticpactli ijcon oquitac, otlamojcaitaquej niman opeu quitlacamatij on xcuajli yolqui. ⁴ Yejhuatej oquimahuistiliquej on dragón pampa yejhua oquimacac itequihuajyo on xcuajli yolqui. Niman on xcuajli yolqui no ijquin oquimahuistiliquej niman quijtohuayaj:

—¿Aquinon nemi yejhuan no ijqui quen in yolqui? Niman, ¿aquinon huelis ihuan notlanis?

⁵ No ocahuilijquej on xcuajli yolqui nohueyitenehuas niman cuijhuicaltis Dios. Niman no ocahuilijquej tlamandaros ompoajli* huan ome metztl. ⁶ Ijcon, tej, on xcuajli yolqui cuijhuicaltiaya Dios, niman itocayo Dios, niman on ichanyou Dios niman no on yejhuan nemij ne ilhuicac. ⁷ No ocahuilijquej ma tlahuijsoqui intech on yejhuan iyaxcahan† Dios, niman ma quintlani. No ijqui oquimacaquej tequihuajyotl para quinmandaros noch raza, noch pueblo, noch quech sesetlamantic tlajtoltin, niman noch pa. ⁸ Nochimej yejhuan chantij ipan in tlalticpactli niman xtlajcuilolnestoquej intoca ipan on tlajcuilolamatl, yejhuan quijtohua aquinomej quipiaj nemilistli para nochipa, quimahuistilisquej on xcuajli yolqui. Yejhua in tlajcuilolamatl iyaxca on Borreguito yejhuan oquimictijquej. Niman ijcuac oquimictijquej oquitemacac temaquixtilistli desde ijcuac otzimpeu in tlalticpactli.

⁹ Xpiacan cuidado on tlen aman nemechijlis:
¹⁰ Tla oncaj para yacaj quitzatzacuasquej, quitzatzacuasquej. Niman tla oncaj para yacaj quimictisquej ican espada, quimictisquej. Yejhua ica, tej, nonequi ma quxicocan on tlen nochihuas ican yolsehuilistli niman nochipa ma quineltocakan Dios on yejhuan iyaxcahan Dios.

¹¹ Quemaj oniquitac ocse xcuajli yolqui huajquistiu ipan on tlalticpactli. In xcuajli yolqui quipiaya ome icuacuahuan quen icuacau se borreguito, pero itlajtol caquistiya quen itlajtol on dragón. ¹² In xcuajli yolqui oquitequitiltij noch on hueyi tequihuajyotl yejhuan iyaxca on achtoj xcuajli yolqui. Niman yejhua oquitequitiltij ne ixpan on achtoj xcuajli yolqui. Yejhua quichihuaya para nochimej on tlacamej chanejquej ipan in tlalticpactli ma quimahuistilican on achtoj xcuajli yolqui, yejhuan opajtic ipan on itlacocol yejhuan nesiya ica miquisquia. ¹³ Yejhua no quinchihuaya huejhueyi tlamañhuisoltin milagrosas hasta ne ipan on cielo‡ hualehuaya titl para huetziya ipan tlajli imixpan on tlacamej campa hueli quitaj. ¹⁴ Yejhua oquincajgayau on tlalticpacchanejquej ican on tlamañhuisoltin milagrosas yejhuan ocahuilijquej quichihuas ixpan on ocse xcuajli yolqui. Niman oquinnahuatiy ma quixcopinacan ican se tlamañijchiutli de itlachalis on achtoj xcuajli yolqui yejhuan nemiya masqui tlacocojli catca ican espada. ¹⁵ Niman on ica ome xcuajli yolqui ocahuilijquej quijjomacas on tlamañijchiutli de on achtoj xcuajli yolqui para oquiyolihuitij. Yejhua ica hueliya tlajtlajtohuaya niman tlanahuatiaya para quinmictiayaj on yejhuan xquimahuistiliayaj on tlamañijchiutli de on achtoj yolqui. ¹⁶ No ijqui on ica ome xcuajli yolqui oquinchihualtij nochimej, masqui huejhueyixtoquej noso xhuejhueyixtoquej, masqui ricos noso mayanquej, masqui tlanamactin noso tlamacahualtin, ma quintlalilican se nescayotl ipan inyecma noso ipan imixcuateu. ¹⁷ Niman xacaj hueliya tlacohuaya nion tlanamacaya tla xquipiaya on nescayotl. On nescayotl quijtosnequi itoca on xcuajli yolqui noso on inúmero de itoca. ¹⁸ Ipan in nonequi tlamatquilistli\$. Tla yacaj hueli cajsicamati on tlen xacaj hueli, ma quixtlalo inúmero on xcuajli yolqui pampa on número inyaxca tlacamej. Niman on número sa no ijqui in: 666.

14

On 144,000 hebreos tlacuicatiaj

* **13:5** Omipoajli quitosnequi cuarenta, niman omipoajli huan ome quitosnequi cuarenta y dos.

† **13:7** le pertenecen; iaxcahan, ihuaxcahan, itlatquihuán ‡ **13:13** On cielo oncaj ne campa oncaj ajacatl, moxtli, metztlij, tonajli niman sitlalimej. § **13:18** sabiduría

¹ Quemaj onontlachix niman oniquitac on Borreguito ijcaticatca ipan on tepetl itoca Sión. Ihuan yejhua nemiyaj 144,000 tlacamej yejhuan ipan inixcuateu tlajcuilnesticatca itocayo on Borreguito niman itocayo on iTajtzin. ² Quemaj onicac se tlajtojli yejhuan ne ilhuicac caquistiya quen caquisti on hueyi atl ijcuac huejcatlan ontoyajticas, niman quen ijcuac chicahuac tlacomoni. Niman no onicac ijcon caquistiya quen caquistij on arpas ijcuac quintzotzonaj. ³ Niman yejhuamej quitlacuicatiayaj se yencuic tlacuicajli ne ixpan on hueyixticaj trono, niman imixpan on yejhuan quen yolquej tlajtlachaj niman no imixpan on tlajtlajmatquej tlayecanquej. On tlacuicajli xacaj hueliya quitlacuicatiaya. Yej hueliyaj san yejhuamej on 144,000 yejhuan omaquisquej ipan on tlalticpactli intzajlan on tlajtlacolejquej. ⁴ Yejhuamej in xonijtlacojquej inhuan on sihuamej. Yejhuamej, tej, xqueman oahuilnенquej. Niman san canon yau on Borreguito yejhuamej ompa ihuan yahuij. Yejhuamej oquincojquej intzajlan on tlalticpactlacamej. Niman yejhuamej nochihuaj achtoj ofrenda para Dios niman para on Borreguito. ⁵ Xqueman oquijtojquej on tlen xmelahuac. Yejhuamej, tej, xquipiaj tlajtlacojli ne ixpan ihueyixticaj trono Dios.

Yeyimej ilhuicactequitquej quiteijliaj on intemachtil

⁶ Quemaj oniquitac ocse ilhuicactequitquetl* patlantinemiya ne ixco on cielo†. Yejhu quitquiya on temachtilistli yejhuan para nochipa quitemaca on temaquixtilistli. Yejhu quitquiya para quimijlis on yejhuan chanejquej ipan in tlalticpactli, ipan nochipáis, nochiraza, ipan nochipueblo, niman no quimijlis nochipuech sesetlamantic tlajtoltin. ⁷ Niman ica chicahuac tlajtojli ijquin oquijtoj:

—Xtlacaitacan Dios, niman xcueyilican, pampa aman yoyejcoc on hora para cada se quiyolcuitis niman quitlaxtlahuilis quen quitocarohua on tlen oquichiu. Xmahuistilican on yejhuan oquitlalij on cielo, on tlalticpactli, on mar niman on ameyaltin.

⁸ Quemaj ocuajtocac on ica ome ilhuicactequitquetl yejhuan oquijtoj:

—¡Yohuetz! ¡Yohuetz on hueyi hueyican ne Babilonia! Niman on yejhuan chanejquej Babilonia quichihualtiaj nochitlacatl ipan nochipáises ma quintlacamatican on ocsequimej dioses.

⁹ Quemaj on ica yeyi ilhuicactequitquetl oquinhuajtocac on achtoj omemej ilhuicactequitquej, niman ican chicahuac tlajtojli ijquin oquijtoj:

—Tla yacaj quimahuistilia on xcuajli yolqui niman on tlamachijchiutli de itlachalis on xcuajli yolqui yejhuan oquichijchiunquej, niman quinocahuilia ma quitlalican on nescayotl ipan ixcateu noso ipan ima, ¹⁰ yejhu quiselis temojtij tlajyohuolistli yejhuan Dios quimacas ican nochipueza, pampa yejhua sanoyej‡ cualani. Niman quitlajyohuilitisquej imixpan on yolchipajquej ilhuicactequitquej niman ixpan on Borreguito ican tlitl niman azufre. ¹¹ Niman ipocylo on tlitl yejhuan quintlajyohuilitjticas para nochipa quistias. Niman nochipa ican tonajli niman ican yehuajli xquipiaj nesehuijli on yejhuan quimahuistiliaj on xcuajli yolqui niman on tlamachijchiutli de itlachalis on xcuajli yolqui yejhuan oquichijquej, niman on yejhuan quiseliaj on nescayotl yejhuan techititia itoca.

* **14:6** ángel: Angeles tequitij ne ilhuicac niman nican ipan in tlalticpactli. † **14:6** On cielo oncaj ne campa oncaj ajacatl, moxtli, metztli, tonajli niman sitlalimej. ‡ **14:10** mucho

¹² Yehua ica nonequi ma quxicocan tlajyohuilistli ican yolsehuilistli on yejhuan iyaxcahuan[§] Dios, yejhuan quitlacamatztihuij itlanahuatilhuan niman quimelajcapiaj intlaneltoc itech Jesús.

¹³ Quemaj se tlajtojli yejhuan ohualeu ne ilhuicac onicac nechijlia:

—Xquipuilo yejhua in: “Sanoyej tlatichiutin yesquej on yejhuan miquisquej desde aman para tlayecapan on yejhuan quinelto Caj to Teco.” On Espíritu Santo no quijtohua: “¡Quemaj, sanoyej tlatichiutin yesquej para yejhamej! Yejhamej nosehuisquej ica on intequiyo, niman Dios quintlaxtlahuilis on tlen oquichijquej.”

Ipan in tlalticpactli quisentlaliaj on tlaquilyotl

¹⁴ Quemaj oniquitac se istac moxtli. Niman ipan on moxtli yehuaticatca quen se tlacatl. Ipan itzontecon quipiaya se corona tlachijchiutli ican oro, niman quimapixtacatca se tepostli tlatequi itoca hoz yejhuan quitequitiltiaj ijcuac pixcalo. ¹⁵ Niman quemaj ocse ilhuicactequitquetl* ohuajquis ne ipan on tiapan, niman oquinotz ican chicahuac tlajtojli on yejhuan yehuaticatca ipan on moxtli, niman ijquin oquijlij:

—Xtequitilti mohoz ipan on tlalticpactli niman xsentlali on tlaquilyotl pampa on hora yoyejcoc niman on tlaquilyotl yochicau.

¹⁶ Quemaj on yejhuan yehuaticatca ipan on moxtli oquipanoltijtiquis ihoz ipan on tlalticpactli niman oquisentlalij itlaquilyo on tlalticpactli.

¹⁷ Quemaj ocse ilhuicactequitquetl ohuajquis ne ipan on tiapan yejhuan oncaj ne ilhuicac, niman yejhua no quipiaya se hoz tlatequi. ¹⁸ Niman ne tlaixpan† ohuajquis ocse ilhuicactequitquetl yejhuan quipia itequiu para quitlajpiaya on tlitl. Niman yejhua ican chicahuac tlajtojli oquinotz on yejhuan quipiaya ihoz tlatequi, niman oquijlij:

—Xtequitilti mohoz tlatequi, niman xsentlali itlaquilyo on uvas yejhuan oncaj ipan on tlalticpactli pampa yochicau.

¹⁹ Niman on ilhuicactequitquetl oquipanoltijtiquis ihoz ipan on tlalticpactli niman oquisentlalij on uvas yejhuan oncaj ipan on tlalticpactli. Quemaj oconxinij ne campa quipatzcasquej. In quijtosnequi on itlahuel Dios yejhuan ye huajlau. ²⁰ Yejhua on uvas xipan on hueyican oquipatzcaquej, yej neca caltenco. Ne campa oquipatzcaquej on uvas oquis yestli. On yestli sanoyej miyec catca niman otlejcoc hasta canaj quen campa quitquij inteposcuai‡ on caballos, niman canaj 300 kilómetros ica huejca onotlaloj.

15

Juan oquitac chicomemej ilhuicactequitquej ican chicome copas yejhuan quipiaj on sa ica nochí plegas

¹ Quemaj ne ipan cielo* oniquitac ocse hueyi niman tetlatlachaltij tlama-jhuisojli. Oniquintac chicomemej ilhuicactequitquej yejhuan oquipixquej on chicome sa ica nochí plegas. On yejhua sa ica nochí plegas pampa ijcuac tlamis on plegas, no tlamis itlahuel Dios. ² No oniquitac on quen itlaj mar tlachijchiutli ican tescatl nenelijtacatca ican tlitl. Ompa majmaniyaj on yejhuan oquitlanquej on xcuajli yolqui, niman on tlamachijchiutli de itlachalis on achtoj xcuajli yolqui yejhuan oquichijchiunquej, niman no ihuan on yejhuan itoca huelis ticmatisquej itechcopia inúmero. Yejhamej ompa quipiaya on arpas yejhuan Dios oquinmacac, ³ niman quitlacuicatiayaj

§ **14:12** le pertenecen; iaxcahuan, ihuaxcahuan, itlatquihuan * **14:15** ángel † **14:18** altar

‡ **14:20** frenos de ellos * **15:1** On cielo oncaj ne campa oncaj ajacatl, moxtli, metztl, tonajli niman sitalimej.

Moisés yejhuan itequichihuilijcau Dios, niman no itlacuical on Borreguito. On tlacuicajli ijquin quijtohuaya:

Hueyi niman tetlatlachaltij nochi on tlen yoticchii toTeco Dios yejhuan nochi tihueli. Timohuica quen quitocarohua niman melajqui, oh tejhua yejhuan tiRey para nochi países.

⁴ ¿Aquinon, tej, xmitztlacaitas? ¿Aquinon xmitzhueyilis toTeco? San tejhua, tej, tiyectli. Niman nochi tlacamej de nochihuiyan países huajlasquej mixpan niman mitzmahuistilisquej, pampa yones ica motequiu oticchii quen quitocarohua.

⁵ Ijcuac ijqui yoniquitac, quemaj quej oniquitac ica ipan on hueyi tiopan yejhuan oncaj ne ilhuicac, otlapou campa más tlayejan campa yejyejtoquej on temej yejhuan ipan tlajcuiolnesticaj on itlanahuatil Dios. ⁶ Ipan on hueyi tiopan ohuajquisquej yejhuamej on chicomemej ilhuicactequitquej yejhuan quipiajaj on chicome plagas. Yejhuamej tlaquemejquej catcaj ica on tlaquentli itoca lino yejhuan chipahuac niman petlanqui. No ijqui mamalinticatca inyelpa se ilpicatl tlachijchiutli ican oro. ⁷ Quemaj semej on nahuimej yejhuan quen yolquej tlajtlachayaj oquinmacatiaj sesentemej se copa tlachijchiutli ican oro. Cada copa tentiaya ica on itlahuel Dios yejhuan nochipa nemí. ⁸ Niman on hueyi tiopan tenticatca ican poctli ipampa ihueyilis niman ipoder Dios. Niman xacaj hueliya calaquiya ne ipan on hueyi tiopan san chica on chicomemej ilhuicactequitquej xe tlamiyaj quixiniyaj on chicome plagas.

16

On chicomemej ilhuicactequitquej quixiniaj on plagas ica on copas

¹ Quemaj onicac se chicahuac tlajtojli yejhuan ocaquistic ne icalijtic on hueyi tiopan. On tlajtojli ijquin oquimijlij on chicomemej ilhuicactequitquej*:

—Xhuiyan, niman on tlahuejli yejhuan itech Dios hualehua xcontoyahuan ica on chicome copas ipan on tlalticpactli.

² On achtoj ilhuicactequitquetl oyaj niman oquitzononquilij icopa on tlen quipiajaj ipan on tlalticpactli. Ijcuacon nochi tlacatl yejhuan quipiajaj inescayo on xcuajli yolqui niman quimahuistiliaya on tlamachijchiutli de itlachalis on yolqui oquiselijquej tzotzomej yejhuan sanoyej† xcuajli niman sanoyej tecocojquej.

³ On ica ome ilhuicactequitquetl oquitzononquilij icopa on tlen quipiajaj ipan mar, niman on mar onocuep yestli quen iyesyo se micatzintli. Niman nochi tlen yolticatca ipan on mar omic.

⁴ On ica yeyi ilhuicactequitquetl oquitzononquilij icopa on tlen quipiajaj ipan on atoyamej niman on ameyaltin, niman nochi on atl onocuep yestli.

⁵ Quemaj on ilhuicactequitquetl yejhuan quitlajpiaya on atl onicac oquijtoj:

—Otitetlaxtlahuilij quen quitocarohua, joh! toTeco Dios yolchipahuac, yejhuan aman nemí niman nochipa nemíya. ⁶ Oticchii quen oquitocaroj pampa on tlacamej oquinmictijquej on yejhuan moyaxcahuan‡ niman on motiotlajtocabahan. Niman pampa ijcon oquichijquej sanoyej xcuajli, aman yotiquimonitij on yestli. Tej, ijqui quintocarohuaya.

⁷ No onicac yacaj ne tlaixpan§ ijquin quijtohuaya:

* **16:1** ángeles: Angeles tequitij ne ilhuicac niman nican ipan in tlalticpactli. † **16:2** muy ‡ **16:6** te pertenecen; moaxcahuan, mohuaxcahuan, motlatquihuan § **16:7** altar

—Quemaj, toTeco Dios nochí hueli, ica tlen melahuac yotitetlaxtlahuilij niman oticchiu quen quitocarohua.

⁸ On ica nahui ilhuicactequitquetl oquitzonoquilij icopa on tlen quipiaya ipan on tonaltzintli, niman on tonaltzintli oquiselij poder para quintonalt-latis on tlacamej. ⁹ Niman on tlacamej sanoyej temojtij otonaltlatlaquej, pero xoquipatlaquej inyojlo nion xocueyilijquej Dios yejhuan quimandarohua on plagas, yej ocuijhuicaltijquej Dios.

¹⁰ On ica macuijli ilhuicactequitquetl oquitzonoquilij icopa on tlen quipiaya ipan itrono on xcuajli yolqui, niman nochihuiyan campa tlanahua-tiaya onocau ipan tlayehuajlotl. On tlacamej sanoyej onococojquej hasta nonenepilcuayaj. ¹¹ Niman yejhamej ocuijhuicaltijquej Dios ilhuicac chanej ipampa on ica nococohuayaj niman on tzotzomej yejhuan oquip-ixquej. Pero masqui ijcon impan onochiu, xocajcrajquej on tlen xcuajli.

¹² On ica chicuasen ilhucactequitquetl oquitzonoquilij icopa on tlen quipiaya ipan on hueyi atentli itoca Eufrates niman on atl ohuac. Ijcon otlapou se ojli para opanoquej on reyes yejhuan huajlayaj ne ica iquisayan tonaltzintli.

¹³ Quemaj oniquitac yejimej xcuajcualtin espíritus yejhuan quen atemo-mej tlajtlachayaj. Yejhamej quisayaj icamac on dragón, niman icamac on xcuajli yolqui niman no icamac on yejhuan xmelahuac tiotlajtojquetl.

¹⁴ In xcuajcualtin espíritus huelij quinchihuaj milagros. Niman yejhamej quisayaj comintlamachilismacayaj* nochimej on reyes ipan on tlalticpactli para quinsentralisquej. Ijquin quichihuasquej para nohuijsoquisquej ihuan Dios ipan on ihueyitonal Dios yejhuan nochí hueli.

¹⁵ Quemaj Cristo oquijtoj: “Xcaquican, xacaj quimati quemanon nihuajlas pampa nihuajlas quen yacaj tlachtequetl. Yejhua ica, sanoyej tlatiochiutli yes on tlacatl yejhuan tlachixtias niman nohuicas quen quitocarohua pampa on tlajtlacojli xiyanticaj. Niman tla ijcuac nihuajlas niqitas itlajtlacol, pinahuas quen yacaj yejhuan tetzotzoltic.” ¹⁶ Niman on yejimej xcuajcualtin espíritus oquinsentralijquej on reyes ne campa ican tlajtojli hebreo itoca Armagedón.

¹⁷ On ica chicome ilhuicactequitquetl oquitzonoquilij icopa on tlen quipiaya ipan ajacatl. Quemaj ne ilhuicac ipan on hueyi tiopan oquis se chicahuac tlajtojli yejhuan hualejticatca ne ipan on hueyixticaj trono. On tlajtojli ijquin quijtohuaya:

—Nochi yonochiu.

¹⁸ Quemaj sanoyej otlapetlan, otlacaquistic chicahuac, otlacocomocac, niman in tlalticpactli ohuihuixcac ican se tlalolinalistli sanoyej temojtij. On tlalolinalistli yejhuan ocuihuixoj in tlajli xqueman onochijca chicahuac quen yejhua in desde ijcuac opeu nemij on tlacamej. ¹⁹ On hueyixticaj ciudad yexcan otlajcoquis, niman on huejhueyican ipan nochí país oxoxotonquej. Niman Dios xoquelcau on hueyi ciudad Babilonia. Yejhua oquichihuaultij ma coni quen itlaj vino on itlahuel yejhuan oquimacac pampa sanoyej ocualanij. ²⁰ Nochimej tlahuactitzintin yejhuan oncatcaj atlajcotian niman on tepemej opolijquej. ²¹ No ijqui huejhueyi tesiuatlí ohualeu ipan cielo niman ohuajxinquej impan on tlalticpactlacamej. Cada se tesiuatlí canaj cuarenta kilos yetic catca. Niman on tlacamej ocuijhuicaltijquej Dios ipampa on tesiuatlí yejhuan sanoyej temojtij catca.

17

On tlacapajpatlaquetl quiselia itlahuel Dios

* **16:14** los inspiraban

¹ Quemaj ohuajlaj semej on chicome ilhuicactequitquetl* yejhuan quipiajaj on chicome copas, niman onechijlij:

—Xhuajla, niman nimitzititis quen Dios quitlajtlacolmacas niman quicas-tigaros on hueyi tlacapajpatlaquetal yejhuan yehuaticaj ipan nochon mares.

² On reyes yejhuan nemij ipan in tlalticpactli ihuan yejhua ocojochquej. Niman on chanejquej ipan on tlalticpactli otlahuanquej ican ivino. Ivino quijtosnequi on tlacapajpatlalistli yejhuan oquichiu.

³ Quemaj on Espíritu Santo oquiyecan notlamachilis niman on ilhuicactequitquetl onechhuicac ne tlapatlaco. Ompa, tej, oniquitac se sihuatl yeticatca ipan se xcuajli yolqui. On xcuajli yolqui chichiltic tlajtlachaya niman nochitlacayo tenticatca ican tocayomej yejhuan cuijhuicaltiyaj Dios. On xcuajli yolqui chicome itzontecon quipiaya niman majtlactli icuacuau. ⁴ Yejhua on sihuatl tlaquemej catca ican se tlaquentli yejhuan quipiaya on tlapalyo morado niman chichiltic. On itlaquen tlajmachyoj† catca ican oro, ican cualtetzitzintin temej, niman ican perlas. Yejhua quimapixticatca se copa yejhuan tlachijchiutli ican oro. On copa tenticatca ican on tlen sanoyej‡ molonqui ijtlacauqui niman ica on tlen sanoyej tetlajyelos§ xchipahuac yejhuan onosentlalij ica itlacapajpatlalis. ⁵ Niman ipan ixcuateu on sihuatl tlajcuilolnestiaya se tocayotl yejhuan xacaj cajsicamatya tlinon quijtosnequi. On tocayotl ijquin quijtohuaya: “On hueyixticaj Babilonia yejhua innan nochimej on tlacapajpatlaquej niman nochon tlen sanoyej molonqui ijtlacauqui ipan on tlalticpactli.” ⁶ Quemaj oniquitac ica on sihuatl tlahuaniqui catca ican inyesyo on iyaxcahuan* Dios niman ican inyesyo on yejhuan omiquej pampa cuajli otenojnotzquej itech ica Jesús. Ijcuac ijcon oniquitac, sanoyej onimojcatlachix. ⁷ Quemaj on ilhuicactequitquetl onechijlij:

—¿Tlica† yotimojcatlachix? Nejhua nimitzmachiltis iichtacalis‡ on sihuatl, niman on xcuajli yolqui yejhuan ipan yetinemie yehuan quipia on chicome itzontecon niman on majtlactli icuacuau. ⁸ On xcuajli yolqui yejhuan otiquitac, sa no yejhua on yejhuan achtoj yolticatca, pero aman xoc yolticaj. Niman masqui xoc yolticaj yejhua huajquisas ne ijtic on pozo yejhuan xnejsi quech ica huejcatlan, niman quemaj sa yeyica quixotonisquej. Desde ijcuac otzimpeu on tlalticpactli ye oncatca se tlajcuilolamatl campa nesticatca intoca on tlacamej yejhuan quipiasquej nemilistli para nochipa. Pero on tlacamej yejhuan xtlajcuilolnesticaj intoca ipan on tlajcuilolamatl, mojcatlachasquej ijcuac quitasquej on xcuajli yolqui. Yejhamej mojcatlachasquej pampa on xcuajli yolqui yolticatca niman aman xoc yolticaj. Pero ocsejpa huajlas.

⁹ Ipan in nonequi se tlamatquilistli§ yejhuan quipia cajsicamatilistli. On chicomemej tzontecomamej quijtosnequi on chicomemej tepemej yejhuan on sihuatl impan yehuaticaj. ¹⁰ Niman no sa no on tzontecomamej no quijtosnequi chicomemej reyes. Macuitimej yejhamej yomiquej. Niman se de yejhamej tlamandarojticaj, niman on ocse hasta aman xhuajlau. Pero ijcuac huajlas on yejhuan sa ica nochon rey, yejhua xoc huejcahuis tlamandaros. ¹¹ On xcuajli yolqui yejhuan yolticatca niman aman xoc yolticaj sa no yejhua on ica chicueyi rey. Yejhua no tehuau ne intech on chicomemej reyes nophohua, niman ijcuac ica ocpa yotlamandaroj, yas para ma quimictican.

* **17:1** ángel: Angeles tequitij ne ilhuicac niman nican ipan in tlalticpactli. † **17:4** adornada

‡ **17:4** mucho § **17:4** provoca náuseas * **17:6** le pertenecen; iaxcahuan, ihuaxcahuan, itlatquihuan † **17:7** ¿por qué?; ¿tline? ‡ **17:7** su secreto § **17:9** sabiduría

12 'On majtlactli cuacuautli yejhuan otiquitac quijtosnequi on majtlactlimej reyes yejhuan hasta aman xe pehuaj tlamandarohuaj. Pero san ipan se achijtzin tiempo san secan ihuan on xcuajli yolqui quiselisquej on tequihuajyotl para tlamandarosquej quen reyes. **13** On majtlactlimej reyes san se tequitl quipiasquej niman impoder ihuan intequihuajyo quimacasquej on xcuajli yolqui. **14** On xcuajli yolqui niman on reyes notlanisquej ihuan on Borreguito. Pero on Borreguito quintlanis pampa toTeco yejhua inTeco impan nochimej on tetecohuan niman Rey impan nochimej on reyes. Niman on yejhuan nemij ihuan on Borreguito, Dios oquinnotz niman oquintlapejpenij, niman cuajli onohuicaquej ihuan on Borreguito.

15 On ilhuicactequitquetl no ijquin onechijlij:

—On mares yejhuan otiquitac impan yehuaticaj on tlacapajpatlaquetl quijtosnequi pueblos, tojlamej, países niman on yejhuan sesetlamantic tla-jtoltin*. **16** On majtlactli cuacuautli yejhuan otiquitac ipan on xcuajli yolqui, quitlahuelitasquej on tlacapajpatlaquetl. Yejhuatej quitlaquijquixtilisquej niman quitetzotzolosquej. No quicuasquej inacayo on tlacapajpatlaquetl, niman quitlatisquej. **17** Ijcon nochihuas pampa sa no Dios oquintlalilij ipan inyojlo para tlen yejhua quinequi, ijqui quichihuasquej. Yejhuatej, tej, san secan notlajtolmacasquej niman quimacasquej intequihuajyo on xcuajli yolqui para yejhua huelis tlanahuatis hasta queman nochihuas nochi tlen Dios yoquijtoj. **18** On sihuatl yejhuan otiquitac quijtosnequi on hueyi hueyican yejhuan quimandarohua nochi quech rey nemí ipan in tlalticpactli.

18

Yohuetz on ciudad itoca Babilonia

1 Quemaj ijcuac ijcon yoniquitac, oniquitac se ilhuicactequitquetl* hau-jitemohuaya ne ilhuicac. Yejhua oquipix hueyi tequihuajyotl niman ican ipetlanalis otlastayac ipan in tlalticpactli. **2** Niman ican chicahuac tlajtojli ijquin tzajtziya:

—Aman quemaj, yohuetz on hueyixticaj ciudad itoca Babilonia. Yejhua yonochiu chanyotl† para on xcuajcualtin espíritus, chanyotl para nochí tla-jtlamach‡ xcuajcualtin ajacamej, niman yonochiu tepajsojli para on xchipaquej niman tlahuelejquej totomej. **3** On tlacamej ipan nochí países yotlajtlacoquej yejhua ipampa. Niman nochimej reyes ipan in tlalticpactli ihuan yotlajtlacoquej ica on tlen xcuajli. Niman no on tlasemanquej yorricojtiaquej ica on tlen tlajtlamach yejhua ica nopactiaj.

4 Quemaj ne ilhuicac oniconcac ocse tlajtojli yejhuan ijquin quijtohuaya:

—Nemejhuamej yejhuan nennoyaxcahuan§ xquisacan ipan on ciudad, para xinhuan nenquichihuasquej on intlajtlacol, niman ijcon xinhuan nenquiselisquej on iplagas. **5** Quiselisquej itlahuel Dios pampa tlajtlacohuaj hasta campa xoc hueli niman Dios yoquelnamic on tlen xcuajli oquichijquej. **6** Ijcon quen yejhua oquinmacac ocsequimej no ijqui xmacacan. Niman on tlen yejhua oquichiu, ocpatipan sa no ijqui xmacacan. Ijcon quen chichic oquineloj se tlaonijli para ocsequimej, nemejhuamej ocpa más chichic xne-locañ para yejhua. **7** Xmacacan tlajyohuilistli niman ajmantli no ijqui quen onohueyilij niman onopactij ican irriquezas. Ijcon xmacacan pampa ipan iyojlo quijtohuá: “Quen yacaj reina nican yehuaticaj. Nejhua xnicahuajli niman xqueman nichocas.” **8** Yejhua ica san ipan se tonajli quipias in plagas.

* **17:15** lenguas

* **18:1** ángel: Angeles tequitij ne ilhuicac niman nican ipan in tlalticpactli.

† **18:2** casa; cajli

‡ **18:2** cosas § **18:4** me pertenecen; nennoyaxcahuan, nennoyaxcahuan, nennotlatquihuan

Quipias miquilistli, ajmantli, apistli niman tlatlas. Ijcon nochihuas pampa toTeco Dios yejhuan yoquitlajtlacolmacac sanoyej* quipia poder.

⁹ On reyes yejhuan nemij ipan in tlalticpactli ihuan ocojcochquej niman ihuan oquipactijquej innemilis ica on tlen oquinajahuiltijquej. Ijcuac quitasquej ipocyo on tlilt yejhuan ica tlatlasquej, chocasquej niman najmanasquej. ¹⁰ Yejhuamej san huejca ontlachixtiasquej pampa quimacajsiquej on itlajyohuilis, niman quijtosquej:

—¡Ay, lástima de tejhua tihueyixticaj ciudad Babilonia! ¡Sanoyej ticojtiti-catca ciudad! Niman aman san ipan se hora oticselij mocastigo.

¹¹ On tlasemanquej yejhuan nemij ipan in tlalticpactli no chocasquej niman najmanasquej ipampa on ciudad, pampa xoc nemisquej yejhuan quinocohuilisquej on tlen quinamacaj. ¹² Xoc cohuasquej on oro, plata, on cualtzitzintin temej, on perlas, on tlaquentli† más cualtzin itoca lino, niman on tlaquentli yejhuan itoca seda, niman on tlaquentli morado niman on tlaquentli chichiltic. No ijqui xoc cohuasquej noch ijlajtlamach cojti‡ ajhuiyac, noch ijlajtlamach yejhuan tlachijchiutli ican marfil, cojin cualtzitzintin, noso on tepostli itoca bronce, noso hierro, noso on tlajtlamach yejhuan tlachijchiutli ica on cuatejtzin tetl itoca mármol. ¹³ Niman xoc cohuasquej canela, tlajtlamach tlen ajhuiyac, xochicopajli, on perfumes itoca mirra niman olíbano, vino, aceite, harina yejhuan más cuajli niman trigo, niman no yolquej yejhuan tlamamaj, borregos, caballos, carros yejhuan quitilanaj on caballos, niman hasta tlacamej tlanamactin. In quijtosnequi innemilis on tlacamej. ¹⁴ On tlasemanquej no quijlisquej on ciudad:

—¡On sanoyej huelic tlaquilyotl yejhuan ticuelitaya xoc ticpia! Niman aman para nochipa yoticpoloj on riquezas niman on tlen patioj yejhuan ticpiaya.

¹⁵ On tlasemanquej yejhuan yotlanamacaquej ica on quen on tlajtlamach niman oricojtiaquej itechcopia on ciudad, san huejca ontlachixtiasquej pampa quimacajsiquej on itlajyohuilis. Yejhuamej chocasquej niman najmanasquej, ¹⁶ niman quijtosquej:

—¡Ah, lástima para on hueyixticaj ciudad! Yejhua quen sihuatl catca yejhuan tlaquemej ican lino fino niman ican tlaquentli morado niman chichiltic, niman tlajmacyoj§ ican oro, ican cualtzitzintin temej niman ican perlas. ¹⁷ ¡Niman san ipan se hora otlan noch ijlajtlamach!

Nochimej on yejhuan tlamandarohuaj ipan on barcos, on yejhuan pajxalohuaj ipan on barcos, on marineros, niman nochimej on yejhuan tequitij ipan on mar huejca huajnotelquetzasquej. ¹⁸ Niman ijcuac quitasquej ipocyo on tlilt yejhuan ica tlatlas on ciudad, quijtosquej:

—¡Xoncatca ocse ciudad sanoyej hueyixticaj quen yejhua in ciudad!

¹⁹ Yejhuamej nocuatlatltemisquej para quiteititisquej ica najmanaj. Chocasquej niman najmanasquej, niman quijtosquej:

—¡Ay, lástima para on hueyi ciudad! Ican irriquezas oricojtiaquej nochimej on yejhuan quipiayaj inbarco. ¡Pero ipan se hora noch ijlajtlamach! ²⁰ Xpaquican nemejhuamej yejhuan nenchantij ne ilhuicac pampa on ciudad yoxoxoton. Nemejhuamej apóstoles, niman nemejhuamej tiotlajtojquej niman nemejhuamej yejhuan iyaxcahan Dios no xpaquican. Xpaquican pampa Dios yocastigaroj on ciudad pampa omechtajyohuiltij.

* ^{18:8} mucho † ^{18:12} tela; totontli ‡ ^{18:12} madera § ^{18:16} adornada

²¹ Quemaj se ilhuicactequitquetl cojtic oquetzteu se tetl. On tetl sanoyej hueyi catca, quen imetl se hueyi molino. Quemaj ocontlajcal on tetl ipan mar, niman oquijtoj:

—Babilonia, on hueyixticaj ciudad no ijcon contlajcalisquej ne tlatzintlan, niman xoc queman ocsejpa más nenquitasquej. ²² Xoc queman ompa quincaquisquej on tlacuicatijquej. Xoc queman caquistisquej quintzotzonaj on arpas, nion quimpitzaj on flautas niman on trompetas ipan on ciudad. Niman nion se tlacatl xoc tequitis ipan tlajtlamach tequitl, niman no xoc caquistisquej on molinos ipan on ciudad. ²³ Nion se tlahuijli xoc tlicuis ipan on ciudad. Niman no xoc nonamictihuas, masqui motlasemancahuau más sanoyej huejhueyixticatcaj ipan on tlalticpactli niman ican monahuajlo otiquincajcayau nochimej países. ²⁴ Ipan on ciudad yopanes inyesyo on tiotlajtojquej, niman on yejhuan iyaxcahuau Dios niman nochimej on yejhuan no oquinmictijquej ipan in tlalticpactli.

19

¹ Ijcuac in yopanoc, onicac quen miyec tlacatl chicahuac tlajtlajtohuaya ne ilhuicac. Yejhamej quijtohuayaj:

¡Ma quiyectenehuacan toDios! Yejhua temaquixtia. Hueyixticaj niman quipia hueyi poder.

² Yejhua tecastigarohua quen quitocarohua niman ica on tlen melahuac. Yejhua, tej, yoquitlalilij icastigo on hueyixticaj tlacapajpatlaquetl, yejhuan ican iahuilnemilis yoquijtlacoj noch i tlacatl. Dios, tej, yocuepiltij on tlacapajpatlaquetl on ica oquinmictij on itequichihuilijcahuau.

³ Quemaj ocsejpa oquijtojquej:

—¡Ma quiyectenehuacan toDios! Tej, ipocy o on hueyi ciudad yejhuan yotlatlac xqueman noteltis.

⁴ Niman on sempoajli* huan nahui tlajtlajmatquej tlayecanquej inhuan on nahuimej yejhuan quen yolquej, onotlacuenquetzquej hasta ixco on tlajli niman oquimahuistilijquej Dios yejhuan yehuaticaj ipan ihueyixticaj trono. Yejhamej quijtohuayaj:

—¡Ma ijqui nochihua! ¡Ma quiyectenehuacan toDios!

⁵ Quemaj ne itech on hueyixticaj trono ocaquistic se tlajtojli yejhuan quijtohuaya:

Xcueyilican toDios nochimej nemejhamej yejhuan nenquitequichihuilij niman nenquitlacaítaj, sanquen on huejhueyixtoquej niman on yejhuan xhuejhueyixtoquej.

On Borreguito nonamictia niman quitlalhuichihuililiaj

⁶ Quemaj onicac quen miyec tlacatl tlajtlajtohuaya. Ocaquistic quen caquisti on hueyi atl ijcuac huejcatlan onttoyajticas, niman quen ijcuac sanoyej† chicahuac tlacomoni. On tlajtojli ijquin quijtohuaya:

¡Ma quiyectenehuacan toDios! pampa on toTeco Dios yejhuan noch hueli yopeu tlamandarohua.

⁷ Ma tipaquican niman ma titemican ican pactli. Ma ticyectenehuacan ihueyilis, pampa yoyejcoc on tonajli para nonamictis on Borreguito niman quitlalhuichihuilisquej. Isihuau yonotlayectlalilij

* **19:4** Sempoajli quitosnequi veinte, niman sempoajli huan nahui quitosnequi veinticuatro.

† **19:6** muy

⁸ ican on lino fino yehuan chipahuac niman petlani yejhuan oquimacaquej.
On lino fino quijtosnequi on tlajtlamach[‡] yejhuan iyaxcahuans[§] Dios
quichihuaj ican inyolmelajquilis.

⁹ Quemaj on ilhuicactequitquetl* onechijlij:

—Xquijcuilo yejhua in: “Sanoyej tlatiochijtiyesquej on yejhuan tlan-
tzaltin para tlacuasquej ipan on ilhuitl yejhuan nochihuas ijcuac nonam-
ictis on Borreguito.”

Niman no onechijlij:

—Yejhua in tlajtojli melahuac itlajtoltzin Dios.

¹⁰ Ijcuac yejhua onechijlij yejhua in, oninotlacuenquetz icxitlan on il-
huicactequitquetl para nicmahuistilis, pero yejhua onechijlij:

—Ma ca ijcon xchihua. Nejhua, tej, san niitequichihuiljcau Dios, sa no
ijqui quen tejhua niman mocnihuan yejhuan melajcanemij ipan on tlen
melahuac yejhuan Jesús oquipanextij. Tejhua san Dios xmahuistili.

Yejhua on, tej, tlen melahuac yejhuan Jesús oquipanextij, yejhua quintla-
machilstia† on tiotlajtojquej.

Juan oquitac on yejhuan quittlejcohua on istac caballo

¹¹ Quemaj oniquitac tlajtoltzin on ilhuicac. Niman ne campa huajtlapojti-
caj ohuajnonextij se istac caballo. Ipan on caballo yeticatca se tlacatl yejhuan
itoca Fiel niman no itoca Melajcatlacatl. Niman yejhua tetlajtlacolmaca
quen quitocarohua niman tlahuijsoqui quen quitocarohua. ¹² Ixtololojhuán
quen itlaj tlimilinajli catca niman miyec coronas quitquiya ipan itzontecon.
Niman yejhua ipan tlajcuilnesticatca se tocayotl yejhuan xacaj quimatiya
tlinon quijtosnequi, yej san yejhua quimatiya. ¹³ Yejhua tlaquemej catca
ican se tlaquentli oquipatzojquej ican yestli, niman yejhua itoca: Dios
iTLajtoltzin. ¹⁴ On soldados chanejquej ne ilhuicac cuajtocatiayaj. Yejhuatej
tlaquemejquej catcaj ican lino yejhuan más cualtzin niman istac niman
chipahuac. Yejhuatej huajyejyetiayaj ipan istaquej caballos. ¹⁵ Icamac
huajquistiaya se espada sanoyej tlatequi, yejhuan ica quintlanis on países.
Yejhua quinmandaros ican hueyi tequivuayotl. Niman quinchihuaultis quen
quichihuiliaj on uvas ijcuac quipatzcraj. In quijtosnequi ica quintlaxtlahuilis
ican temojtij tlajyohuilsatlí yejhuan hualehua ipan on itlahuel Dios yejhuan
nochi hueli. ¹⁶ Ipan itlaquen niman ipan imetzcoyo tlajcuilnestiaya in
tocayotl: “Rey impan nochimej on reyes niman inTeco impan nochimej on
tetecohuan.”

¹⁷ Quemaj se ilhuicactequitquetl‡ oniquitac ijcaticatca ipan on tonaltzintli.
Yejhua sanoyej chicahuac oquintzajtzilij nochimej on totomej yejhuan pat-
lantinemij ne ixco on cielo. Yejhua ijquin oquimijlij:

—Xhuajlacan niman xmosentlalican para nencuasquej on hueyi quij-
tosnequi tlacuajli yejhuan Dios quitemaca. ¹⁸ Xmosentlalican para nen-
cuasquej innacayo on reyes, innacayo on yejhuan tlayecanquej militares,
innacayo on yejhuan huejhueyixtoquej tlacamej, innacayo on caballos ni-
man on yejhuan ipan on caballo tlejcohua[§]. Nochimej tlacamej nen-
quincualisquej innacayo, masqui tlanamactin noso tlamacahualtin, masqui
huejhueyixixquej noso xhuejhueyixixquej.

¹⁹ Quemaj oniquitac on xcuaqli yolqui niman on yejhuan reyes ipan in
tlalticpactli ihuan insoldados, yonosentlalijcaj para notlanisquej ihuan on
yejhuan yeticatca ipan on caballo istac niman isoldados. ²⁰ Ocajsiquej

‡ **19:8** cosas § **19:8** le pertenecen; iaxcahuau, ihuaxcahuau, itlatquihuan * **19:9** ángel: Angeles
tequitij ne ilhuicac niman nican ipan in tlalticpactli. † **19:10** inspira ‡ **19:17** ángel § **19:18**
lo montan

on xcuajli yolqui san secan ihuan on xmelahuac tiotlajtojquetl. Ijcuac xe cajsij on xmelahuac tiotlajtolquetl, oquinchiu tlamajhuisoltin milagrosas ixpan on xcuajli yolqui. Itechcopa on tlamajhuisoltin, oquincajgayau on yejhuan oquinocahuijquej ma quintlalilican inescayo on xcuajli yolqui niman oquimahuistilijquej on tlamachijchiutli de itlachalis on yejhuan oquichijchiuquej. Ijcon tej, on xcuajli yolqui niman on xmelahuac tiotlajtojquetl yoltoquej ocominxinijquej ne tlico campa tecuinticaj ican azufre. ²¹ Niman on ocsequimej insoldados oquinmictijquej ica on espada yejhuan quisaya icamac on yejhuan yeticatca ipan on caballo istac. Niman nochimej on totomej ocuajquej innacayo hasta campa oyolasiquej.

20

On yejhuan ocsejpa yolihiisquej tequihuajtisquej se mil xipan ihuan Cristo

¹ Quemaj oniquitac ne ilhuicac huajtemohuaya se ilhuicactequitquetl* cuajmapixtiaya se hueyi teposcadena niman illave on pozo yejhuan xnejsi quech ica huejcatlan. ² In ilhuicactequitquetl ocajsic yejhua on dragón on icsan cohuatl yejhuan sa no yejhua diablo noso Satanás. Yejhua oquisaloj para ijqui nemis se mil xipan. ³ Quemaj on ilhuicactequitquetl ocontlajcal on Satanás ne ijtic on pozo niman ompa oquitzacu. Ipan on tlatzacuilyotl† yejhuan ica oquitzacu on pozo oquitlalij se sello para on Satanás ma ca sa más quincajcahuas on países hasta tla yopanoc on se mil xipan. Tla yopanoc se mil xipan, ica oncaj ocsejpa quimacahuasquej san quesqui tonaltin.

⁴ Quemaj oniquintac on tronos, niman on yejhuan yoquiselijcaj tequihuajyotl para teyolcuitisquej niman tetlaxtlahuilisquej ompa yejyehuaticatcaj. No ijqui oniquintac inalma on yejhuan oquinquechtzontecaj pampa quiteijliayaj on temachtijli ica Jesús niman pampa oquitemachtijkej itlajtol Dios. Yejhamej xoquimahuistilijquej on xcuajli yolqui, nion yejhua on tlamachijchiutli de itlachalis yejhuan oquichijchiuquej. Niman no xoquinocahuijquej ma quintlalilican inescayo on xcuajli yolqui ipan inixcuateu nion ipan inma. Yejhamej oyolihuiquej‡ niman onoquetztejquej niman se mil xipan ihuan Cristo otequihuajtiquej. ⁵ In yejhuan otequihuajtiquej ihuan Cristo yejhamej achtoj oyolihuiquej niman onoquetztejquej impan intlalcon. Pero on ocsequimej mimiquej xoyolquej hasta ijcuac opanoc on se mil xipan. ⁶ Sanoyej§ tlatiochijtiyesquej niman yolchipajquej yesquej on yejhuan achtoj yolihiisquej niman noquetztehuasquej. Yejhamej xmiquisquej ica ocpa quen on ocsequimej yesquej. Yejhamej intiopixcahuan yesquej Dios niman Cristo. Niman mil xipan ihuan Cristo tequihuajtisquej.

⁷ Ijcuac panos on se mil xipan, Satanás xoc tzacutias, yej quimacahuasquej. ⁸ Quemaj comincajcahuas nochimej on países nochihuiyan ipan in tlalticpactli. Cajcayahuas Gog niman Magog. Isoldados Gog niman Magog nemisquej quen itlaj on xajli miyec yejhuan oncaj itempan mar. Pero Satanás nochisentlalis para quichihuasquej guerra. ⁹ Ijcon tej, ohualejquej nochihuiyan ipan in tlalticpactli, niman oquiyehualoquellej inchanyou on yejhuan iyaxcahuan* Dios, niman on hueyican yejhuan Dios quitlajsojtlat. Pero ne ilhuicac ohuajtemoc tlitl niman nochimej oquintlatij. ¹⁰ Niman on diablo yejhuan oquincajgayau on países ocontlajcalquej ne tlico campa tecuinticaj azufre, campa no nemiyaj on xcuajli yolqui niman on xmelahuac

* **20:1** ángel: Angeles tequitij ne ilhuicac niman nican ipan in tlalticpactli. † **20:3** puerta ‡ **20:4** resucitaron; oyoliquej § **20:6** muy * **20:9** le pertenecen; iaxcahuan, ihuaxcahuan, itlatquihuan
† **20:9** le ama

tiotlajtojquetl. Ican tonajli niman yejhuanli para nochipa ompa tlajyohuijtiasquej.

Dios oquinyolcuitij niman oquintlaxtlahuilij on mimiquej

¹¹ Quemaj oniquitac se istac hueyixticaj trono, niman no oniquitac on yejhuan ipan yehuaticatca. Niman on tlalticpactli niman on cielo[†] totoca oyejtējquej ixpan on yejhuan yehuaticaj ipan on hueyixticaj trono niman xoquinextijquej canon niyanasquej. ¹² Niman quemaj oniquintac ixpan Dios majmanticatcaj on mimiquej yejhuan huejhueyixtoquej niman yejhuan xhuejhueyixtoquej. Quemaj oquintlapojoquej on tlajcuilolamamej niman no oquitlapojoquej ocsen tlajcuilolamatl yejhuan quijtohua aquinon quipia yencuic nemilistli para nochipa. On mimiquej oquinyolcuitij niman oquintlaxtlahuilij quen quitocarohua ica on tlen oquichijquej nochiquech tlajcuilolnesticaj. ¹³ On mimiquej yejhuan nemiyaj ijtic on mar oquisquej, niman on miquilistli oquintemamac on mimiquej niman ipan intalcon oquisquej. Nochi on mimiquej niman cada sesentemej oquinyolcuitijquej niman oquintlaxtlahuilijquej quen quitocarohua on tlen oquichijquej. ¹⁴ Quemaj on miquilistli niman on tlalcontin ocominxinijquej ne tlico campa nemij on tlacamej yejhuan ica ocpa miquij. ¹⁵ On yejhuan xtlajcuilolnesticatca intoca ipan on tlajcuilolamatl yejhuan quijtohua aquinomej quipiaj yencuic nemilistli para nochipa ompa ocominxinijquej ipan on tlitl ne tlico.

21

On cielo niman on tlalticpactli yencuiyasquej

¹ Quemaj oniquitac se yencuic cielo* niman se yencuic tlalticpactli pampa on achtoj cielo niman on achtoj tlalticpactli yopopolijcaj niman xoc oncatca mar. ² Nejhua Juan oniquitac on yejyejticaj hueyican, on yencuic Jerusalén, huajtemotiaya ne ilhuicac campa Dios nemi. On hueyican nochis sanoyej† cualtzin nesiya, quen se sihuamontli ijcuac nonamictia, cualtzin notlaquentia para quipactia inovio. ³ Niman se chicahuac tlajtojli yejhuan hualehuaya ne ilhuicac oquijtoj:

—Xquita, aman intzajlan on tlacamej chanti Dios. Yehua inhuan chantis, niman yejhuamej itech teyaxcahuan‡ yesquej. Sa no yejhuas inDios. ⁴ Dios quimpopolohuilis nochis ajmantli, niman xoc onyas miquilistli, nion choquistli, nion ajmantli, nion cocolistli§, pampa nochis tlen achtoj oncatca yopanoc.

⁵ Quemaj on yejhuan yehuaticatca ipan on hueyixticaj trono oquijtoj:

—Xquita, nejhua nicyenculia nochis on tlajtlamach*.

No ijqui oquijtoj:

—Xquiycilo in tlen ticacticaj pampa in tlen nimitzijlijticaj yejhuan tlen melahuac niman nochimej cuajli para quineltocasquej.

⁶ Onechijlij:

—Ijqui yonochiu. Nejhua niachtoj niman nisa ica nochis de nochis on tlajtlamach, no ijqui quen on abecedario pehua ican on letra A niman ontlami ican on letra Z. On yejhuan amiqui, nicmacas on atl yejhuan ameya ipan on ameyajli niman quitemaca nemilistli. Niman xnechtlaxtlahuilis, yej nejhua san nictlayocolis. ⁷ Yejhuan quisa tetlanqui ipan nochis on tlen

‡ **20:11** On cielo oncaj ne campa oncaj ajacatl, moxtli, metztli, tonajli niman sitlalimej. * **21:1** On cielo oncaj ne campa oncaj ajacatl, moxtli, metztli, tonajli niman sitlalimej. † **21:2** muy ‡ **21:3** le pertenecen; teaxcahuan, tehuaxcahuan, tetlatquihuan § **21:4** dolor * **21:5** cosas

xcuajli quiselis se herencia de nochí yejhua on tlen cuajli. Nejhua niiDios yes niman yejhua noconeuyes. ⁸ Pero para on yejhuan mojquej, on yejhuan xtlaneltocaj, on yejhuan nijtlacohua ixpan Dios, on yejhuan temictianimej, on yejhuan ahuilnemij, on yejhuan tenahualhuiaj, on yejhuan quinmahuistiliaj on tlamachijchihualtin intajtzitzihuan niman on yejhuan tlacajcayahua, yejhuatej yasquej ne tlico campa on tliltl niman azufre tetlatiaj. In, tej, yejhua ica ocpa miquilistli.

Juan oquitac on yencuic Jerusalén

⁹ Quemaj semej on chicomememej ilhuicactequitquej† yejhuan quipiayaj on chicome copas tetentoquej ican on chicome plagas notech ohuajlaj, niman onechijlij:

—Xhuajla, niman nimitzitis on sihuamontli yejhuan aman isihuau on Borreguito.

¹⁰ Quemaj nimantzin, ijcuac on Espíritu Santo oquiyecan notlamachilis, yejhua on ilhuicactequitquetl onechhuicac ipan se hueyi niman tlacpac tepehl. Ompa yejhua onechititij on hueyi niman yejyejticaj hueyican Jerusalén, huajtemotiaya ne ilhuicac campa Dios nemí. ¹¹ On hueyican petlaniya ican ihueyilis Dios. On ipetlanalis ijcon catca quen ipetlanalis on yejhuan más cualtzin tetl itoca jaspe, niman tlanespan quen tescatl yejhuan itoca cristal. ¹² On hueyican quiyehualojtoya se hueyi niman tlacpac tepanchinantli. Quipiaya majtlactli huan ome tlatzacuilyomej‡ niman nemiya se ilhuicactequitquetl ipan cada tlatzacuilotl. Niman intoca on majtlactli huan ome familias yejhuan hualehuaj itech Israel tlajcuilnesticatcaj ipan on tlatzacuilyomej. ¹³ Yeyi tlatzacuilyotl oncatca campa iquisayan tonaltzintli, ocse yeyi ne tlacpac ica, ocse yeyi ne tlatzintlan ica, niman ocse yeyi ne campa icalaquian tonaltzintli. ¹⁴ Ne itzimpeuyan itepanchinan on hueyican oncatcaj majtlactli huan ome cimientos, niman impan tlajcuilnesticatcaj intoca on majtlactli huan ome iapóstoles on Borreguito.

¹⁵ On ilhuicactequitquetl yejhuan nohuan tlajtlajtohuaya quipiaya se tlatemachilcojtl tlachijchiutli ican oro para quitejtemachihuas on hueyican ihuan itlatzacuilyou niman itepanchinan. ¹⁶ On hueyican naucan quipia iesquina. Ijcon quech ica hueyac no ijqui ica patlahuac. On ilhuicactequitquetl oquitemachiu on hueyican ica on tlatemachilcojtl, niman oniquitac ica 22,000 kilómetros ica hueyac quipiaya, niman ica tlacpac niman patlahuac sa no ijqui quipiaya. ¹⁷ Quemaj on ilhuicactequitquetl oquitemachiu itepanchinan on hueyican ica on tlatemachilcojtl yejhuan ica tlatemachihuaj on tlalticpactlacamej. Ijcuac otlan quitemachihua, oniquitac ica yepoajli§ huan nahui metros quipiaya. ¹⁸ On tepanchinantli tlachijchiutli catca ican on tetl yejhuan itoca jaspe. On hueyican tlachijchiutli catca ican on chipahuac oro yejhuan petlani quen on tescatl yejhuan sanoyej chipahuac. ¹⁹ Icimento on tepanchinantli tlajmachyoj* catca ican nochí sesetlamantic cualtetzitzin temej. On achtoj icimiento tlajmachyoj catca ican jaspe, on ica ome ican zafiro, on ica yeyi ican ágata, on ica nahui ican esmeralda, ²⁰ on ica macuji li ican ónica, on ica chicuasen ican cornalina, on ica chicome ican crisólito, on ica chicueyi ican berilo, on ica chicnahui ican topacio, on ica majtlactli ican crisoprasta, on ica majtlactli huan se ican jacinto, niman on ica majtlactli huan ome ican amatista. ²¹ On majtlactli huan ome tlatzacuilyomej tlachijchiutli catcaj ican majtlactli huan ome perlas. Cada se tlatzacuilyotl

† **21:9** ángeles: Angeles tequitij ne ilhuicac niman nican ipan in tlalticpactli. ‡ **21:12** puertas

§ **21:17** Yepoajli quitosnequi sesenta, niman yepoajli huan nahui quitosnequi sesenta y cuatro.

* **21:19** adornada

oquichijchiuquej ican se perla. On patlahuac icalle on hueyican tlachijchiutli catcaj ican chipahuac oro yejhuan petlani quen on tescatl yejhuan sanoyej chipahuac.

²² Ompa, tej, nion se tiopan xoniquitac ipan on hueyican pampa toTeco Dios yejhuan nochí hueli ihuan on Borreguito sa no yejhua tiopan. ²³ On hueyican xquipolohua on tonatzintli nion on metztli para quitlahuilhuiyaj pampa ihueyilis Dios quitlahuilhuiya, niman yejhua on Borreguito itlahuil on hueyican. ²⁴ Tlacamej nochihuiyan quistinemisquej ican itlahuil on hueyican. Niman on tlalticpacrreyes yesquej itech quitquisquej inhueyilis niman intetlacaitalis. ²⁵ Xqueman, nion se tonajli, quitzacutiasquej itlatzacuilyohuan on hueyican, pampa ompa xqueman tlayohuas. ²⁶ On países ompa quitquisquej hueyilistli niman tetlacaitalistli. ²⁷ Pero on tlen xchipahuac ompa xqueman calaquis, nion yejhua on yejhuan njtlacohua ixpan Dios noso on yejhuan tlacajcayahua. Ompa, tej, calaquisquej san yejhamej on yejhuan tlajcuilolnesticaj intoca ipan itlajcuilolamau on Borreguito yejhuan quijtohua aquinomej quipiaj nemilistli para nochipa.

22

¹ Quemaj on ilhuicactequitquetl* onechititij on atentli. Niman on atl ipan on atentli chipahuac catca quen itlaj tescatl itoca cristal. Niman on atl yejhuan oncaj ipan on atentli quitemaca nemilistli. On atl huajquistoya ne itech ihueyixtacaj trono Dios, niman itech on Borreguito, ² niman yajtoya itlajcotian ipan ipatlahuac calle on hueyican. Niman inajnacastlan on atentli oncatca on cojtlaquijlyotl yejhuan quitemaca nemilistli. On cojtlaquijlyotl majtlactli huan ome tlaquiyaj ipan cada xipan. Cada metztli tlaquiyaj. Niman ixojoyo quitequitiltiayaj quen pajtli para ica nopajtiayaj on países. ³ Ipan on hueyican xonyas castigo pampa xoc yacaj tlajtlacos. Ihueyixtacaj trono Dios onyas ne ipan on hueyican niman on Borreguito no ompa nemis. Ompa on itequitcahan quimahuistilisquej. ⁴ Yejhamej quitasquej ixayactzin niman quintlalilisquej ipan inmixcuateu itocatzin Dios. ⁵ Ompa xoc queman tlayohuas, niman on yejhuan ompa chantisquej xquitequitiltisquej itlahuil on lámparas noso itlahuil on tonatzintli, pampa on toTeco Dios quintlahuilhuis. Niman yejhamej para nochipa tlamandarosquej quen reyes.

Ye nisiu para huajlas Jesucristo

⁶ Quemaj on ilhuicactequitquetl† onechijlij:

—In tlajtoltin yejhua tlen melahuac niman huelis nochimej quinelto-casquej. Niman toTeco Dios, yejhuan quintlamachilstia‡ on tiotlajtojquej, ocuajtitlan iilhuicactequitcau para oquintitij itequitcahan on tlen saniman nochihuas.

⁷ Quemaj Jesús onechijlij:

—¡Saniman ocsejpa nihuajlas! Sanoyej§ tlatiochiutli yes on yejhuan quitlamatis in temachtijli yejhuan tlajcuilolnesticaj ipan in tlajcuilolamatl yejhuan techitia on tlen nochihuas.

⁸ Nejhua, Juan, onicac niman oniquitac nochí in tlajtlamach*. Ijcuac yoniac niman yoniquitac, oninotlacuenquetz icxitlan on ilhuicactequitquetl yejhuan onechititij on tlajtlamach para nicmahuistilisquia. ⁹ Pero yejhua onechijlij:

* ^{22:1} ángel: Angeles tequitij ne ilhuicac niman nican ipan in tlalticpactli. † ^{22:6} ángel ‡ ^{22:6} les inspira § ^{22:7} muy * ^{22:8} cosas

—Ma ca ijcon xchihua. Nejhua, tej, san niitequichihuiliijcau Dios, sa no ijqui quen tejhua, niman mocnihuan on tiotlajtojquej niman nochimej on yejhuan quitlacamatij on tlen tlajcuilolnesticaj ipan in tlajcuilolamatl. Tejhua san Dios xmahuistili.

¹⁰ Quemaj ocsejpa onechijlij:

—Ma ca xquiyana in temachtijli yejhuan ipan in tlajcuilolamatl nesticaj pampa ye nisiu huajlau on tonaltin para nochihuas nochi in tlajtlamach.

¹¹ Tla se tlacatl quichihua on tlen xcuajli, masqui oc† ma quichijtiu. Niman on yejhuan quichihua on tlen quijtlacohua ixpan Dios, masqui oc ma quichijtiu. Pero nonequi, tej, para on yejhuan quichihua cuajli ma quichijtiu on tlen cuajli, niman on yejhuan yolchipahuac ijcon ma yolchipajtiu nochipa.

¹² Quemaj Jesús onechijlij:

—Saniman ocsejpa nihuajlas, niman niciuajquis on tlaxtlahuijli. Niman cada se nicmacas quen quitocarohua ipampa on tlen oquichiu. ¹³ Nejhua niachtoj niman nisa ica noch de noch i on tlajtlamach. Nejhua nitlatzimpehuajli niman sa nitlatlajtlamijli no ijqui quen on abecedario pehua ican on letra A niman ontlami ican on letra Z.

¹⁴ Sanoyej tlatiochijtiyesquej on yejhuan quichipahuaj intlaquen para huelis cuasquej on tlen quitlaquitia on cojtlaquijlyotl yejhuan quitemaca nemilistli, niman huelis calaquisquej ipan on tlatzacuilyotl‡ ne ipan on hueyican. ¹⁵ Pero nocahuasquej quiahuac on xompaye yehuamej quen chichimej, on nanahaultin, on yejhuan ahuinemij, on temictianimej, on yejhuan quinmahuistiliaj on tlamachijchijhualti intajtzitzihuan niman nochimej on yejhuan quinejnequij caquij on tlen xmelahuac niman tlacajcayahua.

¹⁶ Niman Jesús oquijtoj:

—Nejhua, Jesús, onictitlan noilhuicactequitcau para noch i in tlajtlamach quipantlantis intzajlan nochimej on tlaneltoaquej ne ipan on tiopantin. Nejhua niquisticaj niman nihuejca tixhuiu§ itech rey David, niman nejhua nipetlanqui quen on sitlalin yejhuan cualcan huajquisa.

¹⁷ On Espíritu Santo niman isihuau on Borreguito ijquin quijtohuaj:

—Xhuajla.

Niman on yejhuan caquis, no ma quipto:

—Xhuajla.

Niman on yejhuan amiqui, ma huajla. Niman yejhuan quinequi, ma coni on atl yejhuan tetlayocolijli niman yejhuan quitemaca nemilistli.

¹⁸ Nemechtachicahuilia nenmochimej yejhuan nenquicaquij itemachtil Dios yejhuan ipan in tlajcuilolamatl nesticaj: tla yacaj quimiyequilis in tlajtlamach, Dios quimiyequilis on plagas yejhuan ye tlajcuiloloncaj ipan in tlajcuilolamatl. ¹⁹ Niman tla yacaj quipopoloahuilis itemachtil Dios yejhuan tlajcuiloloncaj ipan in tlajcuilolamatl, Dios quipopoloahuilis itoca ipan on tlajcuilolamatl yejhuan oncaj ne ilhuicac campa quijtohua aquinon quipia on nemilistli para nochipa, niman xcahuilis calaquis ipan on yejyejticaj hueyican. On tlajcuilolamatl yejhuan oncaj ne ilhuicac niman on yejyejticaj hueyican tlajcuiloloncaj ipan in tlajcuilolamatl.

²⁰ On yejhuan quipantlantia yejhua in, ijquin quijtohuaj:

—Quemaj, saniman ocsejpa nihuajlas.

Ma ijqui nochihua. ¡Xhuajla toTeco Jesús!

²¹ Ma toTeco Jesucristo mechtiochihua nenmochimej nemejhuamej. Ma ijqui nochihua.

† 22:11 todavía; sanquen ‡ 22:14 puerta § 22:16 descendiente